


Nan kalen apo Dios  
(Nan fiarú ay turag)



New Testament in Bontok, Eastern

# Nan kalen apo Dios (Nan fiarú ay turag)

## New Testament in Bontok, Eastern

copyright © 2003 Wycliffe Bible Translators, Inc.

Language: Eastern Bontok (Bontok, Eastern)

Translation by: Wycliffe Bible Translators, Inc.

### Copyright Information

© 2003, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### The New Testament

in Bontok, Eastern

© 2003, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

---

PDF generated using Haiola and XeLaTeX on 11 Nov 2022 from source files dated 29 Jan 2022

1f1c8958-216d-51a9-a716-070579cb1c49

## Contents

Mateo . . . . .	1
Marcos . . . . .	66
Lucas . . . . .	106
Juan . . . . .	170
Aramid . . . . .	218
Roma . . . . .	278
1 Corinto . . . . .	310
2 Corinto . . . . .	338
Galacia . . . . .	357
Efeso . . . . .	368
Filipos . . . . .	379
Colosas . . . . .	387
1 Tesalonica . . . . .	395
2 Tesalonica . . . . .	402
1 Timoteo . . . . .	406
2 Timoteo . . . . .	415
Tito . . . . .	421
Filemon . . . . .	425
Hebreo . . . . .	427
Santiago . . . . .	449
1 Pedro. . . . .	457
2 Pedro . . . . .	466
1 Juan . . . . .	472
2 Juan . . . . .	480
3 Juan . . . . .	482
JUDAS . . . . .	484
Paltiing . . . . .	487

## **Nan Ammay Ay Chamag Ay Insurat Mateo Nan Omona Ay Ammuwun**

Nan nangisurat as nan nauy Ammay ay Chamag at hi Mateo ay makali us un Levi ay ifian Santiago ay potot Alfeo (Mar. 2:14; 3:18). Úray mu naifilang hi Mateo as fumafiasor kiapú ta usa hiya ay Judio ay chinutokan nan chiyucha i-Roma as usa ay mangam-among as fiaror, enayakian challu Jesus hiya as usa as nan disipulusna (Mt. 9:9; Mar. 2:14; Luc. 15:27), ya nakekan pay hi Jesus kan hiya (Mt. 9:10).

Insurat Mateo nan nauy Ammay ay Chamag, tay laychuna ay epakaammu fiakun yangkiay as nan chiyucha Judio ngem uray us as nan am-in ay tataku ay hi Jesus nan Cristo winnu Mesias ay nan Omesarakan ay finaor Apo Dios asna's luta ta matongpar nan enkarina as nan Turag ad Pus-uy.

Laychuna ay epakaammu ay hi Jesus nan tit-iwa ay Aren chi Judio, isunga nafukig nan kali ay “Aren chi Judio” as 2:2; 27:11, 29, 37. Enpakaammuna ay hi Jesus at nurpu as nan kianak Ari David, isunga namen ongorna insurat nan kali ay “Kianak Ari David” as pang-awag kan Jesus (1:1; 9:27; 12:23; 15:22; 20:30,31; 21:9,15; 22:42).

Laychuna ay epakaammu ay hi Jesus nan kangatuwan ay misturu ay finaor Apo Dios. Isunga wachay kalibfengan Jesus ay mangelawlawag as nan lintig Apo Dios ya mangisuru as nan maepangkép as nan muntorayan Apo Dios.

Nan ongor ay isursuron Jesus at napasigcha as lema: 1) Nan enkasabana henan chuntug ay maepangkép as nan libfengun, ukiali ya gun-gunan nan tataku ay maetapi henan muntorayan Apo Dios (5:1-7:27). 2) Nan nangisursuruan Jesus as nan disipulusna as nan uycha nun-ekaskasabaan (10:5-42). 3) Nan chiyucha maepadpachongan nan muntorayan Apo Dios (13:3-52). 4) Nan ukiali ya libfengun nan chiyucha disipulusna (18:3-35). 5) Nan ommatan nan munpatingkiaan nan luta ya nan munfiangchan Cristo ay muntoray (24:4-25:46). Ngem sakbay ommat na, kenalen Jesus un masapor maekasaba nan Ammay ay Chamag as nan am-in ay tataku asna's luta (Mt. 24:14).

Ongor chi naisurat as nan nauy ay liblu, ya as na yangkiay nan kawadancha ay kaman as nan chiyucha mangili ay nurpu as nan fomofoknakian nan urkiw (2:1-2), nan nanaranan Pedro henan fiayfiay (14:24-27), nan naoran nan fiaror as nan tapak nan nafunweten (17:27), nan enmammayan nan chuwa ay nafurag (20:29-34), nan maepadpachongan nan mun-um-uma (20:1-16), nan chuwa ay an-ak (21:28-30), ya nan hinpuru ay fiafiarasang (25:1-13).

### **Nan Nakudkudwaan Nan Nauy Liblu**

Nan Kaap-uwan Jesu Cristo Ya Nan Naiyankana 1:1-2:23

Nan Nun-is-isuruwan Juan Ay Fumufunyag 3:1-12

Nan Nafunyakianan Ya Nachistingan Jesus 3:13-4:11

Nan Nun-is-isuruwan Jesus Ad Galilea 4:12-18:35

Nan Nun-is-isuruwan Jesus Ad Jerusalem 19:1-20:34

Nan Anongos Ay Chumingkon Jesus Ya Nan Natuyana 21:1-27:66

Nan Natakuwan Jesus Manipud As Nan Utúy Ya Nan Nunpail-ana 28:1-20

*Nan Kaap-uwan Jesu Cristo  
(Luc. 3:23-38)*

<sup>1</sup> Hiyana nan lestaan nan kaap-uwan Jesu Cristo ay kianak David, ya hi David at kianak Abraham. <sup>2</sup> Hi Abraham at aman Isaac. Hi Isaac at aman Jacob. Hi Jacob at aman cha Juda ay hen-anag-i. <sup>3</sup> Hi Juda at aman cha Fares kan Zara, ya nan enacha at hi Tamar. Hi Fares at aman Esrom. Hi Esrom at aman Aram.\* <sup>4</sup> Hi Aram at aman Aminadab. Hi Aminadab at aman Naason. Hi Naason at aman Salmon. <sup>5</sup> Hi Salmon at aman Boaz, ya nan enan Boaz at hi Rahab. Hi Boaz at aman Obed, ya nan enan Obed at hi Ruth. Hi Obed at aman Jesse. <sup>6</sup> Hi Jesse at aman Ari David.

Hi David at aman Solomon, ya nan enan Solomon at sikud ay asawan Urias.<sup>†</sup> <sup>7</sup> Hi Solomon at aman Roboam. Hi Roboam at aman Abias. Hi Abias at aman Asa. <sup>8</sup> Hi Asa at aman Josafat. Hi Josafat at aman Joram. Hi Joram at aman Ozias.<sup>‡</sup> <sup>9</sup> Hi Ozias at aman Joatam. Hi Joatam at aman Acasz. Hi Acasz at aman Ezekias. <sup>10</sup> Hi Ezekias at aman Manases. Hi Manases at aman Amon. Hi Amon at aman Josias. <sup>11</sup> Hi Josias at aman cha Jeconias ay hen-anag-i. Enpototna chicha as nan timpu ay naiyuyan nan chiyuycha kianak Israel ad Babilonia.<sup>§</sup>

<sup>12</sup> Kuncha pay wacha ad Babilonia, enpotot Jeconias hi Salatiel. Hi Salatiel at aman Zorobabel.\* <sup>13</sup> Hi Zorobabel at aman Abiud. Hi Abiud at aman Eliakim. Hi Eliakim at aman Azor. <sup>14</sup> Hi Azor at aman Sadoc. Hi Sadoc at aman Akim. Hi Akim at aman Eliud. <sup>15</sup> Hi Eliud at aman Eleazar. Hi Eleazar at aman Matan. Hi Matan at aman Jacob. <sup>16</sup> Hi Jacob at aman Jose. Hi Jose at asawan Maria ay enan Jesus, ya hi Jesus nan makali un Cristo.

<sup>17</sup> Isunga, hinpuru ya opat am-in nan kaap-uwan Jesus manipud kan Abraham inkiana kan David. Hinpuru ya opat us ay kaap-uwan manipud kan David inkiana as nan naiyuyan nan chiyuycha kianak Israel ad Babilonia. Wacha us chi hinpuru ya opat ay kaap-uwan manipud as nan naiyuyan nan chiyuycha kianak Israel ad Babilonia inkiana as nán naiyankan Cristo.

*Nan Naiyankan Jesu Cristo  
(Luc. 2:1-7)*

<sup>18</sup> Hiyana nan kaap-apatan nan naiyankan Jesu Cristo. Hi Maria ay enana at naetfor kan Jose. Ngem sakbay nunteponcha, naammuwan at ay masikug hi Maria babaen as nan pannakafialin nan Espiritu Santo.<sup>†</sup> <sup>19</sup> Kiapúta nalintig ay taku hi Jose ay asawana, ya achina laychun ay ifiafialin hi Maria as nan sangwanan nan tataku, ninumnumna ay iyichangna hiya ay achi maam-ammuwan nan tataku. <sup>20</sup> As nan chana mangnumnumnuman as na, nunpaila babaen as nan iitawna nan anghel nan Apo. Kenalen nan anghel, “Jose ay kianak David, achika umugyat ay mangetepon kan Maria, tay nan nasikukianana at babaen as nan pannakafialin nan Espiritu Santo. <sup>21</sup> Iyanaknantu nan laraki, ya ngadnam as Jesus, tay hiya nan mangesarakantu as nan tatakuna as nan fiasfisorcha.”

<sup>22</sup> Enommat am-in chaná ta matongpar nan enpaifiakian Apo Dios as nan usa ay pomapadtu ay kanana, <sup>23</sup> “Munsikugtu nan usa ay fiasasang ay maid laraki as nakiskissuy kan hiya. Iyanaknantu nan usa ay laraki ay

\* **1:3** Gen. 38:29-30   † **1:6** 2 Sam. 11   ‡ **1:8** 1 Cro. 3:11-12   § **1:11** 2 Ar. 24:8-16; 1 Cro. 10:16

\* **1:12** Ezr. 3:2   † **1:18** Nan iniili ay ukialen chi Judio at mu wachay naetfor, naifilangcha at as hen-asawa uray chaancha pay nuntepon. Mu achi laychun nan laraki ay ituruy, masapor mun-amma hiya as kasuratan nan mun-ichangancha ay wachay chiwa ay tistigu.

mangadnantu as Immanuel.”‡ (Nan laychun nan Immanuel ay kanan at “Wacha hi Apo Dios kan chitaku.”)

<sup>24</sup> Kun pay finmangun hi Jose, enatna nan infiakian nan anghel nan Apo, at entepona hi Maria. <sup>25</sup> Ngem chaan nakiskissuy kan Maria inkiana inyanakna nan mutun ay laraki. As nan hiyachi, ngenadnan Jose nan mutun as Jesus.

## 2

### *Nan Chiyuycha Mangili Ay Uy Nangila Kan Jesus*

<sup>1</sup> Naiyanak hi Jesus henan ili ay Betlehem henan probinsiya ay Judea as nan timpon Ari Herodes. Kun pay chaan nafiyag, wachacha nan inmuy ad Jerusalem ay nurpu henan tukutukún ay luglukiar as apét fomokfoknakian nan urkiw. Chicha nan mamasilib ay lanaraki ay mangad-achar as maepangkep as taraw. <sup>2</sup> Kuncha pay inumchan hid-i, senarudsudcha, “Ay chaud nan kaiyan-anak ay aren chi Judio? Tay inilami met nan fenmoknakian nan taraw ay sinyar nan naiyankana, at enmali kami ay munchayaw kan hiya.”

<sup>3</sup> Kun pay nachamag Ari Herodes nan infiakiacha, nalilifokan hiya as makasolet,\* ya kaman us as nan am-in ay tataku ad Jerusalem. <sup>4</sup> Isunga enpaayagna nan am-in ay ap-apon chi papachi ya mun-isursuru as Lintig, at ensarochachakchakna kan chicha mu ay chaud nan maiyankantu nan Cristo. <sup>5</sup> Tinumforcha kan hiya, “Ad Judea henan ili ay Betlehem, tay hiyana nan insurat nan pomapadtu ay kanana un,

<sup>6</sup> ‘Chakayu ay tataku ad Betlehem henan lutan Juda, figfikun chakayu henan am-in ay ili ad Juda, tay chakayu nan murpuwan nan usa ay muntoray ay mangaywan as nan tatakok ay kianak Israel.’ †

<sup>7</sup> Angkiay ya enpaayag Herodes nan chiyuycha mamasilib ay lanaraki ay chidchichia yangkiay, at naammuwana kan chicha nan ustu ay uras ay nunpail-an nan taraw. <sup>8</sup> Kuna pay infiaor chicha ad Betlehem, inflina, “Umuy kayu’s chi, ya emamadyu man ay manganap as nan onga. As nan manguchananyu, epakaammuyu kan ha-un ta uyaktu us munchayaw kan hiya.”

<sup>9-10</sup> Kuncha pay chinngor nan kenalen nan ari, nunligwatcha. As nan chacha manarcharanan, inilacha kasin nan chiyuy taraw ay inilacha as nan kawad-ancha pay laing henan fomokfoknakian nan urkiw. Naragsakancha as solet as nan nangil-ancha as nan taraw. Nan chiyuy taraw at empanguna chicha inkiana naitungor as nan kawad-an nan onga. <sup>11</sup> Kuncha pay sinungkop as nan afong ya inilacha nan onga ya hi Maria ay enana, nunpalintumangcha ay nunchaychayaw as nan onga. Tenkafiancha nan nangiitwuancha as nan nunkangina ay ichatcha ay fialetok, insenso ya mirra.‡

<sup>12</sup> Angkiay ya as nan kenmatamancha henan lukiarcha, tukún nan inuya-chi kiapú ta enpaiitaw Apo Dios kan chicha ay achicha munfiangad kan Herodes.

### *Nan Lenmayawan Cha Jose Ay Hinfiaruy Ad Egipto*

---

‡ 1:23 Isa. 7:14 \* 2:3 Hi Herodes at fiakun Judio. Ngem uray hiya nan mangetortoray as nan chiyuycha Judio, achina laychun ay wachay manubrat kan hiya. † 2:6 Mik. 5:2 ‡ 2:11 Nan insenso ay maara as nan kaiw at munfiangu mu mapuoran. Nan mirra at usa us ay nafiangu ay lana ay maara as nan kaiw. Nangina chaná ya maifiakiay ay maichat as nan ari.

<sup>13</sup> Kun pay nak-ak nan chiyuycha mamasilib ay lanaraki, nunpaila nan anghel nan Apo kan Jose babaen as nan iitawna. Kenalen nan anghel, "Fumangunka. Etakinmu nan hen-ena ya lomayaw kayu ay umuy ad Egipto.<sup>§</sup> Mayaschi kayu inkiana ifiakiak ay mak-ak kayu, tay epaanap Herodes nan onga ta patayuna."

<sup>14</sup> Hiya at chi ya finmangun hi Jose. Entakina nan hen-ena, ya nunlig-watcha ay inmuy ad Egipto as nan hiyachi ay lafi. <sup>15</sup> Nakiilicha hid-i inkiana natuy hi Herodes. Enommat am-in chaná ta matongpar nan enpaifiakian nan Apo as nan pomapadtu ay kanana, "Enayakiak nan anakku ta mak-ak ad Egipto."<sup>\*</sup>

### *Nan Nangepapatuyan Herodes As Nan Ongong-a*

<sup>16</sup> Kun pay naammuwан Herodes ay insikapan nan chiyuycha mamasilib ay lanaraki hiya, ongor chi fungatna. Isunga infilina ay maepapatuy nan am-in ay lallaraki ay mutun inkiana as nan anongong-a ay muntawwun as chwuwa ad Betlehem ya henan am-in ay sakopuna. Enatna na ay maiyunud as nan timpu ay nangammuwana as nan naiyankan nan mutun as nan chiyuycha mamasilib ay lanaraki.

<sup>17</sup> Hiyana nan natongparan nan kenalen Jeremias ay pomapadtu ad pus-uy ay kanana,

<sup>18</sup> "Nadngor nan pararu ay tangugngug ya akorcha ad Rama. Cha ag-akiaran Raquel nan an-akna. Achina laychun ay maliwliwa, tay natuycha am-in."<sup>†</sup>

### *Nan Nak-akan Cha Jose Ad Egipto*

<sup>19</sup> Kun pay natuy hi Ari Herodes, nunpaila nan anghel nan Apo kan Jose ad Egipto babaen as nan iitawna. <sup>20</sup> Kenalen nan anghel, "Fumangunka, etakinmu nan hen-ena, ya komatam kayu ad Israel, tay natuycha nan chiyuycha nanglarayad ay mangpatuy as nan onga." <sup>21</sup> As nan hiyachi, finmangun hi Jose, entakina nan hen-ena, ya kenmatamcha ad Israel.

<sup>22</sup> Ngem kun pay nachamag Jose ay hi Arkelao nan naisubrat kan Herodes ay amana ay muntoray ad Judea, inmugyat hiya ay umuy hid-i. Kiapú ta finag-an Apo Dios babaen as nan iitawna, nunligwatcha ay umuy henan probinsiya ay Galilea. <sup>23</sup> Hid-i ad Galilea, inmilicha henan ili ay makali un Nazaret. Enommat na ta matongpar nan kenalen nan chiyuycha pomapadtu un, "Makalintu hiya ay Nazareno."

## 3

### *Nan Nun-ekaskasabaan Juan Ay Fumufunyag (Mar. 1:1-8; Luc. 3:1-18; Jn. 1:19-28)*

<sup>1</sup> As nan timpu ay nanagyangan cha Jesus ad Nazaret, uy nun-ekaskasaba hi Juan ay Fumufunyag as nan chiyuycha tataku ay uy nunchungchungor kan hiya henan disyerto ad Judea. <sup>2</sup> Kenalina kan chicha, "Munfiafiawi kayu as nan fiasfiasoryu, tay kiayud umchan nan muntorayan Apo Dios."<sup>\*</sup> <sup>3</sup> Hi Juan ay anna nan infiakian Isaias ay pomapadtu ad pus-uy ay kanana,

---

§ **2:13** Egipto at achawwi ad Judea, ya fiakun sakop nan mun-aariyan Herodes. \* **2:15** Ose. **11:1** † **2:18** Jer. 31:15. Hi Raquel (Gen. 35:16-19) at maepachong as nan en-a ad Betlehem. Nan tatangugngug ya ag-akor at as-op henan nailubkan Raquel. \* **3:2** As nan kali ay Griego at kanana, "nan muntorayan nan chaya".

“Wacha nan taku henan disyerto ay cha mangifugfukiaw un, ‘Esakianayu  
nan ayun nan Apo. Munlutkunyu nan ayuna.’ ”†

<sup>4</sup> Nan fiachon Juan at naamma as chotchot chi kamilyu. Nan sinturuna at larat, ya nan kanuna at chuchun ya chilu. <sup>5</sup> Uray mu assena hiya, in-inmuy kan hiya nan ongoongor ay tataku ay nurpu ad Jerusalem, henan intiru ay probinsiya ay Judea, ya as nan am-in ay naesasag-un henan wawwang ay Jordan. <sup>6</sup> Nunfiafiawicha as nan fiasfiasorcha, at finunyakian Juan chicha henan wawwang ay Jordan.

<sup>7</sup> Kun pay inilan Juan nan ongor ay Fariseo ya Saduseo‡ ay cha omali ay munpafunyag, kenalina kan chicha, “Hoy! Chakayu ay kaman an-ak chi kubra! Anan mangali kan chakayu ay malisiyanyu nan omali ay ichusan Apo Dios mu mafunyakian kayu? <sup>8</sup> Masapor atunyu nan mangepaila ay titiwa ay nunfiafiawi kayu as nan fiasfiasoryu. <sup>9</sup> Achiyu kankanan as achoryu un, ‘Achi chakami challu chusaun kan Apo Dios, tay hi Abraham nan kaap-uwanmi.’ Tay ifiakiak kan chakayu ay uray nan nauycha fiatu at mafalin ay munfialinun Apo Dios as kiankianak Abraham! <sup>10</sup> Nan ichusan Apo Dios at kaman as nan wasay ay naesasakiana ay manipor as kaiw. Am-in ay kaiw ay achi fumkias as ammay at maesalepooncha ay masipor, ya maichus-orcha as nan apuy.”

<sup>11</sup> Inturuy Juan, “Funyakiak chakayu as chanum ay mangepaila ay nunfiafiawi kayu at. Ngem nan cha umunud kan ha-un at am-amud mu ha-un. Achiyak paat maekari ay mangchun as sapatosna.§ Hiya nan mangfunyag kan chakayu as Espiritu Santo ya apuy. <sup>12</sup> Maepadpachong hiya as nan taku ay nanangchun as ligkia ay osaruna ay manapa as nan finayu. Nan natap-an at ittunantu as nan mangit-ittuwan. Ngem nan chuki at ipuornantu as nan apuy ay achi mapappauy.”

### *Nan Nunpafunyakian Jesus (Mar. 1:9-11; Luc. 3:21-22)*

<sup>13</sup> As nan timpu ay nunfunfunyakian Juan, inumchan hi Jesus ay nurpu ad Galilea ta uy munpafunyag kan Juan henan wawwang ay Jordan. <sup>14</sup> Ngem penachas Juan ay mamas-iw kan hiya as nan nangaliyana, “Apo, ha-un met koma nan munpafunyag kan he-a. Sungang t'uy he-a nan omali ay munpafunyag kan ha-un?”

<sup>15</sup> Ngem tinumfor hi Jesus, “Ayu at! Atum na ad wani, tay masapor tongparunta nan am-in ay laychun Apo Dios.” Isunga inyafud Juan.

<sup>16</sup> Kun pay nafunyakian hi Jesus, hiya at chi ya tenmakchang hiya as nan chanum. As nan hiyachi, natkafian ad chaya, ya inilana nan Espiriton Apo Dios ay kaman karopati ay cha komksop inkiana penmatang kan hiya.\*

<sup>17</sup> Wacha us nan kali ay nurpu ad chaya ay kanana, “Hi tona nan anakku ay laylaychok. Hiya nan mangepalaylayad kan ha-un.”

## 4

### *Nan Nanistingan Satanas Kan Jesus (Mar. 1:12-13; Luc. 4:1-13)*

† 3:3 Isa. 40:3 ‡ 3:7 Ara. 23:8. Nan maepangkep as nan chiyucha Fariseo ya nan Saduseo at maila as nan glosario. § 3:11 As nan iniili ay ukialen nan chiyucha Judio, nan chiyucha fiabfiaaruncha nan mangakkaan as nan sapatos nan fiaknang. \* 3:16 Jn. 1:31-34

<sup>1</sup> Kun pay narpas ay nafunyakian hi Jesus, enpangon nan Espiritu Santo hiya henan disyerto ta chistingun Satanas. <sup>2</sup> Kun pay inmuy chi opat puru ay urkiw ya lafi ay nun-ay-ayunaran Jesus, nunchukiaang hiya. <sup>3</sup> Angkiay ya inmuy hi Satanas kan hiya, ya kanana, “Mu tit-iwa ay anak chaka kan Apo Dios, filinum nan nauycha fiatu ta munfialinchu as tenapay.” <sup>4</sup> Ngem tinumfor hi Jesus, “*Nan naisurat as nan Kalen Apo Dios at kanana un, ‘Fiakun yangkiay makan nan pagfiyat nan taku, ngem masaporcha challu nan am-in ay ifiagfiakian Apo Dios.’*”\*

<sup>5</sup> Angkiay ya inyuy Satanas hi Jesus henan nasantowan ay siyudad, ya empatakchugna hiya as nan kangatuwan ay parten nan Templo. <sup>6</sup> Kenalina kan hiya, “Mu tit-iwa ay Anak chaká kan Apo Dios, ud-a pay omagkiangka inkiana as kuwabna, tay kanan met nan naisurat as nan Kalen Apo Dios un, ‘Filinum Apo Dios nan anghelesna ay mangaywan kan he-a. Tatag-uyun chakantu kan chicha as nan limacha ta achi maepakpak nan sukem as nan fiatu.’”†

<sup>7</sup> Tinumfor hi Jesus, “*Wacha met us nan naisurat as nan Kalen Apo Dios ay kanana un, ‘Achim chischistingun nan Apo ay Diosmu.’*”‡

<sup>8</sup> Kun pay narpas chi, inyuy Satanas hi Jesus henan usa ay nangatungatu ay chuntug. Enpailana kan Jesus nan am-in ay muntorayan asna's luta ya nan kaichawayawacha. <sup>9</sup> Kenalen Satanas, “Ichatkuntu am-in chaná kan he-a mu munpalintumangka ay munchayaw kan ha-un.”

<sup>10</sup> Ngem tinumfor hi Jesus kan hiya, “*Mak-akka Satanas! Nan naisurat met as nan Kalen Apo Dios at kanana un, ‘Chayawum nan Apo ay Diosmu, ya kan hiya yangkiay nan munserfiyam.’*”§

<sup>11</sup> Haat taynan Satanas hiya. As nan hiyachi, emmalicha nan angheles ay uy nangfiachang kan hiya.

#### *Nan Nangelapuan Jesus Ay Nun-ekasaba (Mar. 1:14-15; Luc. 4:14-15)*

<sup>12</sup> Kun pay nachamag Jesus ay naifiarud hi Juan ay Fumufunyag, nunfiangad hiya henan probinsiya ay Galilea.\* <sup>13</sup> As nan kawad-ana henan probinsiya ay Galilea, chaan nakiili ad Nazaret, ngem kun at uy nakiili ad Capernaum. Nan ili ay Capernaum at wacha henan olet nan fiayfiay ay Galilea ya henan lutan us nan chiyuchya kianak Zabulon ya Neftali.† <sup>14</sup> Nakiili hiya ad Capernaum ta matongpar nan kenalan Isaias ay pomapadtu ad pus-uy, <sup>15</sup> “Ad Galilea, henan lutan Zabulon ya henan lutan Neftali as nan charan ay umuy henan fiayfiay, ya chuchumangun nan wawwang ay Jordan, hid-i nan nakiiliyan nan ongoongor ay Gentil.‡

<sup>16</sup> Nan tataku hid-i at kamancha natataku as nan kawad-an nan ngongot ya as nan kawad-an nan nunkatuy. Ngem ad wani at ilauncha nan narawag ay silaw, tay emali as nan kawad-ancha nan manilaw as numnumcha.”§

<sup>17</sup> Nunlapu as nan hana ay timpu, enlapon Jesus ay nun-ekaskasaba. Kenarkalina, “*Munfiafiawi kayu as nan fiasfiasoryu, tay kiayud umchan nan muntorayan Apo Dios.*”

\* **4:4** Deut. 8:3   † **4:6** Sal. 91:11-12   ‡ **4:7** Deut. 6:16   § **4:10** Deut. 6:13; 10:20   \* **4:12** Mat.

14:3-5; Mar. 6:14-29   † **4:13** Cha Zabulon kan Neftali nan chuwa as nan potot Jacob ad pus-uy. Luc. 5:1; Jn. 6:1; 21:1   ‡ **4:15** winnu ‘fiakun Judio’.   § **4:16** Isa. 9:1-2; Luc. 1:79

*Nan Nangayakian Jesus As Nan Enmon-oná Ay Disipulusna  
(Mar. 1:16-20; Luc. 5:1-11)*

<sup>18</sup> As nan usa ay urkiw ay cha manarcharanan Jesus henan olet nan fiayfiay ay Galilea, inilana nan hen-aki ay cha manafukor, tay hiyasa nan chunucha. Chicha cha Simon ay makali us un Pedro, ya hi Andres ay ifiana. <sup>19</sup> Kenalina kan chicha, “*Unuchunak, at isurok chakayu ay munfalin as kaman tomatafukor as tataku.*” <sup>20</sup> Hiya at chi ya tenaynancha nan chiyuycha tafukorcha, ya inmunudcha kan hiya.

<sup>21</sup> Kuncha pay inturturuy ay manaran, inilan Jesus nan tukún ay hen-aki ay cha Santiago kan Juan ay potot Zebedeo. Nakilurukiancha kan amacha ay hi Zebedeo as nan fiangka, ya chacha esakiana nan tafukorcha. As nan hiyachi, enayakian Jesus chicha. <sup>22</sup> Hiya at chi ya tenaynancha nan fiangkacha ya hi amacha, ya inmunudcha kan Jesus.

*Nan Nun-is-isuruwan, Nun-ekaskasabaan Ya Nan Nunkakkaanan Jesus As Saket  
(Luc. 6:17-19)*

<sup>23</sup> Nunliklikud hi Jesus henan intiru ay probinsiya ay Galilea. Nun-is-isuruhiya as nan chiyuycha senagogacha, ya enkaskasabana nan Ammay ay Chamag maepangkep henan muntorayan Apo Dios. Kenaana us nan am-in ay karasen chi saketcha ya iliwas chi achorcha. <sup>24</sup> Isunga naepachamag nan maepangkep kan hiya henan intiru ay Siria. Nan tataku at inyuycha kan hiya nan am-in ay nunsaket as tukutukún ay saket, nan naparparalikiatan, nan nunkaanennetan, nan nunkorchas ya nan nunkapilay, ya enpaammay Jesus chicha am-in. <sup>25</sup> Kiapú ta assena, inmunud kan hiya nan ongoongor ay tataku ay nurpu ad Galilea, nan Hinpuru ay Siyudad, Judea, Jerusalem ya henan usa ay chumang nan wawwang ay Jordan.

## 5

*Nan Kanan Jesus Ay Nakiasat Ya Kasusug-ang  
(Luc. 6:20-26)*

<sup>1</sup> As nan nangil-an Jesus as nan ongoongor ay tataku, tinmikid henan usa ay chuntug. Kuna pay entokor, enmali nan disipulusna kan hiya, <sup>2</sup> ya erlapuna ay nun-isuru kan chicha,

<sup>3</sup> “*Nakiasat nan chiyuycha mamigfig as nan kenakurang chi kafiaelan-cha ay mangekaman as nan laychun Apo Dios, tay maetapichantu as nan muntorayana.*

<sup>4</sup> “*Nakiasat nan chiyuycha ngumunguyus kiapiú as fiasor, tay liwliwaantu Apo Dios chicha.*

<sup>5</sup> “*Nakiasat nan chiyuycha napakumbaba, tay tawichunchantu nan luta ay enkaren Apo Dios kan chicha.\**

<sup>6</sup> “*Nakiasat nan chiyuycha kaman cha munchukiaang ya masketan ay chicha nan munlarayad ay mangekaman as nan laychun Apo Dios, tay map-nekchantu.*

<sup>7</sup> “*Nakiasat nan chiyuycha manug-ang as pachongcha ay taku, tay sug-angantu Apo Dios chicha.*

<sup>8</sup> “*Nakiasat nan chiyuycha nacharos chi numnumcha, tay ilauchantu hi Apo Dios.†*

\* <sup>5:5</sup> Sal. 37:11    † <sup>5:8</sup> Sal. 24:1-6

<sup>9</sup> “Nakiasat nan chiyuycha mangepakappia as nan pachongcha ay taku, tay ifilangtu Apo Dios chicha as an-akna.

<sup>10</sup> “Nakiasat nan chiyuycha cha maparpalikiat kiapú as nan chacha mangekamakanan as nan laychun Apo Dios, tay maetapichantu henan muntorayana.

<sup>11</sup> “Nakiasat kayu as nan mangsotan ya mamalikiatan nan tataku kan chakayu, ya ekaliyan chakayu as kumpurni ay mangotettet kiapú kan ha-un.

<sup>12</sup> Kun kayu at murlagragasaka ya murlaylayad, tay ongoongor nan gun-gunayu ad chaya. Tay assesa us nan en-enatcha ay namarpalikiat as nan chiyuycha pomapadtu ay enmon-onu mu chakayu.”

### Nan Maepadpachongan Maepangkep As Nan Asin Ya Pingki

(Mar. 4:21-25; 9:49-50; Luc. 8:16-18; 14:34-35)

<sup>13</sup> Inturuy Jesus, “Chakayu nan maepachong as nan asin ay para as nan am-in ay tataku asna's luta. Ngem mu chakus at nakaan nan tamtam nan asin, achi poros kasin omasin. Maid at kotokna, kun at maiwagkia ya maikiatiatin.<sup>‡</sup>

<sup>14</sup> “Maepachong kayu as nan silaw ay manilaw as numnum nan tataku asna's luta. Nan siyudad ay wacha henan toktok nan chuntug at achi poros malinglingfian. <sup>15</sup> Maid mamaskud as pingki ya op-opana as fianga, ngem kuna at epatang as nan maepatpatngana, at silawan nan pingki nan am-in ay wacha as nan afong. <sup>16</sup> Assesa us ay masapor sumilaw kayu as nan mangiilan nan tataku ta mailacha nan ammay ay chayu at-atun, ya ichaychayawcha hi Amayu ad chaya.”

### Nan Maepangkep As Nan Lintig Moises

<sup>17</sup> Kenalen pay Jesus, “Achiyu kanan un emmaliyak ay manachael as nan Lintig Moises ya nan insurat nan chiyuycha pomapadtu. Chaanak emmali ay manachael as nan hanacha, ngem kunak at emmali ay mangtongpar as nan laychuncha ay kanan. <sup>18</sup> Ifiakiak kan chakayu nan tit-iwa. Uray inkiana mamaid nan chaya ya nan luta, achi poros mamaid chi uray tektek winnu kaaptekan ay kali as nan lintig Apo Dios inkiana matongpar nan am-in ay pangkepna. <sup>19</sup> Isunga uray ngachana nan achi mangafurot as nan filfilin Apo Dios uray nan chiyucha kararakaan ay tongparun, ya mangisuru as nan tapina ta ukiayuncha nan hanacha at maifilang hiya as kun lawá apud henan muntorayan Apo Dios. Ngem nan mangafurot as nan lintig ya mangisuru kan chicha ta ekamancha us at maifilang hiya as amud henan muntorayan Apo Dios. <sup>20</sup> Ifiakiak kan chakayu ay maftalin kayu ay maetapi henan muntorayan Apo Dios mu nalinlintig kayu mu nan chiyuycha mun-isursuru as Lintig ya nan chiyuycha Fariseo.”

### Nan Maepangkep As Fungat

<sup>21</sup> Inturuy Jesus, “Chinngoryu ay naifiakia as nan kaap-uwan takú un, ‘Achi kayu pomatuuy,’ ya ‘nan pomatuuy at maokóm ta machusa.’<sup>§</sup> <sup>22</sup> Ngem ad wani, ifiakiak kan chakayu ay nan taku ay fumungat as nan pachongna ay taku at maokóm hiya ay machusa. Nan taku ay manginsurtu ay mangali as nan pachongna ay taku un, ‘Maid kotkotokmu!’ at maicharum as nan Sanhedrin.\* Kamar us as nan taku ay mangali as nan pachongna ay taku un, ‘Natotongokka!’ at maiyuy as nan apuy ad inferno. <sup>23</sup> Isunga mu kiayudka

<sup>‡</sup> **5:13** Ad kasin at nan asin at naraka ay makaan chi tamtamna.

<sup>§</sup> **5:21** Exo. 20:13; Deut 5:17

\* **5:22** Nan Sanhedrin at Kangatuwan ay Kurten chi Judio.

*mun-ichaton kan Apo Dios as nan altar ya nanumnummu iwa ay wachay finmungtan nan pachongmu ay taku kan he-a,<sup>24</sup> esaadmu nan chatonmu as nan sangwanan nan altar. Uyka on-oná makekappia as nan hana pachongmu ay taku, angkiay munfiangadka ay mun-ichaton kan Apo Dios.*

<sup>25</sup> “Kamuwum ay makealiglu as nan nangicharum kan he-a sakbay iyunya chaká as nan lupon. Tay mu achi, ipurang chaká as nan huwis. Angkiay ya nan huwis at ipurang chaká as nan pulis ay mangifiarud kan he-a as pagfiaruchan. <sup>26</sup> Ifiakiak kan he-a nan tit-iwa ay achikantu makapitiw as pagfiaruchan inkiana fiyacham nan am-in ay mortam.”

### *Nan Maepangkep As Umiwet*

<sup>27</sup> “Chinngoryu at ay naifilin ad pus-uy un, ‘Achi kayu umiwet.<sup>†</sup> <sup>28</sup> Ngem ad wani, ifiakiak kan chakayu ay nan uray ngachana ay mangetotoong as fiafiai ya ninumnumna ay makissuy kan hiya at inmiwet at hiya as numnumna. <sup>29</sup> Isunga mu nan kannawan ay matam nan kiapón chi fumasoram, oketam ya iwagkiam. Un-unuya ay makurangan nan achormu as usa ay parti mu nan wacha nan intiru ay achormu ay kun challu maichus-or ad inferno.<sup>‡</sup> <sup>30</sup> Mu nan kannawan ay limam nan kiapón chi fumasoram, putnam ya iwagkiam. Un-unuya ay makurangan nan achormu as usa ay parti mu nan wacha nan intiru ay achormu ay kun challu umuy ad inferno.”

### *Nan Maepangkep As Ichang*

(Mat. 19:9; Mar. 10:11-12; Luc. 16:18)

<sup>31</sup> “Naifiakia us ad pus-uy un, ‘Nan ngachana ay laraki ay mangiyichang as asawana at masapor umichat hiya kan asawana as kasuratan ay mangepaila ay nun-ichangcha ay hen-asawa.<sup>§</sup> <sup>32</sup> Ngem ad wani, ifiakiak kan chakayu ay nan uray ngachana ay laraki ay mangiyichang as asawana omangkiay mu nakelaraki nan chiyuy asawana at munfialinuna hiya as umiwet mu omasawa hiya as tukún. Kaman us as nan laraki ay mangasawa as nan naiyichang ay fiafiai at umiwet.”

### *Nan Maepangkep As Sapata*

(San. 5:12)

<sup>33</sup> “Chinngoryu ay naifilin as nan kaap-uwan takú un, ‘Achim chukchukkian nan ensapatam as nan Apo, kunmu at masapor tongparun.\* <sup>34</sup> Ngem ad wani, ifiakiak kan chakayu ay achi kayu poros munsapsapata. Achiyu kankanan un, ‘Ilaum ay chaya,’ tay hiyasa nan tomotokoran Apo Dios ay muntotoray. <sup>35</sup> Achiyu us kankanan un, ‘Ilaum ay luta,’ tay hiyana nan kumakiatinana, winnu ‘Ilaum ay Jerusalem,’ tay hiyasa nan siyudad nan nangatu ay Ari. <sup>36</sup> Nan usa pay at achiyu os-osarun nan uruyu ay munsapata, tay achiyu kafaelan ay mangepapukaw winnu mangepangutug as uray usa yangkiay ay fook. <sup>37</sup> Nan kananyu yangkiay at, ‘O,’ winnu ‘Achi.’ Tay nan ngachana nan etapiyu at kan Satanas ay makali un Mangotettet nan nurpuwana.”<sup>†</sup>

### *Nan Maepangkep As Asang*

(Luc. 6:29-30)

<sup>38</sup> “Chinngoryu nan naifilin ad pus-uy ay kanana, ‘Nan manusling as matan chi usa ay taku at masapor us mafusling hiya. Nan mameng-aw as fiab-an chi

† 5:27 Exo. 20:14; Deut. 5:18    ‡ 5:29 Mat. 18:8; Mar. 9:43    § 5:31 Deut. 24:1-4    \* 5:33 Lev. 19:12; Num. 30:2    † 5:37 Nan chiyucha Judio at achicha laychun ay fukfukun nan ngachan Apo Dios. Isunga fukikuncha nan tukún ay ngachan as nan munsapataancha.

usa ay taku at masapor us mapeng-awan hiya.<sup>‡ 39</sup> Ngem ad wani, ifiakiak kan chakayu ay achiyu es-es-ang nan mangotettet ay enkaman nan pachongyu ay taku kan chakayu. Nan ngachana ngarud ay manepak as nan kannawan ay tamelmu at pay-am ay tepakuna us nan fisakna.<sup>§ 40</sup> Nan mangicharum kan he-a ta arauna nan kamisitam at pay-am ay arauna us nan chaketmu.<sup>41</sup> Nan ngachana ay mamelet kan he-a ay manakfiat as uchuna as usa ay kilometro at sakfiatam as uray chuwa ay kilometro.<sup>42</sup> Nan kumchaw kan he-a at ichatmu nan kuchawuna. Nan manglayad ay fumurud kan he-a at achim achiyun.”

### *Nan Layad As Nan Kafusor*

(Luc. 6:27-28, 32-36)

<sup>43</sup> “Chinngoryu nan naifilin ad pus-uy ay kanana, ‘Laylaychum nan ki-ayyumu, ya inglum nan kafusormu.’<sup>\*</sup> <sup>44</sup> Ngem ad wani, ifiakiak kan chakayu ay laylaychunu nan chiyuycha kafusoryu ya ekarkarakianyu nan chiyuycha mamarpalikiat kan chakayu<sup>45</sup> ta maifilang kayu as an-ak Amayu ay wacha ad chaya. Tay hiya at pasilawuna nan urkiw para as nan mangotettetya ammay ay tataku. Kaman us as nan uchan at epaalina para as nan chiyuycha mangekamkaman as nalintig ya nan chiyuycha achi nalintig.<sup>46</sup> Mu nan manglaylayad kan chakayu yangkiy nan laylaychunu, ay wachay ichat Apo Dios as gun-gunayu? Uray nan chiyuycha mangam-among as fiaror at assesa us nan atuncha.<sup>47</sup> Mu nan kiakiayyumu yangkiy nan tagtakiatforunyu, ay wachay natkunanyu as nan tapina? Uray nan chiyuuya Gentil ay achi nangammu kan Apo Dios at assesa us nan atuncha.<sup>48</sup> Isunga masapor maid munkuranganyu ta maepachong kayu kan Amayu ad chaya ay maid nunkurangana.”

## 6

### *Nan Atun Ay Mangfiachang As Nan Makasapor*

<sup>1</sup> Inturuy Jesus, “Il-ilaunyu ta achiyu kurkuraturun ay mangepappaila as nan tataku nan ammay ay atunyu ay kaichayawan Apo Dios. Tay mu hiyasa at maidtu gun-gunayu as ichat Amayu ad chaya.

<sup>2</sup> “Isunga as nan umichatanyu as nan chiyuucha makasapor, achiyu iwar-warakiauwag as nan chiyuucha senagoga ya as nan chiyuucha charan ay kaman as nan cha at-atun nan pakamankaman ta ichayaw nan tataku chicha. Ifiakiak kan chakayu nan tit-iwa ay enawatcha at nan gun-gunacha.<sup>3</sup> Ngem as nan umichatanyu as nan makasapor, achiyu epakaammu as nan uray kaas-ohan ay kiayyumu<sup>4</sup> ta maid mangammu. Hi Amayu ay mangil-ila as nan chaan naamuwan ay enatyu at gun-gunaana chakayuntu.”

### *Nan Insuron Jesus Ay Atun Ay Munkararag*

(Luc. 11:1-13)

<sup>5</sup> Kenalen pay Jesus, “As nan munkararakianyu, achiyu koma tadtad-nun nan chiyuucha pakamankaman, tay laylaychuncha ay tomakchug ay uy munkararag as nan chiyuucha senagoga ya as nan chiyuucha charan ta fuyfuyaun nan tataku chicha. Ifiakiak kan chakayu nan tit-iwa ay enawatcha at nan gun-gunacha.<sup>6</sup> Ngem as nan munkararakianyu at sungkop kayu as kuwartuyu, at in-ubyu nan pantiw, ya munkararag kayu kan Amayu ay achi maila. Hi Amayu ay mangiila as nan achi maam-ammuwan ay atunyu at gun-gunaana chakayuntu.

<sup>‡ 5:38</sup> Exo. 21:24; Lev. 24:20; Deut. 19:21

<sup>§ 5:39</sup> Rom. 12:19

<sup>\*</sup> 5:43 Lev. 19:18

**7** “As nan munkarakianyu, achiyu ong-ongorun nan maid kotkotokna ay chayu kankanan ay kaman as nan cha at-atun nan chiyuycha Gentil ay achi nangammu kan Apo Dios. Tay ka-anancha un chungrun Apo Dios nan kararagcha mu anchuanchuwuncha. **8** Achi kayu koma kaman kan chicha, tay hi Amayu at aammuna challu nan kasaporanyu sakbay ay chumawat kayu kan hiya. **9** Assena ngarud nan atunyu ay munkarakarag:

‘Amami ay wacha ad chaya, maichaychayaw koma nan nasantowan ay ngachanmu.

**10** Omali koma nan muntorayam. Maekaman koma nan laychum asna's luta ay kaman ad chaya.

**11** Ichatmu koma kan chakami nan kanunmi ad wani ay urkiw.

**12** Pakawanum koma chakami as nan fiasfiasormi ay kaman as nan makawanananmi as nan finmasor kan chakami.

**13** Achim koma eparufus ay etorokmi ay masulisukian, ngem esarakam chakami as nan Mangotettet.’”

**14** Inturuy Jesus, “Mu pakawanunyu nan finmasor kan chakayu, pakawanun chakayu us kan Amayu ad chaya. **15** Ngem mu achiyu pakawanun chicha, achi chakayu pakawanun kan Amayu as nan fiasfiasoryu.”

### Nan Maepangkep As Nan Mun-ayunaran

**16** Kenalen pay Jesus, “As nan mun-ayunaranyu, achiyu epappaila ay ngumunguyus kayu ay kaman as nan chiyuycha pakamankaman, tay ennganuyucha ay manarcharos as achorcha ta ilau nan tataku ay kamancha kasusugang as nan chacha mun-ay-ayunaran. Ifiakiak kan chakayu nan tit-iwa ay enawatcha at nan gun-gunacha. **17** Ngem as nan mun-ayunaranyu, munchorop ya munsukud kayu **18** ta achi madlaw nan tataku ay cha kayu mun-ayunar, ngem kun yangkiay hi Amayu ay achi maila. Hi Amayu ay mangil-ila as nan achi maam-ammuwan ay chayu at-atun at gun-gunaanantu chakayu.”

### Nan Kawad-an Nan Kenafiaknang

(Luc. 12:33-34)

**19** “Achi kayu mun-ornong as kenafiaknangyu asna's luta. Tay hena at kun challu chachaelun chi ngomengetnget ya lati, ya sungkop pay chi mangaakiw ta akiwuna. **20** Ngem kun kayu at mun-ornong as kenafiaknangyu ad chaya. Tay hid-i at achi chachaelun chi ngomengetnget ya lati, ya achi pay sungkop chi mangaakiw ta akiwuna. **21** Tay mu ay chaud nan kawad-an nan kenafiaknangyu at hid-i us nan kawad-an nan numnumyu.”

### Nan Silaw Nan Achor

(Luc. 11:34-36)

**22** “Nan mata at kaman silaw nan achor. Mu narawag nan umil-an nan matam, nasalawan nan intiru ay achormu. **23** Ngem mu achi narawag nan umil-an nan matam, ngongottu as solet nan intiru ay achormu. Isunga mu ngongot nan wacha kan he-a, ngongot as solet nan fiyagmu.”

### Hi Apo Dios Yangkiay Nan Matalek

(Luc. 16:13; 12:22-31)

**24** “Maid munserfi as chuwa ay amo, tay iinglunantu nan usa ya laylaychuna nan usa, winnu oononguna nan usa ya elalayusana nan usa. Achiyu mafialin ay munkisanun ay serfiyan hi Apo Dios ya nan siping.

**25** “Isunga ifiakiak kan chakayu ay achi kayu machanakian as maepangkep as pagfiyagyu mu anan kanunyu winnu anan ikopunyu. Achi kayu

*machanakian as nan maepangkep as nan achoryu mu anan ifiachuyu. Ay achi am-amud nan fiyag mu nan makan, ya nan anchor mu nan fiachu?*

*<sup>26</sup> Ilaunyu nan chiyucha kossel ay cha muntat-ayaw ad chaya. Achicha muntanum winnu mun-aní winnu mun-itupug as arangcha. Uray mu hiyasa, pakanun challu Amayu ad chaya chicha. Ay achi kayu am-amud mu chicha?*

*<sup>27</sup> Ngachana kan chakayu nan makafael ay mangepaan-anchu as fiyagna as uray kun usa ay uras kiapú as nan chana munchanchanakian?*

*<sup>28</sup> “Anuy kayu lawá munchanag as maepangkep as fiachu? Ilaunyu nan sabsafong as uma. Achicha munchunu winnu mun-afor as fiachucha. <sup>29</sup> Uray mu hiyasa, ifiakiak kan chakayu ay uray hi Ari Solomon as nan am-in ay kenafiaknangna at chaan poros nunfiachu as maepachong as nan kenaam-ammay nar usa as nan nauycha sabsafong. <sup>30</sup> Mu fiachuwan Apo Dios nan nauycha lukiam ay wacha as uma ad wani, ya as wiet at mapuoran challu, ay achina chamman kaskasin fiachuwan chakayu? Anuy paat anak-akettuy chi pammatiyu! <sup>31</sup> Isunga achi kayu munchanag ay manarudsud un, ‘Anan omor-aní as kanunmi winnu ikopunmi winnu ifiachumi?’ <sup>32</sup> Tay chatona am-in nan cha anaanapun nan chiyucha Gentil ay achi nangammu kan Apo Dios. Hi Amayu ad chaya at ammuna ay masaporyu am-in chaná. <sup>33</sup> Ngem nan omon-oná ay anapunyu at nan maepangkep as nan muntorayan Apo Dios ya nan mangunuchanyu as nan kenalintigna. Mu hiyasa nan atunyu, ichatnantu am-in chaná ay kasaporan kan chakayu. <sup>34</sup> Isunga achi kayu machanakian as nan likiat ay omali as wiet. Awni ta as wiet. Tay nan likiat ay omali as nan usa ay urkiw at nawan as nan hana ay urkiw. Achiyu tapiyan.”*

## 7

### *Nan Achi Mang-okomán As Nan Pachong Ay Taku (Luc. 6:37-38, 41-42)*

*<sup>1</sup> Kenalen pay Jesus, “Achiyu okomún nan pachongyu ay taku ta achi chakayuntu okomún kan Apo Dios. <sup>2</sup> Tay nan atunyu ay mangokóm as nan pachongyu ay taku at assesantu us nan atunyu ay maokóm. Nan panglukudyu as nan pachongyu ay taku at assesantu us nan panglukud Apo Dios kan chakayu. <sup>3</sup> Adchi t'uyumu chillawun nan ek-etkel ay futa as nan matan nan ifiam, ya kunmu at achi madlaw nan ad-acha-an ay futa as nan mismu ay matam? <sup>4</sup> Winnu anan mangaliyam as nan ifiam un, ‘Ud-a ta kaanok nan futa as matam,’ mu wachay ad-acha-an ay futa as nan mismu ay matam? <sup>5</sup> He-a ay pakamankaman! Kaanum on-oná nan hana ad-acha-an ay futa as nan mismu ay matam ta makailaka ay ustu. Angkiay ya maflalinmu ay kaanun nan ek-etkel ay futa as nan matan nan ifiam.”*

*<sup>6</sup> Kenalen Jesus, “Achiyu isuru nan kalen Apo Dios as nan chiyucha nangos-sot ay tataku. Tay maepachongcha as nan asu ya fiafuy. Uray mu ichatmu as nan asu nan ammay, omapor challu ay mamangat kan he-a. Kaman us as nan fiafuy ay uray mu ichatmuy perlas kan hiya, kuna challu kiatkiatinan.”*

### *Nan Mangepatiyan Ay Chumawat (Luc. 11:9-13)*

*<sup>7</sup> Kenalen pay Jesus, “Achiyu ikinkinak ay chumawat kan Apo Dios as kasaporanyu, at maichattu kan chakayu nan chayu chawchawatun. Achiyu ikinkinak ay mun-anap, at maanapanyuntu nan chayu an-anapun. Achiyu ikinkinak ay munkokkokkok, at tokafiantu Apo Dios nan pantiw para kan chakayu. <sup>8</sup> Tay am-in ay chumawat kan Apo Dios at maettan, nan mun-anap*

at makaanap, ya nan munkokkok at matkafian nan pantiw para kan hiya.

<sup>9</sup> Ay wacha kan chakayu ay am-a nan mangichat as fiatu mu chumawat nan pototyu as makan? <sup>10</sup> Winnu mangichat as urug mu chumawat as kiachiw?

<sup>11</sup> Mu chakayu ay manangotetet at ammuu ay mangichat as ammay as nan an-akyu, ay achi kaskasin ay ichat Amayu ay wacha ad chaya nan ammay as nan chiyucha chumawat kan hiya?

<sup>12</sup> “Isunga nan ngachana ay laychum ay atun nan tapina kan he-a, hiyasa nan atum kan chicha. Tay hiyana nan laychun ay kanan nan isursuron nan Lintig Moises ya nan insurat nan chiyucha pomapadtu.”

### Nan Nalepet Ay Pantiw

(Luc. 13:24)

<sup>13</sup> “Sungkop kayu as nan nalepet ay pantiw, tay narawa nan pantiw ya naraka nan charan ay muntoróng ad inferno. Isunga ongorcha nan sungkop hid-i. <sup>14</sup> Ngem nalepet nan pantiw ya nalikiat nan charan ay muntoróng as nan fyag ay maid patingkiana. Isunga akétha nan makad-an hid-i.”

### Nan Kaiw Ya Nan Fukiasna

(Luc. 6:43-44)

<sup>15</sup> “Il-ilaunu nan chiyucha achi tit-iwa ay pomapadtu ay omali kan chakayu. Maepachongcha as nan karnero ay naamu, ngem nan kenatit-iwana at maepachongcha as nan atap ay asu. <sup>16</sup> Nan mangematonanyu kan chicha at as nan chacha at-atun. Ay wachay ubas ay mapuras as nan senagsakiakia, winnu igos ay mapuras as nan loos? <sup>17</sup> Nan narangtu ay kaiw at ammay chi fukiasna. Ngem nan naiing ay kaiw at mangisiw chi fukiasna, <sup>18</sup> tay achi maifalin ay fumkias nan narangtu ay kaiw as mangisiw, ya achi us maifalin ay fumkias nan naiing ay kaiw as ammay. <sup>19</sup> Tunggal kaiw ay achi fumkias as ammay at maesalepoon ay masipor ya maichus-or as nan apuy. <sup>20</sup> Isunga maifalin ay maematonanyu nan chiyucha achi tit-iwa ay pomapadtu babaen as nan chacha at-atun.”

### Nan Achi Maetapi As Nan Muntorayan Apo Dios

(Luc. 13:25-27)

<sup>21</sup> Inturuy Jesus, “Achi am-in ay tataku ay mangali kan ha-un un, ‘Apo, Apo,’ at sungkoptu henan muntorayan Apo Dios, ngem nan chiyucha yangkiay mangekaman as nan laychun Amak ay wacha ad chaya. <sup>22</sup> As nan umchanantu nan urkiw ay mang-okomán Apo Dios as nan katakutaku, ongorchantu nan tataku ay mangali kan ha-un un, ‘Apo, Apo! Ay kun kami chaan nun-epadpadtu as nan ngachanmu? Ay kun kami chaan nun-epakpak-ak as anennet as nan ngachanmu? Ay kun achi ongor nan en-enatmi ay nakaskaschaaw as nan ngachanmu?’ <sup>23</sup> Ngem kanaktu kan chicha un, ‘Achek poros am-ammu chakayu. Omachawwi kayu kan ha-un, chakayu ay mangekamkaman as mangetetet.’”

### Nan Chuwa Ay Nunkiaub As Afong

(Luc. 6:47-49)

<sup>24</sup> “Nan am-in ay tataku ay manngor as nan nauycha kalek ya atuncha chaná at maepachongcha as nan masilib ay taku ay nunkiaub as afongna as nan chupras. <sup>25</sup> Nunmomok, at emiali nan chamuna ay chanum. Pinmuwak as napigsa ya enatifudfuchana nan hana afong, ngem chaan natu-ug, tay as nan chupras nan nasaachana. <sup>26</sup> Ngem am-in ay tataku ay manngor as nan nauycha kalek ya achicha challu atun chaná at maepachongcha as nan achi

*masilib ay taku ay nunkiaub as afongna as nan lakian. <sup>27</sup> Nunmomokya enmali nan chamuna ay chanum. Pinmuwak as napigsaya enatifudfuchana nan hana afong, at natu-ug ya nunsidlay enatna ay nachachael.”*

<sup>28</sup> Kun pay narpas ay infiakian Jesus chaná, naschaaw nan tataku as nan enatna ay nun-isuru. <sup>29</sup> Tay as nan nun-is-isuruwana kan chicha, wachay kalibfengana ya achi kaman as nan chiyucha mun-isursuru as Lintig.

## 8

### *Nan Nangepaammayan Jesus As Nan Nakonet (Mar. 1:40-45; Luc. 5:12-16)*

<sup>1</sup> Kun pay chinmayyu hi Jesus ay nurpu henan chuntug, ongoongor chi tataku ay imunud kan hiya. <sup>2</sup> Angkiay ya naesnop kan hiya nan usa ay laraki ay nakonet ya nunpalintumang as nan sangwanan Jesus, ya kanana, “Apo, mu laychum, epaammayak koma.”

<sup>3</sup> Inchawchaw Jesus nan limana, ya kenpana hiya. Kenalina, “*Laychok. Omammayka!*” Hiya at chi ya nakaan nan konet nan hana larki. <sup>4</sup> Angkiay ya kenalen Jesus kan hiya, “*Maid poros mangifiagfiag-am as kumpurmí as nan enommat kan he-a, ngem kunka at uy munpaila as nan pachi ta ilaura ay nakaan nan saketmu.* *Kun pay marpas, umichatka as chatonmu kan Apo Dios ay kaman as nan inflin Moises ta mangammuwan nan tataku ay nakaan tit-iwa nan saketmu.*”\*

### *Nan Nangepaammayan Jesus As Nan Usa Ay Mafiafbiaor (Luc. 7:1-10)*

<sup>5</sup> As nan enmaliyan Jesus ad Capernaum, wacha hid-i nan kapetan chi sosorchachu ay Romano† ay uy nanib-at kan hiya. Nunpapkakaasi ay chumawat as fiachang kan Jesus. <sup>6</sup> Kenalina, “Apo, cha munsaket nan fiabfiarok as afong. Cha u-uumfug hiya, tay naparalitiko ya malikiatan as solet.”

<sup>7</sup> Kenalen Jesus kan hiya, “*O, uyku epaammay hiya.*”

<sup>8</sup> Ngem tinumfor nan kapetan, “Apo, achiyak maekari ay mangepaskop kan he-a as afongku. Uray kunmu ifilin yangkiay at ommat chi ay mangepaammay as nan fiabfiarok. <sup>9</sup> Tay uray ha-un at wacha nan nangatngatu ay mangetoray kan ha-un, ya wachacha us nan sosorchachok ay etorayak. Mu kanak as nan usa un, ‘Uyka’ at umuy hiya. Mu kanak us as nan usa un, ‘Aka’ at omali hiya. Mu kanak us as nan fiabfiarok un, ‘Atum na’ at atuna.”

<sup>10</sup> Kun pay chinngor Jesus na, naschaaw, ya kanana as nan tataku ay cha umun-unud kan hiya, “*Ifiakiak kan chakayu nan tit-iwa ay maid poros naanapak as assena ay pammati uray ad Israel.* <sup>11</sup> *Ifiakiak kan chakayu ay ongorchantu nan tataku ay Gentil ay murpu henan intiru ay luta ay makekan kan cha chin naaAbraham, naaIsaac, ya najaJacob.* <sup>12</sup> *Ngem nan chiyucha Ju-dio ay maetapi koma henan muntorayan Apo Dios at maichus-orchas as chará henan ngongot. Hid-intu nan mun-ag-akoran nan tatakuya munngesgesatan chi fiab-acha kiapú as fungatcha.*” <sup>13</sup> Haat kanan Jesus as nan kapetan, “*Komatamka, tay nan enafurotmu ay ommat at matongpar.*” Hiyachi challu ay uras nan enmammayan nan fiabfiaaruna.

\* <sup>8:4</sup> Nan nakonet at achi maparufusan ay makiili winnu makeam-among as nan Templo. (Lev. 14:1-32) † <sup>8:5</sup> Nan makali un Romano at taku ay naettan as sichoran chi i-Roma.

*Nan Nangepaammayan Jesus As Nan Ongor Ay Munsaket  
(Mar. 1:29-34; Luc. 4:38-41)*

<sup>14</sup> Kun pay sinungkop hi Jesus as afong Pedro, inilana nan katukiangan Pedro ay fiafiai ay inuumfug ay cha munpuchot. <sup>15</sup> Kenpan Jesus nan limana ya nakaan nan puchotna. As nan hiyachi, finmangun, ya nunsakiana as kanun Jesus.

<sup>16</sup> As nan hiyachi ay naschum, inyalen nan tataku kan Jesus nan ongor ay nunkaanennetan ya nan cha munsaket. Kiapú as nan kalina yangkiay, enpafoknag Jesus nan chiyuycha anennet ya enpaammayna us nan am-in ay cha munsaket. <sup>17</sup> Enatna na ta matongpar nan kenalen Isaias ay pomapadtu, “Hiya ay mismu nan nangaan as iliwas chi achor ya saket takú.”‡

*Nan Likiat Nan Munfialin As Disipulus Jesus  
(Luc. 9:57-62)*

<sup>18</sup> Kun pay inilan Jesus nan ongor ay tataku ay nangularfong kan hiya, infilina as nan disipulusna ay kumchangcha henan fiayfiay ta umuycha ad chumang. <sup>19</sup> Angkiay ya naesnop kan Jesus nan usa ay mun-isursuru as Lintig, ya kanana, “Misturu, umunuchak kan he-a uray kumpurmi as ay-ayam.”

<sup>20</sup> Tinumfor hi Jesus kan hiya, “Wachay omafongan nan chiyuycha fuwus, ya wachay somollongan nan chiyuycha kossal, ngem maid ustus as massuyan nan Naepadtu ay Anak chi Taku.”

<sup>21</sup> Kenalen nan usa ay disipulusna kan hiya, “Apo, awni pay ta uyku ilufok on-oná hi amak.”

<sup>22</sup> Ngem tinumfor hi Jesus kan hiya, “Umunudka kan ha-un. Pay-am. Kikiad nan chiyuycha maid pammaticha ay maepachong as nan nunkatuy nan uy mangilufok as nan pachongcha ay nunkatuy.”

*Nan Nangepakinkan Jesus As nan Napigsa Ay Puwak Ya Challuyon  
(Mar. 4:35-41; Luc. 8:22-25)*

<sup>23</sup> Angkiay ya nunlukian hi Jesus as nan fiangka ya nakilukian nan disipulusna. <sup>24</sup> Kuncha pay wacha as nan fiayfiay, kalina at ya mun-atifufud chi puwak. Nunsidlay manopsopyatan nan challuyon as nan fiangka, at kiayud lumnud. Kun pay hi Jesus at nanassuy. <sup>25</sup> Uycha finangun hiya, ya kanancha, “Apo, esarakam chakami! Lumnud takú pay!”

<sup>26</sup> Kenalen Jesus kan chicha, “Adchi t'uy kayu umugyat? Ak-akettuy tit-iway pammatiyu!” Angkiay ya finmangun hiya ya infilina as nan puwak ya nan challuyon ay kuminakcha. Hiya at chi ya ammay kasis as solet. <sup>27</sup> Naschaaw am-in nan disipulusna, ya kanancha, “Ngachan ngun tona t'uy uray angin ya challuyon at tongparunchay filina?”

*Nan Chuwa Ay Lanaraki Ay Nunkaanennetan  
(Mar. 5:1-20; Luc. 8:26-39)*

<sup>28</sup> Inturuy cha Jesus ay kinumchang inkiana inumchancha henan sasakopun nan i-Gadara. Wachacha nan nanib-at kan hiya ay chuwa ay lanaraki ay nunkaanennetan ay nurpu as nan lurubfok. Kauugyat chaná ay nunkaanennetan. Isunga maid makaiturud ay manguy as nan hana ay charan. <sup>29</sup> Hiya at chi ya, infukiawcha, “He-a ay Anak Apo Dios, anan ngachana nan laychum ay atun kan chakami? Ay enmalika ay mamalikiat kan chakami uray chaan pay inumchan nan ustus ay timpu?”§

‡ 8:17 Isa. 53:4    § 8:29 Mar. 1:24

**30** As nan naesasag-un, wachachay ongoongor ay fiafuy ay cha munsuk-sukor. **31** Enpakaasen nan chiyuycha anennet kan Jesus, “Mu epak-akmu chakami, ifiaormu ngarud chakami as nan chiyuycha fiafuy.”

**32** “*Uy kayu*,” kenalen Jesus kan chicha. Isunga nak-akcha as nan lanaraki ya inmuycha as nan chiyuycha fiafuy. Angkiay ya kenamon am-in nan fiafuy ay chinmayyu inkiana nag-ascha henan teng-el, at nurningcha.

**33** Nan chiyuycha mangay-aywan as nan chiyuycha fiafuy at tenmag-tagcha henan ili, at empachamagcha nan am-in as nan tataku hid-i patí nan enommat as nan lanaraki ay nunkaanennetan. **34** As nan hiyachi, uy sinib-at am-in nan umili hi Jesus. Kuncha pay inila hiya, numpakaasicha kan hiya ta mak-ak hiya henan lukiar ay sasakopuncha.

## 9

### *Nan Nangepaammayan Jesus As Nan Laraki Ay Paralitiko (Mar. 2:1-12; Luc. 5:17-26)*

**1** Kun pay narpas chi, nunlukian cha Jesus as nan fiangka, ya kasincha kinumchang henan fiayfiay inkiana nunfiangadcha henan mismu ay ilen Jesus. **2** As nan hiyachi, wachacha nan nangiyuy kan Jesus as laraki ay paralitiko ay finmafianak as nan ubfukiana. Kun pay inilan Jesus nan pumaticha, kenalina as nan paralitiko, “*Anakku, papigsaum nan numnummu. Napakawanka as nan fiasfiasormu.*”

**3** Angkiay ya wachacha nan tapen nan mun-isursuru as Lintig ay cha mangali as numnumcha, “Nakkuran man na ay taku t’uyna epapachong chi achorna kan Apo Dios!”

**4** Ngem ammon Jesus nan chacha numnumnumun, ya kanana, “*Adchi t’uy mangotettet chi chayu numnumnumun?*” **5** Ngachana nan narakraka as kanan, ‘*Napakawanka as nan fiasfiasormu,’ winnu kanan un, ‘Maligwatka ya manaranka?*’ **6** Ngem mu hiyasa, atok na ta maammuwanyu ay nan Naepadtu ay *Anak chi Taku at wachay kalibfengana asna’s luta ay mangpakawan as tataku as nan fiasfiasorcha.*” Angkiay ya kenalina as nan paralitiko, “*Tomakchugka, araum nan apragmu, ya komatamatka.*” **7** As nan hiyachi, temakchug nan laraki, at kenmatam. **8** As nan nangil-an nan ongor ay tataku as nan enommat, inmugyatcha, ya chinaychayawcha hi Apo Dios ay nangichat as assena ay kalibfengan as nan tataku.

### *Nan Nangayakian Jesus Kan Mateo (Mar. 2:13-17; Luc. 5:27-32)*

**9** Kun pay nak-ak hi Jesus hid-i, as nan chana manarcharanan, inilana nan usa ay laraki ay nan ngachana at Mateo ay nangatokor as nan opisinana ay munfiayfiayachan as fieror. Kenalen Jesus kan hiya, “*Unuchunak.*” Nunkaliligwat hi Mateo ya inmunud kan Jesus.

**10** As nan nangatokoran cha Jesus ay makekan as afong Mateo, ongor chi emiali ay mangam-among as fieror ya tapina ay fumafiasor, ya nakekancha kan Jesus ya as nan disipulusna. **11** Kun pay inilan nan chiyuycha Fariseo nan enat cha Jesus, senarudsudcha as nan disipulusna, “*Adchi t’uy makiufong nan misturuyu as nan chiyuycha mangam-among as fieror ya as nan tapina ay fumafiasor?*”

**12** Ngem kun pay chinngor Jesus chi, kenalina, “*Nan tataku ay achi munsaket at achicha masapor chi choktor, ngem kun yangkiay nan chiyuycha munsaket.*” **13** *Uyyu acharun ay ustu nan laychun ay kanan nan nauy naisurat*

as nan Kalen Apo Dios ay kanana, ‘Nan manug-anganyu as nan pachongyu ay tataku nan laychok, fiakun nan mun-ichatchatonanyu as animar kan ha-un,\* tay chaanak enmali ay mangayag as nan chiyuycha nunkalintig, ngem kun at mangayag as nan chiyuycha fumafiasor.’

*Nan Maepangkep As Nan Mun-ayunaran  
(Mar. 2:18-22; Luc. 5:33-39)*

<sup>14</sup> Angkiay ya enmali kan Jesus nan disipulus Juan ay Fumufunyag, ya senarudsudcha kan hiya, “Adchi t’uy chakami ya nan chiyuycha Fariseo at mun-ayunar, ngem nan disipulusmu at achicha?”

<sup>15</sup> Tinumfor hi Jesus kan chicha, “Ay ngumunguyus nan chiyuycha naayakan ay makichuyas uray mu kukutug nan chumuyas ay laraki kan chicha? Achi met! Ngem mu umchantu nan timpu ay maek-akan nan chin-muyas ay laraki kan chicha, hiyachintu nan mun-ayunarancha.”

<sup>16</sup> Kenalen us Jesus ay nangepachong, “Maid mangelakub as fierú ay lopot as nan lukiak ay fiachu, tay komsun nan naelakub. Angkiay ya makuyud nan lukiak ay fiachu ya kaskasin marakset. <sup>17</sup> Maid us mangittu as kasubsufor ay fiayas as nan lukiak ay mangit-itwuwan ay larat. Tay mu atuna chi at fumtak nan larat. Maiwagkia nan fiayas, ya machachael pay nan larat. Ngem kun at maittu nan kasubsufor ay fiayas as nan fierú ay mangit-itwuwan ay larat ta maid maiwagkia winnu machachael.”

*Nan Anak Nan Ap-apu Ya Nan Fiafiai Ay Nangpa As Nan Fiachon Jesus  
(Mar. 5:21-43; Luc. 8:40-56)*

<sup>18</sup> As nan cha munkarkaliyan Jesus kan chicha, enmali nan usa ay ap-apon chi Judio kan hiya. Numpalintumang as nan sangwanana, ya kanana, “Apo, katkatuy nan pototku ay fiafiai. Ngem omalika pay ta epataymu nan limam kan hiya ta kasin matak.” <sup>19</sup> Isunga naligwat hi Jesus, ya inmunud kan hiya. Nakiuycha us nan disipulusna.

<sup>20</sup> Wacha hid-i nan usa ay fiafiai ay cha mun-ichaichara as hinpuru ya chuwa ay tawwun. Naesnop as uchug Jesus ya kenpana nan kiayachan nan fiachuna, <sup>21</sup> tay kanana as numnumna, “Mu kunku paat kap-un nan fiachuna at omammayak.”

<sup>22</sup> Kun pay nunsakong hi Jesus, inilana hiya, ya kanana kan hiya, “Anak, papigsaum nan numnummu. Nan pammatem nan nangepaammay kan he-a.” Hiya at chi ya enmammay nan chiyu fiafiai.

<sup>23</sup> Kun pay inumchan hi Jesus as nan afong nan ap-apu, inilana nan munkorkoraling para as nan punpun ya nan naaamong ay tataku ay cha mun-at-atengorngor, <sup>24</sup> ya kanana, “Mak-ak kayu hena, tay nan fumarasang at chaan natuy, ngem kun nanassuy.” Kuncha at enam-amrang hiya. <sup>25</sup> Ngem as nan naepapitiwan nan tataku, sinungkop hi Jesus as nan kawad-an nan fumarasang. Angkiay ya inunnana nan limana, ya nafiannangun nan fumarasang. <sup>26</sup> As nan hiyachi, naepachamag nan nauy ay enat Jesus henan am-in ay sakop nan hana ay lukiar.

*Nan Nangaanan Jesus As Nan Finurag Nan Chuwa Ay Lanaraki*

<sup>27</sup> Nak-ak hi Jesus hid-i, ya as nan chana manarcharanan, inunud nan chuwa ay lanaraki ay nafurag hiya. Chacha ifugfukiaw kan hiya, “Sug-angam man paat chakami, he-a ay Kianak David!”<sup>†</sup> <sup>28</sup> Kun pay sinungkop hi Jesus as nan afong, nakiskop us nan chiyuycha chuwa ay nafurag.

\* 9:13 Ose. 6:6    † 9:27 Nan “Kianak David” at usa us ay ngachan Cristo.

Senarudsud Jesus kan chicha, “Ay afurotunyu ay kafaelak ay mangaan as nan finuragyu?”

“O, Apo,” kenalicha.

<sup>29</sup> Angkiay kenpan Jesus nan matacha, ya kanana, “Maekaman kan chakayu ay maiyunud as nan pammatiyu.” <sup>30</sup> As nan hiyachi, nakaan nan finuragcha. Angkiay ya inflin Jesus ay ustu kan chicha, “Ilaunyu ta maid mangiflagflag-anyu’s na.” <sup>31</sup> Ngem as nan nak-akancha’s chi, uycha empachamag nan maepangkep kan Jesus henan am-in ay sakop nan hana ay lukiar.

### *Nan Nangaanan Jesus As Nan Inumor Nan Usa Ay Laraki*

<sup>32</sup> As nan cha mak-akan nan chiyucha nakaan chi finuragcha, inyuy nan tapen nan tataku kan Jesus nan usa ay laraki ay inumor nan anennet. <sup>33</sup> Kun pay enpafoknag Jesus nan anennet ay wacha as nan umor, nunkali nan laraki. Naschaaw nan naamong ay tataku, ya chacha kanan, “Maid poros inil-ilami as assena hena ad Israel!”

<sup>34</sup> Ngem kenalen nan chiyucha Fariseo, “Mun-epak-ak hiya as anennet kiapú as nan inchat nan ap-apon chi anennet ay pannakafialina.”

### *Nan Nanug-angan Jesus As Nan Tataku*

<sup>35</sup> Angkiay ya nunfiabfiaat hi Jesus henan am-in ay ili ya fiabruy. Nun-isuru hiya as nan chiyucha senagogacha, ya enkaskasabana nan Ammay ay Chamag maepangkep henan muntorayan Apo Dios. Kenaana us nan am-in ay tukutukún ay saketcha ya am-in ay tukutukún ay iliwas chi achorcha. <sup>36</sup> As nan nangil-ana as nan ongoongor ay tataku, nasug-ang hiya kan chicha, tay malilifokancha ya maliglikiatancha ay maepachong as nan chiyucha karnero ay maid mangay-aywan kan chicha. <sup>37</sup> Kenalina as nan disipulusna, “Ongor chi maani, ngem akét yangkiay chi mun-aní. <sup>38</sup> Isunga munkararag kayu as nan nunkuwa as nan maani ta umifiaor as tapina ay mun-aní.”

## 10

### *Nan Nangpiliyan Jesus As Nan Hinpuru Ya Chuwa*

(Mar. 3:13-19; Luc. 6:12-16)

<sup>1</sup> As nan usa ay urkiw, enayakian Jesus nan hinpuru ya chuwa ay disipulusna. Angkiay ya enettana chicha as kalibfengancha ay mun-epak-ak as anennet ya mangaan as am-in ay tukutukún ay saket ya am-in ay tukutukún ay iliwas chi achor. <sup>2</sup> Nauycha nan ngadngachan nan hinpuru ya chuwa ay apostoles: nan omona at hi Simon ay makali us un Pedro, hi Andres ay sunúdna, nan hen-aki ay cha Santiago kan Juan ay potot Zebedeo, <sup>3</sup> hi Felipe, hi Bartolome, hi Tomas, hi Mateo ay mangam-among as fiaror, hi Santiago ay potot Alfeo, hi Tadeo, <sup>4</sup> hi Simon ay makali un mangesasaket as nasyona, ya hi Judas Iscariote ay mangesepseptu kan Jesus.

### *Nan Nangifaoran Jesus As Nan Hinpuru Ya Chuwa*

(Mar. 6:7-13; Luc. 9:1-6)

<sup>5</sup> Infiaor Jesus nan nauycha hinpuru ya chuwa, ya inflina kan chicha, “Achi kayu poros um-umuy henan sasakopun nan chiyucha Gentil ya achi kayu poros um-umuy henan il-ilen chii-Samaria. <sup>6</sup> Ngem kun at nan umuyaryu at henan sasakopun nan iib-a takú ay kianak Israel ay maepachong as nan nalitaw ay karnero. <sup>7</sup> As nan am-in ay ay-ayanyu, ekasabayu ay kiayud umchan nan muntorayan Apo Dios. <sup>8</sup> Epaammayyu nan munsaket, takuwunyu nan natuy, epaammayyu nan nakonet ya epafoknayyu nan chiyucha anennet

as nan naanennetan. Achiyu aw-awatun chi fiayad, tay maid poros infiayadyu as nan nauy kalibfengan ay inchatku kan chakayu.<sup>9</sup> Achi kayu ometakin as siping ay fialetok, silver winnu kianfang.<sup>10</sup> Achi kayu us ometakin as samfiag winnu fiachu ay munsokatanyu, sapatos winnu surkud. Tay nan munchunu at libfengna ay maettan as pagfyagna.

<sup>11</sup> “As nan umchananyu henan uray ngachana ay ili winnu fiabruy, anapunyu nan manglayad ay mangmangili kan chakayu. Hid-i nan magyananyu inkiana mak-ak kayu.<sup>12</sup> As nan sungkopanyu as nan hana ay afong, kananyu un, ‘Bendisyonan chakayu koma kan Apo Dios.’<sup>13</sup> Mu laychuncha ay awatun nan inflakiayu kan chicha, mabendisyonancha. Ngem mu achicha awatun, achicha mabendisyonan.<sup>14</sup> Mu maid poros mangmangili kan chakayu winnu chumngor kan chakayu, pokpokanyu nan tapok as nan chapanyu as nan mak-akanyu hid-i ay afong winnu ili.\*<sup>15</sup> Ifiakiak kan chakayu nan tit-iwa ay as nan urkiw ay mang-okomán Apo Dios as nan katakutaku, narakrakantu nan chusan nan i-Sodoma ya i-Gomorra†mu nan umiili hesa.”

### Nan Liglikiat Ay Ommattu (Mar. 13:9-13; Luc. 21:12-17)

<sup>16</sup> Kenalen pay Jesus, “Chumngor kayu! Ifiaorku chakayu ay maepachong as nan naamu ay karnero as nan kawad-an nan chiyuycha kauugyat ay atap ay asu. Isunga masapor masilib kayu ay kaman as nan urug ya naamu kayu ay kaman as nan karopati.<sup>17</sup> Il-ilaunyu, tay wachachantu nan mangtiliw ya mangiyuy kan chakayu as nan chiyuycha lupon. Masaplesaplet kayuntu as nan chiyuycha senagogacha.<sup>18</sup> Maicharum kayuntu as nan gobobernador ya ar-ari kiapú kan ha-un. Hiyasa nan chamsayu ay mangepaneknektu as nan maepangkep as nan Ammay ay Chamag kan chichaya as nan chiyuycha Gentil.<sup>19</sup> Kun chakayu pay icharum, achi kayu machanakian mu anan atunyu ay mangifiakia winnu ngachana nan kananyu. Tay nan kananyu at maepakaam-muntu kan chakayu as nan hana ay uras,<sup>20</sup> tay fiakun chakayu nan munkali, ngem kun at nan Espiriton Apo Dios ay Amayu babaen kan chakayu.

<sup>21</sup> “As nan hiyasa ay timpu, wacha nan mangepapatuytu as mismu ay sunúnda ay laraki. Assesantu us nan atun nan ama as nan pototna. Nan an-ak us at kontrauchantu nan chanakchakorchaya epapatuycha chicha.<sup>22</sup> Inglun chakayuntu as nan am-in ay tataku kiapú as nan pammatiyu kan ha-un. Ngem nan taku ay mangan-anos ay omafurot kan ha-un inkiana as nan anongos at maesarakantu.<sup>23</sup> Kun chakayu pay palikiatun henan usa ay ili, lomayaw kayu ay umuy henan tukún. Ifiakiak kan chakayu nan tit-iwa ay achiyuntu lopasun nan enpadnok kan chakayu henan kailiili ad Israel sakbay ay munfiangad nan Naepadtu ay Anak chi Taku.‡

<sup>24</sup> “Maid uswila as nangatngatu mu nan misturuna, winnu mafiabfiaor as nangatngatu mu nan amona.<sup>25</sup> Mapnek nan uswila as nan komamanana as nan misturuna, ya kaman us as nan mafiabfiaor as nan komamanana as nan amona. Mu penangadnan nan tataku nan ap-apu as nan pamilya as Beelzebub ay ap-apon chi anennet, ay achi at kaskasin mangotettet nan epangachancha kan chakayu ay kun membro as nan pamilyana?”§

### Nan Ustu Ay Umugyatan Nan Tatak (Luc. 12:2-7)

---

\* **10:14** Ara. 13:51   † **10:15** Gen. 19:24-29   ‡ **10:23** Mat. 16:27-28; 24:27-44; 25:31   § **10:25**  
Mat. 9:34; 12:24; Mar. 3:22; Luc. 11:15

<sup>26</sup> “Isunga achi kayu umug-ugyat as nan tataku, tay maid naililingub ay achintu maepaila, winnu naetatafun ay achintu maammuwān. <sup>27</sup> Nan chak iflagflakia kan chakayu as nan lafi at ifiakiyu as nan kaorkia. Nan naitubtuſu kan chakayu at ifukiawyu as nan kaongoran chi tataku.\* <sup>28</sup> Achi kayu umugyat as nan chiyuycha mangpatuy as anchor ngem achi makafael ay mangpatuy as lenawa. Kun at nan umugyatanyu at kan Apo Dios ay makafael ay manachael as anchor ya lenawa ad inferno. <sup>29</sup> Ilaunyu nan chiyuycha tulin. Ay achi nan chuwa at maelaku as kun lawá peso? Maelaku met! Uray akét nanfiarorcha at maid challu matuy uray usa kan chicha mu achi eparufus Amayu. <sup>30</sup> Kaskasin kan chakayu! Uray nan foook as uruyu at nafiflangcha am-in. <sup>31</sup> Isunga achi kayu umug-ugyat, tay nafiaror kayu mu nan ongor ay tulin.”

### Nan Mangipudnu Ya Nan Mangesaot As Nan Maepangkep Kan Cristo (Luc. 12:8-9)

<sup>32</sup> “Isunga nan ngachana ay mangipudnu as nan sangwanan nan tataku ay hiya at omafirot kan ha-un, assesantu us ay ipudnoktu nan maepangkep kan hiya as nan sangwanan Amak ay wacha ad chaya. <sup>33</sup> Ngem nan mangesaot kan ha-un as nan sangwanan nan tataku at esaotku us hiya as nan sangwanan Amak ay wacha ad chaya.”

### Hi Jesus Nan Mangsisiyan As Nan Tataku (Luc. 12:51-53; 14:26-27)

<sup>34</sup> Kenalen pay Jesus, “Achiyu kanan un enmaliyak ay mangiyali as talna asna's luta. Enmaliyak ay maepachong as nan espada ay mangsisiyan as nan tataku. <sup>35</sup> O, enmaliyak ay munlumu as mangontraan nan anak ay laraki kan amana, nan anak ay fiafiai kan enanaya nan enapu ay fiafiai kan katukiangana ay fiafiai. <sup>36</sup> Nan kafusor nan usa ay taku at nan mismu ay pamilyana.†

<sup>37</sup> “Nan taku ay ong-ongor nan layadna kan amana winnu kan enana mu nan layadna kan ha-un at achi maekari as ok disipulu. Uray nan taku ay ong-ongor nan layadna as anakna mu nan layadna kan ha-un at achi maekari as ok disipulu. <sup>38</sup> Nan taku ay achi mangitiin as korosnaya umunud kan ha-un at achi maekari as ok disipulu. <sup>39</sup> Nan taku ay mangaayiw as fiyagna asna's luta at malitawnantu challu. Nan taku ay manglitaw as fiyagna asna's luta kiapú as pammatina kan ha-un at mawad-an as fiyag ay maid patingkiana.”

### Nan Gun-guna (Mar. 9:41)

<sup>40</sup> “Nan taku ay mang-awat kan chakayu at ha-un nan awatuna, ya nan mang-awat kan ha-un at awatuna nan nangifaor kan ha-un. <sup>41</sup> Nan taku ay mang-awat as pomapadtu kiapú ta pomapadtu hiya at magun-gunaan hiya as pachong nan gun-gunan chi pomapadtu. Nan taku us ay mang-awat as nan nalintig ay taku kiapú ta nalintig hiya at magun-gunaan hiya as pachong nan gun-gunan chi nalintig ay taku. <sup>42</sup> Ifiakiak kan chakayu nan tit-iwa ay mu ngachana nan taku ay mangepaikop as uray hentasa ay tungnin ay chanum as nan nauycha apud ay tataku kiapú ta usa hiya ay disipulok at maawatna nan gun-gunana.”

\* **10:27** As nan kali ay Griego at kanana, ‘tabfongan.’ Nan tabfongan nan afong nan Judio at nuntatapor. † **10:36** Mik. 7:6; Mat. 10:21

# 11

*Nan Chiyuycha Infiaor Juan Ay Fumufunyag  
(Luc. 7:18-35)*

<sup>1</sup> Kun pay narpas ay infilin Jesus chaná as nan hinpuru ya chuwa ay disipulusna, nak-ak hid-i, ya uy nun-is-isuru ya nun-ekaskasaba henan naesasag-un ay il-ili hid-i.

<sup>2</sup> As nan hiyachi ay timpu, naifiafiarud hi Juan. Kuna pay nachamag nan cha atuutan Cristo, inmifiaor as nan tapen nan disipulusna,<sup>3</sup> at senarudsud-cha kan hiya, “Ay he-a nan enkaren Apo Dios ay omalintu, winnu munsuud kami as tukún?”

<sup>4</sup> Tinumfor hi Jesus kan chicha, “*Munfiangad kayu kan Juan, ya ifiakiyu kan hiya nan chayu il-ilaun ya chungchungrun.*”<sup>5</sup> *Nan chiyuycha nafurag at makailacha, nan chiyuycha nunkapilud at makacharancha, nan chiyuycha nakonet at enmammaycha, nan chiyuycha naturak at makadngorcha, nan chiyuycha natuy at natakucha manipud as nan utúy, ya nan chiyuycha pugli at naekasaba kan chicha nan Ammay ay Chamag.*<sup>6</sup> *Nakiasat nan taku ay achi munchuwachuwa as nan maepangkep kan ha-un.*”

<sup>7</sup> Kun pay nak-ak nan disipulus Juan, enlapon Jesus ay mangifiakia as nan maepangkep kan Juan as nan ongoongor ay tataku, “*As nan enayanyu kan Juan henan disyerto, ngachana nan nenamnamayu ay ilaun koma? Ay usa'y taku ay maepachong as nan tufú ay cha ikiwiwen chi angin?*”<sup>8</sup> *Ngachana ngarud nan uyyu inila hid-i?* Ay usa ay taku ay nunfiafiachu as am-ammay? Nan chiyuycha met munfiafiachu as am-ammay at mamagyancha as nan chiyuycha palasyu.<sup>9</sup> *Ngachana ngay ngarud nan enay-ayanyu's chi?* Ay uyyu inila nan usa ay pomapadtu? O, ifiakiak kan chakayu, inilayu nan am-amud mu nan pomapadtu.<sup>10</sup> Tay hi Juan nan ifiakiakia as nan Kalen Apo Dios ay kanana un, ‘Wacha nan ifiaorku ay mangon-oná mu he-a ay mangesakiana as nan ayum.’<sup>\*</sup> <sup>11</sup> *Ifiakiak kan chakayu nan tit-iwa ay as nan am-in ay naiyanak at maid am-amud mu hi Juan ay Fumufunyag.* Ngem nan kaapuchan henan muntorayan Apo Dios at am-amud mu hi Juan.<sup>12</sup> *Nunlapu as nan nun-ekaskasabaan Juan inkiana ad wani, wachacha nan mangepapati ay mangekasaba as nan maepangkep henan muntorayan Apo Dios, ya wachacha us nan mangepelet ay maetapi henan muntorayana.*<sup>13</sup> *Tay nan insursurat nan chiyuycha pomapadtu ya nan Lintig Moises at enpadtucha am-in nan maepangkep henan muntorayan Apo Dios inkiana enmali hi Juan.*<sup>14</sup> *Mu laraychunyu ay afurotun chachi at maawatanyu ay hi Juan at hiya nan Elias ay naepadtu ay omali kasin.*<sup>†</sup> <sup>15</sup> *Nan wachay ingana ay chumngor at masapor chumngor.*”

<sup>16</sup> Kenalen pay Jesus, “*Anan mangepachongak ngun kan chatona ay tataku ad wani? Maepachongcha as nan ongong-a ay nangatokor as nan lenawwag ay cha munfinnukiaw as nan kaay-ayamcha ay cha mangarkali un,*<sup>17</sup> *Nun-epeep kami, ya chaan kayu nunsasara. Nunkanta kami as ome panguyus, ya chaan kayu nginmuyus.*”<sup>18</sup> *Chakayu nan maepachongancha, tay enmali hi Juan, ya cha mun-ay-ayunar ya achi cha umig-ikop as fiayas, ya kanancha at un, ‘Naanennetan hiyal’*<sup>19</sup> *Kun pay enmali nan Naepadtu ay Anak chi Taku ay cha makekkekan ya cha makiig-ikop, ya kanancha un, ‘Ilaunyu kay na ay taku at kun naranok ya futtang. Hiya us at kiayyum nan chiyuycha mangam-among*

\* <sup>11:10</sup> Mal. 3:1; Mar. 1:2    † <sup>11:14</sup> Mal. 4:5-6

as fiaror ya nan tapina ay fumafiasor.' Uray mu assesa, maepaila challu ay ustu nan kenasilib Apo Dios as nan cha atuatun nan chiyuycha omaafurot."

*Nan Chiyuycha Achi Omafurot Ay Tataku  
(Luc. 10:13-15)*

<sup>20</sup> Angkiay ya senengaran Jesus nan umili henan il-ili ay nangekamanana as nan kaongoran ay nakaskaschaaw, tay chaancha nunfiafiawi as nan fiasfiasorcha. <sup>21</sup> Kenalina, "Kasusug-ang kayu ay i-Corazin ya i-Betsaida! Tay mu ad Tiro ya ad Sidon nan nangekamanak as nan hanacha amud ay nakaskaschaaw ay enkamkamanku kan chakayu, nunfiafiawichka at koma ay nangafiachu as saku ya nachachapor." <sup>22</sup> Ngem ifiakiak kan chakayu ay as nan urkiw ay mang-okomán Apo Dios as nan katakutaku, narakrakantu nan chusan nan chiyuycha i-Tiro ya i-Sidon mu nan chusayu. <sup>23</sup> Chakayu ngay ay i-Capernaum, ay kananyu un maichayaw kayu ad chaya? Achi! Awni at kun kayu maichus-or ad inferno. Tay mu enkamkamanku nan hanacha amud ay nakaskaschaaw ad Sodoma ay enkamkamanku henan iliyu at nunfiafiawichka as nan fiasfiasorcha ya kukutug nan ilicha. <sup>24</sup> Ngem ifiakiak kan chakayu ay as nan urkiw ay mang-okomán Apo Dios as nan katakutaku at narakrakantu nan chusan nan chiyuycha i-Sodoma mu nan chusayu."\*

*Nan Mun-iblayan Nan Tataku At Kan Jesus  
(Luc. 10:21-22)*

<sup>25</sup> As nan hiyachi ay timpu, enkararag Jesus, "Ama ay Apo ad chaya ya asna's luta, munyamanak kan he-a, tay empakaammom as nan chiyuycha chaan nakaachar nan nauycha entatafunmu as nan chiyuycha mamasilib ya nakaachar. <sup>26</sup> O, Ama, enatmu na, tay hiyana nan mangepalaylayad kan he-a.

<sup>27</sup> "Nan am-in at entalek Ama kan ha-un. Maid nangammu as nan Anak omangkiay nan Ama. Assesa us ay maid nangammu as nan Ama omangkiay nan Anakyaa nan pilyun nan Anak ay mangepakaammuwana.

<sup>28</sup> "Akayu kan ha-un, chakayu am-in ay kaman nabray ay manasakfiat as chagsun ta mun-iblayok chakayu. <sup>29</sup> Unuchunu nan sursurok ya munsuru kayu kan ha-un, tay naanosak ya napakumbabaak. Mu hiyasa nan atunyu, natalnantu nan numnumyu." <sup>30</sup> Tay nan sursurok ay ichatku kan chakayu at naraka ay masuru, ya nan epasakfiatku kan chakayu at achi chagsun."

## 12

*Nan Maepangkep As Nan Urkiw Ay Mun-iblayan  
(Mar. 2:23-28; Luc. 6:1-5)*

<sup>1</sup> As nan usa ay Urkiw ay Mun-iblayan, nanarcharan cha Jesus as nan chiyuycha uma ay natanman as trigo.\* Nunchukiaang nan disipulusna, isunga enlapucha ay nunsaw-i ya chacha munkutkutim as kanuncha. <sup>2</sup> Ngem kun pay inilan nan chiyuycha Fariseo nan enatcha, kenalicha kan Jesus, "Ilaum kay ya at cha atun nan disipulusmu nan epawan nan Lintig takú as nan Urkiw ay Mun-iblayan."†

<sup>3</sup> Tinumfor hi Jesus kan chicha, "Ay chaanyu finasfiasa nan enat Ari David ya nan kakadwana as nan nunchukiaangancha?" <sup>4</sup> Sinungkop hi David as

---

‡ **11:21** Eze. 28:2; Zac. 9:1-4   § **11:23** Gen. 10:19, Rom. 9:29.   \* **11:24** Mat. 10:15   † **11:29** Jer. 6:16   \* **12:1** Nan trigo nan maammaan as arina.   † **12:2** Exo. 20:8; 34:21. Ngem nan chiyuycha Fariseo at entapicha nan ongor pay ay maepawa ay kaman as nan munkutim.

*nan munchaychayawan kan Apo Dios, at kenana nan tenapay ay naichaton kan Apo Dios. Maiyunud as nan Lintig, achi mafialin hiya ya nan kakadwana ay mangan. Kun yangkiay nan papachi nan mafialin ay mangan.*‡ 5 Winnu, ay chaanyu us finasfiasa as nan Lintig Moises ay nan papachi ay cha munichatchaton as nan Templo at chacha lablabsingun nan lintig nan Urkiw ay Mun-iblayan? Uray mu assena, fiakuncha met fiasor sa. § 6 Ifiakiak ay wacha kan chakayu ad wani nan am-amud mu nan Templo. 7 Mu kuryu ammu nan laychun ay kanan nan naisurat as nan Kalen Apo Dios ay kanana un, ‘Nan manug-anganyu as nan pachongyu ay taku nan laychok, fiakun nan munichatchatonanyu as animar kan ha-un.’ Mu tit-iwa ay ammuyu nan laychun nan nauy ay kanan, chaanyu koma penafiasor nan maid fiasorna.\* 8 Tay nan Naepadtu ay Anak chi Taku nan muntoray as nan Urkiw ay Mun-iblayan.”

### *Nan Laraki Ay Nakukuy Nan Usa Ay Limana (Mar. 3:1-6; Luc. 6:6-11)*

9 As nan nak-akan Jesus hid-i, uy sinungkop as nan senagogacha. 10 Wacha hid-i nan laraki ay nakukuy chi usa ay limana. Wacha us nan tapen nan tataku hid-i ay nunsarudsud kan hiya, “Ay eparufus nan Lintig takú nan munkaanan as saket as nan Urkiw ay Mun-iblayan?” Enatcha chi ta wachay epafiasorcha kan hiya.

11 Kenalina kan chicha, “Mu nan usa kan chakayu at wachay karnerona ay mag-as as nan fitu as nan Urkiw ay Mun-iblayan, ay achina ngun uy kuyuchun? 12 Am-amud as solet nan taku mu nan karnero! Isunga eparufus nan Lintig takú ay fiadngan takú nan pachong takú ay taku as nan Urkiw ay Mun-iblayan.” 13 Angkiay ya kenalina as nan nakukuy chi limana, “Uyachum nan limam.” Kuna pay inuyad, enmammay at tit-iwa, ya maepachong as nan usa ay ammay ay limana. 14 Ngem nak-ak nan chiyuycha Fariseo ta uycha anapun mu anan atuncha ay mangpatuy kan Jesus.

### *Hi Jesus Nan Napili Ay Fiabfiaarun Apo Dios*

15 Ammon Jesus na ay pangkepcha, isunga nak-ak hid-i. Ongor nan tataku ay inmunud kan hiya, at enpaammayna nan am-in ay munsaket kan chicha. 16 Infilina kan chicha ay achicha ifiagfiakia nan maepangkep kan hiya. 17 Enatna na ta matongpar nan kalen Apo Dios ay insurat Isaias ay pomapadtu ay kanana,

18 “Hi tona nan fiabfiarok ay pinilek. Hiya nan laylaychok ya mangepalay-layad as solet kan ha-un. Ichatkuntu nan Espiritok kan hiya ta epakaammunantu as nan am-in ay tataku nan atuncha ay mapalintig as nan mangilan Apo Dios.

19 Achintu makisumsuma winnu fumudfudtak, ya achina us ipipigsa nan kalina as nan chiyuycha korsa.

20 Nan nanay-ub ay nunu ay maepachong as nan pammatten nan tataku at achina putnun. Nan munkudkuchimet ay apuy ay maepachong as nan namnamacha at achina patayun. Iturturuya nan chununa inkiana matongpar nan nalintig ay pangkep Apo Dios.

21 Hiya nan namnamaun nan katakutaku ay mangesarakan kan chicha.”†

### *Hi Jesus Ya Hi Beelzebub (Mar. 3:20-30; Luc. 11:14-23)*

---

‡ 12:4 1 Sam. 21:1-6    § 12:5 Lev. 24:8-9    \* 12:7 Ose. 6:6; 1 Sam. 15:22; Mat. 9:13    † 12:21 Isa. 42:1-4

<sup>22</sup> Angkiay ya wachacha nan nangiyuy kan Jesus as laraki ay finurag ya inumor nan anennet. Enpaammay Jesus nan hana laraki at makakali ya makaila at. <sup>23</sup> Naschaaw nan am-in ay tataku, ya kanancha, “Ay hi tona ngun nan Kianak David ay cha takú sassasad-un?”†

<sup>24</sup> Kun pay chinngor nan chiyuycha Fariseo na, tinumforcha, “Fiakun! Hi Beelzebub yangkiay ay ap-apon nan chiyuycha anennet nan nangichat as pannakafialin tona ay taku ay mangepak-ak as nan chiyuycha anennet.”§

<sup>25</sup> Ngem aammon Jesus nan chacha numnumnumun, isunga kenalina kan chicha, “Mu munkikinnufiat nan tataku henan usa ay muntorayan, machachael sa ay muntorayan. Kaman us as nan munkakailiyan winnu hinfiaruy, mu masusumacha at masisiyancha. <sup>26</sup> Mu epak-ak Satanas nan mismu ay iib-ana ay aanennet, anan atuna ay muntotoray in-inkiana? <sup>27</sup> Mu as nan pannakafialin Beelzebub nan nangor-ak as pannakafialinku ay mangepafoknag as aanennet, ngachana ngay nan nangichat as pannakafialin nan chiyuycha umun-unud kan chakayu ay mangepak-ak as nan anennet? Mu hiyasa, chicha nan mangepaneknek ay achi tit-iwa nan kenaliyu. <sup>28</sup> Nan kenatitiwana at fiakun hi Beelzebub, ngem babaen as nan Espiriton Apo Dios nan mangepafoknakiak as nan aanennet. Hiyana nan mangepaila ay enmali nan muntorayan Apo Dios kan chakayu.

<sup>29</sup> “Maepachong hi Beelzebub as nan kursi ay taku. Maid makaskop as nan afong nan usa ay kursi ay taku ta akiwuna nan kuk-uwan tosa sukúdna on-oná etakud hiya.

<sup>30</sup> “Nan achi makius-usa kan ha-un at komokontra kan ha-un. Assesa us ay nan achi fumachang kan ha-un ay mangamong as nan tataku at kuna munsisiyanun chicha. <sup>31</sup> Isunga ifiakiak kan chakayu ay mapakawan nan tataku as nan am-in ay fiasfiasorcha ya uray nan munkaliyancha as maifusor kan Apo Dios, ngem achi mapakawan nan munkali as maifusor as nan Espiritu Santo. <sup>32</sup> Uray nan taku ay munkali as maifusor as nan Naepadtu ay Anak chi Taku at maifialin ay mapakawan. Ngem nan taku ay munkali as maifusor as nan Espiritu Santo at achi mapakawan as nan nauy ay fiyag winnu as nan omali ay fiyag.”

### Nan Kaiw Ya Nan Fukiasna

(Luc. 6:43-45)

<sup>33</sup> Kenalen Jesus ay nun-epadpachong, “Mu narangtu nan usa ay kaiw, ammay us nan fukiasna, winnu mu naiing nan kaiw, mangisiw us nan fukiasna, tay maammuan nan kaiw as nan fukiasna. <sup>34</sup> Chakayu ay maepachong as nan kianak chi kubra, anan atunu ay munkali as ammay mu mangotettet chi ukialiyu? Tay nan sumubsubra ay naichuchulin as nan numnum at hiya challu nan maepafoknag as nan tapak. <sup>35</sup> Nan ammay ay taku at epafoknagna nan ammay ay naichuchulin as nan numnumna. Assesa us ay nan mangotettet ay taku at epafoknagna nan mangotettet ay naichuchulin as nan numnumna. <sup>36</sup> Ifiakiak kan chakayu ay as nan umchanantu nan urkiw ay mang-okomán Apo Dios as nan katakutaku, waschi un songfiatanantu kan Apo Dios nan am-in ay kenarkalina ay maid kotkotokna. <sup>37</sup> Tay nan chiyuychantu mismu ay kaliyu nan osarun Apo Dios ay mangekeddeng kan chakayu mu nakafiasor kayu winnu chaan.”

† <sup>12:23</sup> Mat. 9:27. § <sup>12:24</sup> Beelzebub nan usa ay enpangachan nan chiyuycha Judio kan Satanas.

*Nan Chawat Ay Omepaila Hi Jesus As Nakaskaschaaw  
(Mar. 8:11-12; Luc. 11:29-32)*

<sup>38</sup> Angkiay ya kenalnan tapen nan mun-isursuru as Lintig ya tapen nan Farised kan Jesus, “Misturu, laychunmi ay omepailaka as nakaskaschaaw ay sinyar as mangammuanmi ay nurpuká kan Apo Dios.”

<sup>39</sup> Ngem tinumfor hi Jesus kan chicha, “Anuy paat mangotetet chi ukialen chi tataku ad wani ya maid us pammaticha kan Apo Dios! Chacha chumawat as nakaskaschaaw ay sinyar, ngem maid maepaila kan chicha omangkiay nan nakaskaschaaw ay enommat kan Jonas ay pomapadtu. <sup>40</sup> Tay hi Jonas at nanagyan as nan puton nan ad-acha-an ay finayang ay mamagayan henan fiayfiay as turu ay urkiw ya turu ay lafi.\* Assesantu us as nan Naepadtu ay Anak chi Taku ay mailufok as turu ay urkiw ya turu ay lafi. <sup>41</sup> As nan oma-liyantu nan urkiw ay mun-okomán Apo Dios as nan katakutaku, tomakchugtu nan inmiili ad Nineve ay mangepafiasor kan chakayu ay tataku ad wani, tay nunfiafiawicha as nan fiasfiasorcha as nan nanngorancha as nan enkaskasa-ban Jonas. Ifiakiak kan chakayu ay wacha's na ad wani nan am-amud mu hi Jonas!† <sup>42</sup> Kaman us as nan urkiw ay mun-okomán Apo Dios, tomakchugtu nan Reyna ad Seba ad pus-uy ay mangepafiasor kan chakayu, tay nurpu hiya henan achaachawwi ay lukiar ay uy paat nanngor as nan nainsilifian ay sursuron Solomon. Ifiakiak kan chakayu ay wacha hena ad wani nan am-amud mu hi Solomon.”‡

*Nan Munfiangchan Nan Anennet  
(Luc. 11:24-26)*

<sup>43</sup> Nun-epadpachong pay hi Jesus, “As nan fomoknakian nan anennet ay sinungkop as nan taku, uy munlikud hiya henan luglukiay ay kamaid chi chanum ay mun-anaanap as tukún ay mun-iblayana, ngem maid uchanana.

<sup>44</sup> Angkiay ya kanana as numnumna, ‘Munfiangachak challu as nan afongku ay nurpuwak.’ As nan munfiangchana, uchanana ay nafiafiáw, nacharos ya naornos nan afong. <sup>45</sup> Angkiay mak-ak ya ometakin as tapina ay pitu ay aanennet ay kaskasin manangotetet mu hiya. Sungkopcha as nan afong ya magyancha hid-i. As nan hiyachi, kaskasin mangisiw nan kasasaad nan chiyuy taku mu as nan enmon-ona. Hiyana nan ommattu as nan chiyuycha manangotetet ay tataku ad wani.”

*Nan Enan Jesus Ya Nan Susnúdnu Ay Lanaraki  
(Mar. 3:31-35; Luc. 8:19-21)*

<sup>46</sup> As nan cha pay laing munkarkaliyan Jesus as nan tataku, inumchan at hi enana ya nan susnúdnu ay lanaraki. Tenmatakchugcha as nan fiattaw ya chacha chawatun ay maketakiatforcha kan Jesus. <sup>47</sup> Wacha nan nangifiakia kan Jesus, “Wacha hi enam ya nan susnúdnu ay lanaraki ay nangatakchug as nan fiattaw ay cha maketakiatforcha kan he-a.”

<sup>48</sup> Tinumfor hi Jesus as nan nangifiakia kan hiya, “Ngachana nan kanam ay enak ya susnúdku?” <sup>49</sup> Angkiay ya tinugkiawna nan disipulusna, ya kanana, “Nauycha nan tit-iwa ay enak ya susnúdku! <sup>50</sup> Tay nan uray ngachana ay mangekaman as nan laychun Amak ay wacha ad chaya at hiya nan tit-iwa ay sunúdku ay laraki winnu fiafiai ya enak.”

\* **12:40** Jon. 1:17    † **12:41** Jon. 3:5    ‡ **12:42** 1 Ar. 10:1-10.

## 13

### *Nan Taku Ay Uy Nun-iwagwag As Fokel (Mar. 4:1-9; Luc. 8:4-8)*

<sup>1</sup> As nan hiyachi challu ay urkiw, nak-ak hi Jesus as nan afong, at inmuy henan olet nan flayflay. Hid-i nan tenmokorana ay mun-isuru. <sup>2</sup> Kiapú taongoongor chi tataku ay naamong kan hiya, uy tenmokor hiya as nan fiangka. Nan ontoongor ay tataku at nangatakchugcha henan oletna. <sup>3</sup> Ongor chi inflagiakián Jesus kan chicha ay maepadpachongan. Kenalina, “Wacha nan usa ay taku ay uy nun-iwagwag. <sup>4</sup> As nan chana mun-iwagwagwakan, nag-as nan tapen nan fokel as nan charan. Angkiay ya enmali nan chiyucha kossel, ya kenancha chachi. <sup>5</sup> Nan tapina at nag-ascha as nan machupras ay lukiar ay ak-akettuy chi lutana. Henkemadcha ay linmisim, tay nun-ooson nan luta. <sup>6</sup> Ngem kun pay penomtang, nakling nan chiyucha cha tomemel. Kiapú ta chaancha lenmamot ad chur-um, narangucha. <sup>7</sup> Nan tapina at nag-ascha as nan kaongoran chi sufet. Naikisancha ay tinmuful as nan ongor ay sufet, at nasulincha. <sup>8</sup> Nan tapina ay fokel at nag-ascha as nan ammay ay luta. Tinmufulcha, at nasikuncha. Hacha at fumkias as mahinkiagsot, maunum pupuru, ya matulon pupuru.” <sup>9</sup> Inyanongos Jesus, “Nan wachay ingana at masapor chumngor.”

### *Nan Pangkep Nan Maepadpachongan (Mar. 4:10-12; Luc. 8:9-10)*

<sup>10</sup> Angkiay ya enmali nan disipulus kan Jesus, ya senarudsudcha kan hiya, “Adchi t'uy maepadpachongan chi osarum ay mun-isuru as nan tataku?”

<sup>11</sup> Tinumfor hiya kan chicha, “Kan chakayu nan naepakaammuwan nan chaan naam-ammuwan ay maepangkep henan muntorayan Apo Dios, ngem fiakun kan chicha. <sup>12</sup> Tay nan taku ay wachay kafaelana at maettan as ongongor. Ngem nan taku ay maid kafaelana at uray nan ak-akettuy ay wacha kan hiya at maaranu. <sup>13</sup> Isunga maepadpachongan nan osarok ay mun-isuru kan chicha ta uray mu iilauncha, achicha ematonan. Uray mu chungchungruncha, henpakpakidngoruncha winnu achicha challu maawatan. <sup>14</sup> Kan chicha nan natongparan nan enpadton Isaias ay kanana un, ‘Urav mu chungchungrunyu at achiyu challu maawatan, ya uray mu ilailaunu at achiyu challu ematonan.

<sup>15</sup> Tay tenmangken chi numnum chatona ay tataku! Penoponetancha nan ingacha, ya kenekemetcha nan matacha. Tay mu atuncha chaná at makaemetoncha, makadngorcha, makaawatcha ya munsakongcha kan ha-un, at epaammayku chicha.’”\*

<sup>16</sup> Inturuy Jesus, “Ngem nakiasat kayu, tay makaila kayu ya makadngor kayu.

<sup>17</sup> Ifiakiak kan chakayu nan tit-iwa ay nan ongor ay pomapadtu ya nalintig ay tataku at lenarayadcha ay mangila as nan chayu il-laun, ngem chaancha inila. Lenarayadcha us ay manngor as nan chayu chungchungrun, ngem chaancha chinngor.”

### *Nan Laychun Ay Kanan Nan Maepadpachongan (Mar. 4:13-20; Luc. 8:11-15)*

<sup>18</sup> Kenalen Jesus, “Chungchungrun ngarud nan laychun ay kanan nan maepadpachongan maepangkep as nan uy nun-iwagwag as fokel. <sup>19</sup> Nan chiyucha fokel ay nag-as as nan charan at maepachong chachi as nan tataku ay manngor as nan maepangkep henan muntorayan Apo Dios, ngem achicha

\* <sup>13:15</sup> Isa. 6:9-10

maawatan. Angkiay ya maannuy nan Mangotettet ya kaanuna nan hana kali ay chinngorcha. <sup>20</sup> Nan chiyucha naiwagwag as nan machupras ay lukiar at maepachongcha as nan tataku ay naragsak ay mang-awat ay dagus as nan kalen Apo Dios as nan manngorancha. <sup>21</sup> Uray mu asesa, achi lomamot ay ustу nan kalen Apo Dios as nan numnumcha, ya kun hen-omaketan chi oma-furotancha. As nan omaliyan nan liglikiat kan chicha winnu mapalikiatcha kiapú as nan enmafurotancha as nan kalen Apo Dios, hiya at chi ya achicha ituruy ay omafurot. <sup>22</sup> Kun pay nan chiyucha naiwagwag as nan timufuwan chi ongor ay sufet at maepachongcha as nan tataku ay manngor as nan kalen Apo Dios. Ngem nan chanchanagcha ya nan layadcha ay fumaknang at sulinuncha nan kalen Apo Dios. Mu hiyasa, achicha fumkias. <sup>23</sup> Kun pay nan chiyucha naiwagwag as nan ammay ay luta, maepachongcha as nan tataku ay manngor ya makaawat as nan kalen Apo Dios. Tit-iwa, chatud-i nan fumkias as mahinkiagsot, maunum pupuru, ya matutlon pupuru.”

### *Nan Maepadpachongan Maepangkep As Nan Lukiam*

<sup>24</sup> Wacha pay nan tukún ay maepadpachongan ay infiakian Jesus kan chicha. Kenalina, “Nan muntorayan Apo Dios at maepachong as nan usa ay taku ay uy nun-iwagwag as ammay ay fing-i ay trigo as umana. <sup>25</sup> As nan usa ay lafi, as nan nanassuyan nan am-in ay tataku, inmuy nan kafusorna as nan uman nan nunkuwa, ya wenagwakiana as fokel chi lukiam. Kun pay narpas, nak-ak hiya. <sup>26</sup> Kun pay nasikun nan chiyucha trigo ya elapucha ay mamusfus, cha us masikun nan chiyucha lukiam. <sup>27</sup> Enmali nan chiyucha fiabfiaarun nan nunkuwa as nan uma, ya kanancha as nan amoche, ‘Apo, ay kun fiakun ammay ay fing-i nan inwagwag takú as umam? Anan nurpuwan ngay chi lukiam?’

<sup>28</sup> “Usa ay kafusor nan nangekaman as na,’ ensongfiatna.

“Kenalen nan chiyucha mafiabfiaor kan hiya, ‘Ay laychum ngarud t’uymi kafiaotun?’

<sup>29</sup> “‘Achiyu ud-ay,’ kenalen nan amo, ‘tay atun at mu as nan munkafiaotanyu, maetapi nan chiyucha trigo ay mafiagnot. <sup>30</sup> Pay-anyu ta masikuncha am-in inkiana as panag-aani. Ifiakiaku as nan chiyucha mun-ani un, ‘Amongunyu on-oná nan chiyucha lukiam, yafiatkunyu ta mapuorancha. Kun pay marpas, aniyunu nan chiyucha trigo, ya ipuuyyu as nan arangku.’ ”

### *Nan Maepadpachongan Nan Fokel Chi Mostasa Ya Nan Lebadura (Mar. 4:30-32; Luc. 13:18-21)*

<sup>31</sup> Wacha pay kasin nan tukún ay maepadpachongan ay infiakian Jesus kan chicha. Kenalina, “Nan muntorayan Apo Dios at maepachong as nan fokel chi mostasa ay enaran nan usa ay taku, ya uyna entanum as nan umana. <sup>32</sup> Nan fokel ay anna nan kaek-ektelan as nan am-in ay fokel. Ngem kun pay nasikun, hiya nan kaad-acha-anan as nan am-in ay naetanum as uma ay kaman kaiw chi kaad-achana, ya mafialin ay somollongchay kossel as nan chiyucha pangana.”

<sup>33</sup> Nun-epadpachong kasin hi Jesus. Kenalina, “Nan muntorayan Apo Dios at maepachong as nan akét ay lebadura ay ekar-ot nan fiafiai as nan turon sarop ay alina, inkiana fumrad am-in.”

### *Nan Kotok Nan Nangosaran Jesus As Nan Maepadpachongan (Mar. 4:33-34)*

<sup>34</sup> Maepadpachongan nan enos-osar Jesus as nan am-in ay insursuruna as nan tataku. Maid paat insursuruna kan chicha as chaana enpadpachong.

<sup>35</sup> Enatna na ta matongpar nan infiakian nan pomapadtu,

“Maepadpachongan nan osaroktu ay munkali kan chicha. Ifiakiaktu kan chicha nan naetatafun nunlapu as nan nafiyangan nan luta.”<sup>†</sup>

### *Nan Laychun Ay Kanan Nan Maepadpachongan Maepangkep As Nan Lukiam*

<sup>36</sup> Angkiay ya tenaynan Jesus nan ongoongor ay tataku, ya sinungkop as nan afong. Enmali nan disipulusna kan hiya, ya kanancha, “Ifiakiam pay kan chakami nan laychun ay kanan nan maepadpachongan ay maepangkep as nan lukiam as nan uma.”

<sup>37</sup> Tinumfor hi Jesus, “Nan taku ay nangiawg wag as nan ammay ay fokel at hiya nan Naepadtu ay Anak chi Taku. <sup>38</sup> Nan chiyuy uma at hiya nan luta ay anna. Nan ammay ay fokel at chicha nan tataku ay naetapi henan muntorayan Apo Dios. Nan chiyuycha lukiam at chicha nan tataku ay naetapi as nan Mangotettet. <sup>39</sup> Nan chiyuy kafusor ay uy nunwag wag as nan chiyuycha fokel chi lukiam at hi Satanas. Nan panag-aani at hiya nan munpatingkiaan nan luta, ya nan chiyuycha mun-ani at chicha nan angheles. <sup>40</sup> Kaman as nan nangamongan nan chiyuycha mafiabfiaor as nan lukiam ta mapuoran at assesantu us nan ommat as nan anongos ay urkiw. <sup>41</sup> Ifaortu nan Naepadtu ay Anak chi Taku nan anghelesna ay uy mangaan henan muntorayana nan tataku ay munlumu as fumasoran nan pachongcha ay tataku ya nan am-in ay mangekamkaman as manangotettet. <sup>42</sup> Ichus-or nan angheles chicha as nan munkilkil-ab ay apuy. Hid-intu nan mun-ag-akorancha ya munngesgesatan chi fiab-acha kiapú as fungatcha. <sup>43</sup> Ngem nan nalintig ay tatakon Apo Dios at sumilichantu ay kaman urkiw henan muntorayan Amacha. Nan wachay ingana at masapor chumngor.

### *Nan Maepadpachongan Maepangkep As Nan Naekauab Ay Fialetok Ya Perlas*

<sup>44</sup> “Maepachong nan muntorayan Apo Dios as nan fialetok ay naekauab as nan uma. Kun pay ininchanan nan usa ay taku, kinab-unana kasin. Kiapú as ongor ay lagsakna, uyna enlaku nan am-in ay wacha kan hiya, ya lenakwana nan chiyuy luta.

<sup>45</sup> “Maepachong pay nan muntorayan Apo Dios as nan usa ay taku ay nigosyante ay mun-an-anap as am-ammay ay perlas. <sup>46</sup> As nan nanguchanana as nan usa ay perlas ay nangina as solet, ya kenmatam. Enlakuna nan am-in ay wacha kan hiya, ya uyna lenakwan nan chiyuy perlas.”

### *Nan Maepadpachongan Nan Tafukor*

<sup>47</sup> “Maepachong nan muntorayan Apo Dios as nan tafukor ay naetap-or henan fiayfiay ya kennanay tukutukún. <sup>48</sup> Kun pay napnu, ininat nan chiyuycha tomatafukor ay nangiyuy henan oletna. Tenmokorcha ta pasikuncha nan chiyuycha kennacha. Nan chiyuycha anam-ammay at inittucha as nan mangit-ittuwan. Ngem nan chiyuycha manangisiw at inwagiachacha.

<sup>49</sup> Assesantu us nan ommattu as nan anongos ay urkiw. Omalichantu nan angheles, ya epatkuncha nan manangotettet ay tataku as nan nalintig ay tataku, <sup>50</sup> ya ichus-orcha nan manangotettet ay tataku as nan cha munkilkil-ab

<sup>†</sup> 13:35 Sal. 78:2

*ay apuy. Hid-intu nan mun-ag-akorancha ya munngesngesatan chi fiab-acha  
kiapú as fungatcha.”*

<sup>51</sup> Senarudsud Jesus as nan disipulusna, “Ay naawatanyu am-in chaná?”  
“O,” ensongfiatcha.

<sup>52</sup> Kenalina kan chicha, “Isunga maawatanyu ay nan tunggal usa ay munisursuru as Lintig ay nunfialin as disipulus henan muntorayan Apo Dios at maepachong as nan taku ay wachay afonga ay ammunia ay mangepafoknag as fiarú ya lukiak ay naichuchulin as arangna.”

### *Nan Nangachiyancha Kan Jesus Ad Nazaret (Mar. 6:1-6; Luc. 4:16-30)*

<sup>53</sup> Kun pay lenpas Jesus ay nangifiakia as nan nauycha maepadpachongan, nak-ak hid-i. <sup>54</sup> Hiyachi ya nunfiangad henan mismu ay ilina, ya uy nunisuru hiya as nan tataku as nan senagogacha. Naschaaw nan chiyuycha nnangor, ya kanancha, “Ay chaud ngun nan nangor-an tonia ay taku as kenasilibna ya pannakaflinalia ay mangekaman as nakaskaschaaw? <sup>55</sup> Ay fiakun hiya nan potot nan mun-am-amma as afong? Ay fiakun hi Maria nan enana, ya nan susnúdna at cha Santiago, Jose, Simon ya Judas? <sup>56</sup> Ay achi nan am-in ay susnúdna ay fianafiai at nakiilicha's na kan chitaku? Anuya ngun nangor-an kan chatona am-in?” <sup>57</sup> Angkiay ya enachicha at hiya.

Ngem kenalen Jesus kan chicha, “Maichayaw nan pomapadtu henan kumpurmi ay lukiar omangkiay henan mismu ay ilina ya as nan pamilyana.”

<sup>58</sup> Maid enkaman Jesus as ongor ay nakaskaschaaw hid-i kiapú ta maid pammaticha kan hiya.

## 14

### *Nan Natuyan Juan Ay Fumufunyag (Mar. 6:14-29; Luc. 9:7-9)*

<sup>1</sup> As nan hiyasa ay timpu, nachamag Herodes ay gobernador ad Galilea nan maepangkep kan Jesus. <sup>2</sup> Kenalina as nan chiyuycha opisyarna, “Hi tonia hi Juan ay Fumufunyag ay kun nataku manipud as nan utúy. Isunga wacha kan hiya nan pannakaflinalia ay mangekamkaman as nan nauycha ay nakaskaschaaw.”

<sup>3</sup> Kenalen Herodes chi, tay hiya nan nangepatiliw ya nangepatiawrud kan Juan ay nakokor-ongan. Enatna na ta palaylaychuna hi asawana ay Herodias ay asawan Felipe ay sunúdna, <sup>4</sup> tay kenarkalen ngamin Juan kan Herodes, “Epawan nan lintig ay asaw-um nan ingudmu.”\* <sup>5</sup> Laraychun Herodes ay epapatuy hi Juan, ngem umugyat hiya as nan tataku, tay inflangcha hi Juan as usa ay pomapadtu.

<sup>6</sup> Ngem kun pay inumchan nan urkiw ay mangnumnumnummancha as nan naiyankan Ari Herodes, nunsasara nan anak Herodias ay fiarasang as nan sangwanan nan am-in ay naayakian ay makelagragsak. Nalaylaychan hi Herodes. <sup>7</sup> Isunga enkarina as nan fiarasang ay ichatna kan hiya nan kumpurmi ay chawatuna.

<sup>8</sup> Kiapú ta insuron Herodias ay enana, kenalen nan fiarasang, “Epaiyalem as na kan ha-un nan uron Juan ay Fumufunyag ay maiittu as nan paratu.”

<sup>9</sup> Nalilifokan nan ari, ngem kiapú ta nun-ekari as nan sangwanan nan am-in ay mangilina, inflina ay maekaman nan chinawat nan fiarasang.

<sup>10</sup> Hiyachi ya enpasiwatna nan uron Juan as pagfiaruchan. <sup>11</sup> Inuyucha

\* <sup>14:4</sup> Lev. 18:16

nan uron Juan ay naiittu as nan paratu, ya inchatcha as nan fiarasang ay nangiyuy kan enana. <sup>12</sup> Angkiay ya enmalicha nan disipulus Juan ay ngangara as nan achorna, ya uycha inlufok. Hacha at uy ifiakia kan Jesus.

*Nan Namakanan Jesus As Nan Leman Lifu Ay Tataku  
(Mar. 6:30-44; Luc. 9:10-17; Jn. 6:1-14)*

<sup>13</sup> As nan nangchamakian Jesus as nan enommat kan Juan, nak-ak cha Jesus hid-i. Nunfiangkacha ay inmuy henan kamaid chi tataku ay kun chidchicha yangkiay. Ngem kun pay naammuwana nan ongoongor ay tataku ay nurpu henan il-ili, nanarcharancha ay nanganud kan hiya. <sup>14</sup> Kun pay nunchissaag hi Jesus, inilana nan ongoongor ay tataku. Nasug-ang hiya kan chicha, ya enpaammayna nan wachay saketna kan chicha.

<sup>15</sup> Kun pay cha maschum, inmuy nan disipulusna kan hiya, ya kanancha, “Nauy takú henan kamaid chi umili ya cha us maschum. Epakatammu nan ongoongor ay tataku ta umuycha henan fiabfiabruy ay uy lomaku as kanuncha.”

<sup>16</sup> Tinumfor hi Jesus, “Achicha kis-an mak-ak. Chakayu mismu nan mangichat as kanuncha.”

<sup>17</sup> Kenalicha kan hiya, “Lema met yangkiay ay tenapay ya chuwa ay filis nan wacha's na kan chakami.”

<sup>18</sup> “*Iyaliyu chasa's na kan ha-un*,” kenalen Jesus. <sup>19</sup> Angkiay infilina as nan ongoongor ay tataku ay tomokorcha as nan lukiam. As nan hiyachi, enarana nan lema ay tenapay ya nan chuwa ay filis, ya nuntangad ad chaya ay munyaman kan Apo Dios. Kun pay narpas, pinutput-ingna nan chiyuchaya tenapay, ya inchatna as nan disipulusna, ya nan disipulusna at inwarasca as nan ongoongor ay tataku. <sup>20</sup> Nangancha am-in, at nasufucha. Haat amongun nan disipulus nan chinaancha ay namnu as nan hinpuru ya chuwa ay uppig. <sup>21</sup> Nan filang nan lanaraki ay nangan at kiayud umuy as leman lifu. Chaan naetapi nan fiabfiafiai ya ongong-a ay naifilang.

*Nan Nanaranan Jesus As Nan Oson Nan Chanum  
(Mar. 6:45-52; Jn. 6:15-21)*

<sup>22</sup> As nan cha mangepakataman Jesus as nan ongoongor ay tataku, enpalukiana nan disipulus as nan fiangka, ya enpaon-onana chicha ay kinumchang ad chumang. <sup>23</sup> Kuna pay empakatam nan ongoongor ay tataku, tinmikid hiya henan chuntug ay us-usana ta uy munkararag. As nan naschum, nauusa pay laing hi Jesus hid-i. <sup>24</sup> Kun pay nan fiangka ay nunlurukianan nan disipulusna at achawwi henan olet nan fiayfiay. Kaman cha iyin-inchayon nan challuyon nan fiangka, tay kuncha sisib-atun chi angin.

<sup>25</sup> Kun pay nakapis, inmuy kan chicha hi Jesus ay cha manarcharan as nan oson nan chanum. <sup>26</sup> As nan nangil-an nan disipulus kan hiya ay cha manarcharan as nan oson nan chanum, inmugyatcha as solet. “Anennet!” infukiawcha, ya nun-uwekcha kiapú as ugyatcha.

<sup>27</sup> Ngem nunkanan at Jesus kan chicha, “*Papigsaunyu nan numnumyu! Ha-un na ya! Achi kayu umugyat!*”

<sup>28</sup> Tinumfor hi Pedro, “Apo, mu tit-iwa ay he-a sa, ifikiam pay ay omaliyak kan he-a as nan oson nan chanum.”

<sup>29</sup> “*Aka pay*,” kenalen Jesus.

Isunga kenmaan hi Pedro as nan fiangka, ya enlapuna ay nanaran as nan oson nan chanum ay umuy kan Jesus. <sup>30</sup> Ngem kuna pay kenekna nan

napigsa ay angin, inmugyat, ya enlapuna ay lumnud. Infukiawna, “Apo, esarakakanak!”

<sup>31</sup> Hiya at chi ya inchawchaw Jesus nan limana, ya inkuyudna hiya. “*Anuy paat ak-akettuy chi pammatem! Adchi t'uyka nunchuwachuwa?*” kenalina.

<sup>32</sup> Kuncha pay nunlukian as nan fiangka, kinminak nan angin. <sup>33</sup> Angkiay nan chiyuchya wacha as nan fiangka at chinaychayawcha hi Jesus. Kenalicha, “Tit-iwa ay he-a nan Anak Apo Dios!”

### *Nan Nangepaammayan Jesus As Nan Chiyuchya Munsaket Ad Genesaret (Mar. 6:53-56)*

<sup>34</sup> As nan kinumchangancha henan fiayfiay, inumchancha ad chumang henan lukiar ay Genesaret. <sup>35</sup> Kun pay enmatonan nan tataku hid-i hi Jesus, empakaammucha henan intiru ay lukiar hid-i, at inyuy nan tataku nan am-in ay munsaket kan hiya. <sup>36</sup> Nunpakaasicha kan hiya ta paat kap-un nan chiyuchya munsaket nan kiayachan nan fiachuna, ya nan am-in ay nangpa at enmammaycha.

## 15

### *Nan Sursuru Ay Enpatawid Nan Kaap-uwan (Mar. 7:1-13)*

<sup>1</sup> As nan namingsan, inmuy kan Jesus nan chiyuchya Fariseo ya nan chiyuchya mun-isursuru as Lintig ay nurpu ad Jerusalém. Senarudsudcha, <sup>2</sup> “Adchi t'uy labsingun nan disipulusmu nan iniili ay ukialen nan kaap-uwan takú? Chacha met mangan ay achi munfurū.”

<sup>3</sup> Tinumfor hi Jesus kan chicha, “*Chakayu ngay, chayu met lablabsingun nan lintig Apo Dios ta nan naepatawid ay iniili ay ukialiyyu nan chayu tong-tongparun.*” <sup>4</sup> Tay nan infilin Apo Dios at kanana, ‘*Rispituwum cha amam kan enam,\* ya ‘Nan ngachana ay mangituchor as amana ya enana at masapor maepapatuy.*’ <sup>5</sup> Ngem chayu met isuru ay mu wachay ifiachang koma nan usa ay taku kan cha amana ya enana at mafialin ay munpanfor mu kanana un, ‘*Nan ifiachangku koma kan chakayu at naichat at kan Apo Dios.*’ <sup>6</sup> Mu hiyasa, chayu isuruwan hiya ay uray achina rispituwun hi amana. Isunga kiapú as nan iniili ay ukialiyyu, menaidyu nan kotok nan kalen Apo Dios. <sup>7</sup> *Chakayu ay pakamankaman!* Tit-iwa as solet nan enpadton Isaias maepangkep kan chakayu ay kanana un,

<sup>8</sup> ‘*Nan nauycha tataku at chaychayawunak as nan kalicha, ngem achawwi challu nan numnumcha kan ha-un.*

<sup>9</sup> *Maid kotok nan chacha manaychayawan kan ha-un, tay nan chacha isursuru at linlintig ay enammaan chi taku ay kanancha un filfilinku kanu.’”‡*

### *Nan Tit-iwa Ay Mangepaassi As Nan Taku (Mar. 7:14-23)*

<sup>10</sup> Enayakian Jesus nan tataku kan hiya, ya kanana kan chicha, “*Chumngor kayu ya numnumunyu ay ustu ta maawatanyu nan ifiakiak.*” <sup>11</sup> Fiakun nan okmonun nan usa ay taku nan mangepaassi kan hiya as nan sangwanan Apo Dios, ngem kun at nan epafoknagna as tapakna nan mangepaassi kan hiya.”

<sup>12</sup> Angkiay ya inmuy nan disipulus kan hiya, ya kanancha, “Ay ammom ay menmangisiw chi numnum nan chiyuchya Fariseo as nan nanngorancha’s nan infiakiam?”

\* **15:4** Exo. 20:12; Deut. 5:16    † **15:4** Exo. 21:17; Lev. 20:9    ‡ **15:9** Isa. 29:13

<sup>13</sup> Tinumfor hi Jesus, “Tunggal tenanum ay fiakun hi Amak ad chaya nan nangetanum at mafiangnotcha. <sup>§</sup> <sup>14</sup> Pay-anyu, tay maepachong chasa ay Fariseo as nan nafurag ay mangepangu as ayun. Mu epangon nan nafurag nan pachongna ay nafurag at mag-aschantu ay chuwa as nan ngilig.”

<sup>15</sup> Kenalen Pedro, “Epakaawatmu pay kan chakami nan laychun ay kanan nan nauy maepadpadchongan.”

<sup>16</sup> Kenalen Jesus kan chicha, “Ay uray chakayu at achiyu pay maawatan?

<sup>17</sup> Ay achiyu ammu ay nan okmonun nan taku at umuy as putuna, at etaina challu? <sup>18</sup> Ngem nan chiyuchya epafoknag nan taku as tapakna at murpu as nan numnum, ya hiyachi nan mangepaassi kan hiya. <sup>19</sup> Tay as nan numnum nan kurpuwan chi am-in ay manangotetet ay pangkep ay mangetoróng as nan taku ay pomatuý, umiwet, mangepapas as assi ay lachokna, mangakiw, munkutum ay muntistigu ya omekek-ali. <sup>20</sup> Chatona nan mangepaassi as nan usa ay taku as nan sangwanan Apo Dios. Ngem nan mangan ay achi munfurú at achina epaassi nan usa ay taku.”

### Nan Pammaten Nan Usa Ay Fiafiai

(Mar. 7:24-30)

<sup>21</sup> Angkiay ya nak-ak cha Jesus hid-i ay inmuy henan sakop nan Tiro ya Sidon. <sup>22</sup> Wacha nan usa ay fiafiai ay i-Canaan ay nakiili hid-i. Naesnop kan Jesus, ya infukiawna, “Apo ay Kianak David, sug-anganak man paat! Naanennetan nan anakku ay fiafiai ya malikiatan as solet.”

<sup>23</sup> Ngem chaan tinumtumfor hi Jesus kan hiya. Isunga naesnop nan disipulus kan hiya, ya enpakaasicha, “Uray atum nan chana chawatun ya pakatatum, tay kuna itukiy fukiaw ay cha umunuunud kan chitaku.”

<sup>24</sup> Tinumfor hi Jesus, “Naifiaorak as nan chiyuchya kianak Israel yangkiay ay maepachong as nan chiyuchya nalitaw ay karnero.”

<sup>25</sup> Ngem enmali nan fiafiai ya nunpalintumang as sangwanan Jesus, ya kanana, “Apo, fiadnganak at man.”

<sup>26</sup> Tinumfor hi Jesus ay mangepadpachong, “Achi met ustu mu araun nan cha kanun nan ongong-a, ya ichat as nan chiyuchya asu.”

<sup>27</sup> Kenalen nan fiafiai, “O, tit-iwa sa Apo. Ngem uray met nan asu at kanuncha nan mag-as as nan lamesaan nan amocha.”

<sup>28</sup> Angkiay kenalen Jesus kan hiya, “Ammi, napigsa nan pammatem! Maekaman ngarud nan laychum.” As nan hiyachi, enmammay nan anakna.

### Nan Nangepaammayan Jesus As Nan Munsaket Ay Tataku

<sup>29</sup> Nak-ak hi Jesus hid-i ay nanguy henan olet nan fiayfiay ay Galilea. Angkiay ya timikid henan chuntug, ya tenmokor hid-i. <sup>30</sup> Ongooongor nan inmuy kan hiya ay tataku ay nangiyali as nunkapilay, nunkafurag, nunkapilud, umor ya ongor pay ay tapina ay munsaket. Inyuycha chaná as nan sangwanan Jesus, ya enpaammayna chicha. <sup>31</sup> Naschaawcha nan tataku, ya nunchaychayawcha as nan Dios nan chiyuchya kianak Israel as nan nangil-ancha ay makakali nan umor, enmammay nan chiyuchya napilud, makacharan nan nunkapilay, ya makaila nan nunkafurag.

### Nan Namakanan Jesus As Nan Opat Lifu Ay Tataku

(Mar. 8:1-10)

<sup>32</sup> Angkiay ya enayakian Jesus kan hiya nan disipulusna, ya kanana, “Masug-angak as nan nauycha tataku, tay turu ay urkiw ay naketaktakincha

*kan ha-un, ya nam-in nan sangatcha. Achech laychun ay pakatamun chicha ay cha muncukiaang, tay anaka ya maurawcha as nan charan.”*

<sup>33</sup> Kenalen nan disipulus kan hiya, “Ay chaud ngay nan uy takú omor-an as ommat ay makan ta epakan as nan ongoongor ay tataku hena ay kamaid chi umili?”

<sup>34</sup> Senarudsud Jesus kan chicha, “Kaatnay tenapay nan wacha kan chakayu?”

“Kun pitu, ya akét ay aneket ay filis,” ensongfiatcha.

<sup>35</sup> As nan hiyachi, infilin Jesus as nan tataku ay tomokorcha as nan luta. <sup>36</sup> As nan nangor-ana as nan pitu ay tenapay ya nan filis, nunyaman kan Apo Dios. Kun pay narpas, pinutput-ingna chachi, ya inchatna as nan disipulusna, ya nan disipulusna at inwarascha as nan ongoongor ay tataku. <sup>37</sup> Nangancha am-in, at nasufucha. Haat amongun nan disipulus nan chinaancha ay namnu as nan pitu ay uppig. <sup>38</sup> Nan filang nan lanarakai ay nangan at opat ay lifu. Chaan naetapi nan fiabfiafiai ya anongong-a ay naifilang.

<sup>39</sup> Kun pay enpaketam Jesus nan ongoongor ay tataku, nunlukian hiya as nan fiangka ay inmuy henan sakop nan Magadan.\*

## 16

### *Nan Chawat Ay Omepaila Hi Jesus As Nakaskaschaaw*

(Mar. 8:11-13; Luc. 12:54-56)

<sup>1</sup> Wachacha nan Fariseo ya Saduseo ay inmuy kan Jesus. Lenayad-cha ay chistungin hiya. Isunga chinawatcha kán hiya ay omepaila as nakaskaschaaw ay sinyar ay mangepaneknek ay hiya at nurpu kan Apo Dios. <sup>2</sup> Tinumfor hi Jesus kan chicha, “As nan cha mauynuwan nan urkiw ya munlalatikia ad chaya, kananyu un, ‘Maukiwtu as wiet.’ <sup>3</sup> Mu ilauunu ad chaya as nan wi-ewi-et, kananyu un, ‘Umuchan sa met, tay munlalatikia ad chaya ya munlilifiuu.’ Naraing kayu ay mangematon as nan maila ad chaya. Ngem achiyu met maematonan nan chiyucha sinyar Apo Dios ay maepangkep kan ha-un ay cha om-ommat ad wani. <sup>4</sup> Anuy paat mangotettet chi ukialen chi tataku ad wani, t’uycha chinukkian nan tit-iwa ay Apo Dios! Chacha chumawat as nakaskaschaaw ay sinyar; ngem maid maepaila kan chicha omangkiay nan nakaskaschaaw ay enommat kan Jonas ay pomapadtu.” Kun pay lenpas Jesus ay nangifiakia's chi, nak-ak hiya ay nanaynan kan chicha.

### *Nan Maepadpachongan Maepangkep As Nan Chiyucha Fariseo Ya Saduseo*

(Mar. 8:14-21)

<sup>5</sup> As nan inumchanan cha Jesus ad chumang, ninumnum nan disipulusna ay liniw-anchay ometakin as sangatcha ay tenapay. <sup>6</sup> “Il-ilaunyu nan lebaduran nan chiyucha Fariseo ya Saduseo,” kenalen Jesus kan chicha.

<sup>7</sup> As nan nangaliyana's chi, natatakiatforcha nan disipulusna. Kenalicha, “Infiakiana chi, tay maid entakin takú as sangát takú ay tenapay.”

<sup>8</sup> Ngem ammon Jesus nan nauy chacha matatakiatforan, isunga kenalina kan chicha, “Chakayu ay anak-akettuy chi pammata! Adchi t’uyyu cha matatakiatforan chi kamaid nan sangatu ay tenapay? <sup>9</sup> Ay achiyu pay laing maawatan? Ay achiyu manumnum nan namutput-ingak as nan lema ay tenapay ay kenan nan leman lifu ay tataku? Kaatnay enamongyu ay uppig

\* 15:39 Mar. 8:10

*ay napnu as chinaancha? 10 Winnu as nan pitu ay tenapay ay kenan nan opat lifu ay tataku, kaatnay enamongyu ay uppig ay napnu as chinaancha? 11 Anuyyu paat achi maawatan ay fiakun maepangkep as tenapay nan chak ifiakia kan chakayu? Nan infiakiak kan chakayu at il-ilaunyu nan lebaduran nan chiyuycha Fariseo ya Saduseo.” 12 Angkiay ya naawatancha ay nan infiagfiakian Jesus ay il-ilauncha at fiakun payat nan lebaduran chi tenapay, ngem nan cha isursuron nan chiyuycha Fariseo ya Saduseo.*

### *Nan Infiakiak Pedro Maepangkep Kan Jesus (Mar. 8:27-30; Luc. 9:18-21)*

*13 Kun pay inumchan cha Jesus henan sakop nan Cesarea Filipos, senarudsudna as nan disipulusna, “Ngachana nan kanan nan tataku maepangkep as nan Naepadtu ay Anak chi Taku?”*

*14 Kenalicha, “Kanan met nan tapina un he-a hi Juan ay Fumufunyag, ya kanan nan tapina un he-a hi Elias. Wacha pay nan mangali un he-a hi Jeremias winnu usa as nan chiyuycha pomapadtu.”*

*15 Senarudsud Jesus kan chicha, “Ngem chakayu ngay? Ngachana nan kananyu maepangkep kan ha-un?”*

*16 Tinumfor hi Simon ay makali us un Pedro, “He-a nan Cristo ay Anak nan matataku ay Apo Dios.”*

*17 “Nakiasatka Simon ay potot Jonas,” ensongfiat Jesus. “Tay fiakun taku nan nangepakaammu’s na kan he-a, ngem hi Amak ay wacha ad chaya.*

*18 Ifiakiak kan he-a, he-a hi Pedro ay nan laychuna ay kanan at chupras. Nan nauy ay chupras nan mangkiaufiak as nan iglesiak ay chicha nan omaafurot kan ha-un, ya achi poros amisun nan pannakafialin chi utúy chicha.*

*19 Ichatkuntu kan he-a nan chiyuycha torfek nan muntorayan Apo Dios ad chaya. Nan ngachana ay epawam asna’s luta at maepawantu us ad chaya, ya nan uray ngachana ay eparufusmu asna’s luta at maeparufustu us ad chaya.” 20 Angkiay inflin Jesus ay ustus as nan disipulusna ay maid poros mangifiagflag-ancha ay hiya nan Cristo.*

### *Nan Nangifiag-an Jesus As Nan Likiatna Ya Katuyana (Mar. 8:31-33; Luc. 9:22)*

*21 Nunlapu as nan hiyasa ay timpu, enlapon Jesus ay mangelawlawag as nan disipulusna nan ommattu kan hiya. Kenalina, “Masapor umuyak ad Jerusalem, ya mun-iliwasak as ongor ay likiat ay epailiwas nan anam-amá, anap-apon chi papachi, ya nan chiyuycha mun-isursuru as Lintig. Maepapatuyaktu, ngem as nan maekatlu ay urkiw at matakawak as nan utúy.”*

*22 Kun pay chinngor Pedro na, enek-akna hi Jesus, at senengarana hiya kiapú as nan kenalina. Kenalina, “Apo, achi koma eparufus Apo Dios sa! Achintu poros om-ommat chasa kan he-a.”*

*23 Ngem nunsakong hi Jesus, ya kanana kan Pedro, “Mak-akka Satanas! Somasalika kan ha-un! Tay nan cham numnumnumun at fiakun nan laychun Apo Dios, ngem kun at nan laychun nan taku.”*

### *Nan Taku Ay Manglayad Ay Umunud Kan Jesus (Mar. 8:34-9:1; Luc. 9:23-27)*

*24 Angkiay ya kenalen Jesus as nan disipulusna, “Tay nan ngachana ay manglayad ay umunud kan ha-un at masapor ikinakna ay mangekaman as nan laylaychuna, ya itiina nan korosna, haat umunud kan ha-un. 25 Tay nan uray ngachana ay mangaayyiw as fiyagna asna’s luta at malitawnantu challu. Ngem nan uray ngachana ay manglitaw as nan fiyagna asna’s luta kiapú as*

pammatina kan ha-un at mawad-an as fiyag ay maid patingkiana ay ichat Apo Dios. <sup>26</sup> Tay anan maarantu nan taku ay mangkuwa as nan am-in ay wacha asna's luta, ngem malitawna challu nan fiyagna ay maid patingkiana ad inferno? Winnu anan ngachanantru challu nan esokat nan taku para as nan fiyagna? <sup>27</sup> Tay nan Naepadtu ay Anak chi Taku at munfiangadtu ay kad-wana nan anhelesna ay mangepaila as nan kaichayawan Amana. Angkiay ya gun-gunaanantu nan tunggal usa ay maiyunud as nan enkamkamana. <sup>28</sup> Ifiakiak kan chakayu nan tit-iwa ay wachacha nan tapina kan chakayu ay nangatakchug hena ay achi matuy inkiana ilauncha nan omaliyan nan Naepadtu ay Anak chi Taku ay muntoray.”

## 17

### *Nan Tinmukunan Nan Kail-an Jesus (Mar. 9:2-13; Luc. 9:28-36)*

<sup>1</sup> Kun pay innuy chi unum ay urkiw, entakin Jesus hi Pedro ya cha Santiago kan Juan ay hen-aki. Enpanguna chicha henan nangatu ay chuntug ay kun chidchicha yangkiay. <sup>2</sup> As nan chacha mangi-il-an kan Jesus, tinmukun chi kail-ana. Nan lupana at sumili ay kaman as nan urkiw ya nan fiachuna at pinmukpukkawan ay kaman silaw.

<sup>3</sup> Kalina at ya nunpaila kan chicha cha Moises kan Elias ay cha maketagtakiatfor kan Jesus. <sup>4</sup> Angkiay kenalen Pedro kan Jesus, “Apo, ammay paat ta wacha takú hena. Mu laychum, mun-ammaak as turu ay fiawi asna, usa kan he-a, usa kan Moises ya usa kan Elias.”

<sup>5</sup> Kun pay cha munkarkali hi Pedro, kalina at ya wacha nan sumili ay lifuu ay nangalenong kan chicha. Wacha us nan kali ay nurpu as nan lifuu ay kanana, “Hi tona nan Anakku ay laylaychok. Malaylaychanak paat kan hiya. Chumngor kayu kan hiya.”

<sup>6</sup> As nan nanngoran nan disipulus as nan nauy ay kali, nunlukfubcha kiapú as ongor ay ugyatcha. <sup>7</sup> Ngem naesnop hi Jesus, at kenaprosna chicha, ya kanana, “Fumangun kayu. Achi kayu umugyat.” <sup>8</sup> Kuncha pay nuntangad, maid tapina as inilacha omangkiay hi Jesus.

<sup>9</sup> As nan chacha chumayyuwan ay nurpu henan chuntug, infilin Jesus kan chicha, “Maid mangiflagflag-anyu as nan naepaila kan chakayu inkiana matakku nan Naepadtu ay Anak chi Taku manipud as nan utúy.”

<sup>10</sup> Ensarochakchak nan disipulus kan hiya, “Adchi man t'uy kanan nan mun-isursuru as Lintig un masapor omon-oná hi Elias ay omali mu hi Cristo?”

<sup>11</sup> Tinumfor hi Jesus, “Tit-iwa ay omali on-oná hi Elias ay mangesakiana as nan am-in. <sup>12</sup> Ngem ifiakiak kan chakayu ay emnali at hi Elias, ya chaan emmatonan tataku hiya, ngem kuncha at enat kan hiya nan am-in ay lenaylayadcha. Hiyasa us ay palikiatunchantu nan Naepadtu ay Anak chi Taku.” <sup>13</sup> Haat maawatanan disipulus ay nan cha kankanan Jesus kan chicha at maepangkep kan Juan ay Fumufunyag.

### *Nan Nangepak-akan Jesus As Nan Anennet As Nan Onga (Mar. 9:14-29; Luc. 9:37-43)*

<sup>14</sup> Kun pay nunfiangad cha Jesus as nan kawad-an nan ongoongor ay tataku, innuy nan usa ay laraki kan Jesus. Nunpalintumang as nan sangwanana, ya kanana, <sup>15</sup> “Apo, sug-angam man paat nan pototku ay laraki, tay munkorchas ya malikiatan as solet. Namen ongor ay cha maichuschus-or

hiya as nan apuy winnu as nan chanum. <sup>16</sup> Inyuyku hiya as nan disipulusmu, ngem chaancha kenafaelan ay nangepaammay kan hiya.”

<sup>17</sup> Tinumfor hi Jesus, “*Nakkuran kayu ay tataku ad wani! Maid tit-iwa pammatiyu ya nunkasokel’ kayu! Anan kafayag chi mawawad-ak kan chakayu? Anan kafayag chi tata-unku kan chakayu? Iyaliyu man hena nan onga.*” <sup>18</sup> As nan hiyachi, finilin Jesus nan anennet ay mak-ak, at tenaynan nan anennet nan onga. Hiya at chi ya enmammay nan onga.

<sup>19</sup> Angkiay ya as nan naaw-awni, inmuy nan disipulus kan Jesus ay chidchicha yangkiay, ya senarudsudcha, “Adchi t’uy kami chaan nakaepak-ak as nan anennet?”

<sup>20</sup> Tinumfor hi Jesus, “*Kiapú ta akét nan pammatiyu. Ifiakiak kan chakayu nan tit-iwa ay mu wachay pammatiyu ay maepachong as nan kaad-achan nan fokel chi mostasa, mafialinyu ay kanan henan nauy chuntug un, ‘Masligka munlapu hena ta uyka hid-i,’ at maslig tit-iwa. Maidtu poros achi mafialin kan chakayu.*” <sup>21</sup> [Ngem nan assena ay karasen chi anennet at achi poros maepak-ak mu achi babaen as panagkararag ya panag-ayunar.]\*

### *Nan Nangifiag-an Kasin Jesus As Nan Matuyana (Mar. 9:30-32; Luc. 9:43-45)*

<sup>22</sup> As nan naamongan nan disipulus ay kadwacha hi Jesus ad Galilea, kenalen Jesus kan chicha, “*Nan Naepadtu ay Anak chi Taku at maipurangtu as nan tataku* <sup>23</sup> *ya patayunchantu, ngem matakuntu hiya manipud as nan utúy as nan maekatlu ay urkiw.*” As nan nanngoran nan disipulusna’s chi, nginmunguyuscha as solet.

### *Nan Nunfiayachan Cha Jesus As Fiaror Nan Templo*

<sup>24</sup> Kun pay inumchan hi Jesus ya nan disipulusna ad Capernaum, inmuy kan Pedro nan mangam-among as chuwa ay drachma† ay fieror nan Templo, ya senarudsudna, “Ay munfiayfiayad nan misturuyu as fieror nan Templo?”

<sup>25</sup> “O, met,” ensongfiat Pedro.

Kun pay kenmatam hi Pedro, hi Jesus at enmon-oná ay nunkali kan hiya, ya kanana, “*Simon, ngachana nan munnunumnummu? Ngachana nan munsengelan nan ar-ari asna’s luta as fieror, ay as nan kakailiyancha winnu as nan chiyucha mangilicha?*”

<sup>26</sup> “Ya kakun as nan chiyucha mangilicha,” ensongfiat Pedro.

“*Mu hiyasa, achicha kis-an munfiayad nan kakailiyancha,*” kenalen Jesus kan hiya. <sup>27</sup> “*Ngem uray mu hiyasa, achi takú koma pamangisiwun chi numnumcha. Isunga uyka mamunwet henan fiayfiay. Araum nan omon-oná ay funwetam, ya takangum nan tapakna. Mailamtu nan siping ay munfiaror as opat ay drachma ay ommat as ifiayadta ay chuwa. Araum chi, ya uymu ichat kan chicha ta mafiayachan nan fierorta.*”

## 18

### *Nan Kaamuchan As Nan Muntorayan Apo Dios (Mar. 9:33-37; Luc. 9:46-48)*

<sup>1</sup> As nan hiyachi ay timpu, emmali nan disipulus kan Jesus, ya kanancha, “*Ngachana nan kaamuchan henan muntorayan Apo Dios?*”

---

\* <sup>17:21</sup> As nan tapen nan manuskritu as nan kali ay Griego at maid na ay versikulu. † <sup>17:24</sup> Nan fieror nan chuwa ay drachma at lagfü as chuwa ay urkiw.

<sup>2</sup> Enayakian Jesus nan usa ay onga, at enpatakchugna as nan kiawacha.  
<sup>3</sup> Angkiay ya kenalina, “Ifiakiak kan chakayu nan tit-iwa ay achi kayu poros makaskop henan muntorayan Apo Dios sukúd kayu munfiarfialiw as nan ukialiyu ta munfialin kayu as kaman as nan ongong-a. <sup>4</sup> Isunga nan mangepakumbaba as achorna ay kaman kan tona ay onga at hiya nan kaamuchan henan muntorayan Apo Dios. <sup>5</sup> Nan ngachana ay mang-awat as nan ap-apud ay taku ay kaman kan tona ay onga kiapú as nan pammatina kan ha-un at ha-un nan awatuna.”

### Nan Taku Ay Munlumu As Fumasoran (Mar. 9:42-48; Luc. 17:1-2)

<sup>6</sup> “Nan ngachana ay munlumu as fumasoran chi usa as nan nauycha ap-apud ay tataku ay omaafurot kan ha-un at un-unuyna ay maetekor chi losóng ay fiatu as fiakiangna, ya maichus-or ad chur-um henan fiayfiay ta murning. <sup>7</sup> Kasusug-ang nan tataku asna's luta, tay wachachay sulisug ay munlumu as fumasoran! Tit-iwa ay umchan challu nan sulisug, ngem kasusug-ang nan taku ay kurpuwan nan hana ay sulisug! <sup>8</sup> Mu nan usa ay limam winnu sukem nan kiapón chi fumasoram, putnam, ya iwagkiam. Un-unuyna ay pungudka winnu napiludka ay maetapi as nan fiyag ay maid patingkiana, mu nan wacha nan chuwa ay limam winnu chuwa ay sukem, ya kunka challu maichus-or as nan apuy ay achi mapappaui. <sup>9</sup> Mu nan matam nan kiapón chi fumasoram, oketam, ya iwagkiam. Un-unuyna ay fuslingka ay maetapi as nan fiyag ay maid patingkiana mu nan wacha nan chuwa ay matam, ya kunka challu maichus-or as nan apuy ad inferno.”

### Nan Maepadpachongan Maepangkep As Nan Natingiw Ay Karnero (Luc. 15:3-7)

<sup>10</sup> “Il-ilaunyu ta maid elalayusanyu as nan uray usa as nan nauycha ap-apud ay tataku. Tay ifiakiak kan chakayu ay kanayon ay wacha nan anhelescha as nan kawad-an Amak ad chaya.” <sup>11</sup> [Tay nan Naepadtu ay Anak chi Taku at enmali ay mangesarakan as nan nalitaw.]

<sup>12</sup> “Ngachana nan munnunumnumyu's na? Mu nan usa ay taku at wachay hinkiasot ay karnerona ya natingiw nan usa, ay achina taynan nan chiyuycha siyam puruya siyam ay karnerona as punchag henan chuntug ta uyna anapun nan chiyuy natingiw? <sup>13</sup> Ifiakiak kan chakayu nan tit-iwa ay mu uchanana nan natingiw, ong-ongor chi lagsakna mu nan lagsakna as nan siyam puru ya siyam ay chaan natingtingiw. <sup>14</sup> Hiya us sa kan Amak ay wacha ad chaya ay achina laychun ay malitaw chi uray usa as nan nauycha ap-apud ay tataku.”

### Nan Atun As Nan Nakafiasor Kan Chitaku (Luc. 17:3)

<sup>15</sup> “Mu fumasor nan ifiam kan he-a, uymu ifiakia kan hiya nan finmasorana as nan machchuwaanyu yangkiay. Mu chumngor hiya kan he-a, munki-ayyum kayu kasin. <sup>16</sup> Ngem mu achi chumngor hiya kan he-a, omayagka as usa winnu chuwa as kadwam ay kasin umuy ta wachay chuwa winnu turu ay muntistigu as nan am-in ay maifiakia.\* <sup>17</sup> Mu achi challu chumngor kan chicha, ifiakiam sa as nan iglesia. Mu achi pay laing chumngor as nan iglesia, ifilangmu hiya as achi omaafurot winnu mangam-among as fieror.

\* **18:16** Deut. 19:15; Jn. 8:17; 2 Co. 13:1; 1 Tim. 5:19; Heb. 10:28

**18** “Ifiakiak kan chakayu nan tit-iwa ay nan uray ngachana nan epawayu asna's luta at maepawantu us ad chaya, ya nan uray ngachana nan eparufusyu asna's luta at maeparufustu us ad chaya.”<sup>†</sup>

**19** “Ifiakiak kasin kan chakayu ay mu nan chuwa kan chakayu asna's luta at muntimpuyugcha ay chumawat as kumpurmi kan Amak ay wacha ad chaya at ekamana para kan chakayu. **20** Tay mu ay chaud nan maamongan nan uray chuwa winnu turu kiapú as nan pammaticha kan ha-un, wachaak hid-i kan chicha.”

### *Nan Maepadpachongan Maepangkep As Nan Achi Pomakawan Ay Mafiab-fiaor*

**21** Angkiay ya inmuy hi Pedro kan Jesus, ya kanana kan hiya, “Apo, mamen kaatku pakawanun nan ifiak ay cha fumasofiasor kan ha-un? Ay inkiana mamen pitu?”

**22** “Achek kanan un mamen pitu yangkiay, ngem mamen pitu ay piton puru,” ensongfiat Jesus. **23** “Tay nan munterayan Apo Dios at maepachong as nan usa'y ari ay manglayad ay manotar as nan utang nan chiyuycha opisyarna. **24** Kuna pay cha elapu, naiyali kan hiya nan usa ay opisyalna ay liniblifiy utangna. **25** Kiapú ta achi makafiyad, infilin nan ari ay maelaku hiya ay kadwana nan pamilyana ay munfialin as mafiabfiaor ya nan am-in ay kuk-uwana. **26** Nunpalintumang nan chiyuy opisyar ya enpakaasina un, ‘Suganganak man paat ta fiayachak nan am-in ay utangku kan he-a.’ **27** Nasug-ang tit-iwa nan ari kan hiya. Menaidna nan utangna, ya penakatamma hiya.

**28** “Kun pay nak-ak nan chiyuy opisyar, sinib-atna nan usa ay pachongna ay opisyar ay nakautang kan hiya as hinkiasot ay dinario.<sup>‡</sup> Lenabkisna, ya enlapuna ay nankor, ya chana kanan un, ‘Fiayacham man nan inutangmu kan ha-un!’

**29** “Nunpalintumang nan chiyuy kadwana kan hiya, ya enpakaasina, ‘Suganganak man paat ta fiayachak nan utangku kan he-a.’ **30** Chaana enat nan chawatna, ngem kuna at enpaflarud hiya inkiana mafiayachana nan utangna. **31** As nan nangil-an nan kakadwana ay chiyuycha opisyar as nan enommat, nalilifokan chi numnumcha, ya uycha infiakia as nan ari nan am-in ay enommat.

**32** “Angkiay ya enpaayag nan ari hiya, ya kanana, ‘Mangotettet tit-iway ukialel ay opisyalku! Menaidku ngarud nan am-in ay utangmu, tay nunpasug-angka kan ha-un. **33** Anuymu chaan sinug-angan nan kadwam ay opisyar ay kaman as nan enatku ay nanug-ang kan he-a?’ **34** As nan hiyachi, finnungat as solet nan ari, ya enpaflarudna hiya inkiana mafiayachana nan am-in ay utangna.” **35** Inyanongos Jesus, “Assid-i us nan atun Amak ay wacha ad chaya kan chakayu am-in mu achiyu tit-iwa pakawanun nan ifiayu.”

## 19

### *Nan Insursuron Jesus Maepangkep As Ichang (Mar. 10:1-12; Luc. 16:18)*

**1** Kun pay narpas ay infiakian Jesus chaná, nak-ak cha Jesus ad Galilea, ya inmuycha henañ sakop nan Judea henan usa ay chumang nan wawwang ay Jordan. **2** Immunud kan Jesus nan ongoongor ay tataku, at enpaammayna chicha hid-i.

<sup>†</sup> **18:18** Mat. 16:19    <sup>‡</sup> **18:28** Nan usa ay dinario at lagfu as nan hin-urkiw.

<sup>3</sup> Wachacha nan tapen nan Fariseo ay inmuy kan Jesus ta chistinguncha hiya babaen as nan nanarudsuchancha, “Ay eparufus nan Lintig takú ay iyichang nan laraki nan asawana uray kumpurmi nan panforna?”

<sup>4</sup> Tinumfor hi Jesus, “Ay *chaanyu finasfiasa nan naisurat as nan Kalen Apo Dios maepangkep as nan namayangana as nan taku? As nan laplapuna, finayang Apo Dios nan laraki ya fiafiai.*\* <sup>5</sup> Kenalina us un, ‘*Hiyana nan kiapúna ay taynan nan laraki cha amana kan enana ta etepona hi asawana, at munfialincha as us-usa.*† <sup>6</sup> *Isunga fiakuncha chuwa, ngem kuncha us-usa. Nan nunteponun ngarud Apo Dios at achi koma mun-ichangun chi taku.*”

<sup>7</sup> Kenalen nan chiyuycha Fariseo kan hiya, “Mu hiyasa, adchi ngay ngarud t’uy inflin nan Lintig Moises ay mafialin ay umichat nan laraki kan asawana as kasuratan chi nun-ichangancha, hana at epak-ak hi asawana?”‡

<sup>8</sup> Tinumfor hi Jesus kan chicha, “*O, enparufus Moises ay iyichangyu nan asawayu kiapú as nan kenatangken chi numnumyu. Ngem fiakun met assesa nan pangkep Apo Dios as nan laplapuna.* <sup>9</sup> *Ifiakiak ngarud kan chakayu ay nan uray ngachana ay laraki ay mangiyichang as asawana omangkiay mu nakelaraki at uniwit mu omasawa hiya as tukún.*”

<sup>10</sup> Kenalen nan disipulus kan hiya, “Mu hiyasa payat nan ommat as nan hen-asawa, un-unuyna at ay achita omas-asawa.”

<sup>11</sup> Tinumfor hi Jesus, “*Tit-iwa, ngem achi kafaelan nan am-in ay tataku nan nauy ay sursuru ay achi omasaw-an, ngem kun yangkiay nan chiyuycha nangichatan Apo Dios.* <sup>12</sup> *Tay tukutukún nan kiapón chi achi omasaw-an nan taku. Wachacha nan naiyanak ay kamancha naiblaan, ya nan tapina at iniblaan chi pachongcha ay taku. Ñan tapina us at achicha omasawa ta paus-usauncha nan numnumcha as nan munserfiyancha kan Apo Dios henan muntorayana. Nan makafael ay mangekaman as nan nauy ay sursuru at atuna koma.*”

### *Nan Namendisyonan Jesus As Nan Ongong-a (Mar. 10:13-16; Luc. 18:15-17)*

<sup>13</sup> As nan namingsan, wacha nan nangiyuy kan Jesus as ongong-a ta epatayna nan limana ya ekarakiana chicha. Senengaran nan disipulusna nan tataku. <sup>14</sup> Ngem kenalen Jesus kan chicha, “*Yasa! Pay-anyu ay omali nan ongong-a kan ha-un. Achiyu epawa, tay nan tataku ay maepachong kan chatona ay ongong-a nan maetapi henan muntorayan Apo Dios.*” <sup>15</sup> Kuna pay enpatay nan limana kan chicha, nak-ak hid-i.

### *Nan Fiaknang Ay Fiarfiaru (Mar. 10:17-31; Luc. 18:18-30)*

<sup>16</sup> As nan namingsan, wacha nan usa ay laraki ay inmuy kan Jesus, ya senarudsudna, “Misturu, ngachana man nan ammay ay masapor ay atok ta mawad-anak as fiyag ay maid patingkiana?”

<sup>17</sup> Kenalen Jesus kan hiya, “*Adchi t’uyumu sarudsuchun kan ha-un mu ngachana nan ammay? Wacha nan usayangkiay ay ammay ay hi Apo Dios. Mu laychum ay maetapi as nan fiyag ay maid patingkiana, tongparum nan filfilin Apo Dios.*”

<sup>18</sup> “Ngachan chatud-i ay filfilin?” senarudsudna.

\* **19:4** Gen. 1:27    † **19:5** Gen. 2:24    ‡ **19:7** Deut. 24:1-4

*“Achika pomatuy, achika umiwet, achika mangakiw, achika munkutum ay muntistigu,<sup>19</sup> rispituwum cha amam kan enam, ya laylachum nan pa-chongmu ay taku ay kaman as nan atum ay manglaylayad as achormu,” ensongfiat Jesus.*§

**20** Kenalen nan fumarfiaru kan hiya, “Tenongparku met am-in chaná ay filfilin. Ngachana pay nan masapor ay atok?”

**21** Tinumfor us hi Jesus, “*Mu laychum ay maid munkurangam, uymu elaku nan kuk-uwam, ya ichatmu nan lakuna as nan chiyuchya pugli, at wachantu nan kenafiaknangmu ad chaya. Kun pay marpas, unuchunak.*” **22** Kun pay chinngor nan fiarfiaru na, nak-ak ay cha mununnnunungu, tay nafiaknang as solet.

**23** Kenalen Jesus as nan disipulusna, “*Ifiakiak kan chakayu nan tit-iwa ay naliikiatsu as nan nafiaknang ay taku ay sungkop henan muntorayan Apo Dios.*

**24** *Kasinku kanan un narakraka pay ay lumfot nan kamelio as nan los-ok nan chakum mu nan fiaknang ay sungkop henan muntorayan Apo Dios.”*

**25** As nan nanngoran nan disipulus as na, naschaawcha as solet, ya kanancha, “Ngachancha ngay ngarud nan mafialin ay maesarakan?”

**26** Entoongan Jesus chicha, ya kanana, “*Nan tataku at achicha kafaelan ay mangekaman as na. Ngem hi Apo Dios at kafaelana nan am-in.*”

**27** Angkiay tinumfor hi Pedro, “Enham! Tenaynanmi nan am-in, ya immundun kami kan he-a! Ngachana ngay nan gun-gunamai?”

**28** Kenalen Jesus kan chicha, “*Ifiakiak kan chakayu nan tit-iwa ay as nan mangepaflaruwantu Apo Dios henan lufong, tomokortu nan Naepadtu ay Anak chi Taku as nan machaychayaw ay tronona. Kun pay chakayu ay hinpuru ya chuwa ay disipulusku at tomokor kayuntu as nan hinpuru ya chuwa ay trono ay mangokóm as nan hinpuru ya chuwa ay tribu ay chicha nan kianak nan an-ak Israel.* **29** *Nan ngachana ay nanaynan as afongna, susnúdna, amana, enana, an-akna winnu payyiwna kiapú as nan pammatina kan ha-un at mannen hinkiasottu nan awatuna mu nan fiaror nan tenaynana, ya matawidnantu nan fiyag ay maid patingkiana.* **30** *Ngem nan ongor ay omon-onaa ad wani at omanongoschantu, ya nan ongor ay omanongos ad wani at omon-onachantu.*”

## 20

### *Nan Maepadpachongan Maepangkep As Nan Mun-um-uma*

**1** Kenalen pay Jesus, “*Nan muntorayan Apo Dios at maepachong as nan usa ay taku ay nunkuwa as nan uma ay nataman as ubas. Finmikiat ya uy nun-anap hiya as munlagfu as nan umana.* **2** *Kun pay nakad-an as munlagfuwuna, nakturag kan chicha ay nan lagfucha as hin-urkiw at usa ay dinario. Angkiay infiaorna chicha ay uy munchunu as umana.*

**3** “*As nan mangaurkiw, kasin nun-anap, at inilana nan tapen nan lanaraki ay nangatakchug ay cha munforforakfor as nan mun-el-elakwan.* **4** *Infiakiana kan chicha un, ‘Uy kayu us munchunu as umak, at ichatku nan ustу ay lagfuyu.’* **5** *Isunga inmuycha.*

“*As nan nunkiawa ya as nan alas tres nan makiayud, kasin pinmitiw hiya, ya assid-i us challu ay uy nun-anap.* **6** *Kun pay kiayud alas singko, inmuy kasin as nan mun-el-elakwan, ya ininchanagan nan tapina ay nangatakchug*

*ay cha munforforakfor. Senarudsudna kan chicha un, ‘Anuyyu iyur-urkiw ay munforforakfor?’*

**7** “*Anaka, maid ngamin mangayag kan chakami as munlagfuwanmi,’ ensongfatcha.*

“*Ayu ngarud. Uy kayu us munchunu as umak,’ kenalina kan chicha.*

**8** “*Kun pay cha maschum, kenalen nan nunkuwa as nan uma as nan apapon nan fiabfiaaruna, ‘Uymu ayakian nan chiyuycha nunlagfuta ichatmu nan lagfucha. Elapom as nan chiyuycha enmanongos inkiana as nan chiyuycha emmon-oná ay nunlagfu.’*

**9** “*Enmali nan chiyuycha nunlagfu as nan kiayud alas singko, at nalagfuwan-cha as hin-us-a ay dinario. 10 Isunga as nan enmaliyan nan chiyuycha emmon-oná ay nurlagfu, namnamauncha ay ong-ongor nan lagfucha. Ngem hin-us-a us challu ay dinario nan enawatcha. 11 As nan nanawatancha as nan lagfucha, nunlilicha as nan nunkuwa as nan uma. Kenalicha, 12 Kun usa ay uras yangkiay chi nunchunuwan nan nauycha enmanongos, ya empachongmu pay laing chi lagfucha kan chakami ay nunchunu as hin-urkiw ya nangiliwas as nunsidla ay atong!*”

**13** “*Ngem kanana as nan usa kan chicha, ‘Kiayum, chaanku met senator chakayu. Ay chaanyu inyafud ay usa’y dinario nan lagfuyu as nan hin-urkiw?*”

**14** *Ayu at! Araum nan lagfom, ya komatamka. Laychok challu ay ichat as nan nauycha enmanongos nan kaman as nan inchatku kan he-a. 15 Ay kun fiakun libfengku ay mangekaman as laychok as nan mismu ay sipingku? Winnu chaka payat omapos kiapú ta achiyak nangekot?”*

**16** Haat iyanongos Jesus, “*Isunga nan omanongos ad wani at omon-onantu, ya nan omon-oná ad wani at omanongostu.*”

#### *Nan Kapitlu Ay Nangifiag-an Jesus As Nan Matuyana (Mar. 10:32-34; Luc. 18:31-34)*

**17** As nan cha tumikichan cha Jesus ay umuy ad Jerusalem, ensakikina nan hinpuru ya chuwa ay disipulusna, ya kanana kan chicha, **18** “*Chumngor kayu! Cha takú tumikid ad Jerusalem. Hid-intu ay maipurang nan Naepadtu ay Anak chi Taku as nan anap-apon chi papachi ya as nan chiyuycha munisursuru as Lintig. Keddenganchantu hiya ay matuy, 19 ya ipurangchantu hiya as nan chiyuycha Gentil ay mangot-otyoktu, mangapsaplellu ya mangelansantu kan hiya as nan koros. Ngem as nan maekatlu ay urkiw at matakuntu hiya manipud as nan utúy.*”

#### *Nan Chinawat Nan Enan Cha Santiago Kan Juan (Mar. 10:35-45)*

**20** Angkiay ya inmuy kan Jesus nan asawan Zebedeo ay kadwana nan chuwa ay an-akna ay lanaraki. Nunpalintumang as nan sangwanan Jesus ya chinawatna kan hiya, “Apo, wacha pay nan chawatok.”

**21** Senarudsud Jesus kan hiya, “*Ngachana ngay nan laychum?*”

Tinumfor nan fiafiai kan hiya, “As nan tomokram as nan tronom as nan muntorayam, eparufusmu koma ay maketokor nan nauycha chuwa ay anakkku kan he-a: Nan usa at as apét kannawanmu ya nan usa at as apét kannikidmu.”

**22** Ngem tinumfor hi Jesus, “*Achiyu ammuy chayu chawchawatun. Ay kafiaelanyu ay mangiliwas as nan likiat ay iliwasku?*”\*

---

\* **20:22** As nan kali ay Griego at kanana, “Ay kafiaelanyu ay umikop as nan tasa ay umikopaktu?”

“Kafiaelanmi ya,” ensongfiatcha kan hiya.

<sup>23</sup> Kenalina kan chicha, “Manuwat, tay iliwasuntu nan likiat ay kaman as nan iliawsku. Ngem fiakunku kalibfengan ay munpili as tomokor as apét kannawanku ya as apét kannikidku, tay chatosa at para as nan chiyuycha nangesasakianaan Amak.”

<sup>24</sup> Kun pay chinngor nan hinpuru ay disipulus nan nauy, finzungatcha as nan hen-aki. <sup>25</sup> Ngem enayakian Jesus am-in chicha as nan kawad-ana, ya kanana, “Ammuyu met ay nan chiyuycha mangetortoray as nan chiyuycha Gentil at epapeletcha nan laychuncha as nan chacha etortorayan. Nan anap-apucha us at etorayancha chicha. <sup>26</sup> Fiakun koma assesa kan chakayu, ngem kun at nan uray ngachana ay manglayad ay munfialin as amud kan chakayu at masapor hiya nan fiabfaarunyu. <sup>27</sup> Nan ngachana ay manglayad us ay munfialin as kaamuchan kan chakayu at masapor munfialin as fiabfaarunyu. <sup>28</sup> Uray nan Naepadtu ay Anak chi Taku at chaan enmali ay maserfiyan, ngem kun at munserfi ya ichatna nan fiyagna ta esarakana nan ongor ay tataku.”

### Nan Nangaanan Jesus As Nan Finurag Nan Chuwa Ay Tataku

(Mar. 10:46-52; Luc. 18:35-43)

<sup>29</sup> As nan cha mak-akan cha Jesus ad Jerico, nan ongoongor ay tataku at inmunudcha kan hiya. <sup>30</sup> Wacha nan chuwa ay nafurag ay nangatokor as nan olet nan korsa. Kuncha pay chinngor ay cha mar-os hi Jesus, infukiawcha, “Sug-angam man paat chakami, he-a ay Kianak David!”

<sup>31</sup> Senengaran nan ongor ay tataku chicha, ya chacha ifiakia kan chicha ay kuminakcha koma. Ngem kenaskasincha infukiaw, “Apo, sug-angam man paat chakami, he-a ay Kianak David.”

<sup>32</sup> Inyawnen kayman Jesus, ya enayakiana chicha, ya kanana, “Ngachana nan laychunyu ay atok kan chakayu?”

<sup>33</sup> “Apo, makaila kami koma,” ensongfiatcha.

<sup>34</sup> Nasug-ang hi Jesus kan chicha, at kenpana nan matacha. Hiya at chi ya makailacha, ya inmunudcha kan Jesus.

## 21

### Nan Nanaychayawan Nan Tataku Kan Jesus As Nan Inmuyana Ad Jerusalem

(Mar. 11:1-11; Luc. 19:28-40; Jn. 12:12-19)

<sup>1</sup> Kun pay cha maesnop cha Jesus ad Jerusalem, inumchancha ad Betfage henan chuntug ay Olivó. Enpaon-onan Jesus nan chuwa as nan disipulusna, <sup>2</sup> ya kanana kan chicha, “Uy kayu henan fiabruy ay sasakiangunyu. Uchananyuntu ay dagus nan hen-ena ay dongki ay naetatakud. Fokatanyu chicha, ya iyaliyu kan ha-un. <sup>3</sup> Mu wachay munsarudsud kan chakayu, kananyuntu un, ‘Masapor nan Apo chicha,’ ya paifangadantu challu ay dagus.”

<sup>4</sup> Enommat na ta matongpar nan infiakian nan pomapadtu ay kanana,

<sup>5</sup> “Ifiakiayu as nan tataku ad Jerusalem un,\* ‘Ilaunyu, cha omali kan chakayu nan ariyu ay napakumbaba ay nunsasakay as nan urfun ay dongki.’”†

\* **21:5** As nan kali ay Griego at kanana, “Nan fiafai ay anak Zion.” Hiyana nan enpangachancha as nan umiili ad Jerusalem. Nan Zion at usa henan chuntug ad Jerusalem. † **21:5** Isa. 62:11; Zac. 9:9

**6** Inmuycha nan disipulusna, at enatcha nan inflin Jesus kan chicha. **7** Inyalicha nan chiyuy hen-ena ay dongki. Inyap-apcha nan chiyucha kakiaycha as nan uchug nan nauycha animar, ya nunsakay hi Jesus as nan urfun. **8** Kaongoran as nan tataku hid-i at inyapragcha nan chiyucha kakiaycha as nan korsa. Nan tapina at senmongpatcha as nan chiyucha pangan chi kaiw, ya inchapratcha as nan korsa ta epailacha ay chayawuncha hi Jesus. **9** Nan ongoongor ay tataku ay emnon-oná ya nan chiyucha inmun-unud kan hiya at infugfukiawcha, “Machaychayaw nan Kianak David! Mabendisyonan koma nan omali as nan ngachan nan Apo!<sup>†</sup> Maichaychayaw hi Apo Dios ad chaya!”

**10** As nan inumchanan cha Jesus ad Jerusalem, nakuru nan am-in ay umili as chi, ya kanancha, “Ngachan man paat toná?”

**11** “Hi toná hi Jesus ay pomapadtu ay i-Nazaret henan probinsiya ay Galilea,” ensongfiat nan ongor ay tataku ay nakiuy kan Jesus.

*Nan Inmuyan Jesus As Templo  
(Mar. 11:15-19; Luc. 19:45-48; Jn. 2:13-22)*

**12** Kun pay sinungkop hi Jesus as nan fiattaw nan Templo, empak-akna nan am-in ay cha mun-el-elaku ya nan cha lomaklaku hid-i. Enlokabfuna nan chiyucha lamesaan nan chiyucha cha munsoksokat as siping<sup>§</sup> ya nan totokoran nan chiyucha cha mun-el-elaku as karopati. **13** Kenalina kan chicha, “Kanan nan naisurat as nan Kalen Apo Dios un, ‘Nan afongku at makali un munkarkarakarian.’ Ngem kunyu at nunfalinun as muntabtafunan chi mangaakiw!”\*

**14** Angkiay ya emmalicha nan nafurag ya nan napilud kan Jesus as Templo, at enpaammayna chicha. **15** Ngem nan anap-apon chi papachi ya nan chiyucha mun-isursuru as Lintig at nunsidlay fungatcha as nan nangil-ancha as nan nakaskaschaay ay enatna ya as nan ongong-a ay cha mangifugfukiaw as Templo, “Machaychayaw nan Kianak David!”

**16** Kenalicha kan Jesus, “Ay chuchungrum nan cha kankanan chatona?”<sup>†</sup> “O met,” ensongfiat Jesus. “Ay chaanyu finasfiasa nan naisurat as nan Kalen Apo Dios ay kanana un, ‘He-a Apo, isuruwam nan anongong-aya nan manutun ay mangifiakia as ustuustu ay panagchayaw kan hiya?’” **17** Angkiay tenaynan Jesus chicha henan siyudad, at uy inmiyan ad Betania.

*Nan Kaiw Ay Igos Ay Intuchor Jesus  
(Mar. 11:12-14, 20-24)*

**18** As nan wiet ay cha munfiangchan cha Jesus ad Jerusalem, nunchukiaang hiya. **19** Inilana nan kaiw ay igos as nan olet nan korsa. Inmuy hiya as nan hana kaiw, ya ininchanana ay kun tubtfu yangkiay chi wacha. Angkiay ya kenalina as nan kaiw, “Maidtu poros kasin fugfukiasmu.” Hiya at chi ya narangu nan kaiw ay igos.

**20** As nan nangil-an nan disipulusna as chi, naschaawcha as solet, ya kanancha kan Jesus, “Anan enat nan kaiw ay igos ay narangu'y dagus?”

**21** “Ifiakiak kan chakayu nan tit-iwa,” ensongfiat Jesus. “Mu wachay pammatiyu ya achi kayu munchuwachuwa, fiakun yangkiay nan enkamanku

‡ 21:9 Sal. 118:26    § 21:12 As nan mangichatonan nan Judio as nan tenawwun ay chatona, umuy as nan fiattaw nan Templo ay mangepasokat as nan siping chi i-Roma as siping chi Judio as nan chiyucha munsoksokat as siping. Mu wachay murpu as achawwi, lomaku as ichatona ay karnero winnu karopati hid-i.    \* 21:13 Isa. 56:7; Jer. 7:11    † 21:16 Sal. 8:2

as nan igos nan maekamanyu, ngem mafialinyu us ay kanan henan nauy chuntug un, ‘Maokwatka ya maichus-orka henan fiayfiay,’ at maekaman tit-iwa. <sup>22</sup> Nan uray ngachana ay chawatunyu as nan kararagyu at maawatyuntu mu afurotunyu.”

*Nan Nurpuwan Nan Kalibfengan Jesus  
(Mar. 11:27-33; Luc. 20:1-8)*

<sup>23</sup> Angkiay ya nunfiangad hi Jesus as Templo. As nan chana mun-is-isuruwan, enmali kan hiya nan anap-apon chi papachi ya nan anam-amá. Senarudsudcha, “Anan nurpuwan man nan kalibfengam ay mangekaman kan chatona? Ngachana nan nangichat kan he-a as nan nauy ay kalibfengan?”

<sup>24</sup> Tinumfor hi Jesus kan chicha, “Wacha us nan usa'y sarudsuchok kan chakayu. Mu masongfiatanyu, ifiakiaku kan chakayu nan nurpuwan nan kalibfengak ay mangekamkaman kan chatona. <sup>25</sup> Ay chaud pay nan nurpuwan nan kalibfengan Juan ay munfunyag? Ay nurpu kan Apo Dios winnu as nan tataku?”

Angkiay kenalicha ay maaapat, “Mu kanan takú un, ‘Nurpu kan Apo Dios,’ kananantu kan chitaku un, ‘Anuyyu ngarud chaan enafurot hiya?’ <sup>26</sup> Ngem mu kanan takú un, ‘Nurpu as nan tataku,’ umugyat takú met as nan atun nan ongoongor ay tataku, tay afurotuncha am-in ay hi Juan at usa ay pomapadtu.” <sup>27</sup> Isunga tinumforcha kan Jesus, “Tuan! Achimi ammu.”

Kenalen us Jesus, “Mu hiyasa, acheck us ngarud ifiakia kan chakayu mu ngachana nan nunkalibfengan as nan chak mangekamkamanan kan chatona.”

*Nan Maepadpachongan Nan Chuwa Ay An-ak*

<sup>28</sup> Infiakian Jesus nan nauy ay maepadpachongan kan chicha: “Ngachana nan munnunumnumyu's na? Wacha nan usa ay ama ay chuwa nan pototna. Inmuy hiya as nan panguru, ya kanana, ‘Anak, somepotka ad wani as uma ay naetanman chi ubas o?’

<sup>29</sup> “‘Annaw,’ ensongfiatna. Ngem kun pay naaw-awni, nunfaliw nan numnumna, at senmepot challu.

<sup>30</sup> “Angkiay ya inmuy nan chiyuy ama as nan enauchi, ya assid-i us challu nan infiakiana. Kenalen nan enauchi un, ‘O pay, Ama.’ Ngem chaan inmuy. <sup>31</sup> Ngachana kan chatud-i ay chuwa nan nangtongpar as nan laychun amacha?”

“Nan panguru,” ensongfiatcha.

Kenalen Jesus kan chicha, “Ifiakiak kan chakayu nan tit-iwa. Nan chiyuya mangam-among as fiaror ya nan fianafiai ay mangepabpafiayad as anchorcha at chicha nan mangon-onu ay uy maetapi henan muntorayan Apo Dios mu chakayu. <sup>32</sup> Tay enmali hi Juan ay Fumufunyag ay mangisuru kan chakayu as nan nalintig ay panagfiayag, ya kunyu chaan enafurot hiya. Ngem nan chiyuya mangam-among as fiaror ya fianafiai ay mangepabpafiayad as anchorcha nan enmafurot kan hiya. Uray as nan narpsaran nan nangil-anyu as nan enmafurotancha, chaan kayu pay laing nunfiafiawi ya enmafurot kan hiya.”

*Nan Maepadpachongan Nan Mangaamma As Nan Uma  
(Mar. 12:1-12; Luc. 20:9-19; 1 Ped. 2:6-8)*

<sup>33</sup> “Chungrunyu nan usa pay ay maepadpachongan. Wacha nan usa ay taku ay nuntanum as ongor ay ubas<sup>‡</sup> as umana. Enaradna nan naliwus, ya nunkaub as munkopkopran as ubas. Nun-amma us as nangatungatu ay fiawen nan munfianfiantay as nan umana. Kun pay narpas sa, enpaammana as nan chiyucha mun-uumauna. Angkiay ya nunfaat henan achawwi ay lukiar. <sup>34</sup> Kun pay inumchan nan timpon chi munpurasan, infiaorna nan chiyucha fiabfiaaruna as nan chiyucha nun-uumauna ta uycha arau nan ubas ay kudwan nan amocha. <sup>35</sup> Ngem lenabkis nan chiyucha nun-uumauna chicha. Senaplesapletcha nan usa, penatuycha nan usa, ya lenomtalomatokcha nan usa. <sup>36</sup> Kasin inmifiaor hiya as tapina ay ong-ongor ay fiabfiaaruna mu nan emnona, ngem assid-i us challu nan enatcha kan chicha. <sup>37</sup> As nan anongosna, infiaorna nan mismu ay anakna kan chicha, tay kanana as numnumna un, ‘Siguradu ay mafainchantu as nan mismu ay anakku.’

<sup>38</sup> “Ngem kun pay inilan nan chiyucha nun-uumauna nan mismu ay anakna, kenalicha un, ‘Nauy nan mangetawid as nan uumauna takú ay natatanman as ubas. Akayu! Patayun takú hiya ta kuwaun takú nan tawiña.’ <sup>39</sup> As nan hiyachi, lenabkischa hiya. Inchus-orchas as nan fiakun sakop nan uma ay natatanman as ubas ya penatuycha.”

<sup>40</sup> Senarudsud Jesus, “Mu hiyasa, as nan munfiangchan nan nakin kuwa as nan uma ay natatanman as ubas, ngachanantu ngun nan atuna as nan chiyucha nun-uumauna?”

<sup>41</sup> Tinumforcha, “Ya kakun kauugyat nan atunantu ay mangpatuy as nan chiyucha manangotettet ay tataku. Angkiay ya enpaaywana nan umana ay natatanman as ubas as nan tukún ay mangichat as nan ustu ay kudwana as nan timpon nan munpurasancha.”

<sup>42</sup> Kenalen Jesus kan chicha, “Ay chaanyu poros finasfiasa nan naisurat as nan Kalen Apo Dios? Kanana un,

‘Nan chiyuy fiatu ay enachen nan chiyucha muntuptuping at hiya nan nunfialín as kaamuchan ay maipugnad. Hiyana nan enat nan Apo, ya anuy paat nakaskaschaaw sa as nan mangiila takú’<sup>§</sup>

<sup>43</sup> Isunga kiapú ta enachiyak, ifiakiak kan chakayu ay achi kayuntu maetapi henan muntorayan Apo Dios, ngem kun at nan chiyucha mangekamkaman as nan laychok nan maetapi. <sup>44</sup> Nan mag-as as nan nauy ay fiatu at mapet-apet-ang. Ngem kun pay mag-as nan hana ay fiatu as nan kumpurmi at kimokunantu nan hana mag-asana.”

<sup>45</sup> Kun pay chinngor nan anap-apon chi papachi ya nan chiyucha Fariseo nan nauy maepadpachongan ay infiakian Jesus, naawatancha ay maepangkep kan chicha nan chana kankanan. <sup>46</sup> As nan hiyachi, penachascha ay mangtiliw hiya, inmugyatcha as nan ongoongor ay tataku, tay infilangcha hiya as usa ay pomapadtu.

## 22

### Nan Maepadpachongan Maepangkep As Nan Chuyas (Luc. 14:15-24)

---

<sup>‡</sup> **21:33** As nan mor-oman nan chiyucha ubas, ipuuy nan chiyucha Judio as nan nakaufian. Kiatikiatinancha ta maaracha nan chanumna. Angkiay ammaancha as fiayas. <sup>§</sup> **21:42** Sal. 118:22-23; Ara. 4:11

<sup>1</sup> Kasin nun-epadpachong hi Jesus as nan tataku, <sup>2</sup> “Nan muntorayan Apo Dios at maepachong as nan usa ay ari ay nunsakiana as nan chuyas nan pototna ay laraki. <sup>3</sup> Kun pay naesakiana am-in, inmifiaor hiya as nan chiyuycha fiabfaaruna ay uy mangayag as nan chiyuycha naayakian ay makichuyas. Ngem nan chiyuycha naayakian at chaancha lenayad ay omali. <sup>4</sup> Kasin inmifiaor as nan tapina ay fiabfaaruna ta uycha ifiakia as nan chiyuycha naayakian un, ‘Akayu! Naesakiana at nan am-in. Naparti at nan fiakami ya nan nunkarukmog ay urfun ay fiakami. O, omali kayu ay makichuyas!’ <sup>5</sup> Ngem chaan penakian-anon nan chiyuycha naayakian, at inturuycha nan sikud ay chacha at-atun. Nan usa at semepot, ya nan usa us at uy nanelaku. <sup>6</sup> Kun pay nan tapina at lenabkischa nan chiyuycha fiabfaarun nan ari. Penalikiatcha pay as solet chicha, ya penatuycha. <sup>7</sup> Nunsidlay fungat nan ari as nan nangchamakiana as nan enommat. As nan hiyachi, infiaorna nan sosorchachuna, at penatuycha nan chiyuycha pomapatuyya pinuorancha nan siyudadcha. <sup>8</sup> Angkiay ya kenalen nan ari as nan tapina'y fiabfaaruna, ‘Naesakiana nan am-in as nan nauy ay chuyas, ngem nan tataku ay enayakiak at achicha maekari ay omali. <sup>9</sup> Uy kayu as nan chiyuycha wuliwor ay korsa ya ayakianyu nan am-in ay tataku ay uchananyu hid-i ta makichuyascha.’ <sup>10</sup> Isunga inmuycha tit-iwa as nan chiyuycha korsa, ya enamongcha nan am-in ay tataku ay inuchanancha ay ammay ya uray mangotettet. As nan hiyachi, napnu as tataku nan afong nan chumuyas.

<sup>11</sup> “Ngem kun pay sinungkop nan ari ay uy mangila as nan chiyuycha naayakian, inilana hid-i nan usa ay taku ay chaan nunfiafiachu as fiachon chi makichuyas.\* <sup>12</sup> ‘Kiayum,’ kenalen nan ari kan hiya, ‘anan enatmu ay sinungkop as na ay chaan nunfiafiachu as fiachon chi makichuyas?’ Kun kinkinak nan taku ay anchi. <sup>13</sup> Angkiay kenalen nan ari as nan chiyuycha fiabfaaruna un, ‘Fiaruchunu nan limana ya sukina, ya ichus-oryu hiya as chará ay kawadan nan ngongot. Hid-i nan mun-ag-akoranantu ya munngengesatantu nan fiab-ana kiapú as fungatna.’” <sup>14</sup> Inyanongos Jesus, “Ongor nan naayakian ay maetapi henan muntorayan Apo Dios, ngem akéti nan napili.”

### Nan Sarudsud Maepangkep As Nan Munfiaroran (Mar. 12:13-17; Luc. 20:20-26)

<sup>15</sup> Angkiay ya nak-ak nan chiyuycha Fariseo, ya uycha nuntuturag mu anan atuncha ay manikap kan hiya babaen as nan sarudsudcha ta wachay mangicharumancha kan hiya. <sup>16</sup> Infiaorcha nan tapina ay disipuluscha ay Fariseo ay kadwacha nan papasorot Ari Herodes ta umuycha kan Jesus. Kuncha pay inumchan kan hiya, kenalicha, “Misturu, ammumi ay tit-iwa nan am-in ay kanam. Ammumi us ay isurom nan tit-iwa ay laychun Apo Dios ay atun nan tataku. Mapapchong nan atum as nan am-in ay tataku, tay achim ifilang nan kasasaadcha. <sup>17</sup> Isunga ifiakiam pay ngarud kan chakami nan munnumnumnummu's na: Ay eparufus nan Lintig takú ay munfiayad kami as fieror kan Emperador winnu achi?”

<sup>18</sup> Ngem aammon Jesus nan mangotettet ay pangkepcha, isunga kenalina, “Chakayu ay pakamankaman, adchi t'uyak chischistingun? <sup>19</sup> Ud-a, omepraila kayu kan ha-un as siping ay ifiarfiaroryu.” Inyalicha kan hiya nan usa ay silsilyu. <sup>20</sup> Senarudsudna kan chicha, “Ngachana nan nakin lupa ya nakin ngachan as na?”

\* **22:11** As nan iniili ay ukialen nan Judio, nan chumuyas nan mangichat as fiachu ay para as nan chiyuycha makichuyas.

**21** “Hi Emperador,” ensongfiatcha.

Angkiay kenalen Jesus kan chicha, “*Mu hiyasa ngarud, ichatyu kan Emperador nan kuk-uwan Emperador; ya ichatyu us kan Apo Dios nan kuk-uwan Apo Dios.*”

**22** As nan nanngorancha's na, naschaawcha as solet. Angkiay ya tenaynancha hiya, at kenmatamcha.

### *Nan Sarudsud Maepangkep As Nan Matakuwan Nan Natuy Manipud As Nan Utýy*

(Mar. 12:18-27; Luc. 20:27-40)

**23** As nan hiyasa challu ay urkiw, inmuycha kan Jesus nan tapen nan Saduseo. Chicha nan bunggoy chi Judio ay mangali un achi matakú nan natuy manipud as nan utýy. Senarudsudcha kan hiya, **24** “Misturu, kenalen met Moises un, ‘*Mu wachay hen-asawa ay maid anakcha ya matuy nan laraki, masapor asaw-un nan sunúd nan laraki nan naellakas ta mu wachay anakcha at maifilangtu nan onga as potot nan chiyuy natuy ay sunúdma.*’†

**25** Wachacha met nan pitu ay hen-anag-i ay lanaraki as nan kawad-ammi. Enmasawa nan panguru, at natuy. Kiapú ta maid empototna, enasawan nan utub nan naellakas. **26** Natuy us hiya ay maid empototna. Assid-i us challu as nan maekatlu inkiana as nan maekapitu. **27** Kuncha pay natuy am-in, natuy nan fiafiai. **28** As nan urkiw ay matakúwan nan nunkatuy manipud as nan utýy, ngachana ngay as nan pitu nan nakin asawa as nan chiyuy fiafiai, tay enasawacha met am-in hiya?”

**29** Tinumfor hi Jesus kan chicha, “*Kenomsaw kayu tit-iwa, tay achiyu maawatan nan maepangkep as nan Kalen Apo Dios, ya achiyu us maawatan nan pannakafialina.*” **30** *Tay as nan matakúwan manipud as nan utýy nan nunkatuy, achicha mun-eennasawa, ngem kuncha at maepachong as nan anheles Apo Dios ad chaya.* **31** *Mu maepangkep as nan matakúwan nan nunkatuy manipud as nan utýy, ay chaanyu finasfiasa nan infiakian Apo Dios kan chakayu? Kanana un,* **32** ‘*Ha-un nan Dios Abraham, nan Dios Isaac ya nan Dios Jacob.*’‡ *Nan laychun tona ay kanan at hiya nan Dios nan natataku, fiakun nan nunkatuy.*”

**33** As nan nanngoran nan ongoongor ay tataku as na, naschaawcha as solet as nan insursuruna.

### *Nan Kaamuchan Ay Filin Apo Dios*

(Mar. 12:28-34; Luc. 10:25-28)

**34** Kun pay chinngor nan chiyuycha Fariseo ay senom-or Jesus nan chiyuycha Saduseo, naamongcha. **35** Nan usa kan chicha ay naraing as nan maepangkep as nan chiyuycha lintig ay insurat Moises at nunsarudsud ay manisting kan Jesus, **36** “Misturu, ngachana man nan kaamuchan ay filin as nan Lintig takú?”

**37** Tinumfor hi Jesus, “*Masapor laylaychum nan Apo ay Diosmu as nan am-in ay pusom, as nan am-in ay lenawam ya as nan am-in ay numnummu.*”§

**38** Hiyana nan kaamuchan ya omona ay lintig Apo Dios. **39** Nan maekadwa ay kaamuchan ay maepachong as nan omona at hiyana: ‘*Masapor laylaychum nan pachongmu ay takú ay kaman as nan atum ay manglaylayad as achormu.*’\* **40** Nan nauycha chuwa ay filin at chicha nan maifisaran nan am-in ay Lintig Moises ya nan insursuron nan chiyuycha pomapadtu.”

† 22:24 Deut. 25:5-6   ‡ 22:32 Exo. 3:6, 15   § 22:37 Deut. 6:5   \* 22:39 Lev. 19:18

*Nan Sarudsud Maepangkep Kan Cristo  
(Mar. 12:35-37; Luc. 20:41-44)*

<sup>41</sup> Kun pay naamong nan chiyuycha Fariseo, senarudsud Jesus kan chicha,  
<sup>42</sup> “Ngachana nan munnunumnumyu as nan maepangkep as nan Cristo?  
Ngachanay nakin kianak kan hiya?”

“Kianak David hiya,” ensongfiatcha.

<sup>43</sup> Senarudsud Jesus kan chicha, “Mu hiyasa, adchi pay ngarud t’uy en-paiifaag nan Espiriton Apo Dios kan David ay awakiana hi Cristo as ‘Apo’? Infiajian David un,

<sup>44</sup> Kenalen nan Apo as nan Apok un,

“Tomokorka as apét kannawanku inkiana amisok nan chiyuycha kafusormu.” †

<sup>45</sup> Kenalen pay Jesus, “Mu hiyasa ngarud ay ‘Apo’ nan pang-awag David kan Cristo, anuyna ngay atun ay kianak David hi Cristo?” <sup>46</sup> Maid poros makasongfiat kan Jesus, ya nunlapu as nan hana ay urkiw, maid nakaiturud ay nunsarudsud kasin kan hiya.

## 23

*Nan Nanengaran Jesus As Nan Chiyuycha Mun-isursuru As Lintig Ya Fariseo*

*(Mar. 12:38-39; Luc. 11:43, 46; 20:45-46)*

<sup>1</sup> Angkiay ya kenalen Jesus as nanongoongor ay tataku ya as nan disipulusna, <sup>2</sup> “Nan chiyuycha mun-isursuru as Lintig ya nan chiyuycha Fariseo at wachay kalibfengancha ay mangepakaawat as nan Lintig Moises. <sup>3</sup> Isunga masapor tongparunu ya atunyu nan am-in ay ifiakiacha. Ngem achiyu turturachun nan chacha at-atun, tay achicha cha atun nan chacha ekaskasaba. <sup>4</sup> Chacha epadpad-un as nan tataku nan linlintig ay achicha kafaelan. Ngem uray mu hiyasa, achicha met uyachun chi uray us-usa paat ay kiayyamotcha ay fumachang kan chicha. <sup>5</sup> Am-in nan chacha at-atun at atuncha yangkiay ta ilau nan tataku chicha. Paaad-achauncha nan kaman mait-ittuwani chi kispuru ay mangittuwancha as nan tapen nan naisurat ay lintig Apo Dios ay ifiatarudcha as ketongcha ya as takraycha.\* Chacha us paanchuanchuwun chi ipay nan kiayachan nan kakiaycha ta epailacha nan kenaamudcha.† <sup>6</sup> Laylaychuncha nan chiyuycha tokoran chi mafifigfig, ya nan chiyuycha kaammayan ay tokoran as tomoktokrancha as nan chiyuycha senagoga. <sup>7</sup> Laylaychuncha ay cha risrisipituwun nan tataku chicha as nan chiyuycha mun-el-elakwan, ya laylaychuncha us ay aw-awakian nan tataku chicha as ‘Misturu’.

<sup>8</sup> “Ngem chakayu at achiyu iyafud ay maawakian kayu as ‘Misturu,’ tay usa yangkiay nan misturuyu, ya kaman kayu hen-anag-i am-in. <sup>9</sup> Maid aw-awakianyu asna’s luta as ‘Ama,’ tay kun usa nan Amayu ay hiya nan wacha ad chaya. <sup>10</sup> Achiyu us iyafud ay maawakian kayu as ‘Apo,’ tay hi Cristo yangkiay nan Apo. <sup>11</sup> Nan kaamuchan kan chakayu at masapor hiya nan fiabfiaarunyu. <sup>12</sup> Nan ngachana ay mangepangatu as achorna at maepababantu. Ngem nan mangepababa as achorna at maepangatuntu.”

† **22:44** Sal. 110:1; Ara. 2:34-35; 1 Co. 15:25      \* **23:5** Deut. 6:8; 11:18. Hiyana nan enkamkamancha ta achi maliw-an nan filfilin Apo Dios.      † **23:5** Num. 15:37-41

*Nan Nang-okomán Jesus As Nan Chiyuycha Fariseo Ya Nan Chiyuycha  
Mun-isursuru As Lintig*

(Mar. 12:40; Luc. 11:39-42, 44, 52; 20:47)

<sup>13</sup> Kenalen pay Jesus, "Kasusug-ang kayu ay mun-isursuru as Lintig ya Fariseo! Pakamankaman kayu, tay iniin-ubyu nan sungkopan koma nan tataku henan muntorayan Apo Dios. Chakayu ay mismu at achi kayu sungkop, ya achiyu pay eparufus ay sungkop nan chiyuycha manglayad ay sungkop hid-i."

<sup>14</sup> ["Kasusug-ang kayu ay mun-isursuru as Lintig ya Fariseo! Pakamankaman kayu, tay isikapanyu ay manguwa as nan ab-afong nan eellakas, ya paanchuanchuwunyu nan kararagyu ta ilaun nan tataku ay ammay kayu. Isunga naliglikiattu nan chusayu!]

<sup>15</sup> "Kasusug-ang kayu ay mun-isursuru as Lintig ya Fariseo! Pakamankaman kayu, tay kudngunyu nan fiayfiay, ya umuy kayu henan achawwi ay nasnasyon ta uy kayu omawis as uray usa ay munfialin as pasorotyu. Kun pay wachay usa ay umunud, munfialinunyu as kaskasin maiflang ay umuy ad inferno mu chakayu!"

<sup>16</sup> "Kasusug-ang kayu, chakayu ay maepachong as nan nunkafurag ay mangepangpangu as nan tataku! Chayu isuru un, 'Achi kis-an tongparun nan esapata mu osarun nan Templo as nan munsapataan. Ngem mu osarun nan fialetok as nan Templo as nan munsapataan, masapor ay tongparun.'

<sup>17</sup> Chakayu ay nunkangokngok ay nafurag! Ngachana nan am-amud kan Apo Dios, ay nan fialetok winnu nan Templo ay hiya nan mangepasanto as nan fialetok? <sup>18</sup> Isursuruyu pay un, 'Nan mangosar as nan altar as nan munsapataana at uray ud-ay achiña tongparun nan ensapatana. Ngem mu osaruna nan chaton as nan altar as nan munsapataana, masapor tongparuna.'

<sup>19</sup> Nunkafurag kayu tit-iwa as solet! Ngachana nan am-amud kan Apo Dios, ay nan maichaton winnu nan altar ay mangepasanto as nan maichaton?

<sup>20</sup> Isunga nan mangosar as nan altar as nan munsapataana at osaruna sa ya nan am-in ay naepatang hesa as nan munsapataana. <sup>21</sup> Kaman us as nan mangosar as nan Templo as nan munsapataana at osaruna sa ya hi Apo Dios ay mamagyan hesa as nan munsapataana. <sup>22</sup> Nan mangosar ad chaya as nan munsapataana at osaruna us challu nan tronon Apo Dios ya nan tenmotokor hid-i.

<sup>23</sup> "Kasusug-ang kayu ay mun-isursuru as Lintig ya Fariseo! Pakamankaman kayu, tay ichatonyu tit-iwa nan pagkapuron nan apetyu ay kaman as nan chiyuycha mangepaammay as machangchang,‡ngem enganuyyu met nan chiyuycha tit-iwa ay amud ay sursuron nan Lintig ay kaman as nan munfialinanyu as nalintig, manangsug-ang ya matalek. Chatona nan masapor ay atunyu, ya achiyu challu enganuy ay mangekaman as nan tapina. <sup>24</sup> Chakayu ay maepachong as nan nunkafurag ay mangepangpangu as nan tataku, paatyu makailaun ay ustu nan achi amud! Kenomsaw kayu, tay maepachong kayu as nan taku ay paat mangsakiat as emok as nan ikopuna, ngem maokmona met chi kamelio!"

<sup>25</sup> "Kasusug-ang kayu ay mun-isursuru as Lintig ya Fariseo! Pakamankaman kayu, tay maepachong kayu as nan taku ay manguras as nan luwar yangkiay nan tasa ya paratu. Ngem nan numnumyu met at napnu as ke-naakum ya kenangekot. <sup>26</sup> Chakayu ay Fariseo ay kaman nunkafurag!"

‡ 23:23 Nan tapina'y etaptapen nan Judío as nan machangchang at "mint, dill" ya "cumin".

*Urasanyu on-onan lukaw nan tasa ya paratu at maurusantu us nan luwar-cha.*

<sup>27</sup> “Kasusug-ang kayu ay mun-isursuru as Lintig ya Fariseo! Pakamankaman kayu, tay maepachong kayu as nan chiyuycha lufok ay napentoran as munpupukaw ay am-ammay chi ilacha. Ngem ad chur-umcha at napnucha as tong-or ya nunkabrok ay achor chi nunkatuy. <sup>28</sup> Hiya us sa kan chakayu ay kaman nalintig as nan mangilan nan tataku. Ngem nan numnumyu at napnu as kenapakamankaman ya kenamananglabsing.”

*Nan Chusan Nan Chiyuycha Mun-isursuru As Lintig Ya Nan Chiyuycha Fariseo*

(Luc. 21:5-19; 11:49-51)

<sup>29</sup> Kenalen pay Jesus, “Kasusug-ang kayu ay mun-isursuru as Lintig ya Fariseo! Pakamankaman kayu, tay iyammaanyu as anam-ammay ay lufok nan chiyuycha pomapadtu ad pus-uy ay penatuy nan kaap-uwanyu, ya arkosanyu nan chiyuycha lufok nan nunkalintig ay tataku. <sup>30</sup> Kananyu pay un, ‘Mu kun kami natataku as nan timpon nan chiyuycha kaap-uwani at chaan kami koma naetapi as nan namatuyancha as nan chiyuycha pomapadtu.’ <sup>31</sup> Ngem kiapú ta asesa nan kenaliyu, inyafudu ay kianak chakayu as nan chiyuycha namatuy kan chatud-i ay pomapadtu. <sup>32</sup> Ayu ngarud, lopasunyu ay mangekaman as nan fiasor ay enlalapon nan kaap-uwanyu! <sup>33</sup> Chakayu ay maepachong as nan urug ya an-ak chi kubra ay nunkasikap! Anan atunyu ay makalisi as nan chusayu ad inferno? <sup>34</sup> Isunga ifiaorku kan chakayu nan chiyuycha pomapadtu ya mamasilib ay tataku ya nan chiyuycha mun-isursuru as nan Kalen Apo Dios. Patayunyuntu nan tapina kan chicha, ya elansayuntu as nan koros nan tapina. Sapsapletunyu nan tapina as nan chiyuycha senagogayu, ya chugchukunyuntu chicha henan il-ili. <sup>35</sup> Isunga machusa kayu kiapú as nan namatuyanyu as nan am-in ay nalintig ay tataku asna's luta nunlapu as nan natuyan Abel ay nalintig inkiana as nan natuyan Zacarias ay potot Barakias ay penatuyyu as nan nunkiakiaw-an nan kuwartu as Templo ya nan altar. <sup>36</sup> Ifiakiak kan chakayu nan tit-iwa ay machusantu nan tataku ad wani kiapú as nan napatuyan chatona am-in.”

*Nan Layad Jesus As Nan I-Jerusalem*

(Luc. 13:34-35)

<sup>37</sup> Kenalen Jesus, “Chakayu ay i-Jerusalem, penatuyyu nan chiyuycha pomapadtu, ya lenomtakyu nan chiyuycha infiaor Apo Dios kan chakayu. Namen kaat ay lenarayadku ay mang-among kan chakayu am-in ay kaman as nan atun nan mangngak ay mangesakub as enpasna, ya kunyu paat achi laychun. <sup>38</sup> Il-ilaunyu! Nataynan ya naenganuy nan siyudadyu. <sup>39</sup> Ifiakiak kan chakayu, achiyaktu kasin il-ilaun inkiana as nan timpu ay mangaliyanyu un, ‘Maichay-chayaw koma nan omali ay infiaor Apo Dios.’ ”\*

## 24

*Nan Nangepakaammuwan Jesus As Nan Machachaelan Nan Templo  
(Mar. 13:1-2; Luc. 21:5-6)*

<sup>1</sup> Pinmitiw hi Jesus as nan Templo. As nan chana mak-akan, naesnop nan disipulusna kan hiya, ya tinugkiawcha kan hiya nan chiyuycha anam-ammay ay nakiaub as fiatu as nan kawad-an nan Templo. <sup>2</sup> Kenalen Jesus

kan chicha, “O, iilaunyu met am-in chaná! Ifiakiak kan chakayu nan tit-iwa ay maidtu mayagyag as uray usa ay fiatu as nan naesasad-ana, tay kuncha am-in maikur-ub.”

*Nan Liglikiat Ay Ommattu  
(Mar. 13:3-13; Luc. 21:7-19)*

<sup>3</sup> As nan nangatokoran Jesus henan chuntug ay Olivo, enmali nan disipulus kan hiya ay chidchicha yangkiay. Kenalicha, “Ifiakiak pay kan chakami mu kaatna nan ommatantu toná, ya ngachananter nan sinyar nan omaliyam ya nan anongos ay urkiw.”

<sup>4</sup> Tinumfor hi Jesus kan chicha, “Il-ilaunyu ta maid mangar-allilaw kan chakayu. <sup>5</sup> Tay ongortu nan tataku ay omali ay mangosar as nan ngachanku ay mangarkali un, ‘Ha-un nan Cristo,’ ya ongortu nan allilawuncha ay tataku. <sup>6</sup> Chungrunyuntu nan kanikong chi kukufiat ya chamag maepangkep as kukufiat henan achawwi ay luglukiar. Ilaunyu ta achi kayu machanakian. Masapor challu ommat chaná, ngem fiakun pay hiyasa nan anongos ay urkiw. <sup>7</sup> Tay munkikinnifiattu nan chiyucha nasyon, ya kaman us nan chiyucha muntorayan. Wachachantu chi fitel ya kichu henan tukutukún ay lukiar. <sup>8</sup> Ngem chatona am-in nan laplapon chi likiat ay kaman as nan munpasikaran chi omanak.

<sup>9</sup> “As nan hiyachi, wachachantu nan mangicharum kan chakayu ta palikiatiun ya patayun chakayu. Inglun chakayuntu as nan am-in ay tataku kiapú as nan pammatiyu kan ha-un. <sup>10</sup> As nan timpu ay anchi at ongorchantu nan mankug as pammaticha. Munsesen nepsepcha ya mun-iinningorcha. <sup>11</sup> Ongorchantu us nan munpaila ay achi tit-iwa ay pomapadtu, ya ongortu nan allilawuncha. <sup>12</sup> Kiapú as nan emongoran chi kenamangotettet, omakakét chi layad nan ongor ay tataku. <sup>13</sup> Ngem nan taku ay mangan-anos ay omafurot inkiana as nan anongos at maesarakantu. <sup>14</sup> Nan nauy Ammay ay Chamag maepangkep henan muntorayan Apo Dios at maekasaba as nan am-in ay tataku asna's luta ay munserfi as pamaneknek kan chicha. Angkiay ya omalintu nan munpatikingkaan chi lufong.”

*Nan Kauugyat Ay Ommat  
(Mar. 13:14-23; Luc. 21:20-24)*

<sup>15</sup> Kenalen pay Jesus, “Isunga as nan mangil-anyuntu as nan ‘Kauugyat ay Chumachael’ ay tenmatakchug as nan nasantowan ay lukiar ay hiya nan infiakian Daniel ay pomapadtu, (Nan mamasa as na at masapor maawatana nan laychun toná ay kanan).<sup>\*</sup> <sup>16</sup> nan umiili ad Judea at masapor lomayawcha ay umuy henan chiyucha chuntug. <sup>17</sup> Nan taku ay wacha as tabfongan nan afongna at achi masapor chumayyu ay mangara as kinakuna as fieruy. <sup>18</sup> Nan senmepot at achi masapor somaor ay mangara as kakaiyna. <sup>19</sup> Kasusug-angtu kayman nan chiyucha masisikug ya nan cha munpasusu as nan hanacha ay urkiw! <sup>20</sup> Ekararagyu kan Apo Dios ta achi paat maiyaspor nan lomayawanyu as nan chinamuy winnu as nan Urkiw ay Mun-iblayan. <sup>21</sup> Tay as nan hana ay timpu, omalintu nan nunsidla ay likiat ay maid maepachongana nunlapu as nan nafiayangan nan lufong inkiana ad wani, ya achintu kasin om-ommat. Maidtu om-ommat as assena as tapen chi urkiw. <sup>22</sup> Mu achi henkemachun Apo Dios nan hanacha ay urkiw ay munlikiatan, maidtu maesarakan ay matataku.

\* <sup>24:15</sup> Dan. 9:27; 11:31; 12:11

*Ngem kiapú as nan pinilina ay tatakuna, henkemachuna nan hanacha ay urkiw.*

<sup>23</sup> “*Angkiay ya mu wachay mangarkali kan chakayu un, ‘Ilaunyu! Nauy nan Cristo!’ winnu ‘Chiyuy hiya!’ at achiyu ab-afurotun.* <sup>24</sup> *Tay munpailachantu nan chiyuycha achi tit-iwa ay Cristo ya achi tit-iwa ay pomapadtu. Omeppailachantu as ongor ay nakaskaschaaw ay sinyar ya milagro ta mu mafialin at allilawuncha uray nan tataku ay pinilen Apo Dios.* <sup>25</sup> *Il-ilaunyu, tay infiafiakiak met at kan chakayu.*

<sup>26</sup> “*Isunga mu kanancha un, ‘Ilaunyu at chiyuy hi Cristo henan disyerto,’ achi kayu um-umuy hid-i. Mu kanancha un, ‘Ilaunyu at nauy hiya asna’s fiaruy,’ achiyu ab-afurotun.* <sup>27</sup> *Tay kaman as nan machiyatan nan fiakilat as nan fomokfoknakian nan urkiw ya silawana inkiana as nan mauy-uyunuwan nan urkiw at assid-i us nan omaliyan nan Naepadtu ay Anak chi Taku.* <sup>28</sup> *O, matongpartu chaná ay kaman as nan kanancha un, ‘Mu ay chaud nan kawadan nan natuy at hid-i us nan maamongan nan chiyuycha kossel ay mangkakan as anchor ay natuy.’”*

#### *Nan Omaliyan Nan Naepadtu Ay Anak Chi Taku (Mar. 13:24-27; Luc. 21:25-28)*

<sup>29</sup> “*Kun pay marpas nan chiyuycha likiat as nan hanacha ay timpu, ngomon-gottu ay dagus nan urkiw, ya achintu somorag nan furan. Nan chiyuycha taraw ad chaya at mag-aschantu, ya achintu manongnong chi aatun nan am-in ay wacha ad chaya.*<sup>†</sup> <sup>30</sup> *Angkiay ya mailantu ad chaya nan sinyar nan omaliyan nan Naepadtu ay Anak chi Taku, ya mun-akorchantu nan am-in ay tataku asna’s luta. Ilauchantu nan Naepadtu ay Anak chi Taku ay cha omali ay wachay ongor ay pannakafialina ya kaichayawana ay maetatapi as nan chiyuycha lifuu ay murpu ad chaya.*<sup>‡</sup> <sup>31</sup> *Kun pay kumangos nan tarampet as napigsa, ifiaornantu nan anhelesna ay uy mang-among as nan tataku ay pinilen Apo Dios henan uray ay chaud ay lukiar ay kawad-ancha.”*<sup>§</sup>

#### *Nan Masuru As Nan Kaiw Ay Igos (Mar. 13:28-31; Luc. 21:29-33)*

<sup>32</sup> Kenalen pay Jesus, “*Suruwunyu koma nan maepadpachongan maepangkep as nan kaiw ay igos. As nan somalipingan nan kaiw ay igos ya maforongan, ammuu at ay kiyud chakun.* <sup>33</sup> *Hiyasa us ay as nan mangilanyu ay cha om-ommat chaná at ammuyuntu ay kiyud at nan omaliyana ay kaman wacha hiya as nan pantiw.* <sup>34</sup> *Ifiakiak kan chakayu nan tit-iwa. Wachacha pay nan tapen nan tataku ad wani ay timpu ay matataku pay as nan ommatantu chatona am-in ay infiakiak.* <sup>35</sup> *Mamaidtu nan chaya ya luta, ngem achintu poros mamaid nan kalek.”\**

#### *Maid Mangammu As Nan Omaliyan Nan Naepadtu Ay Anak Chi Taku (Mar. 13:32-37; Luc. 17:26-30, 34-36)*

<sup>36</sup> Kenalen us Jesus, “*Maid mangammu as nan urkiw ya uras ay ommatantu chatona ay infiakiak. Uray nan anheles ad chaya winnu nan Anak Apo Dios at achicha ammu, ngem kun yangkiay nan Ama.* <sup>37</sup> *Kaman as nan ukialen nan tataku as nan timpon Noe at assid-intu us nan ukialen nan tataku as nan omaliyan nan Naepadtu ay Anak chi Taku.* <sup>38</sup> *Tay as nan hana ay timpu*

<sup>†</sup> **24:29** Isa. 13:10; 34:4; Joel 2:10; 3:15; Pal. 6:12-17    <sup>‡</sup> **24:30** Dan. 7:13; Mar. 9:7; 14:62; Pal. 1:7

<sup>§</sup> **24:31** Dan. 7:2 As nan kali ay Griego at kanana “opat ay kurpuwan chi angin.”    <sup>\*</sup> **24:35** Sal. 102:25-27; Isa. 40:6-8; Mat. 5:18

ay chaan pay napsongan nan intiru ay luta, cha mangmangan, cha umig-ikop, ya cha maas-asawa nan tataku inkiana as nan urkiw ay nunlukianan cha Noe as nan papor. <sup>39</sup> Chaancha naammuwan nan ommattu kan chicha inkiana napsong nan lutaya nurningcha am-in. Assid-i us nan ommattu as nan omaliyan nan Naepadtu ay Anak chi Taku. <sup>40</sup> As nan hiyachi, wachachantu nan chuwa ay lanaraki as payyiw. Maarantu nan usa ya mayagyag nan usa. <sup>41</sup> Wachachantu nan chuwa ay fianafiai ay cha munfiayu. Maarantu nan usa ya mayagyag nan usa. <sup>42</sup> Isunga munsasakiana kayu, tay achiyu ammu nan urkiw ay omaliyan nan Apoyu.

<sup>43</sup> “Ngem numnumunyu na: Mu aammon nan nakin afong nan uras as nan lafi ay omaliyan nan mangaakiw, siguradu ay fiantayana nan afongna ya achina eparufus ay sugpuri nan mangaakiw. <sup>44</sup> Isunga assesa us koma kan chakayu ay masapor nakasakiana kayu, tay omali nan Naepadtu ay Anak chi Taku as nan uras ay achiyu namnamaun.”

### Nan Matalek Ya Nan Masilib Ay Mafiabfiaor (Luc. 12:41-48)

<sup>45</sup> Nun-epadpachong pay hi Jesus. Kenalina, “Ngachana ngarud nan matalek ya masilib ay mafiabfiaor? Hiya nan nangichatan nan amona as kalibfengan ay mun-aywan as nan kakadwana ay mafiabfiaor, ya hiya nan mangiwaras as kanuncha as nan ustu ay timpon chi manganancha? <sup>46</sup> Nakiasat paat sa ay mafiabfiaor as nan komataman nan amonaya asporana hiya ay cha mangekaman as nan infilina. <sup>47</sup> Ifiakiak kan chakayu nan tit-iwa ay kan tosa ay mafiabfiaor nan mangichatantu nan amona as nan kalibfengan ay mun-aywan as nan am-in ay kuk-uwana. <sup>48</sup> Ngem mu nan hana mafiabfiaor ay mangotettet chi ukialina at kanana as numnumna un, ‘Uy at man mafiayag ay munfiangad nan amok.’ <sup>49</sup> Angkiay ya elapuna ay manoprat as nan kakadwana ay mafiabfiaor, ya cha uy makekkekan ya makiig-ikop as nan fianuttang. <sup>50</sup> As nan komataman nan amona as nan urkiw ay achina namnamaun ya uras ay achina ammu, <sup>51</sup> chusauntu nan amona hiya. Hana at etapi hiya as nan chiyuycha pakamankaman. Hid-i nan mun-ag-akorantu nan tataku ya munngesgesatantu chi fiab-acha kiapú as fungatcha.”

## 25

### Nan Maepadpachongan Maepangkep As Nan Hinpuru Ay Fiafiarasang

<sup>1</sup> Nun-epadpachong kasin hi Jesus. Kenalina, “Nan muntorayan Apo Dios at maepachongtu as nan hinpuru ay fiafiarasang ay nangara as pingkicha, ya uycha sinib-at nan chumuyas ay laraki. <sup>2</sup> Nan lema kan chicha at achicha masilib, ngem nan lema at masilibcha. <sup>3</sup> Nan chiyuycha achi masilib at enmetakincha as pingkicha, ngem chaancha enmetakin as lana\* as reserbacha. <sup>4</sup> Ngem kun pay nan chiyuycha lema ay masilib, enmetakincha as pingki ya lana as reserbacha. <sup>5</sup> Kiapú ta nafiyag nan omaliyan nan chiyuy chumuyas ay laraki, nasuyamancha, at nassuyucha.

<sup>6</sup> “Ngem kun pay tongan chi lafi, wacha nan nangifukiaw un, ‘Nauy, cha omali nan chumuyas! Uyyu sib-atun hiya!’ <sup>7</sup> As nan hiyachi, nafiannangun nan hinpuru ay fiafiarasang ya ensakianacha nan silawcha. <sup>8</sup> Kenalen nan chiyuycha achi masilib as nan mamasilib, ‘Ettan chakami pay as tapen chi uyyu lana, tay munkudkuchimet nan silawmi.’

\* 25:3 Lanan chi olivo nan osaruncha.

<sup>9</sup> "Ngem kenalen nan chiyuycha masilib un, 'Achi sa met ommat nan reserbami as para kan chitaku am-in. Kun kayu at uy lomaku as nan chiyuycha mun-el-elaku as para kan chakayu.'

<sup>10</sup> "Isunga nalgwatcha ay uy lomaku. Ngem as nan chacha umuyan, inumchan nan chiyuy chumuyas ay laraki. Nan chiyuycha lema ay nakasakiana at nakiskopcha kan hiya as nan afong ay uycha makichuyasan, angkiay nain-ub nan pantiw.

<sup>11</sup> "Kun pay naawni, enmali us nan chiyuycha fiafarasang ay uy lenmaku. 'Apo, Apo! Paskopum pay chakami!' infukiawcha.

<sup>12</sup> "Ngem tinumfor nan chiyuy chumuyas un, 'Ifiakiak kan chakayu nan titiwa. Achek am-ammu chakayu.'

<sup>13</sup> "Isunga munsasakiana kayu, tay achiyu ammu nan urkiw winnu uras ay omaliyan nan Naepadtu ay Anak chi Taku," inyanongos Jesus.

#### Nan Maepadpachongan Maepangkep As Nan Turu Ay Mafiabfiaor (Luc. 19:11-27)

<sup>14</sup> Nun-epadpachong pay hi Jesus. Kenalina, "Nan muntorayan Apo Dios at maepachongtu as nan usa ay taku ay cha munsakiana ay munfaat as achaachawwi. Sakbay ay mak-ak, enayakiana nan chiyuycha fiabfiaaruna, ya entalekna kan chicha nan kuk-uwana. <sup>15</sup> Hinin-us-ana ay nangettan kan chicha as talento<sup>†</sup> ay maiyunud as nan kafaelancha. As nan usa at lema ay talento. As nan usa us at chuwa ay talento, ya as nan kasin usa at usa ay talento. Haat mak-ak hiya ay munfaat.

<sup>16</sup> "Nan chiyuy naichatan nan lema at uyna innigusu ay dagus, at nunkiaransiya as lema pay ay talento. <sup>17</sup> Hiyasa us nan enat nan chiyuy naichatan nan chuwa. Nunkiaransiya as chuwa pay ay talento. <sup>18</sup> Ngem nan chiyuy naichatan nan usa at uyna enkaub nan siping nan amona.

<sup>19</sup> "Kun pay nafayag, nunfiangad nan amocha ya senarudsudna nan maepangkep as nan sipingna ay entalekna kan chicha. <sup>20</sup> Inmuy nan naichatan nan lema ay talento, ya kanana un, 'Apo, lema ay talento nan entalekmu kan ha-un. Nauycha us nan lema kasin ay talento ay kiaransiyana.' <sup>21</sup> 'Ammay nan enatmu,' ensongfiat nan amona. 'Ammayka ya matalekka kayman ay mafiabfiaor! Kiapú ta matalekka as nan ak-akettuy, etalekkuntu kan he-a nan ong-ongor pay. Aka ngarud ta makelagragsakka kan ha-un.'

<sup>22</sup> "Inmuy us nan naichatan nan chuwa ay talento, ya kanana un, 'Apo, chuwa ay talento nan entalekmu kan ha-un. Nauycha nan chuwa kasin ay talento ay kiaransiyana.' <sup>23</sup> 'Ammay nan enatmu,' ensongfiat nan amona. 'Ammayka ya matalekka kayman ay mafiabfiaor! Kiapú ta matalekka as nan ak-akettuy, etalekkuntu kan he-a nan ong-ongor pay. Aka ngarud ta makelagragsakka kan ha-un.'

<sup>24</sup> "Inmuy us nan naichatan nan usa ay talento, ya kanana un, 'Apo, ammok met ay istriktuka ay taku, tay apetum chi fiakunmu tenanum, ya aniyum chi fiakunmu tinunud. <sup>25</sup> Inmugyatok ngamin kan he-a, isunga uyku enkaub nan chiyuy inchatmu kan ha-un. Nauy challu nan kuwam.' <sup>26</sup> Tinumfor nan amona kan hiya, 'Mangotetet chi ukialem ya napadsokka ay mafiabfiaor! Ammom met payat ay apetok chi fiakunku tenanum ya aniyok chi fiakunku tinunud. <sup>27</sup> Kakunmu ngarud indiposito nan sipingku as bangko ta as nan munfiangchak at araox ay wachay interesna.' <sup>28</sup> As nan hiyachi, kenalen

<sup>†</sup> **25:15** Nan usa'y talento at 6,000 dinario. Nan usa'y dinario at lagfu as nan hin-urkiw.

*nan amo as nan tapina ay mafiabfiaor un, ‘Araunyu nan chiyuy talento kan hiya, ya ichatyu as nan naichatan nan hinpuru ay talento.* <sup>29</sup> *Tay nan taku ay wachay kafaelana at maettan as ong-ongor, at ongortu as solet nan wacha kan hiya. Ngem nan taku ay maid kafaelana at uray nan ak-akettuy ay wacha kan hiya at maarantu.* <sup>30</sup> *Nan nauy mafiabfiaor ay maid kotokna at ichusoryu as chará henan ngongot. Hid-i nan mun-ag-akorantu nan tataku ya munngesgesatantu nan fiab-acha kiapú as fungatcha.’”*

### *Nan Anongos Ay Maokomán Nan Tataku*

<sup>31</sup> Kenalen pay Jesus, “As nan kasin omaliyan nan Naepadtu ay Anak chi Taku ay maila nan kaichayawana ay kadwana nan am-in ay anhelesna, tomokortu hiya as nan tronona ta muntoray. <sup>32</sup> Maepaamongchantu as nan sangwanana nan am-in ay tataku ay murpu henan am-in ay nasyon. As nan hiyachi, pasikunantu chicha as chuwa ay grupo ay kaman as nan mamasikian nan munpaspastor as nan chiyuycha karnero as nan chiyuycha kianching.<sup>‡</sup> <sup>33</sup> Nan chiyuycha nalintig ay tataku ay maepachong as nan karnero at ipuuya as apét kannawana. Nan chiyuycha maepachong as nan kianching at ipuuya as apét kannikidna.

<sup>34</sup> “Angkiay ya kanantu nan ari as nan chiyuycha wacha as apét kannawana un, ‘Akayu, chakayu ay benendisyonan Amak ta maetapi kayu henan muntorayana ay naesasakiana para kan chakayu nunlapu as nan naifiangan nan luta.

<sup>35</sup> Tay as nan nunchukiaangak at penakanak kan chakayu. As nan nasketanak at penaikopak, ya usaak ay kaili ay achiyu am-ammu at menangiliyak kan chakayu. <sup>36</sup> Kun pay maid fiachok at enettanak kan chakayu. As nan nunsaketak at enaywananak, ya as nan naifiaruchak at finisitaak.’

<sup>37</sup> “Angkiay ya tumforchantu nan chiyuycha nalintig ay tataku kan hiya un, ‘Apo, kaatnay nangil-anmi kan he-a ay nunchukiaang, at penakanmi he-a, winnu nasketan, at penaikopmi he-a? <sup>38</sup> Kaatnay nangil-anmi kan he-a as kaili ay achi am-ammu, at menangilimi he-a, winnu maid fiachom, at enettanmi he-a? <sup>39</sup> Kaatna us chi nangil-anmi kan he-a ay nunsaket, at enaywananmi he-a, winnu naifiarud, at finisitami he-a?’

<sup>40</sup> “Kanantu nan ari kan chicha un, ‘Ifiakiak kan chakayu nan tit-iwa ay as nan nangfiadnganyu as nan uray usa as nan chiyuycha apud ay iib-ak ay omaafurot at kan ha-un nan nangekamananyu kan chatud-i.’

<sup>41</sup> “Angkiay ya kananantu as nan chiyuycha wacha as apét kannikidna un, ‘Mak-ak kayu, chakayu ay chusaun Apo Dios. Uy kayu as nan achi mapappauy ay apuy ay naesasakiana para kan Satanás ya as nan anhelesna.

<sup>42</sup> Tay as nan nunchukiaangak at chaanak penakan kan chakayu. As nan nasketanak at chaanak penaikop. <sup>43</sup> Usaak ay kaili ay achi am-ammu at chaanak menangili kan chakayu. Kun pay maid fiachok at chaanak enettan kan chakayu. Nunsaketak at chaanak enaywanan, ya naifiaruchak at chaanak finisita.’

<sup>44</sup> “Angkiay ya tumforchantu us ay mangali kan hiya un, ‘Apo, kaatna nan nangil-anmi kan he-a ay nunchukiaang winnu nasketan winnu kaili ay achi am-ammu winnu maid fiachom winnu nunsaket winnu naifiarud, at chaanmi finadngan he-a?’ <sup>45</sup> Kanantu nan ari kan chicha un, ‘Ifiakiak kan chakayu nan tit-iwa ay as nan chaanyu nangfiadngan as nan uray usa as nan chiyuycha apud ay tataku ay omaafurot kan ha-un at kan ha-un nan chaanyu

<sup>‡</sup> **25:32** Mat. 13:49-50; 25:41

*nangekamanan kan chatud-i.’ 46 Umuychantu chachi as nan chusa ay maid patingkiana. Ngem nan chiyucha nalintig ay tataku at umuycha as nan fiyag ay maid patingkiana.”*

## 26

### *Nan Nuntuturakiancha As Atuncha Ay Mangpatuy Kan Jesus (Mar. 14:1-2; Luc. 22:1-2; Jn. 11:45-53)*

<sup>1</sup> Kun pay narpas ay insuron Jesus chaná am-in, kenalina as nan disipulusna, <sup>2</sup> “Ammuyu met ay as sang-achum at Fiastan chi Munlausen.\* Maipurangtu nan Naepadtu ay Anak chi Taku ay maelansa as nan koros.”

<sup>3</sup> As nan hiyachi, naamong nan anap-apon chi papachi ya nan anam-amáay Judio as nan palasyon nan kangatuwan ay pachen chi Judio ay hi Caifas. <sup>4</sup> Nuntuturagcha as atuncha ay mangtiliw ya mangepapatuy kan Jesus ay achi maam-ammuwanan tataku. <sup>5</sup> Ngem kenalicha, “Aw, achi takú iyaspóor as nan fiasta, tay anakya ya munkukuru nan ongoongor ay tataku.”

### *Nan Nangikuyakian Nan Fiafiai As Fiangoingru As Nan Uron Jesus (Mar. 14:3-9; Jn. 12:1-8)*

<sup>6</sup> As nan kawad-an cha Jesus ad Betania, uycha nakekan as afong Simon ay nakonet ay enpaammay Jesus. <sup>7</sup> As nan chacha manganan, naesnop kan hiya nan usa ay fiafiai. Entatakina nan mangit-ittuwan ay naamma as fiatuy nan ngachana at alabastro ay nanapnu as munfiangu ay nanginngina-an ay lana. Angkiay ya inkuyagna as nan uron Jesus.

<sup>8</sup> As nan nangil-an nan disipulusna, pararuy fungatcha, ya kanancha, “Ayyiwka sa paat! <sup>9</sup> Mu koma naelaku na ay fiangoingru as nangina at maichat nan fakuna as nan chiyucha pugli.”

<sup>10</sup> Ngem ammon Jesus nan chacha kankanan, isunga kenalina kan chicha, “Adchi t’uyyu lilifokun nan nauy fiafiai? Ammay met nan enatna kan ha-un. <sup>11</sup> Tay kanayon ay wachacha kan chakayu nan chiyucha pugli. Ngem mu ha-un, achiyaktu kanayon ay wacha kan chakayu. <sup>12</sup> Inkuyagna sa ay fiangoingru kan ha-un ta esakianana nan achorku as nan mailubkak. <sup>13</sup> Ifiakiak kan chakayu nan tit-iwa. Uray ay chaud henan intiru ay luta nan maekasabaan nan Ammay ay Chamag at maifiabfiaagtus nan enatna as mangnumnumnumuman kan hiya.”

### *Nan Mangesepsepan Judas Kan Jesus (Mar. 14:10-11; Luc. 22:3-6)*

<sup>14</sup> Angkiay ya usa as nan hinpuru ya chuwa ay disipulus Jesus ay hi Judas Iscariote at inmuy as nan anap-apon chi papachi, <sup>15</sup> ya kanana, “Kaatna nan etangchananyu kan ha-un mu ipurangku hi Jesus kan chakayu?” Angkiay tenangchanancha hiya as turon puru ay silver ay siping. <sup>16</sup> Nunlapu as nan hiyachi, nun-anap hi Judas as ustu ay chansa ay mangesepsepana kan Jesus.

### *Nan Nangesakianaan Nan Disipulus As Nan Anongos ay Makiufongancha Kan Jesus (Mar. 14:12-21; Luc. 22:7-13)*

---

\* **26:2** Exo. 12:1-4, 23-27. Nan nauy Fiastan chi Munlausen at hiyana nan mangnumnumnumuman as nan lenmayawan nan chiyucha kianak Israel ay nurpu ad Egipto ad pus-uy.

<sup>17</sup> As nan omona ay urkiw nan Fiastan chi Tenapay ay Maid Lebadurana,<sup>†</sup> inmuy nan disipulus kan Jesus. Senarudsudcha, “Ay chaud nan laychum ay mangesakianaanmi as nan manganan takú as nan Fiastan chi Munlausan?”

<sup>18</sup> Kenalen Jesus, “Uy kayu henan siyudad as nan chiyuy larakí, ya kananyu kan hiya un, ‘Infiakian nan Misturu un kiayud at umchan nan timpu ay enkeddeng Apo Dios para kan hiya. As nan afongmu nan mangiyufongana as nan disipulusna as nan Fiastan chi Munlausan.’ ” <sup>19</sup> Enkaman tit-iwa nan disipulus nan infilin Jesus ay atuncha, ya ensakianacha nan manganan as nan Fiastan chi Munlausan.

<sup>20</sup> Kun pay naschum, nakiufong hi Jesus as nan hinpuru ya chuwa ay disipulusna. <sup>21</sup> As nan chacha manganan, kenalen Jesus, “Ifiakiak kan chakayu nan tit-iwa ay wacha nan usa kan chakayu ay mangesepseptu kan ha-un.”

<sup>22</sup> Nginmuyuscha as solet nan disipulusna, ya enlapucha ay nunsesen-narunu ay nunsarudsud kan Jesus, “Apo, ay ha-un ta?”

<sup>23</sup> “Nan chiyuy nakisiwiw kan ha-un as tenapay as nan mallokong nan mangesepseptu kan ha-un,” ensongfiat Jesus. <sup>24</sup> “Matuytu challu nan Naepadtu ay Anak chi Taku ay kaman as nan kanan nan naisurat as nan Kalen Apo Dios maepangkep kan hiya, ngem kasusug-ang kayman nan hana taku ay mangesepsep as nan Naepadtu ay Anak chi Taku! Un-unuyna at mu kun chaan naiyan-anak hiya!”

<sup>25</sup> Hi Judas ay mangesepseptu kan Jesus at senarudsudna, “Misturu, ay ha-un ta?”

“Kenalem at,” ensongfiat Jesus.

### *Nan Anongos Ay Nakiufongan Jesus As Nan Disipulusna As Nan Lafi (Mar. 14:22-25; Luc. 22:14-20; 1 Co. 11:23-25)*

<sup>26</sup> As nan chacha manganan, enaran Jesus nan tenapay, ya nunyaman kan Apo Dios. Pinutput-ingna, angkiay inchatna as nan disipulusna, ya kanana, “Araunyu ta kanunyu. Hiyana nan achorku.” <sup>27</sup> Angkiay ya enarana nan tasa ay natotorwan as maikop. Kun pay narpas ay nunyaman kan Apo Dios, inchatna kan chicha, ya kanana, “Umikop kayu am-in as na. <sup>28</sup> Hiyana nan charak ay mangepasiguradu as nan fierú ay nakiturakian Apo Dios as nan tataku. Omayastu as nan matuyak para as nan ongor ay tataku ta mapakawancha as nan fiasfiasorcha.<sup>‡</sup> <sup>29</sup> Ifiakiak kan chakayu ay achiyaktu kasín umig-ikop as nan nauy ay unus chi ubas inkiana umchan nan hana ay urkiw ay makiikopaktu kan chakayu as nan fierú ay unus chi ubas henan muntorayan Amak.”

<sup>30</sup> As nan narpasancha ay nunkanta as pangchaychayaw kan Apo Dios, pinmitiwcha ay inmuy henan chuntug ay Olivo.

### *Nan Nangepakaammuwan Jesus As Nan Mangesaotan Pedro Kan Hiya (Mar. 14:27-31; Luc. 22:31-34; Jn. 13:36-38)*

<sup>31</sup> As nan chacha umyan, kenalen Jesus as nan disipulusna, “Ad wani ay lafi, lomayaw kayuntu am-in kiapú kan ha-un, tay wacha nan naisurat as nan Kalen Apo Dios ay kanana, ‘Patayoktu nan mangay-aywan as nan karnero, at masisiyanchantu nan chiyuchya karnero.’<sup>§</sup> <sup>32</sup> Ngem as nan matakuvak manipud as nan utúy, omon-onaaaktu ay umuy ad Galilea mu chakayu.”

<sup>†</sup> 26:17 Exo. 12:14-20, Lev. 23:4-8. Nan Fiastan chi Tenapay ay Maid Lebadurana at pitu ay urkiw ya maiyaspors as nan Fiastan chi Munlausan. <sup>‡</sup> 26:28 Exo. 24:1-8. <sup>§</sup> 26:31 Zac. 13:7

<sup>33</sup> Infiakian Pedro kan Jesus, “Uray mu lomayaw nan am-in ay kakadwak kiapú kan he-a at achiyak challu lomaylayaw.”

<sup>34</sup> Kenalen Jesus kan hiya, “*Ifiakiak kan he-a nan tit-iwa. Ad wani ay lafi, sakbay ay munkokakok nan ka-or at mamiluwaktu esaot kan he-a.*”

<sup>35</sup> Kenalen Pedro, “Uray mu maetapiyak kan he-a ay matuy, acheck challu poros esassaot he-a!” Assesa us nan kenalen nan am-in ay kakadwana ay disipulus.

### *Nan Nunkararakian Jesus Ad Getsemani (Mar. 14:32-42; Luc. 22:39-46)*

<sup>36</sup> Angkiay ya inmuy hi Jesus ay kadwana nan disipulusna henan lukiar ay makali un Getsemani, ya kanana kan chicha, “*Etokoryu hena ta uyak munkararag hid-i.*” <sup>37</sup> Entakina hi Pedro ya nan chuwa ay potot Zebedeo ay lanaraki. As nan hiyachi, enlapuna ay nginmuyus ya nalilifok. <sup>38</sup> Kenalina kan chicha, “*Kamanku ekatuy nan nunsidla ay ngunguyusku. Mayasna kayu ya makipuyat kayu kan ha-un.*”

<sup>39</sup> Angkiay ya inmuy as nan ad-achaawi as akét. Nunlukfub as nan luta, ya enkararagna, “*Ama, mu maifalin at parufusum koma ay marpas nan nauy omali ay likiatku. Uray mu assena, fiakun challu nan laychok nan maekaman, ngem nan laychum.*”\*

<sup>40</sup> As nan nunfiangchana as nan kawad-an nan disipulusna, ininchanana chicha ay nanassuy. Kenalina kan cha Pedro, “*Ay kunyu achi kafaelan ay makipuyat kan ha-un as uray us-usa ay uras?*” <sup>41</sup> *Munpuyat ya munkararag kayu ta achi kayu maamis as nan sulisug. Nakasakiana kayman nan numnumyu, ngem nakapuy nan achoryu.*”

<sup>42</sup> As nan kapidwa, tenmaak hi Jesus ya uy nunkararag. Kenalina, “*Amak, mu acheck maifalin ay malisiyan nan nauy likiatku†sukúdku iliwas, maekaman koma nan laychum.*”

<sup>43</sup> Kun pay nunfiangad as nan maekapidwa as nan kawad-an nan disipulusna, ininchanana chicha ay nanassuy kasin, tay makaskassuycha.

<sup>44</sup> Isunga kasina tenaynan chicha, ya uy nunkararag as nan maekapitlu ay maepachong as nan kenarkalina.

<sup>45</sup> Kun pay nunfiangad as nan kawad-an nan disipulusna, kenalina kan chicha, “*Ay kukutug kayu ay cha mammamassuy ya cha mun-ib-iblay? Ilaunyu! Inumchan at nan uras ay maesepsepan nan Naepadtu ay Anak chi Taku as nan fumafiasor.*” <sup>46</sup> *Ayu, fumangun kayu ta uy takú maisib-at. Ilaunyu, nauy at nan mangesepsep kan ha-un.*”

### *Nan Naniliwancha Kan Jesus (Mar. 14:43-50; Luc. 22:47-53; Jn. 18:3-12)*

<sup>47</sup> Kun pay kukutug ay cha munkarkali hi Jesus, enmali hi Judas ay usa as nan hinpuru ya chuwa ay disipulus. Intutun-udna nan ongoongor ay tataku ay nangachoros ya nangapak-or. Chicha nan infiaor nan anap-apon chi papachi ya anam-amán nan Judio. <sup>48</sup> Nan sinyar ay inturag Judas as nan intutun-udna at assena: “Nan taku ay fisituwok at hiya nan chayu ananapun. Tiliwunyu hiya.” <sup>49</sup> Nunchakpos hi Judas kan Jesus, ya kanana, “Komosta, Misturu?” Angkiay finisituna hiya.

\* <sup>26:39</sup> As nan kali ay Griego at kanana, “araum nan nauy tasa kan ha-un.” ay Griego at kanana, “mu hi ton'a'y tasa at masapor kunku ikopun.”

† <sup>26:42</sup> As nan kali

<sup>50</sup> Kenalen Jesus kan hiya, “*Kiayyum, atum at nan pangkepmu ay enmali hena.*”

Hiyachi ya naesnop nan tataku ay nangtiliw kan hiya ya enpapakudcha ay ustu. <sup>51</sup> Nan usa ay kadwan Jesus at enoknosna nan chorosna. Finakagna nan fiabfiaarun nan kangatuwan ay pachi, at nakingasan nan ingana. <sup>52</sup> Kenalen Jesus kan hiya, “*Esekatmu nan chorosmu. Tay nan am-in ay mangosar as choros as nan taku at matuy us babaen as choros.*” <sup>53</sup> Ay achim ammu ay maftialin ay chumawatak as fiachang kan Amak, at ifaorna ay dagus nan nasorok as piton puru ya chuwa ay lifu ay anheles?

<sup>54</sup> Ngem mu atok sa, anan atun ngay nan naisurat as nan Kalen Apo Dios ay matongpar ay kanana un masapor assena nan atuna ay ommat?”

<sup>55</sup> As nan hiyachi ay uras, kenalen Jesus as nanongoongor ay tataku, “Ay kunkumukuru? Adchi t'uy kayu enmali ay nangachoros ya nangapak-or ay mangtiliw kan ha-un? Inurkiw met ay tomotokorak hid-i's Templo ay cha mun-is-isuru, ya chaanak met tiniltiliw kan chakayu.” <sup>56</sup> Ngem enommat challu am-in chaná ta matongpar nan naisurat as nan Kalen Apo Dios ay infiakian nan chiyuchy pomapadtu.” Angkiay ya lenmayawcha nan am-in ay disipulus, ya tenaynancha hiya.

### *Nan Namistikiaran Caifas Kan Jesus*

(Mar. 14:53-65; Luc. 22:54-55, 63-71; Jn. 18:13-14, 19-24)

<sup>57</sup> Angkiay ya nan chiyuchy naniliw kan Jesus at inyuycha hiya as nan afong Caifas ay kangatuwan ay pachi. Hid-i nan naaamongan nan chiyuchy mun-isursuru as Lintig ya nan anam-amá. <sup>58</sup> Ngem kun pay hi Pedro, inmun-unud ay temtataak inkiana as nan fiattaw nan kangatuwan ay pachi. Angkiay ya sinungkop hiya as nan fiattaw, ya naketokor hid-i as nan chiyuchy kuwarcha ay mangila mu ngachana nan ommat kan Jesus.

<sup>59</sup> Nan anap-apon chi papachi ya nan am-in ay membron nan Sanhedrin at nun-anaanapcha as achi tit-iwa ay pammanknek as mangepafiasorancha kan Jesus ta wachay kiapúna as mangepapatuyancha kan hiya. <sup>60</sup> Ngem maid naanapancha, uray mu enmalicha nan ongor ay muntistigu as achi tit-iwa. As nan anongosna, wachacha nan chuwa ay inmuy as sangwanan, ya kanancha, <sup>61</sup> “Kenalen tonu ay taku un kafaelana ay manachael as nan Templon Apo Dios, ya kiaufunantu as nan unig chi turu ay urkiw.”

<sup>62</sup> Angkiay ya tenmakchug nan kangatuwan ay pachi, ya senarudsudna kan Jesus, “Ay maid esongfiatmu as nan cha epabpfiasor chatona ay tataku kan he-a?” <sup>63</sup> Ngem kun kinkinak hi Jesus. Kenalen nan kangatuwan ay pachi kan hiya, “Esapatan as nan ngachan Apo Dios ay natataku ay ifiakiam mu he-a nan Cristo ay Anak Apo Dios.”

<sup>64</sup> “*Kenalem at,*” ensongfiat Jesus kan hiya. “*Ngem ifiakiak kan chakayu ay munlapu ad wani at ilaunyuntu nan Naepadtu ay Anak chi Taku ay tomotokor as nan apét kannawan Apo Dios ay Mannakafialin as nan am-in. Ilaunyuntu us ay omali hiya ay murpu ad chaya ay maetatapi as nan lifuu.*”‡

<sup>65</sup> Kun pay chinngor nan kangatuwan ay pachi chi, lenaksetna nan fiachuna kiapú as fungatna, ya kanana, “Enpachongna nan achorna kan Apo Dios! Ay masapor takú pay chi muntistigu? Chinngoryu at met nan kenalina. <sup>66</sup> Ngachana ngarud nan kananu's na?”

‡ **26:64** Sal. 110:1; Dan. 7:13; Mat. 24:30

“Libfengna ay matuy!” ensongfiatcha. <sup>67</sup> Angkiay ya tinubfiatubfiaancha nan lupana, ya sinudpasudpakcha hiya. Nan tapina kan chicha at tenampatampakcha hiya, at kenalicha kan hiya, <sup>68</sup> “Ud-a pay! He-a ay Cristo kanu, pugtuwam mu ngachana kan chakami nan nanudpak kan he-a.”

### *Nan Nangesaotan Pedro Kan Jesus*

(Mar. 14:66-72; Luc. 22:56-62; Jn. 18:15-18, 25-27)

<sup>69</sup> Kun pay hi Pedro, kukutug as chará ay naketotokor as nan fiattaw. Inmuy kan hiya nan usa ay mafiafbiaor ay fiafiai, at kenalina, “He-a us at nakekadkadwaka met kan Jesus ay i-Galilea?”

<sup>70</sup> Ngem ensaot Pedro ay mangali as nan sangwanancha am-in un, “Achek poros ammu nan cham kankanan!”

<sup>71</sup> Kun pay inmuy hiya as nan sugpan nan fiattaw, nan tukún ay mafiafbiaor ay fiafiai at enmatonana hiya. Kenalina as nan chiyuycha nangatakchug, “Hi tona met ay laraki at usa us ay nakekadkadwa kan Jesus ay i-Nazaret.”

<sup>72</sup> Kasina ensaot ay nangesapata, “Esapatak ay achek poros am-ammu sa ay taku!”

<sup>73</sup> Kun pay naaw-awni as akét, nan chiyuycha nangatakchug hid-i at enmalicha kan Pedro. Kenalicha kan hiya, “O kayong, usaka us kan chicha, tay maematonanmi met nan ayug nan kalem.”

<sup>74</sup> Angkiay ya ensapatan Pedro as nan achorna, “Chusaunak ud-ay kan Apo Dios mu achi tit-iwa nan chak ifiagfiakia! Achek poros ammu sa ay taku!” Hiya at chi ya nunkokakok nan ka-or, <sup>75</sup> ya nanumnum Pedro nan infiakian Jesus un, “Sakbay ay munkokakok nan ka-or at mamitluwaktu ay esaot kan he-a.” Angkiay ya pinmitiw hi Pedro, ya nunsidlay akorna.

## 27

### *Nan Naiyuyan Jesus Kan Pilato*

(Mar. 15:1; Luc. 23:1-2; Jn. 18:28-32)

<sup>1</sup> As nan wi-ewi-et, nuntuturagcha nan am-in ay anap-apon chi papachi ya nan anam-amán chi Judio ay mangepapatuy kan Jesus. <sup>2</sup> Kun pay narpas chi, finarudcha hiya, ya enek-akcha ay nangipurang kan Gobernador Pilato.

### *Nan Natuyan Judas*

(Ara. 1:18-19)

<sup>3</sup> As nan nangil-an Judas ay nangesepsep kan Jesus ay nakeddengan hi Jesus ay matuy, nunfiafiawi as nan enatna. Infiangadna nan chiyuy turon puru ay silver ay siping as nan anap-apon chi papachi ya as nan anam-amá.

<sup>4</sup> Kenalina, “Finmasorak as solet as nan ok nangesepsepan as nan taku ay maid fiasorna.”

“Anan fiyangmi's sa? Kikiadka as sa,” ensongfiatcha. <sup>5</sup> As nan hiyachi, inchus-or Judas nan chiyuy siping as fieruy nan Templo, ya nak-ak ay uy nunfitkor.

<sup>6</sup> Pinichet nan anap-apon chi papachi nan chiyuycha siping, at kenalicha, “Epawan nan lintig takú ay elamong takú na as nan siping as Templo, tay hi tona at fiayad chi fiyang chi usa ay taku.” <sup>7</sup> Isunga nuntuturagcha ay osaruncha nan siping ay manglakucha as nan lutan nan usa ay mun-amama as fianga ta manglublubkancha as matuy ay kaili ay achi am-ammu. <sup>8</sup> Isunga nan hana ay luta at makali un “Luta ay Nacharaan” inkiana ad wani. <sup>9</sup> Hiyana nan natongparan nan kenalen Jeremias ay pomapadtu ad pus-uy ay kanana,

“Enaran nan tapen chi kianak Israel nan turon puru ay silver ay siping ay hiya nan nuntuturakiancha ay lakon nan fiyagna.

**10** Nan siping at infiayadcha as nan lutan nan mun-amamma as fianga ay hiya challu nan infilin Apo Dios kan ha-un.”\*

*Nan Sarudsud Pilato Kan Jesus  
(Mar. 15:2-5; Luc. 23:3-5; Jn. 18:33-38)*

**11** Kun pay hi Jesus, temtatackchug as nan sangwanan Pilato ay gobernador. Senarudsud Pilato kan hiya, “Ay he-a nan aren chi Judio?”

“He-a nan nangali un ha-un,” ensongfiat Jesus.

**12** Ngem as nan nangepabpfiasoran nan anap-apon chi papachi ya nan anam-amá kan hiya, chaan poros tinumtumfor. **13** As nan hiyachi, kenalen Pilato kan hiya, “Ay achim chungrun nan ongor ay chacha epabpfiasor kan he-a?” **14** Ngem chaan poros senongsongfiatan Jesus nan uray usa as nan chacha epabpfiasor kan hiya. Isunga naschaaw as solet nan gobernador.

*Nan Naekeeddengan Jesus Ay Matuy  
(Mar. 15:6-15; Luc. 23:13-25; Jn. 18:39-19:16)*

**15** Kun kay Fiastan chi Munlausan at ukialen nan gobernador ay umilufus as usa ay fierud ay laychun nan tataku ay chawatun. **16** As nan hana ay timpu, wacha nan usa ay nunchinngor ay fierud ay nan ngachana at Barrabas.† **17** Isunga as nan naamongan nan ongoongor ay tataku, senarudsud Pilato kan chicha, “Ngachana nan laychunyu ay ilufusku para kan chakayu? Ay hi Barrabas winnu hi Jesus ay makali un Cristo?” **18** Infiakiana chi, tay naammuwana ay inpurang nan anap-apon chi Judio hi Jesus kan hiya kiapú as aposcha.

**19** As nan nangatokoran Pilato as nan mun-ok-okomána, empachamag asawana kan hiya, “Achika makifiyang as nan laraki ay ansa ay nalintig, tay wacha nan iniitawku ad kia-u maepangkep kan hiya, at pararu ay napalikiatanak kiapú as nan iniitawku.”

**20** As nan hiyachi, nan anap-apon chi papachi ya nan anam-amá at chinorchorcha nan tataku ta nan chawatuncha ay ilufusna at hi Barrabas ya hi Jesus nan epapatuyna. **21** Kasin senarudsud Gobernador Pilato as nan tataku, “Ngachana kan chatona ay chuwa ay tataku nan laychunyu ay ilufusku?”

“Hi Barrabas!” ensongfiatcha.

**22** Kenalen Pilato kan chicha, “Mu hiyasa, anan atok ngay ngarud kan Jesus ay makali un Cristo?”

“Epaelansam as nan koros!” infukiawcha am-in.

**23** “Adchi ngay? Ngachana man nan mangotettet ay enatna?” senarudsud Pilato.

Ngem kenaskasincha infukiaw, “Epaelansam as nan koros!”

**24** As nan nangil-an Pilato ay maid kotok nan chana munsarsarudsuchan, ngem kun at cha maelapu chi kuru, nunpaara as chanum ya nunfur as nan sangwanan nan ongoongor ay tataku. Kenalina, “Maid fiasorku as nan mangpatuyanyu kan ton aya taku! Kikiad kayu!”

**25** Tinumfor nan am-in ay tataku, “O ud-ay, kikiad kami challu ya nan anakmi!”

\* **27:10** Zac. 11:12-13; Jer. 18:1-3; 32:6-10 † **27:16** Jesus Barrabas ay wacha as nan tapina ay manuskritu.

**26** As nan hiyachi, inlufusna hi Barrabas. Angkiay enpasaplesapleyna hi Jesus as nan sosorchachu, at inpurangna hiya ta maelansa as nan koros.

*Nan Nangot-otyokan Nan Sosorchachu Kan Jesus  
(Mar. 15:16-20; Jn. 19:2-3)*

**27** Angkiay ya inyuy nan sosorchachon Pilato hi Jesus as nan fiattaw nan afong nan gobernador, ya enamongcha nan am-in ay kakadwacha ay sosorchachu ya nan chiyuycha nangularfong kan hiya. **28** Lenafusancha hiya, at kenakiayancha hiya as munchachara ay maepachong as nan fiachon chi ari. **29** Penolekawcha nan komawet ay sufet, ya insukrubcha as uruna. Enpad-uncha nan nunu as nan kannawan ay limana. Angkiay nunpalpal-intumangcha ay mangot-otyok as nan mangarkaliyancha, “Matakutakuka ay Aren chi Judio!” **30** Tinubfiatubfiaancha hiya. Enaracha us nan nunu ya enpak-opak-orcha as nan uruna. **31** Kuncha pay lenpas ay nangotyootyok kan hiya, kenaancha nan munchachara ay kakiay, ya enpafiachucha kasin nan fiachuna. Hacha at ek-ak ay uy mangelansa kan hiya as nan koros.

*Nan Naelansaan Jesus As Nan Koros  
(Mar. 15:21-32; Luc. 23:26-43; Jn. 19:17-27)*

**32** As nan chacha mak-akan, sinib-atcha nan laraki ay i-Cirene ay nan ngachana at Simon. Peneletcha hiya ay manakfiat as nan koros Jesus. **33** Kuncha pay inumchan henan lukiar ay makali un Golgota ay nan laychuna ay kanan at “Lukiar nan Tong-or chi Uru,” **34** penachascha ay mangepaikop kan Jesus as fiayas ay nakaslangan as apkuray ay mangepakyat kanu as putug. Ngem kuna pay tenamtaman, enachina.<sup>‡</sup>

**35** Kuncha pay lenpas ay nangelansa kan hiya as nan koros, finingfinigay-cha nan chiyuycha fiachuna babaen as nan nunfifinnonotancha. **36** Angkiay ya temmokorcha, ya finantayancha hiya hid-i. **37** As nan laramakun nan uruna, inpuuycha nan tabra ay naisusuratan nan naepafiasor kan hiya ay assena nan kafiasaana: “Hi Tona Hi Jesus Ay Aren Chi Judio.” **38** Angkiay ya wachacha us nan chuwa ay homohold-ap ay enlangsacha as nan koros, usa as apét kannawan Jesus, ya nan usa at as apét kannikidna.

**39** Nan chiyuycha cha marmar-os at en-ensotcha hiya<sup>§</sup> ya nunwugwug-wugcha, **40** ay cha mangarkali, “He-a ay nangali un kafielam ay manachael as nan Templo ya kiaufum as nan unig chi turu ay urkiw at ud-a, esarakam nan achormu! Mu tit-iwa ay he-a nan Anak Apo Dios, komsocka as nan koros.”

**41** Uray nan anap-apon chi papachi ay kadwacha, nan mun-isursuru as Lintig ya nan anam-amá at enot-otyokcha hi Jesus as nan chacha mangarkaliyan, **42** “Ensarakana nan tapina ay tataku, ngem achina met poros maesarakan nan achorna. Mu hiya nan aren nan chiyuycha kianak Israel, kakun ud-a komsock ad wani as nan koros, at afurotun takú hiya. **43** Talekuna kanu hi Apo Dios. Ud-a pay, ilau takú mu laychun Apo Dios ay mangesarakan kan hiya ad wani, tay kanana us un Anak Apo Dios hiya.”\* **44** Kaman us as nan chiyuycha chuwa ay homohold-ap ay naelansa as nan koroscha at ininsurtucha us hiya.

*Nan Natuyan Jesus  
(Mar. 15:33-41; Luc. 23:44-49; Jn. 19:28-30)*

<sup>‡</sup> **27:34** Sal. 69:21

<sup>§</sup> **27:39** Sal. 22:7-8

<sup>\*</sup> **27:43** Sal. 22:8

<sup>45</sup> Nunlapu as nan nunkiawa, ngenmongot nan intiru ay luta inkiana alas tres as nan makiayud. <sup>46</sup> As nan kiayud alas tres, inpigsan Jesus ay nangifukiaw, “*Eli, Eli, lama sabaktani?*” Nan laychuna ay kanan at, “Diosku, Diosku, adchi t'uyak ennganuy?”<sup>†</sup>

<sup>47</sup> As nan nanngoran nan tapen nan tataku ay nangatakchug hid-i, kenalicha, “Ku-una cha ayakian hi Elias.” <sup>48</sup> Natannagtag nan usa kan chicha ay uy enmara as espongha. Empasosopna as nan senmoka ay fiayas. Kun pay narpas, empakatna as nan nunu ya inchawchawna ta epasosopna kan Jesus. <sup>49</sup> Ngem kanan nan tapina, “Awni pay ud-a ta ilaun takú mu omali hi Elias ay mangesarakan kan hiya.” <sup>50</sup> Nunfukiaw kasin hi Jesus as napigsa, ya entalekna nan long-agna kan Apo Dios.

<sup>51</sup> As nan hiyachi, narakset ay nunkudwa nan kurtinan<sup>‡</sup> nan Templo nunlapu as lamagna inkiana as kuwabna. Kinmichu as napigsa ya nabtakcha nan chiyuchya anad-acha ay chupras. <sup>52</sup> Natkafian us nan chiyuchya lufok, ya nan ongor ay natuy ay tatakon Apo Dios at natakuwa manipud as nan utúy. <sup>53</sup> Tenaynancha nan chiyuchya lufokcha. As nan natakuwan Jesus manipud as nan utúy, inmuyucha ad Jerusalem ay nasantowan ay siyudad, at ongor chi nangila kan chicha.

<sup>54</sup> Kun pay keneknan nan kapetan chi sosorchachu ya nan sosorchachuna ay nunfiafiatay nan kichu ya inilacha nan enommat, inmugyatcha as solet, ya kanancha, “Tit-iwa payat ay hi tona at Anak Apo Dios!”

<sup>55</sup> As nan ad-achawwi as akét, ongorcha nan fianafiae hid-i ay nangila as nan cha om-ommata. Chicha nan inmun-unud kan Jesus nunlapu ad Galilea ya namadfiachang kan hiya. <sup>56</sup> Nan tapina kan chicha at cha Maria Magdalena, hi Maria ay enan cha Santiago kan Jose, ya nan asawan Zebedeo.

### *Nan Lufun Jesus (Mar. 15:42-47; Luc. 23:50-56; Jn. 19:38-42)*

<sup>57</sup> Kun pay cha maschum, enmali nan usa'y fiaknang ay i-Arimatea ay nan ngachana at Jose. Usa us hiya ay disipulon Jesus. <sup>58</sup> Inmuy hiya kan Pilato, at chinmawat as pammarufus ay arauña nan anchor Jesus. Angkiay ya infilin Pilato ay maichat kan hiya. <sup>59</sup> Enaran Jose nan anchor Jesus, ya penotepotana as nan fierú ay am-ammay ya nacharos ay lopot. <sup>60</sup> Angkiay ya enpaipuyna as nan mismu ay fierú ay lufokna ay enpatuktukna ay chupras. Kun pay narpas, enpaulina nan ad-acha ay fiatu ay nanangubna as nan lufok, angkiay nak-ak. <sup>61</sup> Hi Maria Magdalena ya nan usa ay Maria at wachacha us hid-i ay nangatokor as nan sangwanan nan lufok.

### *Nan Nangkuwarchaancha As Nan Lufok Jesus*

<sup>62</sup> As nan kafikiatana as nan narpasan nan Urkiw nan Munsakianaan para as nan Urkiw ay Mun-iblayancha, inmuy nan anap-apon chi papachi ya nan chiyuchya Fariseo as afong Pilato. <sup>63</sup> Kenalicha, “Apo Gobernador, manumnummi nan kenalen nan enmallilaw ay anchi as nan natatakuwana pay laing ay kanana un, ‘As nan maekatlu ay urkiw at matakuwak manipud as nan utúy.’” <sup>64</sup> Isunga ammay man mu ifilinmu ay mafiantayan ay ustú nan lufokna inkiana as nan maekatlu ay urkiw, tay atun at mu umuy nan disipulusna ay mangakiw as nan achorna, ya epachamagchantu as nan tataku ay nataku hiya manipud as nan utúy. Mu atuncha chi, kaskasin

<sup>†</sup> 27:46 Sal. 22:1    <sup>‡</sup> 27:51 Exo. 26:31-33; Heb. 9:6-8, 12-14.

mangisiw nan anongos ay allilawcha mu nan enmon-oná ay kenalen Jesus un hiya nan Cristo.”

<sup>65</sup> Kenalen Pilato kan chicha, “O, omayag kayu ngarud as sosorchachuyu ay murpu as Templo. Angkiay ya umuy kayu hid-i ya epakuwarchayu ay ustú nan lufok.” <sup>66</sup> Isunga inmuycha, ya inpuuycha nan maton as nan unub nan lufok ta mailatu mu wachay mangulin. Hacha at epakuwarcha as nan sosorchachu.

## 28

### *Nan Natakuwan Jesus Manipud As Nan Utúy*

(Mar. 16:1-8; Luc. 24:1-12; Jn. 20:1-10)

<sup>1</sup> Kun pay inmuy nan Urkiw ay Mun-iblayan as nan wi-ewi-et as nan Chumingku, inmuy cha Maria Magdalena ya nan usa ay Maria as nan lufok Jesus. <sup>2</sup> Kalina at ya nunkichu as napigsa, tay kinmuwab nan usa ay anghel Apo Dios ay nurpu ad chaya. Inulina nan fiatu ay tangub nan lufok, at tenokorana. <sup>3</sup> Nan ilana at munselselap ay kaman fiakilat, ya nan fiachuna at pukpukkawan. <sup>4</sup> As nan nangil-an nan chiyuycha sosorchachu as nan anghel, penmayagpagcha ya nunlukfubcha ay kamancha nanatuy kiapú as nan nunsidla ay ugyatcha.

<sup>5</sup> Kenalen nan anghel as nan fianafiai, “Achi kayu umugyat, tay ammok challu ay chayu anapun hi Jesus ay naelansa as nan koros. <sup>6</sup> Maid hiya hena, tay nataku manipud as nan utúy ay kaman as nan infiakiana. Akayu, ilaunyu nan naesasad-ana. <sup>7</sup> Kamuwunu pay ay uy mangifiakia as nan disipulusna ay nataku hiya manipud as nan utúy, ya omon-oná hiya ay umuy mu chakayu ad Galilea. Ilaunyuntu hiya hid-i. Nunumnumunyu nan infiakiak kan chakayu.”

<sup>8</sup> Isunga kenamon nan fianafiai ay nak-ak as nan chiyuy lufok. Uray mu inmuugyatcha, naragsakcha challu. Angkiay ya temagttagcha ay uy mangifiakia as nan disipulusna. <sup>9</sup> As nan chacha tomagtakian, kalina at ya sinib-at Jesus chicha, ya kanana, “Komosta kayu?” Naesnopcha kan hiya, ya nunpalintumangcha ay nangchun as nan sukina, ya nunchayawcha kan hiya. <sup>10</sup> Haat kanan Jesus kan chicha, “Achi kayu umugyat. Uyyu ifiakia as nan iib-ak ay umuycha ad Galilea. Hid-i nan mangil-anchantu kan ha-un.”

### *Nan Enpachamag Nan Nunfiafiantay As Nan Lufok*

<sup>11</sup> As nan cha umuyan nan fianafiai, nan tapen nan sosorchachu ay nanguwarcha as nan lufok Jesus at inmuycha ad Jerusalem. Infiakiacha as nan anap-apon chi papachi nan am-in ay enom-ommatt.\* <sup>12</sup> Nakiturag nan anap-apon chi papachi as nan anam-amá mu anan atuncha. Nan nunturakiancha at pasoksokancha nan chiyuycha sosorchachu as chamuna ay siping. <sup>13</sup> Infilincha kan chicha, “Ifiakiayu as nan tataku ay enmali nan disipulus Jesus as nan lafi, ya enlayawcha nan achorna as nan nanassuyanmi. <sup>14</sup> Mu machamagtu nan gobernador na, kikiad kamintu ay mangawis kan hiya ta maid chusayu.”

<sup>15</sup> Isunga enaran nan sosorchachu nan siping, ya enatcha tit-iwa nan naifilin kan chicha. Inkiana ad wani, hiyana nan kukutug ay cha munchinchinamag as nan chiyuycha Judio.

\* **28:11** Nan chusan nan sorchachu mu lenmayaw nan fierud at mafialin ay utúy. Ara. 12:19.

*Nan Numpail-an Jesus As Nan Disipulusna  
(Mar. 16:14-18; Luc. 24:36-49; Jn. 20:19-23; Ara. 1:6-8)*

<sup>16</sup> Inmuy nan hinpuru ya usa ay disipulus Jesus henan chuntug ad Galilea ay hiya nan inflin Jesus ay manib-atana kan chicha. <sup>17</sup> As nan nangil-ancha kan hiya, chinaychayawcha hiya, ngem nunchuwachuwa nan tapina kan chicha. <sup>18</sup> Naesnop hi Jesus kan chicha, ya kanana, “Naichat kan ha-un nan am-in ay kalibfengan ad chaya ya asna’s luta. <sup>19</sup> Isunga uy kayu as nan am-in ay tataku henan am-in ay nasyon, ya munfialinuryu chicha as disipulusku. Funyakianyu chicha as nan ngachan nan Ama, nan Anak, ya nan Espiritu Santo. <sup>20</sup> Isuruwanyu chicha ay mangafurot as nan am-in ay inflinku kan chakayu. Nunumnumunyu us ay mawawachaak kan chakayu inkiana as nan munpatingkiaan nan lufong.”

## Nan Ammay Ay Chamag Ay Insurat Marcos Nan Omona Ay Ammuwun

Nan nangisurat as nan nauy Ammay ay Chamag at hi Marcos ay anak Maria ay usa ay nafiaknang ay i-Jerusalem (Ara. 12:12). Kaongoran as nan chiyuya nangad-achar as nan Biblia at kanancha un hi Marcos ay anna nan chiyuy makali un Juan Marcos (Ara. 12:25; 13:5) ay kasinsin Bernabe (Col. 4:10). Hiya nan kadwan cha Pablo kan Bernabe as nan laplapon nan uycha nun-ekaskasabaan. Hiya us at kadwan Pedro (1 Ped. 5:13), ya kanan nan kaongoran ay nangad-achar as nan Biblia un hi Pedro nan nunsuruwan Marcos as nan enkamkaman ya insursuron Apo Jesus as nan kawad-ana pay laing asna's luta.

As nan Aramid 12:12 at insurat Lucas ay wachay afong Marcos ad Jerusalem. Kanan nan chiyuya nangad-achar as nan Biblia un nan afong ay anna at hiya nan maam-amongan nan chiyuya disipulus as nan kawad-ancha ad Jerusalem, ya hena nan anongo ay nanganan Jesus ya nan disipulusna. Asna us nan enmaliyan nan Espiriton Apo Dios as nan disipulusna as nan Urkiw ay Pentecostes (Ara. 2:1-4).

Insurat Marcos nan nauy Ammay ay Chamag as nan chiyuya Gentil, kaskasin as nan chiyuya i-Roma. Isunga enlawlawagna nan tapina ay iniili ay ukialen ya kalen chi Judio ta maawatan nan chiyuya Gentil ay ustу (Mar. 3:17; 5:41; 7:1-4, 11, 34).

Nan nauy Ammay ay Chamag ay insurat Marcos at epakaammuna ay hi Jesus nan Naepadtu ay Anak chi Taku ay enmali ay munserfi. Maila na as nan Mar. 10:45 as nan mangaliyan Jesus un, "Tay uray nan Naepadtu ay Anak chi Taku at chaan enmali ay maserfiyan, ngem kun at munserfi, ya ichatna nan fiyagna ta esarakana nan ongor ay tataku."

Nan usa pay ay pangkep Marcos ay nangisurat as na at ta paneknekana nan kalibfengan ya pannakafialin Jesus ay Anak Apo Dios (Mar. 1:1). Penanekneknan Marcos na babaen as nan nangukuchana as nan ongor ay nakaskaschaaw ay en-enat Jesus ay kaman as nan nangepaammayan Jesus as nan chiyuya munsaket ya nunkaanennetan.

As nan kapitulo 16, nan chiyuya anongos ay versikulu 9-20 at maidcha as nan tapen nan manuskriton chi Griego. Isunga nan chiyuya nangad-achar as nan Biblia at kanancha un chaan insurat Marcos chaná ay versikulu.

### **Nan Nakudkudwaan Nan Nauy Liblu**

Nan Nun-ekaskasabaan Juan Ay Fumufunyag 1:1-13

Nan Nun-is-isuruwan Jesus Ad Galilea 1:14-9:50

Nan Nun-is-isuruwan Jesus Ad Jerusalem 10:1-52

Nan Anongos Ay Chumingkon Jesus Ya Nan Natuyana 11:1-15:47

Nan Natakuwan Jesus Manipud As Nan Utúy 16:1-8

Nan Nunpail-an Jesus Ya Nan Naetag-uyana Ad Chaya 16:9-20

### ***Nan Nun-ekaskasabaan Juan Ay Fumufunyag***

*(Mat. 3:1-12; Luc. 3:1-18; Jn. 1:19-28)*

<sup>1</sup> Hiyana nan nunlapuwan nan Ammay ay Chamag ay maepangkep kan Jesu Cristo ay Anak Apo Dios. <sup>2</sup> Wacha nan infiakian Apo Dios as nan Anakna ad pus-uy ay empaisurtna kan Isaias ay usa ay pomapadtu ay kanana,

“Wacha nan ifiaorku ay mangon-oná mu he-a ay mangesakiana as nan ayum.\*

<sup>3</sup> Ifugfukiawnantu henan lukiar ay disyerto un, ‘Esakianayu nan ayun nan Apo. Munlutkunyu nan ayuna.’ †

<sup>4</sup> Natongpar chaná ay kali as nan nunpail-an Juan ay Fumufunyag henan disyerto. Nunfunfunyag ya nun-ekaskasaba as nan tataku, ya kanana, “Munfiafiawi kayu as nan fiasfiasoryu ya munpafunyag kayu, at pakawanun chakayu kan Apo Dios.” <sup>5</sup> In-inmuy kan hiya nan ongoongor ay tataku ay nurpu henan intiru ay probinsiya ay Judea ya henan siyudad ay Jerusalem. Nunfiafiawicha ay cha mangifiagfiakia as nan fiasfiasorcha, at finunyakian Juan chicha henan wawwang ay Jordan.

<sup>6</sup> Nan fiachon Juan at naamma as chotchot chi kamelio. Nan sinturuna at larat, ya nan kanuna at chuchun ya chilu. <sup>7</sup> Infiagfiakiana as nan tataku, “Wacha nan usa ay cha umunud kan ha-un ay am-amud mu ha-un. Achiyak paat maekari ay munyongyong ay mangfokat as kiarot chi sapatosna. <sup>8</sup> Funyakiak chakayu as chanum, ngem hiya at funyakiana chakayuntu as Espiritu Santo.”

#### *Nan Numpafunyakian Jesus*

(Mat. 3:13-17; Luc. 3:21-22)

<sup>9</sup> As nan hiyachi ay timpu, enmali hi Jesus ay nurpu ad Nazaret henan probinsiya ay Galilea, at nunpafunyag kan Juan henan wawwang ay Jordan.

<sup>10</sup> Kun pay tenmakchang hi Jesus as nan chanum, inilana ay natkafian ad chaya, ya nan Espiritu Santo ay kaman karopati at cha komksop kan hiya.

<sup>11</sup> Wacha us nan kali ay nurpu ad chaya ay kanana, “He-a nan anakku ay laylaychok. Malayaychanak paat kan he-a.”

#### *Nan Nanistingan Satanas Kan Jesus*

(Mat. 4:1-11; Luc. 4:1-13)

<sup>12</sup> Hiya at chi ya entoróng nan Espiritu Santo hi Jesus henan disyerto.

<sup>13</sup> Nagyan hi Jesus hid-i as opat puru ay urkiw ay chinischisting Satanas. Wachacha us nan nunkaatap ay animar as nan kawad-ana, ngem wachacha nan anghelles ay uy nangfiachang kan hiya.

#### *Nan Nangelapuan Jesus Ay Mun-ekasaba*

(Mat. 4:12-17; Luc. 4:14-15)

<sup>14</sup> Kun pay naifiarud hi Juan, inmuy hi Jesus ad Galilea, ya enkaskasabana nan Ammay ay Chamag ay nurpu kan Apo Dios. <sup>15</sup> Kenalina, “Inumchan nan ustу ay timpu, ya kiayud nan muntorayan Apo Dios. Munfiafiawi kayu as nan fiasfiasoryu ya afurotunyu nan Ammay ay Chamag!”

#### *Nan Nangayakian Jesus As Nan Enmon-oná Ay Disipulusna*

(Mat. 4:18-22; Luc. 5:1-11)

<sup>16</sup> As nan cha manarcharanan Jesus henan olet nan Fiayfiay ay Galilea, inilana cha Simon kan Andres ay sunúdna ay cha manafukor‡ henan fiayfiay, tay hiyachi nan chunucha. <sup>17</sup> Angkiay kenalen Jesus kan chicha, “Unuchukan, at isurok chakayu ay munfialin as kaman tomatafukor as tataku.” <sup>18</sup> Hiya at chi ya tenaynancha nan chiyuycha tafukorcha, ya inmunudcha kan hiya.

<sup>19</sup> Kuncha pay tenmaak as akét, inilan Jesus cha Santiago kan Juan ay potot Zebedeo. Nan nauycha hen-aki at wachacha as nan fiangkacha ay cha

\* <sup>1:2</sup> Mal. 3:1    † <sup>1:3</sup> Isa. 40:3    ‡ <sup>1:16</sup> Nan tafukor at kaman sichok, ngem ad-acha-an.

mangesakiana as nan chiyuycha tafukorcha. <sup>20</sup> Hiya at chi ya enayakian us Jesus chicha. Tenaynancha hi amacha ay Zebedeo as nan fiangka ay kadwana nan chiyuycha munlagfuwuncha ay lanaraki, ya inmunudcha kan Jesus.

*Nan Nangepak-akan Jesus As Nan Chiyuycha Anennet  
(Luc. 4:31-37)*

<sup>21</sup> Inmuy cha Jesus ad Capernaum. As nan Urkiw ay Mun-iblayan, sinungkop hiya as nan senagoga ya nun-isuru. <sup>22</sup> Naschaawcha nan chiyuycha chinumngor kan hiya as nan enatna ay nun-isuru, tay as nan nun-isuruwana kan chicha at wachay kalibfengana ay achi kaman as nan chiyuycha munisursuru as Lintig. <sup>23</sup> As nan hiyachi, sinungkop hid-i nan usa ay laraki ay naanennetan, ya infukiawna, <sup>24</sup> “Anan atum kan chakami, Jesus ay i-Nazaret? Ay enmalika ya manachael kan chakami? Am-ammok he-a. He-a nan nasantowan ay finaor Apo Dios!”<sup>§</sup>

<sup>25</sup> Ngem senengaran Jesus nan anennet. Kenalina, “Kuminakka! Fomok-nagka kan tosa ay laraki!” <sup>26</sup> Angkiay ya nunkorchasun nan anennet nan laraki ya nun-uwekuna as napigsa, angkiay fenmoknag kan hiya.

<sup>27</sup> Naschaaw as solet nan am-in ay tataku, ya nunsesennarudsudcha, “Anan ngantona ngun ay fiarú ay sursuru? Wachay kalibfengana ay munfilin uray as nan anennet, at tomongparchal!” <sup>28</sup> Naiwaras ay dagus nan chamag maepangkep kan Jesus henan am-in ay sikib nan Galilea.

*Nan Nangepaammayan Jesus As Nan Ongor Ay Munsaket  
(Mat. 8:14-17; Luc. 4:38-41)*

<sup>29</sup> As nan nak-akan cha Jesus as nan senagoga, inmuycha as afong cha Simon kan Andres. Nakiuy cha Santiago kan Juan. <sup>30</sup> Kuncha pay inumchan, nan katukiangan Simon ay fiafiai at inuumfug ay cha munpuchot. Hiya at chi ya infiaagcha kan Jesus. <sup>31</sup> Kun pay naesnop hi Jesus kan hiya, inunnana nan limana ya finanguna. Nakaan nan puchotna, ya nunsakiana as kanuncha. <sup>32</sup> As nan nauynuwan nan urkiw as nan naschum, inyalen nan tataku kan Jesus nan am-in ay cha munsaket ya nan nunkaanennetan. <sup>33</sup> Naamong nan am-in ay umili as nan pantiw nan afong ay kawad-ana. <sup>34</sup> Ongor nan enpaammayna ay cha munsaket as tukutukún ay saksaket, ya enpfoknagna us nan ongor ay anennet as nan nunkaanennetan. Chaana penarufusan ay munkali nan chiyuycha anennet, tay aammucha hiya.

*Nan Nun-ekaskasabaan Jesus Ad Galilea  
(Luc. 4:42-44)*

<sup>35</sup> As nan kafikiatana, finmangun hi Jesus as nan chaana napat-oran ya nak-ak as nan afong. Inmuy henan kamaid chi umili ay uy nunkararag. <sup>36</sup> Finmangun cha Simon ya nan kakadwana, ya uycha enanap hiya. <sup>37</sup> Kuncha pay naanapan, kenalicha, “Am-in ay tataku at cha chaká anapun.” <sup>38</sup> Ngem tinumfor hi Jesus, “Uy takú henan naesasag-un ay il-ili ta uyak us munkasaba as nan tataku hid-i, tay hiyana nan kiapúna ay enmaliyak.” <sup>39</sup> Isunga nunliklikud hiya henan intiru ay probinsiya ay Galilea ay cha mun-ekaskasaba as nan chiyuycha senagogacha ya cha mun-epafoknag as anennet as nan nunkaanennetan.

*Nan Nangepaammayan Jesus As Nan Nakonet  
(Mat. 8:1-4; Luc. 5:12-16)*

<sup>40</sup> Wacha nan usa ay laraki ay nakonet ay naesnop kan Jesus. Nunpalintumang ay cha munpakpakaasi kan hiya, “Mu laychum, epaammayak koma.”

<sup>41</sup> Nasug-ang kayman hi Jesus, ya inchawchawna nan limana ay nangpa kan hiya. Kenalen Jesus, “*Laychok. Omammayka!*” <sup>42</sup> Hiya at chi ya nakaan nan konetna ya enmammay hiya. <sup>43</sup> Angkiay ya enpaketamna hiya ay dagus, ya pararuy enatna ay nangifilin, <sup>44</sup> “*Achim iflagfiakia as kumpurmi nan enommat kan he-a, ngem kunka at uy munpaila as nan pachi ta ilauna ay nakaan nan saketmu. Kun pay marpas, umichatka as chatonmu kan Apo Dios ay kaman as nan inflin Moises ta mangammuan nan tataku ay nakaan tit-iwa nan saketmu.*”\* <sup>45</sup> Ngem as nan nakakan nan chiyuy laraki, uyna enpachapachamag nan enommat kan hiya. Isunga achi mafialin ay makauy hi Jesus henan il-il ay iilaun chi ongoongor ay tataku, ngem kun at nagyan henan kamaid chi tataku. Uray mu hiyasa, enmali challu kan hiya nan ongor ay tataku ay nurpu henan am-in ay lukiar.

## 2

### *Nan Nangepaammayan Jesus As Nan Paralitiko*

(Mat. 9:1-8; Luc. 5:17-26)

<sup>1</sup> Kun pay inmuy chi kaat ay urkiw, nunfiangad hi Jesus ad Capernaum, ya nunchinamag ay kenmatam hiya. <sup>2</sup> Isunga ongor ay tataku nan cha maamoamong as afongna at maid lukiar chi tapina uray as nan fiattaw. Angkiay as nan cha mangekaskasabaan Jesus as kalen Apo Dios kan chicha, <sup>3</sup> enmali nan opat ay lanaraki ay nangeaattang as laraki ay paralitiko ta iyuycha kan hiya. <sup>4</sup> Maid atuncha ay mangesag-un as nan paralitiko kan Jesus kiapú ta ongor chi tataku. Isunga kinusfotancha nan tabfongan ay tungor Jesus, at inuy-uchya nan paralitiko ay kukutug as nan inuumfukiana. <sup>5</sup> Kun pay inilan Jesus nan pammaticha, kenalina as nan paralitiko, “*Anakku, napakawanka as nan fiasfiasormu.*”

<sup>6</sup> Wachacha nan tapina ay mun-isursuru as Lintig ay naketotokor hid-i ay nangali as numnumucha, <sup>7</sup> “Adchi ngun na as tatu t'uyna kanan sa? Nakkuran man na ay tatu t'uyna epapachong chi achorna kan Apo Dios! Ngachana nan makafiel ay mamakawan as nan tataku as nan fiasfiasorcha mu achi hi Apo Dios yangkiay?”

<sup>8</sup> Hiya at chi ya naammuwan Jesus nan wacha as numnumcha, ya kanana kan chicha, “*Adchi sa as chayu numnumnumun?*” <sup>9</sup> Ngachana nan narakraka as kanan as nan paralitiko, ‘*Napakawanka as nan fiasfiasormu,*’ winnu kanan un, ‘*Maligwatka, araum nan apragmu ya manaranka?*’ <sup>10</sup> Ngem mu hiyasa, atok na ta maammuwanu ay nan Naepadtu ay Anak chi Taku at wachay kalibfengana asna’s luta ay mamakawan as tataku as nan fiasfiasorcha.” Kenalina as nan paralitiko, <sup>11</sup> “*Kanak kan he-a, tomakchugka, araum nan apragmu ya komatamka.*” <sup>12</sup> Hiya at chi ya tenmakchug hiya. Angkiay nun-arana nan apragna, ya nak-ak as nan mangiil-an nan am-in ay tataku. Naschaawcha am-in, ya chinaychayawcha hi Apo Dios, ya kanancha, “Anuy maid inil-ilami as assena!”

### *Nan Nangayakian Jesus Kan Levi*

(Mat. 9:9-13; Luc. 5:27-32)

<sup>13</sup> Inmuy kasin hi Jesus henan olet nan Fiayfiay ay Galilea. Naamong chi ongor ay tataku kan hiya, at enlapuna ay nangisurusuru kan chicha. <sup>14</sup> Kun

\* <sup>1:44</sup> Lev. 14:1-32

pay naaw-awni as nan chana manarcharanan, inilana nan potot Alfeo ay hi Levi ay nangatokor as opisinana ay munfiayfiayachan as fiaror. Kenalen Jesus kan hiya, "Unuchunak." Nunkaliligwat hi Levi ya inmунud kan hiya.

<sup>15</sup> As nan nangatokoran cha Jesus ay makekan as afong Levi, ongor chi mangam-among as fiaror ya tapina ay fumafiasor ay makekan kan chicha, tay ongorcha ay inmunud kan hiya. <sup>16</sup> Kun pay inilan nan chiyuycha munisursu as Lintig ay wacha as nan bunggoy nan chiyuycha Fariseo ay cha makekan hi Jesus as nan chiyuycha fumafiasor ya mangam-among as fiaror, senarudsudcha as nan disipulusna, "Adchi t'uy makekan hiya as nan chiyuycha mangam-among as fiaror ya as nan tapina ay fumafiasor?"

<sup>17</sup> Kun pay chinngor Jesus chi, kenalina kan chicha, "Nan tataku ay achi munsaket at achicha masapor chi choktor, ngem kun at nan chiyuycha munsaket yangkiay. Chaanak enmali ay mangayag as nan nunkalintig, ngem kun at nan fumafiasor."

#### *Nan Maepangkep As Nan Mun-ayunaran (Mat. 9:14-15; Luc. 5:33-35)*

<sup>18</sup> As nan namingsan, chacha mun-ayunar nan disipulus Juan ay Fumufunnyag ya nan disipulus nan chiyuycha Fariseo. Inmuy nan tapina ay tataku kan Jesus, ya senarudsudcha, "Adchi t'uy nan disipulus Juan ya nan disipulus nan chiyuycha Fariseo at mun-ayunarcha, ngem nan disipulusmu at achicha?"

<sup>19</sup> Tinumfor hi Jesus kan chicha, "Ay mun-ayunar nan chiyuycha naayakian ay makichuyas uray mu kukutug nan chumuyas ay laraki kan chicha? Achicha met! Mu kukutug nan chumuyas ay laraki kan chicha, achicha mafalin ay mun-ayunar. <sup>20</sup> Ngem mu umchantu nan timpu ay maek-akan nan chinmuyas ay laraki kan chicha, hiyachintu nan mun-ayunarcha."

#### *Nan Maepangkep As Nan Fiarú Ay Insursuron Jesus (Mat. 9:16-17; Luc. 5:36-39)*

<sup>21</sup> Kenalen us Jesus ay nangepachong, "Maid mangelakub as fiarú ay lopot as nan lukiak ay fiachu. Mu atuna chi, komsun nan naelakub, at makuyud nan lukiak ay fiachu ya kaskasin marakset. <sup>22</sup> Maid us mangittu as kasubsufor ay fiayas as nan lukiak ay mangit-ittuwan ay larat. Mu ipuuyna, epabtaktu nan fiayas nan larat, at maiwagkia nan fiayas ya machachael us nan larat. Ngem kun at maittu nan kasubsufor ay fiayas as nan fiarú ay mait-ittuwan ay larat."\*

#### *Nan Maepangkep As Nan Urkiw Ay Mun-iblayan (Mat. 12:1-8; Luc. 6:1-5)*

<sup>23</sup> As nan usa ay Urkiw ay Mun-iblayan, cha mar-os cha Jesus as nan chiyuycha uma ay natanman as trigo. As nan chacha manarcharanan, enlapon nan disipulusna ay munsaw-i. <sup>24</sup> Angkiay ya kanan nan chiyuycha Fariseo kan Jesus, "Ilaum, adchi t'uycha cha atun nan epawan nan Lintig takú as nan Urkiw ay Mun-iblayan?"

<sup>25</sup> Tinumfor hi Jesus kan chicha, "Ay kunyu chaan poros finasfisia nan enat Ari David ya nan kakadwana as nan nunsaporancha ya nunchukiaangancha? <sup>26</sup> As nan hiyachi ay hi Abiatar nan kangatuwan ay pachen nan chiyuycha Judio, sinungkop hi David as nan munchaychayawan kan Apo Dios ya kenana nan tenapay ay naichaton kan Apo Dios. Ngem epawan nan lintig nan ngachana ay mangan mu achi yangkiay nan papachi.†Inchatna us nan

\* <sup>2:22</sup> Gen. 21:14, 19; Jos. 9:4, 13      † <sup>2:26</sup> 1 Sam. 21:1-6

*tapen nan tenapay as nan kakadwana.”* <sup>27</sup> Kenalen pay Jesus, “*Nan Urkiw ay Mun-iblayan at naammaan para as nan omammayan nan tataku. Chaan nafiyang nan tataku ay para as nan Urkiw ay Mun-iblayan.*” <sup>28</sup> *Isunga nan Naepadtu ay Anak chi Taku nan muntoray uray as nan Urkiw ay Mun-iblayan.”*

### 3

#### *Nan Laraki Ay Nakukuy Nan Usa Ay Limana (Mat. 12:9-14; Luc. 6:6-11)*

<sup>1</sup> Sinungkop kасin hi Jesus as nan senagoga. Wacha hid-i nan usa ay laraki ay nakukuy nan usa ay limana. <sup>2</sup> Wachacha us nan manisium kan Jesus mu epaammayna nan hana laraki as nan Urkiw ay Mun-iblayan ta wachay epafiasorcha kan hiya. <sup>3</sup> Kenalen Jesus as nan nakukuy chi limana, “*Omalika hena.*” <sup>4</sup> Angkiay ya senarudsudna as nan tataku, “*Ngachana nan eparufus nan Lintig ay atun takú as nan Urkiw ay Mun-iblayan? Ay atun takú nan ammay winnu mangotet?*” *Ay esarakan takú nan fiyag chi taku winnu chachaelun?”* Ngem maid nunkali kan chicha. <sup>5</sup> Finmufungat hi Jesus ay nuntat-allang kan chicha, ya nasaket us challu nan numnumna kiapú as nan kenatangken chi numnumcha. Angkiay ya kenalina as nan nakukuy chi limana, “*Uyachum nan limam.*” Inuyadna ya enmammay tit-iwa nan limana. <sup>6</sup> Nak-ak nan chiyucha Fariseo, ya hiya at chi ya uycha enapat as nan chiyucha pasorot Ari Herodes mu anan atuncha ay mangpatuy kan Jesus.

#### *Nan Inmuyan Nan Ongor Ay Tataku Henan Olet Nan Fiyfiay*

<sup>7</sup> Nak-ak hid-i hi Jesus ya nan disipulusna, at inmuycha henan olet nan Fiayfiay ay Galilea. Inmunud kan chicha nanongoongor ay tataku ay nurpu ad Galilea, Judea, <sup>8</sup> Jerusalem, sakopun nan Idumea, as apéti fomokfoknakanian nan urkiw ay usa ay chumang nan wawwang ay Jordan ya nan chiyucha naesasag-un ay siyudad ay Tiro ya Sidon. Nan nauycha ongoongor ay tataku at enmalicha kan Jesus, tay chinngorcha nan en-enatna. <sup>9</sup> Kiapú ta ongor chi tataku, kenalen Jesus as nan disipulusna ay mun-esakianacha as fiangka as munlukianana ta achicha epetun hiya. <sup>10</sup> Kiapú ta ongor chi enpaammayna, nunsosonor nan am-in ay munsaket ay umuy kan Jesus ta paatcha kaprosun hiya. <sup>11</sup> Mu kay ilaun nan nunkaanennetan hi Jesus, nunlukfubcha as nan sangwanana, ya infukiawcha, “*He-a nan Anak Apo Dios!*” <sup>12</sup> Ngem inflin Jesus ay ustу kan chicha ay achicha ifiagfiakia nan maepangkep kan hiya.

#### *Nan Nangpiliyan Jesus As Nan Hinpuru Ya Chuwa Ay Apostolesna (Mat. 10:1-4; Luc. 6:12-16)*

<sup>13</sup> Kun pay tinmikid cha Jesus henan chuntug, enayakian Jesus nan chiyucha laychuna, at enmalicha kan hiya. <sup>14</sup> Kuncha pay inumchan, chinutokana nan hinpuru ya chuwa ay apostolesna ta chicha nan kadkadwana, ya ifiaorna ay uy mun-ekaskasaba. <sup>15</sup> Inchatna us chi kalibfengan kan chicha ay mun-epafoknag as nan chiyucha anennen. <sup>16</sup> Chatona nan hinpuru ya chuwa ay pinilen Jesus: hi Simon (ay ngenadnana as Pedro), <sup>17</sup> nan hen-aki ay cha Santiago kan Juan ay potot Zebedeo (ay chicha nan ngenadnana as Boanerges ay nan laychuna ay kanan at “An-ak chi Kud-or”); <sup>18</sup> hi Andres, hi Felipe, hi Bartolome, hi Mateo, hi Tomas, hi Santiago ay potot Alfeo, hi Tadeo, hi Simon ay mangesasaket as nasyona, <sup>19</sup> ya hi Judas Iscariote ay mangesepseptu kan Jesus.

*Hi Jesus Ya Hi Beelzebub  
(Mat. 12:22-32; Luc. 11:14-23)*

<sup>20</sup> Kun pay narpas chi, kennamatam cha Jesus. Ongor kasin chi tataku ay naamong, at kun achi mawayaan hiya ya nan disipulusna ay mangan. <sup>21</sup> As nan nanngoran nan iib-ana as na, inmuycha as nan kawad-an Jesus ta ekatamcha hiya, tay wachacha nan tataku ay cha mangarkali un uy at natongtongok hiya. <sup>22</sup> Nan tapen nan mun-isursuru as Lintig ay kin-muwab ay nurpu ad Jerusalem at chacha kankanan, “Nan sinungkop man kan hiya at hi Beelzebub! Hiya nan ap-apon nan chiyuchya anennet ay nangichat as pannakafialina ay mangepak-ak as nan chiyuchya anennet.” <sup>23</sup> Kun pay enommat na, enayakian Jesus chicha, ya kanana kan chicha ay mangepadpachong, “Anan atun Satanas ay mangepak-ak as achorna? <sup>24</sup> Mu munkikinnufiat nan tataku henan usa ay muntorayan, machachael nan hana ay muntorayan. <sup>25</sup> Kaman us as nan hinfiaruy ay mu masusumacha at masisiyanchantu. <sup>26</sup> Mu makepatuy hi Satanas as nan chiyuchya anennet ay etorayana ya masisiyancha, munpatingkia nan pannakafialina. <sup>27</sup> Maid makaskop as nan afong nan usa ay kursi ay taku ta akiwuna nan kuk-awan tosa sukuðna on-oná etakud hiya, at maifialina ay akiwun nan wacha as nan afonga.

<sup>28</sup> “Ifiakiak kan chakayu nan tit-iwa ay maifialin ay mapakawan nan tataku as nan am-in ay fiasfiasorchaya uray nan am-in ay karkalicha ay maifusor kan Apo Dios. <sup>29</sup> Ngem nan taku ay munkali as maifusor as nan Espiritu Santo at achi poros mapakpakan, tay nan enatna at fiasor ay maid patingkiana.”

<sup>30</sup> Kenalen Jesus na, tay kenalicha ay naanennetan hiya.

*Nan Enan Jesus Ya Nan Susnúdna Ay Lanaraki  
(Mat. 12:46-50; Luc. 8:19-21)*

<sup>31</sup> Angkiay ya enmalli hi enana ya nan susnúdna ay lanaraki as nan afong ay kawad-ana. Nangatachchugcha as nan fiattaw, ya enpaayagcha hiya. <sup>32</sup> Ongor chi tataku ay nangatokor ay nangaarufong kan Jesus, ya kanancha kan hiya, “Wacha hi enam ya nan susnúdnu ay lanaraki as nan fiattaw ay cha mangepaayag kan he-a.”

<sup>33</sup> Tinumfor hi Jesus, “Ngachancha nan kanam ay enak ya susnúdu?” <sup>34</sup> Nuntat-allang as nan nangaarufong kan hiya, ya kanana, “Nauycha nan tit-iwa ay enak ya susnúdu! <sup>35</sup> Nan uray ngachana ay mangekaman as nan enkeddeng Apo Dios ay atuna at hiya nan tit-iwa ay sunúdu ay laraki winnu fiafiai ya enak.”

## 4

*Nan Taku Ay Uy Nun-iwagwag As Fokel  
(Mat. 13:1-9; Luc. 8:4-8)*

<sup>1</sup> Kasin nun-isuru hi Jesus henan olet nan Fiayfiay ay Galilea. Kiapú ta on-goongor chi tataku ay naamong kan hiya, uy temmokor hiya as nan fiangka ay wacha henan fiayfiay. Nan ongoongor ay tataku at wachacha henan oletna. <sup>2</sup> Ongor chi insursuron Jesus kan chicha ay maepadpachongan, ya as nan nun-is-isuruwana, kenalina kan chicha, <sup>3</sup> “Chungrunu! Wacha nan usa ay taku ay uy nun-iwagwag. <sup>4</sup> As nan chana munwagwagwakian, nag-as nan tapen nan fokel as nan charan. Angkiay ya enmalicha nan kossel ya kenancha. <sup>5</sup> Nan tapina at nag-ascha as nan machupras ay lukiar ay ak-akettuy chi lutana. Kiapú ta ak-akettuy chi lutana, henkemad ay limmisimcha.

**6** Kun pay penomtang nan urkiw, nakling nan chiyuycha cha tomemel. Kiapú ta chaancha lenmamot ad chur-um, narangucha. **7** Nan tapina at nag-ascha as nan kaongoran chi sufet. Naikisancha ay tinmuful as nan ongor ay sufet. Naskorcha ya chaancha finumkias. **8** Nan tapina ay fokel at nag-ascha as nan ammay ay luta. Tinmufulcha ya nasikuncha, at finumkiascha ya enmongorchas maturon pupuru, maunum pupuru ya mahinkiagsot.” **9** Inyanongos Jesus, “Nan wachay ingana ay chumngor at masapor chumngor.”\*

### Nan Pangkep Nan Maepadpachongan (Mat. 13:10-17; Luc. 8:9-10)

**10** Kun pay nauusa hi Jesus, nakiuy kan hiya nan tapen nan tataku ay kadwacha nan hinpuru ya chuwa ay disipulus, ya senarudsudcha nan maepangkep as nan maepadpachongan. **11** Tinumfor hi Jesus kan chicha, “Kan chakayu nan naepakaammuwan nan chiyuycha chaan naam-ammuwan ay maepangkep henan muntorayan Apo Dios. Ngem as nan tapina ay achi omafurot kan ha-un at kun maepadpachong nan am-in ay maisursuru **12** ta ‘uray mu ilailauncha, achicha challu ematonan, ya uray mu chungchunchungruncha, achicha challu maawatan. Tay mu atuncha chaná at munfiangadcha kan Apo Dios, at pakawanuna chicha.”†

### Nan Laychun Ay Kanan Nan Maepadpachongan (Mat. 13:18-23; Luc. 8:11-15)

**13** Angkiay ya nunsarudsud hi Jesus kan chicha, “Ay kunyu chamman achi maawatan na ay maepadpachongan? Anan atunyu ngay ngarud ay mangammu as nan laychun ay kanan nan tapina ay maepadpachongan? **14** Nan chiyuycha fokel ay inwagwag nan mun-iwagwagwag at hiyana nan kallen Apo Dios. **15** Nan tapen nan tataku at maepachongcha as nan fokel ay nag-as as nan charan. As nan manngorancha as nan nauy ay kali, maannali hi Satanas ya kaanuna nan hana kali ay chinngorcha. **16** Assesa us as nan chiyuycha fokel ay naiwagwag as nan machupras ay lukiar. Maepachongcha as nan tataku ay naragsak ay mang-awat ay dagus as nan kallen Apo Dios as nan manngorancha. **17** Achi lomamot ay ustu as nan numnumcha, ya kun hen-omaketan chi omafurotancha. Angkiay ya as nan omaliyan nan likiat winnu mapalikiatancha kiapú as nan enmafurotancha as nan kallen Apo Dios, hiya at chi ya achicha itiruy ay omafurot. **18** Kun pay nan chiyuycha naiwagwag as nan tinmufulwan chi ongor ay sufet at maepachongcha as nan tataku ay manngor as nan kallen Apo Dios. **19** Ngem nan chanchanagcha, nan layadcha ay fumaknang, ya nan tapina ay laylaychuncha ay araua at sulinuncha nan kallen Apo Dios. Mu hiyasa, achicha fumkias. **20** Ngem nan chiyuycha naiwagwag as nan ammay ay luta at chicha chi nan maepachong as nan tataku ay manngor ya mang-awat as nan kallen Apo Dios. Fumkiascha as maturon pupuru, maunum pupuru, ya mahinkiagsot.”

### Nan Maepadpachongan Maepangkep As Nan Pingki (Luc. 8:16-18)

**21** Inturuy Jesus ay nun-epadpachong, “Ay napaskuchan nan pingki ta maop-opan as fianga winnu maipuuy as nan selok nan kama? Ay kun at achi epatang as nan maepatpatngana? **22** Tay maid naetatafun ay achintu maepaila, winnu maid chaan naepakaammu as achintu munmallag. **23** Nan

\* **4:9** Mar. 7:16; Pal. 2:7, 11, 17, 29      † **4:12** Isa. 6:9-10; Jn. 12:40

wachay ingana ay chumngor at masapor chumngor.”<sup>‡</sup> **24** Kenalen pay Jesus kan chicha, “Numnumunyu ay ustu nan chungrunyu! Nan panglukudyu as nan pachongyu ay tataku, assesantu us nan panglukud Apo Dios kan chakayu, ngem kaskasin pay. **25** Tay nan taku ay wachay kafaelana at maettan as ongongor. Nan taku ay maid kafaelana at uray nan ak-akettuy ay wacha kan hiya at maarantu.”

### *Nan Maepadpachongan Maepangkep As Nan Cha Masikun Ay Naetanum*

**26** Kasin nun-epachong hi Jesus, “Nan muntorayan Apo Dios at maepachong as nan taku ay uy mun-iwagwag as fokel chi trigo as umana. **27** As nan massuyana as nan lenafi ya fumangunana as nan winiet, at chacha tumufu ya masikun nan fokel, ngem achina ammu mu anan enatcha ay tinmuifu ya nasikun. **28** Tay nan luta mismu nan manikun ya mangepafukias as nan chiyu naetanum. Omon-onas at pom-on, angkiay manusfus. Angkiay ya manorchang. **29** Kun pay nabkiasan chi, uyna aniyun ay dagus, tay panag-aani.”

### *Nan Maepadpachongan Maepangkep As Nan Fokel Chi Mostasa (Mat. 13:31-32, 34; Luc. 13:18-19)*

**30** Inturuy Jesus, “Ngachana nan mangepachongan takú henan muntorayan Apo Dios, winnu ngachana ay maepadpachongan nan osarok? **31** Maepachong as nan fokel chi mostasa ay kaek-ektelan as nan am-in ay fokel asna's luta. **32** Ngem kun pay maetanum, masikun ya munfialin as kaad-acha-anan as nan am-in ay naetanum as uma. Somapang as anad-acha, isunga mafialin ay somollongan chi kossel nan omalenong ay pangana.”

**33** Ongor chi assesena ay maepadpachongan ay enos-osar Jesus as nan nangekaskasabaana as nan kalen Apo Dios kan chicha. Insursuruwana chicha as nan kafaelancha ay mangawat. **34** Kun maepadpachongan am-in nan enosarna ay naketagtakiatfor kan chicha. Ngem as nan maaangkiayancha, epakaawatna as nan disipulusna nan am-in.

### *Nan Nangepakinkan Jesus As Nan Napigsa Ay Angin (Mat. 8:23-27; Luc. 8:22-25)*

**35** As nan hana ay urkiw as nan naschum, kenalen Jesus as nan disipulusna, “Kumchang takú henan fiayfiay ta umuy takú ad chumang.” **36** Nunlukian nan disipulusna as nan fiangka ay nangatokoran Jesus ya tenaynancha nan ongoongor ay tataku. Wachacha pay nan tapina ay fiangka ay nakiuy kan chicha. **37** Kalina at ya enmali nan mun-atifufud ay angin. Pararu ay cha sopsopyatan nan challuyon nan fiangka, isunga kiayud lumnud. **38** Ngem nanassuy hi Jesus ay nangapongan as nan uchichen nan fiangka. Finangun nan disipulus hiya, ya kanancha, “Misturu, ay achim pakian-anu uray mu lumnud takú?”

**39** Finmangun hi Jesus, ya infilina as nan angin ya nan challuyon, “Kumi-nak kayu!” Kinminak nan angin, ya ammay kasin as solet. **40** Kenalen Jesus kan chicha, “Adchi t'uy kayu umugyat? Ay maid poros pammatiyu?”

**41** Naschaawcha as solet ya nunsesennarudsudcha, “Anan ngachan ngun ton a t'uy uray angin ya challuyon at tongparunchay filina?”

<sup>‡</sup> **4:23** Mat. 11:15; Pal. 3:6, 13, 22; 13:9

**5**

*Nan Laraki Ay Naanennetan  
(Mat. 8:28-34; Luc. 8:26-39)*

<sup>1</sup> Inturuy cha Jesus ay kinumchang henan fiayfiay inkiana inumchancha henan sasakopun nan i-Geresa. <sup>2</sup> Kun pay nunchissaag hi Jesus as nan fiangka, wacha nan nanib-at kan hiya ay usa ay laraki ay naanennetan ay nurpu henan lurubfok <sup>3</sup> ay mamagyanana. Maid at makaetakud kan hiya, uray mu kor-onc nan maosar. <sup>4</sup> Tay namen ongor ay nakor-ongan nan limana ya sukina, ngem kuna challu senokposokpot ya chenachaelna nan kor-onc nan sukina. Maid makaepakud kan hiya, tay kurkursiyan. <sup>5</sup> Inurkiw ya lenafi at cha munlikulikud hiya henan lurubfok ya chunchuntug ay cha mun-uweuwek ya chana ug-ughchun nan achorna as fiatu.

<sup>6</sup> Kuna pay inila hi Jesus henan ad-achawwi pay laing, tenmagtag ay inmuy kan hiya ya nunpalintumang as nan sangwanana. <sup>7</sup> Inpigsana ay nangifukiaw, “Jesus ay Anak nan Kangatuwan ay Dios, anan ngachana nan laychum ay atun kan ha-un? Munsapataka kan Apo Dios ay achiyak palikiatun.”\* <sup>8</sup> Kenalina na, tay kenalen at Jesus kan hiya, “*He-a ay anennet, mak-akka kan ton aay laraki!*”

<sup>9</sup> Angkiay senarudsud Jesus kan hiya, “*Anan ngachanmu man?*”

“Liniblifu nan ngachanku, tay ongoongor kami,” ensongfiatna. <sup>10</sup> Angkiay ya kuncha cha munpakaapakaasi kan Jesus ay achina paat pak-akun chicha henan hana ay lukiar.

<sup>11</sup> As nan naesasag-un, wachachay ongoongor ay fiafuy ay cha munsukor henan filig. <sup>12</sup> Enpakaasen nan chiyuycha anennet kan Jesus, “Ifiaormu ngarud chakami as nan chiyuycha fiafuy ta sugpunmi chicha.”

<sup>13</sup> Isunga penarufusan Jesus chicha. As nan hiyachi, fenmoknag nan chiyuycha anennet as nan laraki ya sinungkopcha as nan chiyuycha fiafuy. Angkiay ya kenamon nan chiyuycha fiafuy ay chinmayyu inkiana nag-ascha henan teng-el, ya nurningcha henan fiayfiay. Nan filang nan chiyuycha fiafuy at umuy as chuwan lifu.

<sup>14</sup> Kun pay inilan nan chiyuycha mun-ay-aywan as fiafuy nan enommat, tenmagtagcha ya uycha enpachamag as nan tataku henan ili ya sigsikib. Immuy nan tataku ay uy nangila as nan enommat. <sup>15</sup> Kuncha pay inumchan as nan kawad-an cha Jesus, inilacha nan laraki ay nak-akan nan liniblifu ay anennet. Nangatokor hid-i ya nangafiachu, ya ammay at chi numnumna. As nan hiyachi, inmugyatcha am-in as solet. <sup>16</sup> Angkiay ya nan chiyuycha nangila as na at infiakiacha as nan tataku nan enommat as nan naanennetan ay laraki ya nan enommat as nan chiyuycha fiafuy. <sup>17</sup> Angkiay enlapucha ay nunpakaasi kan Jesus ta mak-ak hiya henan lukiar ay sasakopuncha. <sup>18</sup> Kun pay cha uy munlukian hi Jesus as nan fiangka, nunpakaasi nan laraki ay fenmoknakan nan chiyuycha anennet ta makiuy koma kan hiya. <sup>19</sup> Ngem chaan penarufusan Jesus hiya. Kuna at kenali kan hiya, “*Komatamka as nan iib-am, ya ifiakiam nan am-in ay enat Apo Dios kan he-a ya nan ongor ay sugangna kan he-a.*” <sup>20</sup> Angkiay ya nak-ak ay inmuy henan makali un Hinpuru ay Siyudad ay cha mangifiagfiakia as nan enat Jesus kan hiya. Naschaaw nan am-in ay tataku ay nanngor.

*Nan Anak Jairo Ya Nan Fiafai Ay Nangpa As Nan Fiachon Jesus  
(Mat. 9:18-26; Luc. 8:40-56)*

\* <sup>5:7</sup> Mar. 1:24

<sup>21</sup> Nunfiangka kasiñ cha Jesus ay kinumchang ad chumang. Kun pay nunchissaag hiya henan olet nan flayflay, enarufong nan ongoongor ay tataku hiya. <sup>22</sup> Angkiay ya enmali nan usa ay ap-apu as nan senagoga ay nan ngachana at Jairo. Kuna pay inila hi Jesus, nunlukfub as nan sangwanana, ya kanana, <sup>23</sup> “Cha maongos nan fumarasang ay pototku. Omalika pay ta epataymu nan limam kan hiya ta omammay ya mataku hiya.” <sup>24</sup> Nakiuy hi Jesus kan hiya. Kuncha pay cha manad-aran, inmunud nan ongoongor ay tataku ya semmalyubyubcha kan Jesus.

<sup>25</sup> Wacha hid-i nan usa ay fiafiai kan chicha ay kun cha mun-ichaichara as hinpuru ya chuwa ay tawwun. <sup>26</sup> Ongor chi likiatna as nan uyna nunpaakiaakiasan as nan ongor ay choktor, ya kinastosna pay nan am-in ay sipingna. Omammay koma hiya, ngem kun at kenmaskasin. <sup>27</sup> Nachamagna nan maepangkep kan Jesus. As nan hiyachi, naktun-ud as nan ongoongor ay tataku inkiana naesnop as uchug Jesus, ya kenpana nan fiachuna, <sup>28</sup> tay kanana as numnumna, “Mu kunku paat kap-un uray nan fiachuna at omammayak.”

<sup>29</sup> Hiya at chi ya nakyat tit-iwa nan cha fomokfoknag ay charana, ya keneknana ay nakaan nan saketna. <sup>30</sup> As nan hiyachi, nakeknan Jesus ay nak-ak chi pannakafialin kan hiya. Isunga nunsakong hiya as nan ongoongor ay tataku, ya kanana, “Ngachana nan nangpa as nan fiachok?”

<sup>31</sup> Tinumfor nan disipulusna, “Ilaum at ongoongor chi tataku ay nangaarfong kan he-a, angkiay sarudsuchum pay laing mu anan nangpa kan he-a?” <sup>32</sup> Ngem nuntat-allang hiya ay nangila mu ngachana nan nangekaman hid-i. <sup>33</sup> Kiapú ta ammon nan fiafiai nan enommat kan hiya, enmali ay cha munpappapayagpag kiapú as ugyatna ya nunlukfub as nan sangwanan Jesus. As nan hiyachi, infiakiana kan Jesus nan am-in ay tit-iwa.

<sup>34</sup> Angkiay ya kenalen Jesus kan hiya, “Anakku, nan pammatem nan nangepaammay kan he-a. Úyka ay kun natalna nan numnummu, tay enmamayka at.”

<sup>35</sup> Kun pay kukutug ay cha munkarkali hi Jesus, wachacha at nan enmali ay nurpu as afong Jairo ay ap-apu as nan senagoga. Kenalicha kan Jairo, “Natuy at nan pototmu ay fumarasang. Anum pay laing lilifokun nan misturu?”

<sup>36</sup> Chaan penakian-anon Jesus nan kenalicha. Ngem kuna at kenali kan Jairo, “Achika umugyat. Kunka omafurot yangkiay.” <sup>37</sup> Maid tukún as penarufusan Jesus ay umunud kan hiya kun yangkiay cha Pedro kan Santiago ya hi Juan ay sunúd Santiago. <sup>38</sup> Kuncha pay inumchan as nan afong Jairo, inilan Jesus nan ongor ay tataku ay cha mun-at-atengorngor. Chacha managchaku ya mun-ag-akor as napigsa. <sup>39</sup> Sinungkop hiya, ya kanana kan chicha, “Adchi tu'y kayu cha mun-at-atengorngor ya mun-ag-akor? Nan onga at chaan natuy, ngem kun yangkiay nanassuy.”

<sup>40</sup> Kuncha at enam-amrang hiya. Ngem enpapitiwna am-in chicha, ya enayakiana nan ama ya enan nan onga, ya nan chiyuycha turu ay disipulusna. Angkiay enpanguna chicha as nan kawad-an nan onga. <sup>41</sup> Inunnana nan liman nan onga, ya kanana kan hiya, “Talita, kum!” Nan laychuna ay kanan at, “Fumarasang, fumangunka!” <sup>42</sup> Hiya at chi ya finmangun tit-iwa nan fumarasang ya nanaran. (Hinpuru ya chuwa nan tawwuna.)

Naschaawcha as solet nan nakiuy kan Jesus. <sup>43</sup> Ngem inflin Jesus kan chicha ay maid poros mangifiagfiag-ancha as nan enommat. Angkiay ya infiakiana kan chicha ay umichatcha as kanun nan fumarasang.

## 6

*Nan Nangachiyancha Kan Jesus Ad Nazaret Ay Ilina  
(Mat. 13:53-58; Luc. 4:16-30)*

<sup>1</sup> Nak-ak hi Jesus hid-i, ya inmuy henan mismu ay ilina. Nakiuycha nan disipulusna kan hiya. <sup>2</sup> As nan Urkiw ay Mun-iblayan, enlapuna ay nun-isuru as nan senagoga, at naschaaw nan ongor ay naangor kan hiya. Kenalicha, “Ay chaud ngun nan nangor-an tono ay taku as nan nauycha isursuruna? Ngantona ngun ay kenaslib nan naichat kan hiya? Anan atuna ngun ay mangekaman as milago? <sup>3</sup> Ay fiakun hiya nan mun-amamma as afong ay anak Maria, ya panguruwan cha Santiago, Jose, Judas ya hi Simon? Ay fiakun nan nauycha susnúnda us ay fianafiai at nakiilicha kan chitaku?” Angkiay ya enachicha at hiya.

<sup>4</sup> Kenalen Jesus kan chicha, “*Maichayaw nan pomapadtu henan kumpurmí ay lukiar, omangkiay henan mismu ay ilina ya as nan iib-ana ya pamiliyana.*” <sup>5</sup> Maid enkaman Jesus as nakaskaschaaw hid-i, kun yangkiay nan nangepatayana as limana as nan chiyuycha akét ay cha munsaket, ya enpaammayna chicha. <sup>6</sup> Naschaaw hiya kiapú ta maid pammaticha kan hiya.

*Nan Nangifiaoran Jesus As Nan Hinpuru Ya Chuwa  
(Mat. 10:5-15; Luc. 9:1-6)*

Angkiay ya nunfiabfiaat hi Jesus ay cha mun-is-isuru henan chiyuycha fiabruy hid-i. <sup>7</sup> Enayakiana nan hinpuru ya chuwa ay disipulus, ya infiaorna chicha ay hinchudwa. Inchatnay kalibfengan kan chicha ay mangepak-ak as nan chiyuycha anennet. <sup>8</sup> Infilina us kan chicha, “*Maid etakinu as nan munfiaatanyu, kun yangkiay surkudu. Achi kayu ometakin as sangát, passek ya siping as forsayu.* <sup>9</sup> *Munsandal kayu, ngem achi kayu ometakin as fiachu ay munsokatanyu.* <sup>10</sup> *As nan ngachana ay ili ay ay-ayanyu ay wachay mangmangili kan chakayu as afongna, hid-i nan magyananyu inkiana mak-ak kayu henan hana ay ili.* <sup>11</sup> *Mu maid poros mangmangili kan chakayu henan ngachana ay lukiar ya achicha chumngor kan chakayu, mak-ak kayu hid-i.* *As nan mak-akanyu, pokpokanyu nan tapok as nan chapanyu ta epailayu ay maid fiyangyu kan chicha mu chusaun Apo Dios chicha.*”

<sup>12</sup> Isunga uycha enkasaba as nan tataku ay masapor munfiafiawicha as nan fiasfiasorcha. <sup>13</sup> Enfafoknagcha nan ongor ay anennet as nan nunkaanennetan. Angkiay kenapuwancha as lana nan ongor ay munsaket, at nakaan nan saketcha.

*Nan Natuyan Juan Ay Fumufunyag  
(Mat. 14:1-12; Luc. 9:7-9)*

<sup>14</sup> Nachamag Ari Herodes ad Galilea nan en-enat Jesus, tay nunchinngor nan ngachan Jesus henan am-in ay lukiar. Kenalen nan tapen nan tataku, “Hiya hi Juan ay Fumufunyag ay kun kasin nataku. Isunga wacha kan hiya nan pannakafialin ay mangekamkaman as nan nauycha nakaskaschaaw.” <sup>15</sup> Ngem kenalen nan tapina, “Hiya hi Elias.” Kenalen pay nan tapina, “Usa hiya ay pomapadtu ay kaman usa as nan chiyuycha pomapadtu ad pus-uy.”

<sup>16</sup> Kun pay chinngor Herodes chaná, kenalina, “A, hiya hi Juan ay Fumufunyag ay empasiwatku nan uruna! Kun payat kasin natakul!” <sup>17</sup> Kenalen Herodes chi, tay hiya nan nangepatiliw ya nangepafliarud kan Juan ay nakokor-ongan. Enat Herodes na ta palaylaychuna hi asawana ay Herodias kiapú ta kenontrakontran Juan hi Herodes, tay enasawana nan ingudha ay

asawan Felipe ay sunúdma. <sup>18</sup> Tay kenarkalen ngamin Juan kan Herodes, “Epawan nan lintig ay asaw-um nan ingudmu.” <sup>19</sup> Isunga wachay ingor Herodias kan Juan, at laychuna ay epapatuy hiya, ngem achina maekaman. <sup>20</sup> Kiapú ta umugyat hi Herodes kan Juan, ensarakana hiya, tay ammuna ay nalintig ya nasantowan hiya. Uray mu nalilifokan as solet hi Herodes as nan chana manmanngoran as nan isursuron Juan, laylaychuna challu ay chumchumngor kan hiya.

<sup>21</sup> Ngem kun pay inumchan nan chansan Herodias as nan urkiw ay mangnumnumnumancha as nan naiyanakan Ari Herodes, nunsicha hi Herodes. Enpaayagna nan am-in ay nunkangatu ay opisyar as nan governo, chiyucha komander chi sosorchachu ya nan mafifigfig ay tataku henan probinsiya ay Galilea. <sup>22</sup> As nan sinungkopan nan anak Herodias ay fiafiai ya nunsasara, nalaylaychan hi Herodes ya nan chiyucha mangilina. Isunga kenalen Ari Herodes as nan fiarasang, “Chawatum kan ha-un nan kumpurmi ay laychum, at ichatku kan he-a.” <sup>23</sup> Ensapatana as nan fiarasang, “Uray mu ngachanay chawatum kan ha-un at ichatku kan he-a, uray ud-ay kakudwan nan chak etortorayan.”

<sup>24</sup> Pinmitiw nan fiarasang, ya uyna senarudsud kan enana, “Ngachana nan chawatok?”

“Nan uron Juan ay Fumufunyag,” ensongfiat enana.

<sup>25</sup> Angkiay ya naannuuy nan fiarasang as nan ari, ya kanana kan hiya, “Nan laychok at ichatmu ay dagus nan uron Juan ay Fumufunyag ay maiittu as nan paratu.”

<sup>26</sup> Pararu ay nalilifokan nan ari, ngem kiapú ta nun-ekari as nan sangwanan nan am-in ay mangilina, mafain ay achi mangekaman as nan enkarina kan hiya. <sup>27</sup> Hiya at chi ya infiaorna nan usa ay sorchachu ay mangiyali as nan uron Juan. Inmuy tit-iwa nan sorchachu, ya siniwatna nan uron Juan as pagfiaruchan. <sup>28</sup> Inyuyna nan uru ay naiittu as nan paratu, ya inchatna as nan fiarasang. Angkiay nan fiarasang at inchatna kan enana. <sup>29</sup> Kun pay nachamag nan disipulus Juan na, enmalicha ay nangara as nan achorna, at uycha inlufok.

### *Nan Namakanan Jesus As Nan Leman Lifu Ay Tataku (Mat. 14:13-21; Luc. 9:10-17; Jn. 6:1-14)*

<sup>30</sup> Nunfiangad nan apostoles kan Jesus, ya infiakiacha nan am-in ay enenatcha ya nan insursurucha. <sup>31</sup> Kiapú ta ongor chi tataku ay cha omaliali kan chicha ya ongorcha us chi cha mak-amak-ak, maid wayacha ay mangan. Isunga kenalen Jesus as nan disipulusna, “Ayu! Uy takú henan kamaid chi tataku ay kun chitchitakuyangkiay ta munpangaiblay kayu as henomaketan.” <sup>32</sup> Isunga nunfiangkacha ay inmuy henan kamaid chi tataku ay kun chidchicha yangkiay.

<sup>33</sup> Ngem ongor ay tataku nan nangematon kan cha Jesus as nan nunligwatancha. Tenmagtagcha ay nurpu henan am-in ay ili, at enmon-onacha ay inumchan henan uy ay-ayan cha Jesus. <sup>34</sup> Kun pay nunchissaag hi Jesus, inilana nan ongoongor ay tataku. Nasug-ang hiya kan chicha, tay kamancha karnero ay maid mangay-aywan kan chicha. Isunga enlapuna ay nangisuru kan chicha as ongor ay sursuru. <sup>35</sup> Kun pay cha maschum, inmuy nan disipulus kan hiya, ya kanancha, “Nauy takú henan kamaid chi umili ya cha us maschum. <sup>36</sup> Epakatammu nan nauyucha tataku ta umuycha henan naesasag-un ay fiabfiabruy ya uycha lomaku as kanuncha.”

<sup>37</sup> Ngem tinumfor hi Jesus kan chicha, “*Chakayu mismu nan mangichat as kanuncha.*”

Angkiay senarudsudcha, “Ay uy kami lomaku as tenapay ay munfiaror as chuwan kiasot ay dinario ta ichatmi as kanuncha?”

<sup>38</sup> Senarudsud us Jesus, “*Kaatnay tenapay nan wacha kan chakayu? Uyyuilaun.*”

Kuncha pay naammuwan, nunfiangadcha, ya kanancha kan hiya, “Lema ay tenapay ya chuwa ay filis.”

<sup>39</sup> Angkiay infilina kan chicha ay epaar-arubfongcha nan tataku ay tomokor as nan lukiam. <sup>40</sup> Isunga temmokorcha ay naam-arubfong as hinkagstot ya henlelman pupuru. <sup>41</sup> As nan hiyachi, enaran Jesus nan lema ay tenapay ya nan chuwa ay filis ya nuntangad ad chaya ay munyaman kan Apo Dios. Kun pay narpas, pinutput-ingna nan chiyuucha tenapay, ya inchatna as nan disipulusna, ya nan disipulusna at inwarascha as nan ongoingor ay tataku. Kinudkudwana us nan chuwa ay filis, ya empaiwarasna kan chicha am-in. <sup>42</sup> Nangancha am-in, at nasufucha. <sup>43</sup> Haat amongun nan disipulus nan chinaancha ay tenapay ya filis ay namnu as nan hinpuru ya chuwa ay uppig. <sup>44</sup> Nan filang nan lanaraki yangkiay ay nangan at leman lifu.

### *Nan Nanaranan Jesus As Nan Oson Nan Chanum (Mat. 14:22-33; Jn. 6:16-21)*

<sup>45</sup> As nan cha mangepaketaman Jesus as nan ongoingor ay tataku, hiya at chi ya enpalukiana nan disipulusna as nan fiangka, ya enpaon-onana chicha ay kinumchang ad chumang ad Betsaida. Kuna pay enpaketam chicha, <sup>46</sup> timnikid hiya henan chuntug ta uy munkararag. <sup>47</sup> As nan naschum, wacha nan fiangka ay nunlurukianan nan disipulusna henan kiawan nan fiayfiay. Kun pay hi Jesus, nauusa pay laing henan chuntug. <sup>48</sup> Inilan Jesus nan chiyuucha disipulusna ay cha maliglikiatan ay mangepacharan as nan fiangka, tay kuncha sisib-atun chi angin.

Kun pay nakapis, inmuy kan chicha hi Jesus ay cha manarcharan as nan oson nan chanum. Elas-iyana koma chicha, <sup>49</sup> ngem as nan nangilan nan disipulus kan hiya ay cha manarcharan as nan oson nan chanum, ninumnumcha ay uy at usa ay anennet. Nun-uwekcha, <sup>50</sup> tay inmugyattha as solet as nan nangil-ancha am-in kan hiya. Ngem nunkanan at Jesus kan chicha, “*Papigsaunyu nan numnumyu! Ha-un na ya! Achi kayu umugyat!*”

<sup>51</sup> Angkiay ya nakilukian hiya kan chicha as nan fiangka, at kinminak nan angin. Naschaawcha as solet, <sup>52</sup> tay chaancha pay naawatan nan titiwa ay laychun ay kanan nan nangepaongoran Jesus as nan tenapay, tay temangken chi numnumcha.

### *Nan Nangepappaammayan Jesus As Nan Chiyuucha Munsaket Ad Genesaret (Mat. 14:34-36)*

<sup>53</sup> As nan kinumchangancha henan fiayfiay, inumchancha ad chumang henan lukiar ay Genesaret, ya entakudcha nan fiangka. <sup>54</sup> Kuncha pay nunchissaag as nan fiangka, enmatonan at nan tataku hi Jesus. <sup>55</sup> Isunga tenmagtagcha henan intiru ay lukiar, ya inyaattangcha nan chiyuucha munsaket ta iyuucha henan uray ay chaud ay nangorancha ay kawad-an Jesus. <sup>56</sup> Uray mu ay chaud nan ay-ayan Jesus ay kaman henan fiabfiabruy, il-ili winnu sigsikib, inuyu nan tataku nan chiyuucha munsaket as nan muel-elakwan. Angkiay nunpakaasicha kan hiya ta paat kap-un nan chiyuucha

munsaket nan uray kiayachan nan fiachuna, at enmammaycha nan am-in ay nangpa kan hiya.

## 7

### *Nan Sursuru Ay Enpatawid Nan Kaap-uwan (Mat. 15:1-9)*

<sup>1</sup> As nan namingsan, naamong kan Jesus nan chiyuycha Fariseo ya nan tapen nan mun-isursuru as Lintig ay nurpu ad Jerusalem. <sup>2</sup> Inilacha ay cha mangan nan tapen nan disipulus Jesus ay chaancha nunfur. Chaancha inunud nan ustu ay iniili ay ukialen nan Judio. <sup>3</sup> (Tay nan chiyuycha Fariseo ya am-in ay Judio at chacha un-unuchun nan iniili ay ukialen nan uycha kaap-uwan ay enpatawidcha kan chicha ay hiya nan achicha manganan mu achicha munfur. <sup>4</sup> Mu murpucha as nan mun-el-elakwan, achicha mangan sukdcha mun-umus.\* Ongor pay chi tapina ay naepatawid ay iniili ay ukialicha ay kis-ancha atun ay kaman as nan mangurasancha as nan tasa, fianga ya tapina ay naammaan as kianfiang.) <sup>5</sup> Isunga nunsarudsudcha kan Jesus nan chiyuycha Fariseo ya nan chiyuycha mun-isursuru as Lintig. Kenalicha, “Adchi t’uy achi tongparun nan disipulusmu nan iniili ay ukialen nan kaap-uwan takú, ngem kuncha at mangan ay achi munfur?”

<sup>6</sup> Angkiay kenalen Jesus kan chicha, “*Tit-iwa as solet nan enpadton Isaías maepangkep kan chakayu ay pakamankaman ay hiyana nan nauy naisurat as nan Kalen Apo Dios,*

*‘Nan nauycha tataku at chaychayawunak as nan kalicha, ngem achawwi challu nan numnumcha kan ha-un.*

<sup>7</sup> *Maid kotok nan chacha manaychayawan kan ha-un, tay nan chacha isursuru at linlintig ay enammaan chi taku ay kanancha un filfilinku.*†

<sup>8</sup> *Inyangkiayanyu nan lintig Apo Dios, ya inun-unudyu nan iniili ay ukiali ay enpatawid nan tataku.*

<sup>9</sup> Kenalen pay Jesus kan chicha, “*Ammay met kayman chi chayu at-atun ay mangachi as nan lintig Apo Dios ta tongparunu nan naepatawid ay iniili ay ukiali!* <sup>10</sup> *Tay nan enpaisurat Apo Dios kan Moises at kanana, ‘Rispituwum cha amam kan enam,’ ya ‘Nan ngachana ay mangituchor as amana ya enana at masapor maepapatuy.*‡ <sup>11</sup> *Ngem chayu met isuru ay mu wachay ifiachang koma nan usa ay taku kan cha amana kan enana at mafialin ay munpanfor mu kanana un, ‘Korfian na’ (Nan laychuna ay kanan at naiichat na kan Apo Dios).* <sup>12</sup> *Mu isuruyu sa, chayu epawa ay fiadngana cha amana kan enana.* <sup>13</sup> *Mu hiyasa, menaidyu nan kotok nan kalen Apo Dios kiapú as nan iniili ay ukiali ay chayu epatawid as nan tapina. Ongor pay chi tapina ay anassesesa ay chayu at-atun.*”

### *Nan Tit-iwa Ay Mangepaassi As Nan Taku (Mat. 15:10-20)*

<sup>14</sup> Enayakian kasin Jesus nan tataku kan hiya, ya kanana kan chicha, “*Chumngor kayu am-in kan ha-un, ya numnumunyu ay ustu ta maawatanyu nan ifiakiak.* <sup>15</sup> *Fiakun nan okmonun nan usa ay taku nan mangepaassi*

---

\* **7:4** As nan tapina ay manuskritu at kanana, “Achicha kanun nan nurpu as nan mun-el-elakwan sukdcha maurasan. † **7:7** Isa. 29:13 ‡ **7:10** Exo. 20:12; 21:17; Lev. 20:9; Deut. 5:16

*kan hiya, ngem kun at nan chiyuycha epafoknagna as tapakna ay murpu as numnumna.* <sup>16</sup> [Nan wachay ingana ay chumngor at masapor chumngor.]”<sup>§</sup>

<sup>17</sup> Kun pay tenaynan Jesus nan ongor ay tataku ya sinungkop as nan afong, senarudsud nan disipulusna mu ngachana nan laychun ay kanan nan maepadpachongan. <sup>18</sup> Kenalina kan chicha, “Ay uray us chakayu at achiyu maawatan? Ay achiyu ammu ay nan okmonun nan taku at fiakun hiyana nan mangepaassi kan hiya as nan mangiilan Apo Dios? <sup>19</sup> Tay nan umuyana at fiakun as numnumna, ngem kun at as putuna, at etaina challu.” (Kenalen Jesus chi ta epakaammuna ay mafialin ay kanun nan am-in ay makan.)

<sup>20</sup> Angkiay ya kenalina pay, “Nan epafoknag nan taku ay murpu as nan numnumna nan mangepaassi kan hiya as nan sangwanan Apo Dios. <sup>21</sup> Tay as nan numnum nan taku nan kurpuwan chi am-in ay manangotetet ay pangkep ay mangetoróng kan hiya ay mangepapas as assi ay lachokna, mangakiw, pomatuy, umiwet. <sup>22</sup> Nan tapina pay ay manangotetet ay pangkep at kenaakum, kenasongel, kenamanang-allilaw, kenaruket chi ukiali, kenaapos, kenamanagkak-ali, kenapangas ya kenaruku. <sup>23</sup> Am-in chaná ay kenaman-gotetet at nerpucha as nan numnum nan taku ay chicha nan munlumu as fiasor nan usa ay taku.”

### *Nan Pammatten Nan Fiafiai Ay I-Feniaia (Mat. 15:21-28)*

<sup>24</sup> Angkiay ya nak-ak cha Jesus hid-i ya inmuycha henan sakop nan Tiro ya Sidon. Chinmawus as nan usa ay afong ya achina laychun ay maammuan chi uray usa ay wacha hiya hid-i, ngem chaana naetafun. <sup>25</sup> Wacha nan usa ay fiafiai ay nan anakna ay fiafiai at naanennetan. As nan nanngoran nan hana fiafiai as nan maepangkep kan Jesus, naannuuy hiya ya nunlukfub as nan sangwanana. <sup>26</sup> Nan nauy ay fiafiai at naiyanak ad Fenicia ay sakop nan Siria. Nan kalina at Griego. Numpakaasi hiya kan Jesus ta epafoknagna nan anennet as nan anakna. <sup>27</sup> Kenalen Jesus kan hiya ay magepadpachong, “Masapor pakanun on-oná nan ongong-a, tay achi met ustú mu arauñ nan chacha kanun ya ichat as nan chiyuycha asu.”

<sup>28</sup> Tinumfor nan fiafiai kan hiya, “O, tit-iwa sa Apo. Ngem uray nan chiyuycha asu as nan selok nan lamesaan at kanuncha nan mag-as as nan cha manganan nan ongong-a.”

<sup>29</sup> Angkiay kenalen Jesus kan hiya, “Kiapiú as nan nauy songfiatmu, komatamka ud-ay, tay nak-ak at nan anennet as nan anakmu.” <sup>30</sup> Kenmatam nan fiafiai as afongcha, at inilana nan anakna ay finmafianak as nan masmassuyana. Nak-ak at tit-iwa nan anennet kan hiya.

### *Nan Nangepaammayan Jesus As Nan Taku Ay Naturak Ya Naumor*

<sup>31</sup> Angkiay ya nak-ak hi Jesus henan sakop nan Tiro ya inuyna ad Sidon, at inmuy henan sakop nan makali un Hinpuru ay Siudad. Haat munfiangad henan Fiayfiay ay Galilea. <sup>32</sup> As nan hiyachi, wachacha nan nangiyuy kan Jesus as laraki ay naturak ya naumor. Numpakaasicha kan hiya ta epatayna nan limana kan hiya ta omammay.

<sup>33</sup> Isunga enek-ak Jesus hiya as nan kaongoran chi tataku ta chidchicha yangkiay. Angkiay enlorokna nan kiayyamotna as nan ingan nan laraki. Kun pay narpas, tinmubfia, ya enkapuna nan tubfiana as nan chilan nan laraki. <sup>34</sup> Nuntangad hiya ad chaya, ya nunlong-ag as napigsa, ya kanana

§ 7:16 As nan tapen nan manuskritu as nan kali ay Griego at maid na ay versikulu.

as nan laraki, “Efata!” (Nan laychuna ay kanan at “Matkafianka!”) <sup>35</sup> Hiya at chi ya makadngor nan laraki. Nakaan chi inumorna, ya enmammay chi munkaliyana.

<sup>36</sup> Angkiay ya inflin Jesus kan chicha ay maid poros mangifagfiag-antha. Ngem as nan kaskasina nangifilinan as sa, kaskasincha at infiagfiakia nan enatna. <sup>37</sup> Naschaaw as solet nan am-in ay nanngor, ya kanancha, “Anuy paat ammay am-in chi chana at-atun! Uray nan naturak at pakadnguruna, ya nan naumor at pakaliyuna.”

## 8

### *Nan Namakanan Jesus As Nan Opat Lifu Ay Tataku (Mat. 15:32-39)*

<sup>1</sup> As nan namingsan, ongoongor kasin chi naamong ay tataku kan Jesus. Kun pay nam-in chi kanuncha, enayakian Jesus nan disipulusna kan hiya, ya kanana kan chicha, <sup>2</sup> “Masug-angak as nan nauycha tataku, tay turu ay urkiw ay naketaktakincha kan ha-un, ya nam-in nan sangatcha. <sup>3</sup> Mu pakatamok chicha ay cha munchukiaang, maurawchantu as nan charan, tay achawwi nan nurpuwan chi tapina kan chicha.”

<sup>4</sup> Tinumfor nan disipulusna kan hiya, “O, ngem anan omor-an as ommat ay makan ta epakan kan chatona ay tataku henan kamaid chi umili?”

<sup>5</sup> Senarudsud Jesus, “Kaatna ay tenapay nan wacha kan chakayu?”

“Kun pitu,” ensongfiatcha.

<sup>6</sup> Infilin Jesus as nan tataku ay tomokorchha as nan luta. As nan nangor-ana as nan pitu ay tenapay, nunyaman kan Apo Dios. Kun pay narpas, pinutputtingna cha chi, at inchatna as nan disipulusna ta iwarascha as nan tataku. Enat tit-iwa nan disipulus. <sup>7</sup> Wacha us nan akét ay aneket ay filis. Nunyaman kasin hi Jesus, at enpaiwarasna us. <sup>8</sup> Nangancha am-in, at nasufucha. Haat amongun nan disipulus nan chinaancha ay namnu as nan pitu ay uppig.

<sup>9</sup> Nan filang nan tataku ay nangan at mafalin ay opat lifu.

<sup>10</sup> Kun pay narpas, enpakatam Jesus nan tataku. Hiya at chi ya nunlukian hiya ya nan disipulusna as nan fiangka, ya inmuycha henan sakop nan Dalmanuta.

### *Nan Chawat Ay Omepaila Hi Jesus As Nakaskaschaaw (Mat. 16:1-4; Luc. 12:54-56)*

<sup>11</sup> Wachacha nan Fariseo ay inmuy kan Jesus, ya enlapucha ay makesosek kan hiya. Chinawatcha ay omepaila hiya as nakaskaschaaw ay sinyar ay mangepaneknek ay hiya at nurpu kan Apo Dios. Enatcha na ta chistin-guncha hiya. <sup>12</sup> Nunlong-ag hiya as napigsa kiapú as saket chi numnumna kan chicha, at kenalina, “Adchi ngun t'uy chumawat nan tataku ad wani as nakaskaschaaw ay sinyar? Ifiakiak kan chakayu nan tit-iwa ay maid maepaila kan chicha.” <sup>13</sup> Tenaynana chicha, ya nunlukian kasin as nan fiangka ay kumchang ad chumang.

### *Nan Maepadpachongan Maepangkep As Nan Chiyuchya Fariseo (Mat. 16:5-12)*

<sup>14</sup> Naliw-an nan disipulusna ay ometakin as sangatcha ay tenapay kun yangkiay nan usa ay tenapay ay wacha kan chicha as nan fiangka. <sup>15</sup> Finagan Jesus chicha as nan nangaliyana, “Il-launyu nan lebaduran nan chiyuchya Fariseo ya nan lebaduran Herodes.”

<sup>16</sup> As nan nangaliyana as chi, natatakiatforcha nan disipulusna. Kenalicha, “Infiakiana chi, tay maid sangát takú ay tenapay.”

<sup>17</sup> Ammon Jesus nan chacha matatakiatforan. Isunga senarudsudna kan chicha, “Adchi t'uyyu cha matatakiatforan chi kamaid nan sangatyu ay tenapay? Ay achiyu pay laing ammu winnu maawatan? Ay kun natangken chi numnumyu? <sup>18</sup> Ay maid matayu ay mangila, ya maid ingayu ay manngor? Ay achiyu manumnum <sup>19</sup> nan namutput-ingak as nan lema ay tenapay ay kenan nan leman lifu ay tataku? Kaatnay uppig nan napnu as chinaancha ay enamongyu?”

“Hinpuru ya chuwa,” ensongfiatcha.

<sup>20</sup> “As nan pitu ay tenapay ay kenan nan opat lifu ay tataku, kaatna'y uppig nan napnu as chinaancha ay enamongyu?”

“Pitu,” ensongfiatcha.

<sup>21</sup> “Ay achiyu pay laing maawatan?” senarudsud Jesus.

#### *Nan Nangepaammayan Jesus As Nan Nafurag Ay Laraki Ad Betsaida*

<sup>22</sup> Kun pay inumchan cha Jesus ad Betsaida, inyuy nan tapen nan tataku nan usa ay nafurag ay laraki kan Jesus. Nunpakaasicha kan hiya ta kap-una koma nan nafurag ta omammay. <sup>23</sup> Penachang Jesus nan nafurag ya enek-akna henan fiabruy. Tinubfiaana nan matan nan nafurag, ya enpatayna nan limana kan hiya. Angkiay ya senarudsudna, “Ay wachay mailam?”

<sup>24</sup> Nuntat-allang nan nafurag, at kenalina, “O, mailak chi tataku, ngem kamancha kaiw ay cha manarcharan.”

<sup>25</sup> Enpatay kasin Jesus nan limana as nan matan nan nafurag. Enmetoong nan nafurag, ya enmammay nan matana, at narawag nan mangilana as nan am-in. <sup>26</sup> Angkiay ya empakatam Jesus hiya, ya inflina, “Komamatamka at! Achika munfiangad henan fiabruy.”

#### *Nan Infiakian Pedro Maepangkep Kan Jesus (Mat. 16:13-20; Luc. 9:18-21)*

<sup>27</sup> Angkiay ya inturuy cha Jesus ay inmuy henan chiyuchya fiabruy nan Ceresa Filipos. As nan chacha manaranan, senarudsudna as nan disipulusna, “Ngachana nan kanan nan tataku maepangkep kan ha-un?”

<sup>28</sup> Infiakiacha kan hiya, “Kanan met nan tapina un he-a hi Juan ay Fumufunyag, ya kanan nan tapina un he-a hi Elias. Wacha pay nan mangali un usaka as nan chiyuchya pomapadtu.”

<sup>29</sup> Senarudsud Jesus kan chicha, “Ngem chakayu ngay? Ngachana nan kananu maepangkep kan ha-un?”

Tinumfor hi Pedro, “He-a nan Cristo.”

<sup>30</sup> Angkiay ya inflin Jesus kan chicha ay maid poros mangifiagfiag-ancha as nan maepangkep kan hiya.

#### *Nan Nangifiag-an Jesus As Nan Munlikiatana Ya Matuyana (Mat. 16:21-23; Luc. 9:22)*

<sup>31</sup> Angkiay ya enlapon Jesus ay mangisuru as nan disipulusna ay nan Naepadtu ay Anak chi Táku at masapor mun-iliwas as ongor ay likiat. Achiyuntu nan anam-amá, nan anap-apon chi papachi ya nan chiyuchya mun-isursuru as Lintig hiya. Maepapatuytu hiya, ngem as nan marpasan chi turu ay urkiw at matakhiya manipud as nan utúy. <sup>32</sup> Narawag nan enat Jesus ay nangifiakia kan chicha. Kun pay chinngor Pedro na, enek-akna hi Jesus, at senengarana hiya kiapú as nan kenalina. <sup>33</sup> Ngem as nan nunsakongan Jesus, entoongana nan tapina ay disipulusna, ya sengarana hi Pedro as nan nangaliyana, “Mak-akka Satanas! Tay nan cham numnumnumun at fiakun nan laychun Apo Dios, ngem kun at nan laychun chi taku.”

**Nan Taku Ay Manglayad Ay Umunud Kan Jesus  
(Mat. 16:24-28; Luc. 9:23-27)**

<sup>34</sup> Angkiay ya enayakian Jesus nan ongor ay tataku ya nan disipulusna. Kenalina kan chicha, “Nan taku ay manglayad ay umunud kan ha-un at masapor ikinakna ay mangekaman as nan laylaychuna, ya itiina nan korosna, haat umunud kan ha-un. <sup>35</sup> Tay nan uray ngachana ay mangepapati ay mangesarakan as fiyagna asna's luta at malitawnantu challu. Ngem nan uray ngachana ay manglitaw as fiyagna asna's luta kiapú as pammatica kan ha-un ya as nan Ammay ay Chamag at maesarakantu. <sup>36</sup> Tay anan maaran nan taku ay mangkuwa as nan am-in ay wacha asna's luta, ngem malitawna challu nan fiyagna ay maid patingkiana ad inferno? <sup>37</sup> Anan ngachana challu nan mafialin ay esokat nan taku ay para as nan fiyagna? <sup>38</sup> Tay nan taku ay mangifiain kan ha-un ya nan karkalek as nan nauycha tataku ad wani ay achi omafurot kan Apo Dios ya fumafiasor at ifaintu us nan Naepadtu ay Anak chi Taku hiya as nan kasina omaliyan ay mangepaila as nan kaichayawan Amana ay kadwana nan nasantowan ay angheler.”

## 9

<sup>1</sup> Kenalen pay Jesus kan chicha, “Ifiakiak kan chakayu nan tit-iwa ay wachacha nan tapina kan chakayu ay nangatackhug hena ay achintu matuy inkiana ilauncha nan muntorayan Apo Dios ay wacha nan pannakafialina.”

**Nan Tinmukunan Nan Ilan Jesus  
(Mat. 17:1-13; Luc. 9:28-36)**

<sup>2</sup> Kun pay inmuy chi unum ay urkiw, entakin Jesus cha Pedro, Santiago ya Juan. Empanguna chicha henan nangatu ay chuntug ay kun chidchicha yangkiay. As nan chacha mangi-iil-an kan Jesus, tinmukun chi kail-ana.

<sup>3</sup> Nan fiachuna at nunfialin as mun-am-amoselap ya pinmukpukkawan. Maid maepachongana as nan naepapukaw ay fiachu ay wacha asna's luta.

<sup>4</sup> As nan hiyachi, nunpaila kan chicha cha Elias kan Moises ay cha maketagtakiatfor kan Jesus. <sup>5</sup> Angkiay ya kenalen Pedro kan Jesus, “Misturu, ammay paat ta wacha takú hena. Kun kami at mun-amma as turu ay fiawi, usa kan he-a, usa kan Moises ya usa kan Elias.” <sup>6</sup> Kenalina chi, tay achina ammu nan ustу ay ifiakiiana kiapú ta inmugyatcha as solet.

<sup>7</sup> Angkiay ya wacha nan lifuu ay nangalenong kan chicha, ya wacha nan kali ay nurpu as nan lifuu ay kanana, “Hi tona nan anakku ay laylaychok. Chumngor kayu kan hiya.” <sup>8</sup> Nuntat-allangcha ay dagus, ngem maid tapina as inilacha mu achi hi Jesus yangkiay.

<sup>9</sup> As nan chacha chumayyuwan ay nurpu henan chuntug, infilin Jesus kan chicha, “Maid mangifiafig-anyu as nan inilayu inkiana matakku kasin nan Naepadtu ay Anak chi Taku.”

<sup>10</sup> Tenongparcha nan filina kan chicha, ngem nunsennarudsudcha ay chidchicha yangkiay mu anan laychun ay kanan nan matakku manipud as nan utsу. <sup>11</sup> Ensarochakchakcha kan Jesus, “Adchi man t'uy kanan nan munisursuru as Lintig ay masapor omon-onra hi Elias ay omali mu hi Cristo?”

<sup>12</sup> Tinumfor hi Jesus kan chicha, “Tit-iwa ay omali on-onra hi Elias ay mangesakiana as nan am-in. Ngem adchi t'uy kanan nan naisurat as nan Kalen Apo Dios ay nan Naepadtu ay Anak chi Taku at masapor ay mun-iliwas as ongor ay likiat ya achiyun chi tataku? <sup>13</sup> Ngem ifiakiak kan chakayu ay emnali at hi Elias, ya enatcha kan hiya nan am-in ay lenaylayadcha ay kaman as nan kanan nan naisurat as nan Kalen Apo Dios maepangkep kan hiya.”

*Nan Nangepafoknakian Jesus As Nan Anennet As Nan Onga  
(Mat. 17:14-21; Luc. 9:37-43)*

<sup>14</sup> Kun pay nunfiangad hi Jesus ya nan turu as nan kawad-an nan tapina ay disipulusna, irilacha nan ongoongor ay tataku ay nangaarufong kan chicha. Cha makesosek nan tapen nan mun-isursuru as Lintig as nan disipulus. <sup>15</sup> As nan nangil-an nan am-in ay tataku kan Jesus, naschaawcha as solet, ya tenmagtagcha ay uy nangpacomosta kan hiya. <sup>16</sup> Senarudsud Jesus as nan disipulusna, “*Ngachana nan chayu makesosekan kan chicha?*”

<sup>17</sup> Usa as nan tataku nan tinumfor, “Apo, inyalek kan he-a nan anakku ay laraki ay achi makakali, tay inumor nan anennet hiya. <sup>18</sup> Kun kay sumru nan anennet kan hiya at tu-ukuna as nan luta. Mun-usab nan tapakna, munngesat chi fiab-ana ya kumursi nan achorna. Chinawatku as nan nauycha disipulusmu ay epafoknagcha nan anennet, ngem chaancha kenafaelan.”

<sup>19</sup> Tinumfor hi Jesus kan chicha, “*Nakkuran kayu ay tataku ad wani! Maid tit-iwa pammatiyu!* *Anan kafiatayag chi mawawad-ak kan chakayu? Anan kafiatayag chi tata-unku kan chakayu? Iyaliyu man hiya kan ha-un.*”

<sup>20</sup> Angkiay inuyucha hiya kan Jesus. Kun pay inilan nan anennet hi Jesus, nunkorchasuna ay dagus nan fumarfiaru. Natu-ug nan fumarfiaru ay cha munlidlidchan as nan luta ya cha umus-usab nan tapakna. <sup>21</sup> Senarudsud Jesus as nan aman nan fumarfiaru, “*Kaatna nan nangelapuwana as nan nauy cha om-ommat kan hiya?*”

“Nunlapu as nan kaongan,” ensongfiatna. <sup>22</sup> “Kun anaka un cha ichus-or nan anennet hiya as nan apuy, mu achi kay at as nan chanum ta patayuna hiya. Masug-angka pay kan chakami ya fiadngam chakami mu kafaelam.”

<sup>23</sup> Kenalen Jesus, “*Adchi t'uymu kanan, Mu kafiaelak?* *Am-in at maflinalay maekaman as nan taku ay wachay pammatica kan Apo Dios.*”

<sup>24</sup> Hiya at chi ya inpihsan nan aman nan fumarfiaru ay nunkali, “Omafurotak, ngem kurang nan pammatek. Fiadnganak man paat ta mataptapiyan nan pammatek!”

<sup>25</sup> Kun pay inilan Jesus nan ongor ay tataku ay nagrub ay tenmagtag ay naesnop kan cha Jesus, infilina as nan anennet, “*He-a ay anennet ay nanglurak ya nang-umor as nan nauy fumarfiaru, mak-akka at man kan hiya, ya achika at munfiangfiangad kan hiya!*” <sup>26</sup> Nun-uwek nan anennet, ya nunkorchasuna as solet nan fumarfiaru, angkiay nak-ak. Kaman at kun nanatuy nan fumarfiaru. Isunga ongor nan nangali, “Natuy at hiya.” <sup>27</sup> Ngem inunnan Jesus nan liman nan fumarfiaru, ya finanguna, at temakchug.

<sup>28</sup> Kun pay sinungkop cha Jesus as nan omaafongancha ay chidchicha yangkiay, senarudsud nan disipulusna kan hiya, “*Adchi t'uy kami chaan nakaepak-ak as nan anennet?*”

<sup>29</sup> Tinumfor hi Jesus, “*Nan assena ay karasen chi anennet at achi maepak-ak mu achi babaen as panagkararag yangkiay.*”

*Nan Nangifiag-an Kasin Jesus As Nan Matuyana  
(Mat. 17:22-23; Luc. 9:44-45)*

<sup>30</sup> Nak-ak cha Jesus henan hana ay lukiar, at nar-oscha ad Galilea. Achi laychun Jesus ay maammuwnan tataku nan kawad-ancha, <sup>31</sup> tay chana isuruwan nan disipulusna. Kenalina, “*Nan Naepadtu ay Anak chi Taku at maipurangtu as nan tataku ya patayunchantu.* Kun pay matuy ya marpas chi

turu ay urkiw, matakuntu hiya manipud as nan utiy.” <sup>32</sup> Ngem chaancha naawatan nan kenalina, ya umugyatcha ay mangepoot kan hiya.

### *Nan Kaamuchan As Nan Muntorayan Apo Dios (Mat. 18:1-5; Luc. 9:46-48)*

<sup>33</sup> Inumchancha ad Capernaum. As nan sinungkopancha as nan afong, senarudsud Jesus as nan disipulusna, “Ngachana nan enapatus as nan charan?” <sup>34</sup> Ngem kuncha am-in kinkinak, tay enapatcha mu ngachana nan kaamuchan kan chicha. <sup>35</sup> Kun pay temmokor hi Jesus, enayakiana nan hinpuru ya chuwa ay disipulus, ya kanana kan chicha, “Mu ngachana nan munlayad ay omon-onas at masapor hiya nan omanongos as nan am-in ya fiabfaiarun nan am-in ay tataku.”

<sup>36</sup> Angkiay enarana nan usa ay onga, ya enpatakchugna as nan kiawacha. Enakworna, ya kanana kan chicha, <sup>37</sup> “Nan uray ngachana ay mang-awat as nan ap-apud ay taku ay kaman kan tonay onga kiapú as nan pammatina kan ha-un at ha-un nan awatuna. Nan uray ngachana ay mang-awat kan ha-un at fiakun yangkiay ha-un nan awatuna, ngem nan nangifiaor us kan ha-un.”

### *Nan Achi Fumusor Kan Chitaku At Kadwa Takú (Luc. 9:49-50)*

<sup>38</sup> Kenalen Juan kan Jesus, “Misturu, inilami nan usa ay taku ay cha mangepafoknag as nan chiyucha anennet ay cha mangosar as ngachanmu. Enpawami, tay fiakun takú met kadwa hiya.”

<sup>39</sup> Ngem kenalen Jesus, “Achiyu epawa, tay nan mangekaman as nakaskaschaaw ay mangosar as ngachanku at achiyak ekaliyan as maifusor kan ha-un as maaw-awni. <sup>40</sup> Tay nan taku ay achi fumusor kan chitaku at kadwa takú. <sup>41</sup> Ifiakiak kan chakayu nan tit-iwa ay nan mangepaikop as uray hentasa ay chanum kan chakayu kiapú ta tataku chakayu kan Cristo at siguradu ay maawatna nan gun-gunana.”

### *Nan Taku Ay Munlumu As Fumasoran (Mat. 18:6-9; Luc. 17:1-2)*

<sup>42</sup> “Nan uray ngachana ay munlumu as fumasoran chi usa as nan nauycha ap-apud ay tataku ay omaafurot kan ha-un at un-unuyna ay maetekor chi losóng ay fiatu as fiakiangna, ya maichus-or hiya henan fiayfiay. <sup>43</sup> Mu nan usa as nan limam nan kiapón chi fumasoram, putnam. Un-unuyna ay pungudka ay maetapi as nan fiyag ay maid patingkiana mu nan wacha nan chuwa ay limam, ya kunka challu umuy ad inferno as nan kawad-an chi apuy ay achi mapappaui. <sup>44</sup> [Hid-i at achi matmatuy nan chiyucha fikis, ya achi mapappaui nan apuy.] <sup>45</sup> Mu nan usa ay sukem nan kiapón chi fumasoram, putnam. Un-unuyna ay pungudka ay maetapi as nan fiyag ay maid patingkiana mu nan wacha nan chuwa ay sukem, ya kunka challu maichus-or ad inferno. <sup>46</sup> [Hid-i at achi matmatuy nan chiyucha fikis, ya achi mapappaui nan apuy.]\* <sup>47</sup> Mu nan matam nan kiapón chi fumasoram, oketam. Un-unuyna ay fuslingka ay maetapi henan muntorayan Apo Dios mu nan wacha nan chuwa ay matam, ya kunka challu maichus-or ad inferno. <sup>48</sup> Hid-i at achi matmatuy nan chiyucha fikis, ya achi mapappaui nan apuy.

<sup>49</sup> “Tay am-in ay tataku at masapor mapachasanchay likiat ta omammay nan ukialicha ay maepachong as nan asin ay mangepaammay as tamtam

\* <sup>9:46</sup> As nan tapen nan manuskritu as nan kali ay Griego at maid chaná. Maepachongcha as nan versikulu 48.

*nan chinangchang.<sup>†</sup> 50 Ammay nan asin, ngem mu chakus at nakaan nan tamtamna, achi poros kasi omasin. Isunga komaman kayu as nan asin ta munfifinnachang kayu ya makekappia kayu as nan pachongyu ay taku.”*

## 10

### *Nan Isursuron Jesus Maepangkep As Ichang (Mat. 19:1-12; Luc. 16:18)*

<sup>1</sup> Kun pay nak-ak cha Jesus hid-i, inmuycha henan sakop nan Judea henan usa ay chumang nan wawwang ay Jordan. Angkiay ya kun pay naamong kasi kan hiya nanongoongor ay tataku, insuruwana kasi chicha ay kaman challu as nan ukialina.

<sup>2</sup> Wachacha nan tapen nan Fariseo ay inmuy kan Jesus ta chistinguncha hiya as nan nanarudsuchancha, “Ay eparufus nan Lintig takú ay iyichang nan laraki hi asawana?”

<sup>3</sup> “Anan ngachana nan inflin Moises kan chakayu?” ensongfiat Jesus kan chicha.

<sup>4</sup> “Enparufus met Moises ay mun-amma nan laraki as kasuratan nan munichangancha, at epak-akna hi asawana,” ensongfiatcha.\*

<sup>5</sup> Ngem kenalen Jesus kan chicha, “*Insurat Moises nan nauy lintig para kan chakayu kiapú as nan kenatangken chi numnumyu.* <sup>6</sup> Ngem as nan laplapon nan nafiyangan nan luta, *finayang Apo Dios nan taku ay laraki ya fiafiai<sup>†</sup> ay kaman as nan naifiakia as nan Kalen Apo Dios ay kanana,* <sup>7</sup> ‘*Hiyana nan kiapúna ay taynan nan laraki cha amana kan enana ta etepona hi asawana, 8 at munfialincha as us-usa.’ Isunga fiakuncha chuwa, ngem kuncha us-usa.<sup>‡</sup>*

<sup>9</sup> *Nan nunteponun ngarud Apo Dios at achi koma mun-ichangun chi taku.”*

<sup>10</sup> Kuncha pay nunfiangad as nan afong, ensarochakchak nan disipulus kan Jesus nan maepangkep as nan chiyuy kenalina. <sup>11</sup> Kenalen Jesus kan chicha, “*Nan ngachana ay laraki ay mangiyichang as asawana ya kasi omasawa hiya as tukún at umiwet. Nan hana ay enatna at fiasorna as nan emnon-oná ay asawana.* <sup>12</sup> *Kaman us as nan fiafiai ay mangiyichang as asawana ya kasi omasawa as tukún at umiwet.”*

### *Nan Namendisyonan Jesus As Nan Ongong-a (Mat. 19:13-15; Luc. 18:15-17)*

<sup>13</sup> As nan namingsan, wachacha nan cha mangiyuy as ongong-a kan Jesus ta kaprosuna ay mangbendisyon kan chicha, ngem senengaran nan disipulus chicha. <sup>14</sup> As nan nangil-an Jesus as chi, finmungat, ya kanana kan chicha, “*Yasa! Pay-anyu ay omali nan ongong-a kan ha-un. Achiyu epawa, tay nan tataku ay maepachong kan chatona ay ongong-a nan maetapi henan muntorayan Apo Dios.* <sup>15</sup> *Ifiakiak kan chakayu nan tit-iwa ay nan achi mang-awat henan muntorayan Apo Dios ay kaman as nan atun nan usa ay onga at achi poros sungkop henan muntorayana.*” <sup>16</sup> Angkiay ya inussanna ay nangakwor as nan ongong-a, ya benendisyonana chicha as nan nangepatayana as limana kan chicha am-in.

### *Nan Nafiaknang Ay Taku (Mat. 19:16-30; Luc. 18:18-30)*

<sup>17</sup> Kun pay cha munligwat cha Jesus ay munfiaat, tenmagtag kan hiya nan usa ay laraki. Nunpalintumang as nan sangwanana, ya senarudsudna kan

\* <sup>9:49</sup> As nan kali ay Griego at kanana, “Am-in ay tataku at masapor ay naasinancha as apuy.”

\* <sup>10:4</sup> Deut. 24:1-3      † <sup>10:6</sup> Gen. 1:27; 5:2      ‡ <sup>10:8</sup> Gen. 2:24

hiya, "Ammay ay Misturu, ngachana man nan masapor ay atok ay manawid as nan fiyag ay maid patingkiana?"

<sup>18</sup> Kenalen Jesus kan hiya, "Adchi t'uymu kanan un ammayak? Maid poros tukún as ammay mu achi yangkiay hi Apo Dios. <sup>19</sup> Ammom met nan filfilin Apo Dios, 'Achika pomatuy, achika umiwet, achika mangakiw, achika munkutum ay muntistigu, achika somator, ya rispituwum cha amam kan enam.'" §

<sup>20</sup> Kenalen nan laraki kan hiya, "Misturu, nunlapu as nan kaongak at enafurotku met am-in chaná."

<sup>21</sup> Kun pay entoongan Jesus nan laraki, nalaylaychan kan hiya, ya kanana, "Wacha nan usa ay nunkurangam. Uymu elaku nan kuk-uwam, ya ichatmu nan lakuna as nan chiyuchaya pugli, at wachantu nan kenafiaknangmu ad chaya. Mu marpas sa, unuchunak." <sup>22</sup> Kuna pay chingor sa, naila as lupana ay nginmuyus, ya nunnunnunungu ay nak-ak, tay nafiaknang as solet.

<sup>23</sup> As nan hiyachi, nuntat-allang hi Jesus, ya kanana as nan disipulusna, "Anuy paat nalikiattu as nan chiyuchaya wachay kenafiaknangcha ay sungkop henan muntorayan Apo Dios!" <sup>24</sup> Naschaawcha nan disipulus as nan nangaliyana as chi, ngem kenalen kasin Jesus, "An-akku, anuy paat nalikiat ay sungkop henan muntorayan Apo Dios! <sup>25</sup> Narakraka pay ay lumfot nan kameilio as nan los-ok nan chakum mu nan fiaknang ay sungkop henan muntorayan Apo Dios!"

<sup>26</sup> Naschaawcha as solet, ya nusesennarudsudcha, "Ngachancha ngay ngarud nan mafialin ay maesarakan?"

<sup>27</sup> Entoongan Jesus chicha, ya kanana, "As nan tataku at achicha kafaelan ay mangekaman as na. Ngem achi kan Apo Dios, tay kafaelana nan am-in."

<sup>28</sup> Angkiay kenalen Pedro kan hiya, "Enham! Tenaynanmi nan am-in, ya immunud kami kan he-al!"

<sup>29</sup> Kenalen Jesus, "Ifiakiak kan chakayu nan tit-iwa ay nan nanaynan as afongna, susnúdá, enana, amana, an-akna winnu payyiwna kiapú as nan pammatina kan ha-un ya kiapú as nan mangekasabaana as nan Ammay ay Chamag <sup>30</sup> at mamen hinkiasottu nan awatuna ad wani ay timpu. O, ongor pay nan awatuna ay ab-afong, susnúd, en-a, an-akna, ya payyiw. Uray mu assesa, mapalikiat challu hiya, at as tapen chi urkiw at maettantu hiya as fiyag ay maid patingkiana. <sup>31</sup> Ngem nan ongor ay omon-onaa ad wani at omanongoschantu, ya nan ongor us ay omanongos ad wani at omon-onachantu."

### Nan Kapitlu Ay Nangifiag-an Jesus As Nan Matuyana

(Mat. 20:17-19; Luc. 18:31-34)

<sup>32</sup> As nan cha tumikichan cha Jesus as nan charan ay umuy ad Jerusalem, emmon-onaa hiya. Naschaaw nan disipulusna, ya inmugyat nan tataku ay cha umun-unud. Ensakiken kasin Jesus nan hinpuru ya chuwa ay disipulusna, ya infiakiiana nan nauy ommattu kan hiya, <sup>33</sup> "Chumngor kayu! Cha takú tumikid ad Jerusalem! Hid-intu ay maipurang nan Naepadtu ay Anak chi Taku as nan anap-apon chi papachi ya as nan chiyuchaya mun-isursuru as Lintig. Keddenganchantu hiya ay matuy, ya ipurangchantu hiya as nan chiyuchaya Gentil. <sup>34</sup> Ot-otyokunchantu, tubtubfiaanchantu, sapsapletunchantu ya patayunchantu hiya. Ngem as nan maekatlu ay urkiw at matakuntu hiya manipud as nan utuy."

*Nan Chinawat Cha Santiago Kan Juan  
(Mat. 20:20-28)*

<sup>35</sup> Naesnop kan Jesus nan hen-aki ay cha Santiago kan Juan ay potot Zebedeo, ya kanancha kan hiya, “Misturu, wacha nan chawatunmi ay atum koma kan chakami.”

<sup>36</sup> Senarudsud Jesus kan chicha, “*Ngachan tud-i ngay nan laychunu ay atok para kan chakayu?*”

<sup>37</sup> Tinumforcha kan hiya, “As nan tomokram as nan tronom as nan machaychayaw ay muntorayam at eparufusmu koma ay maketokor kami kan he-a: Nan usa at as apét kannawanmu ya nan usa at as apét kan-nikidmu.”

<sup>38</sup> Ngem kenalen Jesus kan chicha, “*Achiyu ammuy chayu chawchawatun. Ay kafiaelanyu ay mangiliwas as nan likiat ay iliwasku? Ay kafiaelanyu ay matuy ay kaman as nan atok ay matuy?*”\*

<sup>39</sup> “Kafiaelanmi ya,” ensongfiatcha kan hiya.

Kenalen Jesus kan chicha, “*O, iliwas yuntu nan likiat ay iliwasku, ya matuy kayuntu kaman as nan atok ay matuy.*” <sup>40</sup> Ngem fiakunku kalibfengan ay munpili as tomokor as apét kannawanku winnu as apét kannikidku, tay chatosa at para as nan chiyuuya nangesasakianaan Apo Dios.”

<sup>41</sup> Kun pay chinngor nan hinpuru ay disipulus nan nauy, finnungatcha kan cha Santiago kan Juan. <sup>42</sup> Enayakian Jesus am-in chicha as nan kawadana, ya kanana kan chicha, “*Ammuyu met ay nan chiyuuya maifilang ay mangetortoray as nan chiyuuya Gentil at epapeletcha nan laychuncha as nan chacha etortorayan. Nan anap-apucha us at etorayancha chicha.*” <sup>43</sup> Fiakun koma assesa kan chakayu. Ngem kun at nan uray ngachana ay manglayad ay munfialin as amid kan chakayu at masapor hiya nan fiabfiaarunyu. <sup>44</sup> Nan ngachana ay manglayad us ay munfialin as kaamuchan kan chakayu at masapor munfialin as fiabfiaarun nan am-in ay tataku. <sup>45</sup> Tay uray nan Naepadtu ay Anak chi Taku at chaan enmali ay maserfiyan, ngem kun at munserfi ya ichatna nan fiyagna ta esarakana nan ongor ay tataku.”

*Nan Nangaanan Jesus As Nan Finurag Bartimeo  
(Mat. 20:29-34; Luc. 18:35-43)*

<sup>46</sup> Inumchan hi Jesus ya nan disipulusna henan ili ay Jerico. As nan chacha makakan hid-i, nakiuy nan ongoongor ay tataku. Wacha nan usa ay nafurag ay munlelemos ay nan ngachana at Bartimeo ay potot Timeo ay nangatokor as nan olet nan korsa. <sup>47</sup> Kuna pay chinngor ay cha mar-os hi Jesus ay i-Nazaret, enlapuna ay nangifukiaw, “Jesus ay Kianak David, suganganak man paat!”

<sup>48</sup> Senengaran nan ongor ay tataku hiya, ya chacha ifiakia kan hiya ay kuminak koma hiya. Ngem kenaskasina infukiaw, “Kianak David, suganganak man paat!”

<sup>49</sup> Enyawnen Jesus, ya kanana, “*Ayakianyu hiya.*”

Isunga enayakiancha nan nafurag ay laraki, ya kanancha, “Papigsau nan numnumumu! Maligwatka, tay chachaka ayakian.” <sup>50</sup> Kuna pay chinngor sa, nun-iwalina nan kakiaina, natannakchug, ya inmuy kan Jesus.

<sup>51</sup> Senarudsud Jesus kan hiya, “*Ngachana nan laychum ay atok kan he-a?*”

“Misturu, makailaak koma,” ensongfiat nan nafurag kan Jesus.

---

\* <sup>10:38</sup> As nan kalen chi Griego at kanana, “Ay kafiaelanyu ay umikoptu as nan tasa ay umikopaktu? Ay kafiaelanyu ay mafunyakiantu ay kaman as nan atoktu ay mafunyakian?”

<sup>52</sup> Kenalen Jesus kan hiya, “*Uyka. Nan pammatem nan nangepaammay kan he-a.*” Hiya at chi ya makaila nan nafurag, ya inmunud kan Jesus as nan charan.

## 11

*Nan Nanaychayawan Nan Tataku Kan Jesus As Nan Inumchanana Ad Jerusalem*

(Mat. 21:1-11; Luc. 19:28-40; Jn. 12:12-19)

<sup>1</sup> Kun pay cha maesnop cha Jesus ad Jerusalem, inumchancha ad Betfage ya Betania henan chuntug ay Olivo. Enpaon-onana nan chuwa as nan disipulusna, <sup>2</sup> ya kanana kan chicha, “*Uy kayu henan fiabruy ay sasakiangunyu. As nan paatyu umchanan hid-i, uchananyu nan usa ay dongki ay urfun ay naetatakud ay chaan pay nasaksakayan. Fokatanyu, ya iyaliyu hena.*” <sup>3</sup> Mu wachay mangali kan chakayu un, ‘*Adchi t'uyyu cha atun sa?*’ kananyu kan hiya un, ‘*Masapor nan Apo. Paifiangadnantu challu ay dagus hena.*’

<sup>4</sup> Inmuycha, at ininchanancha tit-iwa nan dongki ay urfun as nan korsa ay naetatakud as nan pantiw nan afong. Kuncha pay cha fokatan, <sup>5</sup> senarudsud nan tataku ay kataktakchug hid-i, “*Adchi t'uyyu cha fokatan nan urfun?*” <sup>6</sup> Infiakiacha nan kenalen Jesus kan chicha, at penarufusan nan tataku chicha.

<sup>7</sup> Angkiay ya inyalicha nan urfun kan Jesus. Inyap-apcha nan chiyuycha kakiaycha as nan uchug nan urfun, angkiay nunsakay hi Jesus. <sup>8</sup> Nan ongor ay tataku at inyapragcha nan chiyuycha kakiaycha as nan korsa. Nan tapina at inchapratcha as nan korsa nan chiyuycha sapang ay ongor chi forongcha ay senongpatcha as nan chiyuycha uma ta epailacha ay chayawuncha hi Jesus. <sup>9</sup> Nan chiyuycha enmon-oná mu hiya ya nan chiyuycha inmun-unud at infugfukiawcha, “*Maichaychayaw hi Apo Dios! Mabendisyonan koma nan omali as nan ngachan nan Apo!*” <sup>10</sup> Mabendisyonan koma nan cha omali ay muntoray kan chitaku ay mangesokat kan Ari David ay kaap-uwan takú! Machaychayaw hi Apo Dios ad chaya!”

<sup>11</sup> As nan inumchanan cha Jesus ad Jerusalem, sinungkop hiya as nan templo, ya nuntat-allang as nan am-in ay wacha's chi. Ngem kiapú ta cha maschum, inmuy hiya ad Betania ay kadwana nan hinpuru ya chuwa ay disipulus.

*Nan Kaiw Ay Igos Ay Intuchor Jesus*  
(Mat. 21:18-19)

<sup>12</sup> As nan kafikiatana as nan nak-akancha ad Betania, nunchukiaang hi Jesus. <sup>13</sup> Henan ad-achawwi as akét, inilana nan kaiw ay igos ay ongor chi tufuna. Inmuy hiya ay mangila mu wachay fukiasna. Kun pay inumchan as nan kawad-an nan kaiw, ininchanana ay kun tubtufu yangkiay chi wacha, tay fiakun pay hiyachi nan timpu ay fumfumkiasan chi igos. <sup>14</sup> Angkiay ya kenalina as nan kaiw, “*Maidtu poros mangmangan kasin as nan fukiasmu.*” Chinngor nan disipulusna nan kenalina.

*Nan Nangepak-akan Jesus As Nan Mun-el-elaku As Nan Templo*  
(Mat. 21:12-17; Luc. 19:45-48; Jn. 2:13-17)

<sup>15</sup> Kuncha pay inumchan ad Jerusalem, sinungkop hi Jesus as nan fiattaw nan Templo. Enlapuna ay mangepak-ak as nan chiyuycha am-in ay cha mun-el-elaku ya nan chiyuycha cha lomaklaku hid-i. Enlokabfuna nan chiyuycha lamesaan nan chiyuycha cha munsoksokat as siping ya nan

\* <sup>11:9</sup> Sal. 118:26

totokoran nan chiyuycha cha mun-el-elaku as karopati. <sup>16</sup> Enpawana us ay mar-os nan ngachana ay taku ay wachay karkiacha as nan chiyuycha fiattaw nan Templo. <sup>17</sup> Angkiay ya insuruwana nan tataku, ya kanana kan chicha, “Ay kun chaan naisurat as nan Kalen Apo Dios un, ‘Nan afongku at makali un munkarkarakian ay para henan am-in ay nasyon?’ Ngem kunyu at nunfialinun as muntabtafunan chi mangaakiw!”<sup>†</sup>

<sup>18</sup> Kun pay nachamag nan anap-apon chi papachi ya nan chiyuycha mun-isursuru as Lintig nan kenalen Jesus, inyanapchay atuncha ay mangpatuy kan hiya, tay umugyatcha kiapú ta naschaaw nan ongor ay tataku as nan isursuruna. <sup>19</sup> As nan naschum, nak-ak hi Jesus henan siyudad ay kadwana nan disipulusna.

### *Nan Maachar As Nan Intuchor Jesus Ay Kaiw Ay Igos (Mat. 21:20-22)*

<sup>20</sup> As nan wiet as nan chacha mar-osan, inilacha ay narangu nan kaiw ay igos inkiana as nan lamotna. <sup>21</sup> As nan hiyachi, nanumnum Pedro nan tuchor Jesus, ya kanana kan hiya, “Misturu, ilaum! Narangu nan chiyu kaiw ay igos ay intuchormu.”

<sup>22</sup> “Omafurot kayu koma kan Apo Dios,” ensongfiat Jesus. <sup>23</sup> “Ifiakiak kan chakayu nan tit-iwa. Mu wachay pammatiyu kan Apo Dios ya achi kayu munchuwachuwa, mafialin ay kananyu henan nauy chuntug un, ‘Maokwatka ya maichus-orka henan fiafyay,’ ya maekaman tit-iwa. <sup>24</sup> Isunga ifiakiak kan chakayu ay nan uray ngachana ay chawatunyu kan Apo Dios as nan kararagyu ya afurotunyu ay naawatyu at maichattu kan chakayu. <sup>25</sup> Kun kayu kay munkararag,<sup>‡</sup> mu wachay ingoryu as nan pachongyu ay taku, pakawanunu ta pakawanun chakayu us kan Amayu ad chaya as nan fiasfiasoryu. <sup>26</sup> [Ngem mu achiyu pakawanun hiya, achi chakayu us pakawanun kan Amayu ad chaya as nan fiasfiasoryu.]”

### *Nan Sarudsud Maepangkep As Nan Kalibfengan Jesus (Mat. 21:23-27; Luc. 20:1-8)*

<sup>27</sup> Nunfiangad kasin cha Jesus ad Jerusalem. As nan cha manad-aranan Jesus as nan fiattaw as Templo, inmuy kan hiya nan anap-apon chi papachi, mun-isursuru as Lintig ya nan anam-amá. <sup>28</sup> Senarudsudcha kan hiya, “Anan nurpuwan man nan kalibfengam ay mangekamkaman kan chatona? Ngachana nan nangichat kan he-a as nan nauy ay kalibfengan ay mangekam kan chicha?”

<sup>29</sup> Tinumfor hi Jesus, “Wacha nan usa'y sarudsuchok kan chakayu. Mu masongfiatanyu, ifiakiaktu kan chakayu nan nurpuwan nan kalibfengak ay mangekamkaman kan chatona. <sup>30</sup> Anan nurpuwan nan kalibfengan Juan ay munfunyag? Ay nurpu kan Apo Dios winnu as nan tataku?”

<sup>31</sup> Angkiay kenalicha ay maaapat, “Mu kanan takú un, ‘Nurpu kan Apo Dios,’ kananantu un, ‘Anuyyu ngarud chaan enafurot hiya?’ <sup>32</sup> Ngem mu kanan takú un, ‘Ay nurpu as nan tataku?’ Achi mafialin!” (Umugyatcha, tay afurotun nan am-in ay tataku ay hi Juan at tit-iwa ay usa ay pomapadtu.) <sup>33</sup> Isunga nan ensongfiatcha kan Jesus at “Tuan! Achimi ammu.”

---

<sup>†</sup> **11:17** Isa. 56:7; Jer. 7:11    <sup>‡</sup> **11:25** As nan kali ay Griego at kanana, “Mu tomakchug kayu ay munkararag.” Tay nan chiyuycha Judio at achicha laychun ay tomokor ay maketakiatfor kan Apo Dios.

Kenalen Jesus kan chicha, “*Mu hiyasa, achen us ngarud ifiakia kan chakayu mu ngachana nan nunkalibfengan as nan chak mangekamkamanan kan chatona.*”

## 12

### *Nan Maepadpachongan Nan Mangaamma As Nan Uma (Mat. 21:33-46; Luc. 20:9-19)*

<sup>1</sup> Angkiay ya nun-epadpachong hi Jesus, “*Wacha nan usa ay taku ay nuntanum as ongor ay ubas as umana. Enaradna nan naliwus, ya nunkaub as munkopkopran as ubas. Nun-amma us as nangatungatu ay fiawen nan munfi-anfiantay as nan umana. Kun pay narpas sa, enpaammana as nan chiyuchya mun-umauna. Angkiay ya nufiaat henan achawwi ay lukiar.*\* <sup>2</sup> *Kun pay inumchan nan timpon chi munpurasan, infiaorna nan fiabfiaaruna as nan chiyuchya nun-umauna ta uyna arau nan kudwan nan amona ay ubas ay naapet as nan umana.* <sup>3</sup> *Ngem lenabkis ya senaplesaplet nan chiyuchya nun-umauna hiya, ya enpaifiangadcha hiya ay maid in-inchatcha.* <sup>4</sup> *Kun pay enommat sa, infiaorna us nan usa. Ngem linungakancha, ya penabpfainancha hiya.* <sup>5</sup> *Infiaorna nan tukún, ngem penatuyucha hiya. Wachacha us chi naesokat ay infiaorna. Ngem penak-orcha nan tapen nan nauyucha infiaorna, ya penatuyucha nan tapina.* <sup>6</sup> *Kun pay hiyachi, nan nayagyag at nan us-usa ay laylaychuna ay anak ay laraki. As nan anongosna, infiaorna hiya kan chicha, tay kanana as numnumna un, ‘Siguradu ay mafainchantu as nan mismu ay anaku.’*

<sup>7</sup> “*Ngem kenalen nan chiyuchya nun-umauna as nan tunggal usa un, ‘Nauy nan mangetawid as nan uma ay uumaun takú. Akayu! Patayun takú hiya ta kuwaun takú nan tawidna.’* <sup>8</sup> *As nan hiyachi, lenabkischa hiya. Penatuyucha, ya ichus-orcha as nan fiakun sakop nan uma ay natatanman as ubas.*”

<sup>9</sup> Senarudsud Jesus, “*Ngachanantu nan atun nan nunkuwa as nan uma ay natatanman as ubas? Omalintu hiya ay mangpatuy as nan chiyuchya nun-umauna. Angkiay ichatna as nan tukún nan umana ay natatanman as ubas.*

<sup>10</sup> *Ay chaanyu finasfiasa nan nauy naisurat as nan Kalen Apo Dios? Kanana un:*

‘*Nan chiyuy fiatu ay enachen nan chiyuchya muntuptuping at hiya nan nunfi-alin as kaamuchan ay maipugnad.*

<sup>11</sup> *Hiyana nan enat nan Apo, ya anuy paat nakaskaschaaw sa as nan mangiila takú.*†

<sup>12</sup> *As nan hiyachi, penachas nan anap-apon nan chiyuchya Judio ay mangepatiliw kan Jesus, tay naawatancha ay nan maepadpachongan ay infiakian Jesus at maepangkep kan chicha. Ngem inmugyatcha as nan ongoongor ay tataku, isunga tenaynancha hiya.*

### *Nan Sarudsud Maepangkep As Munfiaroran (Mat. 22:15-22; Luc. 20:20-26)*

<sup>13</sup> *Kun pay narpas chi, infiaorcha kan Jesus nan tapen nan chiyuchya Fariseo ya nan tapen nan chiyuchya pasorot Ari Herodes ay uy manikap kan hiya babaen as nan sarudsudcha ta wachay mangicharumancha kan hiya.*

<sup>14</sup> *Enmalicha kan Jesus, ya kanancha, ‘Misturu, ammumi ay tit-iwa nan am-in ay kanam. Mapapchong nan atum as nan am-in ay tataku, tay achim ifilang nan kasasaadcha, ngem isurom nan tit-iwa ay laychun Apo Dios ay*

\* <sup>12:1</sup> Isa. 5:1-2    † <sup>12:11</sup> Sal. 118:22-23; Ara. 4:11

atun nan tataku. Ifiakiam pay ngarud kan chakami nan songfiatmu's na: Ay eparufus nan Lintig takú ay munfiayad kami as fiaror kan Emperador ad Roma winnu achi?"

<sup>15</sup> Ngem aammon Jesus ay pakamankamancha, ya kanana kan chicha, "Adchi t'uyak chischistingun? Ud-a, umiyali kayu as usa ay silsilyu ta ilaox."

<sup>16</sup> Kuncha pay inyali kan hiya, senarudsudna kan chicha, "Ngachana nan nakin lupa ya nakin ngachan as na?"

"Hi Emperador," ensongfiatcha kan hiya.

<sup>17</sup> Kenalen Jesus kan chicha, "Mu hiyasa ngarud, ichatyu kan Emperador nan kuk-awan Emperador, ya ichatyu us kan Apo Dios nan kuk-awan Apo Dios."

As nan nangaliyana's chi, naschaaw nan chiyuycha naifiaor kan hiya.

### *Nan Sarudsud Maepangkep As Nan Matakuwan Nan Natuy Manipud As Nan Utúy*

(Mat. 22:23-33; Luc. 20:27-40)

<sup>18</sup> Wachacha nan Saduceo ay enmali kan Jesus. Chicha nan bunggoy chi Judio ay mangali un achi matakú nan natuy manipud as nan utúy. Senarudsudcha kan hiya, <sup>19</sup> "Misturu, nauy met nan insurat Moises para kan chitaku ay kanana un, 'Mu wachay hen-asawa ay maid anakcha ya matuy nan laraki, masapor ay asawaun nan sunúd nan laraki nan naellakas ta mu wachay anakcha at maifilangtu nan onga as potot nan chiyuy natuy ay sunúdnu.'<sup>‡</sup> <sup>20</sup> Wachacha kanu nan pitu ay hen-anag-i ay lanaraki. Enmasawa nan panguru, at natuy ay maid enpototna. <sup>21</sup> Enasawan nan utub nan chiyuy naellakas, at natuy us ay maid enpototna. Assid-i us challu as nan maekatlu <sup>22</sup> inkiana as nan maekapitu. Natuycha am-in ay maid enpototcha. Kuncha pay natuy am-in, natuy us nan fiafiai. <sup>23</sup> As nan urkiw ay matakuwan manipud as nan utúy, ngachana ngay nan nakin asawa as nan chiyuy fiafiai, tay enasawan met nan pitu hiya?"

<sup>24</sup> Tinumfor hi Jesus kan chicha, "Kenomsaw kayu tit-iwa! Achiyu maawatan nan maepangkep as nan Kalen Apo Dios, ya achiyu us maawatan nan pannakafialina. <sup>25</sup> Tay as nan matakuwan nan nunkatuy manipud as nan utúy at maid mun-eennasawa, ngem kuncha at am-in maepachong as nan anheles ad chaya. <sup>26</sup> Mu maepangkep as nan matakuwan nan nunkatuy manipud as nan utúy, ay chaanyu finasfiasa nan enpaisurat Apo Dios kan Moises maepangkep as nan cha munkiarkiarud ay kaiw? Hiyachi nan naisuratan nan kenalen Apo Dios un, 'Ha-un nan Dios Abraham, nan Dios Isaac ya nan Dios Jacob.'<sup>§</sup> <sup>27</sup> Nan laychuna ay kanan at hiya nan Dios nan natataku, fiakun nan nunkatuy. Nunsidlay kenomsawanyu!"

*Nan Kaamuchan Ay Filin Apo Dios*

(Mat. 22:34-40; Luc. 10:27)

<sup>28</sup> Chinngor nan usa as nan mun-isursuru as Lintig nan sososek cha Jesus ya nan chiyuycha Saduceo. Ammuna ay ustu nan ensongfiat Jesus kan chicha, isunga senarudsudna kan hiya, "Apo, ngachana man nan kaamuchan ay filin?"

<sup>29</sup> Tinumfor hi Jesus, "Nan kaamuchan ay filin Apo Dios at hiyana: 'Chungrunu, chakayu ay kianak Israel! Us-usa nan Apo takú ay hi Apo Dios. Maid tukún.' <sup>30</sup> Masapor laylaychum nan Apo ay Diosmu as nan am-in ay

<sup>‡</sup> 12:19 Deut. 25:5-6    <sup>§</sup> 12:26 Exo. 3:6

*pusom, as nan am-in ay lenawam, as nan am-in ay numnummu ya as nan am-in ay fikasmu.\** <sup>31</sup> *Nan maekadwa ay kaamuchan at hiyana: ‘Masapor laylaychum nan pachongmu ay taku ay kaman as nan atum ay manglaylayad as achormu.’† Maid kasin tukún as am-amud ay filin mu nan nauycha.*

<sup>32</sup> Angkiay ya kenalen nan mun-isursuru as Lintig, “Ustu, Misturu. Tit-iwa nan kenalem ay us-usa nan Apo Dios. Maid tukún mu achi hiya yangkiay. <sup>33</sup> Tit-iwa met ay masapor laychun nan taku hi Apo Dios as nan am-in ay pusuna, as nan am-in ay numnumna ya as nan am-in ay fikasna. Masapor laylaychuna us nan pachongna ay taku kaman as nan atuna ay manglaylayad as nan achorna. Tit-iwa ay am-amud chaná as atun mu nan mangichatchatonan as animar ya tapina ay chaton kan Apo Dios.”‡

<sup>34</sup> As nan nanngoran Jesus ay nainsilifian nan songfiat nan mun-isursuru as Lintig, kenalina kan hiya, “*Kiayudka maetapi henan muntorayan Apo Dios.*” Kun pay narpas na, maid poros makaiturud ay nunsarsarudsud kasiñ kan hiya.

### *Nan Sarudsud Maepangkep Kan Cristo*

(Mat. 22:41-46; Luc. 20:41-44)

<sup>35</sup> Kun pay cha mun-isuru hi Jesus aschi's Templo, senarudsudna, “*Adchi pay ngarud t'uy kanan nan chiyuyla mun-isursuru as Lintig un hi Cristo at kianak David?*” <sup>36</sup> *Hiyana nan enpaifaag nan Espiritu Santo kan David mismu un,*  
*‘Kenalen nan Apo as nan ok Apo un,*

*“Tomokorka as apét kannawanku inkiana amisok nan chiyuyla kafusormu.”* §

<sup>37</sup> *“Mu hiyasa ngarud ay ‘Apo’ nan pangaw-awag David ay mismu kan Cristo, anuyna ngay atun ay hi Cristo at kianak David?”*

### *Nan Infiagiakian Jesus Maepangkep As Nan Mun-isursuru As Lintig*

(Mat. 23:1-12; Luc. 20:45-47)

Ongor chi lagsak nanongoongor ay tataku ay nanngor as nan kenalina. <sup>38</sup> As nan cha mun-isuruwan Jesus, kenalina, “*Il-ilaunyu nan chiyuyla mun-isursuru as Lintig ay manglaylayad ay munliklikud ay nakafiachu as somakiayad ta mafifigicha, ya manglaylayad ay marisrispitu as nan chiyuyla mun-el-elakwan.*” <sup>39</sup> *Laylaychuncha nan chiyuyla kaammayan ay tokoran as nan chiyuyla senagoga ya nan tokoran nan chiyuyla mafifigfig as tomoktokorancha as nan uycha makifastaan.* <sup>40</sup> *Isikapancha ay mangkuwa as nan abafong nan eellakas. Angkiay paanchuanchuwuncha nan kararagcha ta ilau nan tataku ay ammaycha. Naliglikiaittu nan chusacha!”*

### *Nan Chaton Nan Ellakas*

(Luc. 21:1-4)

<sup>41</sup> As nan nangatokoran Jesus ay nanasakiang as nan mangit-ittuwan as siping aschi's Templo, inilána nan tataku ay cha mangipuuy as sipingcha. Inmipuuy nan ongor ay nunkafiaknang as chamuna ay siping. <sup>42</sup> Angkiay emali nan usa ay pugli ay ellakas ay nangipuuy as kun chuwa ay pesos.

<sup>43</sup> Enayakian Jesus nan disipulusna, at kenalina kan chicha, “*Ifiakiak kan chakayu nan tit-iwa. Hi tona ay pugli ay ellakas nan nangittu as kachamunaan kan chicha am-in.*” <sup>44</sup> *Tay nan nunkafiaknang at kuncha yangkiay inchat nan*

---

\* <sup>12:30</sup> Deut. 6:5    † <sup>12:31</sup> Lev. 19:18    ‡ <sup>12:33</sup> Deut. 4:35    § <sup>12:36</sup> Sal. 110:1; Ara. 2:35; Heb. 1:13; 10:12-13

*subra as nan kenafiaknangcha. Ngem hi tona ay ellakas uray pugli at inittuna challu nan am-in ay wacha kan hiya ay kurpuwan chi pagfyagna.”*

## 13

### *Nan Nangepakaammuwan Jesus As Nan Machachaelan Nan Templo (Mat. 24:1-2; Luc. 21:5-6)*

<sup>1</sup> Kun pay cha pumitiw hi Jesus as nan Templo, kenalen nan usa ay disipuluna kan hiya, “Misturu, ilaum kay! Anad-acha-an as solet nan chiyuycha fiatu ay enosarcha, ya anuy paat anam-ammay nan chiyuycha nakiab as fiatu as nan kawad-an nan Templo!”

<sup>2</sup> “O!” ensongfiat Jesus kan hiya. “Ilaum nan nauycha anad-acha ay nakiab. Maidtu mayagyag as uray usa ay fiatu as nan naesasad-ana, tay kuncha am-in maikur-ub.”

### *Nan Liglikiat Ay Ommattu (Mat. 24:3-14; Luc. 21:7-19)*

<sup>3</sup> As nan nangatokoran Jesus henan chuntug ay Olivo ay chuchumangun nan Templo, enmali cha Pedro, Santiago, Juan ya hi Andres kan hiya ay chidchicha yangkiay. <sup>4</sup> Senarudsudcha, “Ifiakiam pay kan chakami mu kaatnantu nan ommatan chatona, ya ngachanantru nan sinyar ay mange-matongan as nan ommatan chatona am-in?” <sup>5</sup> Kenalen Jesus kan chicha, “Il-ilaunyu ta maid mangar-allilaw kan chakayu. <sup>6</sup> Ongortu nan tataku ay omali ay mangosar as nan ngachanku ay mangarkali un, ‘Ha-un hi Cristo!’ ya ongortu nan allilawuncha ay tataku. <sup>7</sup> As nan manngoranyu as kanikong chi kukufiat ya chamag maepangkep as kufiat henan achawwi ay luglukiar, achi kayu machanakian. Masapor challu ommat chaná, ngem fiakun pay hiyasa nan munpatingkiaan nan lufong. <sup>8</sup> Munkikinnufiattu nan chiyuycha nasyon, ya kaman us nan chiyuycha muntorayan. Wachachantu kichu henan tukutukún ay lukiar. Wachachantu us chi fitel. Ngem chatona nan laplapon chi likiat ay kaman as nan munpasikaran chi omanak.

<sup>9</sup> “Il-ilaunyu, tay wachachantu nan mangicharum kan chakayu as nan chiyuycha lupon. Masaplesplet kayuntu as nan chiyuycha senagogacha. Tomakchug kayuntu as nan sangwanan nan gogobernador ya ar-ari kiapú kan ha-un. Hiyasa nan chansayu ay mangepaneknektu kan chicha as nan maepangkep as nan Ammay ay Chamag. <sup>10</sup> Nan Ammay ay Chamag at masapor maekasaba on-oná henan am-in ay nasyon sakbay munpatingkia nan lufong.\* <sup>11</sup> Kun chakayu pay tiliwun ya icharum, achi kayu machanakian mu ngachanantru nan kananyu, ngem ifiakiayu mu ngachana nan maepakaammu kan chakayu as nan hana ay uras. Tay fiakun chakayu nan munkali, ngem kun at nan Espiritu Santo.

<sup>12</sup> “As nan hiyasa ay timpu, wacha nan mangepapatuytu as mismu ay sunúdná ay laraki. Assesantu us nan atun nan ama as nan pototna. Nan an-ak us at kontraunchantu nan chanakchakorchaya epapatuycha chicha. <sup>13</sup> Inglun chakayuntu as nan am-in ay tataku kiapú as pammatiyu kan ha-un. Ngem nan taku ay mangan-anos ay omafurot kan ha-un inkiana as nan anongos at maesarakantu.”

### *Nan Kauugyat Ay Ommat (Mat. 24:15-28; Luc. 21:20-24)*

\* **13:10** 2 Ped. 3:10-14

**14** Inturuy Jesus, “Ilaunyuntu nan ‘Kauugyat ay Chumachael’ ay tematackchug as nan achina kalibfengan ay tomakchukian. (Nan mamaasa as na at masapor maawatana nan laychun tono ay kanan.) As nan hiyachi, nan umili ad Judea at masapor lomayawcha ay umuy henan chiyuuya chuntug. **15** Nan taku ay wacha as tabfongan nan afongna at achi masapor chumayu ay sungkop ay mangara as kinakuna. **16** Nan senmepot at achi masapor somaor ay mangara as kakiyna. **17** Kasusug-angtu kayman nan chiyuuya masikug ya nan cha munpasusu as nan hanacha ay urkiw! **18** Ekararagyu kan Apo Dios ta fiakun koma as nan chinamuy nan ommatana. **19** Tay as nan hanacha ay urkiw, omalintu nan nunsidla ay likiat ay maid maepachongana nunlapu as nan namayangan Apo Dios henan lufong inkiana ad wani, ya achintu kasin om-ommat.<sup>†</sup> **20** Mu achi henkemachun Apo Dios nan chiyuuya urkiw ay munlikiatan, maidtu taku ay kutug ay matataku. Ngem kiapú as nan pinilina ay tataku, henkemachuna nan chiyuuya urkiw.

**21** “As nan hiyachi ay timpu, mu wachay mangarkali kan chakayu un, ‘Ilaunyu! Nauy nan Cristo!’ winnu ‘Ilaunyu! Chiyuy hiya!’ at achiyu abafurotun. **22** Tay munpailachantu nan chiyuuya achi tit-iwa ay Cristo ya achi tit-iwa ay pomapadtu. Omepappailachantu as ongor ay nakaskaschaaw ay sinyar ya milagro ta mu maifalin at allilawuncha nan tataku ay pinilen Apo Dios. **23** Ngem il-launyu, tay infiafiakiak met at chaná am-in kan chakayu.”

#### Nan Kasin Omaliyan Nan Naepadtu Ay Anak Chi Taku (Mat. 24:29-31; Luc. 21:25-28)

**24** “As nan hanacha ay urkiw as nan karpasan nan timpon chi likiat, ngomon-gottu nan urkiw, ya achintu somorag nan furan. **25** Nan chiyuuya taraw at mag-aschantu ay murpu ad chaya, ya achintu manongnong chi aatun nan am-in ay wacha ad chaya.<sup>‡</sup> **26** Angkiay ilauchantu nan Naepadtu ay Anak chi Taku ay wachay ongor ay pannakafialina ya kaichayawana ay cha omali ay maetatapi as nan chiyuuya lifuu.<sup>§</sup> **27** Angkiay ya ifaornantu nan anheles<sup>\*</sup> ay uy mangamong as nan tataku ay pinilen Apo Dios henan uray ay chaud ay lukiar ay kawad-ancha.”

#### Nan Masuru As Nan Kaiw Ay Igos (Mat. 24:32-35; Luc. 21:29-33)

**28** Kenalen pay Jesus, “Suruwunyu koma nan maepadpachongan maepangkep as nan kaiw ay igos. As nan somalipingan nan kaiw ay igos ya maforongan, ammuu at ay kiayud chakun. **29** Hiyasa us ay as nan mangilyanyu ay cha om-ommat chaná at ammuyuntu ay kiayud at nan omaliyana ay kaman wacha hiya as nan pantiw. **30** Ifiakiak kan chakayu nan tit-iwa. Wachacha pay nan tapen nan tataku ad wani ay timpu ay matataku pay as nan ommatantu chatona am-in ay infiafiakiak. **31** Mamaidtu nan chaya ya luta, ngem achintu poros mamaid nan kalek.

#### Maid Mangammu As Nan Omaliyan Nan Naepadtu Ay Anak Chi Taku (Mat. 24:36-44)

**32** “Maid mangammu as nan urkiw winnu uras ay ommatantu chatona ay infiafiakiak. Uray nan anheles ad chaya winnu nan Anak Apo Dios at achicha ammu, ngem kun yangkiay nan Ama. **33** Il-ilaunyu ya munsasakiana kayu,

---

<sup>†</sup> **13:19** Dan. 12:1    <sup>‡</sup> **13:25** Isa. 13:9-11; 34:4; Joel 2:10; Pal. 6:12-17    <sup>§</sup> **13:26** Dan. (13:26) 7:13; Mar. 9:7; 14:62; Pal. 1:7    <sup>\*</sup> **13:27** As nan kali ay Griego at kanana, “opat ay kurpuwan chi angin.”

tay achiyu ammu nan timpu ay ommatana. <sup>34</sup> Maepachong na as nan taku ay cha munsakiana ay munfaat as nan achaachawwi. Sakbay mak-ak, ipiyarna nan afongna as nan chiyucha fiabfaaruna, ya ifiakiana nan chunuwun nan tunggal usa kan chicha. Ifilina us as nan munfiandiantay as nan sungkopan ay munfiantay hiya ay ustu. <sup>35</sup> Isunga munsasakiana kayu, tay achiyu ammu nan omaliyan nan nun-afong. Achiyu ammu mu uy at as nan maschum, tongan chi lafi, makapis winnu mangaurkiw. <sup>36</sup> Munsasakiana kayu, tay anaka ya loktat ay omali hiya, ya uchanana chakayu ay nanassuy. <sup>37</sup> Nan nauy ay infiakiak kan chakayu at hiya us nan ifiakiak as nan am-in ay tataku: *Munsasakiana kayu!*”

## 14

### *Nan Nangiyapancha As Atuncha Ay Mamatuy Kan Jesus (Mat. 26:1-5; Luc. 22:1-2; Jn. 11:45-53)*

<sup>1</sup> Chuwa pay ay urkiw at umchan nan Fiastan chi Munlausen ya Fiastan chi Tenapay ay Maid Lebadurana. Nan anap-apon chi papachi ya nan mun-isursuru as Lintig at chacha an-anapun nan atuncha ay mangtiliw ya mangepapatuy kan Jesus ay achi maam-ammowan nan tataku. <sup>2</sup> Kenalicha, “Aw, achi takú iyaspas as nan fiasta, tay anaka ya munkukuru nan ongoongor ay tataku.”

### *Nan Nangikuyakian Nan Fiafiai As Fiangfiangru As Nan Uron Jesus (Mat. 26:6-13; Jn. 12:1-8)*

<sup>3</sup> As nan kawad-an cha Jesus ad Betania, uycha nakekan as afong Simon ay nakonet ay enpaammay Jesus. As nan chacha manganan, naesnop nan usa ay fiafiai. Entatakina nan mangit-ittuwan ay naamma as fiat ay nan ngachana at alabastro ay nanapnu as munfiangu ay nanginngina-an ay makali un nardu. Pintuna nan fiakiang nan mangit-ittuwan, ya inkuyagna nan fiangfiangru as nan uron Jesus.

<sup>4</sup> As nan hiyachi, wachacha hid-i nan tapen nan tataku ay finnungat, ya chacha kanan ay matatakatiator, “Ayyiwka sa paat! <sup>5</sup> Mu koma naelaku na ay fiangfiangru at nasorok as turon kiasot ay dinario nan fiarorna. Angkiay maichat nan lakuna as nan chiyucha pugli.” Angkiay ya en-ensotcha as solet nan fiafiai.

<sup>6</sup> Ngem kenalen Jesus kan chicha, “Pay-anyu! Adchi t'uyyu lilifokun hiya? Ammay met nan enatna kan ha-un. <sup>7</sup> Tay kanayon ay wachacha kan chakayu nan chiyucha pugli, ya mu laychunyu, mafialinyu ay fiadngan chicha as nan kumpurmii ay uras. Ngem mu ha-un, achiyaktu kanayon ay wacha kan chakayu. <sup>8</sup> Enat nan fiafiai nan kafaelana ay atun kan ha-un. Enonana ay nangefokfok as nan fiangfiangru as nan achorku ta esakianana nan pannakailufokku. <sup>9</sup> Ifiakiak kan chakayu nan tit-iwa. Uray ay chaud henan intiru ay luta nan maekasabaan nan Ammay ay Chamag at maifiabfiaagtun nan enatna as mangnumnumnumnan kan hiya.”

### *Nan Nakiturakian Judas Ay Esepsepnai Hi Jesus (Mat. 26:14-16; Luc. 22:3-6)*

<sup>10</sup> Angkiay ya hi Judas Iscariote ay usa as nan hinpuru ya chuwa ay disipulus at inmuy as nan anap-apon chi papachi ta esepsepnai hi Jesus kan chicha. <sup>11</sup> Naragsakancha as nan nanngorancha as nan kenalina, ya enkaricha ay ichatcha nan siping kan hiya. Isunga nun-anap hi Judas as ustу ay chansa ay mangesepsepana kan Jesus.

*Nan Nangesakianaan Nan Disipulus As Nan Anongos Ay Makiufongancha Kan Jesus*

(Mat. 26:17-25; Luc. 22:7-13, 21-23; Jn. 13:21-30)

<sup>12</sup> As nan omona ay urkiw ay Fiastan chi Tenapay ay Maid Lebadurana at hiyasa us nan urkiw ay mangichatonan nan chiyuycha Judio as nan chiyuycha urfun ay karnero para as nan Fiastan chi Munlausan. Senarudsud nan disipulus kan Jesus, “Ay chaud nan laychum ay mangesakianaanmi as nan manganan takú as nan Fiastan chi Munlausan?”\*

<sup>13</sup> Angkiay ya kenalen Jesus as nan chuwa ay disipulusna, “Uy kayu henan siyudad,<sup>†</sup> at wachantu nan manib-at kan chakayu ay usa ay laraki ay manasakfiat as fusi ay natorwan as chanum. Unuchunyu hiya. <sup>14</sup> Uray ngachana ay afong nan sungkopana, kanaryu as nan nun-afong, Infiakian nan Misturu un ay chaud nan kuwartu ay mangiyufonganantu as nan disipulusna as nan Fiastan chi Munlausan?” <sup>15</sup> Epailanantu kan chakayu nan nunngangatu ay kuwartu ay ad-acha ay kawad-an nan am-in ay kasaporan takú. Hid-i nan munsakianaanyu.”

<sup>16</sup> Inmuy nan chiyuycha chuwa ay disipulus henan siyudad, ya ininchanancha nan am-in ay kaman as nan infiakian Jesus kan chicha. As nan hiyachi, ensakianacha nan manganan as nan Fiastan chi Munlausan.

<sup>17</sup> Kun pay naschum, inumchan hi Jesus ya nan hinpuru ya chuwa ay disipulus. <sup>18</sup> As nan chacha manganan, kenalina, “Ifiakiak kan chakayu nan tit-iwa ay wacha nan usa kan chakayu ay mangesepseptu kan ha-un ay hiya nan nakuufong kan ha-un ad wani.”

<sup>19</sup> Enlapon nan disipulusna ay nginmuyus, ya nunsesennarunucha ay nunsarudsud kan Jesus, “Ay ha-un ta?”

<sup>20</sup> “Usa kan chakayu ay hinpuru ya chuwa ay cha makisiwsiw kan ha-un as tenapay as nan mallokong,” ensongfiat Jesus kan chicha. <sup>21</sup> “Tay matuytu challu nan Naepadtu ay Anak chi Taku ay kaman as nan kanan nan naisurat as nan Kalen Apo Dios maepangkep kan hiya, ngem kasusug-ang kayman nan hana taku ay mangesepsep as nan Naepadtu ay Anak chi Taku! Un-unuya at mu kun chaan naiyan-anak hiya!”

*Nan Anongos Ay Nakiufongan Jesus As Nan Disipulusna As Nan Lafi*

(Mat. 26:26-30; Luc. 22:14-20; 1 Co. 11:23-25)

<sup>22</sup> As nan chacha manganan, enaran Jesus nan tenapay, ya nunyaman kan Apo Dios. Pinputput-ingna, angkiay inchatna kan chicha, ya kanana, “Araunyu na. Hiyana nan achorku.”

<sup>23</sup> Angkiay ya enarana nan tasa ay natotorwan as maikop. Kun pay narpas ay nunyaman kan Apo Dios, inchatna kan chicha, at inmikopcha am-in. <sup>24</sup> Kenalina kan chicha, “Hiyana nan charak ay mangepasiguradu as nan fierú ay nakiturakian Apo Dios as nan tataku. Omayastu as nan matuyak para as nan ongor ay tataku. <sup>25</sup> Ifiakiak kan chakayu nan kenatit-iwa. Achiyaktu umig-ikop as nan unus chi ubas inkiana umchan nan hana urkiw ay umikopak as nan fierú ay unus chi ubas henan muntorayan Apo Dios.”

<sup>26</sup> As nan narpasancha ay nunkanta as pangchaychayaw kan Apo Dios, pinmitiwha ay inmuy henan chuntug ay Olivo.

*Nan Nangepakaammuwan Jesus As Nan Mangesaotan Pedro Kan Hiya*

(Mat. 26:31-35; Luc. 22:31-34; Jn. 13:36-38)

---

\* <sup>14:12</sup> Exo. 12:1-27; Lev. 23:5-8; Deut. 16:5-8      † <sup>14:13</sup> Nan siyudad at Jerusalem.

<sup>27</sup> As nan chacha umuyan, kenalen Jesus as nan disipulusna, “*Lomayaw kayuntu am-in, tay wacha nan naisurat as nan Kalen Apo Dios ay kanana, Patayoktu nan mangay-aywan as nan karnero, at masisiyanchantu nan chiyuycha karnero.*”<sup>‡ 28</sup> Ngem as nan matakawak kasi manipud as nan utúy, omon-onaaktu ay umuy ad Galilea mu chakayu.”

<sup>29</sup> Infiakian Pedro kan Jesus, “Uray mu lomayaw nan am-in ay kakadwak, achiyak challu lomaylayaw.”

<sup>30</sup> Kenalen Jesus kan hiya, “*Ifiakiak kan he-a nan tit-iwa. Ad wani ay lafi, sakbay munkokakok nan ka-or as nan kapidwa at mamitluwaktu esaot kan he-a.*”

<sup>31</sup> Ngem enpapelet Pedro, “Aw! Uray mu maetapiyak kan he-a ay matuy, acheck challu poros esassaot he-a!” Assesa us nan kenalen nan am-in ay kakadwana ay disipulus.

### *Nan Nunkararakian Jesus Ad Getsemani (Mat. 26:36-46; Luc. 22:39-46)*

<sup>32</sup> Inmuy cha Jesus henan lukiar ay makali un Getsemani, ya kanan Jesus as nan disipulusna, “*Etokoryu hena ta wyak munkararag.*”<sup>33</sup> Entakina hi Pedro, hi Santiago ya hi Juan. As nan hiyachi, enlapuna ay nginmuyus ya nalilifok. <sup>34</sup> Kenalina kan chicha, “*Kamanku ekatuy nan nunsidla ay ngunguyusku. Mayasna kayu ya munpuyat kayu.*”

<sup>35</sup> Angkiay ya inmuy as nan ad-achawwi as akét. Nunlukfub ya enkararagna ay mu maifalin koma at achi maturuy nan ommat kan hiya.

<sup>36</sup> Enkararagna, “*Ama, nan am-in at kafaelam. Kaanum koma kan ha-un nan nauy omali ay likiatku. Uray mu assena, fiakun challu nan laychok nan maekaman, ngem nan laychum.*”

<sup>37</sup> As nan nunfiangchana as nan kawad-an nan disipulusna, ininchanagan chicha ay nanassuy. Kenalina kan Pedro, “*Simon, ay nanassuyka at?* Ay kunmu achi kafaelan ay munpuyat as uray us-usa ay uras?

<sup>38</sup> *Munpuyat ya munkararag kayu ta achi kayu maamis as nan sulisug. Nakasakiana kayman nan numnumyu, ngem nakapuy nan achoryu.*”

<sup>39</sup> Kasin tenmaak hi Jesus, ya enkararagna nan pachong nan kenarkalina.

<sup>40</sup> Kun pay nunfiangad as nan maekapidwa as nan kawad-an nan disipulusna, ininchanagan chicha ay nanassuy kasin, tay makaskassuycha as solet.

Achicha ammu nan esongfiatcha kan hiya.

<sup>41</sup> Inmuy kasin ay nunkararag.

Kun pay nunfiangad as nan maekapitlu, kenalina kan chicha, “*Ay kukutug kayu ay cha mammamassuy ya cha mun-ib-iblay? Ustu sa! Inumchan at nan uras ay maesepsepan nan Naepadtu ay Anak chi Taku as nan fumafiasor.*”

<sup>42</sup> *Ayu, fumangun kayu ta uy takú maisib-at. Ilaunyu, nauy at nan mange-sepsep kan ha-un.*”

### *Nan Naniliwancha Kan Jesus (Mat. 26:47-56; Luc. 22:47-53; Jn. 18:3-12)*

<sup>43</sup> Kun pay kukutug ay cha munkarkali hi Jesus, enmali hi Judas ay usa as nan hinpuru ya chuwa ay disipulus. Intutun-udna nan ongor ay tataku ay kachorchorosan ya kapakpak-oran. Chicha nan infiaor nan anap-apon chi papachi, mun-isursuru as Lintig ya nan anam-amá.

<sup>44</sup> Nan sinyar ay inturag

Judas as nan intutun-udna at assena: “*Nan taku ay fisituwok at hiya nan chayu an-anapun. Tiliwunyu hiya, ya etaakyu ay mangukuwarcha ay ustу.*”

<sup>‡</sup> 14:27 Zac. 13:7

<sup>45</sup> As nan inumchanan Judas, nunchakpos hiya kan Jesus, ya kanana, “Misturu!” ya finisituna hiya. <sup>46</sup> Angkiay ya tiniliwcha hi Jesus, ya enpapakudcha ay ustu. <sup>47</sup> Ngem as nan nangil-an nan usa ay disipulu ay nangatachug hid-i, enoknosna nan chorosna. Finakagna nan fiabfiaarun nan kangatuwan ay pachi, at nakingasan nan ingana.

<sup>48</sup> Angkiay ya kenalen Jesus kan chicha, “Ay kunak kumukuru? Adchi t’uy kayu emmali ay nangachoros ya nangapak-or ay mangtiliw kan ha-un?

<sup>49</sup> Inurkiw met ay wachaak kan chakayu aschi’s Templo ay cha mun-is-isuru, ya chaanak met tiniltiliw kan chakayu. Ngem masapor atunyu na ta matong-par nan naisurat as nan Kalen Apo Díos.” <sup>50</sup> Angkiay ya lenmayawcha am-in, ya tenaynancha hi Jesus.

<sup>51</sup> Wacha nan usa ay fumarfiaru ay nangepopotepot yangkiay as urus as achorna ay cha umun-unud kan Jesus. Penachas nan tataku ay mangtiliw kan hiya, <sup>52</sup> ngem lenmayaw ay lablabfusan ay nanaynan as nan urusna.

*Nan Namistikiaran Nan Ap-apon Chi Judio Kan Jesus  
(Mat. 26:57-68; Luc. 22:54-55, 63-71; Jn. 18:13-14, 19-24)*

<sup>53</sup> Angkiay ya inuyucha hi Jesus as nan afong nan kangatuwan ay pachi. Hid-i nan naaamongan nan am-in ay anap-apon chi papachi, anam-amá ya nan mun-isursuru as Lintig. <sup>54</sup> Inmun-unud hi Pedro ay tenmataak inkiana as nan fiattaw nan afong nan kangatuwan ay pachi. Angkiay ya naketokor hid-i as nan chiyuycha kuwarcha ay makeanichu.

<sup>55</sup> Nan anap-apon chi papachi ya nan am-in ay membron nan Sanhedrin at nun-anaanapcha as pammaneknek as mangepafiasorancha kan Jesus ta wachay kiapúna as mangepapatuyancha kan hiya, ngem maid naanapancha. <sup>56</sup> Nan ongor at nuntistigucha as achi tit-iwa ay maekontra kan Jesus, ngem achi mapapchong nan pammaneknekcha.

<sup>57</sup> Wachacha us nan tapen nan tataku ay tenmakchug ay nuntistigu as achi tit-iwa. Kenalicha, <sup>58</sup> “Chinnormi hiya ay kenalina, ‘Chachaeloktu nan nauy Templo ay enammaan chi tataku, ya as nan unig chi turu ay urkiw kumaufiaku as tukún ay fiakun taku nan mangamma.’ ” <sup>59</sup> Uray challu chatona at chaan napapchong nan intistigucha.

<sup>60</sup> Angkiay ya tenmakchug nan kangatuwan ay pachi as nan sangwanan nan am-in, ya senarudsudna kan Jesus, “Ay maid esongflatmu as nan cha epabpfiasor chatona ay tataku kan he-a?” <sup>61</sup> Ngem kun kinkinak hiya ya chaan tinumtumfor. Senarudsud kasin nan kangatuwan ay pachi kan hiya, “Ay he-a nan Cristo ay Anak nan Machaychayaw ay Díos?”

<sup>62</sup> “O ha-un,” ensongflat Jesus. “Ilaunyuntu nan Naepadtu ay Anak chi Taku ay tomokor as apét kannawan Apo Díos ay Mannakafialin as nan am-in. Ilaunyuntu us ay omali hiya ay murpu ad chaya ay maetatapi as nan lifuu,”<sup>§</sup> ensongflat Jesus.

<sup>63</sup> Kun pay chinngor nan kangatuwan ay pachi chi, lenaksetna nan fiachuna kiapú as fungatna, ya kanana, “Ay masapor takú pay chi muntistigu? <sup>64</sup> Chinngomeryu at met ay enpachongna nan achorna kan Apo Díos. Ngachana nan munnumnumnumyu?” Am-incha at enkeddengcha ay libfengna ay mapatuy.

<sup>65</sup> Angkiay ya enlapon nan tapen nan tataku ay manubtubfia kan hiya. Enokopancha nan matana, ya sinudpasudpakcha hiya, at kenalicha kan

hiya, “Ud-a pay! Pugtuwam mu ngachana nan nanudpak kan he-a.” Haat arauan nan chiyuycha kuwarcha hiya ya tenamtampakcha.

### *Nan Nangesaotan Pedro Kan Jesus*

(Mat. 26:69-75; Luc. 22:56-62; Jn. 18:15-18, 25-27)

<sup>66</sup> Kun pay hi Pedro, kukturug as nan fiattaw. Nar-os nan usa as nan chiyuycha fiabfiafiai ay fiabfiaarun nan kangatuwan ay pachi as nan kawadana. <sup>67</sup> Kuna pay inila hi Pedro ay cha makean-anichu, entoongana hiya, at kenalina, “He-a us at nakekadkadwaka met kan Jesus ay i-Nazaret.”

<sup>68</sup> Ngem ensaot Pedro, “Achek poros ammu nan cham kankanan, ya achek us maawatan!” Inmuy hiya as nan sugpan nan fiattaw. Hiya at chi ya nunkokakok nan ka-or. <sup>69</sup> Nan tukún ay mafiabfiaor ay fiafiai at enmatonana hi Pedro, at kenalina as nan chiyuycha nangatakchug, “Hi ton a met ay laraki at usa us kan chicha.” <sup>70</sup> Ngem kasina ensaot.

Kun pay naaw-awni as akét, nan chiyuycha nangatakchug hid-i at kenalicha kan Pedro, “O kayong, usaka kan chicha, tay i-Galileaka met.”

<sup>71</sup> Ngem ensapatan Pedro as nan achorna, “Chusaunak ud-ay kan Apo Dios mu achi tit-iwa nan chak ifiagfiakia! Achek poros ammu nan taku ay chayu kankanan!”

<sup>72</sup> Hiya at chi ya nunkokakok nan ka-or as nan maekapidwa, ya nanumnum Pedro nan infiakian Jesus kan hiya, “*Sakbay ay munkokakok nan ka-or as nan maekapidwa at mamitluwaktu esaot kan he-a.*” Kun pay nanumnum Pedro, chaana naetporan chi saket chi numnumna, ya nunsidlay akorna.

## 15

### *Nan Naiyuyan Jesus Kan Pilato*

(Mat. 27:1-2, 11-14; Luc. 23:1-5; Jn. 18:28-38)

<sup>1</sup> As nan wi-ewi-et, nuntuturagcha nan anap-apon chi papachi, anamá, mun-isursuru as Lintig ya am-in ay membron nan Sanhedrin mu anan atuncha kan Jesus. Kun pay narpas chi, finarudcha hiya, ya enek-akcha ay nangipurang kan Gobernador Pilato.

<sup>2</sup> Senarudsud Pilato kan hiya, “Ay he-a nan aren chi Judio?”

“*He-a nan nangali ay ha-un,*” ensongfiat Jesus.

<sup>3</sup> Ongor chi enpafiasor nan anap-apon chi papachi kan Jesus. <sup>4</sup> Angkiay kasin senarudsud Pilato kan hiya, “Chungrum at ongor chi chacha epab-pafiasor kan he-a. Ay kun maid esongfiatmu?” <sup>5</sup> Ngem chaan challu tinumtumfor hi Jesus, isunga naschaaw hi Pilato.

### *Nan Naekeddengan Jesus Ay Matuy*

(Mat. 27:15-26; Luc. 23:13-25; Jn. 18:39-19:16)

<sup>6</sup> Kun kay Fiastan chi Munlausan at ukialen Pilato ay umilufus as usa ay fierud ay chawatun nan tataku. <sup>7</sup> As nan hana ay timpu, wacha nan usa as nan chiyuycha fierud ay nan ngachana at Barrabas. Hiya ya nan chiyuycha kakadwana at penmatuycha as nan nangkukuruwancha as nan goberno.

<sup>8</sup> Kun pay naamong nan tataku as nan sangwanan Pilato, chinawatcha kan hiya ay atuna koma nan ukalina kun kay fiasta. <sup>9</sup> Senarudsud Pilato kan chicha, “Ay laychunyu ay ilufusku nan aren chi Judio?” <sup>10</sup> Infiakiana chi, tay naammuwana ay inpurang nan anap-apon chi papachi hi Jesus kan hiya kiapú as aposcha.

<sup>11</sup> Ngem nan anap-apon chi papachi at chinorchorcha nan tataku ay munkuru ta nan chawatuncha ay ilufusna para kan chicha at hi Barrabas

fiakun hi Jesus. <sup>12</sup> Kenalen kasiñ Pilato as nan tataku, “Mu hiyasa, anan atok ngay ngarud as nan laraki ay kananyu un aren chi Judio?”

<sup>13</sup> Infukiawcha, “Epaelansam as nan koros!”

<sup>14</sup> “Adchi ngay? Ngachana man nan fiasorna?” senarudsud Pilato kan chicha.

Ngem kenaskasincha infukiaw, “Epaelansam as nan koros!”

<sup>15</sup> Kiapú ta laychun Pilato ay paragsakuna nan tataku, inlufusna hi Barrabas para kan chicha. Angkiay enpasaplesapletra hi Jesus as nan sosorchachu, ya inpurangna hiya ta maelansa as nan koros.

### *Nan Nangot-otyokan Nan Sosorchachu Kan Jesus (Mat. 27:27-31; Jn. 19:2-3)*

<sup>16</sup> Iniskop nan sosorchachu hi Jesus as nan fiattaw nan palasyon nan gobernador, ya enamongcha nan am-in ay kakadwacha. <sup>17</sup> Finachuwancha hi Jesus as kakiay ay munchachara ay maepachong as nan fiachon chi ari. Penolekawcha nan komawet ay sufet ya insukrubcha kan hiya. <sup>18</sup> Angkiay ya enlapucha ay agin papakomosta kan hiya, “Matakutakuka ay Aren chi Judio!” <sup>19</sup> Enpak-opak-orcha nan nunu as nan uruna, ya tinubfiatubfiaancha hiya. Nunpalpalintumangcha ay aginchachayaw kan hiya. <sup>20</sup> Kuncha pay lenpas ay nangotyootyok kan hiya, kenaancha nan munchachara ay kakiay, ya enpafiachucha kasiñ nan sikud ay inflafiafachuna. Hacha at ek-ak ay uy mangelansa kan hiya as nan koros.

### *Nan Naelansaan Jesus As Nan Koros (Mat. 27:32-44; Luc. 23:26-43; Jn. 19:17-27)*

<sup>21</sup> As nan chacha manad-aranan, wacha nan nurpu henan sikib ay cha omali henan siyudad ay nan ngachana at Simon ay i-Cirene ay aman cha Alejandro kan Rufo. Kuncha pay sinib-at hiya, penelet nan sosorchachu hiya ay manakfiat as nan koros Jesus. <sup>22</sup> Angkiay ya iniyuuya hi Jesus henan lukiar ay makali un Golgota ay nan laychuna ay kanan at “Lukiar nan Tong-or chi Uru”. <sup>23</sup> Hid-i, penachasca ay paikopun hi Jesus as fiayas ay nakaslangan as akias ay makali un mirra ay mangepakyat kanu as putug, ngem enachina.

<sup>24</sup> Enlansan nan sosorchachu hiya as nan koros. Angkiay finingfingaycha nan chiyuuya fiachuna babaen as nan nunfifinnonotancha ta ilauncha mu ngachana nan araun nan tunggal usa kan chicha. <sup>25</sup> Alas nuebe as nan wiet nan nangelansaancha kan Jesus as nan koros. <sup>26</sup> Nan tabra ay naisusuratan nan naepafiasor kan hiya at assena nan kafiasaana: “Nan Aren chi Judio.” <sup>27</sup> Enlansacha us nan chuwa ay homohold-ap, usa as apét kannawan Jesus, ya nan usa at as apét kannikidna. <sup>28</sup> [Hiyana nan natongparan nan naisurat as nan Kalen Apo Dios ay kanana, “Naetapi hiya as nan chiyuuya lomalabsing as lintig.”]\*

<sup>29</sup> Nan chiyuuya cha marmar-os at en-ensotcha hiya ya nunwugwug-wugcha, ya chacha kankanan, “Kakun ayu ad wani! He-a ay nangali un kafielam ay manachael as nan Templo ya kiaufum as nan unig chi turu ay urkiw <sup>30</sup> at ud-a, esarakam nan achormu, ya komsocka as nan koros!”

<sup>31</sup> Uray nan anap-apon chi papachi ya nan mun-isursuru as Lintig at enot-otyokcha hi Jesus as nan chacha mangarkaliyan as nan tunggal usa, “Ensarakana nan tapina ay tataku, ngem achina met poros maesarakan nan achorna. <sup>32</sup> Kakun ud-a komsock ad wani nan nauy Cristo ay aren nan chiyuuya kianak Israel as nan korosna ta ilaun takú, at afurotun takú

\* <sup>15:28</sup> Isa. 53:12

hiya." Nan chiyuycha naetapi kan Jesus ay naelansa as nan koroscha at ininsurtucha us hiya.

### *Nan Natuyan Jesus*

(Mat. 27:45-56; Luc. 23:44-49; Jn. 19:28-30)

<sup>33</sup> As nan nunkiawa, ngenmongot nan intiru ay luta inkiana alas tres as nan makiayud. <sup>34</sup> As nan alas tres, inpigsan Jesus ay nangifiukiaw, "Eli, Eli, lama sabaktani?" Nan laychuna ay kanan at "Diosku, Diosku, adchi t'uyak ennganuy?"<sup>†</sup>

<sup>35</sup> As nan nanngoran nan tapen nan tataku ay nangatakchug hid-i, kenalicha, "Chungrunu sa! Chana ayakian hi Elias." <sup>36</sup> Tenmagtag nan usa ay nangepasosop as nan espongha as nan senmoka ay fiayas. Kun pay narpas, enpakatna as nan nunu, ya inchawchawna kan Jesus ta sosopuna, ya kanana, "Awni pay ud-a ta ilaun takú mu omali hi Elias ay uy mangeksop kan hiya as nan koros."

<sup>37</sup> Nunfukiaw hi Jesus as napigsa ya natuy. <sup>38</sup> As nan hiyachi, narakset ay nunkudwa nan kurtinan nan Templo nunlapu as lamagna inkiana as kuwabna.<sup>‡</sup> <sup>39</sup> Kun pay inilan nan kapetan chi sosorchachu ay nangatakchug hid-i ay nanasakiang kan Jesus nan enatna ay natuy, kenalina, "Tit-iwa payat ay hi ton a y taku at Anak Apo Dios!"

<sup>40</sup> As nan ad-achawwi as akét, wachacha nan fianafiai ay nangiila as nan cha om-ommat. Nan tapina kan chicha at cha Maria Magdalena, hi Maria ay enan cha Jose kan Santiago ay makali un ong-onga, ya hi Salome.<sup>§</sup> <sup>41</sup> Chatona nan nakikkiuy ya namadfiachang kan Jesus as nan kawad-ana pay laing ad Galilea. Ongor us nan tapina ay fianafiai ay immunud kan Jesus as nan enmaliyana ad Jerusalem.

### *Nan Lufun Jesus*

(Mat. 27:57-61; Luc. 23:50-56; Jn. 19:38-42)

<sup>42</sup> Kun pay cha maschum, chacha munsakiana nan Judio para as nan kafikiatana ay Urkiw ay Mun-iblayan. <sup>43</sup> Hi Jose ay i-Arimatea at naturud ay immuy kan Pilato, at chinmawat as pammarufus ay arauña nan anchor Jesus. Hi Jose ay anna at usa ay machayaw ay ap-apon chi Judio ay manman-ud as nan omaliyan nan muntorayan Apo Dios.

<sup>44</sup> Naschaaw hi Pilato as nan nanngorana ay natuy at hi Jesus. Isunga enayakiana nan kapetan nan sosorchachu ya senarudsudna mu tit-iwa ay natuy hi Jesus. <sup>45</sup> Kuna pay naammuwán as nan kapetan ay natuy tit-iwa hi Jesus, enparufusna ay arauña nan anchor Jesus. <sup>46</sup> Lenmaku hi Jose as am-ammay ay lopot. Enpaksopna nan anchor Jesus, at penotepotana as nan hana ay lopot. Angkiay ya enpaipuunya as nan lufok ay natuktukan ay chupras. Kun pay narpas, enpaulina nan ad-acha ay fiatu ay nanangubna as nan lufok. <sup>47</sup> Hi Maria Magdalena ya hi Maria ay enan Jose at inilacha nan nailubkan Jesus.

## 16

### *Nan Natakuwan Jesus Manipud As Nan Utý*

(Mat. 28:1-10; Luc. 24:1-12; Jn. 20:1-10)

<sup>1</sup> Kun pay immuy nan Urkiw ay Mun-iblayan, lenmaku cha Maria Magdalena, Maria ay enan Santiago, ya hi Salome as fiangfangru ta uycha

† **15:34** Sal. 22:1    ‡ **15:38** Exo. 26:31-33; Heb. 9:3    § **15:40** Luc. 8:2; Mar. 16:1

ekapu as nan anchor Jesus. <sup>2</sup> As nan wi-ewi-et nan Chumingku as nan cha fomoknakian nan urkiw, inmuy nan chiyuya fianaflai as nan lufok Jesus. <sup>3</sup> As nan chacha ay-ayan, chacha kanan ay matatakiatfor, “Ngachana ngay nan mangulin as nan tangub nan lufok?” <sup>4</sup> As nan inumchanancha as nan lufok, inilacha ay nakakaan nan ad-acha ay tangub nan lufok. <sup>5</sup> Kuncha pay sinungkop ya inilacha nan fumarfiaru ay nangatokor as apét kannawan ay nangakakiay as munpupukaw, inmugyat.

<sup>6</sup> Kenalina kan chicha, “Achi kayu umugyat. Ammok challu ay chayu anapun hi Jesus ay i-Nazaret ay naelansa as nan koros. Maid hiya hena. Nataku hiya manipud as nan utúy! Ilaunyu nan nangesad-antha kan hiya. <sup>7</sup> Uyyu pay ifiakia as nan disipulusna ya kan Pedro ay omon-oná ay umuy hi Jesus mu chakayu ad Galilea. Ilaunyuntu hiya hid-i ay kaman as nan kenakalina kan chakayu.”

<sup>8</sup> As nan hiyachi, pinmitiwcha as nan lufok ya lenmayawcha, tay nakudnorcha ya penmayagpagcha. Maid nangifiagfiag-antha as uray usa kiapú as nan nunsidla ay ugyatcha.

### *Nan Nulpail-an Jesus Kan Maria Magdalena (Mat. 28:9-10; Jn. 20:11-18)*

<sup>9</sup> [Kun pay nataku manipud as nan utúy hi Jesus as nan wi-ewi-et nan Chumingku, nunpaila hiya omona kan Maria Magdalena ay nangegefok-nakiana as pitu ay anennet. <sup>10</sup> Inmuy hi Maria Magdalena as nan kawadan nan disipulus Jesus ay cha munununungu ya cha mun-ag-akor, ya infiakiana kan chicha ay inilana hi Jesus. <sup>11</sup> Ngem as nan nanngorancha as nan infiakiana ay nataku hi Jesus manipud as nan utúy ya inilana hiya, chaancha enafurot.

### *Nan Nulpail-an Jesus As Nan Chuwa Ay Disipulus (Luc. 24:13-35)*

<sup>12</sup> As nan narpasan tona, nunpaila hi Jesus as nan chuwa ay disipulusna as nan chacha manarcharanan ay umuy henan sikib, ngem tinmukun chi kail-ana. <sup>13</sup> Nunfiangad nan chiyuya chuwa, ya epachamagcha as nan chiyuya kakadwacha ay nunpaila hi Jesus kan chicha, ngem chaancha us enafurot chicha.

### *Nan Nulpail-an Jesus As Nan Hinpuru Ya Usa (Mat. 28:16-20; Luc. 24:36-49; Jn. 20:19-23; Ara. 1:6-8)*

<sup>14</sup> Angkiay ya, nunpaila hi Jesus as nan hinpuru ya usa ay disipulus as nan chacha manganan. Senengarana chicha kiapú ta maid pammaticha ya natangken chi numnumcha, tay chaancha enafurot nan infiakian nan chiyuya nangila kan hiya as nan natakuwana manipud as nan utúy. <sup>15</sup> Kenalina kan chicha, “Uy kayu henan intiru ay luta, ya ekasabayu nan Ammay ay Chamag as nan am-in ay tataku. <sup>16</sup> Nan omafurot ya mafunyakian at maesarakantu. Ngem nan achi omafurot at machusantu. <sup>17</sup> Nauycha nan nakaskaschaaw ay sinyar ay epailantu nan chiyuya omafurot: Mafialinchantu ay epafoknag nan chiyuya anennet babaen as nan mangosarancha as nan ngachanku, ya makakalichantu as tukutukín ay kali ay epakalen nan Espiritu Santo. <sup>18</sup> Uray mu unnanchantu nan chiyuya urug, winnu umikopcha as puwison at maid mangisiw ay ommat kan chicha. As nan mangepatayanchantu as limacha as nan chiyuya munsaket at omammay-chantu.”

*Nan Naetag-uyan Jesus Ad Chaya  
(Luc. 24:50-53; Ara. 1:9-11)*

<sup>19</sup> Kun pay narpas ay naketakiatfor hi Apo Jesus kan chicha, naetag-uy hiya ad chaya, at temmokor as apét kannawan Apo Dios. <sup>20</sup> Angkiay ya naligwat nan disipulusna ya uycha nun-ekaskasaba henan am-in ay lukiar. Finad-fiadngan Apo Jesus chicha, ya enpailana ay tit-iwa nan chacha ekaskasaba babaen as nan chiyucha nakaskaschaaw ay sinyar ay enpaekamkamana kan chicha.]

## Nan Ammay ay Chamag Ay Insurat Lucas Nan Omona Ay Ammuwun

Nan nangisurat as nan nauy Ammay ay Chamag at hi Lucas ay ngenadnan Pablo as “laylaychun takú ay choktor”. Usa hiya ay Gentil (Col. 4:11-14), ya ammu takú na, tay chaan entapen Pablo hiya as nan lestaan nan chiyuchacha omaafurot ay Judio ay kakadwana ay nunserserfi. Insurat us Lucas nan “Enenat nan Apostoles” ay hiyana nan turuy nan nauy ay liblu.

Insurat Lucas nan nauy Ammay ay Chamag kan Teofilo ay usa ay nangatuy saadna (1:1). Laychun Lucas ay epakaammu ay tit-iwa nan am-in ay naisursuru kan Teofilo, tay enmamadna ay nangachar (1:3-4). Laychun Lucas us ay epakaammu ay hi Jesus nan Naepadtu ay Anak chi Taku ay enachen nan chiyuchacha kianak Israel (17:25). Kiapú as nan nangachiyancha kan hiya, naekaskasaba nan maepangkep kan Jesus as nan chiyuchacha Gentil ta maammuwancha nan maepangkep as nan muntorayan Apo Dios ya maesarakancha.

Nauycha nan tukutukún ay kaamuchan ay laychun Lucas ay epakaammu: Nan omona at maepangkep as panagfiaifiwi. Insurat Lucas ay nan pangkep Juan ay Fumufunyag as nan enmaliyana ay nun-isuru at ta munfiaifiwi nan tataku as nan fiasfiasorcha (3:3). Enpailan Lucas ay wacha nan kalibfengan Jesus asna's luta ay mamakawan as nan chiyuchacha finmasor (5:24). Intukiatukian Lucas ay nangisurat as nan maepangkep as nan mapakawanan as nan fiasfiasor (6:37; 7:47; 11:4; 12:10; 17:3-4; 23:34; 24:47).

Nan maekadwa at maepangkep as kararag. Maepaila as nan nauycha versikulu ay hi Jesus at kanayon ay nunkararag 3:21; 5:16; 6:12; 9:18, 28; 22:32, 40-41. Insurat us Lucas nan filin Jesus as nan disipulusna ay achicha machischismaya ay munkararag (18:1-8).

Nan maekatlu at maepangkep as lagsak nan am-in ay nangafurot ay hi Jesus at Anak Apo Dios ay kaman as nan nanib-atan Zakeo kan Jesus. Ongor chi lagsakna ay nangmangili kan Jesus as afongna. (19:6, 37).

Ongor chi naisurat as nan nauy ay liblu, ya as na yangkiay nan kawadana ay kaman as nan kantan nan angheles (2:13-14), nan nangil-an nan chiyuchacha munpaspastor kan cha Jesus as nan naiyankana (2:15-20), nan nataynanan Jesus as Templo as nan kaongana (2:41-52), nan fiaknang ya hi Lazaro (16:19-31), nan maepadpachongan maepangkep as nan i-Samaria (10:30-37) ya nan nalitaw ay anak (15:11-32).

### **Nan Nakudkudwaan nan Nauy Liblu:**

Nan Pangkep Nan Nauy Liblu 1:1-4

Nan Naiyankan Juan Ay Fumufunyag Ya Hi Jesus 1:5-2:52

Nan Nafunyakianan Ya Nachistangan Jesus 3:1-4:13

Nan Nun-is-isuruwan Jesus Ad Galilea 4:14-9:50

Nan Nun-is-isuruwan Jesus Ad Jerusalem 9:51-19:27

Nan Anongos Ay Chumingkon Jesus Ya Nan Natuyana 19:28-23:56

Nan Natakuwan Jesus Manipud As Nan Utý Inkiana Nan Naetag-uyana Ad Chaya 24:1-53

### *Nan Laplapon Nan Surat*

<sup>1</sup> Kan he-a machayaw ay Teofilo,

Ongorcha nan namachas ay nangisurat as nan chiyucha natongpar as nan kawad-an takú. <sup>2</sup> Nan insuratcha at kaman as nan nachamag takú as nan chiyucha nangila as nan en-enat Jesus nunlapu as nan laplapuna ya nan chiyucha nangekaskasaba as nan kalen Apo Dios. <sup>3</sup> Kiapú ta enmadku ay nangachar as nan nauycha am-in ay enom-ommat nunlapu as nan nunlapuwancha, ninumnumku us ay ammay mu ornosok ay mangisurat as nan nauycha kan he-a <sup>4</sup> ta maammuwam ay tit-iwa nan naisursuru kan he-a.

### *Nan Naepakaammuwan Nan Maiyankan Juan Ay Fumufuryag*

<sup>5</sup> As nan timpu ay hi Herodes nan ari ad Judea, wacha nan usa ay pachi ay nan ngachana at Zacarias ay naetatapi as nan bunggoy chi papachi ay epapanguruwan Abias. Nan ngachan asawana at Elisabet ay kianak Aaron.\*

<sup>6</sup> Nalintigcha ay hen-asawa as nan mangil-an Apo Dios, ya tenongparcha ay ustu nan am-in ay filin ya lintig Apo Dios. <sup>7</sup> Maid anakcha, tay fiasig hi Elisabet, ya nunkarakaycha us challu.

<sup>8</sup> Kun pay inumchan nan urki ay munserfiyan nan bunggoy ay naetatapiyan Zacarias, hiya nan cha mangekaman as nan chununa ay kenapachi.

<sup>9</sup> Maiyunud as nan inilli ay ukialen nan papachi, hi Zacarias nan nafuntan ay sungkop as nan Templo ay mamuor as nan insenso. <sup>10</sup> Kuna pay cha puoran nan insenso, chacha us munkararag nan am-in ay tataku as chará. <sup>11</sup> Angkiay ya nunpaila kan Zacarias nan usa ay anghel Apo Dios ay nangatackchug as apét kannawan nan altar ay mangipuorancha as nan insenso. <sup>12</sup> Nakudnor hi Zacarias as nan nangil-ana as nan anghel, ya inmugyat hiya as solet. <sup>13</sup> Ngem kenalen nan chiyuy anghel kan hiya, “Achika umugyat, Zacarias, tay chinngor Apo Dios nan kararagmu, at omanaktu hi asawam ay Elisabet as laraki, ya ngadnam hiya as Juan. <sup>14</sup> Ongortu nan lagsakmu, ya ongortu us nan maragsakan as nan maiyankana, <sup>15</sup> tay amudtu hiya as nan mangilan Apo Dios. Masapor achi umikop as fiayas winnu tapina ay fumutang, ya mapnuntu hiya as Espiritu Santo uray as nan naisisikukiana. <sup>16</sup> Ongortu nan munfiangchuna ay kianak Israel kan Apo ay Dioscha. <sup>17</sup> Mangon-onantu hiya mu hi Cristo, ya nan pannakafialina at kamantu as nan inchat nan Espiritu Santo kan Elias ay pomapadtu ad pusuy. Munlelennayachunantu nan am-a ya nan an-ak, ya nan nunkasokel at pafiangchunantu as nan kenasilib chi nalintig ay taku. Hiyachi nan atuna ay mangesakiana as nan tataku as nan omaliyan Cristo.”

<sup>18</sup> Angkiay kenalen Zacarias as nan anghel, “Anan mangammuwan mu tit-iwa nan kenalem, tay narakayak met ya kaman us kan asawak?”

<sup>19</sup> Tinumfor nan anghel kan hiya, “Ha-un hi Gabriel ay fiabfiaarun Apo Dios ay nangatackchug as nan sangwanana. Infiaorak kan hiya ay mangifiakia kan he-a as nan nauy ammay ay chamag. <sup>20</sup> Kiapú ta chaanmu enafurot nan kenalek, maumorkantu inkiana umchan nan urkiw ay matongparan nan infiakiak kan he-a, tay tit-iwa ay matongpar chaná as nan timpuna.”

<sup>21</sup> As nan hiyachi, sisin-ud nan tataku as chará nan pumitiwan Zacarias, ya chacha masmaschaaw mu adchi t'uy mafiyag hiya as Templo. <sup>22</sup> Kun pay pinimitiw hi Zacarias, achi at makakali kan chicha. Angkiay ya naawatancha ay wachay enpailan Apo Dios kan hiya as fieruy, tay kun nunpadpacha hiya kan chicha ya achi makakali.

<sup>23</sup> Kun pay narpas ay nunserfi as templo, kenmatam. <sup>24</sup> Kun pay chaan nafiyag, nunsikug hi Elisabet ay asawana, ya kun nuntutungaw as lema ay

\* <sup>1:5</sup> 1 Cro. 24:10 Hi Aaron at pachi us ad pus-uy.

furan. <sup>25</sup> Kenalina as achorna, “Hi Apo Dios nan nangekaman as na kan ha-un, tay sinug-anganak as nan acheck makaankan. Ad wani, maid ekafiainku as nan tataku.”

### *Nan Naepakaammuwan Nan Maiyankan Jesus*

<sup>26</sup> Kun pay as nan maekan-um ay furanun nan sikug Elisabet, infiaor Apo Dios hi anghel Gabriel ad Nazaret ay ili ad Galilea <sup>27</sup> as nan usa ay fiarasang ay nan ngachana at Maria ay chaan nakiskissuy as laraki. Hi Maria at naetfor kan Jose ay nurpu as nan kianak Ari David ad pus-uy. <sup>28</sup> Kun pay inmuy nan anghel kan Maria, kenalina, “Munlagragsakka! He-a ay nabendisyonan as solet, tay wacha hi Apo Dios kan he-a.”

<sup>29</sup> Nalilifokan as solet hi Maria as nan infiakian nan anghel, at ninumnumunnumna mu anan laychun nari nauy ay kanan. <sup>30</sup> Ngem kenalen nan anghel kan hiya, “Achika umug-ugyat Maria, tay benendisyonan chaká kan Apo Dios. <sup>31</sup> Munsikugkantu, at iyanakmu nan laraki, ya ngadnamtu hiya as Jesus. <sup>32</sup> Hiyantu nan tit-iwa ay amud ya makali un Anak nan Kangatuwan ay Apo Dios. Mun-ariyuntu Apo Dios hiya ay kaman as nan kaap-uwana ay hi Ari David, <sup>33</sup> ya hiyantu nan muntoray in-inkiana as nan chiyuycha kianak Jacob, ya maid munpattingkiaan nan muntorayana.”

<sup>34</sup> Senarudsud Maria as nan anghel, “Anuy man atun tona ay ommat, tay maid met laraki as nakiskissuy kan ha-un?”

<sup>35</sup> Tinumfor nan anghel, “Omalintu nan Espiritu Santo kan he-a, ya as nan pannakafialin Apo Dios, ommat na kan he-a. Hiyana nan kiapúna ay nan nasantowan ay onga ay maiyanak at makali un Anak Apo Dios. <sup>36</sup> Uray nan ifiam ay Elisabet ay kanancha un fiasig ya narakay at unum chi furanun nan laraki ay insisikugna, <sup>37</sup> tay maid achi mafialin kan Apo Dios.”

<sup>38</sup> Kenalen Maria, “Ha-un nan fiabfiaarun Apo Dios, ya kun ommat kan ha-un nan hana kenalem.” Angkiay ya tenaynan nan anghel hiya.

### *Nan Nangfisiaan Maria Kan Elisabet*

<sup>39</sup> Kun pay chaan nafiyag as nan nanaynanan nan anghel kan Maria, kenamkamon Maria ay tinmikid henan chunchuntug inkiana inumchan henan usa ay ili ad Judea. <sup>40</sup> Sinungkop as afong cha Zacarias, ya kenomostana hi Elisabet. <sup>41</sup> Kun pay chinngor Elisabet nan kalem Maria, nunkiwi nan onga as putuna. Napnu hi Elisabet as Espiritu Santo, <sup>42</sup> ya nunkali as napigsa, “Nabendisyonanka challu as nan am-in ay fianafiai, ya nabendisyonan onga as putom! <sup>43</sup> Anuyak paat nabendisyonan t'uyak finisita as nan enan nan Apok? <sup>44</sup> As nan nanngorak as nan kalem, nunkiwi nan nauy onga as putok as lagsakna. <sup>45</sup> Nabendisyonanka, tay enafurotmu ay matongpar nan infiakian Apo Dios kan he-a.”

### *Nan Nangichayawan Maria Kan Apo Dios*

<sup>46</sup> Angkiay kenalen Maria,  
“As nan am-in ay numnumku, ichaychayawku nan Apo.  
<sup>47</sup> Munlagragsakak as solet kiapú kan Apo Dios ay Mangesarakan kan ha-un,  
<sup>48</sup> tay ninunumnumak ay kun lawá ap-apud ay mafiabfiaor! Munlapu ad  
wani, kanantu nan am-in ay tatáku un nabendisyonanak,  
<sup>49</sup> tay hi Apo Dios ay Mannakafialin ya nasantowan at enatna nan  
nakaskaschaaw kan ha-un.  
<sup>50</sup> Masug-ang hiya as nan am-in ay mangichaychayaw kan hiya manipud as  
nan kaap-uwuan takú inkiana as nan chiyuycha cha somarsarunu ay  
kianakcha.

- <sup>51</sup> Enpailana nan pannakafialina as nan nangwarawaraana as nan tataku ay nunkapangas.
- <sup>52</sup> Kenaana nan chiyuycha mannakafialin ay ar-ari as nan tronocha, ya empangatuna nan ap-apud ay tataku.
- <sup>53</sup> Sinufuna nan chiyuycha cha munchukiaang as ammay, ya enpak-akna nan chiyuycha nafiaknang ay maid in-inchatna kan chicha.
- <sup>54</sup> Ninunumnumna nan enkarina as nan kaap-uwan takú, isunga finad-ngana nan chiyuycha kianak Israel† ay fiabfiaaruna.
- <sup>55</sup> Kaman as nan enkarina kan Abraham ad pus-uy ya as nan chiyuycha kianakna ay sug-angana chicha in-inkiana.”
- <sup>56</sup> Kiayud umuy as turu ay furan nan nafofoonan Maria as afong cha Elisabet, angkiay ya kenmatam.

### *Nan Naiyankan Juan Ay Fumufunyag*

<sup>57</sup> Kun pay inumchan nan urkiw ay omangkan Elisabet, inyanakna nan laraki. <sup>58</sup> Chinngor nan sasag-una ya iib-ana nan sug-ang Apo Dios kan hiya, at nakelagraggsakcha.

<sup>59</sup> As nan maekawaru ay urkiw nan onga, enmalicha ay manugyat, ya mangepangachan koma kan hiya as Zacarias ay ngachan amana. <sup>60</sup> Ngem kenalen enana, “Fiakun sa. Nan ngachana at Juan.”

<sup>61</sup> Kenalicha kan hiya, “Maid met ib-am as nakin ngachan as assesa.” <sup>62</sup> Angkiay ya penachacha kan amana ay Zacarias mu ngachana nan laychuna ay epangachan as nan onga. <sup>63</sup> Nunpaara hi Zacarias as tabra as munsuratana, at insuratna na: “Nan ngachana at Juan.” Kuncha pay inila chi, naschaawcha am-in. <sup>64</sup> Kalina at ya makakali hi Zacarias ya nunchaychayaw kan Apo Dios.

<sup>65</sup> Am-in nan sasag-uncha at naschaawcha as nan enommat, ya nan nauy ay chamag at naiwaras as nan umiili henan am-in ay chuntug ad Judea. <sup>66</sup> Nan am-in ay nanngor as na at ninumnunumnumcha ya waschi un senarudsudna, “Anan munfialinan ngun tona ay onga?” Kenalicha chi, tay inilacha ay wacha nan pannakafialin Apo Dios as nan onga.

### *Nan Enpadton Zacarias*

<sup>67</sup> Napnu as Espiritu Santo hi Zacarias ay aman nan onga, ya enpadtuna na:

<sup>68</sup> “Machaychayaw hi Apo Dios ay Apon nan chiyuycha kianak Israel, tay enmali ay nangfiachang as nan tatakuna, ya nangwayawaya kan chicha.

<sup>69</sup> Infiaorna kan chitaku nan mannakafialin ay Omesarakan ay nurpu as nan kianak Ari David ay fiabfiaaruna.

<sup>70</sup> Hiyana challu nan enpaepadtuna as nan chiyuycha nasantowan ay pomapadtuna ad pus-uy ay nangali

<sup>71</sup> un esarakana chitaku as nan chiyuycha kafusor takú ya as nan am-in ay mangiingor kan chitaku.

<sup>72</sup> Enkarina ay sug-angana nan kaap-uwan takú, ya achina liwliw-an nan nasantowan ay inturagna kan chicha.

<sup>73</sup> O, enkarina kan Abraham ay kaap-uwan takú

<sup>74</sup> ay esarakana chitaku as nan chiyuycha kafusor takú, ya parufusana chitaku ay tumurud ay munserfi kan hiya

---

† <sup>1:54</sup> Gen. 32:25-28; 49:7, 16

75 ta nasantowan ya nalintig takú as nan mangilan Apo Dios as nan am-in ay urkiw ay panagfiyag takú.

76 “He-a ay anakku, he-a nan makali un pomapadton nan Kangatuwan ay Dios, tay omon-onaka mu nan Apo ta cham esakiana nan ayuna.”<sup>‡</sup>

77 Uymu cha epakaammu as nan tataku ay maesarakancha as nan mapakawanancha as nan fiasfiasorcha.

78 Kiapú as nan sug-ang Apo Dios kan chitaku, ifiaornantu nan murpu ad chaya ay mangesarakan kan chitaku ay maepachong as nan cha fomoknakian nan urkiw.

79 Tay as nan omaliyana ay murpu ad chaya, silawana nan tataku ay maepachong as nan matataku as nan ngongot ya umuycha as nan utúy ay maid patingkiana. Epangunantu chitaku as nan charan ay muntoróng as natalna ay numnum.”<sup>§</sup>

Hiyana nan kenalen Zacarias.

80 Inmurúg nan onga, ya finmikas nan achorna, ya pinmigsa nan pampatina. Nayaschi henan disyerto inkiana inumchan nan urkiw ay nunpailana ay mun-isuru as nan tataku ay kianak Israel.

## 2

### *Nan Naiyankan Jesus (Mat. 1:18-25)*

1 As nan hiyachi ay timpu, infilin Emperador Augustu ad Roma ay munpalesta nan am-in ay tataku henan am-in ay il-ili ay muntotorayana.

2 Hiyana nan omona ay naeleestaan chi tataku at enommat as nan timpon Gobernador Kirenio ad Siria. 3 Waschi un uy nunpalesta henan mismu ay ilina.

4 Kun pay hi Jose ay nurpu ad Nazaret ay usa ay ili ad Galilea, enmabrat ad Betlehem ay ili ad Judea, tay hid-i nan naiyankan Ari David ay kaap-uwana ad pus-uy. 5 Nuntun-udcha kan Maria ay naetfor ay asaw-una ta uycha us munpalesta. As nan hiyachi ay timpu, masisikug hi Maria. 6 Kuncha pay wacha ad Betlehem, inumchan at nan timpu ay omangkan Maria, 7 at inyanakna nan laraki ay panguru ay anakna. Penotepotana as lopot ya empab-ugna as nan mangmanganan chi animar. Hid-i ad Bethlehem nan inmiyanancha, tay maid magyanancha as nan chumawchawsan.

### *Nan Nunpail-an Nan Anghel As Nan Chiyuycha Mumpaspastor*

8 As nan hiyachi ay lafi, wachacha nan munpaspastor ay inmiiyan henan pastu ay naesasag-un henan hiyachi challu ay lukiar ay mamanfiantay as nan karnerochea. 9 Kalina at ya nunpaila nan usa ay anghel Apo Dios kan chicha, ya nasilawancha as nan sumili ay kaichayawan Apo Ðios, ya inmugyatcha as solet. 10 Ngem kenalen nan anghel kan chicha, “Achi kayu umugyat, tay iyalek nan ammay ay chamag kan chakayu ay mangepalagsak as nan am-in ay tataku. 11 Ad wani ay urkiw, henan ilen Ari David, naiyanak nan Omesarakan ay hi Cristo ay hiya nan Apo. 12 Hiyana nan sinyar ay mangammuwanyu ay tit-iwa sa: Ilaunyuntu nan mutun ay napopotepotan as lopot ay naepapab-ug as nan mangmanganan chi animar.”

<sup>‡</sup> 1:76 Mal. 3:1; Mat. 11:10; Mar. 1:2; 7:27    <sup>§</sup> 1:79 Isa. 9:2; 59:8; Mat. 4:16

**13** Kalina at ya nunpaila nan ongoongor ay anghelles ay nurpu ad chaya ay kakanadwan nan nauy anghel, ya chacha munchaychayaw kan Apo Dios ay chacha kankanan,

**14** "Machaychayaw hi Apo Dios ad chaya, ya wachay kappia asna's luta as nan tataku ay mangepalaylayad kan hiya!"

**15** Kuncha pay nunfiangad nan anghelles ad chaya, natatakiatfor nan chiyuycha munpaspastor, "Uy takú ad Betlehem, ya uy takú ilaun nan nauy ay enommat ay empakaammon Apo Dios kan chitaku." **16** Angkiay ya kenakamucha ay inmuy, ya ininchanancha cha Maria kan Jose ya nan mutun ay naepapab-ug as nan mangmanganan chi animar. **17** As nan nangil-ancha as nan mutun, infiakiacha kan chicha nan kenalen nan anghel maepangkep as nan nauy mutun. **18** Naschaawcha nan am-in ay nanngor as nan infiakiakan nan chiyuycha munpaspastor kan chicha. **19** Ngem kun ninunumnum am-in Maria chaná ya chana numnumnumun ay ustu. **20** Nan chiyuycha munpaspastor at nunfiangadcha ay cha munkankanta ya munchaychayaw kan Apo Dios kiapú as nan am-in ay chinngorcha ya inilacha ay infiakiakan nan anghel kan chicha.

### *Nangadnan Hi Jesus*

**21** As nan maekawaru ay urkiw nan mutun, sinugyatancha ya ngenadnancha as Jesus, tay hiyachi nan ngachan ay infiakiakan nan anghel kan chicha as nan chaana nurmuwan.

### *Nan Nangiyawatancha Kan Jesus As Templo*

**22** Kun pay enmali nan timpu ay mangekamanan cha Jose kan Maria as nan Lintig Moises ay pannakacharos, entakincha nan mutun ad Jerusalem ay uy mangiyawat kan hiya kan Apo Dios **23** ay kaman as nan naisurat as nan Lintig Apo Dios ay kanana, "Am-in ay laraki ay panguru ay anak at kuwan Apo Dios chicha."\* **24** Uycha us inchaton kan Apo Dios nan infiakiakan nan Lintig ay chuwa ay fiarug winnu chuwa ay kinapad ay karopati.†

**25** Ad Jerusalem, wacha nan usa ay am-ama ay nan ngachana at Simeon ay maman-ud as nan kaesarakanan nan chiyuycha kianak Israel. Hi tono ay taku at nalintig ya tit-iwa ay manangchaychayaw kan Apo Dios, ya wacha nan Espiritu Santo kan hiya. **26** Empakaammon nan Espiritu Santo kan hiya ay achi matuy hiya inkiana ilauna hi Cristo ay encaren nan Apo. **27** Kun pay entoróng nan Espiritu Santo hi Simeon as Templo, hiyachi us nan nangiskopan Jose ya hi asawana kan Jesus ta uycha atun nan naisurat as nan Lintig. **28** Senakrui Simeon nan mutun ya chinaychayawna hi Apo Dios. Kenalina,

**29** "Apo Dios, ad wani ay tenongparmu nanenkarem, eparufusmu koma ay matuyak ay fiabfiaarum ay wachay talna as numnumku,

**30** tay inilak at ay mismu nan infiormu ay Omesarakan

**31** ay ensasakianam as nan mangilan nan am-in ay tataku.

**32** Hiya at maepachong as nan silaw ay manilaw as numnum nan chiyuycha Gentil, ya kiapú kan hiya, maichayaw nan tatakom ay kianak Israel."

\* **2:23** Exo. 13:2, 12, 15      † **2:24** Nan maepangkep as nan Lintig Apo Dios ay infiakiakan Moises at hiyaná: Mu omanak nan fiafiai as laraki, maifilang hiya as naruket as opat puru ay urkiw. Kun pay marpas sa, masapor iyuyna as Templo nan usa ay kordero winnu kossal ay maichat as nan pachi ta puoran nan pachi ay maichaton kan Apo Dios. As nan hiyachi ay atuna, nan fiafiai at maifilang kasin as nacharos. Lev. 12:8

<sup>33</sup> Naschaaw nan chanakchakor Jesus as nan kenalen Simeon maepangkep kan Jesus. <sup>34</sup> Angkiay ya benendisyonan Simeon chicha, ya kanana kan Maria ay enan Jesus, “Nan nauy ay anakmu at pinilen Apo Dios ay manachael ya mangesarakan as nan ongor ay kianak Israel. Hiya nan sinyar ay nurpu kan Apo Dios ay achi laychun nan ongor ay tataku. <sup>35</sup> Kiapú kan hiya, maammuwanan tit-iwa ay wacha as numnumcha. Kun pay he-a ay enana, ngumunguyuska as solet ay kaman chaká chinuyok as tachum ay espada.”

<sup>36</sup> Wacha us hid-i nan usa ay en-enagkiaw ay pomapadtu ay nan ngachana at Ana ay potot Fanuel ay kianak Aser. Pitu yangkiay ay tawwun nan enmaasaw-ana, <sup>37</sup> ellakas hiya inkiana waron puru ya opat nan tawwuna. Inurkiw ya lenafi ay wacha hiya as Templo ay cha munchayachayaw kan Apo Dios, cha mun-ayyuayunar ya cha munkarakararag. <sup>38</sup> As nan hiyachi ay uras, naesnop ay mangila kan Jesus. Nunnyaman kan Apo Dios, ya infiakiana nan maepangkep as nan mutun as nan am-in ay maman-ud as nan mangwayawayaan Apo Dios as nan tataku ad Jerusalem.

<sup>39</sup> Kun pay narpas ay enat cha Jose kan Maria nan am-in ay filin as nan Lintig Apo Dios, nunfiangadcha ad Galilea henan mismu ay ilicha ay Nazaret. <sup>40</sup> Inmurúg ya finmikas nan onga. Napnu us as silib, ya wacha kan hiya nan bendisyon Apo Dios.

### *Nan Nunfiatiyan Jesus As Templo*

<sup>41</sup> Tenawwun ay in-inmuy nan chanakchakor Jesus ad Jerusalem as nan Fiastan chi Munlausán. <sup>42</sup> Kun pay hinpuru ya chuwa nan tawwun Jesus, uycha nakiesta ay maiyunud as nan iniili ay ukialicha. <sup>43</sup> As nan narpasan nan fiasta, inligwatcha ay munfiangad as ilicha. Ngem nunfiati hi Jesus ad Jerusalem ay achi ammon nan chanakchakorna. <sup>44</sup> Ka-anancha mu nakitutun-ud hiya as nan kakadwacha ay munfiangad as ilicha. Isunga nanad-arancha as usa ay urkiw, at enlapucha ay manganap kan hiya as nan iib-acha ya as nan am-ammucha. <sup>45</sup> Kuncha pay achi maanapan hiya, nunfiangadcha ad Jerusalem ay uy manganap kan hiya. <sup>46</sup> Kun pay inmuy chi turu ay urkiw, ininchanancha hi Jesus as nan Templo ay naketotokor ay chuchumngor as nan mun-isursuru as Lintig ya cha munsarsarudsud kan chicha. <sup>47</sup> Am-in ay nanngor kan hiya at naschaawcha as nan pan-nakaawatna ya chiyuycha songfiatna. <sup>48</sup> Kun pay inilan nan chanakchakorna hiya, naschaawcha, ya kanan enana kan hiya, “Anakku, adchi t'uyumu enat na kan chakami? Nachanakian kami as solet kan amam ay uy nangananap kan he-a.”

<sup>49</sup> Tinumfor hi Jesus, “Adchi t'uyak kis-an anapun? Ay achiyu ammu ay mas-apor wachaak as afong Amak?” <sup>50</sup> Ngem chaan naawatan nan chanakchakorna nan laychuna ay kanan kan chicha. <sup>51</sup> Angkiay ya nakitun-ud hi Jesus kan chicha ay nunfiangad as ilicha ay Nazaret, at tenontongparna cha amana kan enana. Kun ninunumnum am-in enana chaná ay enom-ommata. <sup>52</sup> Inmurúg ya similib hi Jesus, at nalaylaychan hi Apo Dios ya nan tataku kan hiya.

<sup>1</sup> As nan maekapuru ya lema ay tawwun ay nuntorayan Emperador Tiberio, hi Poncio Pilato nan gobernador ad Judea, hi Herodes nan nuntoray ad Galilea, hi Felipe ay sunúdma nan nuntoray ad Iturea ya Traconite, ya hi Lisanias nan nuntoray ad Abilene.\* <sup>2</sup> Nan kangatuwan ay papachen chi Judio at cha Anas kan Caifas.

As nan hana ay timpu, wacha nan kenalen Apo Dios kan Juan ay potot Zacarias as nan kawad-ana henan disyerto. <sup>3</sup> Uy nun-ekaskasaba hi Juan henan am-in ay lukiar ay nangliliwu henan wawwang ay Jordan. Kelnarkalina, “Munfiafiawi kayu ya munpafunyag kayu, at pakawanun Apo Dios chakayu as nan fiasfiasoryu.” <sup>4</sup> Nan nauy ay en-enat Juan at hiyana nan natongparan nan enpasurat Apo Dios kan Isaías ay pomapadtu ay kanana: “Wacha nan taku henan disyerto ay cha mangifugfukiaw un, ‘Esakianayu nan ayun nan Apo. Munlutkunyu nan ayuna.’”

<sup>5</sup> Masapor maafiah nan chiyuycha nakaongan. Mapanad nan chiyuycha filig. Munfialin as lutug nan chiyuycha charan ay nunkatiku. Machuschusan nan chiyuycha tinmutunu.

<sup>6</sup> Ilauntu nan am-in ay tataku nan atun Apo Dios ay omesarakan.”†

<sup>7</sup> Kenalen Juan as nan ongoongor ay tataku ay uy munpafunyag kan hiya, “Hoy! Chakayu ay kaman an-ak chi kubra! Anan nangali kan chakayu un malisiyanyu nan omali ay ichusan Apo Dios mu mafunyakian kayu? <sup>8</sup> Masapor atunyu nan mangepaila ay tit-iwa ay nunfiafiawi kayu as nan fiasfiasoryu. Achiyu kankanan as achoryu un, ‘Achi chakami challu chusaun kan Apo Dios, tay hi Abraham nan kaap-uwanmi.’ Tay ifiakiak kan chakayu ay uray nan nauycha fiatu at mafialin ay munfialinun Apo Dios as kiankianak Abraham! <sup>9</sup> Nan ichusan Apo Dios at kaman as nan wasay ay naesasakiana ay manipor as kaiw. Am-in ay kaiw ay achi fumkias as ammay at maesalepooncha ay masipor, ya maichus-orcha as nan apuy.”

<sup>10</sup> Senarudsud nan ongor ay tataku kan hiya, “Ngachana nan atunmi ngarud?”

<sup>11</sup> Tinumfor hi Juan kan chicha, “Nan taku ay wachay fiachuna as chuwa at masapor ichatna nan usa as nan maid fiachuna, ya nan wachay kanuna at umichat as nan maid kanuna.”

<sup>12</sup> Wachacha us nan mangam-among as fiaror ay inmuy ay munpafunyag, ya kanancha kan Juan, “Misturu, ngachana nan atunmi?”

<sup>13</sup> “Achi kayu munsengsengel as subra mu nan naifilin kan chakayu,” ensongfiatna.

<sup>14</sup> Wachacha us nan sosorchachu ay nanarudsud kan hiya, “Chakami ngay, ngachana nan atunmi?”

Tinumfor hi Juan kan chicha, “Achiyu epeleplet ay mangara as siping chi uray ngachana ay taku winnu achi kayu munkutkutum ay mangepfiasor as nan uray ngachana ay taku. Mapnek kayu as nan silchuyu.”

<sup>15</sup> Kiapú as nan infiakian Juan, pinmigsa nan namnaman nan tataku, ya chacha numnumun nan maepangkep kan Juan ay uy at hiya nan Cristo.

<sup>16</sup> Kenalen Juan kan chicha am-in, “Funyakiak chakayu as chanum, ngem wacha nan cha umunud kan ha-un ay am-amud mu ha-un. Achiyak paat maekari ay mangfokat as kiarot chi sapatosna. Funyakianantu chakayu as Espiritu Santo ya apuy. <sup>17</sup> Maepadpachong hiya as nan taku ay nanangchun as ligkia ay osaruna ay manapa as nan finayu. Nan natap-an at ittunantu

\* <sup>3:1</sup> Mat. 14:1; Ara. 13:1    † <sup>3:6</sup> Isa. 40:3-5

as nan mangit-ittuwan. Ngem nan chuki at ipuornantu as nan apuy ay achi mapappaauy."

<sup>18</sup> Ongor pay nan tapina ay enosarna as nan chana mangekasabaan as nan Ammay ay Chamag as nan tataku. <sup>19</sup> Ngem senengaran Juan hi Gobernador Herodes, tay penlosna hi Herodias ay asawan nan sunúdna, ya kiapú as nan am-in ay tapina pay ay manangotettet ay en-enatna. <sup>20</sup> Nan usa pay ay mangotettet ay enatna at nan nangepfafiaruchana kan Juan.<sup>‡</sup>

*Nan Nunpafunyakian Jesus  
(Mat. 3:13-17; Mar. 1:9-11)*

<sup>21</sup> As nan chaan pay naifiaruchan Juan as nan chana mamunfunyakian as nan ongor ay tataku, uy nunpafunyag us hi Jesus. As nan cha munkarkarakian Jesus kan Apo Dios, natkafian ad chaya. <sup>22</sup> Angkiay ya kenomsop kan hiya nan Espiritu Santo ay kaman as nan ilan chi karopati, ya wacha nan kali ay nurpu ad chaya ay kanana, "He-a nan anakku ay laylaychok. Malaylaychanak paat kan he-a."

*Nan Kaap-uwan Jesus  
(Mat. 1:1-17)*

<sup>23</sup> Kiayud turon puru ay tawwun Jesus as nan nangelapuwana ay nunsuru as nan tataku. Infilang nan tataku hiya as potot Jose. Hi Jose at potot Eli. <sup>24</sup> Hi Eli at potot Matat. Hi Matat at potot Levi. Hi Levi at potot Melki. Hi Melki at potot Jane. Hi Jane at potot Jose; <sup>25</sup> Hi Jose at potot Matatias. Hi Matatias at potot Amos. Hi Amos at potot Nahum. Hi Nahum at potot Esli. Hi Esli at potot Nage. <sup>26</sup> Hi Nage at potot Maat. Hi Maat at potot Matatias. Hi Matatias at potot Semei. Hi Semei at potot Jose. Hi Jose at potot Juda. <sup>27</sup> Hi Juda at potot Joana. Hi Joana at potot Resa. Hi Resa at potot Zorobabel. Hi Zorobabel at potot Salatiel. Hi Salatiel at potot Neri. <sup>§</sup> <sup>28</sup> Hi Neri at potot Melki. Hi Melki at potot Adi. Hi Adi at potot Cosam. Hi Cosam at potot Elmodam. Hi Elmodam at potot Er. <sup>29</sup> Hi Er at potot Josue. Hi Josue at potot Eliezer. Hi Eliezer at potot Jorim. Hi Jorim at potot Matat. Hi Matat at potot Levi. <sup>30</sup> Hi Levi at potot Simeon. Hi Simeon at potot Juda. Hi Juda at potot Jose. Hi Jose at potot Jonan. Hi Jonan at potot Eliakim. <sup>31</sup> Hi Eliakim at potot Melea. Hi Melea at potot Mena. Hi Mena at potot Matata. Hi Matata at potot Natan. Hi Natan at potot David. <sup>32</sup> Hi David at potot Jesse. Hi Jesse at potot Obed. Hi Obed at potot Booz. Hi Booz at potot Salmon. Hi Salmon at potot Naason. \* <sup>33</sup> Hi Naason at potot Aminadab. Hi Aminadab at potot Aram. Hi Aram at potot Arni. Hi Arni at potot Esron. Hi Esron at potot Fares. Hi Fares at potot Juda. <sup>†</sup> <sup>34</sup> Hi Juda at potot Jacob. Hi Jacob at potot Isaac. Hi Isaac at potot Abraham. Hi Abraham at potot Tare. Hi Tare at potot Nacor. <sup>‡</sup> <sup>35</sup> Hi Nacor at potot Serug. Hi Serug at potot Ragau. Hi Ragau at potot Peleg. Hi Peleg at potot Heber. Hi Heber at potot Selah. <sup>§</sup> <sup>36</sup> Hi Selah at potot Cainan. Hi Cainan at potot Arfaxad. Hi Arfaxad at potot Sem. Hi Sem at potot Noe. Hi Noe at potot Lamec. \* <sup>37</sup> Hi Lamec at potot Matusalem. Hi Matusalem at potot Enoc. Hi Enoc at potot Jared. Hi Jared at potot Mahalaleel. Hi Mahalaleel at potot Cainan. <sup>†</sup> <sup>38</sup> Hi Cainan at potot Enos. Hi Enos at potot Set. Hi Set at potot Adan, ya hi Adan at anak Apo Dios.<sup>‡</sup>

---

<sup>‡</sup> <sup>3:20</sup> Mar. 6:16-29      <sup>§</sup> <sup>3:27</sup> 1 Cro. 3:17-19; Ezra 3:2; Hag. 1:1      \* <sup>3:32</sup> Ruth 2:4      <sup>†</sup> <sup>3:33</sup> Gen. 38:29; 46:12; Num. 26:20      <sup>‡</sup> <sup>3:34</sup> Gen. 11:24-32      <sup>§</sup> <sup>3:35</sup> Gen. 10:25; 11:16-19      \* <sup>3:36</sup> Gen. 4:18-24      <sup>†</sup> <sup>3:37</sup> Gen. 5:18-22      <sup>‡</sup> <sup>3:38</sup> Gen. 2; 5:1-5

**4**

*Nan Nanistingan Satanas Kan Jesus*  
*(Mat. 4:1-11; Mar. 1:12-13)*

<sup>1</sup> Hi Jesus ay napnu as pannakafialin nan Espiritu Santo at nak-ak henan wawwang ay Jordan. Enpangon nan Espiritu Santo hiya henan disyerto. <sup>2</sup> Hid-i nan nanistingan Satanas kan hiya as opat puru ay urkiw. As nan chiyucha ay urkiw, chaan nangnangan hi Jesus. Kun pay narpas chachi, nunchukiaang hiya. <sup>3</sup> Kenalen Satanas kan hiya, “Mu tit-iwa ay anak chaká kan Apo Dios, filinum nan nauy fiatu ta munfialin as tenapay.”

<sup>4</sup> Tinumfor hi Jesus kan hiya, “*Nan naisurat as nan Kalen Apo Dios at kanana un, ‘Fiakun yangkiay makan nan pagfiyag nan taku.’*”\*

<sup>5</sup> Angkiay ya enpangon Satanas hi Jesus as nan nangatu ay lukiar, ya as nan apag-ila yangkiay, enpailana kan Jesus nan am-in ay muntorayan asna's luta.

<sup>6</sup> Kenalen Satanas, “Ichatkuntu kan he-a nan nauycha am-in ay kalibfengan ay mangetoray hena ya am-in nan nauycha kenafiaknangcha, tay naichat at chaná kan ha-un, at ichatkuntu as nan laychok ay mangichatan. <sup>7</sup> Isunga mu chayawunak kan he-a, kuwam am-in chaná.”

<sup>8</sup> Tinumfor hi Jesus kan hiya, “*Nan naisurat as nan Kalen Apo Dios at kanana un, ‘Chayawum nan Apo ay Diosmu, ya kan hiya yangkiay nan munseryiam.’*”†

<sup>9</sup> Angkiay ya enpangon Satanas hiya ad Jerusalem, ya enpatakchugna hiya as nan kangtuwan ay parten nan Templo. Kenalina kan hiya, “Mu tit-iwa ay Anak chaká kan Apo Dios, ud-a pay omagkiangka munlapu hena inkiana as kuwabna, <sup>10</sup> tay nan naisurat met as nan Kalen Apo Dios at kanana un, ‘Filinun Apo Dios nan anhelesna ay mangaywan kan he-a. <sup>11</sup> Tatag-uyun chakantu kan chicha as nan limacha ta achi maepakpak nan sukem as nan fiatu.’”

<sup>12</sup> Tinumfor hi Jesus kan hiya, “*Wacha met us nan naisurat as nan Kalen Apo Dios ay kanana un, ‘Achim chischistingun nan Apo ay Diosmu.’*”‡

<sup>13</sup> Kun pay enat Satanas nan am-in ay kafaelana ay nanisting kan Jesus, tenaynan Satanas hiya inkiana kasin mawad-an as chansana.

*Nan Nangalpuwan Jesus Ay Nun-isuru Ad Galilea*  
*(Mat. 4:12-17; Mar. 1:14-15)*

<sup>14</sup> Nunfiangad hi Jesus ad Galilea ay wacha kan hiya nan pannakafialin nan Espiritu Santo, at nunchinamag nan maepangkep kan hiya henan am-in ay lukiar ad Galilea. <sup>15</sup> Nun-is-isuru hiya as nan chiyucha senagogacha, ya chinaychayaw nan am-in ay tataku hiya.

*Nan Nangachiyancha Kan Jesus Ad Nazaret*  
*(Mat. 13:53-58; Mar. 6:1-6)*

<sup>16</sup> Angkiay ya inmuy hi Jesus ad Nazaret ay nasiknana. Kun pay inumchan nan Urkiw ay Mun-iblayan, inmuy hiya as nan senagoga, tay hiyasa challu nan chana atuutan. Tenmakchug ay mamasa as nan Kalen Apo Dios. <sup>17</sup> Naichat kan hiya nan nalolopelop ay insurat Isaias ay pomapadtu. Finitlagna ya ininchanagan nan naisurat ay kanana,

<sup>18</sup> “*Wacha nan Espiriton Apo Dios kan ha-un, tay piniliyak ay mangekasaba as nan Ammay ay Chamag as nan pugli. Infiaorak ay uy mangifiaag as*

\* **4:4** Deut. 8:3   † **4:8** Deut. 6:13; 10:20   ‡ **4:12** Deut. 6:16

*nan pannakailufus nan chiyuycha fiarud, makail-an nan nunkafurag, ya pannakawayawayan nan munliglikiat.*

**19** *Infiaorak us ay mangepakaammu as nan timpu ay mangesarakanan Apo Dios as nan tataku.*§

**20** Lenopelopna kasin nan nangfiasaana ya infiangadna as nan fumadfi-achang, at tenmokor hiya. Am-in nan tataku ay wacha as nan senagoga at entotoongancha hiya. **21** Kenalina kan chicha, “*Nan nauy naisurat as nan Kalen Apo Dios ay chingoryu ay naifasa at natongpar ad wani.*”

**22** Ammay nan kaap-apatana as nan am-in ay tataku, ya naschaawcha as nan kenaammay nan kenalina. Kenalicha, “Ay fiakun hi tona nan potot Jose?”

**23** Kenalina kan chicha, “*Ammok ay ifiakiayuntu kan ha-un nan nauy ay karkali: ‘Choktor, akiasam nan achormu.’ Kananyuntu us un, ‘Atum as nan mismu ay ilem nan chinngormi ay en-enatmu ad Capernaum.’*”

**24** Kenalen pay Jesus, “*Ifiakiak kan chakayu nan tit-iwa ay maid challu pomapadtu ay maichayaw henan mismu ay ilina.* **25** *Ifiakiak kan chakayu ay tit-iwa ay ongor chi ellakas ad Israel as nan timpon Elias. As nan hiyasa ay timpu, chaan inmud-uchan as turu ya kakudwa ay tawwun, ya nunsidlay fitel henan intiru ay luta.* **26** *Hi Elias at chaan naifao ay fumachang as nan uray usa kan chicha ad Israel, ngem kun yangkiay as nan usa ay ellakas ad Serepta ay sakop nan Sidon.*\* **27** *Ongor us chi nakonet ad Israel as nan timpon nan pomapadtu ay hi Eliseo, ya maid enpaammayna kan chicha, ngem kun yangkiay hi Naaman ay i-Siria.*†

**28** Kun pay chinngor nan am-in ay tataku ay wacha as nan senagoga nan kenalen Jesus, finzungatcha as solet. **29** Natannakchugcha ya peneletcha hiya ay mangek-ak henan ili. Iniyucha hiya henan teng-el nan chuntug ay nasasad-an nan ilicha ta uycha koma tokchakun. **30** Ngem kun at kinmawa kan chicha ya nak-ak.

### *Nan Nangepak-akan Jesus As Nan Anennet (Mar. 1:21-28)*

**31** Angkiay ya inmuy hi Jesus ad Capernaum ay ili ad Galilea, ya enlapuna ay nun-isuru as nan tataku as nan Urkiw ay Mun-iblayan. **32** Naschaawcha am-in as nan enatna ay nun-isuru, tay wachay kalibfengan as nan kalina.

**33** As nan senagoga, wacha nan usa ay laraki ay naanennetan. Infukiawna,  
**34** “Ha! Anan atum kan chakami, Jesus ay i-Nazaret? Ay enmalika ay manachael kan chakami? Am-ammok he-a. He-a nan nasantowan ay infiaor Apo Dios!”

**35** Ngem senengaran Jesus nan anennet. Kenalina, “*Kuminakka! Fomok-nagka kan tosa ay laraki!*” Entap-or nan anennet nan laraki as nan sangwanan nan tataku, at femoknag hiya ay maid enkamkamana as putug as nan laraki.

**36** Naschaaw as solet nan am-in ay tataku, ya chacha matatakiat-for, “Ngachan ton a man ay kali? Wachay kalibfengana ya pannakafialina ay mamilin as nan chiyuycha anennet, at fomoknagcha tit-iwa.”

**37** Nunchinamag nan maepangkep kan Jesus henan am-in ay sasakopun nan hana ay lukiar.

*Nan Nangepaammayan Jesus As Nan Ongor Ay Munsaket  
(Mat. 8:14-17; Mar. 1:29-34)*

<sup>38</sup> Angkiay ya nak-ak hi Jesus as nan senagoga, ya inmuy as afong cha Simon. Nan katukiangan Simon ay fiafiai at pararuy puchotna. Naketaki-atforcha kan Jesus ta fiadngana hiya. <sup>39</sup> Uy tenmakchug hi Jesus as nan sag-un nan fiafiai, ya kuna pay finilin nan puchotna ay makaan, at nakaan. Nafianangun nan fiafiai ya nunsakiana as kanuncha.

<sup>40</sup> Kun pay cha maschum, inyalen nan tataku kan Jesus nan am-in ay kiaki-ayyumcha ay munsaket as tukutukún ay saket. Enpatay Jesus nan limana as nan tunggal usa kan chicha, at enpaammayna chicha am-in. <sup>41</sup> Fenmoknag us nan chiyuycha anennet as nan ongor ay tataku ay nunkaanennetan. As nan chacha fomoknakian, chacha ifugfukiaw, “He-a nan Anak Apo Dios!” Ngem senengaran Jesus chicha ya achina parufusan chicha ay munkali, tay ammucha ay hiya nan Cristo.

*Nan Nun-ekasabaan Jesus As Nan Chiyuycha Senagoga  
(Mar. 1:35-39)*

<sup>42</sup> Kun pay cha mafikiat, nak-ak hi Jesus henan hana ay ili ya inmuy henan kamaid chi umili. Cha an-anapun nan tataku hiya, ya kuncha pay naanapan, enpakuudcha hiya ta achi mak-ak. <sup>43</sup> Ngem kenalina kan chicha, “Masapor ekasabak nan Ammay ay Chamag maepangkep as nan muntorayan Apo Dios as nan tapina ay il-ili, tay hiyana nan nangifiaoranak kan Apo Dios.” <sup>44</sup> Uy ngarud nun-ekaskasaba as nan chiyuycha senagoga henan intiru ay probinsiya ay Judea.

## 5

*Nan Nangayakian Jesus As Nan Enmon-oná Ay Disipulusna  
(Mat. 4:18-22; Mar. 1:16-20)*

<sup>1</sup> As nan hin-urkiw as nan nangatakchukian Jesus henan olet nan Fiayfiay ay Genesaret, nunsosonnor nan tataku ay maesnop kan hiya ay manngor as nan isuruna ay kalen Apo Dios. <sup>2</sup> Inilana nan chuwa ay fiangka as nan oletna ay tenaynan nan chiyuycha nakin kuwa ay cha manguras as nan tafukorcha. <sup>3</sup> Nunlukian hi Jesus as nan fiangkan Simon, ya chinawatna kan Simon ay iyad-achawwina as akét nan fiangka henan olet nan fiayfiay. Angkiay ya temmokor hi Jesus ya nun-isuru as nan tataku ay wacha henan oletna.

<sup>4</sup> Kun pay narpas ay nun-isuru as nan tataku, kenalina kan Simon, “Iyuymu nan nauy fiangka as nan posong, ya uy-uyunu na hanacha tafukoryu ta wachay tafukoranyu.”

<sup>5</sup> Tinumfor hi Simon, “Apo, enlabrafimi ay nanafutafukor ya maid poros enarami. Ngem mu hiyasay kanam, uy-uyok nan nauyucha tafukor.”

<sup>6</sup> Kuncha pay tit-iwa enat na, ongoongor nan natafukoran, ya kiayud marakset nan chiyuycha tafukor. <sup>7</sup> Isunga wenatkiyancha nan kakadwacha ay wacha as nan usa ay fiangkacha ta omalicha ay fumachang. Kuncha pay enmali, pinnucha nan chuwa ay fiangka as nan tenafukorancha, at kiayudcha lumnud. <sup>8</sup> Kun pay inilan Simon Pedro nan enommata, nunlukfub hiya as nan sangwanan Jesus, ya kanana, “Tomaakka kan ha-un Apo, tay fumafiasorak ay taku.” <sup>9</sup> Naschaaw hi Pedro ya nan am-in ay kakadwana as nan ongoongor ay tenafukorancha <sup>10</sup> ay kaman us kan cha Santiago kan Juan ay potot Zebedeo ay kakadwan Simon.

Angkiay ya kenalen Jesus kan Simon, “*Achika umug-ugyat. Munlapu ad wani, tataku nan tafukorantu.*” <sup>11</sup> Kuncha pay empaolet nan fiangkacha, tenaynancha nan am-in, ya inmunudcha kan Jesus.

*Nan Nangepaammayan Jesus As Nan Nakonet  
(Mat. 8:1-4; Mar. 1:40-45)*

<sup>12</sup> As nan hin-urkiw ay kawad-an Jesus henan usa ay ili, wacha nan usa ay laraki ay nakonet nan intiru ay achorna. Kuna pay inila hi Jesus, uy nunlukfub as nan sangwanana, ya empakaasina, “Apo, mu laychum, epaammayak koma.”

<sup>13</sup> Inchawchaw Jesus nan limana, ya kenpana hiya. Kenalina, “*Laychok. Omammayka!*” Hiya at chi ya nakaan nan konet nan hana laraki.

<sup>14</sup> Angkiay ya kenalen Jesus kan hiya, “*Achim ifiagfiakia as kumpurmnan enommat kan he-a. Ngem kunka at uy munpaila as nan pachi ta ilauna ay nakaan nan saketmu. Kun pay marpas, umichatka as chatonmu kan Apo Dios ay kaman as nan infilin Moises ta mangammuwan nan tataku ay nakaan tit-iwa nan saketmu.*”\* <sup>15</sup> Ngem kaskasin nunchinamag nan maepangkep kan Jesus. Oongoongorchay tataku ay enmali ay manngor as nan kanana ya uy munpakaan as nan saksaketcha. <sup>16</sup> Ngem kun pay hi Jesus, inmuy hiya henan kamaid chi umili ay nunkararag.

*Nan Nangepaammayan Jesus As Nan Paralitiko  
(Mat. 9:1-8; Mar. 2:1-12)*

<sup>17</sup> As nan hin-urkiw ay cha mun-isursuruwan Jesus, wachacha nan Fariseo ya nan mun-isursuru as Lintig ay nangatokor ay cha manmanngor as nan chana kankanan. Nurpucha henan am-in ay ili ad Galilea, ad Judea ya ad Jerusalem. Wacha nan pannakafialin Apo Dios kan Jesus ay mangepaam-may as tataku ay cha munsaket. <sup>18</sup> As nan hiyachi, wachacha nan nangiyattang ay nangiyali as usa ay laraki ay paralitiko. Penachascha ay mangiskop as nan afong ay kawad-an Jesus ta epab-ugcha as nan sangwanana. <sup>19</sup> Ngem maid atuncha ay mangiskop, tay ongoingor chi tataku. Isunga inuyucha as tabfongan. Kinusfotancha nan atop, at inuy-uchya hiya ay kukutug as nan inuumfukiana as nan paat sangwanan Jesus as nan kiawan nan ongor ay tataku. <sup>20</sup> Kun pay inilan Jesus nan pammaticha, kenalina as nan paralitiko, “*Ifia, napakawanka as nan fiasfiasormu.*”

<sup>21</sup> Angkiay ya enlapon nan chiyucha mun-isursuru as Lintig ya nan chiyucha Fariseo ay nunsesennarudsud, “Ngachan man ton aytaku ay paat mangepachong as achorna kan Apo Dios? Ngachana nan makafael ay mamakawan as nan tataku as nan fiasfiasorchu mu achi hi Apo Dios yangkiy?”

<sup>22</sup> Kun pay naammuwan Jesus nan chacha numnumnumun, kenalina kan chicha, “*Adchi sa as chayu numnumnumun?*” <sup>23</sup> Ngachana nan narakraka as kanan, ‘*Napakawanka as nan fiasfiasormu,*’ winnu kanan un, ‘*Maligwatka ya manaranka?*’ <sup>24</sup> Ngem mu hiyasa, atok na ta maammuwanu ay nan Naepadtu ay Anak chi Taku at wachay kalibfengana asna’s luta ay mamakawan as nan tataku as nan fiasfiasorchu.” Kenalina as nan paralitiko, “*Kanak kan he-a, tomakchugka, arauum nan apragmu ya komatamka.*” <sup>25</sup> Hiya at chi ya temakchug nan laraki ay illauncha am-in. Angkiay nun-arana nan apragna, ya kenmatam ay cha munchaychayaw kan Apo Dios. <sup>26</sup> Naschaawcha as solet nan am-in ay tataku. Chinaychayawcha hi Apo Dios ya pararuy ugyatcha. Kenalicha, “Anuy paat nakaskaschaaw nan inila taku ad wani.”

\* **5:14** Lev. 14:1-32

*Nan Nangayakian Jesus Kan Levi  
(Mat. 9:9-13; Mar. 2:13-17)*

<sup>27</sup> Kun pay narpas na, nak-ak hi Jesus ya inilana nan usa ay mangam-among as fiaror ay nan ngachana at Levi ay nangatokor as opisinana ay munfiayfiayachan as fiaror. Kenalen Jesus kan hiya, “*Unuchunak.*”  
<sup>28</sup> Nunkaliligwat hi Levi ay nanaynan as nan am-in ya inmunud kan Jesus.

<sup>29</sup> Angkiay ya nunparti hi Levi as fiaka as afongna ta pachayawana hi Jesus. Ongorcha us nan mangam-among as fiaror ya tapina ay tataku ay uy nakekan. <sup>30</sup> Kun pay inilan nan chiyuycha Fariseo ya nan kakadwacha ay mun-isursuru as Lintig ay cha makekan hi Jesus as nan chiyuycha mangam-among as fiaror, nunmotmotcha as nan disipulus Jesus. Kenalicha, “Adchi t’uy kayu makiub-ufong ya makiig-ikop as nan chiyuycha mangam-among as fiaror ya as nan tapina ay fumafiasor?”†

<sup>31</sup> Tinumfor hi Jesus kan chicha, “*Nan tataku ay achi munsaket at achicha masapor chi choktor, ngem kun yangkiay nan chiyuycha munsaket.*”

<sup>32</sup> *Chaanak enmali ay mangayag as nan nunkalintig, ngem kun at nan fumafiasor ta munfiafiawicha.*”

*Nan Maepangkep As Nan Mun-ayunaran  
(Mat. 9:14-17; Mar. 2:18-22)*

<sup>33</sup> Kenalen nan tapina kan Jesus, “Nan disipulus Juan ay Fumufunyag ya nan disipulus nan chiyuycha Fariseo at kun anaka un nun-ay-ayunarcha ya nunkarkararagcha. Ngem nan disipulusmu at chacha mangmangan ya umig-ikop.”

<sup>34</sup> Tinumfor hi Jesus kan chicha, “*Ay mafialin ay mun-ayunaranu nan chiyuycha naayakian ay makichuyas uray mu kukutug nan chumuyas ay laraki kan chicha? Achi met!*” <sup>35</sup> *Ngem mu umchantu nan timpu ay maek-akan nan chinuyas ay laraki kan chicha, hiyachintu nan mun-ayunarancha.*”

*Nan Maepangkep As Nan Fiarú Ay Insursuron Jesus*

<sup>36</sup> Angkiay ya infiakian us Jesus na ay maepadpachongan: “*Maid lomakset as akét as nan fierú ay fiachu ya elakubna as nan lukiak ay fiachu. Mu atuna chi, kuna lawá chachaelun nan chiyuy fierú ay fiachu, ya achi maifiakiay as nan naelakfiana ay lukiak ay fiachu.*” <sup>37</sup> *Maid us mangittu as kasubsufor ay fiayas as nan lukiak ay mangit-ittuwan ay larat. Mu ipuuyna, epabtaktu nan kasubsufor ay fiayas nan larat. Maiwagkiantu nan fiayas ya machachaeltu nan mangit-ittuwan ay larat.* <sup>38</sup> *Ngem kun at nan kasubsufor ay fiayas at masapor maittu as nan fierú ay mangit-ittuwan ay larat.* <sup>39</sup> *Maid us manglayad ay umikop as kasubsufor ay fiayas mu narpas at ay inmikop as norkiat, tay kanancha un am-am-ammay nan norkiat.”*

## 6

*Nan Maepangkep As Nan Urkiw Ay Mun-iblayan  
(Mat. 12:1-8; Mar. 2:23-28)*

<sup>1</sup> As nan Urkiw ay Mun-iblayan, cha mar-os cha Jesus as nan chiyuycha uma ay nataman as trigo. As nan hiyachi, nunsaw-i nan disipulusna ya kinutimancha, at kenancha. <sup>2</sup> Ngem kenalen nan tapen nan chiyuycha Fariseo, “Adchi t’uyyu cha atun nan epawan nan Lintig takú as nan Urkiw ay Mun-iblayan?”\*

† **5:30** Luc. 7:34; 15:2; Jn. 9:25      \* **6:2** Exo. 34:21

<sup>3</sup> Tinumfor hi Jesus, “Ay chaanyu finasfiasa nan enat Ari David ya nan kakadwana as nan nunchukiaangancha? <sup>4</sup> Sinungkop hi David as nan munchaychayawan kan Apo Dios, ya enarana nan tenapay ay naichaton kan Apo Dios ya kenana. Ngem epawan nan Lintig nan ngachana ay mangan mu achi yangkiay nan papachi. Inchatna us nan tapen nan tenapay as nan kakadwana.”† <sup>5</sup> Inyanongos Jesus, “Nan Naepadtu ay Anak chi Taku nan muntoray as nan Urkiw ay Mun-iblayan.”

*Nan Laraki Ay Nakukuy Nan Usa Ay Limana  
(Mat. 12:9-14; Mar. 3:1-6)*

<sup>6</sup> As nan kasin usa ay Urkiw ay Mun-iblayan, sinungkop hi Jesus as nan senagoga, ya nun-isuru. Wacha hid-i nan usa ay laraki ay nakukuy nan kannawan ay limana. <sup>7</sup> Wachacha us nan tapen nan chiyuchya mun-isursuru as Lintig ya tapen nan chiyuchya Fariseo ay manisium kan Jesus mu mun-epaammay as tataku ay wachay saketcha as nan Urkiw ay Mun-iblayan ta wachay maanapan as epafiasorcha kan hiya. <sup>8</sup> Ngem aammon Jesus nan wacha as numnumcha, at kenalina as nan nakukuy chi limana, “Maligwatka ya omalika hena.” Naligwat tit-iwa ya uy temmakchug hid-i. <sup>9</sup> Angkiay kenalen Jesus kan chicha, “Sarudsuchok man kan chakayu mu ngachana nan eparufus nan Lintig ay atun takú as nan Urkiw ay Mun-iblayan: Ay atun takú nan ammay winnu mangotet? Ay esarakan takú nan fiyag chi taku winnu chachaelun takú?” <sup>10</sup> Entoongan Jesus chicha am-in, ya kanana as nan nakukuy chi limana, “Uyachum nan limam.” Inuyadna ya enmammay tit-iwa nan limana. <sup>11</sup> Ngem pararuy fungat nan chiyuchya mun-isursuru as Lintig ya nan chiyuchya Fariseo, at naaapatcha mu anan atuncha kan Jesus.

*Nan Nangpiliyan Jesus As Nan Hinpuru Ya Chuwa Ay Apostolesna  
(Mat. 10:1-4; Mar. 3:13-19)*

<sup>12</sup> As nan hana ay timpu, tinmikid hi Jesus henan chuntug ay uy munkararag. Enlabrafina hid-i ay nunkarkararag kan Apo Dios. <sup>13</sup> Kun pay nafkiat, enayakiana nan disipulusna ya pinilina nan hinpuru ya chuwa kan chicha ay ngenadnana as apostoles. <sup>14</sup> Nauycha nan ngadngachan nan pinilina: Hi Simon ay ngenadnana as Pedro, hi Andres ay sunúd Pedro, hi Santiago, hi Juan, hi Felipe, hi Bartolome, <sup>15</sup> hi Mateo, hi Tomas, hi Santiago ay potot Alfeo, hi Simon ay kanancha un mangesasaket as nasyona, <sup>16</sup> hi Judas ay potot Santiago, ya hi Judas Iscariote ay mangesepseptu kan Jesus.

*Nan Nun-ekaskasabaan Jesus Ya Nan Nunkakkaanana As Saket  
(Mat. 4:23-25)*

<sup>17</sup> Chinmayyu cha Jesus ya inyawntina as nan nuntatapor ay lukiar ay kawad-an nan ongor ay tapina ay disipulusna. Wachacha hid-i nan on-goongor ay tataku ay nurpu henan am-in ay lukiar ad Judea ya Jerusalem. Wachacha us nan nurpu henan chiyuchya siyudad ay Tiro ya Sidon ay wacha henan olet nan fiayfiay. <sup>18</sup> Enmalicha ay manngor as nan isursuron Jesus ya mangepakaan as am-in ay saksaketcha. Enpaammay Jesus nan chiyuchya enmali ay penarpalikiat chi anennet. <sup>19</sup> Am-in nan tataku hid-i at penachascha ay mangpa kan Jesus, tay wacha nan pannakafalin ay murpu kan hiya, at enpaammayna chicha am-in ay wachay saketcha.

*Nan Kenalen Jesus Ay Nakiasat Ya Kasusug-ang*

<sup>20</sup> Inilan Jesus nan disipulusna, ya kanana, “Nakiasat kayu ay pugli, tay maetapi kayuntu as nan muntorayan Apo Dios.

† **6:4** 1 Sam. 21:1-6

- 21 Nakiasat kayu ay cha muncukiaang ad wani, tay mapnek kayuntu.  
 Nakiasat kayu ay cha mun-akor ad wani, tay maamrang kayuntu.
- 22 Nakiasat kayu as nan mang-ingoran nan tataku kan chakayu, as nan achicha mangetapiyan kan chakayu kan chicha, as nan mangsotancha kan chakayu, ya as nan mangaliyancha un mangotettet kayu kiapú as nan Naepadtu ay Anak chi Taku.
- 23 Munlagragsakya muntat-allok kayu kiapú as lagsakyu as nan ommatan nan hanacha kan chakayu, tayongoongor nan gun-gunayu ad chaya. Tay assesa us nan en-enat nan kaap-uwancha as nan chiyucha pomapadtu.”
- 24 “Ngem kasusug-ang kayu ay nunkafiaknang ad wani, tay enawatyu at nan kenanam-ay chi fiyagyu.
- 25 Kasusug-ang kayu ay masusufu ad wani, tay muncukiaang kayuntu. Kasusug-ang kayu ay cha maam-amrang ad wani, tay ngumuyus ya mun-akor kayuntu.
- 26 Kasusug-ang kayu as nan mangaliyan nan am-in ay tataku un ammay kayu, tay assesa us nan kenarkalen nan kaap-uwancha as nan chiyucha achi tit-iwa ay pomapadtu.”

*Nan Layad As Nan Kafusor  
 (Mat. 5:38-48; 7:12)*

27 “Ngem ad wani, ifiakiak kan chakayu ay chuchumngor kan ha-un: Laychunu nan chiyucha kafusoryu ya ammay nan atunyu as nan mangiingor kan chakayu. 28 Bendisyonanyu nan chiyucha mangituchor kan chakayu, ya ekararakianyu nan chiyucha mamarpalikiat kan chakayu. 29 Mu wachay manepak as tamelmu, ichutngom us nan fisakna. Mu wachay mamelet ay mangara as chaketmu, ichatmu us nan kamisitam. 30 Ettam nan ngachana ay kumchaw kan he-a. Nan ngachana ay mangara as kuk-uwam, achim fiangchun. 31 Nan ngachana ay laychum ay atun nan tapina kan he-a, hiyasa us nan atum kan chicha.

32 “Mu laylaychunu nan chiyucha yangkiay manglaylayad kan chakayu, ay magun-gunaan kayu? Achi! Tay uray nan fumafiasor at laylaychuncha nan chiyucha manglaylayad kan chicha. 33 Mu ekamanyu nan ammay as nan chiyucha yangkiay mangekaman as ammay kan chakayu, ay magun-gunaan kayu? Achi! Tay assesa us nan atun nan fumafiasor. 34 Mu nan pafuruchanyu yangkiay at nan chiyucha ammuyu ay mangifiangadtu as nan finurudcha, ay magun-gunaan kayu? Achi! Tay assesa us nan atun nan chiyucha fumafiasor ay pafuruchuncha nan kakadwacha ay fumafiasor, tay ammucha ay maifiangadtu challu nan finurudcha. 35 Ngem fiakun assesa nan atunyu! Kunyu at laylaychun nan kaiingoryu, ya atunyu nan ammay kan chicha. Pafuruchunu chicha, ya achiyu namnamaun ay ifianganadcha. Mu hiyasa nan atunyu, magun-gunaan kayuntu as ongor; ya chakayuntu nan an-ak nan Kangatuwan ay Dios. Tay hi Apo Dios at manangsug-ang uray as nan chiyucha achi munyaman ya chiyucha manangotettet chi ukialicha.

36 “Masapor manangsug-ang kayu kaman kan Apo Dios ay Amayu ay manangsug-ang.”

*Nan Achi Mang-okomán As Nan Pachong Ay Taku  
 (Mat. 7:1-5)*

37 Kenalen pay Jesus, “Achiyu okomún nan pachongyu ay taku ta achi chakayuntu okomún kan Apo Dios. Achiyu keddengan ay chusaun nan pachongyu ay taku ta achi chakayuntu keddengan ay chusaun kan Apo Dios.

*Pomakawan kayu ta pakawanun chakayuntu kan Apo Dios. 38 Ichatyu nan kasaporan chi iib-ayu, at ichattu Apo Dios nan kasaporanyu. Nan atun Apo Dios ay umichat at iyongoongorna ya ipudpudna inkiana somafi. Tay nan panglukuduyu as nan pachongyu ay taku at assesantu us nan panglukud Apo Dios kan chakayu.*

<sup>39</sup> Infiakian us Jesus kan chicha nan nauy usa ay maepadpachongan: “Ay mafialin ay epangon nan nafurag nan pachongna ay nafurag? Mu hiyasa, ay kuncha ngun achi mag-astu ay chuwa as nan ngilig? <sup>40</sup> Maid uswila as nangatngatu mu nan misturuna. Ngem am-in ay uswila ay manglopas as nan chana uswilaun at komaman as nan misturuna.”<sup>‡</sup>

<sup>41</sup> “Adchi t'uymu chillawun nan ek-ektel ay futa as nan matan nan ifiam, ya kunmu at achi madlaw nan ad-acha-an ay futa as nan mismu ay matam? <sup>42</sup> Winnu anan mangaliyam as nan ifiam un, ‘Ud-a ta kaanok nan futa as matam,’ mu he-a mismu at achim maila nan ad-acha-an ay futa as nan mismu ay matam? He-a ay pakamankaman! Kaanum on-ona nan hana ad-acha-an ay futa as nan mismu ay matam. Angkiay ya makailakantu ay ustу ay mangaan as nan ek-ektel ay futa as nan matan nan ifiam.”

### *Nan Kaiw Ya Nan Fukiasna (Mat. 7:16-20; 12:33-35)*

<sup>43</sup> Nun-epadpachong kasin hi Jesus, “Nan narangtu ay kaiw at achi fumkias as mangisiw, winnu nan naiing ay kaiw at achi fumkias as ammay. <sup>44</sup> Tay nan kaiw at maammuwан babaen as nan fukiasna. Tay nan chugway at achi mapuras as nan uyok, winnu nan ubas as nan lubfian. <sup>45</sup> Nan ammay ay taku at epafoknagna nan ammay ay naichuchulin as nan numnumna. Assesa us ay nan mangotettet ay taku at epafoknagna nan mangotettet ay naichuchulin as nan numnumna. Tay nan sumubsubra as numnumna at hiyasa challu nan epafoknagna as tapakna.”

### *Nan Chuwa Ay Nunkiaub As Afong (Mat. 7:24-27)*

<sup>46</sup> Kenalen pay Jesus, “Adchi t'uyyu kanan kan ha-un un, ‘Apo, Apo,’ ya achiyu challu atun nan ifiakiak? <sup>47</sup> Nan ngachana ay taku ay omali kan ha-un ya manngor as nan nauycha kalek ya atuna chaná <sup>48</sup> at ifiakiak nan nauy maepachongana: Maepachong hiya as nan taku ay cha munkiaub as afong. Kenaufiana nan luta inkiana ininchanancha nan chupras ad chur-um, ya tinuudna nan pusten nan afong. Kun pay enmali nan ongor ay chanum, chinaraposna nan hana ay afong, ngemchaan poros nunwawud, tay naekanag ay nakiaub. <sup>49</sup> Ngem nan chiyuy taku ay manngor as nan nauycha kalek ya achina challu atun chaná at maepachong as nan taku ay nunkiaub as afong as nan luta ay chaan nangekaub as pusten nan afongna. Kun pay enmali nan ongor ay chanum, chinaraposna nan hana afong, at nunkatutu-ug ya nunsidlay enatna ay nachachael.”

## 7

### *Nan Nangepaammayan Jesus As Nan Usa Ay Mafiafbfiaor (Mat. 8:5-13)*

<sup>1</sup> Kun pay narpas ay infiakian Jesus chaná am-in as nan tataku, inmuy ad Capernaum. <sup>2</sup> Wacha hid-i nan usa ay kapetan chi sosorchachu ay Romano

<sup>‡</sup> **6:40** Mat. 10:24; Jn. 13:16; 15:20

ay wachay fiabfiaaruna ay laylaychuna as solet. Nan fiabfiaaruna ay anna at cha munsaket, ya kiayud matuy. <sup>3</sup> Kun pay chinngor nan kapetan nan maepangkep kan Jesus, infiaorna nan tapen nan anam-amán chi Judio ay uy mangayag kan Jesus ta epaammayna nan fiabfiaarun nan kapetan ay anna. <sup>4</sup> Kuncha pay inmuy kan Jesus, nunpakpakaasicha kan hiya. Kenalicha, “Nan nauy ay kapetan at maekari ay fiadgam, <sup>5</sup> tay laylaychuna chitaku ay Judio, ya hiya nan nangepaamma as nan senagoga takú.” <sup>6</sup> Angkiay ya nakiuy hi Jesus kan chicha.

Kuncha pay kiayud umchan as nan afong, infiaor nan kapetan nan kiakiayyumna ay uy mangifiakia kan Jesus, “Apo, achika cha munforforay ay omali as afongku, tay achiyak maekari ay mangepaskop kan he-a. <sup>7</sup> Isunga achiyak maekari ay omali kan he-a. Ommat nan kalem yangkiay as mangepaammay as nan fiabfiaarok. <sup>8</sup> Tay uray ha-un at wacha nan mangetoray kan ha-un, ya wachacha us nan sosorchachok ay etorayak. Mu kanak as nan usa un, ‘Uyka’ at umuy hiya. Mu kanak us as nan usa un, ‘Aka’ at omali hiya. Mu kanak us as nan fiabfiaarok un, ‘Atum na’ at atuna.”

<sup>9</sup> Kun pay chinngor Jesus na, naschaaw hiya, ya nunsakong as nan ongor ay tataku ay cha umun-unud kan hiya, ya kanana, “*Ifiakiak kan chakayu ay maid poros naanapak as assena ay pammati uray ad Israel.*” <sup>10</sup> Nunfiangad nan chiyuchya infiaor nan kapetan, at ininchanancha ay enmammay at nan fiabfiaaruna.

### *Nan Nangtakuan Jesus As Nan Anak Nan Ellakas*

<sup>11</sup> Naaw-awni as akét, inmuy hi Jesus henan usa ay ili ay makali un Nain. Nakiuy kan hiya nan disipulusna ya nan ongoongor ay tataku. <sup>12</sup> Kun pay cha maesnop cha Jesus as nan sungkopan henan ili, sinib-atcha nan ongor ay uy mangilfun as nan laraki ay us-usa ay anak nan ellakas. Nakitutun-ud as nan ellakas nan ongoongor ay tataku ay nurpu henan hana ay ili. <sup>13</sup> Kun pay inilan Jesus nan ellakas, ongor chi sug-angna. Kenalina, “*Achika munakor.*” <sup>14</sup> Angkiay ya naesnop hi Jesus ya kenpana nan longon.\* Angkiay inkinak nan chiyuchya nangiyaaattang. Kenalen Jesus, “*Anakku, kanaak kan he-a un fumangunka.*” <sup>15</sup> Tenmokor tit-iwa nan natuy ay laraki, ya enlapuna ay nunkali. Haat ichat Jesus hiya kan enana. <sup>16</sup> Inmugyat nan am-in ay tataku, at chinaychayawcha hi Apo Dios ay chacha kankanan, “*Nunpaila kan chitaku nan usa ay mannakafialin ay pomapadtu,*” ya “*Enmali hi Apo Dios ay mangesarakan as nan tatakuna.*” <sup>17</sup> Nunchinamag nan nauy maepangkep kan Jesus henan intiru ay Judea ya henan am-in ay lukiar ay nangliliwus henan ili ay anna.

### *Nan Chiyuchya Infiaor Juan Ay Fumufunyag (Mat. 11:2-8)*

<sup>18</sup> Nan disipulus Juan at uycha infiaikia kan Juan ay naifiafiarud as nan hiyachi nan nauycha am-in ay enom-ommat. <sup>19</sup> Kun pay chinngor Juan chasa, enayakiana nan chuwa as nan disipulusna, ya infiaorna chicha ay uy manarudsud as nan Apo, “Ay he-a nan enkaren Apo Dios ay omalintu, winnu munsuud kami as tukún?”

<sup>20</sup> Kuncha pay inmuy kan Jesus, kenalicha, “Hi Juan ay Fumufunyag at infiaor chakami ay manarudsud un, ‘Ay he-a nan enkaren Apo Dios ay omali, winnu munsuud kami as tukún?’”

\* **7:14** Nan longon as nan timpon Jesus at chakurug ay osaruncha ay mangiyuy as nan natuy as lufokna.

<sup>21</sup> As nan hiyachi ay uras, ongor nan enpaammay Jesus ay munsaket as tukutukún ay saksaket. Enpafoknagna nan anennet, ya nan nunkafurag at makailacha. <sup>22</sup> Tinumfor hi Jesus as nan chiyuycha infiaor Juan, “*Munfiangad kayu kan Juan, ya ifiakiayu kan hiya nan nauyucha inilayu ya chinngoryu: Nan chiyuycha nafurag at makailacha, nan chiyuycha napilud at makacharancha, nan chiyuycha nakonet at enmammaycha, nan chiyuycha naturak at makadongorcha, nan chiyuycha natuy at natakucha, ya nan chiyuycha pugli at naekasaba kan chicha nan Ammay ay Chamag.*” <sup>23</sup> Nakiasat nan taku ay achi munchuwachuwa as nan maepangkep kan ha-un.”

### *Nan Infiaikan Jesus Maepangkep Kan Juan Ay Fumufunyag (Mat. 11:9-19)*

<sup>24</sup> Kun pay nak-ak nan chiyuycha infiaor Juan, infiaikan Jesus nan maepangkep kan Juan as nan óongoongor ay tataku, “*As nan enayanyu kan Juan henan disyerto, ngachana nan nenamnamayu ay ilaun koma? Ay usa ay taku ay maepachong as nan tufú ay cha ikiwiwen chi angin?*” <sup>25</sup> Ngachana ngarud nan enay-ayanyu hid-i ay ilaun? *Ay usa ay taku ay nunfiafiachu as am-ammay? Nan chiyuycha met munfiafiachu as nangina ya nanam-ay chi fiyagcha at mamagyancha as nan chiyuycha palasyu.* <sup>26</sup> *Ngachana ngay ngarud nan enay-ayanyu hid-i? Ay uyyu inila nan usa ay pomapadtu? O, ifiakiak kan chakayu, inilayu nan am-amud mu nan pomapadtu.* <sup>27</sup> *Tay hi Juan nan naifiakia as nan Kalen Apo Dios ay kanana un, ‘Wacha nan ifiaorku ay mangon-oná mu he-a ay mangesakiana as nan ayum.*† <sup>28</sup> *Ifiakiak kan chakayu ay as nan am-in ay naiyanak at maid am-amud mu hi Juan. Ngem nan kaapuchan as nan muntorayan Apo Dios at am-amud mu hi Juan.*”

<sup>29</sup> Kun pay chinngor nan am-in ay tataku patí nan chiyuycha mangam-among as fieror nan nauy kenalen Jesus, enafurotcha nan nalintig ay pangkep Apo Dios kan chicha, ya nunpafunyagcha kan Juan. <sup>30</sup> Ngem nan chiyuycha Fariseo ya nan mun-isursuru as Lintig at enachicha nan pangkep Apo Dios kan chicha, tay chaancha nunpafunyag kan Juan.

<sup>31</sup> Kenalen pay Jesus, “*Anan mangepachongak ngun kan chatona ay tataku ad wani, ya anan kaassenacha?*” <sup>32</sup> *Maepachongcha as nan ongong-a ay nangatokor as nan lenawwag ay cha munfifinnukiaw ay cha mangarkali un, ‘Nun-epEEP kami, ya chaan kayu nunsasara. Nunkanta kami as omepanguyus, ya chaan kayu nun-akor.’* <sup>33</sup> *Tay enmali hi Juan ay Fumufunyag ay cha munay-ayunar ya achi umig-ikop as fiayas, ya kananyu un, ‘Naanennenetan hiya!’* <sup>34</sup> *Kun pay enmali nan Naepadtu ay Anak chi Taku ay cha makekkekán ya cha makiig-ikop, kananyu un, ‘Ilaunyu kay na ay taku at kun naranok ya futtang. Hiya us at kiayum nan chiyuycha mangam-among as fieror ya nan tapina ay fumafiasor.’* <sup>35</sup> *Uray mu hiyasa, maepaila challu ay ustu nan kenasilib Apo Dios as nan am-in ay tatakuna.’*

### *Nan Namakawanán Jesus As Nan Fiafiai Ay Fumafiasor*

<sup>36</sup> Wacha nan usa ay Fariseo ay nangayag kan Jesus ta uy makekan kan hiya. Isunga inmuy hi Jesus as afongna, ya nakuifong hiya as nan Fariseo ay ansa. <sup>37</sup> Henan hana ay ili, wacha nan usa ay fiafiai ay fumafiasor. Kuna pay nachamag ay cha makekan hi Jesus as afong nan Fariseo, inyuyna nan mangit-ittuwan ay naamma as fiatu ay nan ngachana at alabastro ay nanapnu as munfiangu ay lana. <sup>38</sup> Tenmakchug nan hana ay fiafiai ay

† *7:27 Mal. 3:1; Mar. 1:2*

cha mun-ag-akor as likud Jesus as nan sag-un nan sukina. Nan chiyuycha luwana at timmidtidcha as nan suken Jesus. Angkiay ya pinunasana as nan fookna. Finisituna nan suken Jesus, ya fenokfokana as fiangfiangru.<sup>39</sup> Kun pay inilan nan Fariseo ay nangayag kan Jesus nan hana naekaman, kenalina as numnumnuma, “Mu tit-iwa ay pomapadtuna ay taku, aammuna koma nan katatakon tona ay fiafiai ay cha mangmangpa kan hiya. Aammuna us koma ay hi tona at fumafiasor.”

<sup>40</sup> Angkiay kenalen Jesus as nan Fariseo, “*Simon, wacha nan ifiakiak kan he-a.*”

“O, Misturu, ngachan tud-i?” ensongfiatna.

<sup>41</sup> Kenalen Jesus, “*Wachacha nan chuwa ay inmutang as nan usa ay munpappautang as siping. Inmutang nan usa as leman kiasot ay dinario,<sup>†</sup>kun pay nan usa at leman puru.*” <sup>42</sup> *Kiapú ta achicha makafiyad, penakawan nan nunpautang chicha ay chuwa. Ad wani, ngachana pay kan chicha nan ongongor nan layadna as nan nunpautang?*”

<sup>43</sup> Tinumfor hi Simon, “Uy at nan chiyuy ong-ongor nan utangna ay.”

Kenalen Jesus kan hiya, “*Ustu nan hana kenalem.*” <sup>44</sup> Angkiay ya nun-sakong as nan fiafiai, ya kanana kan Simon, “*Ilaum nan nauy fiafiai. Sinungkopak asna's afongmu, ya maid inchatmu as chanum ay mangurasku as sukek. Ngem hiya at enlasana nan sukek as luwana ya pinunasana as fookna.*” <sup>45</sup> As nan sinungkopak, chaanak met finisitu kan he-a ay kaman as nan iniili ay ukiali takú. Ngem hiya at chaana inkinkinak ay namisfisitu as nan sukek nunlapu as nan sinungkopak. <sup>46</sup> *Chaanmu lenanaan nan urok, ngem hiya at fenokfokana nan sukek as fiangfiangru.*” <sup>47</sup> *Isunga ifiakiak kan he-a ay kiapú as nan ongor ay layadna kan ha-un, hiyana nan mangepaila ay napakawan hiya as nan ongor ay fiasfiasorna. Ngem nan taku ay akét chi napakawan ay fiasfiasorna at akét nan layadna ay epailana.*”

<sup>48</sup> Kenalen Jesus as nan fiafiai, “*Napakawanka as nan fiasfiasormu.*”

<sup>49</sup> Angkiay ya nan kakadwana ay nakekan at enlapucha ay mangali as numnumchá, “Ngachan man tona ay mamakawan as tataku as nan fiasfiasorcha?”

<sup>50</sup> Ngem kenalen Jesus as nan fiafiai, “*Nan pammatem nan nangesarakan kan he-a. Uyka ay kun natalna nan numnummu.*”

## 8

### *Nan Fiabfiafiai Ay Nakikkiuy Kan Jesus*

<sup>1</sup> Kun pay chaan nafiyag, inmuy hi Jesus henan il-ili ya fiabfiabruy ay cha mangekaskasaba as nan Ammay ay Chamag maepangkep as nan muntorayan Apo Dios. Nakiuy kan hiya nan hinpuru ya chuwa ay disipulusna <sup>2</sup> ya nan tapen us nan fianafiai ay nakaanan nan chiyuycha anennet ya saksaket. Chicha cha Maria ay makali un Magdalena ay naepafoknakian chi pitu ay anennet, <sup>3</sup> hi Juana ay asawan Cusa ay opisyar Ari Herodes, hi Susana, ya ongor pay ay tapina ay fianafiai ay inmid-ichat as kasaporan cha Jesus babaen as nan kafaelancha ay ichat.

### *Nan Taku Ay Uy Nun-iwagwag As Fokel*

(Mat. 13:1-9; Mar. 4:1-9)

<sup>4</sup> Cha omali-ali nan ongoongor ay tataku ay nurpu henan tukutukún ay il-ili. Kuncha pay naamong as nan kawad-an Jesus, infiakian Jesus na ay

<sup>†</sup> **7:41** Nan usa ay dinario at munfiaror as lagfu as usa ay urkiw kan chicha ad pus-uy.

maepadpachongan: <sup>5</sup>“Wacha nan usa ay taku ay uy nun-iwagwag as fokel as nan umana. As nan chana mun-iwagwagwakian, nag-as nan tapen nan fokel as nan charan. Naikiatincha, ya kenan chi kossal. <sup>6</sup>Nan tapina at nag-ascha as nan machupras ay lukiar. Kuncha pay cha tomemel, naklingcha at, tay maid chanum nan naetenmancha. <sup>7</sup>Nan tapina at nag-ascha as nan kaongoran chi sufet. Naikisancha ay tinmuful as nan ongor ay sufet, at nasulincha. <sup>8</sup>Nan tapina at nag-ascha as nan ammay ay luta. Tinmufulcha ya finumkiascha as mahinkiagsot.” Inyanongos Jesus, “Nan wachay ingana ay chumngor at masapor chumngor.”

### *Nan Pangkep Ya Nan Laychun Ay Kanan Nan Maepadpachongan (Mat. 13:10-23; Mar. 4:10-20)*

<sup>9</sup> Senarudsud nan disipulus Jesus kan hiya mu ngachana nan laychun ay kanan nan chiyuy maepadpachongan. <sup>10</sup>Tinumfor hi Jesus, “Kan chakayu nan naepakaammuwan nan chaan naam-ammuwan maepangkep as nan muntorayan Apo Dios. Ngem as nan tapina, maifiakia kan chicha babaen yangkiay as nan mangosaran as maepadpachongan ta uray mu iilauncha, achicha ematonan. Uray mu chungruchungruncha at achicha challu maawatan.”\*

<sup>11</sup>“Nauy nan laychun ay kanan nan maepadpachongan: Nanfokel at hiyana nan Kalen Apo Dios. <sup>12</sup>Nan chiyuycha nag-as as nan charan at maepachongcha as nan tataku ay manngor as nan Kalen Apo Dios, ngem umuy hi Satanas, ya kaanuna nan hana kali as numnumcha ta achicha omafurot ya maesarakan. <sup>13</sup>Nan chiyuycha naiwagwag as nan chiyuycha machupras ay lukiar at maepachongcha as nan tataku ay naragsak ay mang-awat as nan kalen Apo Dios as nan manngorancha. Ngem kiapú ta achicha lomamot ay ustus as numnumcha, hen-omaketan yangkiay nan omafurotancha. As nan timpu ay umchanan chi sulisug kan chicha, achicha at ituruy ay omafurot. <sup>14</sup>Kun pay nan chiyuycha nag-as as nan tinmufulwan chi ongor ay sufet at maepachongcha as nan tataku ay manngor as nan kalen Apo Dios. Ngem kun pay naaw-awni, nan chanchanagcha, kenafiaknangcha ya lagragsakcha as nan nauy ay fiyag at sulinuncha nan chinngorcha, at achicha maonangan as nan pammaticha. <sup>15</sup>Kun pay nan chiyuycha naiwagwag as nan ammay ay luta at maepachongcha as nan tataku ay manngor as nan kalen Apo Dios, ya ittucha as nan ammay ya napudnu ay numnumcha. Mun-an-anoscha inkiana fumkiascha.”

### *Nan Maepadpachongan Nan Pingki (Mar. 4:21-25)*

<sup>16</sup>Kenalen pay Jesus, “Maid taku ay mamaskud as pingki ya op-opana as fianga winnu ipuuyna as nan selok chi kama. Kuna at epatang as nan maepatpatngana ta mailan nan chiyuycha sungkop nan silawna. <sup>17</sup>Tay maid naetatafun as achintu maepaila, winnu uray ngachana ay chaan naam-ammuwan as achintu maammuwan ya maepaila. <sup>18</sup>Il-ilauryu ngegarud nan atunyu ay chumngor, tay nan taku ay wachay kafaelana at maettan as ongongor. Nan taku ay maid kafaelana at uray nan ak-akettuy ay wacha kan hiya at maarantu.”

### *Nan Enan Jesus Ya Nan Susnúdna Ay Lanaraki (Mat. 12:46-50; Mar. 3:31-35)*

\* <sup>8:10</sup> Isa. 6:9-10; Jer. 5:21; Jn. 12:40

**19** Inmuy kan Jesus hi enana ya nan susnúdha ay lanaraki, ngem maid atuncha ay maesnop kan hiya kiapú as nan kenaongor chi tataku. **20** Wacha nan nangifiakia kan Jesus, “Wacha hi enam ya nan susnúdmu ay lanaraki ay nangatakchug as nan fiattaw, ya laychun chaká ay ilaun.” **21** Ngem kenalen Jesus kan chicha, “*Nan enak ya nan susnúdku at nan chiyuycha chumngor ya mangekaman as nan kalen Apo Dios.*”

*Nan Nangepakinkan Jesus As Nan Puwak Ya Challuyon  
(Mat. 8:23-27; Mar. 4:35-41)*

**22** As nan hin-urkiw, nunlukian hi Jesus as nan fiangka ay kadwana nan disipulusna. Kenalen Jesus kan chicha, “*Kumchang takú henan fiayfiay ta uy takú ad chumang.*” Isunga nunligwatcha ay nunlukian as nan fiangka. **23** As nan chacha kumchang, nassuy hi Jesus. Kalina at ya mun-atifufudfud chi puwak henan fiayfiay. Cha matorwan as chanum nan fiangka ay nunlurukianancha, at kiayudcha lumnud. **24** Uycha finangun hi Jesus, ya kanancha, “Apo, Apo, lumnud takú pay!”

Finnangun hi Jesus, ya finilina nan puwak ya nan napigsa ay challuyon. Nakianninakcha, at ammay kasin. **25** Kenalen Jesus kan chicha, “*Ay chaud payat nañ pammatiyu?*”

Ngem inmugyatcha ya naschaawcha ay nunsesennarudsud, “Ngachan ngun ton aay mamilin as uray angin ya chanum, at tomongparcha?”

*Nan Laraki Ay Naanennetan  
(Mat. 8:28-34; Mar. 5:1-20)*

**26** Inturuycha Jesus ay kinumchang inkiana inumchan henan sasakopun nan chiyuycha i-Geresa ay chuchumangun nan Galilea.<sup>†</sup> **27** Kuncha pay inumchan ya pinmitiuhi Jesus as nan papor, sinib-atna nan laraki ay naanennetan ay nurpu henan hana ay ili. Nafiyag ay chaan nunfiadfiachu hiya ya chaan us nanagyan as afongna, ngem kun at as nan lurubfok. **28** Kuna pay inila hi Jesus, nun-uwek ya nunlukfub as nan sangwanan Jesus, ya inpigsana ay nangifukiaw, “Jesus ay Anak nan Kangatuwan ay Dios, ngachana nan laychum ay atun kan ha-un? Esapatam ay achiyak palikiatun.” **29** Kenalina na, tay finilin Jesus nan anennet ay fomoknag as nan laraki. Namen ongor ay penalikiat nan anennet nan laraki, ya uray naepokok ya nakor-ongan nan lima ya sukina, ngem senokpotna challu nán kor-ong ya enpatagttag nan anennet hiya ay umuy henan disyerto. **30** Senarudsud Jesus kan hiya, “*Anan ngachanmu man?*”

“Liniblifu,” ensongflatna, tay ongoingorcha nan anennet ay sinungkop kan hiya. **31** Nunpakpakaasi nan chiyuycha anennet kan Jesus ta achina filinun chicha ay umuy henan lukiar ay kaman fitu ay maid papugna.<sup>‡</sup> **32** As nan naesasag-un, wachachay ongoingor ay fiafuy ay cha munsuksukor henan filig. Nunpakpakaasi nan chiyuycha anennet kan Jesus ta sungkopcha as nan chiyuycha fiafuy. Isunga penarufusan Jesus chicha.

**33** Fenmoknagcha tit-iwa nan chiyuycha anennet as nan laraki, ya sinungkopcha as nan chiyuycha fiafuy. Angkiay ya kenamon nan chiyuycha fiafuy ay chinmayyu inkiana nag-ascha henan teng-el, at nurningcha henan fiayfiay.

**34** Kun pay inilan nan chiyuycha mun-ay-aywan as nan chiyuycha fiafuy nan enommat, tenmagtagcha ay uy nangepachamag as nan tataku henan

<sup>†</sup> **8:26** Mat. 8:28; Mar. 5:1    <sup>‡</sup> **8:31** Pal. 9:1; 11:7; 20:1

ili ya sigsikib. <sup>35</sup> Angkiay ya inmuycha nan tataku ay uy mangila as nan enommat. Kuncha pay inumchan as nan kawad-an cha Jesus, inilacha nan laraki ay fenmoknakian nan chiyucha anennet. Nangatokor hiya as nan sag-un nan suken Jesus. Nangafiachu ya ammay at chi numnumna. As nan hiyachi, inmugyatcha am-in as solet. <sup>36</sup> Nan chiyucha nangila at infiakiacha as nan tataku nan enat nan laraki ay enmammay. <sup>37</sup> Kiapú as nan nunsidla ay ugyatnan am-in ay-i-Geresa, chinawatcha kan Jesus ay makak hiya hid-i. Isunga nunlukian hi Jesus as nan fiangka ya nak-ak.

<sup>38</sup> As nan hiyachi, nunpakpakaasi kan Jesus nan laraki ay fenmoknakian nan anennet ta makiuy koma kan hiya. Ngem enpakatam Jesus hiya. Kenalina, <sup>39</sup> “Komamatka at man, ya uymu ifiagfiakia nan enat Apo Dios kan he-a.” Kenmatam tit-iwa ya uyna ifiakia as nan am-in ay kakailiyana nan enat Jesus kan hiya.

*Nan Anak Jairo Ya Nan Fiafiae Ay Nangpa As Nan Fiachon Jesus  
(Mat. 9:18-26; Mar. 5:21-43)*

<sup>40</sup> Kun pay nunfiangad hi Jesus ad chumang, naragsak nan tataku ay nangayag kan hiya, tay hiya nan sasad-uncha. <sup>41</sup> Angkiay ya enmali nan usa ay laraki ay nan ngachana at Jairo ay usa ay ap-apu as nan senagoga. Nunlukfub hiya as nan sangwanan Jesus, ya nunpakpakaasi kan hiya ta makiuy as afongna, <sup>42</sup> tay kiayud matuy nan us-usa ay anakna ay fiafiae ay hinpuru ya chuwa nan tawwuna.

Kun pay cha umuy hi Jesus, somaliubyub chi tataku ay makitun-ud kan hiya. <sup>43</sup> Wacha hid-i nan usa ay fiafiae kan chicha ay cha munichaichara as hinpuru ya chuwa ay tawwun. Kinastosna am-in nan sipingna ay namayadna as mangakias kan hiya, ngem maid nakaakias kan hiya. <sup>44</sup> Naesnop as uchug Jesus ya kenpana nan kiayachan nan fiachona. Hiya at chi ya nakyat nan cha fomokfoknag kan hiya. <sup>45</sup> Senarudsud Jesus, “Ngachana nan nangpa kan ha-un?”

Kuncha pay am-in ensaot, kenalen Pedro, “Apo, kuncha ongor chi tataku ay somaliubyub kan he-a ya.”

<sup>46</sup> Ngem kenalen Jesus, “Ammok ay wacha nan nangpa kan ha-un, tay keneknak ay wachay pannakafialin ay nak-ak kan ha-un.”

<sup>47</sup> Kun pay achi maesaot nan fiafiae, cha munpapayagpag ay enmali kan Jesus ya nunlukfub as nan sangwanana. As nan sangwanan nan am-in ay tataku, infiakiana mu adchi t'uyna kenpa hi Jesus ya anan enatna ay enmammay. <sup>48</sup> Kenalen Jesus kan hiya, “Ammi, nan pammatem nan nangepaammay kan he-a. Uyka ay kun natalna nan numnummu.”

<sup>49</sup> As nan cha munkarkaliyan Jesus, enmali nan usa ay laraki ay naifiaor ay nurpu as afong Jairo, ya kanana kan Jairo, “Natuy at nan pototmu ay fiafiae. Achim lilibokun nan misturu.”

<sup>50</sup> Ngem as nan nangoran Jesus as sa, kenalina kan Jairo, “Achika umugyat. Omafurotka yangkiay, at omammay nan pototmu.”

<sup>51</sup> Kun pay inumchan hi Jesus as afong Jairo, maid tukún as empaskopna mu achi yangkiay cha Pedro, Juan, Santiago, ya nan ama ya enan nan onga.

<sup>52</sup> Am-in nan tataku hid-i at chacha mun-ag-akor ya munngunguyus. Ngem kenalen Jesus kan chicha, “Achi kayu cha mun-ag-akor, tay chaan natuy hiya, ngem kun nanassuy.”

<sup>53</sup> Kuncha at enam-amrang hiya, tay nan ammucha at natuy nan onga.

<sup>54</sup> Ngem inunnan Jesus nan liman nan onga, ya kanana kan hiya, “Anakku, fumangunka.” <sup>55</sup> Nataku kasin nan onga ya nafiannangun hiya. Angkiay

ya infilin Jesus ay umichatcha kan hiya as kanuna. <sup>56</sup> Naschaawcha nan chanakchakor nan onga, ngem infilin Jesus kan chicha ay maid poros mangifiagfiag-ancha as nan enommat.

## 9

### *Nan Nangifiaoran Jesus As Nan Hinpuru Ya Chuwa (Mat. 10:5-15; Mar. 6:7-13)*

<sup>1</sup> Enamong Jesus nan hinpuru ya chuwa ay disipulusna kan hiya, ya inchatnay pannakafalin ya kalibfengan kan chicha ay mangepak-ak as am-in ay anennet ya mangaan as saksaket. <sup>2</sup> Angkiay ya infiaorna chicha ay mangekasaba as nan maepangkep as nan munctorayan Apo Dios ya mangepaammay as nan tataku ay munsaket. <sup>3</sup> Kenalina kan chicha, “*Maid etakinyu as nan munfaatanyu. Achi kayu ometakin as uray surkud, samfiag, makan winnu siping ya uray munsokatanyu.*” <sup>4</sup> *As nan uray ngachana ay afong ay sungkopanyu, hid-i nan magyananyu inkiana mak-ak kayu hid-i ay ili.* <sup>5</sup> *Henan ngachana ay ili ay umuyanyu ay maid poros mangmangili kan chakayu, mak-ak kayu hid-i ay ili. As nan mak-akanyu, pokpokanyu\*nan tapok as nan chapanyu ay mangepaila ay maid fiyangyu kan chicha as nan manusaan Apo Dios kan chicha.*”

<sup>6</sup> Angkiay ya inligwatcha ya inmuycha henan fiabfiabruy. Enkaskasabacha nan Ammay ay Chamag ya enpappaammaycha nan chiyuycha munsaket henan am-in ay lukiar.

### *Nalilifokan Hi Ari Herodes (Mat. 14:1-12; Mar. 6:14-29)*

<sup>7</sup> Kun pay nachamag Herodes ay gobernador ad Galilea nan am-in ay enkamkaman Jesus, nalilifokan hiya, tay kenalen nan tapina ay tataku un nataku manipud as nan utúy hi Juan ay Fumufunyag.<sup>†</sup> <sup>8</sup> Nan tapina at kenalicha un nunpaila hi Elias, ya nan tapina us at kenalicha un hiya nan usa as nan chiyuycha pomapadtu ad pùs-uy ay nataku manipud as nan utúy. <sup>9</sup> Kenalen Herodes, “Kunku cha enpasiwat nan uron Juan ya, ngem ngachan ngun tona ay taku nan chacha kankanan?” Nunlapu as nan hiyachi, lenayadna as solet ay mangila kan Jesus.

### *Nan Namakanan Jesus As Nan Leman Lifu Ay Tataku (Mat. 14:13-21; Mar. 6:30-44; Jn. 6:1-14)*

<sup>10</sup> As nan nunfiangchan nan hinpuru ya chuwa ay apostoles, infiakiacha kan Jesus nan am-in ay en-enatcha. Angkiay ya entakin Jesus chicha, ya inmuycha ay chidchicha yangkiay henan ili ay makali un Betsaida. <sup>11</sup> Kun pay naammuwan nan ongoongor ay tataku, inunudcha hiya. Enayakian Jesus nan nauycha tataku, ya infiakiana kan chicha nan maepangkep as nan munctorayan Apo Dios. Angkiay enpaammayna nan chiyuycha munsaket.

<sup>12</sup> Kun pay cha maschum, enmali nan hinpuru ya chuwa ay disipulus kan Jesus, ya kanancha, “Nauy takú henan kamaid chi umili, epakatamu nan ongoongor ay tataku ta umuycha henan naesasag-un ay fiabfiabruy ya siksikib ay mun-anap as kanuncha ya massuyancha.”

<sup>13</sup> Ngem kenalen Jesus kan chicha, “*Chakayu mismu nan mangichat as kanuncha.*”

\* <sup>9:5</sup> Nan mamokpokan as tapok as nan chapan at inibili ay ukialen chi Judio. † <sup>9:7</sup> Luc. 3:19

"Lema met yangkiay ay tenapay ya chuwa ay filis nan wacha kan chakami sukúd kami a uy lomaku as kanun nan nauycha am-in ay tataku," ensongfatcha. <sup>14</sup> Kenalicha chi, tay nan filang nan lanaraki yangkiay at kiayud umuy as leman lifu.

Kenalen Jesus as nan disipulusna, "Patokorunyu chicha ay maam-among as henlelman pupuru." <sup>15</sup> Enatcha tit-iwa, at enpatokorcha nan am-in ay tataku. <sup>16</sup> As nan hiyachi enaran Jesus nan lema ay tenapay ya nan chuwa ay filis, ya nuntangad hiya ad chaya ay munyaman kan Apo Dios. Kun pay narpas, pinutput-ingna chachi, ya inchatna as nan disipulusna, ya nan disipulusna at inwarasca as nan tataku. <sup>17</sup> Nangan am-in nan tataku, at nasufucha. Haat amongun nan disipulus nan chinaancha ay namnu as nan hinpuru ya chuwa ay uppig.

### *Nan Infiakan Pedro Maepangkep Kan Jesus (Mat. 16:13-20; Mar. 8:27-29)*

<sup>18</sup> As nan namingsan ay naaangkiayan Jesus ay cha munkararag, naesnop nan disipulus kan hiya. Angkiay senarudsudna kan chicha, "Ngachana nan kanan nan tataku maepangkep kan ha-un?"

<sup>19</sup> Tinumforcha, "Kanan met nan tapina un he-a hi Juan ay Fumufunyag, ya kanan nan tapina un he-a hi Elias. Wacha pay nan mangali un usaka as nan chiyuchya pomapadtu ad pis-uy ay nataku manipud as nan utúy."

<sup>20</sup> Senarudsud Jesus kan chicha, "Ngem chakayu ngay? Ngachana nan kananyu maepangkep kan ha-un?"

Tinumfor hi Pedro, "He-a nan Cristo ay pinilen Apo Dios."

<sup>21</sup> Angkiay infilin Jesus ay ustу kan chicha ay maid poros mangifiagfiagancha as na. <sup>22</sup> Kenalina, "Nan Naepadtu ay Anak chi Taku at masapor muniliwas as ongor ay likiat. Achintu laychun nan anam-amá, anap-apon chi papachi, ya nan chiyuchya mun-isursuru as Lintig. Maepapatuytu hiya, ngem as nan maekatlu ay urkiw at matak manipud as nan utúy."

### *Nan Taku Ay Manglayad Ay Umunud Kan Jesus (Mat. 16:24-28; Mar. 8:34-9:1)*

<sup>23</sup> Angkiay kenalen Jesus as nan am-in, "Mu ngachana nan manglayad ay umunud kan ha-un at masapor ikinakna ay mangekaman as nan laylachuna, ya itiina nan korosna as inurkiw, haat umunud kan ha-un. <sup>24</sup> Tay nan uray ngachana ay mangepapati ay mangesarakan as fiyagna asna's luta at malitawnantu challu. Ngem nan uray ngachana ay manglitaw as fiyagna asna's luta kiapú as pammatina kan ha-un at maesarakantu. <sup>25</sup> Tay anan maaran nan taku ay mangkuwa as nan am-in ay wacha asna's luta, ngem malitaw winnu machachael challu hiya? <sup>26</sup> Tay nan ngachana ay mangifiain kan ha-un ya nan karkalek at ifaintu us nan Naepadtu ay Anak chi Taku hiya as nan omaliyana kasin ay mangepaila as nan kaichayawana ya nan kaichayawan nan Ama ya nan nasantowan ay anghellesna.<sup>‡</sup> <sup>27</sup> Ifiakiak kan chakayu nan tit-iwa ay wachacha nan tapina kan chakayu ay nangatakchug hena ay achintu matuy inkiana ilauncha nan muntorayan Apo Dios."

### *Nan Tinmukunan Nan Kail-an Jesus (Mat. 17:1-8; Mar. 9:2-8)*

<sup>28</sup> Kun pay kiayud waru ay urkiw as nan nangifiag-an Jesus as nan nauycha, entakin Jesus cha Pedro, Juan ya Santiago henan chuntug ta uycha munkararag. <sup>29</sup> As nan cha munkararakian Jesus, timukun chi kail-an chi

<sup>‡</sup> 9:26 Mat. 10:33

lupana, ya nan fiachuna at pinmukpukkawan ya kun sumili. <sup>30-31</sup> Kalina at ya nunpaila nan sumili ay chuwa ay lanaraki ay cha maketagtakiatfor kan hiya ay cha Moises kan Elias. Chacha apatun nan kiayud mangtongparan Jesus as nan pangkep Apo Dios kan hiya ay hiyachi nan uyna matuyan ad Jerusalem. <sup>32</sup> As nan hiyachi, naimugmug hi Pedro ya nan iib-ana, ngem kuncha pay finmangun, inilacha nan kaichayawan Jesus ya nan chuwa ay lanaraki ay naketatakchug kan hiya. <sup>33</sup> Kun pay cha mak-ak nan chuwa ay lanaraki as nan kawad-an Jesus, kenalen Pedro kan Jesus, “Apo, ammay paat ta wacha takú hena. Kun kami at mun-amma as turu ay fiawi, usa kan he-a, usa kan Moises ya usa kan Elias.” Kenalina chi, tay achina ammu nan chana kankanan.

<sup>34</sup> Kun pay cha munkarkali hi Pedro, wacha nan lifuu ay nangalenong kan chicha, at inmugyatcha as solet ay cha maabfongan as lifuu. <sup>35</sup> Wacha us nan kali ay nurpu as nan lifuu ay kanana, “Hi tona nan Anakku ay pinilek. Chumngor kayu kan hiya!” <sup>36</sup> Kun pay kinminak nan cha munkali, inilacha ay nauusa hi Jesus. Kuncha kinkinak nan disipulusna, ya as nan hiyachi ay timpu, maid nangifiagfiag-ancha as nan inilacha.

#### *Nan Nangepak-akan Jesus As Nan Anennet As Nan Onga (Mat. 17:14-18; Mar. 9:14-27)*

<sup>37</sup> As nan kafikiatana, chinmayyu cha Jesus ay nurpu henan chuntug, ya ongor nan tataku ay nanib-at kan hiya. <sup>38</sup> Kalina at ya infukiaw nan usa ay laraki ay naetatapi as nan tataku, “Misturu, ilaum man paat nan pototku ay laraki, tay kun us-usa ay pototku. <sup>39</sup> Tay as nan umchaan nan anennet kan hiya, kalina at ya cha lawá munfugfukiaw ya cha munkorchas hiya inkiana umusab nan tapakna. Paliwasana hiya as solet ya achina laychun ay taynan. <sup>40</sup> Nunpakpakaasiyak as nan nauycha disipulusmu ay epafoknagcha nan anennet, ngem achicha kafiaelan.”

<sup>41</sup> Tinumfor hi Jesus, “Nakkuran kayu ay tataku ad wani! Maid tit-iwa pammatiyu ya nunkasokel kayu! Anan kafayag chi mawawad-ak ya tataunku kan chakayu? Iyalem man hena nan pototmu.”

<sup>42</sup> Kun pay cha maesnop nan onga kan Jesus, inturcun nan anennet hiya as nan luta ya nunkorchasuna. Ngem finilin Jesus nan anennet ay fomoknag, at enmammay nan onga. Angkiay ya inpurangna nan onga as nan amana.

<sup>43</sup> Am-in nan tataku at naschaawcha as nan inilacha ay pannakafialin Apo Dios.

#### *Nan Nangifiag-an Kasin Jesus As Nan Katayana (Mat. 17:22-23; Mar. 9:30-32)*

Kun pay cha masmaschaaw nan tataku as nan am-in ay enat Jesus, kenalina as nan disipulusna, <sup>44</sup> “Achiyu liqliw-an nan nauy ifiakiak kan chakayu: Nan Naepadtu ay Anak chi Taku at maipurangtu as nan tataku.”

<sup>45</sup> Ngem chaancha naawatan nan nauy infiakiana, tay naililingub kan chicha ta achicha maawatan, ya umugyatcha ay manarudsud kan hiya as nan maepangkep as nan nauy infiakiana.

#### *Nan Kaamuchan As Nan Muntorayan Apo Dios (Mat. 18:1-5; Mar. 9:33-37)*

<sup>46</sup> Wacha nan nunlapu ay susuma as nan disipulus Jesus mu ngachana kan chicha nan kaamuchan. <sup>47</sup> Ngem kiapú ta ammon Jesus nan chacha numnumnumun, enayakiana nan usa ay onga ya enpatakchugna as nan

sag-una. <sup>48</sup> Kenalina kan chicha, “*Nan uray ngachana ay mang-awat kan tona ay onga kiapú as pammatica kan ha-un at ha-un nan awatuna. Nan uray ngachana ay mang-awat kan ha-un at awatuna nan nangifiaor kan ha-un. Tay nan taku ay kaapuchan kan chakayu am-in at hiya nan kaamuchan.*”

### *Nan Achi Komontra Kan Chakayu At Kadwayu (Mar. 9:38-40)*

<sup>49</sup> Tinumfor hi Juan, “Apo, inilami nan usa ay taku ay cha mangosar as ngachanmu ay mangepafoknag as nan chiyuycha anennet. Enpawami, tay fiakun takú met kadwa hiya.”

<sup>50</sup> Ngem kenalen Jesus kan Juan ya as nan tapen nan disipulusna, “*Achiyu epawa, tay nan taku ay achi komontra kan chakayu at kadwayu.*”

### *Nan Chaan Nangepachawusan Nan I-Samaria Kan Jesus*

<sup>51</sup> Kun pay kiayud umchan nan timpu ay maetag-uyan Jesus ad chaya, epapatina ay umuy ad Jerusalem. <sup>52</sup> Isunga enpaon-onana nan tapen nan tataku henan usa ay fiabruy nan i-Samaria\* ta chacha esakiana nan munchawsana. <sup>53</sup> Ngem chaan lenayad nan umiili hid-i ay chumawus hi Jesus as kawad-ancha, tay aammucha ay ad Jerusalem nan ay-ayana. <sup>54</sup> Kun pay inilan cha Santiago kan Juan ay disipulusna nan enat nan i-Samaria, kenalicha kan Jesus, “Apo, ay laychum ay ayakianmi nan apuy ay murpu ad chaya ay komnopay ay mamuor kan chicha?” <sup>55</sup> Ngem nunsakong hi Jesus ya senengarana chicha. <sup>56</sup> Angkiay ya inmuycha henan tukún ay fiabruy.

### *Nan Masapor Ay Atun Nan Umunud Kan Jesus (Mat. 8:19-22)*

<sup>57</sup> As nan chacha umyan, kenalen nan usa ay laraki kan Jesus, “Umunuchak kan he-a uray kumpurmi as ay-ayam.”

<sup>58</sup> Tinumfor hi Jesus kan hiya, “*Wachay lungug ay omafongan nan chiyuycha fuwus, ya wachay somollongan nan chiyuycha kossel, ngem maid ustu as massuyan nan Naepadtu ay Anak chi Taku.*”

<sup>59</sup> Kenalen Jesus as nan usa pay ay taku, “*Umunudka kan ha-un.*” Ngem kenalen nan taku, “Apo, awni pay ta uyku ilufok on-oná hi amak.”

<sup>60</sup> Tinumfor hi Jesus kan hiya, “*Pay-am. Kikiad nan chiyuycha maid pammatica ay maepachong as nan nunkatuy nan uy mangilufok as nan pacchongcha ay nunkatuy. Ngem kun pay he-a, uymu at ekasaba nan maepangkep as nan muntorayan Apo Dios.*”

<sup>61</sup> Kenalen nan tukún ay taku, “Apo, umunuchak kan he-a, ngem awni pay a ta uyak munpakacha on-oná as nan pamilyak.”

<sup>62</sup> Ngem kenalen Jesus, “*Nan taku ay mangelapu ay mun-arachu ya kun cha munsakosakong at achi maekari ay maetapi as nan muntorayan Apo Dios.*”

## 10

### *Nan Nangifiaoran Jesus As Nan Piton Puru Ya Chuwa Ay Disipulusna*

<sup>1</sup> Kun pay narpas chi, nunpili hi Jesus as piton puru ya chuwa pay ay disipulusna, ya infiaorna chicha ay mahinchudwa ay mangon-oná ay umuy henan am-in ay ili ya lukiar ay ay-ayanantu. <sup>2</sup> Kenalina kan chicha, “*Ongor chi maani, ngem akét chi mun-aní. Isunga ekararagyu as nan nunkuwa as nan maani ta umifiaor hiya as tapina pay ay mun-aní.*” <sup>3</sup> Uy kayu! Ifiaorku chakayu

\* <sup>9:52</sup> Munififinnusor nan chiyuycha i-Samaria ya nan chiyuycha Judío. Jn 4:9; 8:48

ay maepachong as nan naamu ay kordero as nan kawad-an nan chiyuycha kauugyat ay atap ay asu. <sup>4</sup> Achi kayu ometakin as petaka, samfiag winnu saptos ay munsokatanyu. Achiyu iyaw-awni as nan charan ay maketagtakiatfor as kumpurmi. <sup>5</sup> As nan uray ngachana ay afong ay sungkpanyu, kananyu on-onu un, ‘Nan natalna ay numnum nan mawawacha koma kan chakayu ay hinfiaruy.’ <sup>6</sup> Mu awatun nan nakin afong nan hana bendisyon ay infiakiayu, mabendisyonantu hiya. Ngem mu achina awatun, achintu mabendisyonan. <sup>7</sup> Mayassa kayu as nan hana ay afong. Kanunyu ya ikopuryu nari ichatcha kan chakayu, tay nan munchunu at maeckari ay malagfuwan. Achi kayu munattoation as afong ay chumawusanyu. <sup>8</sup> As nan umuyanyu henan usa ay ili ya mangiliyun chakayu, kanunyu nan makan ay esakianacha para kan chakayu. <sup>9</sup> Paammayunyu nan munsaket ay wacha hid-i ay ili, ya kananyu kan chicha, ‘Kiayud umchan nan muntorayan Apo Dios kan chakayu.’ <sup>10</sup> Ngem as nan umuyanyu henan usa ay ili ya achi chakayu mangiliyun, umuy kayu as nan chiyuycha korsa, ya kananyu un, <sup>11</sup> ‘Uray nan tapok nan iliyu ay naepkat as nan chapamni at pokpokanmi ay mangepaila ay maid fiyangmi as nan manusaan Apo Dios kan chakayu.’ Ngem uray mu hiyasa, achiyu liwliw-an ay kiayud umchan nan muntorayan Apo Dios kan chakayu. <sup>12</sup> Ifiakiak kan chakayu ay as nan hana ay urkiw ay mang-okomán Apo Dios as nan katakutaku, narakrakantu nan chusan nan chiyuycha i-Sodoma mu nan umiili hesa.”\*

### Nan Chiyuycha Achi Omafurot Ay Tataku (Mat. 11:20-24)

<sup>13</sup> Inturuy Jesus, “Kasusug-ang kayu ay i-Corazin ya i-Betsaida! Tay mu ad Tiro ya ad Sidon nan nangekamanak as nan hanacha amud ay nakaskaschaaw ay enkamkamanku kan chakayu, nunfiafiawicha at koma ay nangatokor ay nangafiachu as saku ya nachachapor. <sup>14</sup> Ngem as nan urkiw ay mang-okomán Apo Dios as nan katakutaku, narakrakantu nan chusan nan chiyuycha i-Tiro ya i-Sidon mu chakayu. <sup>15</sup> Chakayu ngay ay i-Capernaum, ay kananyu un maichayaw kayu ad chaya? Achi! Awni at kun kayu maichus-or ad inferno.”

<sup>16</sup> Kenalen pay Jesus as nari disipulusna, “Nan taku ay chumngor kan chakayu at kan ha-un nan chumngorana, ya nan mangachi kan chakayu at ha-un nan achiyuna. Kun pay nan mangachi kan ha-un at hi Apo Dios ay nangifaor kan ha-un nan achiyuna.”

### Nan Nunfiangchan Nan Piton Puru Ya Chuwa

<sup>17</sup> As nan nunfiangchan nan piton puru ya chuwa ay infiaor Jesus, ongor chi lagsakcha, ya kanancha kan Jesus, “Apo, uray nan chiyuycha anennet at enmafurotcha kan chakami as nan nangifilinanmi kan chicha ay fomok-nagcha as nan nangosaranmi as nan ngachanmu.”

<sup>18</sup> Kenalen Jesus kan chicha, “Inilak nan enat Satanas ay nag-as, at kaman as nan fiakilat ay nurpu ad chaya. <sup>19</sup> Chumngor kayu! Enettak chakayu as kalibfengan ay mangikiatin as nan chiyuycha urug ya chiyuycha scorpion, ya mangamis as nan am-in ay pannakafialin nan kafusoryu ay hi Satanas. Maid mangisiw ay ommat kan chakayu. <sup>20</sup> Ngem achi kayu koma munlagsak kiapú ta nunpaetoray nan chiyuycha anennet kan chakayu, kun at nan munlagsakanyu at kiapú ta naisurat nan ngachanyu ad chaya.”

\* <sup>10:12</sup> Gen. 19:1-29; Isa. 1:9-10; 3:9; Jer. 23:14; Mat. 10:15; Pal. 11:8

**Nunlagragsak Hi Jesus  
(Mat. 11:25-27; 13:16-17)**

**21** As nan hiyasa ay uras, enpalagragsak nan Espiritu Santo hi Jesus, ya kanana, “*Ama ay Apo ad chaya ya asna's luta, munyamanak kan he-a, tay en-pakaammom as nan chiyuycha chaan nakaachar nan nauycha entatafunmu as nan chiyuycha mamasilib ya nakaachar.* O, Ama, enatmu na, tay hiyana nan mangepalayayad kan he-a.”

**22** “*Nan am-in at entalek Ama kan ha-un. Maid nangammu as nan Anak omangkiay nan Ama. Assesa us ay maid nangammu as nan Ama omangkiay nan Anak ya nan piliyun nan Anak ay mangepakaammuwana.*”

**23** Kun pay narpas sa, nunsakong hi Jesus as nan disipulusna as nan naaangkiayancha, ya kanana “*Nakiasat nan tataku ay mangila as nan chayu il-ilaun.* **24** *Ifiakiak kan chakayu ay ongor kayman chi pomapadtu ya ar-ari ay nunlarayad ay mangila as nan chayu il-ilaun, ngem chaancha inila. Lenayadcha us ay manngor as nan chayu chungchungrun, ngem chaancha chinngor.*”

**Nan Maepadpachongan Nan Ammay Ay I-Samaria**

**25** Wacha nan usa ay mun-isursuru as Lintig ay inmuy kan Jesus ta chistinguna hiya. Kenalina, “Misturu, ngachana nan atok ta tawichok nan fiyag ay maid patingkiana?”

**26** Tinumfor hi Jesus kan hiya, “*Ngachana nan naisurat as nan Kalen Apo Dios? Ngachana nan mangawatmu?*”

**27** Tinumfor hiya, “Masapor laylaychum nan Apo ay Diosmu as nan am-in ay pusom, as nan am-in ay katatakom, as nan am-in ay fikasmu, ya as nan am-in ay numnummu. Masapor us laylaychum nan pachongmu ay taku ay kaman as nan atum ay manglaylayad as achormu.”†

**28** “*Ustu nan ensongfiatmu,*” kenalen Jesus, “*Hiyasa nan atum, at matakuka in-inkiana.*”

**29** Ngem lenayadna ay mangekalintikian as achorna, isunga kenalina kan Jesus, “*Ngachana man nan sasag-unku?*”

**30** Tinumfor hi Jesus babaen as nan maepadpachongan: “*Wacha nan usa ay taku ay cha chumayyu ad Jerico ay nurpu ad Jerusalem. As nan korsa, kalina at ya finchang chi homohold-ap hiya. Enaracha nan am-in ay wacha kan hiya, uray nan fiachuna, ya penak-opak-orcha inkiana kiayud matuy. Angkiay ya tenaynancha hiya.* **31** *Wacha nan pachi ay naiyaspor ay cha chumayyu as nan hana ay korsa. Kuna pay inila nan chiyuy taku, nunliglig hiya.* **32** *Assesa us as nan Levita†ay kun pay inumchan as nan kawad-an nan chiyuy taku ya inilana hiya, nunliglig hiya.* **33** *Ngem as nan nar-osan us nan usa ay i-Samaria ay cha munfiaat as nan kawad-an nan chiyuy taku ya inilana hiya, nasug-ang as solet hiya.*§ **34** *Naesag-un, ya kenapuwana hiya as lana ya fiayas, angkiay finudfuchana nan sukiatna. Kun pay narpas, ensakayna hiya as nan dongki, ya inyuyna as nan chumawchawsan chi munfiaat, angkiay enaywanana hiya.* **35** *As nan kafikiatana, inchatna nan chuwa ay dinario as nan nakin kuwa as nan chumawchawsan, ya kanana kan hiya, ‘Aywanam hiya. As nan munfiangchak hena, fiyachaktu mu kaatna pay nan kinastosmu.’*”

† **10:27** Deut. 6:5; Lev. 19:18; Prov. 3:29      ‡ **10:32** Nan chiyuycha Levita at chicha nan mamadfiachang as nan pachi as nan Templo.      § **10:33** Luc. 9:52-53; Jn. 8:48

<sup>36</sup> Inyanongos Jesus, “As nan munnunumnummu, ngachana kan chatud-i ay turu nan tit-iwa ay sag-un nan chiyuy taku ay penak-opak-or nan chiyuycha homohold-ap?”

<sup>37</sup> Tinumfor nan mun-isursuru as Lintig, “Ya kakun nan chiyuy taku ay nanug-ang kan hiya.”

Kenalen Jesus, “Uyka ngarud, ya assid-i us nan atum.”

### *Nan Uy Nangfisitaan Jesus Kan Cha Marta Kan Maria*

<sup>38</sup> As nan cha munfiaatan Jesus ya nan disipulusna, inumchancha henan usa ay fiabruy. Wacha hid-i nan fiafai ay nan ngachana at Marta ay nangmangili kan chicha.\* <sup>39</sup> Wacha nan enauchina ay nan ngachana at Maria ay temokor as nan sag-un nan suken Jesus ya cha chumchumngor as nan cha isursuron Jesus. <sup>40</sup> Ngem kun pay hi Marta, cha maseksekoran, tay hiya yangkiay nan cha mun-esakiana as kanuncha. Isunga inmuy hiya kan Jesus, ya kanana, “Apo, ay achim pakian-anu uray mu tenaynanak as nan ifiak, at kunku iyuusa ay mannu as nan nauycha am-in ay chunu? Ifiakiam pay kan hiya ta fiadnganak.”

<sup>41</sup> Ngem tinumfor hi Jesus kan hiya, “Marta, Marta! Chaka machan-chanakian ya malilifokan as maepangkep as ongor ay fianag, <sup>42</sup> ngem kun met usa yangkiay nan kasaporan. Pinilen Maria nan kaammayan, at achintu makakkaan kan hiya.”

## 11

### *Nan Insuron Jesus Ay Atun Ay Munkararag (Mat. 6:9-13; 7:7-11)*

<sup>1</sup> As nan hin-urkiw, cha munkarkararag hi Jesus henan usa ay lukiar. Kun pay narpas, kenalen nan usa ay disipuluna, “Apo, isurom pay chakami ay munkararag, kaman as nan enat Juan ay Fumufunyag ay nangisuru as nan disipulusna.”

<sup>2</sup> Kenalen Jesus kan chicha, “As nan munkarakianyu, assena nan kananyu:

‘Ama, maichaychayaw koma nan nasantowan ay ngachanmu. Omali koma nan muntorayam.

<sup>3</sup> Ichatmu koma kan chakami nan kanunmi as inurkiw.

<sup>4</sup> Pakawanum koma chakami as nan fiasfiasormi, tay pakawanunmi us nan am-in ay finmasor kan chakami. Achim koma eparufus ay etorokmi ay masulisukian.’”

<sup>5</sup> Kenalen pay Jesus, “Mungay wacha nan usa kan chakayu ay umuy as afong nan usa ay kiayyumna as nan tongan chi lafi, ya kanana kan hiya. ‘Kiayyum, umutangak pay as turu ay tenapay, <sup>6</sup> tay wacha nan cha munfiaat ay kiayyumku ay chinmawus ya naiyaspor ay maid epakanku kan hiya.’ <sup>7</sup> Mu ngay kanan nan kiayyummua wacha as fieruy un: ‘Achika at man chumisturfu, tay naichachakig at nan unub ya inuumfug kami as nan an-akku. Achiyak challu fumangun ay umichat as makan kan he-a.’ <sup>8</sup> Ifiakiak kan chakayu ay uray mu achi fumangun ay umichat as makan kiapú ta kiayyummua hiya, ngem kiapú ta cham itukiatukia ay chumawat, fumangun challu ya ichatna nan am-in ay kasaporan.

<sup>9</sup> “Isunga ifiakiak kan chakayu ay achiyu ikinkinak ay chumawchawat kan Apo Dios as kasaporanyu, at maichattu kan chakayu nan chayu

---

\* **10:38** Jn. 11:18-19

chawchawatun. Achiyu ikinkinak ay mun-an-anap, at maanapanyuntu nan chayu an-anapun. Achiyu ikinkinak ay munkokkokkok, at tokafiantu Apo Dios nan pantiw para kan chakayu. <sup>10</sup> Tay am-in ay chumawat kan Apo Dios at maawatna nan chawatuna, ya nan mun-anap at makaanap, ya nan munkokkok at matkafian nan pantiw para kan hiya. <sup>11</sup> Ngachana kan chakayu ay am-a nan mangichat as urug mu chumawat nan pototyu as kiachiw, <sup>12</sup> winnu mangichat as scorpion mu chumawat as itlug? <sup>13</sup> Mu chakayu ay manangotettet at ammuyu ay umichat as ammay as nan an-akyu, ay achi kaskasin ay ichat Ama ay wacha ad chaya nan Espiritu Santo as nan chiyuchcha chumawat kan hiya?”

### *Hi Jesus Ya Hi Beelzebub*

(Mat. 12:22-30; Mar. 3:20-27)

<sup>14</sup> As nan hin-urkiw, cha mun-epafoknag hi Jesus as anennet ay nang-umor as nan usa ay taku. Kun pay fenmoknag nan anennet, makakali at nan hana ay taku, at naschaawcha nan tataku. <sup>15</sup> Ngem nan tapina kan chicha at kenalicha, “Hi Beelzebub ay ap-apon chi anennet nan nangichat kan hiya as pannakafialin ay mangepak-ak as anennet.” <sup>16</sup> Kun pay nan tapina at lenayadcha ay manisting kan Jesus. Isunga chinmawatcha as nakaskaschaaw ay sinyar ay mangepanének ay hiya at nurpu kan Apo Dios.

<sup>17</sup> Ngem ammon Jesus nan chacha numnumnumun, isunga kenalina kan chicha, “Uray ngachana ay muntorayan ay munkikinnufiat chi tatakuna at machachael. Kaman us as nan hinfiaruy ay mu masusumacha at masisiyan-cha. <sup>18</sup> Mu makepatuy hi Satanas as nan chiyuchcha anennet ay etorayana, anan atuna ay munturturuy ay muntoray in-inkiana? Kenalek sa, tay kananyu un hi Beelzebub nan nangichat as pannakafialinku ay mangepafoknag as nan chiyuchcha anennet. <sup>19</sup> Mu as nan pannakafialin Beelzebub nan nangor-ak as pannakafialinku ay mangepafoknag as nan chiyuchcha anennet, ngachana ngay nan nangichat as pannakafialin nan chiyuchcha umun-unud kan chakayu ay mun-epafoknag as nan chiyuchcha anennet? Mu hiyasa, chicha nan mangepanének ay achi tit-iwa nan kenaliyu. <sup>20</sup> Nan kenatit-iwana at fiakun hi Beelzebub, ngem hi Apo Dios nan nangichat as pannakafialinku ay mun-epafoknag as nan chiyuchcha anennet. Hiyana nan mangepaila ay enmali nan muntorayan Apo Dios kan chakayu.”

<sup>21</sup> “Mu naarmasan ay ustu nan usa ay kursi ay taku ya fiantayana nan afongna, maid maak-akiw as nan kuk-uwana. <sup>22</sup> Ngem mu omali nan kurkursi ay taku ay makepatuy ya amisuna hiya, arauña nan am-in ay armas ay muntal-talekan nan kursi ay anchi. Angkiay ya enpakakchang nan hana kurkursi nan enakiwua.

<sup>23</sup> “Nan ngachana ay achi makius-usa kan ha-un at komokontra kan ha-un. Assesa us ay nan ngachana ay achi fumachang kan ha-un ay mangamong as nan tataku at kuna munsisiyanun chicha.”

### *Nan Munfiangchan Nan Anennet*

(Mat. 12:43-45)

<sup>24</sup> Nun-epadpachong pay hi Jesus, “As nan fenmoknakian nan anennet ay sinungkop as nan taku, uy munlikud hiya henan luglukiar ay kamaid chi chanum ay mun-anaanap as tukún ay mun-iblayana, ngem maid uchanana. Angkiay ya kanana as numnumna, ‘Munfiangachak challu as nan afongku ay nurpuwak.’ <sup>25</sup> As nan munfiangchana, uchanana ay nacharos ya naornos nan

afong. <sup>26</sup> Angkiay ya mak-ak ya ometakin as tapina ay pitu ay anennet ay kaskasin manangotettet mu hiya. Sungkopcha as nan afong ya magyancha hid-i. As nan hiyachi, kaskasin mangisiw nan kasasaad nan chiyuy taku mu nan enmon-oná ay kasasaadna.”

#### *Nan Tit-iwa Ay Nakiasat*

<sup>27</sup> Kun pay kenalen Jesus chaná, nunfukiaw nan usa ay fiafiai ay wacha as nan kaongoran chi tataku, ya kanana kan hiya, “Nakiasat paat nan nangiyarak ya nangepasusu kan he-a!”

<sup>28</sup> Ngem kenalen Jesus, “Kun at nan nakiasat at nan chiyuchya manngor as nan kelen Apo Dios ya mangtongpar as sa.”

#### *Nan Chawat Ay Omepaila Hi Jesus As Nakaskaschaaw*

(Mat. 12:38-42)

<sup>29</sup> Kun pay cha omongor chi tataku, inturuy Jesus, “Nakkuran! Anuy paat mangotettet chi ukialen chi tataku ad wani! Chacha chumawat as nakaskaschaaw ay sinyar, ngem maid maepaila kan chicha omangkiay nan nakaskaschaaw ay enommat kan Jonas ay pomapadtu. <sup>30</sup> Kaman as nan nunfialinan Jonas as sinyar ay naepaila as nan tataku ad Nineve at assesa us ay munfialintu nan Naepadtu ay Anak chi Taku as sinyar ay maepaila as nan tataku ad wani. <sup>31</sup> As nan urkiw ay mun-okomán Apo Dios, tomakchugtu nan Reyna ad Seba ad pus-uy ay mangepafiasor as nan tataku ad wani, tay nurpu hiya henan achaachawwi ay lukiar ay uy paat nanngor as nan nainsilifian ay sursuron Solomon. Ifiakiak kan chakayu ay wacha hena ad wani nan am-amud mu hi Solomon. <sup>32</sup> As nan omaliyantu nan urkiw ay mun-okomántu Apo Dios as nan am-in ay tataku, tomakchugtu nan inmiili ad Nineve ay mangepafiasor kan chakayu ay tataku ad wani, tay nunfiafiawicha as nan fiasfiasorcha as nan nanngorancha as nan enkaskasaban Jonas. Ifiakiak kan chakayu ay wacha hena ad wani nan am-amud mu hi Jonas!”\*

#### *Nan Maepadpachongan Nan Pingki*

(Mat. 5:15; 6:22-23)

<sup>33</sup> Inturuy Jesus, “Maid mamaskud as pingki ya ilingub winnu uyna op-opan as fianga. Ngem kuna at epatang as nan maepatpatngan ta nan chiyuchya sungkop at ilauncha nan silaw. <sup>34</sup> Nan matam at hiyasa nan maepachong as nan silaw nan achormu. Mu narawag nan umil-an nan matam, nasilawan nan intiru ay achormu. Ngem mu achi narawag nan umil-an nan matam, ngongot as solet nan achormu. <sup>35</sup> Isunga il-ilauum ngarud ta nan silaw nan wacha kan he-a, fiakun nan ngongot. <sup>36</sup> Mu nan intiru ay achormu at narawag ay maid poros ngongot, narawagtun nan intiru ay achormu ay kaman chaká sinisilawan as nan lawag nan silaw.”

#### *Nan Nanengaran Jesus As Nan Chiyuchya Fariseo Ya Mun-isursuru As Lintig*

(Mat. 23:1-36; Mar. 12:38-40)

<sup>37</sup> Kun pay cha munkarkali hi Jesus, enayakian nan usa ay Fariseo hiya ta makekan kan hiya. Isunga inmuy hi Jesus as nan afong nan Fariseo, ya naketokor ay makekan. <sup>38</sup> Nakudnor nan chiyuy Fariseo as nan nangil-ana ay chaan nunfuró on-oná hi Jesus sakbay mangan ay maiyunud as nan iniili ay ukialicha. <sup>39</sup> Ngem kenalen Apo Jesus kan hiya, “Chakayu ay Fariseo at kaman kayu as nan tataku ay manguras as nan luwar yangkiay nan tasa ya

\* **11:32** Jon. 3:5

paratu, ngem achiyu met charosan nan numnumyu ay napnu as kenaakum ya kenamangotettet! <sup>40</sup> Chakayu ay nunkangokngok! Ay fiakun hi Apo Dios ay nangamma as nan anchor takú nan nangamma us as nan numnum takú? <sup>41</sup> Kunyu at ichat as nan makasapor nan wacha as nan tasa ya paratuyu. Tay mu atunyu sa, tit-iwa ay nacharos kayu.

<sup>42</sup> “Kasusug-ang kayu ay Fariseo, tay ichatonyu met tit-iwa nan pagkapuron nan apetyu ay kaman as nan chiyuycha mangepaammay as machangchang, ngem enganuyyu met nan kenalintig ya nan layadyu kan Apo Dios. Chatona nan masapor ay atunyu, ya achiyu challu enganuy ay mangekaman as nan tapina.”<sup>†</sup>

<sup>43</sup> “Kasusug-ang kayu ay Fariseo, tay nan laylaychunyu ay tomoktokoran at as nan kaammayan ay tokoran as nan senagoga, ya laylaychunyu us ay cha chakayu risrispituwun as nan tataku as nan chiyuycha mun-el-elakwan.

<sup>44</sup> “Kasusug-ang kayu ay Fariseo, tay maepachong kayu as nan chiyuycha lufok ay maid matoncha ay cha ikiatkiatin chi tataku, tay achicha ammu ay lufok.”

<sup>45</sup> Usa as nan mun-isursuru as Lintig nan nanfor kan Jesus, “Misturu, as nan nangaliyam as sa, cham us pabpfaiinan chakami.” <sup>46</sup> Kenalen Jesus, “Kasusug-ang kayu us ay mun-isursuru as Lintig, tay ongor chi lintigyu ay chayu epadpad-un as nan tataku ay achicha kafaelan, ya achiyu met uyachun chi uray us-usa paat ay kiayyamotyu ay fumachang kan chicha.

<sup>47</sup> “Kasusug-ang kayu, tay iyammaanyu as anam-ammay ay lufok nan chiyuycha pomapadtu ay penatuy nan kaap-uwanyu. <sup>48</sup> Ngem as nan mangekamkamananyu as sa, epailayu ay iyafudyu nan enkamkaman nan kaap-uwanyu, tay penatuycha chicha, ya iyam-ammaanyu chicha as lufokcha. <sup>49</sup> Hiyana nan mangepaila ay masilib hi Apo Dios, tay kenalina ad pus-uy un, ‘Ifiaorkuntu kan chicha nan chiyuycha pomapadtu ya apostoles, ngem patayunchantu nan tapina kan chicha ya palikiatunchantu nan tapina.’

<sup>50</sup> Isunga chakayu ay tataku ad wani nan machusantu kiapú as nan napatuyan nan am-in ay pomapadtu nunlapu as nan nafiyangan nan luta, <sup>51</sup> nunlapu as nan natuyan Abel inkiana as nan natuyan Zacarias ay napatuy as nan nunkiakiaw-an nan altar ya nan nasantowan ay kuwartu as nan Templo. Ifiakiak kan chakayu, tit-iwa ay machusantu nan tataku ad wani kiapú as nan penmatpatuyan nan kaap-uwancha.”<sup>‡</sup>

<sup>52</sup> “Kasusug-ang kayu ay mun-isursuru as Lintig, tay kenaanyu nan torfek ay mankab as nan pantiw nan mangammuwan as nan kalen Apo Dios. Chakayu ay mismu at chaan kayu sinungkop ya empawayu pay ay sungkop koma nan tataku.”

<sup>53</sup> Kun pay cha mak-ak hi Jesus as nan chiyuy ay lukiar, enlapon nan mun-isursuru as Lintig ya nan chiyuycha Fariseo ay kaskasin mangsot kan hiya. Ongor us chi senarudsudcha kan hiya, <sup>54</sup> tay laychuncha ay wachay kanana as mangepafiasorancha kan hiya.

## 12

*Nan Tukun As Nan Kenapakamankaman  
(Mat. 10:26-27)*

† **11:42** Lev. 27:30; Deut. 14:22    ‡ **11:51** Gen. 4:8; 2 Cro. 24:20-22

<sup>1</sup> As nan cha ommatan nan nauycha, cha somaliyubyub nan liniblifu ay tataku ay uray kuncha cha munkikinnatin. Kenalen Jesus on-onan disipulusna, “Il-ilaunyu nan lebaduran nan chiyuycha Fariseo ay hiya nan ukialicha ay kenapakamankaman. <sup>2</sup> Maid naililingub ay achintu maepaila, winnu naetatafun ay achintu maammuwani. <sup>3</sup> Isunga mu ngachana nan infiagfiakiayu as nan lafi, madngortu as nan kaorkia. Nan intubtfuyu as nan kawad-anyu as nan naiin-ub ay kuwartuyu at maifukiatwu as nan chiyuycha charan ta chungrun nan ongor ay tataku.”

### Nan Ustu Ay Umugyatnan Taku (Mat. 10:28-31)

<sup>4</sup> Kenalen Jesus as nan disipulusna, “Ifiakiak kan chakayu ay kiakiayyumku, achi kayu umugyat as nan chiyuycha mangpatuy as anchor, tay as nan marpasan tosa at maid kasincha atun. <sup>5</sup> Ngem ifiakiak nan umugyatanyu: Nan umugyatanyu at kan Apo Dios ay wachay pannakafialina ay mangichus-or as nan anchor ad inferno as nan manglopasana ay mangpatuy. O, tit-iwa, ifiakiak kan chakayu ay hiya nan masapor umugyatanyu. <sup>6</sup> Ilaunyu nan chiyuycha tulin. Ay achi nan lema at maelaku as kun lawá chuwa ay pesos? Maelaku met! Uray akéti chi fiarorcha at maid challu liwliw-an Apo Dios as uray usa kan chicha. <sup>7</sup> Uray nan fook as uruyu at naffilangcha am-in. Isunga achi kayu umugyat, tay nafiarfiaror kayu mu nan ongor ay tulin.”

### Nan Mangipudnu Ya Nan Mangesaot As Nan Maepangkep Kan Cristo (Mat. 10:32-33; 12:32; 10:19-20)

<sup>8</sup> Kenalen pay Jesus, “Ifiakiak kan chakayu ay nan uray ngachana ay mangipudnu as nan sangwanan nan tataku ay hiya at omafurot kan ha-un, assesantu us ay ipudnuntu nan Naepadtu ay Anak chi Taku nan maepangkep kan hiya as nan sangwanan nan anghelles Apo Dios. <sup>9</sup> Ngem nan mangesaot kan ha-un as nan sangwanan nan tataku at maesaottu us as nan sangwanan nan anghelles Apo Dios.

<sup>10</sup> “Nan ngachana ay munkali as maifusor as nan Naepadtu ay Anak chi Taku at maefalin ay mapakawan. Ngem nan munkali as maifusor as nan Espiritu Santo at achi mapakawan.

<sup>11</sup> “As nan mangicharuman nan tataku kan chakayu as nan sangwanan nan anap-apu as nan chiyuycha senagoga winnu as nan gogobernador winnu as nan wacha as nan toray, achi kayu machanchanakian mu anan atunyu ay somongfiat winnu ngachana nan kananyu. <sup>12</sup> Tay as nan hiyasa ay timpu at isuruntu nan Espiritu Santo nan ustus ay kananyu.”

### Nan Maepadpachongan Nan Narokrok Ay Fiaknang

<sup>13</sup> As nan kaongoran chi tataku, wacha nan usa ay laraki hid-i ay nangali kan Jesus, “Misturu, ifiakiam as nan sunúdku ay kudwaunmi nan enpatawid chin amami kan chakami.”

<sup>14</sup> Ngem kenalen Jesus kan hiya, “Ay kun kayong ha-un nan wachay kalibfengana ay mangenongnong winnu mangudwa as tawidyu? Fiakun.”

<sup>15</sup> Angkiay ya inturuy Jesus ay mangali as nan am-in ay tataku, “Il-ilaunyu ta achi kayu masursulisukian as nan am-in ay kenaakum, tay fiakun nan kaongor nan kuk-uwan nan taku nan mail-an nan tit-iwa ay fiyagna.”

<sup>16</sup> As nan hiyachi, infiakian Jesus kan chicha nan nauy ay maepadpachongan: “Wacha nan usa ay fiaknang ay ongor nan enanina as payyiwna.”

<sup>17</sup> Kenalina as numnumna, ‘Anan atok ngun, t’enha maid mangepay-ak as nan ongor ay enanek? <sup>18</sup> O, iwa, assena nan atok: Soktafok nan chiyuycha arangku

*ya munkiaufiak as an-anad-acha. Hid-i nan mangepay-ak as nan am-in ay enanek ya tapina pay ay kinakok.’<sup>19</sup> Angkiay ya kanaktu as achorku, ‘Ongor nan intupugku ay kasaporak ay ommat as kaat ay tawwun. Kunak mun-ib-blai, mangmangan, umig-ikop, ya munlagragsak.’<sup>20</sup> Ngem kenalen Apo Dios kan hiya, ‘Narokrok! Ad wani ay lafi, matuy ka. Anan manguwa pay as nan intutupugmu?’”*

*21 Inyanongos Jesus, “Assesa nan ommat as nan taku ay cha mun-ituputupug as kenafiaknang as para kan hiya, ngem pugli hiya as nan mangilan Apo Dios.”*

#### *Hi Apo Dios Yangkiay Nan Matalek (Mat. 6:25-34)*

*22 Kenalen Jesus as nan disipulusna, “Isunga ifiakiak kan chakayu ay achi kayu machanakian as maepangkep as pagfiyagyu mu anan kanunyu, winnu machanakian as nan maepangkep as nan achoryu mu anan ifiachuyu.<sup>23</sup> Tay nan fiyag at am-amud mu nan makan, ya nan anchor at am-amud mu nan fiachu.<sup>24</sup> Numnumunyu nan chiyucha kossel. Achicha muntanum winnu mun-aninya maid fiarugcha winnu arangcha. Uray mu hiyasa, pakanun challu Apo Dios chicha. Am-amud kayu met mu nan nauycha kossel!<sup>25</sup> Ngachana kan chakayu nan makafael ay mangepaan-anchu as fiyagna as uray kun usa ay uras kiapú as nan chana munchanchanakian.<sup>26</sup> Mu achiyu kafaelan ay mangekaman as ak-akettuy ay kaman as nan hana, anuy kayu lawá machanakian as maepangkep as tapina?*

*27 “Ilaunyu nan atun nan sabsafong ay masikun. Achicha munchunu winnu mun-afor as fiachucha. Uray mu hiyasa, ifiakiak kan chakayu ay uray hi Ari Solomon as nan am-in ay kenafiaknangna at chaan poros nunfiachu as maepachong as nan kenaam-ammay nan usa as nan nauycha sabsafong.<sup>28</sup> Mu fiachuwan Apo Dios nan nauycha lukiam ay wacha as uma ad wani ya as wiet at mapuoran challu, ay achina chanman kaskasin fiachuwan chakayu mu nan nauycha? Anuy paat anak-akettuy chi pammatiyu!<sup>29</sup> Kiapú ta assesa, achi kayu cha munnumnunnum as kanunyu ya ikopunyu, ya achi kayu munchanag.<sup>30</sup> Tay nan nauycha nan cha anaanapun nan chiyucha Gentil ay achi nangammu kan Apo Dios. Ngem hi Amayu ad chaya at ammuna ay masaporyu chaná.<sup>31</sup> Kunyu at anapun nan maepangkep as nan muntorayan Apo Dios, at ichatnantu us chaná ay kasaporanyu.”*

#### *Nan Kawad-an Nan Kenafiaknang (Mat. 6:19-21)*

*32 Kenalen pay Jesus, “Achi kayu umugyat, chakayu ay chak ay-aywanan, uray akét kayu, tay laychun Ama ad chaya ay maketoray kayu kan hiya.<sup>33</sup> Elakuyu nan kuk-uwayu, ya ichatyu nan lakuna as nan chiyucha pugli. As nan mangekamananyu as na, maarayu nan kenafiaknangyu ad chaya ay achi poros maak-akiw ya machadchachael. Kamanyu cha esakiana nan chiyucha petakayu ay achi machunchunot, ya nan kenafiaknangyu ay ichulinyu at achi mamammaid.<sup>34</sup> Tay mu ay chaud nan kawad-an nan kenafiaknangyu at hid-i us nan kawad-an nan numnumyu.”*

#### *Nan Chiyucha Nakasakiana Ay Mafiabfiaor (Mat. 24:42-44)*

*35 Inturuy Jesus, “Munsasakiana kayu as nan kumpurmi ay om-ommat, ya papaskuchanyu nan pingkiyu<sup>36</sup> ay maepachong as nan chiyucha mafiabfiaor*

*ay maman-ud as nan amocha ay uy nakichuyas ta muntokafiancha nan unub as nan munkokkokana ay sungkop.* <sup>37</sup> Nakiasat nan chiyuchya mafiabfiaor ay chaan nanassuy ya nakasakiana as nan omaliyan nan amocha. Ifiakiak kan chakayu nan tit-iwa ay munsokattu nan chiyuy amo, patokorunantu chichaya ikiauwana chicha. <sup>38</sup> Nakiasatcha nan chiyuchya mafiabfiaor mu asporan nan amocha chicha ay nakasakiana, uray mu komatam hiya as nan tongan chi lafi winnu maradlachaw.”

<sup>39</sup> “Numnumuryu na: Mu aammon nan nakin afong nan uras ay omaliyan nan mangaakiw, achina eparufus ay sugpun nan mangaakiw nan afongna.

<sup>40</sup> “Assesa us koma kan chakayu ay masapor nakasakiana kayu, tay omali nan Naepadtu ay Anak chi Taku as nan uras ay achiyu namnamaun.”

### *Nan Matalek Ya Nan Masilib Ay Mafiabfiaor (Mat. 24:45-51)*

<sup>41</sup> Kenalen Pedro, “Apo, ay kan chakami nan cham mangifiag-an as nan nauy maepadpachongan winnu as nan am-in ay tataku?”

<sup>42</sup> Tinumfor hi Apo Jesus, “Ngachana ngarud nan matalek ya masilib ay mafiabfiaor? Hiya nan mangichatantu nan amona as nan kalibfengan ay mun-aywan as nan kakadwana ay mafiabfiaor, ya hiya nan mangiwarastu as kanuncha as nan ustu ay timpon chi manganancha. <sup>43</sup> Nakiasat paat sa ay mafiabfiaor as nan komataman nan amona ya asporana hiya ay cha mangekaman as nan inflina. <sup>44</sup> Ifiakiak kan chakayu nan tit-iwa ay kan tosa ay mafiabfiaor nan mangichatantu nan amona as nan kalibfengan ay mun-aywan as nan am-in ay kuk-uwana. <sup>45</sup> Ngem mu nan hana ay mafiabfiaor at kanana as numnumna un, ‘Uy at man mafiyag ay munfiangad nan amok.’ Angkiay ya enlapuna ay manoprat as nan kakadwana ay mafiabfiaor ay fianafiai ya lanaraki, ya cha uy mangmangan, umig-ikop, ya munfutfutang. <sup>46</sup> As nan komatamantu nan amona as nan urkiw ay achina namnamaun ya uras ay achina ammu, chusauntu nan amona hiya. Hana at etapi hiya as nan chiyuchya achi omaafurot.”

<sup>47</sup> “Nan mafiabfiaor ay nangammu as nan laychun nan amona ay atuna ngem chaan nunsakiana winnu chaana enat nan laychun nan amona at ong-ongortu nan masaplitana. <sup>48</sup> Kun pay nan mafiabfiaor ay chaan nangammu as nan laychun nan amona ay atuna, uray mu enatna nan kiapón chi masaplitana, ak-akéttu nan masaplitana. Tay nan taku ay naichatan chi ongor at ongor nan manamnamantu ay murpu kan hiya, ya nan taku ay naetalekan chi ongor at ongor nan manamnamantu ay murpu kan hiya.”

### *Hi Jesus Nan Kiapón Nan Masisiyanan Chi Tataku (Mat. 10:34-36)*

<sup>49</sup> Kenalen pay Jesus, “Enmaliyak ay mamuor as nan nauy luta ya laychok ay kumil-aw at koma! <sup>50</sup> Ngem masapor munlikiataktu, ya kunak masesekoran as solet inkiana ommat! <sup>51</sup> Ay kananyu un enmaliyak ay umichat as talna asna’s luta? Achi! Ifiakiak kan chakayu, enmaliyak ay mangsisiyan as nan tataku. <sup>52</sup> Munlapu ad wani, masisiyan nan lema as nan usa ay pamilya. Nan turu at kontrauncha nan chuwa, ya nan chuwa at kontrauncha nan turu. <sup>53</sup> O, kuncha makudkudwa. Munkennontra nan hen-ama ya kaman us as nan hen-ena. Nan katukiangan ay fiafiai at kontrauna nan enapuna ay fiafiai, ya nan enapu ay fiafiai at kontrauna nan katukiangana ay fiafiai.”

*Nan Mangematonan As Nan Timpu  
(Mat. 16:2-3)*

<sup>54</sup> Kenalen Jesus as nan ongor ay tataku, “*Mu ilaunyu nan lifuu ay cha fomoknag henan mayu-uynuwan nan urkiw, hiya at chi ya kananyu un, ‘Umuchantu,’ ya ommat tit-iwa.* <sup>55</sup> *Kaman us as nan mangkeknaanyu as nan angin ay murpu as filang, kananyu un, ‘At-atongngantu,’ ya ommat tit-iwa.* <sup>56</sup> *Chakayu ay pakamankaman! Naraing kayu ay mangematon as nan maila henan lutaya ad chaya. Ngem anuyyu achi maematonan nan chiyuycha sinyar Apo Dios maepangkep kan ha-un ay cha om-ommat ad wani ay timpu?*”

*Nan Makealigluwan Omona Nan Taku Ta Achi Maicharam  
(Mat. 5:25-26)*

<sup>57</sup> Inturuy Jesus, “*Adchi t’uyyu achi numnumun mu ngachana nan ustu ay atunyu?* <sup>58</sup> *Mu kaspangarigan iyuy chaká as nan nangicharum kan he-a as kurti, atum nan kafaelam ay makealiglu kan hiya as nan charan. Tay mu achi, ipurang chaká as nan huwis. Angkiay ya nan huwis at ipurang chaká as nan pulis ay mangifiarud kan he-a as pagfiaruchan.* <sup>59</sup> *Ifiakiak kan he-a ay achikantu makapitiw as pagfiaruchan inkiana fiayacham nan am-in ay mortam.*”

## 13

*Masapor Ay Munfiafiawi*

<sup>1</sup> As nan hiyachi ay timpu, wachacha hid-i nan tapina ay tataku ay nangifiakia kan Jesus maepangkep as nan tapina ay i-Galilea ay enpapatuy Gobernador Pilato as nan chacha mun-ichatonan kan Apo Dios. <sup>2</sup> Tinumfor hi Jesus kan chicha, “*Ay kananyu un kaskasin fumafiasor chaná ay i-Galilea mu nan tapina ay i-Galilea kiapú ta assesa nan enkatuycha?* <sup>3</sup> *Achi! Ifiakiak kan chakayu ay mu achi kayu munfiafiawi as nan fiasfiasoryu, matuy kayuntu us ay kaman kan chicha.* <sup>4</sup> *Ay kananyu un kaskasin nunsidlay fiasfiasor nan chiyuycha hinpuru ya waru ay tataku ay natuy ay naappelan as nan natukian nan nangatungatu ay afong ad Siloe\* mu nan fiasfiasor nan chiyuycha tapina ay kakailiyancha ay i-Jerusalem?* <sup>5</sup> *Achi! Ifiakiak kan chakayu ay mu achi kayu munfiafiawi as nan fiasfiasoryu, matuy kayuntu us ay kaman kan chicha.*”

*Nan Maepadpachongan Maepangkep As Nan Igos Ay Achi Fumkias*

<sup>6</sup> Angkiay ya infiakian Jesus kan chicha nan nauy maepadpachongan: “*Wacha nan usa ay taku ay nuntanum as kaiw ay igos as nan umana. As nan timpon chi fumkiasana, uy mun-ila as fukiasna ngem kun maid.* <sup>7</sup> *Isunga kenalina as nan munkiarkiarchinuna, ‘Naiy turu ay tawwun ay enmalialiyak ay mangila as fukias nan nauy ay kaiw, ya kun maid poros ininchanan. Separum at, tay kuna lawá cha saysayangun nan luta.’*

<sup>8</sup> “*Ngem kenalen nan munkiarkiarchinuna, ‘Apo, hihiya sa hesa as usa ay tawwun ta kaufiak nan kawad-an nan puuna ya lumangak.* <sup>9</sup> *Mu fumkias sa as tawwun, ammay paat. Ngem mu achi challu fumkias, epasipormuntu.’*”

*Nan Nangepaammayan Jesus As Nan Napekot Ay Fiafai*

<sup>10</sup> As nan Urkiw ay Mun-iblayan, cha mun-is-isuru hi Jesus as nan usa ay senagogga. <sup>11</sup> Wacha hid-i nan usa ay fiafai ay naanennetan ay nangepasaket kan hiya as hinpuru ya waru ay tawwun. Penekot nan anennet hiya, at

\* <sup>13:4</sup> Neh. 3:15; Isa. 8:6; Jn. 9:7, 11

achi poros makauyad. <sup>12</sup> Kun pay inilan Jesus hiya, enayakiana, ya kanana, “Ammi, nawayawayaanka as nan saketmu.” <sup>13</sup> As nan nangepatayan Jesus as nan limana kan hiya, naannuyad ya nunchayaw hiya kan Apo Dios.

<sup>14</sup> Ngem finmungat nan ap-apu as nan senagoga, tay nunkaan hi Jesus as saket as nan Urkiw ay Mun-iblayan. Kenalina as nan tataku, “Unum ay urkiw nan munchunuwan takú. Isunga as nan hanacha ay urkiw nan omaliyanu ay munpakaan as saketyu, fiakun as nan Urkiw ay Mun-iblayan.”

<sup>15</sup> Tinumfor hi Apo Jesus kan hiya, “Chakayu ay pakamankaman! Ay wachay usa kan chakayu ay achi mangfokat ay uy mangepaikop as fiakana winnu dongkina as nan Urkiw ay Mun-iblayan? <sup>16</sup> Ay achi mafialin ay maway-awayaan as nan Urkiw ay Mun-iblayan nan nauy fiafiai ay kianak Abraham ay finafiarud Satanas as hinpuru ya waru ay tawwun?” <sup>17</sup> As nan nangaliyana as na, nafainan nan am-in ay kafusorna, ngem nunlagragsakcha nan tataku kiapú as nan am-in ay nakaskaschaaw ay en-enatna.

### *Nan Maepachongan Nan Fokel Chi Mostasa Ya Nan Lebadura (Mat. 13:31-33; Mar. 4:30-32)*

<sup>18</sup> Angkiay ya kenalen Jesus, “Ngachana nan kaassenan nan muntorayan Apo Dios? Anan mangepachongak pay? <sup>19</sup> Maepachong as nan ek-ektel ay fokel chi mostasa ay enaran nan usa ay taku, ya uyna entanum as nan umana. Nasikun inkiana kaman kaiw chi kaad-achana, at nun-ammacha nan chiyuycha kossel as sollongcha as nan chiyuycha pangana.”

<sup>20</sup> Kenalen pay Jesus, “Ngachana nan mangepachongak as nan muntorayan Apo Dios? <sup>21</sup> Maepachong as nan akét ay lebadura ay ekar-ot nan fiafiai as nan turon sarop ay alina inkiana fumrad am-in.”

### *Nan Nalepet Ay Pantiw (Mat. 7:13-14, 21-23)*

<sup>22</sup> Inturuy Jesus ay umuy ad Jerusalem, ya as nan chana manglausen henan il-ili ya fiabiabruy, nun-is-isuru as nan tataku. <sup>23</sup> Wacha nan nun-sarudsud kan hiya, “Apo, ay kun akét chi tataku ay maesarakan?”

Tinumfor hi Jesus kan hiya, <sup>24</sup> “Epapatiyu ay sungkop as nan nalepet ay pantiw, tay ifiakiak kan chakayu ay ongortu nan manglayad ay sungkop, ngem achicha makaskop. <sup>25</sup> Tay maepachong as nan nauy: Mu chakus tenmakchug nan nakin afong ya inin-ubna nan pantiw, mayagyag kayuntu as chará. Uray mu cha kayu munkokkokkok ay mangali un, ‘Apo, ayu pay tokafiam na ta sungkop kami.’ Kananantu ay manfor kan chakayu un, ‘Achek poros am-ammu chakayu winnu nan nurpuwanyu.’ <sup>26</sup> Angkiay ya kananyuntu us un, ‘Kun kami cha nakedekkan ya nakiig-ikop kan he-a ya. Nun-isursuruka pay henan ilimi.’ <sup>27</sup> Ngem kananantu kasin, ‘Achek challu am-ammu chakayu winnu nan nurpuwanyu. Omachawwi kayu kan ha-un, chakayu am-in ay mangekamkaman as mangotettet!’ <sup>28</sup> Hesa as chará nan mun-ag-akoranyuntu ya munngesgesatantu nan fiab-ayu kiapú as fungatyu as nan mangil-anyuntu kan Abraham, Isaac, Jacob ya nan am-in ay pomapadtu ay naetatapi as nan muntorayan Apo Dios. <sup>29</sup> Omalichantu nan tataku ay achi omaafurot ay murpu as apét fomokfoknakian ya mauy-wynuwan nan urkiw, ya as apét senakiangan ya filáng ay maketokor ay makifiasta as nan muntorayan Apo Dios. <sup>30</sup> Wachacha nan tapina ay anongos ad wani at chichantu nan omon-ona, ya nan tapina ay omon-oná ad wani at chichantu nan omanongos.”

*Nan Layad Jesus As Nan Chiyuycha I-Jerusalem  
(Mat. 23:37-39)*

<sup>31</sup> As nan hiyachi challu ay uras, wachacha nan tapina ay Fariseo ay inmuy kan Jesus, ya kanancha kan hiya, “Ammay mu mak-akka hena, tay laychun chaká kanu ay patayun kan Ari Herodes.”

<sup>32</sup> Tinumfor hi Jesus kan chicha, “Uyyy ifiakia kan Ari Herodes ay nasikap ay maepachong as nan fuwus un, ‘Mun-epafoknakiak as anennet ya munkaanak as saket ad wani ya as wiet, ya as sang-achum, lopasok nan chunok.’ <sup>33</sup> Uray mu hiyasa, masapor ituruyku ay munfiaat ad Jerusalem ad wani, as wiet ya sang-achum, tay maid challu pomapadtu ay matuy as tukún ay lukiar omangkiay ad Jerusalem.

<sup>34</sup> “Chakayu ay i-Jerusalem, penatuyyu nan chiyuycha pomapadtu, ya lenomtakyu nan chiyuycha infiaor Apo Dios kan chakayu. Namen kaat ay lenarayadku ay mang-among kan chakayu am-in ay kaman as nan atun nan mangngak ay mangesakub as enpasna, ngem kunyu paat achi laychun. <sup>35</sup> Ililaunyu! Nataynan nan siyudadyu! Ifiakiak kan chakayu, achiyaktu kasin ililaun inkiana as nan timpu ay mangaliyanyu un, ‘Machaychayaw koma nan omali ay infiaor Apo Dios!’”

## 14

*Nan Kasin Nunkaanan Jesus As Saket As Nan Urkiw Ay Mun-iblayan*

<sup>1</sup> As nan usa ay Urkiw ay Mun-iblayan, uy nakekan hi Jesus as afong nan usa ay ap-apu ay Fariseo. Nan tataku hid-i at sinisiimancha hiya mu ngachana nan atuna. <sup>2</sup> Wacha as nan sangwanana nan usa ay laraki ay finufumror nan chiyuycha sukina ya takrayna. <sup>3</sup> Kenalen Jesus as nan chiyuycha Fariseo ya mun-isursuru as Lintig, “Ay eparufus nan Lintig takú ay munkaan as saket as nan Urkiw ay Mun-iblayan winnu achi?” <sup>4</sup> Ngem kuncha kinkinak. Enayakian Jesus nan chiyuy laraki ya enpaammayna, angkiay empakatamna.

<sup>5</sup> Angkiay ya kenalina kan chicha, “Ngachana kan chakayu nan wachay anakna winnu fiakana ay nag-as as nan fufun as nan Urkiw ay Mun-iblayan, ay achiyu uy mun-ara?” <sup>6</sup> Maid poros ensongfiatcha kan hiya maepangkep as sa.

*Nan Filin As Nan Mangili Ya Nan Munmangili*

<sup>7</sup> Kun pay inilan Jesus ay cha munpili nan tapina ay mangili as kaammayan ay tomokorancha, infiakiana nan nauy usa ay maepachongan kan chicha:

<sup>8</sup> “Mu wachay mangayag kan he-a as nan chuyas, achika tomokor as nan kaammayan ay tokoran, tay atun at mu wacha nan am-amud mu he-a ay enayakiana. <sup>9</sup> Mu omali nan chiyuy nangayag kan chakayu ay chuwa, ya kanana kan he-a, ‘Hiya pay nan tomokor hena.’ Angkiay naflainanka at a, ya kapeletan ay uyka tomokor as nan apud ay tokoran. <sup>10</sup> Kun at nan atum as nan maayakianam at uyka tomokor as nan apud ay tokoran ta as nan omaliyan nan nangayag kan he-a at kananantu un, ‘Kiayum, uyka tomokor as nan kaammayan ay tokoran.’ Angkiay maichayawkantu as nan sangwanan nan am-in ay tapen chi mangili. <sup>11</sup> Tay nan mange pangatu as achorna at maepababantu, ya nan mange pangababa as achorna at maepangatantu.”

<sup>12</sup> Angkiay kenalen Jesus as nan nangayag kan hiya, “As nan mangiyayakiam as makan as afongmu as nan kaorkia winnu maschum, achim ayakian nan kiakiayyummu winnu susnúdmu winnu iib-am winnu

*nan nunkafiaknang ay sasag-unmu. Tay mu hiyasa nan atum, ayakian chakantu us kan chicha, at maafus nan enatmu kan chicha.* <sup>13</sup> *Ngem as nan mangiyayakiam as makan as afongmu, nan ayakiam at nan chiyuycha pugli, nakukuy, napilud ya nafurag,* <sup>14</sup> *at nakiasatkantu. Tay uray mu achicha makaafus as nan enatmu, gun-gunaan chakantu kan Apo Dios as nan matakwan nan chiyuycha nalintig ay tataku manipud as nan utúy.”*

### *Nan Maepadpachongan Nan Chuyas (Mat. 22:1-10)*

<sup>15</sup> *Kun pay chinngor nan usa ay laraki as nan chiyuycha nakuufong kan Jesus nan hana maepadpachongan, kenalina kan Jesus, “Nakiasat as solet nan taku ay makiufongtu as nan muntorayan Apo Dios.”*

<sup>16</sup> *Ngem kenalen Jesus kan hiya, “Wacha nan usa ay tataku ay nunparti as fiaka, ya ongor nan tataku ay enayakiana.* <sup>17</sup> *Kun pay timpon chi manganan, imifiaor hiya as usa as nan chiyuycha fiabfiaaruna ay uy mangifiakia as nan chiyuycha naayakian un, ‘Akayu at, tay naesakiana nan am-in ay makan.’*

<sup>18</sup> *Ngem kuncha am-in nunpanfor nan naayakian. Nan enmona ay naayakian at kenalina kan hiya, ‘Pasensiya a, achiyak omali, tay wacha nan kalaklakok ay payyiw, at masapor uyku ilaun.’* <sup>19</sup> *Kenalen us nan usa, ‘Achiyak omali, tay wacha nan hinpuru ay fiaka ay kalaklakok, at masapor uyku pachasun chicha ay mangidnu. Isunga kunak pasensiyaun.’* <sup>20</sup> *Nan usa us at kenalina, ‘Kachuychuyasku met, isunga achiyak makaali.’*

<sup>21</sup> *“Angkiay ya nunfiangad nan chiyuy mafiabfiaor, ya infiakiana am-in chaná as nan amona. Finmungat nan amona, ya kanana as nan fiabfiaaruna, ‘Kamuuwum ay umuy as nan chiyuycha korsa ya charan henan ili, ya ayakiam nan chiyuycha pugli, nakukuy, nafurag ya napilud.’* <sup>22</sup> *Uy tit-iwa enayakian nan chiyuy mafiabfiaor chachi, ya kanana as nan amona as nan nunfiangchana, ‘Apo, enatku am-in nan infilinmu, ngem nawaya pay met as fiaury.’* <sup>23</sup> *Angkiay kenalen nan amona kan hiya, ‘Umuyka as nan ad-achawwi ay korkorsa ya luglukiar; ya peletum nan tataku ay omali hena ta mapnu nan afongku.* <sup>24</sup> *Ifiakiak kan he-a ay am-in nan chiyuycha naayakian ay chaan emiali at maid tamtamancha as nan ensasakianak ay makan.’”*

### *Nan Masapor Ay Atun Nan Munfialin As Disipulus Jesus (Mat. 10:37-38)*

<sup>25</sup> *As nan namingsan, ongoongor ay tataku nan nakiuy kan Jesus. Nunsakong hi Jesus kan chicha, ya kanana,* <sup>26</sup> *“Mu ngachana nan tataku ay manglayad ay omali kan ha-un ay munfialin as disipulok, masapor ong-ongor nan layadna kan ha-un mu as nan amana, enana, asawana, an-akna, ib-ana ay lanaraki ya fianafiai ya uray as nan achorna.* <sup>27</sup> *Nan tataku ay achi mangitiin as korosna ya achi umunud kan ha-un at achi mafialin ay munfialin as disipulok.*

<sup>28</sup> *“Mu wacha kan chakayu nan manglayad ay mangkiaub as ad-acha ay afong, ay achina on-on a etokor ay mangnumnum mu wachay sipingna as ommat ay kiastosuna inkiana marpas?* <sup>29</sup> *Tay mu empatakchugna yangkiay nan chiyuycha tukud ya chaana lenpas, nan am-in ay tataku ay mangil-ila as nan hana at ot-otyokunchantu hiya.* <sup>30</sup> *Kankananchantu un, ‘Kun lawá enlapon tona ay tataku ay munkiaub as ad-acha ay afong ya achina lopasun.’*

<sup>31</sup> *“Kaman us as nan usa ay ari ay wachay hinpuru ay lifu ay sorchachuna ay uy makikufiat as nan ari ay wachay chuwan puru ay lifu ay sorchachuna at etokorna on-on a ta numnumuna mu kafaelana ay kufiatun chicha.* <sup>32</sup> *Mu*

achina kafiaelan, umifiaor as manib-at kan tosa ay ari mu achawwicha pay laing ta chumawat as munkennappiaancha.<sup>33</sup> Assesa us kan chakayu ay achi kayu maftalin ay munfialin as disipulusku mu achiyu taynan nan am-in ay wacha kan chakayu.”

### *Nan Maepadpachongan Nan Asin*

(Mat. 5:13; Mar. 9:50)

<sup>34</sup> “Nan asin at ammay, ngem mu chakus nakaan nan tamtamna, achi poros kasing omasin. <sup>35</sup> Maid challu kotokna as nan luta winnu as nan mangam-amongan as lumang, kun yangkiay maiwagkia. Nan wachay ingana ay chumngor at masapor chumngor.”

## 15

### *Nan Maepadpachongan Nan Nalitaw Ay Karnero*

(Mat. 18:12-14)

<sup>1</sup> As nan namingsan, ongor ay mangam-among as fiaror ya fumafiasor nan emmali as nan kawad-an Jesus ay manngor as nan isursuruna. <sup>2</sup> Nunmotmot nan chiyucha Fariseo ya nan chiyucha mun-isursuru as Lintig ay mangarkali, “Hi tona ay taku at ayakianay fumafiasor ya makekan pay kan chicha.” <sup>3</sup> Isunga infiakian Jesus kan chicha nan nauy maepadpachongan:

<sup>4</sup> “Kaspanganigan, mu nan usa kan chakayu at wachay hinkiasot ay karnerona, ya nalitaw nan usa, ay achina taynan nan chiyucha siyam puruya siyam ay karnerona as punchag ta uyna anapun nan chiyuy nalitaw inkiana uchanana? <sup>5</sup> As nan manguchanana, ongor chi lagsakna, ya sakfiatana ay mangesaor. <sup>6</sup> As nan mangesaorana, ayakiana nan sasag-una ya nan kiakiayumna, ya kanana kan chicha, ‘Makelagragasak kayu kan ha-un, tay ininchanak nan nalitaw ay karnerok.’ <sup>7</sup> Ifiakiak kan chakayu, assesa us ay ongongor chi lagsak ad chaya kiapú as nan munfiafiawiyen nan usa ay fumafiasor mu nan chiyucha siyam puru ya siyam ay nalintig ay tataku ay achi kis-an munfiafiawi.”

### *Nan Maepadpachongan Nan Nalitaw Ay Siping*

<sup>8</sup> Inturuy Jesus, “Kaspanganigan, nan usa ay fiafiai at wachay nafiaror ay hinpuru ay silsilyu ay sipingna, ngem nalitaw nan usa. Ngachana nan atuna? Paskuchana nan pingki, ya sakiachana nan chat-orna ay manganaanap inkiana mad-anana. <sup>9</sup> Angkiay ya as nan manguchanana, ayakianantu nan sasag-una ya nan kiakiayumna, ya kanana, ‘Makelagragasak kayu kan ha-un, tay ininchanak nan sipingku ay nalitaw.’ <sup>10</sup> Ifiakiak kan chakayu, assesa us ay munlagragsak nan anghelles Apo Dios as nan munfiafiawiyen nan usa ay fumafiasor.”

### *Nan Maepadpachongan Nan Nalitaw Ay Anak*

<sup>11</sup> Kenalen pay Jesus, “Wacha nan usa ay ama ay chuwa nan pototna ay lanaraki. <sup>12</sup> Kenalen nan enauchi kan amana, ‘Ama, iyalem pay nan tawidku.’ Kinudwan tit-iwa amacha nan epatawidna kan chicha.

<sup>13</sup> “Kun pay chaan inmuy chi ongor ay urkiw, enlakon nan enauchi nan am-in ay tawidna. Enarana nan am-in ay sipingna ya inmuy henan achaachawwi ay ili. Hid-i nan nangkiastosana as sipingna as nan lenalaschak ay panagfyag.

<sup>14</sup> Kuna pay kinastos nan am-in ay wacha kan hiya, inumchan nan pararu ay fitel henan lukiar ay anchi, at maid poros nayagyag kan hiya. <sup>15</sup> Isunga uy

nunchunu as nan usa ay umiili hid-i. Infiaor nan hana umiili as nan kawadan nan fiafiyna ta hiya nan munpakpakan. <sup>16</sup> Laraychuna koma ay masufu as nan uray kanun nan chiyucha fiafuy, ngem maid poros inmichat kan hiya.

<sup>17</sup> “Kun pay nunnunnum ay ustu, kenalina, ‘Ongorcha nan fiabfiaarun amak ay cha sumubsubray kanuncha, ya nauyak hena ay kun lawá kiayud matuy as chukiaang. <sup>18</sup> Maligwatak at ay munfiangad kan amak, ya kanaktu kan hiya un, ‘Ama, nakafiasorak kan Apo Dios ya kaman us kan he-a. <sup>19</sup> Achiyak at maekari ay makali un pototmu. Isunga kunak ud-ay ifilang as usa ay fiabfiaarum.’”

<sup>20</sup> “Naligwat tit-iwa hiya ya nunfiangad kan amana. Ngem kun pay kutug ay achawwi as afongcha, inilan amana hiya, ya ongor chi sug-angna. Tenmagtag hi amana ay nanib-at kan hiya. Enakworna, ya finisituna hiya. <sup>21</sup> Angkiay ya kenalen nan pototna, ‘Ama, finmasorak kan Apo Dios ya kaman us kan he-a. Achiyak at maekari ay makali un pototmu.’

<sup>22</sup> “Ngem kenalen amana as nan chiyucha fiabfiaaruna, ‘Kamuwunyu ay mangiyali as nan kaammayan ay fiachu ya iyammayu kan hiya. Singsinganyu nan limana, ya sapatosanyu hiya. <sup>23</sup> Angkiay ya iyaliyu nan tenmafia ay urfun ay fiaka ya partiyunu as ischa takú ta munlagragsak takú. <sup>24</sup> Tay nan nauy pototku at kaman natuy, ngem nataku. Kaman us nalitaw hiya, ngem nad-anan.’ Angkiay ya enlapucha ay munlagragsak.

<sup>25</sup> “As nan hiyachi, nan panguru ay anak at wacha as payyiw. Kun pay cha somaor ya cha maesnop as afongcha, chinngorna nan tokar ya tataku ay cha munsasara. <sup>26</sup> Angkiay ya enayakiana nan usa as nan chiyucha mafiabfiaor, ya senarudsudna kan hiya, ‘Anan cha om-ommat?’ <sup>27</sup> ‘Nunfiangad nan enauchem,’ ensongfiat nan mafiabfiaor, ‘at enpaparten amam nan tenmafia ay urfun ay fiaka, tay nunfiangad hiya ay maid mangisiw as enom-ommat.’

<sup>28</sup> “Ngem finnungat nan panguru ay anak ya chaana lenayad ay sungkop. Isunga pinmitiw hi amana ay uy nangay-ayu kan hiya ta sungkop. <sup>29</sup> Ngem kenalen nan anak kan amana un, ‘Kaat ay tawwun nan nunchunchunuwak kan he-a ay kaman usa ay mafiabfiaor, ya maid chaanku tenongpar ay filinmu. Ngem maid poros inchatmu kan ha-un as uray usa ay kianching ta wachay munlagragsakanmi as nan kiakiayyumu. <sup>30</sup> Ngem kun pay kenmatam nan nauy pototmu ay nangamin as kuk-uwam kiapú as fianafiai ay mangepabpfai-ayad as achorcha, enpartiyam hiya as tenmafia ay fiaka ay urfun!’

<sup>31</sup> “Angkiay kenalen amana un, ‘Anakku, kanayon met ay wachaka kan ha-un, ya nan am-in ay wacha kan ha-un at kuk-uwam us. <sup>32</sup> Ngem masapor challu munselebrar ya munlagragsak takú, tay nan ifiam at kaman natuy, ngem nataku. Kaman us nalitaw hiya, ngem nad-anan.’”

## 16

### Nan Nasikap Ay Mun-ay-aywan

<sup>1</sup> Nun-epadpachong kasin hi Jesus as nan disipulusna, “Wacha nan usa ay nafiaknang ay nangetalek as kuk-uwana as nan mun-ay-aywanuna. Nafiakia as nan nafiaknang ay nan sipingna at cha kiaskiastosun nan nauy mun-ay-aywan. <sup>2</sup> Enpaayag nan nafiaknang hiya, ya kanana un, ‘Ngachana nan nauy machamchamagku maepangkep kan he-a? Iyalem nan lestaan nan am-in ay entalekku kan he-a, tay fiakun at he-a nan mun-aywanok.’

<sup>3</sup> “Kenalen nan mun-ay-aywan as numnumna un, ‘Anan atok ngun, tay fi-akuntu ha-un nan mun-aywanun nan amok? Achek met kafaelan ay munpara ya mafiainak met us ay munlemos. <sup>4</sup> A, ammok nan atok ta wachay mangayag kan ha-un as nan kiakiayumku as afongcha as nan makaanak as nan chunok.’ <sup>5</sup> Isunga hinin-us-ana ay nangayag as nan tataku ay inmutang as nan amona ay nafiaknang, ya kanana as nan omona un, ‘Kaatna nan utangmu as nan amok?’ <sup>6</sup> ‘Hinkiasot ay lata ay mantika,’ ensongfiatna. Kenalen nan mun-ay-aywan un, ‘Nauy nan lestaan nan utangmu. Kamuwum ay tomokor, ya nan isuratmu ud-ay at leman puru.’ <sup>7</sup> Angkiay ya kenalina as nan usa un, ‘He-a ngay, kaatna nan utangmu?’ ‘Hinkiasot ay kafian ay fukias,’ ensongfiatna. Kenalen nan mun-ay-aywan un, ‘Nauy nan lestaan nan utangmu. Ayu, nan isuratmu ud-ay at waron puru.’

<sup>8</sup> “Chinayaw nan amona nan kenasikap nan mun-ay-aywanuna ay achi mapiyar. Tay tit-iwa ay nan tataku ay achi omafurot kan Apo Dios at nasik-sikapcha as nan chacha at-atun mu nan omafurot kan Apo Dios. <sup>9</sup> Ifiakiak ngarud kan chakayu ay osarunyu nan kenafiaknangyu asna’s luta ay makiki-ayyum as nan pachongyu ay tataku. Mu hiyasa ay mam-in, maawat kayuntu ad chaya ay magyananyu in-inkiana.

<sup>10</sup> “Nan taku ay matalek as nan ak-akettuy at matalek us as nan cham-chamuna. Kun pay nan taku ay achi mapiyar as nan ak-akettuy at achi us mapiyar as nan chamchamuna. <sup>11</sup> Isunga mu achika mapiyar ay mangosar as nan kenafiaknang ay wacha asna’s luta, anan mangetalektu kan he-a as nan tit-iwa ay kenafiaknang? <sup>12</sup> Kaman us mu achika mapiyar ay mangaywan as nan kuk-uwani chi tapina, anan mangichattu kan he-a as nan kuk-uwam?”

<sup>13</sup> “Maid mafibfiaor ay munserfi as chuwa ay amo. Tay mu atuna sa, iinglunantu nan usa ya laylaychuna nan usa, winnu oononguna nan usa ya elelayusana nan usa. Achiyu mafialin ay munkisanun ay serfiyan hi Apo Dios ya nan siping.”

### Nan Tukun Jesus As Nan Chiyuchya Fariseo

(Mat. 5:31-32; Mar. 10:11-12)

<sup>14</sup> Kun pay chinngor nan chiyuchya Fariseo nan nauycha am-in ay infi-akian Jesus, enot-otyokcha hiya, tay nan laylaychuncha at siping. <sup>15</sup> Ngem kenalen Jesus kan chicha, “Chakayu nan cha mangepappaila ay kaman kayu nalintig as nan mangilan nan tataku, ngem aammon challu Apo Dios nan wacha as numnumyu. Tay nan amud as nan mangilan nan tataku at maid kotokna as nan mangilan Apo Dios.”\*

<sup>16</sup> “Nan Lintig Moises ya nan insurat nan chiyuchya pomapadtu at naun-unud inkiana as nan timpon Juan ay Fumufunyag. Nunlapu as nan hiyachi, naekasaba nan Ammay ay Chamag maepangkep as nan muntorayan Apo Dios, at waschi un epapeletna ay maetapi. <sup>17</sup> Ngem narakraka ay mamaid nan chaya ya nan luta mu nan kaek-ektelan ay surat as nan Lintig.”

<sup>18</sup> Kenalen us Jesus, “Nan ngachana ay laraki ay mangiyichang as asawana ya kasin omasawa as tukún at umiwet. Kaman us as nan laraki ay mangasawa as nan fiafiai ay naiyichang at umiwet.”

### Nan Fiaknang Ya Hi Lazaro

<sup>19</sup> Inturuy pay Jesus, “Wacha nan usa ay nafiaknang ay kanayon ay nangaf-achu as nunkangina, ya inurkiw ay lenalaschak chi panagfiyagna. <sup>20</sup> Wacha us

\* <sup>16:15</sup> 1 Sam. 16:7

*nan usa ay pugli ay nan ngachana at Lazaro ay nakulid nan intiru ay achorna. Inurkiw ay naiyuy hiya as nan pantiw nan fiaknang.* <sup>21</sup> *Laraychuna ay mangkakan as nan uray nunkag-as ay makan ay nurpu as nan lamesaan nan fiaknang. Uray nan chiyuycha asu at uycha chinilchilchilan nan ongoongor ay kulidna.*

<sup>22</sup> *"Natuy nan pugli, ya inyuy nan anheles hiya as nan kawad-an Abraham. Natuy us nan fiaknang, ya nailufok.* <sup>23</sup> *Angkiay ya naiyuy hiya ad Hades ay hid-i nan chana munliglikiatan. As nan kawad-ana's chi, nuntangad, ya inilana hi Abraham ay wacha as nan achawwi ya hi Lazaro ay naichachapat kan hiya.* <sup>24</sup> *Isunga infukiawna un, 'Ama Abraham, sug-anganak man paat! Ifiaormu pay hi Lazaro ay mangisiwiw as limana as nan chanum, ya epatidtidna as nan chilak ta tumungnin, tay ad-achiyan chi chak iliwas kiapú as nan atong nan nauy apuy.'*

<sup>25</sup> *"Ngem kenalen Abraham kan hiya, 'Anakku, numnumum ay as nan natatakuwam at naichat nan am-in ay anam-ammay kan he-a. Kun pay hi Lazaro at manangisiw nan naichat kan hiya. Ad wani, hiya nan cha maliwliwa hena, ya he-a nan cha munliglikiat hesa.* <sup>26</sup> *Fiakunyangkiy sa, tay nauy challu nan narawarawa ay kaman teng-el ay maid papugna as nan nunkiakian-an takú ta achi maifalin ay nan murpu hena at makaali hesa kan chakayu, winnu nan murpu hesa at achi makaali hena kan chakami.'*

<sup>27</sup> *"Tinumfor nan fiaknang, 'Ama Abraham, chawatok ngarud ay ifiaormu hi Lazaro ay umuy as afong cha amak* <sup>28</sup> *ta uyna fiagfiag-an nan lema ay susnúdku hid-i ta achicha us omali hena ay kawad-an chi likiat.'*

<sup>29</sup> *"Ngem kenalen Abraham, 'Wacha met kan chicha nan liblu ay insurat Moises ya nan chiyuycha pomapadtu ay manukun kan chicha. Kikiadcha nan susnúdmu ay chumngor kan chicha.'*

<sup>30</sup> *"Tinumfor nan fiaknang, 'Aw, achi ommat sa Ama Abraham! Ngem mu wachay matakus as nan nunkatuy ay umuy kan chicha, munfiafiawichantu as nan fiasfiasorcha.'*

<sup>31</sup> *"Ngem kenalen Abraham, 'Mu achicha challu afurotun nan insurat Moises ya nan chiyuycha pomapadtu, achicha challu maawis ay omafurot uray mu wachay matakus ay natuy ay umuy kan chicha.'*

## 17

### Nan Taku Ay Munlumu As Fumasoran (Mat. 18:6-7, 21-22; Mar. 9:42)

<sup>1</sup> Kenalen Jesus as nan disipulusna, "Tit-iwa ay umchan challu nan chiyuy-cha sulisug ay fumasoran chi tataku, ngem kasusug-ang nan taku ay kur-puwana. <sup>2</sup> Un-unuya at mu kun maetekor chi losóng ay fiatuh as fiakiangna, ya maichus-or hiya henan fiayfiay mu nan munlumuwanas as fumasoran chi uray usa as nan nauycha ap-apud ay tataku. <sup>3</sup> Isunga il-ilaunyu at!"

"Mu fumasor nan ifiam at sengaram. Mu munfiafiawi at pakawanum. <sup>4</sup> Mu mamen pitu ay fumasor hiya kan he-a as nan hin-urkiw, ya mamen pitu ay omali kan he-a ay mangali un, 'Munfiafiawiyak' at masapor pakawanum hiya."

### Nan Pammati

<sup>5</sup> Kenalen nan apostoles as nan Apo, "Papigsaum pay nan pammatiimi." <sup>6</sup> Tinumfor nan Apo, "Mu wachay pammatiyu ay maepachong as nan kaad-achan nan fokel chi mostasa, maifalinyu ay kanan as nan nauy kaiw ay

sikomoro un, 'Mafiagnotka ya maetanumka henan fiayfiay,' at tongparunantu nan ifiakiayu."

### *Nan Chunon Nan Mafiabfiaor*

<sup>7</sup> Kenalen pay Jesus, "Kaspangarigan, mu wachay usa kan chakayu ay wachay fiabfiaaruna ay cha mun-ar-arachu winnu cha mun-ay-aywan as nan chiyuycha karnero. As nan somaorana, ay kanam kan hiya un, 'Aka ta manganka?' Achim met. <sup>8</sup> Kunmu at kanantu kan hiya un, 'Kamuwum ay uy munlulu. Munsokatka ya esakianam nan kanok, angkiay sad-unak inkiana maafusak. As nan marpasak, mafialinka ay mangan.' <sup>9</sup> Ay kis-anka munyaman as nan fiabfiaarum kiapú ta tenongparna nan inflinmu? Achi! <sup>10</sup> Kaman us kan chakayu as nan nangekamananyu as nan am-in ay naifilin ay atunyu, kananyu un, 'Kun kami lawá mafiabfiaor, at kunmi yangkiay enat nan chunumi.'

### *Nan Nangepaammayan Jesus As Nan Hinpuru Ay Tatakay Nakonet*

<sup>11</sup> As nan cha umyan cha Jesus ad Jerusalem, inuycha nan nunkiakiawan nan Samaria ya Galilea. <sup>12</sup> Kuncha pay cha umuy henan usa ay fiabruy, wachacha at nan hinpuru ay nunkakonet ay nanib-at kan hiya. Tenmakchugcha as nan ad-achawwi as akét, <sup>13</sup> ya infukiaawcha, "Apo Jesus! Sugangam man paat chakami!"

<sup>14</sup> Kun pay inilan Jesus chicha, kenalina, "Uy kayu munpaila as nan papachi." As nan chacha umyan, enmammaycha at.\*

<sup>15</sup> Kun pay inilan nan usa kan chicha ay enmammay hiya, nunfiangad ay mangipipigsa ay mangichaychayaw kan Apo Dios. <sup>16</sup> Nunlukfub as nan sangwanan Jesus, ya nunyaman. Hi tud-i ay taku at i-Samaria.

<sup>17</sup> Angkiay kenalen Jesus, "Kun ngun hinpuru nan nakaan chi konetcha. Ay chaud ngay nan siyam? <sup>18</sup> Adchi t'uy kun yangkiay nan nauy kaili nan nunfiangad ay munyaman kan Apo Dios?" <sup>19</sup> Angkiay kenalen Jesus kan hiya, "Tomakchugka ya komatamka. Nan pammatem nan nangepaammay kan he-a."

### *Nan Omaliyan Nan Muntorayan Apo Dios (Mat. 24:23-28, 37-41)*

<sup>20</sup> Wachacha nan tapina ay Fariseo ay nangesarochakchak kan Jesus mu kaatnay omaliyan nan muntorayan Apo Dios asna's luta. Tinumfor hiya kan chicha, "Nan muntorayan Apo Dios at omalintu ay maid sinyar ay maepaila <sup>21</sup> winnu maid mangali un, 'Nauy hena,' winnu 'Chiyuy hid-il' tay wacha at kan chakayu nan muntorayan Apo Dios."

<sup>22</sup> Angkiay kenalen Jesus as nan disipulusna, "Wachantu nan timpu ay laraychunyu ay mangila as nan Naepadtu ay Anak chi Taku as uray henkemad, ngem achiyu maila. <sup>23</sup> Wachachantu nan mangali kan chakayu, 'Enha, chiyuy hid-il' winnu 'Enha, nauy hena!' Ngem achiyu uy an-anapun hiya. <sup>24</sup> Tay kaman as nan machiyatan nan fiakilat ay manilaw am-in ad chaya at assidi us nan kasin omaliyan nan Naepadtu ay Anak chi Taku. <sup>25</sup> Ngem masapor mun-iliwas hiya on-onas ongor ay likiat ya achiyun nan nauy ay kianak.

<sup>26</sup> "As nan kasin omaliyan nan Naepadtu ay Anak chi Taku, nan ukialen nan tataku at kaman as nan ukialen nan tataku as nan timpon Noe. <sup>27</sup> Cha mangmangan, umig-ikop, ya maas-asawa nan tataku inkiana as nan urkiw ay nunlukianan cha Noe as nan papor. Angkiay napsong nan intiru ay luta,

\* <sup>17:14</sup> Lev. 13; Luc. 5:14

*ya nurningcha am-in.* <sup>28</sup> Kaman us as nan timpon Lot ad Sodoma. Waschi un cha mangmangan ya cha umig-ikop, cha lomaklaku ya cha mun-el-elaku, cha muntantanum, ya cha munkiagkiaub as afong. <sup>29</sup> Kun pay as nan urkiw ay nakakan Lot ad Sodoma, kalina at ya nag-aschay apuy ya asofre ay nurpu ad chaya ay namatuy kan chicha am-in. <sup>30</sup> Assesantu us nan ommat as nan urkiw ay maepail-an kasin nan Naepadtu ay Anak chi Taku.

<sup>31</sup> “As nan hana ay urkiw, nan taku ay wacha as tabsongan nan afongna at achi kis-an sungkop ay mangara as kinakuna. Kaman us as nan semepot at achi kis-an somaor.” <sup>32</sup> Numnumunyu nan enommat as nan asawan Lot!† <sup>33</sup> Nan uray ngachana ay mangepapati ay mangesarakan as fiyagna at litawuna challu. Ngem mu ngachana nan manglitaw as fiyagna kiapú kan haun at maesarakantu. <sup>34</sup> Ifiakiak kan chakayu, as nan hana ay lafi ay oma-liyak, wachachantu nan chuwa ay tataku ay munchachapat ay mamassuy. Maarantu nan usa, ya mayagyagtu nan usa. <sup>35</sup> Wachachantu nan chuwa ay fianafiai ay cha mun-assud ay munfiayu. Maarantu nan usa ya mayagyagtu nan usa. <sup>36</sup> [Wachachantu nan chuwa ay lanaraki as payyiw. Maarantu nan usa ya mayagyagtu nan usa.]‡

<sup>37</sup> Angkiay ya senarudsud nan disipulus kan Jesus, “Ay chaud man nan ommatan nan nauycha, Apo?”

Tinumfor hi Jesus kan chicha, “O, matongpartu chaná ay kaman as nan kanana un, ‘Mu ay chaud nan kawad-an nan natuy, hid-i nan maamongan nan anad-acha ay kossel ay mangkakan as anchor ay natuy.’”

## 18

### Nan Maepadpachongan Nan Huwis Ya Nan Ellakas

<sup>1</sup> Infiakian Jesus nan usa ay maepadpachongan as nan disipulusna ta isuruna chicha ay masapor kanayon ay munkarkararagcha ya achicha maichun nan namnamacha. <sup>2</sup> Kenalina, “Henan usa ay ili, wacha nan usa ay huwis ay chaan inmug-ugyat kan Apo Dios ya chaana rinisrispitu nan pachongna ay taku. <sup>3</sup> Wacha nan usa ay ellakas henan hana ay ili ay cha umuumuy as nan huwis. Chana kanakanan un, ‘Fiadnganak man paat ay mangamis as nan kafusorku.’ <sup>4</sup> Nafiyag ay chaan en-enat nan huwis nan cha chawachawatun nan ellakas. Ngem as nan anongosna, kenalina as achorna, ‘Uray mu achiyak umugyat kan Apo Dios ya acheck rispituwun nan pachongku ay taku, <sup>5</sup> kunku at fiadngan nan nauy ellakas ay mangamis as nan kafusorna, tay kunak liliifikun. Mu acheck ichat nan kalintikiana, kun cha omalialintu ay omepeaayu.’”

<sup>6</sup> Kenalen pay Apo Jesus, “Chinngoryu nan kenalen nan hana achi nalintig ay huwis. <sup>7</sup> Ay hi Apo Dios at paat nan achi mangichat as kalintikian nan tataku ay pinilina ay cha chumawachawat as fiachangna as inurkiw ya lenafi? Ay iyaawnina ay mangfiachang kan chicha? Achi! <sup>8</sup> Ifiakiak kan chakayu, munichatnantu kan chicha nan kalintikiancha. Ngem as nan munfiangchantu nan Naepadtu ay Anak chi Taku, ay wachantu ngun chi uchanana ay omaafurot asna’s luta?”

### Nan Fariseo Ya Nan Mangam-among As Fiaror

<sup>9</sup> Infiakian us Jesus nan nauy maepadpachongan as nan tataku ay nange pangpanggas as kenalintigcha ya nangelalayus as pachongcha ay

† 17:32 Gen. 19:26 ‡ 17:36 As nan tapen nan manuskritu as nan kali ay Griego at maid na ay versikulu.

tataku. <sup>10</sup> “Wacha nan chuwa ay lanaraki ay inmuy as nan Templo ay uy nunkararag. Nan usa at Fariseo, ya nan usa at mangam-among as fiaror. <sup>11</sup> Tenmataak ay nangatachug nan Fariseo ya nunkararag as maepangkep as achorna. Kenalina, ‘Apo Dios, muryamanak kan he-a, tay achiyak kaman as nan tapina ay tataku ay naakum, somasator, umiwet, winnu uray kaman kan tonu ay mangam-among as fiaror. <sup>12</sup> Mun-ayunarak as chuwa ay urkiw as nan makachumingku, ya ichatku pay kan he-a nan pagkapuron nan am-in ay lagfok.’

<sup>13</sup> “Ngem nan mangam-among as fiaror at tenmakchug as nan ad-achawwi. Achi poros muntangad ad chaya, ngem kuna at cha tibib-ukun nan tagrangna, ya kanana un, ‘Apo Dios, masug-angka man paat kan ha-un ay usa ay fumafisnor.’

<sup>14</sup> “Ifiakiak kan chakayu ay nan nauy mangam-among as fiaror at kenmatam ay naifilang as nalintig as nan sangwanan Apo Dios, ngem nan Fariseo at chaan. Tay nan mangepangatu as achorna at maepababantu, ya nan mangepababa as achorna at maepangatuntu.”

### Nan Nangbendisyonan Jesus As Nan Ongong-a (Mat. 19:13-15; Mar. 10:13-16)

<sup>15</sup> As nan namingsan, wachacha nan cha mangiyuy as ongong-a kan Jesus uray manutun ta kaprosuna ay mangbendisyon kan chicha. Kun pay inilan nan disipulusna, senengarancha chicha. <sup>16</sup> Ngem enayakian Jesus nan ongong-a, ya kanana as nan disipulusna, “Yasa! Pay-anyu ay omali nan ongong-a kan ha-un. Achiyu epawa, tay nan tataku ay maepachong kan chatona ay ongong-a nan maetapi as nan muntorayan Apo Dios. <sup>17</sup> Ifiakiak kan chakayu nan tit-iwa ay nan achintu mang-awat as nan muntorayan Apo Dios ay kaman as nan atun nan usa ay onga at achintu poros makaskop henan muntorayan Apo Dios.”

### Nan Likiat Nan Fiaknang (Mat. 19:16-30; Mar. 10:17-31)

<sup>18</sup> Nunsarudsud nan usa ay ap-apon chi Judio kan Jesus, “Ammay ay Misturu, ngachana man nan masapor ay atok ay manawid as nan fiyag ay maid patingkiana?”

<sup>19</sup> Kenalen Jesus kan hiya, “Adchi t'uymu kanan un ammayak? Maid poros tukún as ammay omangkiay hi Apo Dios. <sup>20</sup> Ammom met nan filfilin Apo Dios: ‘Achika umiwet, achika pomatiy, achika mangakiw, achika munkutum ay muntistigu, ya rispituwum cha amam kan enam.’ ”\*

<sup>21</sup> Kenalen nan laraki, “Nunlapu as nan kaongak at enafurotku met am-in chaná.”

<sup>22</sup> Kun pay chinngor Jesus na, kenalina, “Wacha pay nan usa ay nunkurangam. Elakom am-in nan kuk-uwam, ya ichatmu nan lakuna as nan chiyucha pugli, at wachantu nan kenafiaknangmu ad chaya. Kun pay marpas, unuchunak.” <sup>23</sup> Ngem kuna pay chinngor na, ngimuyus, tay nafiaknang hiya as solet.

<sup>24</sup> Inilan Jesus ay nginmunguyus hiya, ya kanana, “Anuy paat nalikiat ay sungkop nan chiyucha wachay kenafiaknangcha henan muntorayan Apo Dios. <sup>25</sup> Narakraka pay ay lumfot nan kamelio as nan los-ok nan chakum mu nan fiaknang ay sungkop henan muntorayan Apo Dios.”

\* **18:20** Exo. 20:12-16; Deut. 5:16-20

<sup>26</sup> Ensarochakchak nan chiyuycha nanngor as na, “Ngachancha ngay ngarud nan mafialin ay maesarakán?”

<sup>27</sup> Tinumfor hi Jesus, “*Nan achi kafiaelan nan tataku ay ekaman at kafiaelan Apo Dios.*”

<sup>28</sup> Kenalen Pedro, “Enham! Tenaynanmi nan pamilyami, ya inmunud kами kan he-a!”

<sup>29</sup> Kenalen Jesus kan chicha, “*Ifiakiak kan chakayu nan tit-iwa ay nan nanaynan as afongna, asawana, susnúdra, chanakchakorna winnu an-akna kiapú as nan muntorayan Apo Dios* <sup>30</sup> *at ong-ongortu nan awatuna ad wani ay timpu, ya awatunantuy fiyag ay maid patingkiana as tapen chi urkiw.*”

### *Nan Kapitlu Ay Nangifiag-an Jesus As Nan Matuyana Ya Nan Matakuwana Manipud As Nan Utúy*

(Mat. 20:17-19; Mar. 10:32-34)

<sup>31</sup> Ensakiken Jesus nan hinpuru ya chuwa ay disipulusna, ya kanana kan chicha, “*Chumngor kayu! Cha takú tumikid ad Jerusalem, ya nan am-in ay insurat nan chiyuycha pomapadtu maepangkep as nan Naepadtu ay Anak chi Taku at matongpartu.*” <sup>32</sup> *Maipurangtu hiya as nan chiyuycha Gentil ay mangot-otyoktu, mangpabpaflaintu ya mangtubtubflaintu kan hiya.* <sup>33</sup> *Sapletunchantu ya patayunchantu hiya. Ngem as nan maekatlu ay urkiw at matakuntu hiya manipud as nan utúy.*”

<sup>34</sup> Ngem maid poros naawatancha as nan kenalina. Nan laychuna ay kanan at naililingub kan chicha, ya achicha challu ammu nan cha kankanan Jesus.

### *Enpaammay Jesus Nan Taku Ay Nafurag Ay Munlelemos*

(Mat. 20:29-34; Mar. 10:46-52)

<sup>35</sup> Kun pay kiayud umchan hi Jesus ad Jerico, wacha nan usa ay laraki ay nafurag ay cha munlelemos ay nangatokor as nan olet nan korsa.

<sup>36</sup> Kuna pay chinngor ay ongor chi cha mar-os ay tataku, ensarochakchakna, “Ngachana man nan cha om-ommat?” <sup>37</sup> “*Cha mar-os hi Jesus ay i-Nazaret,*” kenalicha kan hiya.

<sup>38</sup> Infukiaw nan nafurag, “Jesus ay Kianak David, sug-anganak man paat!”

<sup>39</sup> Nan nangepapangu ay tataku at senengarancha hiya, ya chacha ifiakia kan hiya ay kuminak koma hiya. Ngem kenaskasina infukiaw, “Kianak David, sug-anganak man paat!”

<sup>40</sup> Inyawnen Jesus, ya inflina ay iyalicha kan hiya nan nafurag. Kun pay naesnop nan nauy nafurag, senarudsud Jesus kan hiya, <sup>41</sup> “*Ngachana nan laychum ay atok kan he-a?*”

“Apo, makailaak koma,” ensongfiatna.

<sup>42</sup> Kenalen Jesus kan hiya, “*Makaila ka at! Nan pammatem nan nangepaammay kan he-a.*” <sup>43</sup> Hiya at chi ya makaila nan nafurag, at inmunud kan Jesus ya cha munchaychayaw kan Apo Dios. Uray us nan am-in ay tataku ay nangila as nan enommat at chinaychayawcha hi Apo Dios.

## 19

### *Cha Jesus Kan Zakeo*

<sup>1</sup> Inumchan hi Jesus ad Jerico ya cha mar-os henan hana ay ili. <sup>2</sup> Wacha nan nafiaknang hid-i ay ap-apon chi mangam-among as fiaror ay nan ngachana at Zakeo. <sup>3</sup> Laraychuna ay ilau mu kaassenan Jesus, ngem achina maila,

tay ongor chi tataku ya ap-aptek hiya. <sup>4</sup> Isunga tenmagtag ay enmon-oná, ya kenmarab as nan kaiw ay sikomoro ta ilauna hi Jesus, tay mar-ostu hid-i.

<sup>5</sup> Kun pay inumchan hi Jesus as nan kawad-an Zakeo, nuntangad, ya kanana, “Zakeo, kamuwum ay komsop, tay masapor chumawusak as afongmu ad wani ay urkiw.”

<sup>6</sup> Kenamon tit-iwa Zakeo ay kenomsop, ya ongor chi lagsakna ay nangmangili kan Jesus as afongna. <sup>7</sup> Angkiay ya am-in nan tataku ay nangila as na at enlapucha ay munmotmot. Kenalicha, “Nakkuran! Uy nunpamangili as nan taku ay fumafiasor.”

<sup>8</sup> Tenmakchug hi Zakeo, ya kanana as nan Apo, “Apo, chumngorka man paat. Ichatkuntu nan kakudwan nan kuk-uwak as nan pugli, ya mu wachay senatorku, ifiangadkuntu kan hiya as mamen opat ay kaongor mu nan enarak kan hiya.”

<sup>9</sup> Kenalen Jesus kan hiya, “Ad wani ay urkiw, naesarakan nan naiy ay hinfiaruy, tay hiya at usa us as nan nalitaw ay kianak Abraham. <sup>10</sup> Tay nan Naepadtu ay Anak chi Taku at emali ay manganap ya mangesarakan as nan nalitaw.”

### Nan Maepadpachongan Maepangkep As Nan Chiyuycha Fialetok Ay Silsilu

(Mat. 25:14-30)

<sup>11</sup> Kun pay cha epappapanaakian nan tataku chaná, inturuy Jesus ay nangosar as maepadpachongan kiapú ta kiayud umchan hiya ad Jerusalem ya kiapú ta ka-anan nan tataku ay munpaila ay dagus nan muntorayan Apo Dios. <sup>12</sup> Isunga kenalina, “Wacha nan usa ay mafifigfig ay taku ay inmuy as nan achaachawwi ay lukiar ta uy machutokan as ari. Angkiay ya munfiangad ay mun-ari henan mismu ay ilina. <sup>13</sup> Sakbay mak-ak hiya, enayakiana nan hinpuru ay fiabfiaaruna, ya inchatna kan chicha nan hin-us-a ay fialetok ay siping.\* Kenalina kan chicha, ‘Naui nan munpoonanyu ay munnigusyu inkiana munfiangachak.’

<sup>14</sup> “Ngem iningor nan kakailiyana hiya, at inmiftaorcha as mangunud kan hiya ay mangifikasi kan Emperador un, ‘Achimi laychun hiya ay mun-ari kan chakami.’ <sup>15</sup> Nachutokan challu ay mun-ari nan chiyuy mafifigfig ay taku.

“As nan nunfiangchana, enpaayagna nan chiyuycha fiabfiaaruna ay nangichatana as nan siping ta ammuwuna mu kaatna nan kiaransiaycha. <sup>16</sup> Inmuy nan omona, ya kanana, ‘Apo, nunkiaransiya as hinpuru nan chiyuy usa ay fialetok ay inchatmu.’ <sup>17</sup> ‘Ammay nan enatmu,’ ensongfiat nan ari. ‘Ammayka ay mafiabfiaor! Kiapú ta matalekká as nan ak-akettuy, ichatku kan he-a nan kalibfengan ay mangetoray henan hinpuru ay siyudad.’

<sup>18</sup> “Inmuy nan maekadwa, ya kanana, ‘Apo, nunkiaransiya as lema nan usa ay siping ay fialetok ay inchatmu.’ <sup>19</sup> Tinumfor hiya, ‘Ichatku kan he-a nan kalibfengan ay mangetoray henan lema ay siyudad.’

<sup>20</sup> “Inmuy nan usa ay mafiabfiaor, ya kanana, ‘Apo, nauy challu nan sipingmu ay intupugku ay lenekfotak as nan panyok. <sup>21</sup> Inmugyatak ngamin kan he-a, tay istriktuka ay taku. Kum lawá araun chi fiakunmu nunforayan, ya aniyum chi fiakunmu tinunud.’ <sup>22</sup> ‘Mangotetet chi ukialem ay mafiabfiaor;’ ensongfiat nan ari, ‘Chusaok he-a kiapú as nan hanacha kenalem. Ammom met ay istriktuwak ay taku ay mangara as fiakunku nunforayan ya mangani

\* <sup>19:13</sup> As nan kali ay Griego at kanana un hinpuru ay “minas”.

as fiakunku tinunud. <sup>23</sup> Adchi ngarud t'uymu chaan indiposito nan sipingku as bangko ta as nan mungfiangchak at araok ay wachay interesa?"

<sup>24</sup> "As nan hiyachi, kenalen nan ari as nan chiyuycha nangatackhug hid-i, Araunyu nan siping kan hiya, ya ichatyu as nan naichatan nan hinpuru."

<sup>25</sup> "(Ngem kenalicha kan hiya, 'Apo, wacha met mampay nan hinpuruna!')

<sup>26</sup> "Tinumfor hiya, 'Nan taku ay wachay kafaelana at maettan as ongongor. Ngem nan taku ay maid kafaelana, uray nan ak-akettuy ay wacha kan hiya at maarantu. <sup>27</sup> Ngem mu maepangkep as nan chiyuycha kafusorku ay chaan nanglayad ay etorayak chicha, iyaliyu chicha hena, ya patayunyu as nan sangwanak.'"

### *Nan Nangichaychayawan Nan Tataku Kan Jesus As Nan Inumchanana Ad Jerusalem*

(Mat. 21:1-11; Mar. 11:1-11; Jn. 12:12-19)

<sup>28</sup> Kun pay narpas ay infiakian Jesus na, emmon-onna hiya ay enmabrat ad Jerusalem. <sup>29</sup> Kun pay cha maesnop hiya ad Betfage ya Betania henan chuntug ay Olivo, enpaon-onana nan chuwa as nan disipulusna.

<sup>30</sup> Kenalina, "Uy kayu henan fiabruy ay sasakiangunyu. As nan umchananyu hid-i, uchananyu nan usa ay dongki ay urfun ay naetatakud ay chaan pay nasaksakayan. Fokatanyu, ya iyaliyu hena. <sup>31</sup> Mu wachay munsarudsud kan chakayu un, 'Adchi t'uyyu cha fokatan sa?' kananyuntu, 'Masapor nan Apo.'"

<sup>32</sup> Inmuycha ngarud nan chiyuycha naifiaor, ya ininchanancha tit-iwa nan infiakiana kan chicha. <sup>33</sup> Kuncha pay cha fokatan nan dongki ay urfun, kenalen nan chiyuycha nakin kuwa as nan dongki kan chicha, "Adchi t'uyyu cha fokatan nan dongki ay urfun?"

<sup>34</sup> "Masapor nan Apo," kenalicha. <sup>35</sup> Angkiay ya inyalicha nan urfun kan Jesus. Inyap-apcha nan chiyuycha kakiaycha as nan uchug nan nauy urfun, ya enpasakaycha hi Jesus. <sup>36</sup> Kun pay cha mar-os hi Jesus ay nunsasakay as nan urfun, nan tataku at inyaprakcha nan chiyuycha kakiaycha as nan korsa.

<sup>37</sup> As nan cha maesnopan Jesus ad Jerusalem, as nan chayyuwan ay nurpu henan chuntug ay Olivo, enlapon nan ongoongor ay disipulusna ay munlagragsak ya inpi pigsacha ay nangichaychayaw kan Apo Dios kiapú as nan am-in ay nakaskaschaaw ay inil-ilacha. <sup>38</sup> Infugfukiaiwcha, "Mabendisyonan koma nan Ari ay omali as nan ngachan nan Apo! Wachay kappia ad chaya, ya maichaychayaw hi Apo Dios!"

<sup>39</sup> Ngem nan tapina ay Fariseo ay naetatapi as nan ongor ay tataku at kenalicha kan Jesus, "Misturu, pakinkum man nan nauycha disipulusmu!"

<sup>40</sup> Tinumfor hi Jesus, "Ifiakak kan chakayu ay mu ikinak chatona, nan chiyuycha fiatuan munfukiaw."

### *Nan Nun-akiaran Jesus Kiapú As Nan Ommat Ad Jerusalem*

<sup>41</sup> As nan cha maesnopan Jesus ad Jerusalem, nun-akor hiya as nan nangil-ana henan siyudad. <sup>42</sup> Kenalina, "Chakayu ay i-Jerusalem, mu kunyu naammuwan uray ad wani nan kasaporan ta makekappia kayu kan Apo Dios. Ngem ad wani, naililingub at kan chakayu. <sup>43</sup> Omalintu nan urkiw ay nan chiyuycha kafusoryu at arachuncha nan siyudadu, liktufun chakayu, ya sokokun chakayu as nan am-in ay suli. <sup>44</sup> Chachaelunchantu as solet nan siyudadu, ya uray us chakayu ay umili hesa at patayuncha. Maidtu yagyakuncha as uray usa ay fiatuan naetotor-opana, tay chaanyu enmatonan nan timpu ay emaliyan Apo Dios ay mangesarakan koma kan chakayu."

*Nan Nangepak-akan Jesus As Nan Mun-el-elaku As Nan Templo  
(Mat. 21:12-13; Mar. 11:15-19; Jn. 2:13-17)*

<sup>45</sup> Kun pay inumchan hi Jesus ad Jerusalem, sinungkop as nan fiattaw nan Templo. Enlapuna ay mangepak-ak as nan chiyuycha cha mun-el-elaku hid-i. <sup>46</sup> Kenalina kan chicha, “*Wacha nan naisurat as nan Kalen Apo Dios ay kanana un, ‘Nan afongku at munkarkarakarian.’ Ngem kunyu at nunfalinun as muntabtafunan chi mangaakiw!*”†

<sup>47</sup> Inurkiw ay cha mun-is-isuru hi Jesus as nan Templo. Nan anap-apon chi papachi, nan mun-isursuru as Lintig ya nan tapina ay anap-apu at chacha anapun mu anan atuncha ay mangpatuy kan Jesus, <sup>48</sup> ngem maid atuncha. Tay am-in nan tataku at epapanaaagcha nan chana kankanan.

## 20

*Nan Sarudsud Maepangkep As Nan Kalibfengan Jesus  
(Mat. 21:23-27; Mar. 11:27-33)*

<sup>1</sup> As nan hin-urkiw ay cha mun-is-isuruwan Jesus as nan tataku as Templo ya as nan chana mangekaskasabaan as nan Ammay ay Chamag, innuy kan hiya nan anap-apon chi papachi, mun-isursuru as Lintig ya nan anam-amá. <sup>2</sup> Kenalicha, “Ayu, ifiakiam kan chakami mu anan nurpuwan nan kalibfengam ay cha mangekamkaman as na, winnu ngachana nan nangichat kan he-a as nan nauy ay kalibfengan.”

<sup>3</sup> Tinumfor hi Jesus, “*Wacha us nan sarudsuchok kan chakayu. Ifiakiayu man us kan ha-un* <sup>4</sup> *mu anan nurpuwan nan kalibfengan Juan ay munfunyag. Ay nurpu kan Apo Dios winnu as nan tataku?*”

<sup>5</sup> Angkiay kenalicha ay maaapat, “Mu kanan takú un, ‘Nurpu kan Apo Dios,’ kananantu un, ‘Anuyyu ngarud chaan enafurot hi Juan?’ <sup>6</sup> Ngem mu kanan takú un, ‘Nurpu as nan tataku,’ lomtakun chitakuntu as nan am-in ay tataku, tay afurotuncha ay hi Juan at usa ay pomapadtu.” <sup>7</sup> Isunga nan ensongfiatcha at achicha ammu nan nurpuwan nan kalibfengana.

<sup>8</sup> Kenalen Jesus kan chicha, “*Mu hiyasa, achen us ifiakia kan chakayu mu ngachana nan nakin kalibfengan as nan chak mangekamkamanan kan chatona.*”

*Nan Maepadpachongan Nan Mangaamma As Nan Uma  
(Mat. 21:33-46; Mar. 12:1-12)*

<sup>9</sup> Angkiay ya infiakian Jesus nan nauy ay maepadpachongan as nan tataku: “*Wacha nan usa ay taku ay nuntanum as ongor ay ubas as umana. Kuna pay enpaamma as nan chiyuycha mun-umauna, nunfiaat henan achawwi ay lukiar ya nafiyag hid-i.*” <sup>10</sup> Kun pay inumchan nan timpon chi munpurasan, infiaorna nan fiabfiaaruna as nan chiyuycha nun-uumauna ta uyna arauan nan kudwan nan amona ay ubas ay naapet as nan umana. Ngem kun at senaplesaplet nan chiyuycha nun-uumauna hiya, angkiay enpafiangadcha hiya ay maid in-inchatcha. <sup>11</sup> Kun pay narpas sa, infiaorna us nan usa, ya kuncha us senaplesaplet, penafianan, angkiay enpafiangadcha hiya ay maid in-inchatcha. <sup>12</sup> Infiaorna nan maekatlu. Finakagcha hiya, ya inchus-orchas as nan fiakun sakop nan uma. <sup>13</sup> Kenalen nan nakin kuwa as nan uma un, ‘Anan atok ngun? A! Ifiaorku nan laylachok ay anakku. Urumya mafainchantu kan hiya.’

† **19:46** Isa. 56:7; Jer. 7:11

**14** “Ngem kun pay inilan nan chiyuycha nun-uumauna nan anakna, *kenalicha un, ‘Nauy nan mangetawid as nan uumaun takú ay natatanman as ubas. Akayu! Patayun takú hiya ta kuwaun takú nan tawidna.’* <sup>15</sup> As nan hiyachi, *inchus-orcha* hiya as nan fiakun sakop nan uma ay natatanman as ubas ya penatuycha.

“Ngachanantu ngay nan atun nan nakin kuwa as nan uma ay natatanman as ubas as nan chiyuycha nun-uumauna? <sup>16</sup> Omalintu hiya ay mangpatuy kan chicha, ya ichatna as nan tukún nan umana ay natatanman as ubas.”

Kun pay chinngor nan tataku na, kenalicha, “Aw! Fiakun koma assesay ommat.”

**17** Entoongan Jesus chicha, ya kanana, “*Ngachana ngarud nan laychun ay kanan nan nauy naisurat as nan Kalen Apo Dios? Kanana un, ‘Nan chiyuy fiatu ay enachen nan chiyuycha muntuptuping at hiya nan nunfialin as kaamuchan ay maipugnad.*”\*

**18** Am-in ay tataku ay mag-as as nan hana ay fiatu at mapet-apet-ang. Ngem kun pay mag-as nan hana ay fiatu as nan kumpurmi at kimokunantu nan hana mag-asana.”

#### *Nan Sarudsud Maepangkep As Nan Munfiayachan As Fiaror (Mat. 22:15-22; Mar. 12:13-17)*

**19** Kiapú ta naawatan nan mun-isursuru as Lintig ya nan anap-apon chi papachi ay nan nauy maepadpachongan ay infiakian Jesus at maepangkep kan chicha, penachascha ay epatiliw hiya as nan hiyachi ay uras, ngem immugatcha as nan tataku. **20** Isunga nunsuudcha as chansacha ay mangtiliw kan hiya. Infiaorcha nan napasoksokan ay lanaraki ay pakamankaman ay uy manikap kan Jesus ta wachay ifiakiana as mangicharumancha kan hiya ta ipurangcha hiya as nan gobernador ay wachay kalibfengana ay munokóm. **21** Inmuycha kan Jesus nan napasoksokan, ya kanancha kan hiya, “Misturu, ammumi ay ustu nan kanam ya isurom. Ammumi us ay maid paspasikum, ngem isurom nan tit-iwa ay laychun Apo Dios ay atun nan tataku. **22** Ifiakiam pay ngarud kan chakami nan songfiatmu as na: Ay eparufus nan lintig takú ay munfiayad kami as fieror kan Emperador ad Roma winnu achi?”

**23** Ngem ammon Jesus nan kenasikapcha, ya kanana kan chicha, **24** “*Ud-a, omepaila kayu kan ha-un as usa ay silsilyu. Ngachana nan nakin lupa ya nakin ngachan as na?*”

“Hi Emperador,” ensongfiatcha.

**25** Kenalen Jesus kan chicha, “*Mu hiyasa ngarud, ichatyu kan Emperador nan kuk-uwan Emperador, ya ichatyu us kan Apo Dios nan kuk-uwan Apo Dios.*”

**26** Achicha poros kafaelan ay isikapan hi Jesus babaen as nan kenalina as nan mangilinan tataku. Kiapú ta naschaawcha as nan ensongfiatna, kinminakcha.

#### *Nan Sarudsud Maepangkep As Nan Matakuwan Nan Natuy Manipud As Nan Utúy*

*(Mat. 22:23-33; Mar. 12:18-27)*

**27** Wachacha nan tapen nan Saduseo ay enmali kan hiya. Chicha nan bunggoy chi Judio ay mangali un achi mataku nan natuy manipud as nan utúy. Senarudsudcha kan hiya. **28** “Misturu, nauy met nan insurat Moises

\* **20:17** Sal. 118:22; Efe. 2:20; 1 Ped. 2:6-8; Ara. 4:11

para kan chitaku ay kanana un, ‘Mu wachay hen-asawa ay maid anakcha ya matuy nan laraki, masapor asawaun nan sunúd nan laraki nan naellakas ta mu wachay anakcha at maifilangtu nan onga as potot nan chiyuy natuy ay sunúdma.’<sup>†</sup> <sup>29</sup> Wachacha kanu nan pitu ay hen-anag-i ay lanaraki. Enmasawa nan panguru, at natuy ay maid enpototna. <sup>30</sup> Enasawan nan utub nan chiyuy naellakas, at natuy us ay maid enpototna. <sup>31</sup> Assid-i us challu as nan maekatlu inkiana as nan maekapitu. Natuycha am-in nan pitu ay maid enpotpototcha. <sup>32</sup> Kuncha pay natuy am-in, natuy us nan fiafiai. <sup>33</sup> As nan urkiw ay matakwanan nunkatuy manipud as nan utúy, ngachana ngay nan nakin asawa as nan chiyuy fiafiai, tay enasawan met nan pitu hiya?’

<sup>34</sup> Tinumfor hi Jesus, “*Nan tataku asna's luta at mun-eennasawacha.* <sup>35</sup> Ngem nan chiyuycha natuy ay maekari ay matakua manipud as nan utúy ya maketaku kan Apo Dios at achichantu mun-eennasawa, <sup>36</sup> tay kamancha anheles ay achi matmatuy. An-aktu Apo Dios chicha, tay matakucha manipud as nan utúy.

<sup>37</sup> “Uray hi Moises at penaneknekana ay matakua nan natuy manipud as nan utúy. As nan naisurat as nan Kalen Apo Dios maepangkep as nan cha munkiarkiarud ay kaiw at enawakian Moises hi Apo Dios ay kanana un, ‘Nan Apo at hiya nan Dios Abraham, nan Dios Isaac ya nan Dios Jacob.’<sup>‡</sup> <sup>38</sup> Nan laychun nan nauy ay kanan at hiya nan Dios nan matakua, fiakun nan nunkatuy. Tay mu as nan fiyang Apo Dios, nan am-in at matakua.”

<sup>39</sup> Angkiay kenalen nan tapina ay mun-isursuru as Lintig, “Ammay met kayman nan ensongfiatmu, Misturu.” <sup>40</sup> Kenalicha chi, tay chaancha naiturud ay munsarudsud kasin kan hiya.

#### *Nan Sarudsud Maepangkep As Nan Cristo (Mat. 22:41-46; Mar. 12:35-37)*

<sup>41</sup> Angkiay kenalen Jesus kan chicha, “Anuyna atun ay nan Cristo at makali un kianak David? <sup>42</sup> Tay uray met hi David ay mismu at kanana as nan liblu ay Salmo un,

‘Kenalen nan Apo as nan ok Apo un: Tomokorka as apét kannawanku

<sup>43</sup> inkiana amisok nan chiyuycha kafusormu ay kaman chicha nan kiakiati-nam.’<sup>§</sup>

<sup>44</sup> Inturuy Jesus, “Mu hiyasa ngegarud ay ‘Apo’ nan pang-awag David kan Cristo, anuyna ngay atun ay nan Cristo at kianak David?”

#### *Nan Infiagfiakian Jesus Maepangkep As Nan Mun-isursuru As Lintig (Mat. 23:1-36; Mar. 12:38-40)*

<sup>45</sup> As nan chuchumngoran nan am-in ay tataku, kenalen Jesus as nan disipulusna, <sup>46</sup> “Il-launyu nan nauycha mun-isursuru as Lintig. Laylay-chuncha ay munliklikud ay nakafiachu as somakiayad, ya laylaychuncha ay cha risrispituwun nan tataku chicha as nan chiyuycha mun-el-elakwan. Laylaychuncha nan chiyuycha kaammayan ay tokoran as tomoktokorancha ya tokoran nan chiyuycha mafifigfig as nan chiyuycha senagoga as nan uycha makifistaan.”<sup>47</sup> Isikapcha ay manguwa as nan ab-afong nan eellakas. Angkiay paanchuanchuwuncha nan kararagcha ta ilaun nan tataku ay am-maycha. Naliglikiattu nan chusacha!”

<sup>†</sup> **20:28** Deut. 25:5    <sup>‡</sup> **20:37** Exo. 3:6    <sup>§</sup> **20:43** Sal. 110:1; Ara. 2:35; Heb. 1:13; 10:12-13

# 21

## *Nan Chaton Nan Ellakas (Mar. 12:41-44)*

<sup>1</sup> Kun pay nuntangad hi Jesus, inilana nan nunkafiaknang ay cha mangittu as chatoncha ay siping as nan mangit-ittawan as Templo. <sup>2</sup> Inilana us nan usa ay pugli ay ellakas ay nangittu as kun chuwa ay pesos. <sup>3</sup> As nan hiyachi, kenalen Jesus, “*Ifiakiak kan chakayu nan tit-iwa. Hi tona ay pugli ay ellakas nan nangittu as kachamunaan kan chicha am-in.*” <sup>4</sup> Tay nan nunkafiaknang at kuncha yangkiay inchat nan subra as nan kenafiaknangcha. Ngem hi tona ay ellakas uray pugli at inittuna challu nan am-in ay wacha kan hiya ay kurpuwan chi pagfiyagna.”

## *Nan Nangepakaammuwan Jesus As Nan Machachaelan Nan Templo (Mat. 24:1-2; Mar. 13:1-2)*

<sup>5</sup> Wachacha nan tapina ay cha mangapat as nan kenaam-ammay nan Templo kiapú as nan anam-ammay ay fiatu ay naiyamma ya nan naiyar-arkos ay naichatchaton kan Apo Dios. <sup>6</sup> Kenalen Jesus, “*Am-in chaná ay ilalaunu at umchantu nan timpu ay maidtu mayagyag as uray usa ay fiatu as nan naesasad-ana, tay kuncha am-in maikur-ub.*”

## *Nan Liglikiat Ay Ommattu (Mat. 24:3-14; Mar. 13:3-13)*

<sup>7</sup> Senarudsudcha kan Jesus, “Misturu, kaatnantu nan ommatan chatona, ya ngachanantu nan sinyar ay mangematonan as nan kiayud ommatan chatona?”

<sup>8</sup> Tinumfor hi Jesus, “*Il-ilaunu ta achi kayu maar-allilaw. Ongortu nan tataku ay omali ay mangosar as nan ngachanku ay mangarkali un, ‘Ha-un hi Cristo!’ ya ‘Kiayud umchan nan timpu!’ Achiyu poros un-unuchun chicha.*” <sup>9</sup> As nan manngoranyu ay wachachay kukufiat ya kukuru, achi kayu umug-ugyat as solet. *Masapor challu ommat chaná on-oná, ngem fiakun pay hiyasa nan munpatingkiaan nan ka-ichin.*”

<sup>10</sup> Kenalen pay Jesus, “*Munkikinnufiattu nan chiyuycha nasyon ya kaman us nan chiyuycha muntorayan.*” <sup>11</sup> *Henan tukutukún ay luglukiar, wachachantu nunkapiagsa ay kichu, ya wachachay fitel ya kauugyat ay saksaket ay ekatuytu nan tataku. Wachachantu us nan maila ad chaya ay kauugyat ya nakaskaschaaw ay sinyar.*

<sup>12</sup> “*Ngem sakbay ommat chaná, wachachantu nan mangtiliw ya mamalikiat kan chakayu. Ichárum chakayuntu as nan totoray as nan chiyuycha senagoga, ya ifiarud chakayu. Iyu chakayuntu as nan ar-ari ya as nan gogobernador kiapú as nan pammatiyu kan ha-un.*” <sup>13</sup> *Hiyanantu nan chansayu ay mangepaneknek as nan Ammay ay Chamag kan chicha.* <sup>14</sup> *Nunumnumunyu ay achi kayu machanakian mu ngachanantu nan esongfiatyu,* <sup>15</sup> *tay ha-untu nan mangichat kan chakayu as kananyu ya kenasilibyu ay achintu makontra winnu masongfiatan nan kafusoryu.* <sup>16</sup> *Uray chanakchakoryu, susnúdyu, ibayu, ya kiakiayyumu at epatiliw chakayuntu, ya nar tapina kan chakayu at patayunchantu.* <sup>17</sup> *Inglun chakayuntu as nan am-in ay tataku kiapú as nan pammatiyu kan ha-un.*” <sup>18</sup> *Ngem uray mu hiyasa, aaywanan chakayu challu kan Apo Dios ta uray usa as nan fookyu at achi malitaw.* <sup>19</sup> *Mun-eta-un kayu, tay hiyana nan aturyu ay mangara as nan fiyagu ay maid patingkiana.”*

**Nan Machachaelan Nan Siyudad Ay Jerusalem  
(Mat. 24:15-21; Mar. 13:14-19)**

**20** Inturuy Jesus, “As nan mangil-anyuntu ay nan ili ay Jerusalem at li-wusun chi ongor ay sosorchachu, maammuwayuntu ay kiayud umchan nan machachaelana. **21** As nan hiyasa, nan umiili ad Judea at masapor lomayawcha ay umuy henan chiyuycha chuntug. Masapor mak-ak nan chiyuycha wacha henan siyudad, ya nan chiyuycha wacha henan sigsikib at masapor achicha sungkop henan siyudad, **22** tay chatonantu nan ‘Urkiw ay Machusaan’ ta matongpar nan am-in ay kanan nan naisurat as nan Kalen Apo Dios. **23** Kasusug-angtu nan chiyuycha masisikug ya nan cha munpasusu as nan hanacha ay urkiw! Omalintu nan nunsidla ay likiat asna’s luta, ya leknaun nan nauycha tataku nan fungat Apo Dios. **24** Matuytu nan tapina as choros, ya nan tapina at maifiarudchantu ay maiuy henan tukutukún ay nasyon. Nan siyudad ay Jerusalem at chachaeluntu nan chiyuycha Gentil. Chichantu nan muntoray inkiana marpas nan naekeddeng ay timpucha.”\*

**Nan Kasin Omaliyan Nan Naepadtu Ay Anak Chi Taku  
(Mat. 24:29-31; Mar. 13:24-27)**

**25** Kenalen pay Jesus, “Wachachantu nan sinyar ay maila as nan urkiw, furan ya taraw. Malilifokantu as solet nan am-in ay tataku henan am-in ay nasyon kiapú as nan nunsidla ay ugyatcha as nan napigsa ay atifungug henan fiayfiay ya anad-acha ay challuyon. **26** Maurawchantu nan tataku kiapú as ugyatcha ay munsusuud as nan ommattu asna’s luta, tay achintumanongnong chi aatun nan am-in ay wacha ad chaya.† **27** Angkiay ya ilauchantu nan Naepadtu ay Anak chi Taku ay wachay kaichayawana ya pannakafialina ay cha omali ay maetatapi as nan lifuu.‡ **28** As nan maelapuwan nan nauycha ay ommat, tomakchug ya muntangad kayu, tay kiayud umchan nan mae-sarakananyu.”

**Nan Maepadpachongan Nan Kaiw  
(Mat. 24:32-35; Mar. 13:28-31)**

**29** Angkiay ya infiakiak Jesus kan chicha nan nauy maepadpachongan: “Ilaunyu nan kaiw ay igos ya nan am-in ay tapen chi kaiw. **30** As nan mangil-anyu ay chacha somaliping, ammuyu at ay kiayud nan chakun. **31** Assesa us ay as nan mangil-anyu ay cha om-ommat chaná at ammuyuntu ay kiayud at umchan nan muntorayan Apo Dios.

**32** “Ifiakiak kan chakayu nan tit-iwa. Wachacha nan tapen nan tataku ad wani ay timpu ay matataku pay laing as nan ommatantu nan am-in ay infiakiak. **33** Mamaidtu nan chaya ya luta, ngem achi poros mamaid nan kalek.

**Nan Nakasakianaanyu As Nan Pammatiyu**

**34** “Il-ilaunyu ta fiakun nan narafus ay lagragsak ya futfutang ya chan-chanag as maepangkep as pagfiyag nan nunumnumunyu. Mu atunyu chaná, makudnor kayuntu ay kaman kayu makna as nan loktat ay omaliyan nan hana ay urkiw. **35** Tay nan hana ay urkiw at umchan as nan am-in ay tataku asna’s luta. **36** Isunga kanayon kayu ay nakasakiana, ya masapor kanayon kayu ay munkarkararag ta mawad-an kayu as pigsa ay mangeta-un as nan nauycha am-in ay ommattu ya ta makatakchug kayuntu as nan sangwanan nan Naepadtu ay Anak chi Taku.”

\* **21:24** Rom. 11:25

† **21:26** Isa. 13:9-11; 34:4; Joel 2:10; Pal. 6:12-17

9:7; 14:62; Pal. 1:7

‡ **21:27** Dan. 7:13; Mar.

<sup>37</sup> Inurkiw ay nun-is-isuru hi Jesus as Templo, ya lenafi ay uy immiyan henan chuntug ay Olivo. <sup>38</sup> Am-in nan tataku at inurkiw ay fumikiatcha ay umuy as Templo ay uy munchungor kan hiya.

## 22

### *Nan Nangyanapancha As Atuncha Ay Mamatuy Kan Jesus (Mat. 26:1-5; Mar. 14:1-2; Jn. 11:45-53)*

<sup>1</sup> Kiayud umchan nan Fiastan chi Tenapay ay Maid Lebadurana ay kanan-chi un Fiastan chi Munlausen. <sup>2</sup> Inyan-anap nan anap-apon chi papachi ya nan mun-isursuru as Lintig nan atuncha ay mangepapatuy kan Jesus, tay umugyatcha as nan tataku.

### *Nan Nakiturakian Judas Ay Mangesepsep Kan Jesus (Mat. 26:14-16; Mar. 14:10-11)*

<sup>3</sup> Sinungkop hi Satanas kan Judas ay makali un Iscariote ay usa as nan hinpuru ya chuwa ay disipulus Jesus. <sup>4</sup> Inmuy hi Judas as nan anap-apon chi papachi ya chiyucha opisyar chi kukuwarcha as nan Templo ta makiturag mu anan atuna ay mangesepsep kan Jesus kan chicha. <sup>5</sup> Naragsakancha ya enkaricha ay ichatcha nan siping kan hiya. <sup>6</sup> Inyafud Judas, at nun-anap as ustу ay chansa ay mangesepsepana kan Jesus ay achi maam-ammuwanan tataku.

### *Nan Nangepasakianaan Jesus As Nan Anongos Ay Makiufongan As Nan Disipulusna*

*(Mat. 26:17-25; Mar. 14:12-21)*

<sup>7</sup> Angkiay ya enmali nan urkiw ay Fiastan chi Tenapay ay Maid Lebadurana ay hiyasa us nan naichatonan nan chiyucha urfun ay karnero para as nan Fiastan chi Munlausen. <sup>8</sup> Infiaor Jesus cha Pedro kan Juan. Kenalina kan chicha, “Uyyu esakiana nan manganan takú as nan Fiastan chi Munlausen.”

<sup>9</sup> Senarudsudcha, “Ay chaud nan laychum ay mangesakianaanmi?”

<sup>10</sup> Tinumfor hi Jesus, “Chumngor kayu. As nan sungkopanyu henan siyudad, wachantu nan manib-at kan chakayu ay usa ay laraki ay manasakfiat as fusi ay natotorwan as chanum. Unuchunyu hiya inkiana as nan afong ay sungkopana.

<sup>11</sup> Angkiay ya kananyu as nan nakin afong, ‘Sarudsuchun nan Misturu kan he-a: Ay chaud nan kuwartu ay mangiyufonganantu as nan disipulusna as nan Fiastan chi Munlausen?’ <sup>12</sup> Epailanantu kan chakayu nan nunngangatu ay kuwartu ay ad-acha ay kawad-an nan am-in ay kasaporan takú. Hid-i nan munsakianaanyu.”

<sup>13</sup> Inmuycha, ya ininchanancha nan am-in ay infiakian Jesus kan chicha. As nan hiyachi, ensakianacha nan manganan as nan Fiastan chi Munlausen.

### *Nan Anongos Ay Nakiufongan Jesus As Nan Apostolesna As Nan Lafi (Mat. 26:26-30; Mar. 14:22-26; 1 Co. 11:23-25)*

<sup>14</sup> As nan inumchanan nan uras ay manganancha, nakiufong hi Jesus as nan apostolesna. <sup>15</sup> Angkiay ya kenalina kan chicha, “Lenarayaduk paat ay makiufong kan chakayu as nan nauy Fiastan chi Munlausan sakbay munlikiat, <sup>16</sup> tay ifiakiak kan chakayu, achiyaktu kasin mangmangan as nan nauy inkiana matongpar as nan muntorayan Apo Dios.”

<sup>17</sup> Angkiay ya enarana nan tasa ay natotorwan as maikop. Kun pay narpas ay nynyaman kan Apo Dios, kenalina, “Araunyu na, ya hen-anak-etunyu am-in ay mangikop. <sup>18</sup> Ifiakiak kan chakayu, munlapu ad wani, achiyaktu umigikop as nan unus chi ubas inkiana omali nan muntorayan Apo Dios.”

**19** Enarana us nan tenapay. Kun pay narpas ay nunyaman kan Apo Dios, pinutput-ingna, ya inchatna kan chicha, ya kanana, “*Hiyana nan achorku ay maichat kan chakayu. Atunyu na as mangnumnumnumanyu kan ha-un.*”

**20** Kaman us as nan narpasancha ay nangan, inchatna nan tasa, ya kanana, “*Nan nauy naetatasu at hiyana nan fiarú ay nakiturakian Apo Dios as nan tatakuna, epailantu nan charak ay omayas para kan chakayu.*

**21** “*Ngem ilaunyu at cha makiufong hena nan mangesepsep kan ha-un.*” **22** *Tay matuyu challu nan Naepadtu ay Anak chi Taku ay kaman as nan enked-deng Apo Dios. Ngem kasusug-ang kayman nan hana taku ay mangesepsep kan hiya!*” **23** Angkiay ya enlapucha ay munesennarudsud mu ngachana kan chicha nan mangekaman as na.

### *Nan Susuma Mu Ngachana Nan Kaamuchan*

**24** Kun pay naaw-awni as akét, nasusuma nan disipulus mu ngachana kan chicha nan kaamuchan. **25** Kenalen Jesus kan chicha, “*Nan ar-ari asna's luta at kuncha cha etortorayan nan tatakucha, ya nan chiyuya wachay kalibfengancha ay muntoray at ngadrancha nan mismu ay achorcha as 'Fumadfiachang'.*” **26** *Ngem fiakun koma assesa kan chakayu. Ngem kun at nan kaamuchan kan chakayu at ifilangna koma nan achorna as kaongaan, ya nan ap-apu at ifilangna nan achorna as mafiabfiaor.* **27** *Ngachana pay nan am-amud, nan tomokor ay mangan winnu nan umichat as makan?* Ay fiakun nan chiyuy tomokor ay mangan? *Ngem ha-un, nauyak kan chakayu ay maepachong as nan mafiabfiaor.*

**28** “*Chakayu nan chaan nanaytaynan kan ha-un as nan liglikiatku.*” **29** *Isunga epatorayku chakayu ay kaman as nan nangeپatorayan amak kan ha-un* **30** *ta makiufong kayuntu kan ha-un as nan muntorayak, ya tomokor kayuntu as nan chiyuya trono ay mangokóm as nan hinpuruya chuwa ay tribu ay chicha nan kianak Israel.”*

### *Nan Nangeپakaammuwan Jesus As Nan Mangesaotan Pedro Kan Hiya (Mat. 26:31-35; Mar. 14:27-31; Jn. 13:36-38)*

**31** Angkiay kenalen Jesus kan Simon Pedro, “*Simon, Simon, chumngorka. Naparufusan hi Satanás ay manisting kan chakayu am-in ta masisiyan kayu ay kaman as nan maisiyanan nan fukias as nan chuki.*” **32** *Ngem enkararakia he-a, Simon ta achi mamaid nan pammatem. As nan munfiangcham kan ha-un, masapor papigsaum nan pammatem nan iib-am.”*

**33** Tinumfor hi Pedro, “*Apo, nakasakianaak ay maetapi kan he-a ay maifi-arud ya matuyu.”*

**34** “*Ifiakiak kan he-a, Pedro,*” kenalen Jesus, “*Achintu munkokakok nan kator ad wani inkiana mamitluwak esaot kan he-a.”*

### *Nan Petaka, Samfiag Ya Chorus*

**35** Angkiay kenalen Jesus kan chicha, “*As nan nangifiaorak kan chakayu ay maid entaktakinyu as petaka, samfiag winnu sapatos, ay wachay nunkuran-ganyu?*”

“Maid ya,” ensongfiatcha.\*

**36** Kenalen Jesus kan chicha, “*Ngem ad wani, nan wachay petakana at masapor etakina, ya kaman us nan samfiagna. Nan maid chorosna at masapor elakuna nan kakiayna ta paat lomaku as usa.*” **37** *Tay ifiakiak kan chakayu ay masapor ommat kan ha-un nan naisurat as nan Kalen Apo Dios ay kanana,*

\* **22:35** Luc. 10:4

*'Maifilang hiya as lomalabsing as lintig.'*

*Tay nan hana naisurat maepangkep kan ha-un at kiayud matongpar."*†

<sup>38</sup> Kenalen nan disipulusna, "Apo, nauy met nan chuwa ay chorosmi hena."

"Nawan sa," ensongfiat Jesus.

*Nan Nunkarakian Jesus Henan Chuntug Ay Olivo  
(Mat. 26:36-46; Mar. 14:32-42)*

<sup>39</sup> Angkiay ya nak-ak hi Jesus henan siyudad, ya inmuy henan chuntug ay Olivo ay hiyachi challu nan chana atutun. Nakiuya us nan disipulusna.

<sup>40</sup> Kuncha pay inumchan hid-i, kenalina kan chicha, "*Munkararag kayu ta achi kayu maamis as nan sulisug.*"

<sup>41</sup> Angkiay ya tenaynana chicha ya inmuy as nan kaachawen chi maiki-ayangan chi fiatu. Hid-i nan nunpalintumangana ya nunkarakiana ay kanana, <sup>42</sup> "Ama, mu laychum, kaanum koma kan ha-un nan nauy omali ay likiatku. Ngem fiakun nan laychok nan matongpar; kun at nan laychum."

<sup>43</sup> Wacha nan usa ay anghel ay nurpu ad chaya ay nunpaila ya nangepapigsa kan hiya. <sup>44</sup> Kiapú ta nalilifokan as solet, kaskasina enpapasnek ay nunkararag. Nan lengatna at maepachong as nan chara ay timmidtid as nan luta.

<sup>45</sup> Kun pay narpas ay nunkararag, tenmakchug ya nunfiangad as nan kawad-an nan disipulusna. Ininchanana chicha ay nanassuy kiapú as foraycha as nan nginmuyusancha. <sup>46</sup> Kenalina kan chicha, "*Adchi t'uy kayu mamassuy? Fumangun kayu, ya munkararag kayu ta achi kayu maamis as nan sulisug.*"

*Nan Natiliwan Jesus  
(Mat. 26:47-56; Mar. 14:43-50; Jn. 18:3-11)*

<sup>47</sup> Kun pay kukutug ay cha munkarkali hi Jesus, enmali nan ongor ay tataku ay enpapanguruwan Judas ay usa as nan hinpuru ya chuwa ay disipulusna. Naesnop hiya ay mamisitu kan Jesus, <sup>48</sup> ngem kenalen Jesus kan hiya, "*Judas, ay as nan mamisituwam as nan Naepadtu ay Anak chi Taku nan atum ay mangesepsep kan hiya?*"

<sup>49</sup> Kun pay inilan nan disipulus ay naketakin kan Jesus nan ommat, senarudsudcha, "Apo, ay fumakag kami?" <sup>50</sup> As nan hiyachi, finakag nan usa as nan disipulus nan fiabfiaarun nan kangatuwan ay pachi, at nakingasan nan kannawan ay ingana.

<sup>51</sup> Ngem kenalen Jesus kan chicha, "*Ustu sa!*" Angkiay ya kenpana nan ingan nan mafiabfiaor, at enpaammayna hiya.

<sup>52</sup> Angkiay kenalen Jesus as nan anap-apon chi papachi, oopisyar nan chiyucha kuwarcha as nan templo, ya as nan anam-amá ay enmali ay uy mangtiliw kan hiya, "Ay kunak kumukuru? *Adchi t'uy kayu enmali ay nangachoros ya nangapak-or?*" <sup>53</sup> *Inurkiw met ay wachaak as Templo, ya chaanak met tiniltiliw kan chakayu. Ngem urasyu ad wani, ya uras Satanas ay mangetoray as kenamangisisi.*"

*Nan Nangesaotan Pedro Kan Jesus  
(Mat. 26:57-58, 69-75; Mar. 14:53-54, 66-72; Jn. 18:12-18, 25-27)*

<sup>54</sup> Angkiay ya tiniliwcha hi Jesus, ya inyuycha as nan afong nan kangatuwan ay pachi. Kun pay hi Pedro, inmun-unud ay tenmataak. <sup>55</sup> Kun pay naiyapuy as nan kiawan nan fiattaw, uy naketokor hi Pedro as nan

† 22:37 Isa. 53:12

chiuyucha cha mun-an-anichu. <sup>56</sup> Ngem wacha hid-i nan usa ay mafiabfiaor ay fiafiai ay nangila kan Pedro ay temmotokor ay cha makean-anichu. Entoongana, ya kanana, “Hi tona met ay laraki at usa us ay nakekadkadwa kan Jesus.”

<sup>57</sup> Ngem ensaot Pedro, “Ammi, achek poros am-ammu hiya!”

<sup>58</sup> Kun pay naaw-awni, nan tukún ay laraki at enmatonana us hi Pedro, ya kanana, “He-a us at usaka met as nan kakadwana.”

Ngem tinumfor hi Pedro, “Aw, fiakunak met usa kan chicha!”

<sup>59</sup> Uy at kiayud usa ay uras chi inmuy, wacha nan usa pay ay laraki ay nangepapelet, “Tit-iwa met ay nakekadkadwa us na ay laraki kan Jesus, tay i-Galilea met hiya.”

<sup>60</sup> Ngem tinumfor hi Pedro, “Lakay, achek poros ammu nan cham kankanan!” Kun pay kukutug ay cha munkarkali hi Pedro, hiya at chi ya nunkokakok nan ka-or. <sup>61</sup> Nunsakong hi Apo Jesus, ya entoongana hi Pedro. Hiya at chi ya nanumnum Pedro nan infiakian nan Apo kan hiya un, “*Sakbay munkokakok nan ka-or ad wani at mamitluwaktu esaot kan he-a.*” <sup>62</sup> Angkiay ya pinmitiw hi Pedro, ya nunsidlay akorna.

### *Nan Nangot-otyokan Ya Nanapsaplitancha Kan Jesus*

(Mat. 26:67-68; Mar. 14:65)

<sup>63</sup> Ad wani, nan tataku ay nangukuwarcha kan Jesus at enot-otyok ya senaplesapletcha hiya. <sup>64</sup> Enkopancha nan matana, ya senarudsudcha kan hiya, “Ud-a pay! Pugtuwam mu ngachana nan nanuppak kan he-a.” <sup>65</sup> Ongor pay chi kafiafiain ay infiagfiakiacha kan hiya.

### *Nan Namistikiaran Nan Anap-apon Chi Papachi Kan Jesus*

(Mat. 26:59-66; Mar. 14:55-64; Jn. 18:19-24)

<sup>66</sup> As nan wi-ewi-et, naamongcha nan membron nan Sanhedrin ay chicha nan anam-amán chi Judio, anap-apon chi papachi, ya nan chiuyucha munisursuru as Lintig. Kun pay narpas chi, inyuycha hi Jesus as nan sangwanan nan Sanhedrin. <sup>67</sup> Kenalicha kan hiya, “Ifiakiam man kan chakami mu he-a nan Cristo?”

Tinumfor hi Jesus, “*Uray mu ifiakiak kan chakayu, achiyuntu challu afurtun.*” <sup>68</sup> *Mu munsarudsuchak kan chakayu, achi kayuntu challu tumfor.*

<sup>69</sup> Ngem murlapu ad wani, tomokortu nan Naepadtu ay Anak chi Taku as apét kannawan Apo Dios ay Mannakafialin as nan am-in.”

<sup>70</sup> Senarudsudcha am-in, “Mu hiyasa, ay he-a ngarud nan anak Apo Dios?”

“*Chakayu nan nangali un ha-un,*” ensongfiat Jesus.

<sup>71</sup> Hacha at kanan, “Ay masapor takú pay chi tapina ay muntistigu? Chinngor takú met ay mismu nan kenalina.”

## 23

### *Nan Naiyuyan Jesus Kan Pilato*

(Mat. 27:1-2, 11-14; Mar. 15:1-5; Jn. 18:28-38)

<sup>1</sup> Angkiay ya naligwat nan am-in ay membron nan Sanhedrin, ya inyuycha hi Jesus kan Gobernador Pilato. <sup>2</sup> Enlapucha ay mangicharam kan hiya. Kenalicha, “Tiniliwmi na ay taku ay cha mangurkuru as nan kakailiyanmi. Epawanay munfiayachan as fieror kan Emperador, ya kanana us un hiya nan Cristo ay usa ay ari.”

<sup>3</sup> Senarudsud Pilato kan Jesus, “Ay he-a nan aren chi Judio?”

“*He-a nan nangali un ha-un,*” ensongfiat Jesus.

<sup>4</sup> Kenalen Pilato as nan anap-apon chi papachi ya as nan ongor ay tataku, “Maid naanapak as fiasor tona ay taku.” <sup>5</sup> Ngem enpapeletcha, “Kiapú as nan sursuruna, nakuru nan tataku henan am-in ay ili ad Judea, manipud ad Galilea inkiana hena ad Jerusalem.”

### *Nan Naiuyan Jesus Kan Herodes*

<sup>6</sup> Kun pay chinngor Pilato na, senarudsudna mu i-Galilea hi Jesus. <sup>7</sup> Kuna pay naammuwān ay nan ilen Jesus at sakop nan muntotorayan Herodes, enpaityuyna hi Jesus kan Herodes ay wacha ad Jerusalem as nan hiyachi ay timpu.

<sup>8</sup> Naragsakan as solet hi Herodes as nan nangil-ana kan Jesus, tay nafiyayag ay laraychuna ay mangila kan hiya kiapú ta chinchinngorna nan maepangkep kan hiya ya nemnamana ay mangila as nakaskaschaaw ay epailan Jesus. <sup>9</sup> Isunga ongor chi senarudsud Herodes kan Jesus, ngem chaan tinumtumfor hiya. <sup>10</sup> Tenmatakchug nan anap-apon chi papachi ya nan mun-isursuru as Lintig ay kaskasin nangepfiasor kan Jesus. <sup>11</sup> As nan hiyachi, enlaylayusan ya enot-otyok Herodes ya nan sorchachuna hi Jesus. Angkiay ya enpafiachucha kan hiya nan fiachon chi ari, ya enpafiangad Herodes hiya kan Pilato. <sup>12</sup> Nunlapu as nan hiyasa ay urkiw, nunkiayyum cha Herodes kan Pilato uray mu nunfinnusorcha ad kasin.

### *Nan Naekekdengan Jesus Ay Matuy (Mat. 27:15-26; Mar. 15:6-15; Jn. 18:39-19:16)*

<sup>13</sup> Enamong Pilato nan anap-apon chi papachi, nan mange pangpangguru as nan Judio ya nan tataku, <sup>14</sup> ya kanana kan chicha, “Inyaliyu kan ha-un nan nauy ay taku ay kananyu un mangurkuru as tataku. Finistikiarku at hiya as nan sangwananyu, at maid naanapak as nan chayu epabpfiasor kan hiya. <sup>15</sup> Kaman us kan Herodes ay maid naanapana, tay hiyasa nan kiapúna as nan nangepfiangchana kan hiya kan chitaku. Maid challu enat tona ay taku as libfengna ay matuyan. <sup>16</sup> Isunga kunku yangkiay epasaplet hiya, angkiay ilufusku hiya.” <sup>17</sup> [Napeletan hi Pilato ay umilufus as usa ay fierud mu Fiastan chi Munlausen, tay hiyasa nan iniili ay ukialen chi Judio.]

<sup>18</sup> Ngem nagrubbcha am-in nan tataku ay nangifukiaw, “Epapatuymu! Hi Barrabas nan laychunmi ay ilufusmu!” <sup>19</sup> (Hi Barrabas ay anna at naifiarud kiapú ta enpanguna nan tataku ay munkukuru ad Jerusalem ya kiapú ta penmatuy.)

<sup>20</sup> Naketakiatfor kasihiya as nan tataku, tay laraychun Pilato ay mangilufus kan Jesus. <sup>21</sup> Ngem infugfukiawcha, “Epaelansam as nan koros! Epaelansam as nan koros!”

<sup>22</sup> Kenalen Pilato kan chicha as nan maekapitlu, “Adchi ngay? Ngachana man nan mangotettet ay enatna? Maid met naanapak as enatna as libfengna ay matuyan. Isunga kunku yangkiay epasaplet hiya, ya ilufus hiya.”

<sup>23</sup> Ngem kaskasincha enpapati ay nangifukiaw un maelansa hi Jesus as nan koros inkiana nangafiaikcha. <sup>24</sup> Isunga inyafud Pilato nan enpapatticha. <sup>25</sup> Inlufusna nan laraki ay naifiarud kiapú as nan nunkuruwana ya penmatuyana ay chinawatcha. Ngem impurangna hi Jesus kan chicha ta atuncha nan laychuncha kan hiya.

### *Nan Naelansaan Jesus As Nan Koros (Mat. 27:32-44; Mar. 15:21-32; Jn. 19:17-27)*

<sup>26</sup> As nan cha mangek-akan nan sosorchachu kan Jesus, inkuyudcha nan usa ay taku ay nan ngachana at Simon ay i-Cirene ay cha omali henan

siyudad ay nurpu henan sikit. Enpasakfiatcha kan hiya nan koros, angkiay enpaunudcha kan Jesus.

<sup>27</sup> Inmunud kan Jesus nanongoongor ay tataku, ya nan tapina ay fianafiai ay cha mun-ag-akor ya muntangtanggunggug kiapú kan hiya. <sup>28</sup> Senakong Jesus chicha, ya kanana, “*Aammi ay i-Jerusalem, achiyak akiaran. Achoryu at ya nan an-akyu nan akiaranyu!*” <sup>29</sup> Tay umchantu nan timpu ay mangaliyantu nan tataku un, ‘Nakiasat nan fianafiai ay fiasig, chaan enman-anak, ya chaan numpaspasus!’ <sup>30</sup> Hiyasa nar timpu ay mangaliyantu nan tataku as nan chunchuntug un, ‘Kiab-onanyu chakami,’\* ya as nan filfilig un, ‘Lingfianyu chakami.’ <sup>31</sup> Tay mu hiyana nan maekaman kan ha-un ay maepachong as nan naata ay kaiw, ay kun at achi kaskasin nan maekaman kan chakayu ay maepachong as nan narangu ay kaiw?’

<sup>32</sup> Wachacha us nan chuwa ay lomalabsing as lintig ay naek-ak ay maetapi kan Jesus ay maepapatuy. <sup>33</sup> Kuncha pay inumchan henan lukiar ay makali un Tong-or Chi Uru, enlansacha hi Jesus as nan koros. Enlansacha us nan chuwa ay lomalabsing as lintig, usa as apét kannawan Jesus ya nan usa at as apét kannikidna. <sup>34</sup> Kenalen Jesus, “*Ama, pakawanum chicha, tay achicha ammu nan chacha at-atun.*”

As nan hiyachi, fingingingay nan sosorchachu nan chiyucha fiachuna babaen as nan nunfifinnunotancha.† <sup>35</sup> Nan tataku hid-i at nangatakchugcha ay cha munfuyfuya. Kun pay nan anap-apon chi Judio at enot-otyokcha hiya. Chacha kankanan, “Ensarakana met nan tapina ay tataku. Kakuna esarkan nan achorna mu hiya nan Cristo ay pinisen Apo Dios!”

<sup>36</sup> Uray nan sosorchachu at enot-otyokcha hiya. Naesnopcha ya inchutngucha nan semmoka ay fiayas, <sup>37</sup> ya kanancha, “Mu tit-iwa ay he-a nan aren chi Judio, kakunmu esarkan nan achormu!”

<sup>38</sup> Wacha nan naisurats nan tabra ay naipuuy as nan laramakun nan uron Jesus: “*Hi Tona Nan Aren Chi Judio.*”

<sup>39</sup> Nan usa as nan chiyucha lomalabsing as lintig ay naelansa at ininsurtuna hi Jesus. Kenalina, “Ay fiakun he-a nan Cristo? Kakunmu ngarud esarkan nan achormu ya chakami!”

<sup>40</sup> Ngem nan chiyuy usa ay naelansa at senengarana nan nauy nanginsurtu kan Jesus. Kenalina, “Ay achika umugyat kan Apo Dios? Mapapchong met nan chusa takú am-in. <sup>41</sup> Libfengta met ay machusa kiapú as nan enatta. Ngem hiya at maid enatna as mangisiw.” <sup>42</sup> Angkiay kenalina kan Jesus, “Apo Jesus, nunumnumunak man paat as nan omaliyam ay mun-ari.”

<sup>43</sup> Tinumfor hi Jesus kan hiya, “*Ifiakiak kan he-a nan tit-iwa. Ad wani ay urkiw at maetapikantu kan ha-un ad Paraiso.*”

### *Nan Natuyan Jesus*

(Mat. 27:45-56; Mar. 15:33-41; Jn. 19:28-30)

<sup>44</sup> As nan kiayud munkiawa, ngenmongot nan intiru ay luta inkiana alas tres as nan makiayud. <sup>45</sup> As nan hiyachi, namaid nan lawag nan urkiw, ya narakset ay nakudwa nan kurtinan nan Templo nunlapu as lamagna inkiana as kuwabna.‡ <sup>46</sup> Angkiay inpihsan Jesus ay nangifukiaw, “*Ama, ichatku kan he-a nan lenawak.*” Kuna pay narpas ay kenali na, natuy hiya.

<sup>47</sup> Kun pay inilan nan kapetan chi sosorchachu nan enommat, nunchay-chayaw hiya kan Apo Dios, ya kanana, “*Tit-iwa payat ay nalintig na ay taku!*”

\* 23:30 Ose. 10:8 † 23:34 Sal. 22:18 ‡ 23:45 Exo. 26:31-33

<sup>48</sup> Kun pay inilan nan naaamong ay tataku ay cha munfuyfuya nan enommat, kenmatamcha ay cha manibtib-ug as tagrangcha kiapú as nan ongor ay ngunguyuscha. <sup>49</sup> Nan am-in ay am-ammon Jesus patí nan fianafiai ay inmun-unud kan hiya nunlapu ad Galilea at nangatakchugcha as nan adachawwi as akét ay mangiila as nan nauycha cha om-ommatt.

### *Nan Lufun Jesus*

(Mat. 27:57-61; Mar. 15:42-47; Jn. 19:38-42)

<sup>50-51</sup> Wacha nan usa ay laraki ay nan ngachana at Jose ay nurpu ad Arimatea ay usa ay ili henan probinsiya ay Judea. Nan nauy ay taku at ammay ya nalintig, ya usa ay cha manman-ud as nan omaliyan nan muntorayan Apo Dios. Uray mu usa hiya ay membron nan Sanhedrin, chaana inyafud nan enkeddeng ya enat nan kakadwana kan Jesus. <sup>52</sup> Inmuy hiya kan Pilato, at chinmawat as pammarufus ay arauna nan anchor Jesus. <sup>53</sup> As nan naeksopan nan anchor Jesus as nan koros, penotepotana as am-ammay ay lopot, ya uyna inlufok as nan chaan naos-osar ay lufok ay natuktukan ay chupras. <sup>54</sup> As nan hana ay urkiw at urkiw ay Munsakianaan chi Judio, ya kiayud nunlapu nan Urkiw ay Mun-iblayan.

<sup>55</sup> Nan fianafiai ay inmun-unud kan Jesus ay nurpu ad Galilea at nakiuycha kan Jose. Inilacha nan lufok ya nan enat nan anchor Jesus ay naesaad. <sup>56</sup> Kun pay narpas, kenmatamcha. Angkiay ensakianacha nan lana ya fiangfiangru ay ipuuýchya as nan anchor Jesus. As nan Urkiw ay Mun-iblayan, nun-iblaycha ay maiyunud as nan filfilin nan Lintig.

## 24

### *Nan Natakuwan Jesus Manipud As Nan Utý*

(Mat. 28:1-10; Mar. 16:1-8; Jn. 20:1-10)

<sup>1</sup> As nan wi-ewi-et nan Chumingku, inmuy nan chiyuycha fianafiai as nan lufok Jesus. Entatakincha nan ensakianacha ay fiangfiangru. <sup>2</sup> As nan inumchanancha as nan lufok, ininchanancha ay nauulin at nan fiatuy ay naetatangub as nan chiyuy lufok. <sup>3</sup> Ngem kuncha pay sinungkop, maid ininchanancha as anchor Jesus. <sup>4</sup> As nan chacha masmaschaawan as nan inilacha, kalina at ya naketatakchug as nan sag-uncha nan chuwa ay lanaraki ay nangafiachu as mun-aliling. <sup>5</sup> Kiapú as nan nunsidla ay ugyatcha, nunlukfubcha, ngem kenalen nan chuwa ay lanaraki kan chicha, “Adchi t'uyyu anapun chi matataku as nan kawad-an chi nunkatuy? <sup>6</sup> Maid hiya hena. Nataku hiya manipud as nan utý. Numnumunyu nan kenalina kan chakayu as nan kawad-ana ad Galilea <sup>7</sup> ay nan Naepadtu ay Anak chi Taku at masapor maipurang as nan fumafiasor ay tataku ta maelansa as nan koros, ya as nan maekatlu ay urkiw at mataku challu manipud as nan utý.”

<sup>8</sup> Angkiay ya nanumnum nan fianafiai nan infiakian Jesus.

<sup>9</sup> Kuncha pay nunfiangad ay nurpu as nan lufok, uycha empachamag chaná am-in as nan hinpuru ya usa ay disipulus ya as nan am-in ay tapina pay ay kakadwacha. <sup>10</sup> Chatona nan fianafiai ay uy nangifiakia as na as nan apostoles: hi Maria Magdalena, hi Juana, ya hi Maria ay enan Santiago, ya tapina pay ay fianafiai ay kakadwacha. <sup>11</sup> Ngem ka-anan nan apostoles un kun lawá ap-apat nan kenalicha, ya chaancha enafurot chicha. <sup>12</sup> Ngem uray mu hiyasa, naligwat hi Pedro, ya tenmagtag ay inmuy as nan lufok Jesus. As nan inumchanana, nunyongyong ay nangiting-i ad chur-um, ya

kun yangkiay nan naelekfot kan Jesus nan inilana. Angkiay kenmatam hiya ay cha masmaschaaw as nan enommat.

*Nan Nunpail-an Jesus As Nan Chuwa Ay Disipulus  
(Mar. 16:12-13)*

<sup>13</sup> As nan hiyasa challu ay urkiw, cha manad-aran nan chuwa ay disipulus Jesus henan usa ay fiabruy ay makali un Emaus ay uy at umuy as hinpuru ya usa ay kilometro nan kaachawwina ad Jerusalem. <sup>14</sup> Chacha ap-apatun nan am-in ay enom-ommat. <sup>15</sup> Kuncha pay cha mun-ap-apat, naesnop hi Jesus ya nakitun-ud kan chicha. <sup>16</sup> Inilacha hiya, ngem chaancha naparufusan ay mangematon kan hiya. <sup>17</sup> Senarudsud Jesus kan chicha, “*Ngachana man paat nan chayu ap-apatun as nan chayu manarcharanan?*”

Entakchugcha ay kun ngumunguyus. <sup>18</sup> Angkiay ya tinumfor nan usa ay nan ngachana at Cleofas, “*Anuy he-a yangkiay chi mangili ad Jerusalem as achi nangammu as nan enom-ommat as nan nauycha inmuy ay urkiw?*”

<sup>19</sup> Senarudsud Jesus, “*Anan enom-ommat?*”

Tinumforcha, “Nan maepangkep as nan enommat kan Jesus ay i-Nazaret. Hi tono ay taku at usa ay pomapadtu, ya inflang Apo Dios ya nan am-in ay tataku hiya as wachay pannakafialina ay mun-isuru ya mangekaman as nakaskaschaaw. <sup>20</sup> Nan anap-apon chi papachi takú ya nan muntotoray kan chitaku at inpurangcha hiya ay makeddengan ay matuy, ya enpaelansacha as nan koros. <sup>21</sup> Namnamaunmi ay hiya pay koma nan mangesarakan kan chitaku ay kianak Israel. Fiakun yangkiay sa, nauy maekatlu ay urkiw ad wani nunlapu as nan enommatana. <sup>22</sup> Nan usa pay at nan tapina ay fianafiai ay kakadwami at infiakiachay naschaawanmi. Inmuycha as nan lufokna as nan wi-ewi-et, <sup>23</sup> ngem maid kanu ininchanancha as achorna. Nunfiangadcha ay nangifiakia un wacha kanu nan nunpaila ay anghelles ay nangali kan chicha un nataku hiya manipud as nan utúy. <sup>24</sup> Angkiay ya wachacha nan tapina ay kakadwami ay inmuy as nan lufok Jesus, at ininchanancha ay tit-iwa nan kenalen nan fianafiai, ngem chaancha challu inila hiya.”

<sup>25</sup> Kenalen Jesus kan chicha, “*Chakayu ay nunkangokngok! Anuy kayu nalikiat ay omafurot as nan am-in ay infiagiakian nan chiyucha pomapadtu!*

<sup>26</sup> *Ay kun achi masapor iliwas Cristo chaná sakbay umuy ad chaya?*” <sup>27</sup> As nan hiyachi, manipud as nan chiyucha liblon Moises inkiana as nan insurat nan am-in ay pomapadtu, enpakaawatana kan chicha nan am-in ay naisurat as nan Kalen Apo Dios maepangkep kan hiya.

<sup>28</sup> Kuncha pay cha maesnop henan fiabruy ay ay-ayancha, enpadlaw Jesus ay kaman achawwi pay nan ay-ayana, <sup>29</sup> ngem enpakudcha hiya, ya kanancha, “Kakunka chumawus kan chakami, tay makiayud at met ya kiyud maschum.” Isunga chinmawus hiya kan chicha.

<sup>30</sup> Kun pay tenmokor hi Jesus ay makekan kan chicha, enarana nan tenapay ya benendisyonana. Angkiay ya pinputput-ingna, ya inchatna kan chicha. <sup>31</sup> Kalina at ya kaman nunmallag chi mangilacha kan Jesus, at enmatonancha hiya, ngem namaid at. <sup>32</sup> Kenalicha as nan tunggal usa, “Isunga naragsakta payat as nan naketakiatforana kan chita as nan korsa ya as nan nangepakaawatana kan chita as nan naisurat as nan Kalen Apo Dios.”

<sup>33</sup> Nalannigwatcha ya nunfiangadcha ad Jerusalem. Ininchanancha nan hinpuru ya usa ay disipulus ay naaamong patí nan tapina pay ay kakadwacha <sup>34</sup> ay cha mangarkali un, “Tit-iwa ay nataku nan Apo manipud

as nan utúy! Nunpaila kan Simon!” <sup>35</sup> Angkiay ya infiakian nan chuwa nan enom-ommat kan chicha as nan kawad-ancha as nan korsa, ya nan nangematonancha as nan Apo as nan namputput-ingana as nan tenapay.

*Nan Numpail-an Jesus As Nan Disipulusna*

(Mat. 28:16-20; Mar. 16:14-18; Jn. 20:19-23; Ara. 1:6-8)

<sup>36</sup> Kun pay cha ifiagfiakian nan chuwa na kan chicha, kalina at ya nake-tatakchug hi Jesus kan chicha, ya kanana, “*Natalna ay numnum koma nan mawawacha kan chakayu.*”

<sup>37</sup> Nakudnorcha ya inmugyatcha as solet. Ka-anancha mu uy at lawá anennet nan inilacha. <sup>38</sup> Ngem kenalina kan chicha, “*Adchi t'uy kayu malilifokan ya munchuwachuwa ay ha-un na?*” <sup>39</sup> *Ilaunyu nan limak ya nan sukek. Ha-un na ay mismu!* Ayu, udnanaky ya keknaunyu ta omafurot kayu, tay maid laman ya tong-or nan anennet ay kaman as nan mailayu kan ha-un.”

<sup>40</sup> As nan nangaliyana as na, enpailana kan chicha nan limana ya nan sukina. <sup>41</sup> Kuncha pay kutug ay achi omafurot, chacha maragragsakan ya mas-maschaaw as solet, senarudsudna, “*Ay wachay makan hena?*” <sup>42</sup> Inchatcha nan usa ay fiangos ay chinawis. <sup>43</sup> Enarana ya kenana as nan sangwanancha.

<sup>44</sup> Kun pay narpas hi Jesus ay nangan, kenalina kan chicha, “*Nauycha nan infiakiak as nan kawad-ak pay laing kan chakayu: Masapor matongpar am-in nan naisurat as nan Lintig Moises, nan insurat nan chiyuchya pomapadtu ya nan wacha as nan liblu ay Salmo maepangkep kan ha-un.*”

<sup>45</sup> Angkiay ya lenawlawakiana nan numnumcha ta maawatancha nan naisurat as nan Kalen Apo Dios. <sup>46</sup> Kenalina kan chicha, “*Nauy nan naisurat as nan Kalen Apo Dios: Masapor munlikiat nan Cristo ya matuy. Angkiay as nan maekatlu ay urkiw, matak hiya manipud as nan utúy.*” <sup>47</sup> *Masapor us maekasaba nan munfiafiawian nan tataku as nan fiasfiasorcha ya nan mamakawanan Apo Dios kan chicha babaen kan hiya henar am-in ay nasyon munlapu hena ad Jerusalem.* <sup>48</sup> *Chakayu nan mangepaneknek as nan nauycha.* <sup>49</sup> *Ifiaorkuntu kan chakayu nanenkaren Amak, ngem masapor sasad-unyu ad Jerusalem inkiana maawatyu nan pannakafialin ay murpu ad chaya.*”\*

*Nan Naetag-uyan Jesus Ad Chaya*

(Mar. 16:19-20; Ara. 1:9-11)

<sup>50</sup> Angkiay ya enpangon Jesus nan disipulusna ay umuy as nan fiakun sakop nan siudad. Kuncha pay inumchan ad Betania, tenaguyna nan limana, ya benendisyonana chicha. <sup>51</sup> As nan chana mang-bendisyonan kan chicha, tenaynana chicha, ya naetag-uy hiya ad chaya.

<sup>52</sup> Nunchaychayawcha kan hiya, angkiay nunfiangadcha ad Jerusalem ay cha munlagragsak. <sup>53</sup> Nunlapu as nan hiyachi ay timpu, kanayon ay wachacha as nan Templo ay munchaychayaw kan Apo Dios.

\* <sup>24:49</sup> Joel 2:28-32; Jn. 16:5-15; Ara. 2:1-21

## Nan Ammay Ay Chamag Ay Insurat Juan Nan Omona Ay Ammuwun

Nan nangisurat as nan nauy Ammay ay Chamag at hi Juan ay anak cha Zebedeo kan Salome ay i-Galilea. Usa hiya as nan hinpuru ya chuwa ay disipulus Jesus ya nan enmon-onas ay inmunud kan Jesus (1:37-40). Wacha us hiya as nan natuyan Jesus as nan koros (19:26-27). Ngem uray mu hiyasa, chaan lenayad Juan ay nangifiaka as nan mismu ay ngachana. Isunga ngenadnana nan achorna as “nan chiyuy disipulu ay laylaychun Jesus” (13:23; 19:26, 21:7, 20) winnu “nan chiyuy usa pay ay disipulon Jesus” (1:37-40; 20:2).

Insurat Juan nan nauy ay liblu, tay laychuna ay afurotun nan mamasa ay hi Jesus nan Cristo ay Anak Apo Dios, ya kiapú as nan omafurotana kan hiya, mawad-an hiya as fiyang ay maid patingkiana (20:31).

Enlapuna ay nangisurat as nan nauy liblu babaen as nan nangepaneknekana ay hi Jesus nan Kalen Apo Dios ay nunfialin as taku. Kiapú ta assesa, nan munfiasa at makaammu as nan maepangkep as nan kenadios ya numnum Apo Dios ay Ama takú. As nan turuyna, enpailan Juan nan nauycha pitu ay nakaskaschaaw ay sinyar ay enammaan Jesu Cristo ta epaneknek Jesus nan kenadiosna: nan nangepaafialinana as nan chanum as fiayas (2:1-11), nan nangepaammayana as nan potot nan ap-apu (4:46-54), nan nangepaammayana as nan usa ay laraki ad Betsata (5:1-18), nan namakanana as nan leman lifu ay tataku (6:6-13), nan nanaranana as nan oson nan chanum (6:16-21), nan nangepaammayana as nan nafurag (9:1-7), ya nan nangtakuwana kan Lazaro manipud as nan utúy (11:1-45).

Insurat us Juan nan maepangkep as nan kenarkalen Jesus ay maepangkep as nan kenadiosna ya nan chunon Jesus ay entalek Apo Dios ay Amana. Nan usa ay kenaukialiyan Jesus as nan mun-is-isuruwana at nan mangososarana as maepadpachongan, ay kaman as nan nauycha: Hiya nan tit-iwa ay makan (6:35), silaw (8:12; 9:5), sungkopan (10:7), charan (14:6), ya puon chi ubas (15:1).

### **Nan Nakudukduwan Nan Nauy Liblu**

Nan Kali Ay Nunfialin As Taku 1:1-18

Hi Juan Ay Fumufunyag Ya Nan Omona Ay Disipulus Jesus 1:19-51

Nan Nun-is-isuruwan Jesus As Nan Tataku 2:1-12:50

Nan Nun-is-isuruwan Jesus As Nan Disipulusna As Nan Anongos Ay Urkiwina 13:1-17:26

Nan Natuyan Jesus 18:1-19:42

Nan Natakuwan Jesus Manipud As Nan Utúy Ya Nan Nunpail-ana 20:1-21:25

### ***Nan Kali Ay Nunfialin As Taku***

<sup>1</sup> As nan laplapuna, sakbay mafiayang nan luta, nawawacha at nan Kali.\* Nan nauy Kali ay hi Cristo at kadwan Apo Dios, ya hiya at Apo Dios ay mismu.

<sup>2</sup> Hi tona ay Kali at kadwan Apo Dios nunlapu ad maliyam. <sup>3</sup> Nan am-in ay wacha at finayang Apo Dios babaen kan hiya, ya mu achi babaen kan hiya at

---

\* <sup>1:1</sup> Nan kali at hiya nan mangammuwan as nan wacha as numnum. Isunga nan laychun ay kanan nan Kali ay hi Cristo at hiya nan mangammuwan nan tataku as nan numnum Apo Dios.

maid usa as nafiyang.<sup>†</sup> <sup>4</sup> Hiya nan kurpuwan chi fiyag, ya nan nauy ay fiyag at hiyana nan silaw ay manilaw as nan numnum nan tataku. <sup>5</sup> Nan silaw at silawana nan ngongot, ya achi poros amisun nan ngongot nan silaw.

<sup>6</sup> Wacha nan usa ay taku ay finaor Apo Dios ay nan ngachana at Juan.<sup>‡</sup> <sup>7</sup> Enmali ay uy mangepaneknek as nan maepangkep as nan nauy silaw ta am-in ay tataku at omafurotcha koma babaen kan hiya. <sup>8</sup> Hi Juan ay mismu at fiakun hiya nan chiyuy silaw. Enmali yangkiay ay uy mangepaneknek as nan maepangkep as nan chiyuy silaw.

<sup>9</sup> Nan tit-iwa ay silaw ay manilaw as nan numnum nan am-in ay tataku at cha omali asna's luta. <sup>10</sup> Asna's luta nan nawawad-anana, ya am-in ay wacha hena at finayang Apo Dios babaen kan hiya. Uray mu hiyasa, nan tataku at kuncha challu chaan enmatonan hiya. <sup>11</sup> Enmali henan mismu ay ilina, ngem chaan enawat nan kakailiyana hiya. <sup>12</sup> Ngem am-in ay nang-awat ya enmafurot kan hiya at chicha nan nangichatana as kalibfengan ay munfialin as an-ak Apo Dios. <sup>13</sup> Nan kiapón nan nunfialinancha as an-ak Apo Dios at fiakun nan naiyankancha as nan chanakchakorchha winnu fiakun kiapú as nan pangkep nan hen-asawa ay mawad-an as anak, ngem kun at babaen as nan pannakafialin Apo Dios.

<sup>14</sup> Nan Kali at nunfialin as taku ya nakiili kan chakami. Naila nan grasyana as nan am-in ay en-enatna, ya am-in nan infiagfiakiana at tit-iwa. Inilami nan kaichayawana ay inchat Amana kan hiya ay us-usa ay Anakna.

<sup>15</sup> Hi Juan at penaneknekana nan maepangkep as nan hana Kali. Infuk-awna, "Hi tona nan infiakiak kan chakayu un, 'Nan cha umunud kan ha-un at am-amud mu ha-un, tay nawawacha hiya sakbay maiyanakak.'" <sup>16</sup> Kiapú as nan ongoongor ay sug-angna, kanayon ay somabsafi nan bendisyona kan chitaku am-in. <sup>17</sup> Tay nan Lintig at empakaammon Apo Dios babaen kan Moises, ngem nan grasyana ya nan kenatit-iwa maepangkep kan hiya at empakaammuna babaen kan Jesu Cristo. <sup>18</sup> Maid poros nakaila kan Apo Dios mu achi yangkiay nan us-usa ay Anakna ay Dios mismu ay kadwan Amana. Hiya nan nangepakaammu as nan maepangkep kan Amana as nan tataku.

*Nan Nun-ekaskasabaan Juan Ay Fumufunyag  
(Mat. 3:1-12; Mar. 1:1-8; Luc. 3:1-18)*

<sup>19</sup> Hiyana nan penaneknekana Juan as nan papachi ya as nan chiyuycha Levita ay finaor nan anap-apon chi Judio ad Jerusalem ay uy manarudsud kan Juan mu anan ngachana. <sup>20</sup> Chaan ensaot Juan, ngem kuna at inputdu kan chicha un, "Fiakun ha-un nan Cristo."<sup>§</sup>

<sup>21</sup> Senarudsudcha, "Ngachanmu ngay ngarud? Ay he-a hi Elias?"\*  
"Fiakun," ensongfiat Juan.

"Ay he-a nan Pomapadtu ay sasad-unmi?"† senarudsudcha kasin.  
"Fiakun," ensongfiatna.

<sup>22</sup> Kenalicha kan Juan, "Ayu man paat ifiakiam mu anan ngachanmu. Masapor wachay esongfiatmi as nan chiyuycha nangifiaor kan chakami. Anan ngachanmu tit-iwa?"

† <sup>1:3</sup> Gen. 1:1; 1 Co. 8:6; Col. 1:16-20    ‡ <sup>1:6</sup> Luc. 1:5-25    § <sup>1:20</sup> Jn. 1:41. "Cristo" as nan kallen chi Griego winnu "Mesias" as nan kallen chi Hebreo. Nan laychuna ay kanan at nan chinutokan Apo Dios ay muntoray. \* <sup>1:21</sup> Mat. 11:14    † <sup>1:21</sup> Deut. 18:18-20

<sup>23</sup> Tinumfor hi Juan babaen as nan nangifiag-ana as nan enpadton Isaias, “Ha-un nan kalen nan cha mangifugfukiaw henan disyerto un, ‘Munlutkunyu nan ayun nan Apo.’”<sup>‡</sup>

<sup>24</sup> Angkiay ya nan chiyuycha finaor nan chiyuycha Fariseo at senarudsudcha kan Juan, <sup>25</sup> “Adchi ngay t'uyka munfunyag mu fiakun he-a nan Cristo winnu hi Elias winnu nan chiyuy pomapadtu?”

<sup>26</sup> Tinumfor hi Juan, “Funyakiak chakayu as chanum, ngem wacha kan chakayu nan achiyu am-ammu. <sup>27</sup> Hiya nan cha umunud kan ha-un, ya achiyak poros maekari ay mangfokat as kiarot nan sapatosna.” <sup>28</sup> Enommata chaná am-in ad Betania as apét fomokfoknakian nan urkiw as nan usa ay chumang nan wawwang ay Jordan ay cha munfunfunyakian Juan.

### *Nan Korderon Apo Dios*

<sup>29</sup> As nan kafikiatana, inilan Juan hi Jesus ay cha omali kan hiya, ya kanana, “Nauy nan Korderon Apo Dios ay mangaan as fiasfiasor nan katakutaku! <sup>30</sup> Hi tona nan infiakiak ay cha umunud kan ha-un ay am-amud mu ha-un, tay nawawacha hiya sakbay maiyanakak. <sup>31</sup> Uray ha-un at acheck us am-ammu hiya ad kasin, ngem enmaliyak ay mangfunyag as nan tataku as chanum ta hiyasa nan maepakaammuwana kan chakayu ay kianak Israel.” <sup>32</sup> Nauy nan pamaneknek Juan, “Inilak nan Espiritu Santo ay kenomsop ay kaman karopati ay nurpu ad chaya ya nayaschi kan hiya. <sup>33</sup> Ha-un mismu at acheck am-ammu hiya. Ngem hi Apo Dios ay nangifiaor kan ha-un ay mangfunyag as nan tataku as chanum at kenalina kan ha-un, ‘Nan ilaumtu ay komsopan ya mayayaschiyan nan Espiritu Santo at hiya nan mangfunyagtu as nan tataku as Espiritu Santo.’ <sup>34</sup> Inilak sa tit-iwa, at paneknekak kan chakayu ay hiya nan Anak Apo Dios.”

### *Nan Omona Ay Disipulus Jesus*

<sup>35</sup> As nan kafikiatana, nangatakchug hid-i kasin cha Juan ya nan chuwa ay disipulusna. <sup>36</sup> Kun pay inilan Juan hi Jesus ay cha mar-os, kenalina, “Chiyuy nan Korderon Apo Dios!” <sup>37</sup> Chinngor nan chiyuycha chuwa ay disipulus Juan nan kenalina, at inmunudcha kan Jesus. <sup>38</sup> Nunsakong hi Jesus, ya inilana chicha ay cha umunud kan hiya. Angkiay senarudsudna kan chicha, “Ay wachay chayu anapun?”

“Rabbi, ay chaud man paat nan mamaganam?” Ensongfiatcha. (Nan laychun ay kanan nan Rabbi at “Misturu”).

<sup>39</sup> Kenalen us Jesus, “Akayu ta ilaunyu.” Isunga nakiuycha kan hiya, at inilacha nan mamaganana, naakepagyancha kan hiya as nan hana ay urkiw, tay alas kuwatro as nan makiayud.

<sup>40</sup> Hi Andres ay sunúd Simon Pedro at hiya nan usa as nan chiyuycha chuwa ay nanngor as nan infiakian Juan ya nakiuy kan Jesus.<sup>§</sup> <sup>41</sup> Uy enanap Andres omona hi Simon ay sunúdna. Kuna pay inila, kenalina kan hiya, “Nad-ananmi nan Mesias.” (Nan laychun ay kanan nan Mesias at Cristo.) <sup>42</sup> Angkiay ya intun-udna hi Simon kan Jesus.

Entoongan Jesus hi Simon, ya kanana, “He-a hi Simon ay potot Juan. Mangadnankantu as Cefas.” (Nan laychuna ay kanan at Pedro.)\*

### *Nan Nangayakian Jesus Kan Cha Felipe Kan Natanael*

---

<sup>‡</sup> **1:23** Isa. 40:3; Mar. 1:2-3; Luc. 3:4-6      <sup>§</sup> **1:40** Mat. 4: 18-22      \* **1:42** Nan Cefas ya Pedro ay ngachan at munpachong ay fiatu nan laychuna ay kanan.

<sup>43</sup> As nan kafikiatana, ninumnum Jesus ay umuy ad Galilea. Ininchanana hi Felipe, ya kanana kan hiya, “*Aka, unuchunak.*” <sup>44</sup> Hi Felipe at i-Betsaida ay kailiyan cha Andres kan Pedro.

<sup>45</sup> Naanapan Felipe hi Natanael, ya infiakiana kan hiya, “Ininchananmi nan chiyuy taku ay insurat Moises as nan liblon chi Lintig ya nan insurat us nan chiyucha pomapadtu. Hiya hi Jesus ay i-Nazaret ay potot Jose.”

<sup>46</sup> Angkiay ya kenalen Natanael kan hiya, “Ay wacha ngun paat chi ammay ay murpu ad Nazaret?”

“Aka at kayya ta ilaura!” kenalen Felipe.

<sup>47</sup> Kun pay inilan Jesus hi Natanael ay cha omali kan hiya, infiakiana nan maepangkep kan hiya, “*Nauy nan tit-iwa ay kianak Israel ay maid poros kenasikap kan hiya.*”

<sup>48</sup> As nan hiyachi, kenalen Natanael kan Jesus, “Anan nangammuwam kan ha-un?”

Tinumfor hi Jesus, “*Inilak he-a as nan puon nan kaiw ay igos sakbay ayakian chaká kan Felipe.*”

<sup>49</sup> Tinumfor hi Natanael, “Misturu, he-a payat nan Anak Apo Dios! He-a nan Aren nan Israel!”

<sup>50</sup> Tinumfor hi Jesus, “*Enmafurotka o-ngun kiapú ta kenalek un inilak he-a as nan puon nan kaiw ay igos. Ilaumtu nanongoongor ay nakaskaschaaway ommat mu nan nauycha.*” <sup>51</sup> Angkiay ya kenalen Jesus kan chicha, “*Ifiakiak kan chakayu nan tit-iwa ay ilauryuntu ad chaya ay kaman nanatkafian ya nan angeles Apo Dios ay cha um-umuy ya cha komkomson as nan Naepadtu ay Anak chi Taku.*”†

## 2

### *Nan Chuyas Ad Cana*

<sup>1</sup> Kun pay inmuy chi chuwa ay urkiw, wacha nan chuyas henan ili ad Cana henan probinsiya ay Galilea. Wacha hid-i hi enan Jesus. <sup>2</sup> Naayakian us cha Jesus ya nan disipulusna ay makichuyas. <sup>3</sup> Kun pay nam-in nan fiayas, kenalen enan Jesus kan hiya, “Nam-in at nan fiayascha.”

<sup>4</sup> Kenalen Jesus kan Maria, “*Ammi, achiyak ud-ay fifiyangan, tay nan timpok ay mangtongpar as nan planon Apo Dios at chaan pay omali.*” <sup>5</sup> Kenalen enana as nan chiyucha mafiabfiaor, “Atunu nan uray ngachana ay ifiakiana kan chakayu.”

<sup>6</sup> Wacha hid-i nan nunkaesaa ay unum ay anad-acha-an ay panannu ay naamma as fiatu ay natotorwan as ifuru, tay wacha nan iniili ay ukialen chi Judio maepangkep as nan ustu ay atun ay munfuru.\* Nan usa ay panannu at ittuna nan kiayud hinfiallis ay chanum. <sup>7</sup> Kenalen Jesus as nan chiyucha mafiabfiaor, “*Punuwunyu nan hanacha panannu as chanum.*” Pinnucha tit-iwa am-in. <sup>8</sup> Angkiay ya kenalina kan chicha, “*Pomaok kayu as nan hana chanum, ya iyuyu as nan mangenongnongnong as nan nauy chuyas.*” Inuyucha tit-iwa.

<sup>9</sup> Angkiay ya tenamtaman nan mangenongnongnong as nan chuyas nan chanum ay nunfialin as fiayas. Achina ammu nan nurpuwana, ngem nan chiyucha mafiabfiaor ay penmaok as nan chanum at chicha nan nangammu. Isunga enayakiana nan chiyuy chinmuyas ay laraki, <sup>10</sup> ya

† **1:51** Gen. 28:12 \* **2:6** Mar. 7:3

kanana kan hiya, “Nan iniili ay ukialen nan tataku at epaikopcha omon-oná nan am-ammay ay fiayas, ya kun pay chakus enpapas nan mangili ay inmkop, ichatcha nan achi am-ammay ay fiayas. Ngem he-a at intupugmu nan am-ammay ay fiayas inkiana ad wani.”

<sup>11</sup> Nan enat Jesus ad Cana ad Galilea at hiyana nan enmon-oná ay nakaskaschaaw ay sinyar ay nangepail-ana as nan kaichayawana, at kaskasin enmafurot nan disipulusna kan hiya. <sup>12</sup> As nan narpasan nan chuyas, immuy hi Jesus ad Capernaum ay kadwana cha enana, nan susnúdha, ya nan disipulusna. Hid-i nan nagyanancha as kaat ay urkiw.

*Nan Nangepak-akan Jesus As Nan Mun-el-elaku As Templo  
(Mat. 21:12-13; Mar. 11:15-17; Luc. 19:45-46)*

<sup>13</sup> As nan kiayud umchanan nan Fiastan chi Judio ay makali un Munlausán, enmabrat cha Jesus ad Jerusalem. <sup>14</sup> Sinungkop hiya as Templo, ya ininchana nan tataku ay cha mun-el-elaku as fiaka, karnero ya karopati,<sup>†</sup> ya nan chiyucha munsoksokat as siping ay nangatokor. <sup>15</sup> Isunga nunamma hi Jesus as saplet ay tali, ya enpak-akna manipud as nan Templo nan am-in ay mun-el-elaku, ya enafugna nan karnerocha ya fiakacha. Inwakletna us nan siping nan chiyucha munsoksokat as siping, ya enlokabfuna nan lamesaancha. <sup>16</sup> Kenalina as nan chiyucha mun-el-elaku as karopati, “*Ipitiwyu at am-in chaná! Achiyu man munfalinun nan afong Amak as mun-el-elakwan!*” <sup>17</sup> Nanumnum nan disipulusna nan naisurat as nan Kalen Apo Dios ay kanana, “Nan mangesasaketak as nan afongmu at hiya nan ekatuyku.”<sup>‡</sup>

<sup>18</sup> Kiapú as nan enat Jesus, kenalen nan anap-apon chi Judio kan hiya, “Ngachana nan nakaskaschaaw ay sinyar ay atum as mangepail-am kan chakami ay wachay kalibfengam ay mangekaman as nan nauycha?”

<sup>19</sup> Tinumfor hi Jesus kan chicha, “*Okrangunu nan nauy Templo, at kiaufoktu as kun turu ay urkiw.*”

<sup>20</sup> Angkiay ya kenalen nan chiyucha Judio kan hiya, “Opat puru ya unum ay tawwun nan nakiaufian nan nauy ay Templo, ya kanam un kun turu ay urkiw chi mangkiaufiam kasin?” <sup>21</sup> Ngem nan templo ay kenalen Jesus at hiya nan achorna. <sup>22</sup> Isunga as nan natakuwan Jesus manipud as nan utý, ninumnum nan disipulusna nan nauy kenalina. Angkiay ya enafurotcha nan naisurat as nan Kalen Apo Dios ya nan infiakian Jesus.

*Ammon Jesus Nan Numnum Nan Tataku*

<sup>23</sup> As nan nakifiastaan Jesus ad Jerusalem, ongorcha nan enmafurot kan hiya as nan nangil-ancha as nan chiyucha nakaskaschaaw ay sinyar ay enatna. <sup>24</sup> Ngem chaana entalek nan achorna kan chicha, tay aammuna nan numnum nan tataku. <sup>25</sup> Achi kis-an wacha nan mangepaneknek kan hiya as nan maepangkep kan chicha, tay hiya mismu at aammuna nan wacha as numnumcha.

### 3

*Cha Jesus Kan Nicodemo*

<sup>1</sup> Wacha nan usa ay membron nan bunggoy chi Fariseo ay nan ngachana at Nicodemo ay ap-apon chi Judio. <sup>2</sup> As nan henlafi, immuy hiya kan Jesus, ya kanana, “Misturu, ammumi ay usaka ay mun-isursuru ay infiaor Apo Dios,

<sup>†</sup> **2:14** Nan nauycha animar at maichaton kan Apo Dios.    <sup>‡</sup> **2:17** Sal. 69:9

tay maid makaekaman as nan nauycha nakaskaschaaw ay sinyar ay cham at-atun sukúd wacha hi Apo Dios kan hiya.”

<sup>3</sup> Tinumfor hi Jesus kan hiya, “*Ifiakiak kan he-a nan tit-iwa. Maid maetapi henan muntorayan Apo Dios sukúd maiyanak kasiñ.*”

<sup>4</sup> Senarudsud Nicodemo kan hiya, “Anuy man atun nan taku ay kasiñ maiyanak mu chakus at narakay? Ay kun mafialin ay kasiñ sungkop as nan puton enana ta maipidwa ay maiyanak? Achi met!”

<sup>5</sup> Tinumfor hi Jesus, “*Ifiakiak kan he-a nan tit-iwa. Maid maetapi henan muntorayan Apo Dios sukúd maiyanak as chanum ya as Espiritu Santo.\**

<sup>6</sup> *Nan maiyanak as taku at taku challu, ya nan maiyanak as Espiritu Santo at naespirituwan.* <sup>7</sup> Achika koma maschaaw as nan nangaliyak kan he-a un masapor maiyanak kayu kasiñ. <sup>8</sup> *Nan angin at umuy as kumpurmi ay ay-ayana. Chungrum nan atifungugna, ngem achim ammu nan nurpuwana winnu ay-ayana. Assesa us nan chunon nan Espiritu Santo as nan am-in ay tataku ay maiyanak kasiñ.*

<sup>9</sup> Senarudsud kasiñ Nicodemo kan hiya, “Anan atun man ton a ommat?”

<sup>10</sup> “*Ayokayong!*” kenalen Jesus. “*Usaka met ay misturon nan chiyuchia kianak Israel, ya achim pay laing maawatan na?*” <sup>11</sup> *Ifiakiak kan he-a nan tit-iwa. Ifiakiami nan ammumi ya paneknekanmi nan inilami, ngem kunyu achi awatun nan pammaneknekmi.* <sup>12</sup> *Mu hiyasa ay nan infiakiak maepangkep as nan wacha asna's luta at achiyu afurotun, anan atunyu ay mangafurot mu ifiakiak nan maepangkep as nan wacha ad chaya?* <sup>13</sup> *Maid pay inmuy ad chaya omangkiay nan Naepadtu ay Anak chi Taku ay kenomsop ay nurpu ad chaya.* <sup>14</sup> *Kaman as nan nangetag-uyen Moises as nan inur-urug ay kianfang as nan tukud henan disyerto,*<sup>†</sup> *masapor us assesa nan maekaman as nan Naepadtu ay Anak chi Taku* <sup>15</sup> *ta nan uray ngachana ay omafurot kan hiya at mawad-an as fiyag ay maid patingkiana.*”

<sup>16</sup> “*Kiapú ta laylaychun Apo Dios as solet nan tataku asna's luta, inchatna nan us-usa ay Anakna<sup>‡</sup>ta nan uray ngachana ay omafurot kan hiya at achi machusa ay maisiyán kan Apo Dios, ngem mawad-an as fiyag ay maid patingkiana.*” <sup>17</sup> *Tay chaan finaor Apo Dios nan Anakna asna's luta ta keddengana ay manusa as nan tataku, ngem kuna at finaor ta maesarakancha babaen kan hiya.* <sup>18</sup> *Nan taku ay omafurot kan hiya at achi makeddengan ay machusa. Ngem nan taku ay achi omafurot at chakus naokóm ay machusa, tay chaana enafurot nan us-usa ay Anak Apo Dios.*<sup>§</sup>

<sup>19</sup> “*Hiyana nan kiapón nan maokománcha: Enmali nan silaw ay manilaw as numnum nan tataku asna's luta, ngem lenaylayadcha nan ngongot mu nan silaw, tay mangotettet nan chacha atuutan.*” <sup>20</sup> *Tay nan ngachana ay cha mangekamkaman as mangotettet at kaiinggaña nan silaw. Achina laychun ay maesnop as nan silaw, tay achina laychun ay maepaila nan mangotettet ay chana atuutan.* <sup>21</sup> *Ngem nan taku ay cha mangekamkaman as tit-iwa at maesnop as nan silaw ta maepaila ay ustu ay nan chana at-atun at nurpu kan Apo Dios.*”

### *Nan Nangifiag-an Juan As Nan Maepangkep Kan Jesus*

\* <sup>3:5</sup> Mat. 3:11; Mar. 1:8; Luc. 3:16   † <sup>3:14</sup> Num. 21:4-9   ‡ <sup>3:16</sup> Jn. 1:14; 1 Jn. 4:9   § <sup>3:18</sup> Mar. 16:16; Jn. 5:24

<sup>22</sup> As nan narpasan tona, inmuy hi Jesus ya nan disipulusna henan probinsiya ay Judea. Hid-i nan nayaschiyancha ay nunfunfunyag.\* <sup>23</sup> Hi Juan us at cha munfunfunyag ad Enon ay sag-un nan Salim, tay ongor chi chanum hid-i. Chacha um-umuy nan tataku kan hiya, ya chana funfunyakian chicha. <sup>24</sup> As nan hiyachi, chaan pay naifiarud hi Juan.

<sup>25</sup> Nunlapuy sososek nan disipulus Juan ya nan usa ay Judio maepangkep as nan panagcharos.† <sup>26</sup> Isunga inmuycha kan Juan, at kenalicha, “Misturu, ay manumnummu nan chiyuy taku ay kadwam as nan usa ay chumang nan wawwang ay Jordan, nan chiyuy pay challu penaneknekam kan chakami? Cha munfunfunyag hiya, ya chacha um-umuy am-in chi tataku kan hiya.”

<sup>27</sup> Tinumfor hi Juan, “Maid saad as nan fiyag ay maawat chi taku sukúd ichat Apo Dios kan hiya. <sup>28</sup> Chakayu ay mismu nan mangepanekekne as nan kenalek un, ‘Fiakun ha-un nan Cristo, ngem infiaorak ay mangon-onu mu hiya.’ <sup>29</sup> Nan nauy at maepachong as nan chuyas nan chumuyas ay laraki ya nan chumuyas ay fiafai. Nan kiayyum nan chumuyas ay laraki at hiya nan mangenongnong as nan sakiana as nan chuyas. Munsusuud ya chumngor hiya as nan munfiangchan nan chumuyas ay laraki. Kuna pay chungrun nan kalina, ongor nan lagsakna. Assesantu nan lagsakku, tay ha-un nan maepachong as nan hana kiayyum. <sup>30</sup> Masapor omam-amud hiya, ya ha-un at masapor omap-apuchak.”

### Nan Naepadtu Ay Anak Chi Taku

<sup>31</sup> Nan omali ay murpu as ngatu at nangatngatu as nan am-in. Nan chiyuy murpu asna's luta at kun challu asna's luta nan kawad-ana, ya nan chana apaapatun at maepangkep yangkiay as nan wacha asna's luta. Ngem nan omali ay murpu ad chaya at hiya nan nangatngatu as nan am-in. <sup>32</sup> Paneknekana nan inilana ya chinngorna, ngem kun maid omafurot as nan pamaneknekna. <sup>33</sup> Nan taku ay omafurot as nan pamaneknekna at penaneknekana ay tit-iwa nan kenalen Apo Dios. <sup>34</sup> Tay nan infiaor Apo Dios at ifiakiana nan kalen Apo Dios, tay inchat Apo Dios kan hiya nan am-in ay pannakafialin nan Espirituna. <sup>35</sup> Nan Dios Ama at laylaychuna nan Anakna, ya am-in ay ka-ichin at inpurangna kan hiya. <sup>36</sup> Nan uray ngachana ay omafurot as nan Anakna at mawad-an as fiyag ay maid patingkiana. Ngem nan achi mangtongpar as nan Anakna at achi mawad-an as fiyag, ngem kun at mawad-an as nan ichusan Apo Dios in-inkiana.

## 4

### Hi Jesus Ya Nan Fiafai Ay I-Samaria

<sup>1</sup> Chinngor nan chiyuycha Fariseo ay ong-ongor chi cha aw-awisun ya funfunyakian Jesus as papasorotna mu hi Juan. <sup>2</sup> Ngem nan kenatit-iwana at chaan nunfunfunyag hi Jesus mismu, ngem kun at nan disipulusna yangkiay.

<sup>3</sup> Kun pay naammuwan Jesus ay chinngor nan chiyuycha Fariseo na, nak-akhiya ad Judea ya nunfiangad ad Galilea. <sup>4</sup> As nan hiyachi, masapor mar-os hiya henan probinsiya ay Samaria. <sup>5</sup> Inumchan cha Jesus ad Sicar ay usa ay ili ad Samaria ay achi achawwi henan luta ay enpatawid Jacob kan Jose ay

---

\* <sup>3:22</sup> Jn. 4:2 † <sup>3:25</sup> Mu maepangkep as panagcharos, nan chiyuycha Judio at ongor chi lintigcha maepangkep as nan mangorasancha as achorcha ya nan osaruncha ay mangan ta maekaricha ay mangchaychayaw kan Apo Dios.

pototna.\* <sup>6</sup> Wacha hid-i nan fufun chin Jacob. Kun pay nabray hi Jesus ay nanarcharan, temmokor hiya as nan fianang nan fufun. Kiayud munkiawa as nan hiyachi. <sup>7</sup> As nan hiyachi, enmali ay somakchu nan usa ay fiafai ay i-Samaria. Kenalen Jesus kan hiya, “*Ettanak pay as ikopok?*” <sup>8</sup> Kun pay nan disipulus Jesus at inmuycha henan ili ta uycha lomaku as kanuncha.

<sup>9</sup> “Ha? Kunka cha Judio ya, anuyka kumchaw as ikopum kan ha-un ay fiafai ay i-Samaria?” ensongfiat nan fiafai. (Tay nan chiyuyccha Judio at achicha makekadkadwa as nan chiyuyccha i-Samaria.)†

<sup>10</sup> Tinumfor hi Jesus kan hiya, “*Mu naammuwam koma nan ichat Apo Dios ya mu ngachana nan cha kumchaw as ikopuna kan he-a, kumchawka koma kan hiya, at ettan chaká as chanum ay umichat as fiyag.*”

<sup>11</sup> Kenalen nan fiafai, “Sir, maid met kayong esakchom, ya nan fufun at naroosong. Ay chaud ngay nan omor-am as nan hana chanum ay umichat as fiyag? <sup>12</sup> Ay am-amudka mu nan kaap-uwan takú ay chin Jacob? Hiya met nan nangeptawid as nan nauy fufun kan chakami, ya hena us nan inmig-ikopana patí nan an-akna ya nan chiyuyccha tarakoncha.”

<sup>13</sup> Kenalen Jesus, “*Nan am-in ay umikop as nan nauy ay chanum at masketan kasiñ.* <sup>14</sup> *Ngem nan uray ngachana ay umikop as nan chanum ay ichatku kan hiya at achintu poros masmasketan. O, nan chanum ay ichatkuntu kan hiya at munfalin as uwor as achorna ay achi makmak-et ay umichat as fiyag ay maid patingkiana.*”

<sup>15</sup> Chinawat nan fiafai kan hiya, “Sir, ichatmu pay na ngarud ay chanum kan ha-un ta achiyak kasiñ masmasketan, winnu omar-ali hena ay somakchu.”

<sup>16</sup> Kenalen Jesus kan hiya, “*Uymu ayakian hi asawam, at munfiangadka hena.*”

<sup>17</sup> “Maid met kang asawak,” ensongfiat nan fiafai.

“*Tit-iwa met nan kenalem ay maid asawam,*” kenalen Jesus. <sup>18</sup> “*Namen lemaka ay enmasawa, ya fiakunmu asawa nan laraki ay enteteponmu ad wani. Tit-iwa nan infiakiam kan ha-un.*”

<sup>19</sup> “Sir,” kenalen nan fiafai, “madlawku ay usaka payat ay pomapadtu!

<sup>20</sup> Nan kaap-uwanmi met ay i-Samaria at henan nauy ay chuntug nan nunchaychayawancha kan Apo Dios, ngem chakayu ay Judio at kananyu un masapor ad Jerusalem nan munchaychayawan takú.”

<sup>21</sup> “Ammi,” ensongfiat Jesus, “*afurotum nan kanak ay omalintu nan timpu ay fiakun hena ay chuntug winnu ad Jerusalem nan munchayawanyu kan Dios Ama.* <sup>22</sup> *Chakayu ay i-Samaria at achiyu am-ammu nan chayu chaychayawun. Chakami ay Judio at am-ammumi nan chami chaychayawun, tay kan chakami nan nurpuwan nan omesarakan.*‡ <sup>23</sup> *Uray mu hiyasa, cha omali nan timpu, ya nauy at ad wani ay nan chiyuyccha tit-iwa ay manangchaychayaw kan Dios Ama at munchaychayawchantu kan hiya babaen as nan Espirituna ya maiyunud as nan kenatit-iwa, tay chatona nan laychun Apo Dios ay munchayaw kan hiya.* <sup>24</sup> *Hi Apo Dios at Espiritu ngamin, ya nan chiyuyccha manangchaychayaw kan hiya at masapor munchaychayawcha babaen as nan Espirituna ya maiyunud as nan kenatit-iwa.*” Hiyana nan kenalen Jesus.

\* <sup>4:5</sup> Gen. 33:19; 48:21-22; Jos. 24:32      † <sup>4:9</sup> As nan tapina ay manuskritu at kanana, “Tay nan chiyuyccha Judio at achicha os-osarun nan umig-ikopan nan chiyuyccha i-Samaria.”      ‡ <sup>4:22</sup> Sal. 147:19-20; Isa. 2:3; Rom. 3:1; 9:3-5

<sup>25</sup> Kenalen nan fiafiai kan hiya, “Ammok ay omalintu nan Mesias ay makali un Cristo. As nan omaliyana, epakaammunantu kan chitaku nan am-in.”

<sup>26</sup> Tinumfor hi Jesus, “*Ha-un ay cha maketagtakiatfor kan he-a nan cham kankanan.*”

<sup>27</sup> As nan hiyachi challu, nunfiangad nan disipulusna, at naschaawcha ay nangchan kan hiya ay cha maketagtakiatfor as nan fiafiai. Ngem maid kan chicha nan nangsarudsud as nan fiafiai, “Ngachana nan laychum?” winnu nangsarudsud kan Jesus, “Adchi t'uyka cha maketagtakiatfor kan hiya?”

<sup>28</sup> Angkiay ya tenaynan nan fiafiai nan sakchuwana, ya nunfiangad henan ili. Kenalina as nan tataku hid-i, <sup>29</sup> “Akayu kay t'uyyu ilaun nan laraki ay nangifiakia kan ha-un as nan am-in ay en-enatku. Ay fiakun ngun hiya nan Cristo?” <sup>30</sup> Nak-akcha henan ili, ya inmuycha kan Jesus.

<sup>31</sup> As nan hiyachi us, cha iyannoannong nan disipulus ay mangali kan Jesus, “Misturu, ayu manganka.”

<sup>32</sup> Ngem kenalen Jesus kan chicha, “*Wacha nan kanok ay achiyu ammu.*”

<sup>33</sup> Isunga enlapon nan disipulusna ay matatakiatfor, “Ay wacha ngun chi nangiyali kan hiya as makan?”

<sup>34</sup> Kenalen Jesus kan chicha, “*Nan kanok at nan mangekamanak as nan laychun nan nangifiaor kan ha-un ya nan manglopasak as nan epadnuna kan ha-un.* <sup>35</sup> *Ay kun achi wacha nan kankananyu un, 'Opat ay furan pay sakbay kaseani? Ilaunyu nan chiyucha tataku. Nan nauycha tataku ay cha omali at maepachongcha as nan chiyucha pakuy ay mafialin ay maani.* <sup>36</sup> *Nan munani at malagfuwan, ya nan tataku ay chicha nan maepachong as nan aniyuna at ettan Apo Dios as fiyag ay maid patingkiana. Isunga nan muntanum as kallen Apo Dios ya nan mun-anai at munlagragsakcha ay chuwa.* <sup>37</sup> *Tit-iwa chaná ay karkali, 'Nan usa nan muntanum ya tukún nan mun-anai.'* <sup>38</sup> *Finaorku chakayu ay mun-anai as nan chaanyu inidnuwan. Tukúncha nan nunchunu, ya ad wani maarayu nan inidnuwancha.*”

<sup>39</sup> Ongor chi i-Samaria henan hana ay ili nan emmafurot kan Jesus kiapú as nan pammanknek nan fiafiai un, “Infiakiana kan ha-un nan am-in ay en-enatku.” <sup>40</sup> Isunga as nan emmaliyan nan chiyucha i-Samaria kan Jesus, chinawatcha kan hiya ay makepagyan hiya kan chicha, at nagyan hiya's chi as chuwa ay urkiw. <sup>41</sup> Enmong-ongorcha nan emmafurot kan Jesus kiapú as nan insursuruna. <sup>42</sup> Kenalicha as nan fiafiai, “Nan omafurotanmi ad wani at fiakun at kiapú as nan infiakiam, ngem kiapú as nan nanngoranmi ay mismu as nan kenalina. Ammumi ay hi tona nan tit-iwa ay Mangesarakan as nan tataku asna's luta.”

### *Nan Nangepaammayan Jesus As Nan Anak Chi Opisyar*

<sup>43</sup> Kun pay inmuy chi chuwa ay urkiw, nak-ak cha Jesus ad Samaria ya inmuycha henan probinsiya ay Galilea. <sup>44</sup> Tay hi Jesus challu mismu nan nangali un achi maichayaw nan pomapadtu henan mismu ay ilina. <sup>45</sup> As nan emmaliyan cha Jesus ad Galilea, menangilen nan umili hid-i hiya, tay inilacha nan am-in ay en-enatna as nan fiastan chi Judio ad Jerusalem as nan nakifiastaancha hid-i.

<sup>46</sup> As nan hiyachi, kasin nunfiangad hi Jesus ad Cana ay ili ad Galilea ay hid-i nan nangepaafalinana as nan chanum as fiayas. Wacha nan usa ay opisyar chi goberno ay nan pototna ay laraki at cha munsaket ad Capernaum.

<sup>47</sup> Kuna pay chinngor ay emmali hi Jesus ad Galilea ay nurpu ad Judea, inmuy hiya kan Jesus ya numpasug-ang kan hiya ay chumayyu ad Capernaum ya epaammayna nan pototna ay kiayud matuy. <sup>48</sup> Kenalen Jesus kan hiya,

*"Maid challu omafurot kan chakayu sukúdyu ilaun nan nakaskaschaaw ay sinyar ay maekaman."*

<sup>49</sup> "Sir," kenalen nan opisyar, "makichayyuka man paat kan ha-un ta achi matuy nan pototku."

<sup>50</sup> Kenalen Jesus, "*Komatamka. Omammay nan pototmu.*" Enafurot tit-iwa nan opisyar nan kenalen Jesus, at nunligwat ay kenmatam.

<sup>51</sup> As nan chana chumayyuwan ay komatam ad Capernaum, sinib-at nan chiyucha fiabfaaruna hiya, ya empachamagcha ay emmamay nan pototna ay laraki. <sup>52</sup> Senarudsud nan opisyar kan chicha mu ngachana ay uras nan enmamaynan pototna.

Tinumforcha kan hiya, "Ad kugkia as nan ala ona as nan makiayud nan nakaanan nan puchotna."

<sup>53</sup> Haat manumnum nan aman nan onga ay hiyachi nan uras ay nangaliyan Jesus kan hiya, "*Omammay nan pototmu.*" Isunga hiya ay mismu ya am-in nan membron nan pamilyana at enmafurotcha. <sup>54</sup> Hiyana nan maekadwa ay nakaskaschaaw ay sinyar ay enat Jesus ad Galilea as nan purpuwana ad Judea.

## 5

### *Nan Nangepaammayan Jesus As Nan Laraki Ad Betsata*

<sup>1</sup> As nan narpasan tono, wacha nan fiastan chi Judio ad Jerusalem, ya enmabrat cha Jesus ay nakifiasta. <sup>2</sup> As nan sag-un chi Sungkopan chi Karnero ad Jerusalem, wacha nan nanapsong ay mun-om-omsan ay nan ngachana as nan kalen chi Hebreo at Betsata.\* Naliwus as lema ay fiangsar nan hana mun-om-omsan. <sup>3</sup> As nan nauycha ay fiangsar nan finmafiankan chi ongoongor ay munsaket ay tataku ay kaman as nan chiyucha nafurag, napilud ya paralitiko. [Sasad-un chatona nan munkiwiyan nan chanum, <sup>4</sup> tay komsop kanu nan anghel nan Apo mu mamingsan ya ikiwina nan chanum. Mu ngachana kanu nan omon-onu ay pomachak as nan chanum mu marpas ay maikiwi at makaan nan kumpurmi ay saket ay wacha kan hiya.]†

<sup>5</sup> Wacha hid-i nan usa ay laraki ay turon puru ya waru ay tawwun chi nunsasaketana. <sup>6</sup> Kun pay inilan Jesus hiya ay finmafianak hid-i ya ammunu ay nafiyag chi saketna, kenalina kan hiya, "*Ay laychum ay omammay?*"

<sup>7</sup> Tinumfor nan laraki ay cha munsaket, "Sir, maid met mangipuuy kan ha-un as nan nanapsong ay mun-om-omsan mu maikiwi nan chanum. As nan chak umuyan as nan maikiwiyan nan chanum, wacha at chi enmon-onu mu ha-un."

<sup>8</sup> Kenalen Jesus kan hiya, "*Tomakchugka, araum nan apragmu ya manaranka.*" <sup>9</sup> Hiya at chi ya enmamay nan laraki. Enarana nan apragna ya nanaran.

Enommat na as nan Urkiw ay Mun-iblayan, <sup>10</sup> isunga kenalen nan anapapon chi Judio as nan laraki ay enmamay, "Urkiw met ay Mun-iblayan, ya achi eparufus nan Lintig taku ay cham a-aagpetun nan apragmu."

<sup>11</sup> Ngem tinumfor nan laraki, "Infiakian met nan nangepaammay kan ha-un un araoak nan apragku ya manaranak."

§ <sup>4:51</sup> Nan kaachawwen nan Cana inkiana ad Capernaum at kiayud 32 kilometro. \* <sup>5:2</sup> As nan tapen nan manuskritu as nan kali ay Griego at makali un Betsaida winnu Betesda. † <sup>5:4</sup> As nan tapen nan manuskritu as nan kali ay Griego at maid chaná ay versikulu.

<sup>12</sup> Senarudsudcha kan hiya, “Ngachana nan laraki ay nangali kan he-a un araua nan apragmu, ya manaranka?” <sup>13</sup> Ngem nan laraki ay enmammay at achina ammu mu ngachan tud-i, tay nak-ak hi Jesus ay maid nakadkadlaw kan hiya as nan ongor ay tataku hid-i.

<sup>14</sup> Kun pay naaw-awni as aké, ininchanan Jesus nan laraki as Templo, ya kanana kan hiya, “*Ilaum at enmammayka! Ikinakmu ngarud ay cha fumasofiasor ta maid kaskasin likiat as ommat kan he-a.*”

<sup>15</sup> Nak-ak nan laraki, ya uyna infiakia as nan anap-apon chi Judio ay hi Jesus nan nangepaammay kan hiya. <sup>16</sup> Hiyana nan kiapúna ay enlapon nan chiyuycha Judio ay namarpalikiat kan Jésus, tay enatna na as nan Urkiw ay Mun-iblayan. <sup>17</sup> Ngem tinumfor hi Jesus kan chicha, “*Hi Amak at achina ikinkinak ay cha muncunchunu ay mangepaila as sug-angna. Assesa us nan chak at-atun.*” <sup>18</sup> Kiapú as nan nauy ay infiakian Jesus, kaskasin enpapaten nan anap-apon chi Judio ay mangpatuy kan hiya, tay chaana yangkiay lenabsing nan Urkiw ay Mun-iblayan, ngem enpachongna pay nan achorna kan Apo Dios as nan nangaliyana un hi Apo Dios nan Amana.

### *Nan Kalibfengan Jesus Ay Anak Apo Dios*

<sup>19</sup> Kenalen Jesus kan chicha, “*Ifiakiak kan chakayu nan tit-iwa. Nan Anak at maid maifalina ay atun as nan mismu ay kalibfengana, ngem atuna nan iilauna ay cha at-atun Amana, tay mu ngachana nan atun nan Ama, atun us nan Anak.*” <sup>20</sup> *Tay nan Ama at laylaychuna nan Anak, ya am-in nan chana at-atun at enpailana kan hiya. Wacha pay nan epailana kan hiya ay kaskasin nakaskaschaaw mu nan nauycha ta maschaaw kayu.* <sup>21</sup> *Tay kaman as nan Ama ay takuwuna nan nunkatuy, assesa us as nan Anak ay takuwuna nan laychuna.* <sup>22</sup> *Nan Ama at maid okomuna ay tataku, ngem am-in nan kalibfengan ay mun-okóm at inchatna as nan Anakna* <sup>23</sup> *ta am-in ay tataku at chayawuncha koma nan Anakna ay kaman as nan mangchayawancha as nan Amana. Nan taku ay achi munchayaw as nan Anak at achina us chayawun nan Ama ay nangifaor kan hiya.*

<sup>24</sup> “*Ifiakiak kan chakayu nan tit-iwa. Nan taku ay manngor as nan kalek ya omafurot as nan nangifaor kan ha-un at mawad-an as fiyag ay maid patingkiana. Achintu makeddengan hiya ay machusa, tay narpas nan naisiyanaana kan Apo Dios, ya nawad-an at hiya as fiyag ay maid patingkiana.*

<sup>25</sup> *Ifiakiak kan chakayu nan tit-iwa. Cha omali nan timpu, ya nauy at ad wani ay nan tataku ay naifilang as natuy as nan mangiilan Apo Dios at chungrunchantu nan kallen nan Anak Apo Dios. Nan chiyuycha mangafurot as nan chinngorcha at matakucha.* <sup>26</sup> *Tay kaman as nan Ama ay kurpuwan nan mismu ay fiyag, assesa us ay inchatna as nan Anakna nan kalibfengan ay mangichat as nan fiyag.* <sup>27</sup> *Inchatna us as nan Anakna nan kalibfengan ay munokóm, tay hiya nan Naepadtu ay Anak chi Taku.*<sup>‡</sup> <sup>28</sup> *Achi kayu maschaaw as sa, tay cha omali nan timpu ay am-in nan nunkatuy at chungruncha nan kalina,* <sup>29</sup> *ya fomoknagcha as nan nailurubkancha. Nan chiyuycha nangekamkaman as ammay at matakuchantu manipud as nan utúy ta maichat kan chicha nan fiyag ay maid patingkiana. Ngem nan chiyuycha nangekamkaman as mangotettet at matakuchantu manipud as nan utúy ta makeddengancha ay machusa in-inkiana.*”

### *Nan Mangepaneknek As Nan Kenatit-iwa Maepangkep Kan Jesus*

<sup>‡</sup> <sup>5:27</sup> Dan. 7:13-14; Mat. 25:31-33; Mar. 8:38; Luc. 12:8-9

<sup>30</sup> Inturuy Jesus, “Maid maekamanku as nan mismu ay kalibfengak. Munokomák yangkiay ay maiyunud as nan ifiakian Amak kan ha-un. Isunga ustu nan atok ay mun-okóm, tay fiakun nan laychok nan atok mu achi yangkiay nan laychun nan nangifiaor kan ha-un.

<sup>31</sup> “Mu ha-un ay mismu nan mangepaneknek as nan maepangkep kan ha-un, achi maafurot nan ifiakiak. <sup>32</sup> Wacha us hi Amak ay mangepaneknek as nan maepangkep kan ha-un, ya ammok ay tit-iwa nan ifiakiana.

<sup>33</sup> “Nan usa pay at wachacha nan finaoryu ay inmuy kan Juan, ya penaneknekan Juan kan chicha nan tit-iwa maepangkep kan ha-un. <sup>34</sup> Achek masapor chi taku ay mangepaneknek as nan maepangkep kan ha-un. Ngem epanumnumku yangkiay nan infiakian Juan ta omafurot ya maesarakan kayu. <sup>35</sup> Hi Juan at maepachong as nan pingki ay cha kumarkiarudy ya sumilsilaw, ya lenarayadyu as hen-omaketan ay nangkiankianas as nan lawagna. <sup>36</sup> Ngem nan pammanknek ay wacha kan ha-un at narawrawag pay mu nan hana pammanknek Juan. Tay nan nauycha chunu ay chak lopasun ay enpatongpar Amak kan ha-un at chatona challu nan mangepaneknek as nan maepangkep kan ha-un ay hi Amak nan nangifiaor kan ha-un. <sup>37</sup> Hi Ama ay nangifiaor kan ha-un at hiya mismu nan mangepaneknek as nan maepangkep kan ha-un. Chaanyu poros chinchingor nan kalina winnu inil-ila nan lupana. <sup>38</sup> Achiyu ittu nan kalina as numnumyu, tay achi kayu omafurot as nan infiorna. <sup>39</sup> Komakud kayu ay cha mangachaachar as nan naisurat as nan Kalen Apo Dios, tay ka-ananyu un assid-i nan atunyu ay manganap as fiyag ay maid patingkiana. Chatosa ay naisurat nan mangepaneknek as nan maepangkep kan ha-un. <sup>40</sup> Uray mu hiyasa, kunyu challu achi laychun ay omali kan ha-un ta mawad-an kayu as fiyag ay maid patingkiana.

<sup>41</sup> “Achek awatun nan pammachayaw nan tataku kan ha-un. <sup>42</sup> Ngem ammok chakayu, at ammok ay maid layadyu kan Apo Dios. <sup>43</sup> Enmaliyak babaen as nan kalibfengan Ama ya kunak achi awatun kan chakayu. Ngem mu wacha nan omali babaen as nan mismu ay kalibfengana, kun at hiya nan awatunyu. <sup>44</sup> Anan atunyu man ngarud ay omafurot? Tay enha nan laychunyu at awatunyu nan pammachayaw nan tunggal usa kan chakayu, ngem achiyu met pachasun ay manganap as nan chayaw ay murpu as nan us-usa yangkiay ay Dios. <sup>45</sup> Achiyu kanan un ha-un nan mangicharumtu kan chakayu as nan Amak. Tay nan mangicharum kan chakayu at chin Moises ay namnamaunyu ay mangesarakan kan chakayu. <sup>46</sup> Mu enafurotyu chin Moises at afurotunak us koma, tay insuratna nan maepangkep kan ha-un. <sup>47</sup> Ngem mu achiyu afurotun nan insuratna, anan atunyu ay mangafurot as nan kanak?”

## 6

### Nan Namakanan Jesus As Nan Leman Lifu Ay Tataku (Mat. 14:13-21; Mar. 6:30-44; Luc. 9:10-17)

<sup>1</sup> As nan narpasan toná,\* kinumchang hi Jesus henan fiayfiay ay Galilea ay ngenadnancha us as Fiayfiay ay Tiberias. <sup>2</sup> Inmunud kan hiya nan ongoongor ay tataku, tay inilacha nan chiyuycha nakaskaschaaw ay sinyar ay en-enatna as nan nangepaammayana as nan chiyuycha munsaket. <sup>3</sup> As nan inumchanancha ad chumang, tinmikid hi Jesus ya nan disipulusna

\* <sup>6:1</sup> Omona, nunfiaat cha Jesus ay nurpu ad Jerusalem ya inmuycha ad Galilea. Angkiay ya nunlukiancha as nan fiangka, ya kinumchangha henan fiayfiay.

henan usa ay chuntug, ya tenmokorcha hid-i. <sup>4</sup> As nan hiyachi ay timpu, kiayud umchan nan Fiastan chi Munlausan ay fiastan chi Judio.

<sup>5</sup> Kun pay inilan Jesus nanongoongor ay tataku ay cha omali kan hiya, kenalina kan Felipe, "Ay chaudngun nan lomakwan takú as kanun chatona ay tataku?" <sup>6</sup> Senarudsudna chi ay manisting yangkiay kan Felipe, tay aammon Jesus mismu nan atuna.

<sup>7</sup> Tinumfor hi Felipe, "Tuan! Uray chuwan kiasot ay dinario nan elaku takú as makan at achi challu ommat as hen-anak-etuncha."

<sup>8</sup> Kenalen nan usa as nan disipulusna ay hi Andres ay sunúd Simon Pedro kan Jesus, <sup>9</sup> "Wacha nan usa ay fumarfiaru hena ay nananngát as lema ay tenapay ay naamma as kaman safug ya chuwa ay filis, ngem ay kun challu ommat na kan chatona am-in ay tataku?"

<sup>10</sup> Kenalen Jesus as nan disipulusna, "Patokoronyu nan tataku." Ongor chi lukiam hid-i, isunga hiyachi nan tenmokoran nan tataku. Nan filang nan lanaraki at umuy as leman lifu. <sup>11</sup> Angkiay ya enaran Jesus nan chiyuchya tenapay ya nunyaman kan Apo Dios. Kun pay narpas sa, empaiwarasna as nan disipulusna ay nangiwaras as nan chiyuchya nangatokor ay tataku. Assesa us nan enatna as nan chuwa ay filis ay empaiwarasna inkiana nasufucha am-in. <sup>12</sup> Kuncha pay am-in nasufu, kenalen Jesus as nan disipulusna, "Amongunyu am-in nan chinaancha ta maid masayang." <sup>13</sup> Isunga enamongcha nan chinaancha ay namnu as nan hinpuru ya chuwa ay uppig as nachaan as nan lema ay tenapay.

<sup>14</sup> Kun pay inilan nan tataku nan nakaskaschaaw ay enat Jesus, kenalicha, "Tit-iwa ay hi tona nan Pomapadtu ay naepadtu ay omali asna's luta."† <sup>15</sup> Hi Jesus at ammunna ay kiayudcha omali nán tataku ya peletuncha hiya ta munfalin as ari.‡ Kiapú as na, nauusa ay inmuy kasin henan chuntug.

#### *Nan Nanaranan Jesus Henan Chanum (Mat. 14:22-33; Mar. 6:45-52)*

<sup>16</sup> Kun pay cha maschum, chinmayyucha nan disipulus Jesus henan olet nan fiayfiay. <sup>17</sup> Nunlukiancha as nan fiangka, ya iniligwatcha ay kumchang ad Capernaum. Kun pay naschum, maid pay laing hi Jesus kan chicha.

<sup>18</sup> As nan hiyachi, nawacha at chi challuyon, tay mun-atifudfud chi angin.

<sup>19</sup> Kun pay inmuy as lema winnu unum ay kilometro nan kinchangcha, inilacha hi Jesus ay cha manarcharan henan oson nan chanum, ya cha maesnop as nan fiangka. Inmugyatcha as solet. <sup>20</sup> Ngem kenalen Jesus kan chicha, "Ha-un na! Achi kayu umugyat." <sup>21</sup> Angkiay ya laraychuncha ay mangilukian kan hiya. Hiya at chi ya inumchancha as nan olet nan lukiar ay ay-ayancha.

#### *Hi Jesus Nan Makan Ay Umichat As Fiyag*

<sup>22</sup> As nan kafikiatana, nanongoongor ay tataku ay nataynan ad chumang at sisin-udcha hi Jesus. Nanumnumcha ay kun usa nan fiangka ay wacha hid-i as nan lafi, ya ammucha us ay chaan nakilukian hi Jesus, ngem kun yangkiay nan disipulusna. <sup>23</sup> As nan hiyachi, nan tapina ay fiangka ay nurpu henan ili ay Tiberias at enmalicha as nan sag-un nan lukiar ay nanganancha as tenapay as nan narpasan nan nunyamanan Apo Jesus. <sup>24</sup> Kun pay inilan nan tataku ay maid hi Jesus hid-i winnu nan disipulusna, nunlukiancha as nan chiyuchya fiangka, ya inmuycha ad Capernaum ay uy manganap kan Jesus.

† **6:14** Deut. 18:15-18; Jn. 1:21    ‡ **6:15** Jn. 1:49; 18:36-37

<sup>25</sup> Kuncha pay ininchanan hi Jesus ad chumang nan fiayfiay, kenalicha kan hiya, "Misturu, kaatna payat chi enmaliyam hena?"

<sup>26</sup> "Ifiakiak kan chakayu nan tit-iwa," ensongfiat Jesus. "Chaak anaanapun kan chakayu, fiakun kiapú ta naawatanyu nan nakaskaschaaw ay sinyar ay inil-ilayu, ngem kiapú ta nangan kayu as nan tenapay ya nasufu kayu." <sup>27</sup> Achi kayu munforay para as nan makan ay machachael, ngem kun kayu munforay para as nan makan ay umichat as fiyag ay maid patingkiana. Nan mangichat as nan nauy ay makan kan chakayu at hiya nan Naepadtu ay Anak chi Taku, tay enpailan Dios Ama kan hiya nan panang-aprobarna."

<sup>28</sup> Angkiay ya senarudsudcha kan hiya, "Ngachana man nan masapor ay atunmi ta ekamanmi nan laychun Apo Dios?"

<sup>29</sup> Tinumfor hi Jesus kan chicha, "Nan laychun Apo Dios ay atunyu at omafurot kayu as nan infiaorna."

<sup>30</sup> Senarudsudcha kan hiya, "Ngachana ngarud nan nakaskaschaaw ay sinyar ay epailam ta ilaunmi ya omafurot kami kan he-a? Ngachana nan atum? <sup>31</sup> Nan kaap-uwan takú at nangancha as 'mana' henan disyerto. Tay wacha nan naisurat as nan Kalen Apo Dios ay kanana, 'Enettana chicha as makan ay nurpu ad chaya.' "§

<sup>32</sup> Tinumfor hi Jesus kan chicha, "Ifiakiak kan chakayu nan tit-iwa. Fiakun chin Moises nan mangichat kan chakayu as makan ay nurpu ad chaya, ngem hi Amak. O, hi Amak nan mangichat kan chakayu ad wani as tit-iwa ay makan ay murpu ad chaya." <sup>33</sup> Tay nan tit-iwa ay makan ay ichat Apo Dios at nan taku ay komsop ay nurpu ad chaya ya umichat as fiyag ay maid patingkiana as nan tataku."

<sup>34</sup> Kenalicha kan hiya, "Sir, kanayon pay ngarud ay ichatmu kan chakami na ay makan."

<sup>35</sup> Infiakian Jesus na ay maepadpachongan kan chicha, "Ha-un nan makan ay umichat as fiyag ay maid patingkiana. Nan taku ay omali kan ha-un at achintu murchugchukiaang, ya nan taku ay omafurot kan ha-un at achintu masmasketan.\* <sup>36</sup> Ngem kenalek at kan chakayu ay uray inilaak, kun kayu challu achi omafurot. <sup>37</sup> Nan am-in ay tataku ay etalek Amak kan ha-un at omalichantu kan ha-un, ya nan omali kan ha-un atachektu porospafiangchun. <sup>38</sup> Tay kenomsopak ay nurpu ad chaya ay achenek ekaman nan laychok, ngem nan laychun nan nangifiaor kan ha-un. <sup>39</sup> Nan laychun nan nangifiaor kan ha-un at maid poros litawok as uray usa as nan am-in ay entalekna kan ha-un, ngem takuwoktu chicha manipud as nan utúy as nan anongos ay urkiw. <sup>40</sup> Tay nan laychun Amak at am-in nan mamigfig kan ha-un ay Anak ya omafurot kan ha-un at mawad-ancha as fiyag ay maid patingkiana. Takuwoktu chicha manipud as nan utúy as nan anongos ay urkiw."

<sup>41</sup> As nan hiyachi, nan chiyuycha Judio at nunmotmotcha maepangkep kan hiya kiapú as nan kenalina un hiya nan makan ay kenomsop ay nurpu ad chaya. <sup>42</sup> Kenalicha, "Ay kun fiakun hi tonu hi Jesus ay potot Jose? Amammu takú met nan amana ya enana. Anuyna kanan ad wani un hiya at kenomsop ay nurpu ad chaya?"

<sup>43</sup> Tinumfor hi Jesus, "Ikinakyu ay cha munmotmotmot. <sup>44</sup> Maid taku ay makaali kan ha-un sukúd hi Amak ay nangifiaor kan ha-un nan mangepaali kan hiya, ya takuwoktu hiya manipud as nan utúy as nan anongos ay urkiw.

<sup>45</sup> Tay wacha nan insurat nan chiyuycha pomapadtu ad pus-uy ay kanana,

‘Am-in ay tataku at isuruwantu Apo Dios.’<sup>f</sup> Nan am-in ay chumngor ya munsuru kan Ama at omalicha kan ha-un. <sup>46</sup> Achek kanan un wacha nan nangila kan Ama, tay maid nakaila kan hiya omangkiyau nan usa ay nurpu kan hiya. <sup>47</sup> Ifiakiak kan chakayu nan tit-iwa. Nan taku ay omafurot kan ha-un at mawad-an as fiyag ay maid patingkiana. <sup>48</sup> Ha-un nan makan ay umichat as fiyag ay maid patingkiana. <sup>49</sup> Nan kaap-uwanyu ad pus-uy at uray nangancha as ‘mana’ henan disyerto, ngem natuycha challu. <sup>50</sup> Ngem nan makan ay chak ifiagiakia kan chakayu at hiya nan kenomsop ay nurpu ad chaya, ya mu ngachana nan mangan as nan nauy ay makan at achintu poros matmatuy. <sup>51</sup> Ha-un nan makan ay matataku ay kenomsop ay nurpu ad chaya. Mu ngachana nan mangan as nan nauy ay makan, matakuntu hiya in-inkiana. Nan makan ay anna at hiya nan achorku ay ichatku ta am-in ay tataku asna’s luta at mafialincha ay matak.”

<sup>52</sup> Angkiay ya nunlapuy nunsidla ay susuma as nan chiyuycha Judio, “Anuy man atun tonu ay taku ay mangepakan as achorna kan chitaku?”

<sup>53</sup> Kenalen Jesus kan chicha, “Ifiakiak kan chakayu nan tit-iwa. Mu achiyu kanun nan anchor nan Naepadtu ay Anak chi Taku ya ikopun nan charana at maid kan chakayu nan fiyag ay maid patingkiana. <sup>54</sup> Nan taku ay mangan as nan achorku ya mangikop as nan charak at mawad-an as fiyag ay maid patingkiana, ya takuwok hiya manipud as nan utúy as nan anongos ay urkiw. <sup>55</sup> Tay nan achorku at hiya nan tit-iwa ay makan, ya nan charak at hiya nan tit-iwa ay maikop. <sup>56</sup> Nan taku ay mangan as nan achorku ya mangikop as nan charak at mawawacha hiya kan ha-un, ya mawawachaak us kan hiya. <sup>57</sup> Kaman as nan nangifiaroranak as nan matataku ay Amak ay kurpuwan chi fiyag, ya matakawak kiapú kan hiya, assesa us ay nan taku ay mangan kan ha-un at matakawak kiapú kan ha-un. <sup>58</sup> Ha-un nan makan ay kenomsop ay nurpu ad chaya. Achi kaman as nan makan ay kenan nan kaap-uwanyu ad pus-uy, at natuycha challu. Nan taku ay mangan as nan nauy ay makan at matak in-inkiana.” <sup>59</sup> Kenalen Jesus na as nan nun-isuruwana as nan senagoga ad Capernaum.

### *Hi Jesus Nan Kali Ay Umichat As Fiyag*

<sup>60</sup> Kun pay chinngor nan chiyuycha disipulus Jesus nan kenalina, ongor kan chicha nan nangali, “Nalikiat na ay sursuru. Anan chumngor ya omafurot as na?”

<sup>61</sup> Uray maid nangifiakia kan Jesus, ammuna ay cha munmotmotmot nan disipulusna maepangkep as na, isunga kenalina kan chicha, “Ay kun yangkiyau na ya chinukkianyu at nan pammatiyu? <sup>62</sup> Mu hiyasa, ngachana ngun chi numnumyuntu mu ilaunyu nan Naepadtu ay Anak chi Taku ay ngomatu ay munfiangad as nan sikud ay kawad-ana? <sup>63</sup> Nan Espiriton Apo Dios at hiya nan umichat as fiyag, tay nan taku at maid poros pannakafialina ay umichat as fiyag. Nan chiyuycha kenalek kan chakayu at nurpu as nan Espiriton Apo Dios ay umichat as fiyag ay maid patingkiana. <sup>64</sup> Ngem wachacha nan tapina kan chakayu ay achi omafurot.” Hiyana nan kenalen Jesus, tay ammuna nunlapu as nan laplapuna nan chiyuycha achi omafurot ya nan mangesepsep kan hiya. <sup>65</sup> Kenalen pay Jesus, “Hiyana nan mangaliyak kan chakayu un maid usa as makaali kan ha-un sukúd paaliyun Amak hiya.”

<sup>66</sup> Nunlapu as nan hiyachi, ongorcha as nan disipulus Jesus nan nankug kan hiya, ya chaancha inturuy ay nanganud kan hiya. <sup>67</sup> Isunga senarudsud

<sup>f</sup> **6:45** Isa. 54:13

Jesus as nan hinpuru ya chuwa ay disipulusna, “*Chakayu ngay, ay laychunyu us ay tomaynan?*”

<sup>68</sup> Tinumfor hi Simon Pedro, “Apo, anan umunuchanmi challu. He-a met nan kawad-an nan kali ay umichat as fiyag ay maid patingkiana. <sup>69</sup> Afurotunumi ya ammumi met ay he-a nan Nasantowan ay nurpu kan Apo Dios.”

<sup>70</sup> Tinumfor hi Jesus, “*Ay kunku challu chaan pinili chakayu ay hinpuru ya chuwa? Ngem nan usa kan chakayu at kaman as nan numnum Satanas nan numnumna.*” <sup>71</sup> Nan laychun ay kanan Jesus at hi Judas ay potot Simon Iscariote. Uray usa hiya as nan hinpuru ya chuwa ay disipulusna, hiya challu nan mangsepseptu kan Jesus.

## 7

### *Nan Nun-isuruwan Jesus As Nan Fiastan Chi Fiawi*

<sup>1</sup> As nan narpasan tona, nunfiabfiaat hi Jesus henan probinsiya ay Galilea. Achina laychun ay umuy henan probinsiya ay Judea, tay nan anap-apon chi Judio hid-i at chacha anapun chi atuncha ay mangpatuy kan hiya.

<sup>2</sup> As nan kiayud umchanan nan fiastan chi Judio ay makali un Fiastan chi Fiawi, <sup>\*3</sup> kenalen nan lanaraki ay susnúd Jesus kan hiya, “Mak-akka hena ya umuyka ad Judea ta ilaun nan chiyuycha pasorotmu nan nakaskaschaaw ay cham at-atun. <sup>4</sup> Maid mangililingub as chana at-atun mu laychuna ay munchinamag hiya as nan tataku. Kiapú ta cham ekamkaman chaná ay nakaskaschaaw, uymu ngarud epaila as nan tataku asna’s luta.” <sup>5</sup> Kenalen nan mismu ay susnúdna chi, tay uray chicha at achicha afurotun hiya.

<sup>6</sup> Kenalen Jesus kar chicha, “*Chaan pay omali nan ustu ay timpok ay mangtongpar as nan planon Apo Dios. Ngem kun pay chakayu, mafialin kayu ay umuy hid-i, uray ngachana ay timpu.*” <sup>7</sup> Nan tataku asna’s luta at achi chakayu mafialin ay inglun. *Ngem ha-un at inglunak, tay chak paneknekan ay mangotettet nan chacha atuatan.* <sup>8</sup> O, uy kayu ngarud makifiasta. *Kun pay ha-un, achiyak makiuy ad wani, tay chaan pay omali nan ustu ay timpok.*” <sup>9</sup> As nan nangifiag-ana as na kan chicha, nunfiati hiya ad Galilea.

### *Hi Jesus As Nan Fiastan Chi Fiawi*

<sup>10</sup> Kun pay nak-ak nan susnúd Jesus ay nakifiasta ad Jerusalem, inligwat us Jesus ay immuy. Ngem as nan chana umuyan, chaan nunpadpadlaw ta achi maammuwani chi tataku. <sup>11</sup> As nan hiyachi ay fiasta, cha anapun nan anap-apon chi Judio hiya, ya chacha sarudsuchun, “Ay chaud ngun hiya?”

<sup>12</sup> Ongor chi intubtifon nan ongor ay tataku ay nakifiasta maepangkep kan Jesus. Wachacha nan nangali, “Kun man ammay hiya ay tatu.” Kenalen nan tapina, “Aw! Achi ya, tay chana ar-allilawun chi tataku.” <sup>13</sup> Uray mu hiyasa, maid nakaiturud ay mangap-apat as nan maepangkep kan hiya as nan sangwanan nan tataku, tay umugyatcha as nan anap-apon chi Judio.

<sup>14</sup> Kun pay kiayud komakinawa nan fiasta, inmuy hi Jesus as Templo, ya nun-isursuru as nan tataku. <sup>15</sup> Naschaawcha nan anap-apon chi Judio, ya senarudsudcha, “Anuy man nangor-an tona as kenaraingna, tay chaan met nun-us-uswila?”<sup>†</sup>

<sup>16</sup> Tinumfor hi Jesus kan chicha, “*Nan chak isursuru at achi murpu kan ha-un, ngem nurpu kan Apo Dios ay nangifaor kan ha-un.*” <sup>17</sup> *Nan taku ay manglarayad ay mangekaman as nan laychun Apo Dios at maammuwantanu*

\* <sup>7:2</sup> Lev. 23:33-36; Deut. 16:13-15      † <sup>7:15</sup> Jn. 5:30; 7:16; 8:28; 12:49; 14:10, 24

*mu nan chak isursuru at nurpu kan Apo Dios winnu nurpu as nan mismu ay kalibfengak.* <sup>18</sup> *Nan cha mangifiagfiakia as nan nurpu as numnumna at chana anapun nan mismu ay kaichayawana. Ngem nan cha manganap as kaichayawan nan nangifiaor kan hiya at matalek ya maid kenangutum kan hiya.* <sup>19</sup> *Ay kun chaan inchat Moises nan Lintig kan chakayu? Ngem kun challu maid usa kan chakayu as nangtongpar. Mu omafurot kayu as nan hana ay Lintig, adchi t'uyyu cha pachasun ay mangpatuy kan ha-un?*

<sup>20</sup> “Naanennetanka! Anan ngachana man nan cha mamachas ay mangpatuy kan he-a?” ensongfiat nan tataku.

<sup>21</sup> Tinumfor hi Jesus kan chicha, “*As nan usa ay enatku as nan Urkiw ay Mun-iblayan, naschaaw kayu am-in as nan chiyuy.* <sup>22</sup> *Kiapú ta infilin Moises ay sugyatanyu nan an-akyu ay lallaraki, sugyatanyu met as nan maekawaru ay urkiwna uray mu Urkiw ay Mun-iblayan.* (Fiakun hi Moises nan nangifilin as na, ngem chicha nan kaap-uwanyu.) <sup>23</sup> *Mu sugyatanyu nan onga ay laraki as nan Urkiw ay Mun-iblayan ta maafurot nan Lintig Moises, adchingay t'uy kayu fumungat kan ha-un kiapú ta enpaammayku nan intiru ay anchor nan laraki as nan Urkiw ay Mun-iblayan?* <sup>24</sup> *Achi kayu mun-okóm kiapú as nan maila yangkiay, ngem mun-okóm kayu ay maiyunud as nan ustu.*”

### *Nan Sarudsud Mu Hi Jesus Nan Cristo*

<sup>25</sup> As nan hiyachi, senarudsud nan tapen nan tataku ay wacha ad Jerusalem, “Ay fiakun hi tona ay laraki nan chacha pachasun ay patayun? <sup>26</sup> Ilaunyu! Nauy met hiya ay cha munkarkali as nan kaongoran chi tataku, ya maid met kankanan nan anap-apu as maekontra kan hiya. Ayokayong! Ay mafifigicha ngun tit-iwa ay hi tona nan Cristo? <sup>27</sup> Ngem kun pay hi tona ay laraki, ammu takú met am-in nan nurpuwana. As nan omaliyan nan Cristo, maid kanu mangammu as murpuwana.”

<sup>28</sup> As nan cha mun-isuruwan Jesus as Templo, inpigsana ay nangali, “Ay am-ammuwak tit-iwa ya ammuyu nan nurpuwak? Chaanak enmali asna's luta as nan mismu ay kalibfengak. Ngem nan nangifiaor kan ha-un at matalek. Achiyu poros am-ammu hiya, <sup>29</sup> ngem am-ammok challu hiya, tay hiya nan nurpuwak, ya hiya nan nangifiaor kan ha-un.”

<sup>30</sup> Kuna pay infiakia na, penachas nan anap-apu ay mangtiliw kan hiya, ngem maid nakafael as sa, tay chaan pay omali nan timpuna. <sup>31</sup> Uray mu hiyasa, ongor as nan tataku nan enmafurot kan hiya. Kenalicha, “As nan omaliyan nan Cristo, ay ong-ongor ngun chi atuna ay nakaskaschaaw ay sinyar mu nan en-enat tona ay taku?”

### *Nan Naifiaoran Nan Chiyuycha Kuwarcha Ay Mangtiliw Kan Jesus*

<sup>32</sup> As nan hiyachi, chinngor nan chiyuycha Fariseo nan intubtufon nan tataku maepangkep kan Jesus. Isunga chicha ya nan anap-apon chi papachi at inmifiaorcha as kukuwarchan nan Templo ay mangtiliw kan hiya. <sup>33</sup> Kenalen Jesus kan chicha, “Achi mafiayag nan makepagyanak kan chakayu, at munfiangachak as nan nangifiaor kan ha-un. <sup>34</sup> Anapunaktu, ngem achiyaktu maanapan, tay achi kayu mafialin ay umuy as nan kawad-aktu.”

<sup>35</sup> Nunsesennarudsud nan anap-apon chi Judio, “Ay chaud ngun nan ayanaya, t'uy takú kanu achi maanapan hiya? Ay umuy ngun as nan kakailiyan takú ay Judio ay naiwaras henan nasnasyon chi Gentil ta uyna isuruwan nan chiyuycha Gentil? <sup>36</sup> Anan laychuna ngun ay kanan as nan nangaliyana un,

'Anapunaktu, ngem achiyaktu maanapan,' ya 'Achi kayu mafialin ay umuy as nan kawad-aktu?"

### *Nan Ugwor Ay Umichat As Fiyag Ay Maid Patingkiana*

<sup>37</sup> As nan anongos ya nan kaamuchan ay urkiw as nan Fiastan chi Fiawi, tenmakchug hi Jesus, ya inpigsana ay nangali, "Mu ngachana nan nasketan, omali kan ha-un ay umikop." <sup>38</sup> Wacha nan naisurat as nan Kalen Apo Dios ay kanana,

'Nan taku ay omafurot kan ha-un at wachantu kan hiya nan mangichat as tit-iwa ay fiyag ay maepachong as nan ugwor ay cha omay-ayas.'<sup>†</sup>

<sup>39</sup> Nan nauy ay infiakian Jesus kan chicha at maepangkep as nan Espiriton Apo Dios ay awatuntu nan chiyuya omafurot kan hiya. As nan hiyachi, chaan pay naichat nan Espiriton Apo Dios, tay chaan pay naepaila nan kaichayawan Jesus.

<sup>40</sup> Nan tapen nan tataku ay nanngor as nan nauy infiakian Jesus at kenalicha, "Tit-iwa, hi tona ay taku nan Pomapadtu ay sasad-un takú."

<sup>41</sup> Kenalen nan tapina, "Hi tona nan Cristo!" Ngem nan tapina at kenalicha, "Kenomsaw kayu! Ay kun ngun murpu ad Galilea nan Cristo? <sup>42</sup> Ay chaan naisurat as nan Kalen Apo Dios un nan Cristo at murpu as nan kianak Ari David, ya maiyanak ad Betlehem ay inmiiliyan David?" <sup>43</sup> Isunga kun at tukutukún chi mangnunumnum nan tataku as nan maepangkep kan Jesus.

<sup>44</sup> Nan tapina kan chicha at laychuncha ay tiliwun hiya, ngem maid usa as nakafiael ay nangekaman as sa kan hiya.

### *Nan Achi Omafurotan Nan Anap-apon chi Judio Kan Jesus*

<sup>45</sup> As nan nunfiangchan nan chiyuya kuwarcha, senarudsud nan anapapon chi papachi ya nan chiyuya Fariseo kan chicha, "Adchi t'uyyu chaan inyalihiya?"

<sup>46</sup> "Maid met kang poros nunkali ay kaman as nan enat tona ay taku," ensongfiat nan chiyuya kuwarcha.

<sup>47</sup> Enot-otyok nan chiyuya Fariseo chicha, "Ayokayong! Uray us payat chakayu at naallilaw kayu? <sup>48</sup> Ay wachay ammuu as usa as nan anap-apu winnu chiyuya Fariseo ay enmafurot kan hiya? <sup>49</sup> Ngem as nan nauycha man ongor ay tataku ay achi poros nangammu as nan Lintig Moises at wacha nan tuchor Apo Dios kan chicha."

<sup>50</sup> Hi Nicodemo ay usa kan chicha ay Fariseo ya hiya nan inmuy kan Jesus as nan henlafi at senarudsudna kan chicha,<sup>§</sup> <sup>51</sup> "Ay mafialin ay keddengan nan Lintig takú nan usa ay taku ay machusa sakbay mafistikiar ya maam-muwan mu ngachana nan en-enatna?"

<sup>52</sup> "Ay i-Galilea ka us payat?" ensongfiatcha. "Ayu, anapum ay ustу nan naisurat as nan Kalen Apo Dios, at maammuwamtu ay maid poros pomapadtu ay murpu ad Galilea." <sup>53</sup> As nan hiyachi, waschi un kenmatam.

## 8

### *Nan Fiafiai Ay Inmiwet*

<sup>1</sup> Kun pay hi Jesus, inmuy hiya henan chuntug ay Olivo. <sup>2</sup> As nan wi-ewi-et, nunfiangad hi Jesus as Templo, ya am-in nan tataku at enarufongcha hiya. Tenmokor hiya, ya enlapuna ay mun-isuru kan chicha. <sup>3</sup> As nan chana mun-isuruwan, inyalen nan chiyuya mun-isursuru as Lintig ya nan chiyuya

<sup>†</sup> **7:38** Exo. 17:1-7; Isa. 12:3-6; 44:3; 55:1; 58:11; Ezek. 47:1-12; Jn. 4:10      <sup>§</sup> **7:50** Jn. 3:1-21

Fariseo nan usa ay fiafiai ay tiniliwcha ay naasporancha ay cha umiwet. Enpatakchugcha hiya as nan sangwanan nan ongor ay tataku.<sup>4</sup> Kenalicha kan Jesus, “Misturu, nan nauy ay fiafiai at naasporan ay cha umiwet.<sup>5</sup> As nan Lintig takú, infilin Moises ay nan assena ay fiafiai at masapor malomtak ta matuy. Anan maifiakiam maepangkep kan hiya?”<sup>6</sup> Hiyana nan infiakiacha ay manisting kan Jesus ta wachay panforcha ay mangicharum kan hiya. Ngem nunyongyong hi Jesus, ya enosarna nan kiayyamotna ay nunsurat as nan luta.

<sup>7</sup> As nan nangepapatiyancha ay nunsarudsud, tenmakchug hi Jesus, ya kanana kan chicha, “Mu ngachana kan chakayu nan maid fiasorna, ayu, hiya nan omona ay manglomtak kan hiya.”<sup>8</sup> Kasín nunyongyong, ya enosarna nan kiayyamotna ay nunsurat as nan luta.

<sup>9</sup> As nan nanngorancha as nan kenalina, nak-akcha am-in ay naussaussa manipud as nan kaam-amaan inkiana hi Jesus yangkiay ya nan fiafiai ay nangatakchug hid-i nan nayagyag.

<sup>10</sup> Angkiay ya tenmakchug hi Jesus, ya kanana kan hiya, “Ammi, ay chaudcha ngay? Ay maid nang-okóm kan he-a?”

<sup>11</sup> “Maid, sir,” ensongfiatna.

Kenalen Jesus, “Mu hiyasa ngarud, uray ha-un at acheck okomún he-a. Uyka at, ya achika kasiñ fumasfiasor.”

### *Hi Jesus Nan Silaw*

<sup>12</sup> Kun pay kasiñ nunkali hi Jesus as nan tataku, infiakiana na ay maepad-pachongan: “Ha-un nan silaw ay manilaw as numnum nan tataku asna's luta. Mu ngachana nan umunud kan ha-un, achi poros manaran as nan ngongot, ngem kun at wacha kan hiya nan silaw ay umichat as fiyag.”\*

<sup>13</sup> Kenontran nan chiyucha Fariseo hiya, “He-a challu nan cha mangepaneknek as nan maepangkep as achormu. Achi kaaafurot nan cham ifiagfiakia!”

<sup>14</sup> Tinumfor hi Jesus, “Uray mu ha-un nan cha mangepaneknek as nan maepangkep as achorku, tit-iwa nan pammaneknekku, tay ammok nan nurpuwak ya nan ay-ayak. Ngem chakayu, achiyu poros ammu nan nurpuwak ya nan ay-ayak.”<sup>15</sup> Nan aturyu ay mun-okóm at maiyunud as nan numnum chi taku. Ngem ha-un at maid okomók.<sup>16</sup> Ngem uray mu mun-okomák, ustú nan panang-okómku, tay fiakun yangkiay ha-un nan mun-okóm, ngem kun at chuwa kami kan Amak ay nangifiaor kan ha-un.<sup>17</sup> Naisurat as nan Lintigyu ay mu munpachong nan pammaneknek chi chuwa ay taku, tit-iwa nan ifiakiacha.<sup>18</sup> Ha-un ay mismu nan usa ay mangepaneknek as maepangkep as nan achorku, ya nan maekadwa at hi Ama ay nangifiaor kan ha-un.”

<sup>19</sup> Senarudsudcha kan Jesus, “Ay chaud nan kawad-an amam?”

Tinumfor hi Jesus, “Achiyak met am-ammu, ya achiyu us am-ammu hi Amak. Mu tit-iwa ay am-ammuwak kan chakayu, am-ammuyu us hi Amak.”

<sup>20</sup> Chatona nan infiagiakian Jesus as nan chana mun-is-isuruwan as nan Templo as nan sag-un nan mangit-ituwancha as siping ay maichaton. Ngem maid nangtiliw kan hiya, tay chaan pay omali nan timpuna ay mangtongpar as nan planon Apo Diós.

### *Nan Infiakian Jesus As Nan Achi Omafurot Kan Hiya*

---

\* <sup>8:12</sup> Jn. 1:4-5; 9:5; 12:46

**21** Kenalen kasin Jesus kan chicha, “*Awni at mak-akak, ya anapunaktu, ngem matuy kayuntu ay chaan kayu napakawan as nan fiasfiasoryu. O, achi kayu mafialin ay makaali as nan ay-ayak.*”

**22** Nunsesennarudsud nan anap-apon chi Judio, “Adchi t’uyna kanan un achi takú mafialin ay makauy as nan ay-ayana? Ay nan laychuna ngun ay kanan at patayuna nan achorna?”

**23** Tinumfor hi Jesus kan chicha, “*Chakayu, nurpu kayu asna’s luta, ngem ha-un, nurpuwak ad chaya. Nan nunumnumunyu at nan maepangkep asna’s luta, ngem ha-un at fiakun.*” **24** *Hiyasa nan nangaliyak kan chakayu un matuy kayuntu ay chaan kayu napakawan as nan fiasfiasoryu. Tay mu achiyu afurotun ay ha-un nan infiakiak at matuy kayu challu ay chaan kayu napakawan as nan fiasfiasoryu.*”

**25** “Anan ngachanmu man?” senarudsudcha kan hiya.

“*Ayokáyong! Ha-un nan infiagiakiak challu kan chakayu nunlapu as nan laplapuna inkiana ad wani,*” ensongfiat Jesus. **26** “*Kun pay maepangkep kan chakayu, ongor nan mafialin ay kanak ay mangepafiasor kan chakayu. Ngem nan infiakiak nan nangifiaor kan ha-un at tit-iwa, ya chak ifiagiakiak as nan tataku asna’s luta nan chinngorku yangkiay kan hiya.*”

**27** Nan chiyucha nanngor as na at chaancha naawatan ay nan Dios Ama nan infiagiakiakina. **28** Isunga kenalen Jesus kan chicha, “*As nan mangetag-uyanyuntu as nan Naepadtu ay Anak chi Taku as nan koros, maam-muwanyuntu ay ha-un nan chak ifiagiakiak. Maammuwanyuntu us ay maid poros atok as nan mismu ay kalibfengak, ngem kunku yangkiay cha ifiagiakiak nan insuron Amak kan ha-un.*” **29** *Nan nangifiaor kan ha-un at wacha kan ha-un. Achiyak taytayan ay kun mauusa, tay kunku cha atuatun nan mangepalaylayad kan hiya.*” **30** As nan nangifiag-an Jesus as sa, ongor nan enmafurot kan hiya.

### *Nan Maifilang Ay Anak Abraham*

**31** As nan hiyachi, kenalen Jesus as nan chiyucha Judio ay enmafurot kan hiya, “*Mu iturturuyyu ay mangun-unud as nan insursurok, chakayu nan tit-iwa ay disipulusku.*” **32** *Maammuwanyuntu nan kenatit-iwa maepangkep kan ha-un, ya nan kenatit-iwa ay anna nan mangwayawayantu kan chakayu.*”

**33** Tinumforcha kan hiya, “Ohu! Kianak chakami met kan Abraham, ya maid usa as namabfiaor kan chakami. Anum kanan un mawayawayaan kamintu?”

**34** Tinumfor hi Jesus kan chicha, “*Ifiakiak kan chakayu nan tit-iwa. Nan ngachana ay fumasor at hiya nan fiabfiaarun nan fiasor.*” **35** *Nan mafifiaor at achi maifilang in-inkiana as nan pamilya, ngem nan anak at maifilang in-inkiana.*” **36** *Isunga mu nan Anak Apo Dios nan mangwayawaya kan chakayu, tit-iwa ay mawayawayaan kayu.*” **37** *Ammok met ay kianak chakayu kan Abraham, ngem laychunak ay patayun, tay achiyu awatun nan chak isurusuru.*” **38** *Ifiagiakiak nan maepangkep as nan enpailan Amak kan ha-un. Chakayu at assesa us, tay atunyu nan chinngoryu kan amayu.*”

**39** Tinumfor nan chiyucha Judio kan hiya, “Enham! Chin Abraham nan amami.”

Kenalen Jesus kan chicha, “*Mu tit-iwa ay an-ak chakayu kan Abraham, atunyu koma nan en-enatna.*” **40** *Ngem chayu met iyan-anap chi atunyu ay*

† **8:28** Exo. 3:14; Jn. 13:19; 18:4-6

*mangpatuy kan ha-un ay nangifiakia kan chakayu as nan kenatit-iwa ay chinngoriku kan Apo Dios. Maid assesa as en-enat Abraham! 41 Nan chayu at-atun nan en-enat amayu."*

Kenalicha kan Jesus, "Fiakun kami met bastardo! Hi Apo Dios yangkiay nan amami. Maid tukún."

<sup>42</sup> Kenalen Jesus kan chicha, "Mu tit-iwa ay hi Apo Dios nan Amayu, laylaychunak a koma, tay nurpuwak met kan Apo Dios, ya ad wani nauyak hena. Chaanak enmali as nan mismu ay kalibfengak, ngem hiya nan nangifiakia kan ha-un. <sup>43</sup> Adchi t'uyyu achi maawatan nan chak kankanan? Hiyana challu, tay hinlurlurkunyu ay chumngor as nan ifiakiak. <sup>44</sup> Chakayu nan an-ak amayu ay hi Satanas, ya nan laychunyu ay atun at nan laylaychuna. Nunlapu as nan laplapuna at pomapatuy hiya, ya maid poros ifiagfiakiana as kenatit-iwa, tay maid poros kenatit-iwa kan hiya. As nan munkutumana, maiyunud as nan ukialina ay nangutum. Tay hiya at nangutum ya aman chi am-in ay kenangutum. <sup>45</sup> Ngem kiapú ta chak ifiakia nan kenatit-iwa, achiyak afurotun kan chakayu. <sup>46</sup> Ngachana kan chakayu nan mangepaneknek ay finmasorak? Mu ifiakiak nan kenatit-iwa, adchi t'uyak achi afurotun? <sup>47</sup> Nan anak Apo Dios at chungruna nan karkalen Apo Dios. Ngem fiakuna an-ak chakayu, isunga achiyu chungrun nan kalina."

### *Cha Jesus Kan Abraham*

<sup>48</sup> Tinumfor nan chiyucha Judio kan Jesus, "Ay achi tit-iwa nan kananmi un i-Samariaka<sup>‡</sup> ya naanennetanka?"

<sup>49</sup> "Maid anennet kan ha-un, ngem kunku at cha chayawun hi Amak. Chakayu at achiyak chayawun," ensongfiat Jesus. <sup>50</sup> "Achech cha anapun nan mismu ay kaichayawak. Ngem wacha nan usa ay cha manganap as nan kaichayawak, ya hiya nan mun-okóm. <sup>51</sup> Ifiakiak kan chakayu nan tit-iwa. Mu ngachana nan mangtongpar as nan kalek at achintu matmatuy."

<sup>52</sup> Kenalicha kan hiya, "Ad wani ammumi ay tit-iwa ay naanennetanka. Hi Abraham at natuy, ya kaman us nan chiyucha pomapadtu. Ngem kanam pay laing un nan mangtongpar as nan kalem at achi matmatuy. <sup>53</sup> Ay am-amudka chamman mu chin kaap-uwanmi ay Abraham? Hiya at natuy, ya kaman us nan chiyucha pomapadtu. Ngachana kang nan mangnunnumnummu as achormu?"

<sup>54</sup> Tinumfor hi Jesus, "Mu ichayawku nan achorku, maid kotok nan kaichayawak. Hi Amak nan mangichayaw kan ha-un ay hiya nan kananyu un Apo Diosyu. <sup>55</sup> Achiyu poros am-ammu hiya. Kun pay ha-un at am-ammok challu hiya. Mu kanak unachech am-ammu hiya, nangutumak ay kaman kan chakayu. Ngem am-ammok met tit-iwa hiya, ya tongparok nan kalina. <sup>56</sup> Naragsak chin kaap-uwanmi ay Abraham as nan nangnumnumana ay ilaunantu nan urkiw ay omaliyak asna's luta. Inilana tit-iwa, at naragsakan hiya."<sup>§</sup>

<sup>57</sup> "Ayokayong! Kuncha maid pay laing leman puru as tawwunmu ya," kenalen nan chiyucha Judio kan hiya. "Anum kanan un inilam hi Abraham?"

<sup>58</sup> Tinumfor hi Jesus kan chicha, "Ifiakiak kan chakayu nan tit-iwa. As nan chaan pay naiyarkan Abraham at nawawachaak."\* <sup>59</sup> As nan nanngorancha as sa, pinmichetcha as fiatua elomtakcha kan hiya, ngem nuntafun hi Jesus, ya nak-ak as Templo.

---

<sup>‡</sup> **8:48** Jn. 4:9. Nan i-Samaria at inglun nan chiyucha Judio.    <sup>§</sup> **8:56** Gen. 12:3; 15:17-21    \* **8:58** Exo. 3:14

## 9

*Nan Nangepaammayan Jesus As Nan Nafurag*

<sup>1</sup> As nan nanarcharanan cha Jesus, inilana nan usa ay laraki ay nafufurag nunlapu as nan naiyankana. <sup>2</sup> Senarudsud nan disipulusna kan hiya, “Misturu, ngachana nan nakin fiasor t’uy nafufurag na nunlapu as nan naiyankana? Ay nan nauy laraki winnu nan chanakchakorna?”

<sup>3</sup> “Fiakun fiasor nan nauy laraki winnu nan chanakchakorna,” ensongfiat Jesus. “Enommat na kan hiya ta maepaila nan pannakafialin Apo Dios kan hiya. <sup>4</sup> Masapor atun takú nan epadnon nan nangifiaor kan ha-un, tay kaorkia pay laing. Cha omali nan lafi, at maid makachunu. <sup>5</sup> As nan mawawad-ak pay laing asna’s luta, ha-un nan silaw ay manilaw as numnum nan tataku.”

<sup>6</sup> Kun pay kenalen Jesus chaná, tinmubfia as nan luta, at penelotna. Hana at ekapu as nan matan nan laraki. <sup>7</sup> Kenalina as nan laraki, “Uyka munchor-op as nan Mun-om-omsan ay Siloe.” (Nan laychun ay kanan nan Siloe at naifiaor.) Isunga hiya at chi ya inmuy ya nunchor-op. As nan kenmatamana, makaila at.

<sup>8</sup> As nan nangil-an nan sasag-una ya nan chiyuchaya sikud ay nangil-ila kan hiya as nan nunlelemosana, kenalicha, “Ay fiakun hi tona nan laraki ay nangepaingsa ay tomokor ay munlemos?” <sup>9</sup> “O, hiya ya,” kenalen nan tapen nan tataku.

Nan tapina at kenalicha, “Fiakun ya. Kaluplupana yangkiay.”

Ngem kenalen nan laraki ay mismu, “Ha-un chi ya.”

<sup>10</sup> Senarudsudcha kan hiya, “Adchi t’uyka makaila ad wani?”

<sup>11</sup> Tinumfor hiya, “Nan taku ay nan ngachana at Jesus at penelotna nan luta, at enkapuna as nan matak. Hana at kanan kan ha-un un umuyak as nan Mun-om-omsan ay Siloe ya munchor-opak hid-i. Isunga hiya at chi ya inmuyak, at nunchor-opak. Kunak pay narpas, makailaak.”

<sup>12</sup> “Ay chaud ngay hiya?” senarudsudcha kan hiya.

“Tuan,” ensongfiatna.

*Nan Namistikiaran Nan Chiyuchaya Fariseo As Nan Nakaanan Nan Finuragna*

<sup>13</sup> Inyuycha nan laraki ay nakaan chi finuragna as nan chiyuchaya Fariseo.

<sup>14</sup> Nan urkiw ay namelotan Jesus as nan pitak ya nangaanana as finurag nan laraki at Urkiw ay Mun-iblayan. <sup>15</sup> Isunga ensarochakchak nan chiyuchaya Fariseo as nan laraki mu adchi t’uy nakaila. Kenalina kan chicha, “Enkapuna nan pitak as matak, at chinor-opak. Ad wani at makailaak.”

<sup>16</sup> Kenalen nan tapen nan Fariseo, “Nan laraki ay nangekaman as na at chaan nurpu kan Apo Dios, tay achina tongparun nan lintig maepangkep as nan Urkiw ay Mun-iblayan.”

Ngem kenalen nan tapina, “Mu hiya at fumafiasor challu, anan atuna ay mangekaman as nakaskaschaaw ay sinyar ay kaman as nan nauycha?” Angkiay ya tukutukún at chi mangnunumnumcha as nan maepangkep kan Jesus.

<sup>17</sup> Isunga kasin senarudsud nan chiyuchaya Fariseo as nan laraki, “Anan mafiakiam maepangkep kan hiya, tay kenaana nan finuragu?”

“Pomapadtu hiya,” ensongfiatna.

<sup>18</sup> Ngem chaan pay enafurot nan anap-apon chi Judio ay nan laraki ay makaila ad wani at naiyanak ay nafufurag. Isunga enayakiancha nan chanakchakorna. <sup>19</sup> Senarudsudcha, “Ay hi tona nan anakyu ay laraki

ay kananyu un nafufurag nunlapu as nan naiyankana? Adchi ngay t'uy makaila ad wani?"

<sup>20</sup> Tinumfor nan chanakchakorna, "Ammumi ay hi tona nan anakmi ay laraki, ya ammumi ay nafufurag hiya nunlapu as nan naiyankana.

<sup>21</sup> Ngem achimi poros ammu mu adchi t'uy makaila hiya ad wani winnu ngachana nan nangaan as finuragna. Kakunyu sarudsuchun kan hiya, tay inmurúg met, ya mafialina ay songfiatan nan sarudsudyu." <sup>22</sup> Kenalen nan chanakchakorna na kiapú ta umugyatcha as nan anap-apon chi Judio, tay nuntuturakian at nan nauycha anap-apu ay mu ngachana nan mamigfig ay hi Jesus nan Cristo at maepak-ak hiya as nan senagogacha. <sup>23</sup> Isunga hiyasa nan kiapúna as nangaliyan nan chanakchakorna un inmurúg hiya, ya kan hiya nan munsarudsuchancha.

<sup>24</sup> Kasincha enayakian nan laraki ay nafufurag nunlapu as nan naiyankana. Kenalicha kan hiya, "Chayawum kayong hi Apo Dios ya fiakun hi tona, tay ammumi ay hi tona ay taku ay nangepaammay as matam ta makailaka at fumafiasor."

<sup>25</sup> Tinumfor hiya, "Achek ammu mu fumafiasor hiya winnu achi. Nan usa ay ammok at nafurakiak, ngem makailaak ad wani."

<sup>26</sup> Senarudsudcha kan hiya, "Anan enatna mampay kan he-a t'uy nakaan nan finuragmu?"

<sup>27</sup> "Kunku man infiakia kan chakayu, ya kun kayu achi chumngor," ensongfiatna. "Adchi t'uyyu laychun ay kasin chungrun? Ay laychunu us ay munfialin as disipulusna?"

<sup>28</sup> Angkiay ya ininsurtucha hiya, ya kanancha, "He-a nan disipuluna! Ngem chakami at disipulus Moises! <sup>29</sup> Ammumi ay nunkali hi Apo Dios kan Moises. Ngem hi tona ay taku, achimi ammu uray nan nurpuwana."

<sup>30</sup> Tinumfor nan laraki, "Anuy paat nakaskaschaaw as solet! Achiyu ammu nan nurpuwana, ngem kenaana met nan finuragku. <sup>31</sup> Ammu takú ay achi chumngor hi Apo Dios as nan chiyuya fumafiasor, ngem chumngor hiya as nan tataku ay mangchayaw kán hiya ya mangekaman as nan laychuna. <sup>32</sup> Nunlapu as nan nafiyangan nan luta, maid poros nadngor as taku ay nangepaammay as nafufurag nunlapu as nan naiyankana. <sup>33</sup> Mu nan nauy ay taku at chaan nurpu kan Apo Dios, achi koma makaekaman as assena."

<sup>34</sup> Tinumforcha kan hiya, "Ohu! Kunka cha fumafiasor nunlapu as nan naiyankam ya. He-a at paat nan mangisuru kan chakami?" Angkiay enpak-akcha hiya as nan senagoga.

### *Nan Achi Omafurot Ay Maepachong As Nan Nafurag*

<sup>35</sup> Kun pay chinngor Jesus ay enpak-akcha hiya, uyna enanap. As nan nanginchanana kan hiya, senarudsudna, "Ay omafurotka as nan Naepadtu ay Anak chi Taku?"

<sup>36</sup> "Sir, ifiakiam pay mu anan ngachana ta omafurotak kan hiya," ensongfiatna.

<sup>37</sup> Kenalen Jesus kan hiya, "Inilam at hiya, ya hiya nan cha maketagtakiatfor kan he-a."

<sup>38</sup> "Apo, omafurotak," ensongfiat nan laraki, at nunchayaw hiya kan Jesus.

<sup>39</sup> Kenalen Jesus, "Enmaliyak asna's luta ay mun-okóm ta nan chiyuya kaman nafurag ay achi nangammu kan Apo Dios at makailacha, ya nan chiyuya makaila ay mangali un ammucha hi Apo Dios at munfialinchá as kaman nafurag."

**40** Nan tapen nan chiyucha Fariseo ay naesasag-un kan Jesus at chinngorcha na, ya senarudsudcha, “Ay kanam un nafurag kami us?”

**41** Tinumfor hi Jesus, “*Mu nafurag kayu at maid komafiasoryu. Ngem kiapú ta kananyu un makaila kayu, kukutug nan fiasoryu.*”

## 10

### *Nan Maepadpachongan Maepangkep As Nan Ammay Ay Mun-ay-aywan As Karnero*

**1** Infiakian Jesus na ay maepadpachongan kan chicha: “*Ifiakiak kan chakayu nan tit-iwa. Nan taku ay achi sungkop as nan sugpan nan punchag chi karnero, ngem kun uy komarab as nan arad at mangaakiw ya homohold-ap.*” **2** *Nan taku ay sungkop as nan sugpan at hiya nan mangay-aywan as nan karnero.* **3** *Hiya nan paskopun nan munkukuwarcha as nan sugpan. As nan manguyawan nan mangay-aywan as nan ngachan nan tunggal usa as nan chiyucha karnerona at ematonancha nan kalina at umuycha kan hiya. Angkiay ya epanguna chicha ay pumitiw.* **4** *Kuna pay empapitiw am-in nan kuwana, epanguna chicha, ya nan karnerona at umunudcha kan hiya, tay ammucha nan kalina.* **5** *Achicha umunud as nan tukún, ngem kuncha at lomayaw ay manaynan kan hiya, tay achicha ammu nan kalina.*” **6** Hiyana nan maepadpachongan ay infiakian Jesus kan chicha, ngem chaancha naawatan nan laychuna ay kanan.

### *Hi Jesus Nan Ammay Ay Mangay-aywan*

**7** Isunga kasing kenalen Jesus kan chicha, “*Ifiakiak kan chakayu nan tit-iwa. Ha-un nan maepachong as nan sugpan ay sungkopan nan chiyucha karnero.*\* **8** *Nan am-in ay enmon-oná ay enmali mu ha-un at chicha nan mangaakiw ya homohold-up, ngem chaan enafurot nan chiyucha karnero chicha.* **9** *Ha-un nan sugpan. Mu ngachana nan sungkop ay manguy kan ha-un at maesarakan. Maepachong hiya as nan karnero ay mafalin ay sungkop ya pumitiw ay mun-anap as munkiarafiana.*

**10** “*Nan mangaakiw at omali yangkiay ay mangakiw, pomatuy, ya chumachael. Kun pay ha-un, enmalyak ta nan tataku ay chicha nan maepachong as nan karnerok at mawad-ancha as fiyag ay maid patingkiana ya maid kurangna.*”

**11** Inturuy Jesus, “*Ha-un nan ammay ay mangay-aywan as karnero. Nan ammay ay mangay-aywan at nakasakiana ay mangichat as fiyagna para as nan karnerona uray mu matuy hiya.*” **12** *Nan malagfuwan ay fiakun tit-iwa ay mangay-aywan ya fiakun nakin kuwa as nan karnero at lomayaw ay manaynan as nan karnero mu wachay ilauna as atap ay asu ay cha omali. Nan atap ay asu at chupapuna nan karnero, ya pasisiyanuna chicha.* **13** *Lomayaw hiya kiapú ta hiya at malagfuwan yangkiay, ya achina ayyiwan nan chiyucha karnero.* **14** *Ha-un nan ammay ay mangay-aywan as karnero. O, am-ammok nan karnerok, ya nan karnerok at am-ammuwak us.* **15** *Hiyasa us kan Ama ay am-ammuwak ya am-ammok us hiya, ya ichatku nan fiyagku kiapú as nan karnerok.* **16** *Wachacha nan tapina ay karnerok ay maid pay as nan nauy punchag. Masapor etoróngku us chicha hena, at chumngorchantu as nan kalek. Mu hiyasa, munfialincha as henpamurukian ya usa nan mangay-aywan kan chicha.*

\* **10:7** Jn. 6:35; 14:6

**17** “Laylaychunak kan Amak, tay nakasakianaak ay mangichat as nan fiyagku ta kasinak challu matak. **18** Maid mangara as nan fiyagku kan ha-un, ngem ha-un challu nan nakin numnum ay mangichat. Wacha nan kalibfengak ay mangichat as nan fiyagku, ya wacha us nan kalibfengak ay mangara kasi. Hiyana nan filin ay enawatku kan Amak.”

**19** Kun pay chinngor nan chiyuycha Judio nan nauycha infiakian Jesus, tutukukún kasiñ chi mangnunumnumcha as nan maepangkep kan hiya.

**20** Ongor kan chicha nan nangali, “Naanennetan hiya! Natongok hiya! Adchi t’uy kayu chumngor kan hiya?”

**21** Ngem kenalen nan tapina, “Fiakun assesa nan kankanan chi naanennetan ya. Ay maepaammay nan anennet chi nafurag ta makaila?”

### *Nan Nangachiyan Nan Chiyuycha Judio Kan Jesus*

**22** As nan chinamuy, wacha nan Fiasta ay Maichatonan chi Templo ad Jerusalem. **23** Cha manarcharan hi Jesus as nan makali un Fiangsar Solomon as Templo. **24** Enarufong nan chiyuycha Judio hi Jesus, ya kanancha, “Anan uyaka man chi mangpapasugchanam kan chakami? Mu he-a nan Cristo, elawlawagmu man ay mangifiakia kan chakami.”

**25** Tinumfor hi Jesus kan chicha, “Infiakiak at kan chakayu, ngem kunyu challu achi afurotun. Nan chiyuycha nakaskaschaaw ay chak at-atun as nan kalibfengan Ama at chatona nan mangepaneknek as nan maepangkep kan ha-un. **26** Ngem kun kayu achi omafurot kiapú ta fiakun chakayu nan karnerok. **27** Nan chiyuycha karnerok at ematonancha nan kalek. Ammok chicha, ya umunudcha kan ha-un. **28** Ettak chicha as fiyag ay maid patingkiana, ya achichantu poros maisiyan kan Apo Dios. Maidtu mammamros kan chicha kan ha-un. **29** Hi Amak ay nangichat kan chicha kan ha-un at am-amud mu nan am-in. Maid makafiael ay mamros kan chicha as nan mangay-aywanan Dios Ama. **30** Ha-un ya hi Ama at us-usa kami.”

**31** Kun pay chinngor nan chiyuycha Judio, kasincha pinmichet as fiatu as elomtakcha kan hiya. **32** Kenalen Jesus kan chicha, “Ongor nan ammay ay nakaskaschaaw ay enpailak kan chakayu babaen as nan pannakafialin Ama. Ay chaud as nan nauycha ay enpailak nan kiapúna as uyyu manglomtakan kan ha-un?”

**33** Tinumfor nan chiyuycha Judio kan hiya, “Fiakun nan ammay ay enatmu nan kiapúna as manglomtakanmi kan he-a, ngem kiapú as nan kenalem ay maifusor kan Apo Dios. Kunka lawá taku ya, ngem munfialinum chi achormu as Dios.”

**34** Kenalen Jesus kan chicha, “Ay kun chaan naisurat as nan Lintigyu ay kenalen Apo Dios un, ‘Kenalek un ap-apodios kayu?’† **35** Ammu takú met ay nan naisurat as nan Kalen Apo Dios at achi masoksokatan, ya enawakian Apo Dios as ap-apodios nan chiyuycha naichatan nan kalen Apo Dios. **36** Kun pay ha-un, piniliyak kan Ama ya infiaorak asna’s luta. Ay kananyu un chaak munkali as maifusor kan Apo Dios kiapú ta kenalek un, ‘Ha-un nan Anak Apo Dios?’‡ **37** Mu acheck cha atun nan epadnon Ama at achiyak ud-ay afurotun. **38** Ngem mu atok chaná, uray achiyak afurotun, afurotunyu koma nan chiyuycha chak atuatun ta maammuwayu ya maawatanyu ay wacha hi Ama kan ha-un, ya wachaak us kan hiya.”

† **10:34** Sal. 82:6    ‡ **10:36** Jn. 17:17, 19

<sup>39</sup> Penachascha kasin ay mangtiliw kan Jesus, ngem enlayawana chicha. <sup>40</sup> Angkiay ya kasin nunfiangad hi Jesus ay kinumchang henan wawwang ay Jordan henan lukiar ay nunfunfunyakian Juan ad kasin, ya hid-i nan nagyanana. <sup>41</sup> Ongor ay tataku nan inmuy kan hiya, at kenalicha, “Maid enat Juan as nakaskaschaaw ay sinyar, ngem am-in ay kenarkalen Juan maepangkep kan tonu ay taku at tit-iwa.” <sup>42</sup> Ongor ay tataku nan enmafurot kan Jesus hid-i.

## 11

### *Nan Natuyan Lazaro*

<sup>1</sup> Wacha nan usa ay laraki ay nan ngachana at Lazaro ay cha munsaket ad Betania. Hid-i nan ilen Maria ya nan sunúdna ay hi Marta. <sup>2</sup> Hi Maria ay anna nan mangikuyagtu as fiangfiangru as nan suken Jesus, ya punasanantu as nan fookna. Hi Lazaro ay sunúdna nan nunsaket.\*

<sup>3</sup> Isunga inmifiaor nan hen-aki ay fianafiai as uy mangifiakia kan Jesus un, “Apo, nan kiayyummu ay laylaychum at cha munsaket.” <sup>4</sup> Kun pay chinggor Jesus sa, kenalina, “*Nan saket ay anna at achi ekatuy Lazaro. Ommat na ta maichayaw hi Apo Dios, ya hiyasa nan kiapón nan maichayawan nan Anak Apo Dios.*”

<sup>5</sup> Laylaychun Jesus nan nauycha hen-anag-i ay cha Marta, Maria ya Lazaro. <sup>6</sup> As nan nangchamakian Jesus ay nunsaket hi Lazaro, nayaschi henan lukiar ay kawad-ana as chuwa pay ay urkiw. <sup>7</sup> Kun pay narpas na, kenalen Jesus as nan disipulusna, “*Umuy takú kasin ad Judea.*”

<sup>8</sup> Kenalen nan disipulus kan hiya, “Misturu, chaan nafiayag nan timpu ay kiayud chaká nanglomtakan as nan chiyuycha Judio. Ay kasinka pay laing munfiangad hid-i?”

<sup>9</sup> Tinumfor hi Jesus, “Ay kun maid hinpuruya chuwa ay uras as nan kaorkia? Mu ngachana nan manarcharan as nan kaorkia at achi maesakiaw hiya, tay mailana nan silaw†asna's luta. <sup>10</sup> Ngem mu ngachana nan manarcharan as nan lafi at maesakiaw, tay maid nan silaw kan hiya.”

<sup>11</sup> Kun pay kenalen Jesus na, kenalina pay, “*Nan kiayyum takú ay hi Lazaro at nassuy, ngem ukyu fiangunun hiya.*”

<sup>12</sup> Tinumfor nan disipulus kan hiya, “Apo, mu nassuy hiya at omam-maytu.” <sup>13</sup> Nan laychun Jesus ay kanan at natuy hiya, ngem ka-anancha mu nanassuy tit-iwa hi Lazaro.

<sup>14</sup> Isunga narawag nan infiakian Jesus kan chicha, “*Natuy hi Lazaro, 15 ngem kiapú kan chakayu, naragsakak as nan kamaidku as nan kawad-ana as nan natuyana ta pumigsa nan pammatiyu kan ha-un. Ayu, uy takú ilaun hiya.*”

<sup>16</sup> Kenalen Tomas ay makali un Apel as nan kakadwana ay disipulus, “Umuy takú us ta uray maetapi takú as nan Apo ay matuy.”

### *Hi Jesus Nan Kurpuwan Chi Fiyag Ay Maid Patingkiana*

<sup>17</sup> Kun pay inumchan cha Jesus ad Betania, naammuwana ay opat at ay urkiw nan nailurubkan Lazaro. <sup>18</sup> Nan nauy Betania at asnop ad Jerusalem. Umuy as turu ay kilometro nan kaachawwina. <sup>19</sup> Ongor ay Judio nan emiali ay uy mangliwliwa kan cha Marta kan Maria kiapú as nan natuyan nan sunúdcha.

\* <sup>11:2</sup> Jn. 12:3   † <sup>11:9</sup> 8:12; 9:5

<sup>20</sup> Kun pay chinngor Marta ay cha omali hi Jesus, pinmitiw hiya ay uy nanib-at kan hiya, ngem nayagyag hi Maria as afongcha. <sup>21</sup> Kenalen Marta kan Jesus, “Apo, mu kunka wacha hena at chaan koma natuy nan sunúdku. <sup>22</sup> Ngem uray ad wani, ammok ay mu ngachana nan chawatum kan Apo Dios, ichatana kan he-a.”

<sup>23</sup> Kenalen Jesus kan hiya, “*Matakuntu manipud as nan utúy nan sunúdmu.*”

<sup>24</sup> “Ammok ay matakau kasin hiya as nan matakawantu nan nunkatuy manipud as nan utúy as nan anongos ay urkiw,” ensongfiat Marta.

<sup>25</sup> Kenalen Jesus kan hiya, “*Ha-un nan mangtaku as nan natuy manipud as nan utúy ya nan mangichat as nan fiyag ay maid patingkiana. Nan taku ay omafurot kan ha-un at matakau challu uray mu matuy, ya mu ngachana nan matakau ay omafurot kan ha-un at achi matmatuy. Ay afurotum na?*

<sup>27</sup> “O, Apo,” ensongfiat Marta. “Afurotok ay he-a nan Cristo ay Anak Apo Dios. He-a nan sisin-udmi ay omali asna's luta.”

### *Nan Nun-akoran Jesus*

<sup>28</sup> Kun pay narpas ay infiakian Marta na, nunfiangad hiya ay uy nangayag kan Maria ay sunúdma. Intubtufuna kan hiya, “Wacha nan Misturu hena, ya cha chaka epaayag.” <sup>29</sup> As nan nanngoran Maria as sa, nalannigwat hiya, at inmuy kan Jesus. <sup>30</sup> Chaan pay inumchan hi Jesus henan fiabruy, tay kukutug henan lukiar ay nanib-atan Marta kan hiya. <sup>31</sup> Nan chiyucha Judio ay cha mangliwliwa kan Maria as fieruy at inmunudcha as nan nangil-ancho ay nalannigwat hiya ya pinmitiw. Ka-anancha mu umuy as nan kawad-an nan lufok ta mun-akor.

<sup>32</sup> Kun pay inumchan hi Maria as nan kawad-an Jesus ya inilana hiya, nunlukfub as nan sangwanana. Kenalina kan hiya, “Apo, mu kunka wacha hena at chaan koma natuy nan sunúdku ay laraki.”

<sup>33</sup> As nan nangil-an Jesus kan Maria ya nan chiyucha Judio ay inmunud kan hiya ay cha mun-ag-akor, nginmuyus hiya as solet ya nalilifok chi numnumna. <sup>34</sup> Senarudsudna kan chicha, “*Ay chaud nan nangilubkanyu kan hiya?*”

“Apo, aka ta uy takú ilaun,” ensongfiatcha.

<sup>35</sup> Nun-akor hi Jesus. <sup>36</sup> Kenalen nan chiyucha Judio, “Ilaunyu, ongor paat chi layadna kan hiya.” <sup>37</sup> Ngem kenalen nan tapen nan tataku, “Ay fiakun hiya nan nangepaammay as matan nan nafurag ta makaila? Adchi ngay t'uyna enparufus ay natuy hi Lazaro?”

### *Nan Natakuwan Lazaro Manipud As Nan Utúy*

<sup>38</sup> Kasin nginmuyus as solet hi Jesus as nan naesnopana as nan nailubkan Lazaro. Nan lufokna at natuktukan ay chupras ya natatangfian as ad-acha ay fiatu. <sup>39</sup> “*Kaanunu nan fiatu,*” infilin Jesus.

Ngem kenalen Marta ay sunúd nan natuy, “Ayokayong! Apo, mun-akub at a, tay opat at ay urkiw nan nailurubkana!”

<sup>40</sup> Kenalen Jesus kan hiya, “*Ay chaanku infiakia kan he-a ay mu omafurotka at mailam nan kaichayawan Apo Dios?*” <sup>41</sup> Isunga kenaancha nan fiatu. Angkiay ya nuntangad hi Jesus, ya kanana, “*Ama, munyamanak kan he-a, tay chinngorak kan he-a.*” <sup>42</sup> Ammok ay kanayonak ay chungrun kan he-a, ngem kanak na kiapú as nan nauyucha tataku hena ta afurotuncha ay he-a nan nangifaor kan ha-un.”

<sup>43</sup> Kuna pay kenali na, inpiagsana ay nangifukiaw, “*Lazaro, pumitiwk!*”  
<sup>44</sup> Pinmitiw nan natuy. Napopotepotan chi limana ya sukina as lopot, ya naapongotan us nan lupana as panyu. Angkiay kenalen Jesus kan chicha, “*Kaanunyu nan hanacha naepopotepot kan hiya ta mafialin ay komatam.*”

### *Nan Nuntuturakian Nan Judio Ay Mangpatuy Kan Jesus*

(Mat. 26:1-5; Mar. 14:1-2; Luc. 22:1-2)

<sup>45</sup> Nan ongor as nan chiyuchya Judio ay enmali ay nangliwliwa kan Maria ya nangila as nan enat Jesus at enmafurotcha kan hiya. <sup>46</sup> Ngem nan tapina kan chicha at inmuyucha as nan chiyuchya Fariseo, ya infiakiacha kan chicha nan enat Jesus.

<sup>47</sup> Angkiay nan chiyuchya Fariseo ya nan anap-apon chi papachi at nakim-itincha as nan chiyuchya membron nan Sanhedrin. Kenalicha kan chicha, “Anan atun takú ngay? Nan taku ay ansa at ongor chi nakaskaschaaw ay sinyar ay chana at-atun! <sup>48</sup> Mu ukiayun takú hiya ay mangiturturuy as sa, am-in ay tataku at omafurotchantu kan hiya. Mu hiyasa, omalintu nan chiyuchya toray ay i-Roma ay manachael as nan Templo takú ya uray nan nasyon takú.”

<sup>49</sup> Ngem nan usa kan chicha at hi Caifas ay kangatuwan ay pachi as nan hiyachi ay tawwun nan nangali, “Kenomsaw kayu! Maid paat ammuu!

<sup>50</sup> Ay achiyu maawatan ay un-unuya kan chakayu ay nan usa ay taku at matuy para as nan tataku mu nan intiru ay nasyon nan machachael?”

<sup>51</sup> Nan nauy infiakian Caifas at chaan nurpu as nan mismu ay numnumna, ngem kiapú ta hiya nan kangatuwan ay pachi as nan hiyachi ay tawwun, enpaepadton Apo Dios kan hiya ay matuy hi Jesus para as nan tataku ay Judio. <sup>52</sup> Fiakun yangkiay para as nan chiyuchya Judio, ngem am-in ay an-ak Apo Dios ay wacha henan tukutukún ay luglukiar at amonguna ay mun-us-usaun. <sup>53</sup> Nunlapu as nan hiyachi ay urkiw, nuntuturag nan anap-apon chi Judio as atunchá ay mangpatuy kan Jesus.

<sup>54</sup> Isunga chaan at nunfiabfiaat hi Jesus as nan kawad-an nan tataku ad Judea, ngem kun at nak-ak hiya ya nan disipulusna ay inmuy henan ili ay Efraim ay asnop henan disyerto, ya hid-i nan nayaschiyancha.

<sup>55</sup> As nan hiyachi, kiayud umchan nan Fiastan chi Judio ay makali un Munlausen. Ongorcha nan enmabrat ad Jerusalem ay nurpu henan sigsikib ay uy mangekaman as nan inili ay ukialicha ay panagcharos sakbay makifiastacha. <sup>56</sup> Kuncha pay inumchan nan tataku ad Jerusalem, chacha anapun hi Jesus. As nan naamongancha as Templo, nunsesennarudsudcha, “Ngachana nan munnumnumnummu? Ay achi ngun omali hi Jesus ay makifiasta?” <sup>57</sup> Nan anap-apon chi papachi ya nan chiyuchya Fariseo at infilinchaa as nan tataku ay mu wacha nan nangammu as nan kawad-an Jesus, masapor epakaammuna ta tiliwuncha hiya.

## 12

### *Nan Nangikuyakian Maria As Fiangantru As Nan Suken Jesus*

(Mat. 26:6-13; Mar. 14:3-9)

<sup>1</sup> As nan hiyachi, unum pay ay urkiw sakbay nan Fiastan chi Munlausen. Inmuy cha Jesus ad Betania ay ilen Lazaro ay tenakuna manipud as nan utúy.

<sup>2</sup> Nunsakianacha hid-i as kanuncha as nan maschum ta pachayawancha hi Jesus. Finmachang hi Marta ay nun-iwaras as makan, ya hi Lazaro at usa as nan chiyuchya nakuifong kan Jesus.

<sup>3</sup> Angkiay ya hi Maria at enarana nan kakudwan chi litro ay nanginnginan ay fiangfiangru ay nardu ay maid naekaskaslang. Inkuyagna as nan suken Jesus, angkiay inpunasna nan fookna. Nan fiangruna at nunwaras as nan intiru ay afong.

<sup>4</sup> Ngem kun pay hi Judas Iscariote ay usa as nan disipulus Jesus ay mangesepseptu kan Jesus, kenalina as nan nangil-ana's chi, <sup>5</sup> "Ayyiwka sa paat! Anuy chaan naelaku na ay fiangfiangru as turon kiasot ay dinario ya maichat nan lakuna as nan chiyucha pugli?" <sup>6</sup> Kenalina sa, fiakun kiapú ta sug-angana nan pugli, ngem kiapú ta mangaakiw hiya. Hiya us nan mamangchun as nan sipingcha, ya ukialina ay mangakét para as nan mismu ay osaruna.

<sup>7</sup> Kenalen Jesus kan Judas, "Pay-anyu! Intutupugna sa ta esakianana nan achorku para as nan urkiw ay mailubkak. <sup>8</sup> Nan chiyucha pugli at kanayoncha ay wacha kan chakayu. Ngem kun pay ha-un, achiyak kanayon ay wacha kan chakayu."

#### *Nan Planon Nan Anap-apon Chi Papachi Ay Mangpatuy Kan Lazaro*

<sup>9</sup> As nan nangammuanan ongor ay Judio ay wacha hi Jesus ad Betania, inmuycha hid-i. Nan inmuyancha at fiakun yangkiay kiapú kan Jesus, ngem kiapú ta laychuncha us ay ilaun hi Lazaro ay tenakuna manipud as nan utúy. <sup>10</sup> Isunga plenanon nan anap-apon chi papachi ay patayun us hi Lazaro, <sup>11</sup> tay kiapú kan hiya, ongor as nan chiyucha Judio nan cha mak-ak kan chicha ya cha omafurot kan Jesus.

#### *Nan Nangchayawan Nan Tataku Kan Jesus As Nan Inmuyana Ad Jerusalem*

(Mat. 21:1-11; Mar. 11:1-11; Luc. 19:28-40)

<sup>12</sup> As nan kafikiatana, nan ongoongor ay tataku ay enmali ay nakifiasta at chinngorcha ay cha omali hi Jesus ad Jerusalem. <sup>13</sup> Isunga enmaracha as pangan chi palma ay kaiw, ya uycha sinib-at hiya. Infugfukiawcha, "Machaychayaw hi Apo Dios! Bendisyonian koma Apo Dios nan naifiaor as pannakaachorna. Bendisyonian koma Apo Dios nan Aren nan Israel!"

<sup>14</sup> Enpaaran Jesus nan urfun ay dongki, ya nunsakay hiya ay kaman as nan naisurat as nan Kalen Apo Dios ay kanana,

<sup>15</sup> "Chakayu ay tataku ad Jerusalem, achi kayu umugyat. Ilaunyu! Cha omali nan ariyu ay nunsasakay as nan urfun ay dongki."\*

<sup>16</sup> Nan nauycha enommat at chaan naawatan nan disipulus Jesus as nan hiyachi ay timpu. Ngem as nan naichayawan Jesus as nan natakuwana manipud as nan utúy, hiyachi nan nangnumnumancha ay nan nauycha maepangkep kan hiya at naisuratcha as nan Kalen Apo Dios ya enkamancha chaná kan hiya.

<sup>17</sup> Nan ongor ay tataku ay nangila as nan nangayakian Jesus kan Lazaro as nan lufokna ya nangtakuwana kan hiya manipud as nan utúy at chacha epachapachamag nan inilacha. <sup>18</sup> Hiyachi nan kiapúna ay ongoongorcha nan uy nanib-at kan Jesus, tay nachamagcha nan nauy nakaskaschaaw ay sinyar ay enatna. <sup>19</sup> Angkiay ya kenalen nan chiyucha Fariseo as nan tunggal usa, "Ilaunyu at maid atun takú! Am-in ay tataku at chacha umunud kan hiya."

#### *Nan Nangifiag-an Jesus As Nan Katuyana*

\* **12:15** Zac. 9:9

<sup>20</sup> Wachacha nan tapen nan Griego ay naetatapi as nan chiyuycha uy nunchaychayaw kan Apo Dios as nan fiasta ad Jerusalem. <sup>21</sup> Inmuycha kan Felipe ay i-Betsaida ad Galilea, at kenalicha kan hiya, “Sir, laychunmi ngay koma ay ilaan hi Jesus.” <sup>22</sup> Uy infiakian Felipe kan Andres, at uycha infiakia ay chuwa kan Jesus.

<sup>23</sup> Kenalen Jesus kan chicha, “Enmali at nan uras ay maichayawan nan Naepadtu ay Anak chi Taku. <sup>24</sup> Ifiakiak kan chakayu nan tit-iwa. Nan nauy ay ommat at maepachong as nan usa ay fokel ay makiab-onan as nan luta ya kaman matuy. Mu assena, achi hiihya ay us-usa. Ngem uray kaman matuy, tomemeltu, at fumkias as ongoongor. <sup>25</sup> Nan taku ay nan mismu ay fiyagna yangkiay nan laylaychuna at malitawnantu. Ngem nan taku ay fiakun nan mismu ay fiyagna asna's luta nan laylaychuna at matakuntu in-inkiana. <sup>26</sup> Mu ngachana nan manglayad ay munserfi kan ha-un, masapor unuchunak, ya henan kawad-ak, hid-i us nan kawad-an nan fiabfiaarok. Mu ngachana nan munserfi kan ha-un, ichayaw Amak hiya.”

### *Epakaammon Jesus Nan Matuyana*

<sup>27</sup> Inturuy Jesus, “Ad wani, malilifok as solet chi numnumku, ya anan ekararagku? Ay ekararagku un, ‘Ama, esarakanan as nan nauy omali ay likiatku’? Achi, tay hiyana ay likiat nan pangkep nan enmaliyak hena. <sup>28</sup> Kun at nan kanak, ‘Ama, epailam nan kaichayawan nan ngachanmu.’”

Angkiay ya wacha at nan kali ay nurpu ad chaya ay kanana, “Enpailak at nan kaichayawak, ya kasinkuntu epaila.”

<sup>29</sup> Nan ongor ay tataku ay nangatakchug hid-i at chinngorchu chi ay kali. Kenalen nan tapina kan chicha un kinmud-or. Nan tapina at kenalicha, “Nunkali nan anghel kan hiya.”

<sup>30</sup> Tinumfor hi Jesus kan chicha, “Nan nauy kali ay chinngoryu at fiakun para kan ha-un, ngem kun at para kan chakayu. <sup>31</sup> Ad wani nan maokomán nan tataku asna's luta, ya ad wani us nan maamisan Satanás ay ap-apon chi achi omaafurot.† <sup>32</sup> Kunak pay maetag-uy manipud asna's luta, awisoktu nan am-in ay tataku ta omafurotcha kan ha-un.” <sup>33</sup> Kenalina na ay mangepakaammu as nan atuna ay matuy.

<sup>34</sup> Angkiay ya tinumfor nan ongor ay tataku, “Ammumi met ay kanana as nan Lintig takú ay nan Cristo at matakut in-inkiana. Adchi t'uymu kanan un, ‘Masapor maetag-uy nan Naepadtu ay Anak chi Taku’? Ngachan toná ay Naepadtu ay Anak chi Taku?”

<sup>35</sup> Tinumfor hi Jesus, “Hen-omaketanyangkiay nan mawawad-an nan silaw kan chakayu. Iturturuyu ay manaran as nan mawawad-an pay laing nan silaw kan chakayu sakbay maschuman kayu. Tay nan taku ay manaran as nan ngongot at achina ammu nan ay-ayana. <sup>36</sup> As nan mawawad-an pay laing nan silaw kan chakayu, omafurot kayu as nan silaw ta munfialin kayu as tataku ay nasilawan chi numnumcha.” As nan nangaliyan Jesus as na, nak-ak hiya, ya chaan nunpaila kan chicha.

### *Nan Achi Omafurotan Nan Chiyuycha Judio*

<sup>37</sup> Uray kun ongor nan nakaskaschaaw ay sinyar ay empappailan Jesus kan chicha, kuncha challu achi afurotun hiya <sup>38</sup> ta matongpar nan kenalen Isaías ay pomapadtu un, “Apo, ay kun wachay enmafurot as nan empakaammumi? Ay kun wachay enmafurot as nan empailam ay pannakafialinmu?” ‡

† **12:31** Jn. 14:30; 16:11    ‡ **12:38** Isa. 53:1

**39** Nan kiapúna as achicha omafurotan at wacha ngamin us nan kenalen Isaias un,

**40** "Finurag Apo Dios nan matacha ya enpatangkena nan numnumcha ta achicha maila ya achicha us maawatan ya achicha munsakong kan hiya ta epaammayna chicha."§

**41** Kenalen Isaias na, tay inilana nan kaichayawan Jesus ad pus-uy ya infiakiana nan maepangkep kan hiya.

**42** Uray mu hiyachi, ongor ay anap-apon chi Judio nan enmafurot kan Jesus. Ngem kuncha chaan ipudnu nan pammaticha, tay umugyatcha mu epak-ak nan chiyucha Fariseo chicha as nan senagoga,**43** tay laylaychuncha nan mangchaychayawan nan tataku kan chicha mu nan mangchayawan Apo Dios kan chicha.

### *Nan Maokóm Kiapú As Nan Kalen Jesus*

**44** Angkiay ya inpigan Jesus ay nangali, "Nan taku ay omafurot kan ha-un at fiakun yangkiay ha-un nan afurotuna ngem patí nan nangifaor kan ha-un. **45** Nan taku ay mangila kan ha-un at ilaua us nan nangifaor kan ha-un.

**46** Enmaliyak as kaman silaw asna's luta ta mu ngachana nan omafurot kan ha-un at achi mayayaschi as nan ngongot.

**47** "Mu ngachana nan manngor as nan chak isursuru ya achina tongparun at acheck okomún hiya. Tay chaanak enmali ay mang-okóm as nan tataku asna's luta, ngem kunak at enmali ay mangesarakan kan chicha. **48** Wacha nan mangokóm as nan mangachi kan ha-un ya achi mang-awat as nan chiyucha kanak. Nan nauyucha kenarkalek at chicha nan mang-okóm kan hiya as nan anongos ay urkiw. **49** O, tit-iwa, tay chaanak nunkarkali as nan mismu ay kalibfengak, ngem kun at hi Ama ay nangifaor kan ha-un nan nangifilin kan ha-un as nan masapor ay kanak. **50** Ammok ay nan filina at muntoróng as nan fiyag ay maid patingkiana. Isunga nan infilin Amak kan ha-un at hiya yangkiay nan kenarkalek."

## 13

### *Nan Nangisawan Jesus As Nan Disipulusna*

**1** As nan kiayud umchanan nan Fiastan chi Munlausen, ammon Jesus ay inumchan nan uras ay mak-akana asna's luta ya munfiangchana kan Amana. Kanayona ay lenaylayad nan disipulusna, ya lenaylayadna chicha inkiana as nan natuyana asna's luta.

**2** As nan lafi, as nan cha manganan cha Jesus, enpanumnum at Satanas kan Judas ay potot Simon Iscariote nan pangkepna ay mangesepsep kan Jesus. **3** Aammon Jesus ay am-in ay pannakaflalin at inchat Amana kan hiya. Ammuna us ay kan Apo Dios nan nurpuwana ya kan hiya nan munfiangchana.

**4** Isunga tenmakchug hi Jesus, ya kenaana nan kakiayna, angkiay ensalifudna nan tuwarya as kitangna. **5** Kun pay narpas sa, tenorwana nan parangkiana as chanum. Angkiay ya enlapuna ay mangisu as nan disipulusna, ya punasana as nan tuwarya ay ensasalifudna as kitangna.

**6** Kun pay naekchang kan Simon Pedro, kenalen Pedro kan hiya, "Apo, ay he-a nan mangisu kan ha-un?"

**7** Tinumfor hi Jesus kan hiya, "Nan nauy chak at-atun at achim maawatan ad wani, ngem maawatantu as kasin."

<sup>8</sup> Kenalen Pedro kan Jesus, “Aw, achiyaktu poros is-isuwan kan he-a, Apo.”

Ngem tinumfor hi Jesus, “*Mu acheck isuwan he-a at achika maifilang as disipulok.*”

<sup>9</sup> Tinumfor hi Pedro, “Mu hiyasa payat, Apo, fiakun yangkiay nan sukek nan urasam ngem uray us nan limak ya nan urok.”

<sup>10</sup> Kenalen Jesus, “*Nan taku ay chakus nun-umus at achi kis-an mun-umus kasing, kun yangkiay mun-isu, tay nacharos hiya. Nacharos kayu, ngem achi kayu am-in.*” <sup>11</sup> Aammon Jesus nan mangesepsep kan hiya, isunga kenalina, “*Achi kayu am-in nacharos.*”

<sup>12</sup> Kuna pay lenpas ay nangisu kan chicha, kasing nunkakiay ya nunfiangad as nan tokorana. Senarudsudna as nan disipulusna, “Ay maawatanyu nan nauy enatku kan chakayu.” <sup>13</sup> *Nan awagyu kan ha-un ay ‘Misturu’ ya ‘Apo’ at ustu, tay tit-iwa met ay ha-un sa.* <sup>14</sup> *Mu ha-un ay Apoyu ya Misturuyu at inisuwak chakayu, masapor us mun-iinnisu kayu.* <sup>15</sup> *Enpailak met nan turachunyu ta atunyu us koma nan kaman as nan enatku kan chakayu.*

<sup>16</sup> *Ifiakiak kan chakayu nan tit-iwa. Nan mafiafiaor at achi am-amud mu nan amona. Kaman us as nan naifiaor at achi am-amud mu nan nangifiaor kan hiya.* <sup>17</sup> *Mu ammuyu chaná, nakiastat kayu mu atunyu!*

<sup>18</sup> “Fiakun chakayu am-in nan chak ifiagiakia, tay ammok nan chiyuycha pinilek. Ngem masapor matongpar nan naisurat as nan Kalen Apo Dios ay kanana, ‘Nan nakekan kan ha-un at hiya nan nunfalin as kafusorku.’\*

<sup>19</sup> *Ifiakiak na kan chakayu ad wani sakbay ommat ta as nan ommatana at afurotunyu ay ha-un nan Cristo.*† <sup>20</sup> *Ifiakiak kan chakayu nan tit-iwa. Nan taku ay mang-awat as nan ifiaorku at ha-un nan awatuna, ya nan mang-awat kan ha-un at awatuna nan nangifiaor kan ha-un.*

#### *Nan Nangifiag-an Jesus As Nan Maesepsepana (Mat. 26:20-25; Mar. 14:17-21; Luc. 22:21-23)*

<sup>21</sup> Kun pay narpas ay infiakian Jesus na, nalilifokan as solet nan numnumna. As nan hiyachi, narawag ay infiakiana, “*Ifiakiak kan chakayu nan tit-iwa. Wacha kan chakayu nan usa ay mangesepsep kan ha-un.*” <sup>22</sup> Nun-iinnila nan disipulusna, tay achicha poros ammu mu ngachana kan chicha nan chana kanan. <sup>23</sup> *Nan usa as nan disipulusna ay laylaychun Jesus at naichachapat kan Jesus.* <sup>24</sup> Sininyasan Simon Pedro hiya, ya kanana, “Sarudsuchum pay kan Apo mu ngachana kan chitaku nan chana kanan.”

<sup>25</sup> Isunga nan naichachapat kan Jesus at kaskasin naesnop kan hiya, ya senarudsudna, “Apo, ngachan ngay tud-i?”

<sup>26</sup> “*Nan mangichataktu as nan nauy tenapay ay esawsawku at hiya,*” en-songfiat Jesus. Kuna pay ensawsaw nan tenapay, inchatna kan Judas ay potot Simon Iscariote. <sup>27</sup> As nan hiyachi ay nangor-an Judas as nan tenapay, nasannukop hi Satanas kan hiya.

Kenalen Jesus kan hiya, “*Kamuwum! Atum at nan hana planom ay atun.*”

<sup>28</sup> Maid nakaawat as nan chiyuycha nakekan kan Jesus mu adchi t'uy kenalen Jesus chi kan Judas. <sup>29</sup> Kiapú ta hi Judas nan mamangchun as nan sipingcha, ka-anan nan tapina kan chicha un uy at cha ifiakian Jesus kan hiya ay uy lomaku as kasaporancha as nan hana ay fiasta winnu uy umichat as siping as nan pugli. <sup>30</sup> As nan nang-awatan Judas as nan tenapay, napannitiw hiya. Lafi as nan hiyachi.

\* <sup>13:18</sup> Sal. 41:9    † <sup>13:19</sup> Exo. 3:14; Jn. 8:28,58; 14:29

### *Nan Fiarú Ay Filin*

<sup>31</sup> As nan nak-akan Judas, kenalen Jesus, “*Ad wani, maichayaw nan Naepadtu ay Anak chi Taku, ya babaen kan hiya at maila nan kaichayawan Apo Dios.* <sup>32</sup> *Mu maichayaw hi Apo Dios babaen kan hiya at hi Apo Dios us ay mismu nan mangepaila ay dagus as kaichayawan nan Naepadtu ay Anak chi Taku.*

<sup>33</sup> “*Chakayu ay an-akku, hen-omaketan yangkiay nan kawad-ak kan chakayu. Anapunaktu kan chakayu, ngem ifiakiak ad wani kan chakayu nan infiakiak as nan anap-apon chi Judio ay achi kayu makauy henan ay-ayak.*<sup>‡</sup>

<sup>34</sup> *Nauy nan fiarú ay filinku kan chakayu: Munleennayad kayu. Kaman as nan nanglaylachanak kan chakayu at assesa us ay masapor munleennayad kayu.*<sup>§</sup> <sup>35</sup> *Mu hiyasa ay munleennayad kayu, maammuwantu nan am-in ay tataku ay chakayu nan disipulusku.”*

### *Nan Nangifiag-an Jesus As Nan Nangesaotan Pedro Kan Hiya*

(Mat. 26:31-35; Mar. 14:27-31; Luc. 22:31-34)

<sup>36</sup> Senarudsud Simon Pedro kan Jesus, “Apo, ay chaud nan ay-ayam?”

“*Henan ay-ayak at achika makaunud ad wani kan ha-un, ngem umunud-kuntu as kasin,*” ensongfiat Jesus.

<sup>37</sup> Senarudsud kasin Pedro, “Apo, adchi t'uyak achi makaunud kan he-a ad wani? Nakasakianaak met ay matuy para kan he-a.”

<sup>38</sup> Tinumfor hi Jesus, “*Ay tit-iwa ay nakasakianaka ay matuy para kan ha-un? Ifiakiak kan he-a nan tit-iwa. Achi munkokakok nan ka-or inkiana mamen turu ay esaotak kan he-a.*”

## 14

### *Hi Jesus Nan Charan Ay Umuy Kan Dios Ama*

<sup>1</sup> Inturuy Jesus, “*Achi kayu malilifokan, ngem kun kayu at omafurot kan Apo Dios, ya omafurot kayu us kan ha-un.* <sup>2</sup> *Ongor chi magyanan as nan kawad-an Amak ad chaya, ya umuyak hid-i ay mangesakiana as nan magyananyu. Mu kun achi tit-iwa nan chak kankanan at infiakiak koma kan chakayu.* <sup>3</sup> *As nan umuyak ya mangesakianaak as nan magyananyu, omaliyaktu kasin ay mangekatam kan chakayu ta wacha kayuntu us as nan kawad-ak.* <sup>4</sup> *Ammuyu met nan charan ay umuy as nan ay-ayak.*”

<sup>5</sup> Kenalen Tomas kan Jesus, “Apo, achimi met ammu nan ay-ayam. Ngachana ngay nan atunmi ay mangammu as nan charan?”

<sup>6</sup> Tinumfor hi Jesus kan hiya, “*Ha-un nan charan ay umuy ad chaya, nan kurpuwan chi kenatit-iwa ya nan mangichat as fiyag. Maid makaali kan Amak mu achi babaen kan ha-un.* <sup>7</sup> *Mu tit-iwa ay am-ammuwak at am-ammuyu us hi Amak. Munlapu ad wani, am-ammuyu challu hiya, ya kamanyu tit-iwa inila hiya.”*

<sup>8</sup> Kenalen Felipe kan Jesus, “Apo, epailam kan chakami nan Ama. Mu atum sa, mapnek kami.”

<sup>9</sup> Tinumfor hi Jesus kan hiya, “*Ayokayong Felipe! Kunak cha nafiayag kan chakayu am-in ya, ay achiyak pay laing am-ammu kan he-a? Nan nakaila at kan ha-un at inilana us nan Ama. Anuymu kanan un, ‘Epailam nan Ama kan chakami?’* <sup>10</sup> *Ay achim afurotun ay wachaak kan Amak, ya wacha hi Amak kan ha-un? Nan kenarkalek kan chakayu at chaan nurpu as numnumuk*

<sup>‡</sup> 13:33 Jn. 7:34; 8:21    <sup>§</sup> 13:34 Jn. 15:12; 1 Jn. 3:23-24; 4:7-11

*ngem hi Amak ay mawawacha kan ha-un nan cha mangekaman as nan atuna. 11 Afurotunyu nan kanak ay wachaak kan Ama ya wacha hi Ama kan ha-un. Mu achiyu afurotun nan kanak, afurotunyu kiapú as nan nakaskaschaaw ay en-enatku.*

*12 Ifiakiak kan chakayu nan tit-iwa. Nan ngachana ay omafurot kan ha-un at atunantu us nan chak at-atun. Am-amud pay nan atuna mu nan nauycha, tay munfiangachak kan Ama. 13 Nan ngachana ay chawaturunu kiapú as nan nakius-usaanyu kan ha-un at atoktu ta maichayaw nan Ama babaen as nan Anakna. 14 O, mu chumawat kayu as kumpurmi kiapú as nan nakius-usaanyu kan ha-un, atoktu."*

### *Nan Nangifiag-an Jesus Ay Epaalina Nan Espiritu Santo*

*15 Kenalen us Jesus, "Mu laylaychunak kan chakayu, tongparunyu nan filfilinku. 16 Chawatoktu kan Ama, at ifiaorna nan Fumadfiachang as pannakaachorku. Hiya at mawawacha kan chakayu in-inkiana. 17 Hiya nan Espiritu Santo ay mangisursuru as nan kenatit-iwa. Nan tataku asna's luta ay achi omafurot at achicha mafialin ay awatun hiya, tay achicha maematonan ya achicha ammu hiya. Kun pay chakayu, ammuyu hiya, tay makepagyan kan chakayu, ya awni at mawawacha kan chakayu.*

*18 "Achek taytaynan chakayu ay kaman maid chanakchakorcha, tay munfiangachaktu challu kan chakayu. 19 Achi mafiyag at achiyaktu il-laun as nan tataku ay achi omafurot kan ha-un. Ngem chakayu at ilaunaktu. Kiapú ta matakuwak at mataku kayu us. 20 As nan hana ay urkiw, maammuwanyuntu ay wachaak kan Ama, ya wacha kayu kan ha-un, ya wachaak kan chakayu. 21 Nan mang-awat ya mangtongpar as nan filfilinku at hiya nan manglaylayad kan ha-un. Nan manglaylayad kan ha-un at laylaychuntu Ama hiya. Uray ha-un at laylaychoktu us hiya, ya epakaammoktu kan hiya nan maepangkep kan ha-un."*

*22 Senarudsud Judas (fiakun hi Judas Iscariote), "Apo, adchi t'uy kan chakami yangkiay nan mangepakaammuwan as nan maepangkep kan he-a ya fiakun as nan am-in ay tataku asna's luta?"*

*23 Tinumfor hi Jesus kan hiya, "Mu ngachana nan manglaylayad kan ha-un at tongparuna nan ifiakiak. Hi Amak at laylaychunantu hiya, ya omali kamintu ay chuwa ay makeafong kan hiya.\* 24 Nan taku ay achi manglaylayad kan ha-un at achina tongparun nan ifiakiak. Nan nauy kali ay chinngoryu at chaan nurpu as numnumku, ngem nurpu kan Ama ay nangisiaor kan ha-un.*

*25 "Infiakiak chaná kan chakayu ad wani ay wachaak pay laing kan chakayu. 26 Ngem ifiaortu Amak nan Fumadfiachang ay hiya nan Espiritu Santo as pannakaachorku. Hiyantu nan mangisuru kan chakayu as nan am-in ya mangepanumnum as nan am-in ay infiagiakiak kan chakayu.*

*27 "Nan natalna ay numnum nan ifiatek kan chakayu. O, nan nauy natalna ay numnum ay nurpu mismu kan ha-un at achi poros maepachong as nan ichat nan tataku asna's luta. Isunga achi kayu malilifokan winnu umugugyat. 28 Chinngoryu met nan kenalek kan chakayu ay mak-akak, ngem munfiangachaktu kan chakayu. Mu lenaylayachak kan chakayu, naragsakan kayu koma, tay komatamak kan Ama. Tay hi Ama at am-amud mu ha-un. 29 Infiakiak na kan chakayu ad wani sakbay ay ommat ta as nan ommatana, omafurot kayu kan ha-un.*

\* **14:23** 2 Co. 6:16; Efe. 3:17; Pal. 3:20; 21:3

**30** “Achi mafiayag chi maketagtakiatforak kan chakayu, tay cha omali hi Satanas ay ap-apon chi achi omaafurot. Maid pannakafialina ay mangetoray kan ha-un,<sup>†</sup> **31** ngem masapor maammuwana nan tataku asna's luta ay laylaychok hi Ama. Hiyana nan kiapúna ay am-in ay infilin Ama kan ha-un at tongparok. Maligwat kayu ta uy takú,” kenalina.

## 15

### *Maepachong Hi Jesus As Nan Puon Chi Ubas*

**1** Infiakian Jesus na ay maepadpachongan, “Ha-un nan tit-iwa ay puon chi ubas, ya hi Amak nan mangay-aywan.”<sup>\*</sup> **2** Songpatuna nan tunggal panga ay achi fumkias, ya charosana nan chiyuycha panga ay fumkias ta omongongor chi fukiascha. **3** Chakayu nan maepachong as nan chiyuycha panga ay chakus nacharosan kiapú as nan nangafurotanyu as nan kalek ay infiagfiaikiak kan chakayu. **4** Iturturuyyu ay mawawacha kan ha-un, ya mawawachaak us kan chakayu. Nan panga at maid atuna ay fumkias mu naisiyan as nan puuna. Kaman us kan chakayu at maidfukiasyu as nan pammatiyu sukúd kayu mawawacha kan ha-un.

**5** “Ha-un nan puon chi ubas, ya chakayu nan chiyuycha panga. Nan ngachana ay mawawacha kan ha-un ya mawawachaak us kan hiya at hiyantu nan omongor chi fukiasna as nan pammatina, tay maid maekamanyu mu maichak kan chakayu. **6** Nan achi mawawacha kan ha-un at maichusortu ay kaman as nan panga ay nasongpat. Mu narangnu nan assesesa ay panga, maamong ya maichus-orcha as nan apuy ta mapuorancha. **7** Mu mawawacha kayu kan ha-un ya mawawacha nan kalek kan chakayu, uray ngachana nan chawatunyu ay laychunyu, maichattu kan chakayu. **8** Hiyana nan maichayawan Amak mu omongor nan fukiasyu as nan pammatiyu. Mu assena, hiyana us nan mangepaila ay chakayu nan disipulusku.

**9** “Kaman as nan manglaylaychanan Amak kan ha-un at assena us nan manglaylaychanak kan chakayu. O, masapor mawawacha kayu ngarud as nan layadku kan chakayu. **10** Mu tongparunyu nan infilinku, mawawacha nan layadku kan chakayu. Tay uray ha-un at tenongparku nan infilfilin Amak, ya mawawacha nan layadna kan ha-un. **11** Infiakiak chaná kan chakayu ta mawawacha nan lagsakku kan chakayu ya maid munkurangana.<sup>†</sup>

**12** “Nauy nan filinku kan chakayu: Munleennayad kayu ay kaman as nan nanglaylaychanak kan chakayu.<sup>‡</sup> **13** Nan kaamuchan ay layad ay epailan nan taku at hiyana nan mangichatana as nan fiyagna ta matakun nan kiakiayumna. **14** Chakayu nan kiakiayumku mu tongparunyu nan ifilinku kan chakayu. **15** Fiakun at mafiabfiaor nan awagku kan chakayu, tay nan mafiabfiaor at achina ammu nan cha at-atun nan amona. Kunku at awakian chakayu as kiakiayumku, tay nan am-in ay chinchingorku kan Amak at enpakaammok kan chakayu. **16** Fiakun chakayu nan nangpili kan ha-un, ngem ha-un nan nangpili ya nangchutok kan chakayu ta uyyu paafurotun nan ongor ay tataku ay chicha nan maepachong as nan fukiasyu as nan pammatiyu ay mawawacha in-inkiana. Mu atunyu sa, uray ngachana nan chawatunyu kan Ama kiapú as nan nakius-usaanyu kan ha-un at ichatnantu kan chakayu. **17** Hiyana ngarud nan ifilinku kan chakayu: Munleennayad kayu.”

---

<sup>†</sup> **14:30** Jn. 12:31; 16:11    \* **15:1** Sal. 80:8-18; Isa. 5:1-2, 7    † **15:11** Jn. 16:24; 17:13    ‡ **15:12** Jn. 13:34; 1 Jn. 3:23-24; 4:7-11

### *Nan Namalikiatan Nan Achi Omaafurot As Nan Disipulus Jesus*

**18** Inturuy Jesus, “Mu inglun chakayu as nan tataku ay achi omaafurot, numnumunyu ay ha-un nan emmon-onu ay iningorcha. **19** Mu makius-usa kayu as nan achi omaafurot asna’s luta, laylaychun chakayu kan chicha ay pachongcha. Ngem kiapú ta pinilek chakayu ta maisiyau kayu kan chicha ay achi omaafurot. Isunga iinglun chakayu kan chicha. **20** Numnumunyu nan karkalek ay infiakiak kan chakayu: ‘Nan mafiabfiaor at achi am-amud mu nan amona.’<sup>§</sup> Mu palikiatunak kan chicha at palikiatunchantu us chakayu. Mu tongparuncha nan insursurok at tongparunchantu us nan isursuruyu. **21** Ngem am-in chaná ay likiat at epalak-amchantu kan chakayu kiapú as nan emmafurotanu kan ha-un, tay achicha ammu nan nangifiaor kan ha-un. **22** Mu chaanak emmali ya chaanku infiakiak kan chicha, fiakuncha fiasor nan achicha mangafurotan kan ha-un. Ngem ad wani at maid maepanforcha para as nan fiasorcha. **23** Nan taku ay mangiingor kan ha-un at iingoruna us hi Amak. **24** Mu chaanku enkaman as nan nangiil-ancha nan nakaskaschaaw ay maid poros usa ay taku ay makaekaman at chaancha koma finmasor. Ngem ad wani, uray inilacha at iinglunak ya hi Amak. **25** Hiyana nan enommat ta matongpar nan naisurat as nan Lintigcha ay kanana, ‘Iningorak kan chicha ay maid kiapkiapúna.’\*

**26** “Omalintu nan Fumadfiachang ay murpu kan Ama. Hiya nan Espiritu Santo ay ifiaorkuntu ay mangisuru as nan kenatit-iwa kan chakayu. O, hiyantu nan mangepaneknek as nan maepangkep kan ha-un.”<sup>†</sup> **27** Chakayu us at paneknekaryuntu nan maepangkep kan ha-un, tay naituntun-ud kayu kan ha-un nunlapu as nan laplapuna.

## **16**

**1** “Am-in chaná at kenalek kan chakayu ta achiyu koma chukchukkian nan pammatiyu kan ha-un. **2** Epak-ak chakayuntu as nan senagogacha. Fiakun yangkiay sa, tay omalintu nan timpu ay nan tataku ay mangpatuy kan chakayu at numnumunchantu ay chacha munserserfi kan Apo Dios.\* **3** Hiyanantu nan atuncha kan chakayu, tay achicha am-ammu hi Ama winnu ha-un. **4** Ifiagfiakiak chaná kan chakayu ad wani ta as nan omaliyan nan timpu ay mangekamanancha’s na, manumnumyuntu ay infiakiak kan chakayu.”

### *Nan Atun Nan Espiritu Santo*

Inturuy Jesus, “Chaanku infiaki chaná as nan laplapuna ay nun-isuruwak kan chakayu, tay nawawachaak kan chakayu. **5** Ad wani, munfiangachak as nan nangifiaor kan ha-un. Ngem uray mu hiyasa, maid manarsarudsud kan chakayu un, ‘Ay chaud nan ay-ayam?’ **6** Ngem kiapú ta infiakiak chaná kan chakayu ad wani, ngumunguyus kayu. **7** Uray mu hiyasa, ifiakiak kan chakayu nan tit-iwa: Para as nan omammayanyu nan mak-akak. Tay mu achiyak mak-ak, achi omali nan Fumadfiachang kan chakayu. Ngem mu mak-akak, ifiaorkuntu hiya kan chakayu. **8** As nan omaliyana, paneknekanantu as nan tataku asna’s luta nan kenomsawancha maepangkep as nan fiasorcha. Paneknekanantu us nan maepangkep as kenalintigya nan maepangkep as nan mun-okomán Apo Dios. **9** As nan maepangkep as fiasorcha, paneknekanantu ay kenomsawcha, tay achicha omaafurot kan ha-un. **10** As nan maepangkep

---

§ **15:20** Jn. 13:16   \* **15:25** Sal. 35:19; 69:4   † **15:26** Jn. 14:16-17, 26   \* **16:2** Ara. 26:9-11

as kenalintig, paneknekanantu ay nalintikiak, tay umuyak kan Ama, ya achiyaktu il-ilaun kan chakayu. <sup>11</sup> As nan maepangkep as nan mun-okomana, paneknekanantu ay kenomsawcha, tay naokóm at hi Satanas ay mangetor-toray as nan chiyuchaya achi omaafurot asna's luta.

<sup>12</sup> “Ongor pay nan laychok ay ifiakia kan chakayu, ngem ad wani, achi kayu makafiael ay mangnumnum. <sup>13</sup> Ngem as nan omaliyan nan Espiritu ay mangisuru as nan kenatit-iwa, hiyantu nan mangetoróng kan chakayu ay mangammu as nan am-in ay kenatit-iwa. Achi munkali hiya as nan mismu ay kalibfengana, ngem ifiakiana nan chungruna kan Dios Ama, ya epakaammanantu kan chakayu nan ommat as kasin. <sup>14</sup> Ha-un nan chayawunantu, tay nan wacha as numnumku at hiyasantu nan iwarakiawagna kan chakayu. <sup>15</sup> Nan am-in ay kuwan Ama at kuwak. Isunga kenalek un nan wacha as numnumku at hiyasa nan iwarakiawagtu nan Espiritu Santo kan chakayu.”

### Nan Ngimunguyusan Ya Nunlagsakan Nan Disipulus Jesus

<sup>16</sup> Inturuy us Jesus, “Achi mafiayag at achiyaktu il-ilaun kan chakayu. Angkiay ya achi kasin mafiayag at ilaunaktu.”

<sup>17</sup> Angkiay nunsesennarudsud nan tapen nan disipulusna, “Ngachana man nan laychun tona ay kanan, ‘Achi mafiayag at achiyak il-ilaun. Angkiay ya achi kasin mafiayag at ilaunaktu,’ ya, ‘Tay umuyak kan Ama?’” <sup>18</sup> Kasincha senarudsud, “Ngachana man nan laychun ay kanan nan ‘Achi mafiayag’? Achi takú met maawatan nan laychuna ay kanan.”

<sup>19</sup> Aammon Jesus nan laychuncha ay sarudsuchun kan hiya, isunga kenalina kan chicha, “Ay hiyana nan chayu munsesennarudsuchan, ‘Achi mafiayag at achiyak il-ilaun, angkiay achi kasin mafiayag at ilaunak?’ <sup>20</sup> Ifiakiak kan chakayu nan tit-iwa. Mun-ag-akor ya ngumunguyus kayuntu, ngem munlagragsakchantu nan tataku ay achi omafurot. Ngumunguyus kayuntu, ngem nan ngunguyusyu at munfialintu as lagsak. <sup>21</sup> Nan maepachongana at as nan fiafiai ay cha munlikiat, tay timpon at nan munpasikarana. Ngem as nan chakusna enmankan, liw-ana nan likiatna ya ongor nan lagsakna, tay naiyanak nan mutun asna's luta. <sup>22</sup> Kaman us kan chakayu: Ngumunguyus kayu ad wani, ngem ilaoktu kasin chakayu. As nan hiyachi, munlagsak kayuntu as solet, ya maid poros mangaan as nan hana ay lagsakyu kan chakayu.

<sup>23</sup> “As nan hana ay urkiw at maidtu uyyu kis-an sarudsuchun kan ha-un. Ifiakiak kan chakayu nan tit-iwa. Mu chumawat kayu as kumpurmi kan Ama at ichatnantu kan chakayu kiapú as nan nakius-usaanyu kan ha-un.

<sup>24</sup> Inkiana ad wani at maid pay chinawatyu kan Ama kiapú as nan nakius-usaanyu kan ha-un. Chumawat kayu, at maawatyuntu ta maid munkurangan nan lagsakyu.

### Nan Naamisan Nan Achi Omaafurot

<sup>25</sup> “Kenarkalek chaná kan chakayu babaen as nan maepadpachongan. Omalintu nan timpu ay achek at osarun nan maepadpachongan, ngem kun yangkiay narawag nan ifiakiaku ay maepangkep kan Ama. <sup>26</sup> As nan hana ay urkiw, chumawat kayuntu mismu kan Ama kiapú as nan nakius-usaanyu kan ha-un. Achek kanan kan chakayu un chumawataktu kan Ama as para kan chakayu. <sup>27</sup> Tay hi Ama ay mismu at laylaychuna chakayu kiapú ta lenay-layachak kan chakayu ya enafirotyu ay nurpuwak kan hiya. <sup>28</sup> Nurpuwak

*kan Amak, ya enmaliyak asna's luta. Ad wani, mak-akak asna's luta, ya munfiangachak kan Ama."*

<sup>29</sup> Angkiay kenalen nan disipulusna kan hiya, "Ilaum, narawag ad wani nan cham kankanan, tay achika mun-epadpachong. <sup>30</sup> Ad wani, ammumi at ay ammom nan am-in ay ka-ichin. Achim kasaporan chi munsarudsud kan he-a, tay mafialinmu ay songfiatan sakbay munsarudsudcha. Hiyana nan mangafurotanmi ay nurpuka kan Apo Dios."

<sup>31</sup> Tinumfor hi Jesus kan chicha, "Ay omafurot kayu ad wani? <sup>32</sup> Cha omali nan timpu, ya nauy at ad wani, masisiyan kayuntu ay waschi un kenmatam as afongna. Kun pay ha-un, taynanaktu ay mauusa. Uray mu hiyasa, achiyak mauusa, tay wacha hi Ama kan ha-un. <sup>33</sup> Nan nauycha at infiakiak kan chakayu ta natalnay numnumyu kiapú as nan nakius-usaanyu kan ha-un. Ongor chi munlikiatanyu asna's luta, ngem papigsaunyu nan numnumyu, tay enamisku at nan am-in ay mangotetted ay pannakafialin asna's luta."

## 17

### *Nan Luwaron Jesus*

<sup>1</sup> Kun pay narpas ay infiakiak Jesus chaná, nuntangad ad chaya ya kanana, "Ama, enmali at nan uras ay enkeddengmu. Epailam nan kaichayawan nan Anakmu ta epailan nan Anakmu nan kaichayawam. <sup>2</sup> Tay kun pay he-a at inchatmu kan hiya nan kalibfengan ay mangetoray as nan katakutaku ta ichatna nan fiyag ay maid patingkiana as nan am-in ay tataku ay entalekmu kan hiya. <sup>3</sup> Nan fiyag ay maid patingkiana at hiya nan mangammuwancha kan he-a ay us-usa ay tit-iwa ay Apo Dios ya kan Jesu Cristo ay infiaormu. <sup>4</sup> Enpailak nan kaichayawam asna's luta as nan nanglopasak as nan enpadnom kan ha-un. <sup>5</sup> Ad wani, Ama, as nan mawawad-ak kasin as nan kawad-am, epailam nan kaichayawak ay pachong challu nan kaichayawak as nan kawad-ak kan he-a sakbay nafiyang nan luta.

### *Nan Nangekararakian Jesus As Nan Disipulusna*

<sup>6</sup> "Enpakaammok nan kenadiosmu\* kan chicha ay pinilem asna's luta. Sikud challu ay tatakom chicha, ya entalekmu chicha kan ha-un. Tenongparcha nan kalem. <sup>7</sup> Ad wani, naammuwanche ay nan am-in ay inchatmu kan ha-un at nurpu kan he-a, <sup>8</sup> tay infiakiak kan chicha nan infiakiam kan ha-un, at enawatcha. Ammucha ay tit-iwa ay nurpuwak kan he-a, ya afurotuncha ay he-a nan nangfiaor kan ha-un.

<sup>9</sup> "Ekarkararakiaik chicha. Achech cha ekararakian nan achi omafurot ay tatakum asna's luta, ngem kun yangkiay nan chiyuycha entalekmu kan ha-un, tay tatakum chicha. <sup>10</sup> Am-in ay kuwak at kuwam, ya am-in ay kuwam at kuwak, ya maepaila pay nan kaichayawak babaen kan chicha. <sup>11</sup> Ad wani, achiyak at mayayasna asna's luta, tay kiayuchak munfiangad kan he-a. Ngem chicha at mayagyagcha asna's luta. Nasantowan ay Ama, aywanam koma chicha babaen as nan pannakafialinmu ay inchatmu kan ha-un ta mun-us-usacha koma ay kaman as nan nun-us-usaanta. <sup>12</sup> As nan nawawad-ak kan chicha at enaywanak chicha babaen as nan pannakafialinmu ay inchatmu kan ha-un. Tit-iwa, enaywanak chicha ay ustu. Maid poros nalitaw kan chicha, ngem kun yangkiay nan usa ay nakeddengen ay machusa ta matongpar nan naisurat as nan Kalen Apo Dios.

\* **17:6** As nan kali ay Griego at kanana, "ngachanmu."

**13** “Ad wani, kiayuchak munfiangad kan he-a. Ifiakiak chaná kan chicha as nan mawawad-ak pay laing asna's luta ta nan lagsakku at maichat kan chicha ay maid munkurangana.† **14** Infiakiak kan chicha nan infiakiam kan ha-un, ya nan tataku asna's luta ay achi omaafurot at iningorcha chicha. O, tay achicha ngamin makius-usa as nan achi omaafurot asna's luta ay kaman kan ha-un ay achi makius-usa as nan achi omafurot. **15** Achek chawatun ay ek-akmu chicha asna's luta, ngem chawatok ay aywanam chicha ta achicha maamis as nan pannakafialin Satanas ay makali un Mangotettet. **16** Kamancha kan ha-un ay achi makius-usa as nan achi omafurot asna's luta. **17** Elasimnu chicha ay munserfi kan he-a babaen as nan kalem ay hiya nan kenatit-iwa. **18** Nan enatku ay nangifiaor kan chicha asna's luta at kaman as nan enatmu ay nangifiaor kan ha-un asna's luta. **19** Ichatonku nan achorku kan he-a para kan chicha ta uray chicha at maelasincha ay munserfi tit-iwa kan he-a.

### Nan Nangekararakian Jesus As Nan Am-in Ay Omaafurot

**20** “Fiakun yangkiay chatona ay disipulusku nan ekararakiai ngem uray us nan chiyuycha omafurottu kan ha-un kiapú as nan iflagfiakiacha. **21** Ama, ekararagku ay mun-us-usacha koma am-in ay kaman as nan mawawad-am kan ha-un ya mawawad-ak kan he-a. Mawawachacha koma kan chita ta afurotuntu nan tataku asna's luta ay finaorak kan he-a. **22** Inchatku kan chicha nan kaichayawan ay inchatmu kan ha-un ta mun-us-usacha ay kaman as nan nun-us-usaanta. **23** Mawawachaak kan chicha, ya mawawachaka us kan ha-un ta maid koma munkurangan nan mun-us-usaan chi numnumchha. Mu hiyasa, maammuwan koma nan tataku asna's luta ay finaorak kan he-a. Maammuwancha koma us ay laylaychum chaná ay disipulus ay kaman as nan manglaylaychanam kan ha-un.

**24** “Ama, laychok ay nan tataku ay entalekmu kan ha-un at mawawachacha us koma kan ha-un as nan kawad-ak. Mu hiyasa, ilauncha nan kaichayawak ay inchatmu kan ha-un, taylenaylayachak kan he-a sakbay nafiyangnan luta.

**25** “O, Ama ay nalintig, nan achi omaafurot ay tataku asna's luta at achi chaká am-ammu. Ngem ha-un at am-ammok he-a, ya nan nauycha disipulusku at ammuchaa ay finaorak kan he-a. **26** Enpakaammok kan chicha nan maepangkep as nan kenadiosmu,‡ya ituruyku pay ay mangepakaammu. Atok na ta nan layadmu kan ha-un at mawawacha kan chicha ya ta mawawachaak us kan chicha.”

## 18

### Nan Nangtiliwancha Kan Jesus

(Mat. 26:47-56; Mar. 14:43-50; Luc. 22:47-53)

**1** As nan nanglopasan Jesus as nan nauy ay kararag, nak-ak hiya ay kadwana nan disipulusna, ya kinchangcha nan kinnaw ay Kidron. Angkiay inmuycha henan lukiar ay naetatanman chi ongor ay kaiw ay olivo.

**2** Hi Judas ay mangesepsep kan Jesus at aimmuna chi ay lukiar, tay hid-i nan kanayon ay nakisibsib-atan Jesus as nan disipulusna. **3** Isunga inmuy hi Judas hid-i ay nangepangu as nan usa ay bunggoy nan sosorchachu ay i-Roma, nan kukuwarcha as Templo ay infiaor nan anap-apon chi papachi ya nan chiyuycha Fariseo. Nangaparorcha, nangapenakadcha, ya nangaarmascha.

† 17:13 Jn. 15:11    ‡ 17:26 17:6

<sup>4</sup> Kiapú ta aammon Jesus nan am-in ay atunchantu kan hiya, naisib-at kan chicha, ya kanana, “*Ngachana nan chayu anapun?*”

<sup>5</sup> “Hi Jesus ay i-Nazaret,” ensongfiatcha.

“*Ha-un ya,*” kenalen Jesus. Hi Judas ay mangesepsep kan Jesus at naketatakchug kan chicha. <sup>6</sup> As nan nangaliyan Jesus, “*Ha-un ya,*” nasannanudcha ya natu-ugcha.

<sup>7</sup> Angkiay ya kasin nunsarudsud hi Jesus kan chicha, “*Ngachana ngarud nan chayu anapun?*”

“Hi Jesus ay i-Nazaret,” ensongfiatcha kasin.

<sup>8</sup> “*Infiakia met kan chakayu un ha-un,*” ensongfiat Jesus. “*Mu ha-un nan chayu anapun, pay-anyu ta mak-ak nan nauycha kakadwak.*” <sup>9</sup> Infiakian Jesus na ta matongpar nan kenalina: “*Ama, maid linitawku as uray usa as nan chiyuycha entalekmu kan ha-un.*”\*

<sup>10</sup> Angkiay ya hi Simon Pedro ay nangachoros, enoknosna nan chorosna, ya finakagna nan fiabfiaarun nan kangatuwan ay pachi, at nakingasan nan kannawan ay ingana. Nan ngachan nan fiabfiaaruna at Malco. <sup>11</sup> Infilin Jesus kan Pedro, “*Esekatmu nan chorosmu. Ay kanam unache etau-nan likiat ay enkeddeng Ama kan ha-un?*”†

### *Nan Nangiuyancha Kan Jesus Kan Anas*

<sup>12</sup> Angkiay ya nan bunggoy chi sosorchachu patí nan komandercha ya nan chiyuycha kuwarcha as Templo at tiniliwcha hi Jesus, ya finarudcha nan limana. <sup>13</sup> Inuyucha hiya omona kan Anas ay katukiangan Caifas. Hi Caifas ay anna nan kangatuwan ay pachi as nan hiyachi ay tawwun. <sup>14</sup> Hi Caifas us nan nangitukun as nan ap-apon chi Judio ay un-unuya ay matuy nan usa ay taku para as nan am-in ay tataku.‡

### *Nan Omona Ay Nangesaotan Pedro Kan Jesus (Mat. 26:69-70; Mar. 14:66-68; Luc. 22:55-57)*

<sup>15</sup> Hi Simon Pedro ya nan usa ay disipulu at inmunudcha kan Jesus. Kiapú ta nan disipulu ay anna at am-ammon nan kangatuwan ay pachi, naparufusan ay nakiskop kan Jesus as nan fiattaw nan palasyon nan kangatuwan ay pachi. <sup>16</sup> Ngem hi Pedro at nayagyag as chara as nan sag-un nan sugpan. Isunga nunfiangad nan hana disipulu ay am-ammon nan kangatuwan ay pachi as nan sugpan, ya naketakiatfor as nan fiafiai ay munfianfiantay as nan sugpan. As nan hiyachi, enpaskopna hi Pedro. <sup>17</sup> Kenalen nan mafiafbiao ay fiafiai ay munfianfiantay as nan sugpan kan Pedro, “Ay fiakunka us usa as nan disipulus nan hana laraki?”

“Fiakun ya!” kenalen Pedro.

<sup>18</sup> As nan hiyachi at tungnin. Nan chiyuycha mafiafbiao ya nan chiyuycha kuwarcha at enpafiaracha nan uling ya nangatakchugcha ay cha mun-anichu. Uy naketatakchug us hi Pedro, ya cha makean-anichu kan chicha.

### *Nan Namistikiaran Nan Kangatuwan Ay Pachi Kan Jesus (Mat. 26:59-66; Mar. 14:55-64; Luc. 22:66-71)*

<sup>19</sup> Kun pay nan kangatuwan ay pachi at chana fistikiarun hi Jesus maepangkep as nan disipulusna ya nan sursuruna. <sup>20</sup> Tinumfor hi Jesus kan hiya, “*Kanayonak ay nunkarkali as nan sangwanan nan kaongoran chi tataku. Kanayon pay ay nun-is-isuruwak as nan senagoga ya as nan Templo*

\* <sup>18:9</sup> Jn. 6:39; <sup>17:12</sup> † <sup>18:11</sup> As nan kali ay Griego at kanana, “Ay kunku achi ikopun nan matatasa ay ichat Ama kan ha-un?” ‡ <sup>18:14</sup> Jn. 11:50

*ay naam-amongan nan am-in ay Judio. Maid met naetatafun as kenarkalek.*  
**21** *Adchi t'uy kan ha-un chi munsarudsucham? Kakunmu sarudsuchun as nan tataku ay nanngor kan ha-un, tay ammuchas met nan inflagfiakiak."*

**22** As nan nangaliyan Jesus as na, nuntampak nan usa ay kuwarcha ay nangatakchug hid-i, ya kanana, "Ay hiyasay atum ay manfor as nan kangatuwan ay pachi?"

**23** Tinumfor hi Jesus kan hiya, "*Mu wachay inflakiak as achi ustu, paneknekam as nan tataku hena nan achi ustu ay kenalek. Ngem mu ustu nan kenalek, anuyak lawá tampakun?*"

**24** Angkiay ya infiaor Anas hi Jesus ay kukutug ay nafiafiarud nan limana kan Caifas ay kangatuwan ay pachi.

***Nan Nangesaotan Kasin Pedro Kan Jesus***  
*(Mat. 26:71-75; Mar. 14:69-72; Luc. 22:58-62)*

**25** Kun pay kutug hi Simon Pedro ay nangatakchug as nan fiattaw ay cha mun-an-anichu, wachacha nan nanarudsud kan hiya, "Ay fiakunka us usa as nan disipulusna?"

"Aw, fiakunak!" kenalina ay nangesaot.

**26** Wacha hid-i nan usa as nan fiabfiaarun nan kangatuwan ay pachi ay iban nan laraki ay kinigasan Pedro nan ingana. Senarudsudna, "Ay fiakunka he-a nan inilak as nan kawad-an nan kakkaiw ay olivo ay nakekakadwa kan Jesus?" **27** Ngem kasin ensaot Pedro chi. Hiya at chi ya nunkokakok nan ka-or.

***Nan Nangfistikiaran Pilato Kan Jesus***  
*(Mat. 27:1-2, 11-14; Mar. 15:1-5; Luc. 23:1-5)*

**28** Nakapis at as nan nanglopasancha ay namistikiar kan Jesus as afong Caifas. Inyuy nan chiyucha anap-apon chi Judio hiya as palasyon nan gobernador ay Romano, ngem chaancha nakiskop kiapú ta law-un nan Lintigcha ay sungkopcha as nan lukiar nan Gentil ta achicha maifilang as naruket ya ta mañalinchay ay makekan as nan Fiastan chi Munlausen.

**29** Isunga pinmitiw hi Pilato ay gobernador, ya senarudsudna kan chicha, "Ngachana nan charumyu kan tona ay laraki?"

**30** "Ay kunmi lawá cha iyar-ali nan nauy laraki kan he-a mu maid fia-sorna?" ensongfiatcha.

**31** Kenalen Pilato kan chicha, "Mu hiyasa, kikiad kayu ngarud. Ayu, chakayu mismu nan mangokóm kan hiya ay maiyunud as nan Lintiguy."

"Ngem chakami ay Judio at maid met kalibfenganmi ay mangepapatuy as taku," ensongfiatcha. **32** Hiyana nan enommat ta matongpar nan kenalen Jesus maepangkep as nan atuna ay matuy. §

**33** Sinungkop kasin hi Pilato as nan palasyu, ya enpaayagna hi Jesus. Senarudsudna kan hiya, "Ay he-a nan aren chí Judio?"

**34** Tinumfor hi Jesus, "*Ay nurpu as numnummu sa ay sarudsud, winnu wachachay nangifiakia kan he-a as nan maepangkep kan ha-un?*"

**35** Tinumfor hi Pilato, "Ay kunak Judio? Nan mismu ay kakailiyam ya nan anap-apon chi papachi nan nangipurang kan he-a hena. Ngachana man chi fiasormu?"

**36** "Fiakunka asna's luta nan mun-ariyak," ensongfiat Jesus. "*Mu asna's luta nan mun-ariyak at nakepapatuy koma nan papasorotku ta chaanak tiniliw*

*as nan anap-apon chi Judio. O, nan mun-ariyak at fiakun asna's luta nan murpuwana."*

<sup>37</sup> Isunga senarudsud Pilato kan hiya, "Ay ari ka ngarud?"

"*He-a nan nangali un ariyak,*" ensongfiat Jesus. "*Nan pangkep nan emmaliyak asna's luta ya naiyanakak at ta paneknekak nan kenatit-iwa. Nan am-in ay manglayad as nan kenatit-iwa at chungruna nan kanak.*"

<sup>38</sup> As nan hiyachi, senarudsud Pilato, "Ngachana man nan kenatit-iwa?"

*Nan Nakeddenganan Jesus Ay Matuy  
(Mat. 27:15-31; Mar. 15:6-20; Luc. 23:13-25)*

As nan nangaliyan Pilato as na, pinmitiw kasin hiya, ya kanana as nan chiyuycha Judio, "Maid met maanapak as fiasorna as mang-okomák kan hiya. <sup>39</sup> Ngem wacha nan inili ay ukialiuy ay umilufusak as usa ay fierud ay laychunyu as nan Fiastan chi Munlausen. Ay laychunyu ay ilufusku nan ariyu ay Judio?"

<sup>40</sup> Infukiawcha, "Fiakun hiya! Hi Barrabas nan laychunmi!" (Hi Barrabas ay anna at kumukuru.)

## 19

<sup>1</sup> Kun pay narpas chi, enpasaplet Pilato hi Jesus. <sup>2</sup> Kun pay nan sosor-chachu, nunpolekawcha as sufet, ya inpuuycha as uruna. Finachuwancha hiya as kummayad ay kakiay ay kaman fiachon chi ari. <sup>3</sup> Angkiay ya chacha masensennokat ay manamtampak ay mangarkali kan hiya, "Matakutakuka ay Aren chi Judio!"

<sup>4</sup> Pinmitiw kasin hi Pilato, ya kanana as nan tataku, "Ad wani, epaipitiwku hiya hena ta maammuwanyu ay maid maanapak as fiasorna." <sup>5</sup> Isunga pinmitiw hi Jesus ay nakokoronaan as sufet ya nangafiachu as kaman fiachon chi ari. Kenalen Pilato kan chicha, "Ilaunyu, nauy nan taku."

<sup>6</sup> Kun pay inilan nan anap-apon chi papachi ya nan kukuwarcha as nan Templo hiya, infukiawcha, "Epalansam hiya as nan koros! Epalansam hiya as nan koros!"

Ngem kenalen Pilato kan chicha, "Chakayu mismu nan mangara kan hiya, ya elansayu as nan koros, tay maid naanapak as fiasorna."

<sup>7</sup> Tinumfor nan chiyuycha Judio, "Wacha met nan lintigmi ay mangali un masapor matuy hiya, tay kenalina un anak Apo Dios hiya."

<sup>8</sup> Kun pay chinngor Pilato chaná ay kenalicha, kaskasin inmugyat hiya.

<sup>9</sup> Sinungkop kasin as nan palasyu, ya senarudsudna kan Jesus, "Ay chaud man nan nurpuwam?" Ngem chaan tinumfor hi Jesus. <sup>10</sup> Kenalen Pilato kan hiya, "Anuyka achi tumfor kan ha-un? Ay achim ammu ay wachay kalibfengak ay mangilufus winnu mangeaelansa kan he-a as nan koros?"

<sup>11</sup> Tinumfor hi Jesus kan Pilato, "Maid poros kalibfengam kan ha-un sukúd kun ichat Apo Dios kan he-a. Isunga nan taku ay nangipurang kan ha-un kan he-a at ong-ongor nan fiasorna."

<sup>12</sup> As nan nanngoran Pilato as na, chana anapun chi atuna ay mangilufus kan Jesus. Ngem infukiaw nan chiyuycha Judio, "Mu ilufusmu na ay taku at fiakun chaká kiayyum kan Emperador. Tay nan ngachana ay mangiflang as achorna as ari at kafusor nan Emperador."

<sup>13</sup> Kun pay chinngor Pilato chaná ay kenalicha, enpaipitiwna hi Jesus, angkiay uy temmokor as nan tokoran chi huwes henan lukiar ay makali un Naataran as Fiatu. Nan ngachana as nan kalen chi Hebreo at Gabata. <sup>14</sup> As nan hiyachi at kiayud munkiawa as nan Urkiw ay Munsakianaan nan Judio

as nan Fiantan chi Munlausen. Kenalen Pilato as nan chiyuchya Judio, "Nauy nan ariyu!"

<sup>15</sup> Ngem infugfukiawcha, "Epapatuymu! Epapatuymu! Epalansam as nan koros!"

Kenalen us Pilato kan chicha, "Ay laychunyu ay epalansak nan ariyu as nan koros?"

"Maid tukún as arimi mu achi yangkiay hi Emperador," ensongfiat nan anap-apon chi papachi.

<sup>16</sup> Kun pay as nan anongos, inpurang Pilato hi Jesus kan chicha ta maelansa as nan koros.

### *Nan Naelansaan Jesus As Nan Koros*

(Mat. 27:32-44; Mar. 15:21-32; Luc. 23:26-43)

<sup>17</sup> Nan sosorchachu at enpasakfiatcha kan Jesus nan korosna, ya inyuchya hiya henan lukiar ay makali un Lukiar nan Tong-or chi Uru. Nan ngachana as nan kelen chi Hebreo at Golgota. <sup>18</sup> Hid-i nan nangelansaancha kan Jesus as nan koros. Wachacha us nan chuwa ay enlangsacha as nan koroscha, usa as apét kannawan Jesus ya nan usa as apét kannikidna.

<sup>19</sup> Wacha us nan empaisurat Pilato ay enpaipuyna as nan koros Jesus ay kanana, "Hi Jesus ay i-Nazaret, nan Aren chi Judio." <sup>20</sup> Ongor as nan chiyuchya Judio nan nangfiasa as na, tay nan lukiar ay naekorosan Jesus at naesasag-un henan siyudad. Usa pay at naisurat sa as kelen chi Hebreo, Latin ya Griego. <sup>21</sup> Nan anap-apon chi papachen chi Judio at inmuyucha kan Pilato, ya nunlilicha, "Fiakun 'Aren chi Judio' nan isuratmu, ngem kun at nan 'Kenalen tona ay laraki un ha-un nan Aren chi Judio.' "

<sup>22</sup> Ngem tinumfor hi Pilato, "Nan chakusku insurat at achi masokatan."

<sup>23</sup> Kun pay lenpas nan sosorchachu ay nangelansa kan Jesus as nan koros, enaracha nan chiyuchya fiachuna, ya nunkap-atuncha ta makmakchangcha ay opat. Enaracha us nan an-anchu ay kaman sando ay enafor ay maid nunsoopana. <sup>24</sup> Isunga kenalen nan sosorchachu as nan tunggal usa, "Achi takú laksetun. Un-unuyna mu kun takú at munfifinnunot ta ilaun takú mu ngachana nan manguwa."\* Hiyana nan enommat ta matongpar nan naisurat as nan Kalen Apo Dios ay kanana, "Kinudkudwacha nan chiyuchya fiachok, ya nunfifinnotancha nan an-anchu ay sandok."

<sup>25</sup> As nan sag-un nan koros Jesus, nangatakchug cha enana, nan sunúd enana ay fiafiai, hi Maria ay asawan Cleofas, ya hi Maria Magdalena. <sup>26</sup> Kun pay inilán Jesus hi enana ya nan disipuluna ay laylaychuna ay nangatakchug as nan sag-una, kenalen Jesus kan enana, "Ammi, hi tosa nan ifilangmu as anakmu." <sup>27</sup> Kenalina us as nan chiyuy disipuluna, "Enauchi, hi tosa nan ifilangmu as enam." Nunlapu as nan hiyachi ay uras, enkatam nan chiyuy disipulu hi enan Jesus as afongna.

### *Nan Natuyan Jesus*

(Mat. 27:45-56; Mar. 15:33-41; Luc. 23:44-49)

<sup>28</sup> As nan narpasan tona, ammon at Jesus ay lenpasna nan am-in ya ta matongpar nan naisurat as nan Kalen Apo Dios, kenalina, "Nasketanak."

<sup>29</sup> Wacha hid-i nan usa ay fusi ay nanapnu as semmoka ay fiayas. Isunga ensawsaw nan sosorchachu nan munyam-us ay mangsosop as nan fiayas. Empakatcha as nan ungtiwan nan naluslusinan ay lükiam ay makali un hisupu, ya inchawchawcha ta sosopun Jesus. <sup>30</sup> Kun pay senosop Jesus chi, kenalina,

\* <sup>19:24</sup> Sal. 22:18

*“Narpas at.” Angkiay ya nunyongyong ya entalekna nan long-agna kan Apo Dios.*

### *Nan Nachuyokan Nan Kapiniling Jesus*

<sup>31</sup> Nan hana ay urkiw ay natuyan Jesus at Urkiw ay Munsakianaan. As nan kafikiatana at hiyasa nan kapatekian ay Urkiw ay Mun-iblayan, tay maikisan as nan Fiastan chi Munlausen. Kiapú ta law-uncha mu mayaschi nan chiyucha anchor as nan koros as nan Urkiw ay Mun-iblayan, inmuy nan anap-apon chi Judio kan Pilato, ya chinawatcha kan hiya ay epaepongna nan suken nan chiyucha naelaransa as nan koros ta munkakatuycha, at epakaana chicha as nan koroscha. <sup>32</sup> Isunga inmuy nan sosorchachu, ya enepongcha nan suken nan chuwa ay lanaraki ay naikiakiaw-an Jesus. <sup>33</sup> Ngem kuncha pay enmali kan Jesus ya inilacha ay nannatuy at hiya, chaancha enepong nan sukina. <sup>34</sup> Uray mu hiyasa, inchuyok nan usa as nan sosorchachu nan fiangkawna as nan kapiniling Jesus. Hiya at chi ya tinmuyok chi chara ya chanum. <sup>35</sup> Nan taku ay nangila as nan nauy ay enommat at paneknekana na ta omafurot kayu us koma. Tit-iwa nan pammaneknekna ya ammunia ay kenatit-iwa nan infiakiana. <sup>36</sup> Enommat chaná ta matongpar nan naisurat as nan Kalen Apo Dios ay kanana, “Maidtu maepong as uray usa as nan tong-orna.”† <sup>37</sup> Wacha us nan tapina ay naisurat as nan Kalen Apo Dios ay kanana un, “Iaunchantu hiya ay chinuyokcha.”‡

### *Nan Nailubkan Jesus*

(Mat. 27:57-61; Mar. 15:42-47; Luc. 23:50-56)

<sup>38</sup> As nar narpasan tonas, inmuy hi Jose ay i-Arimatea kan Pilato, ya chinawatna nan anchor Jesus. Hi Jose ay anna at usa'y disipulon Jesus, ngem kuna chaan enpapkakaammu nan pammartinia as nan ongor ay tataku, tay umugyat as nan anap-apon chi Judio. As nan nangeparufusan Pilato, uy enek-ak Jose nan anchor Jesus. <sup>39</sup> Nakiuy us hi Nicodemo ay hiya nan inmuy kan Jesus as nan henlafi.§ Enmetakin hiya as nasorok as turon puru ay kilo ay fiangfiangru ay naamma as makali un mirra ya aloe.\* <sup>40</sup> Enaran nan nauycha chuwa nan anchor Jesus, ya penotepotancha as am-ammay ay lopot ay natapiyan as fiangfiangru ay maiyunud as nan iniili ay ukialen nan chiyucha Judio ay atuncha as nan natuy.

<sup>41</sup> As nan sag-un nan naekorosan Jesus, wacha nan lukiar ay natatanman as ongor ay kaiw ay kawad-an nan fiarú ay lufok ay maid nailublufok. <sup>42</sup> Kiapú ta kiayud umchan nan Urkiw ay Mun-iblayan chi Judio ya kiapú ta naesasag-un nan lufok, hid-i nan uycha nangilubkan kan Jesus.

## 20

### *Nan Natakuwan Jesus Manipud As Nan Utúy*

(Mat. 28:1-8; Mar. 16:1-8; Luc. 24:1-12)

<sup>1</sup> Kun pay as nan Chumingku, hi Maria Magdalena at enmalicha as nan chaan napat-or as nan lufok Jesus, ya inilana ay nakaan nan fiatu ay naetatangub as nan pantiw nan lufok. <sup>2</sup> Isunga tenmagtaghiya ay inmuy kan Simon Pedro ya as nan usa ay disipulu ay laylaychun Jesus,\* ya infiakiana

† 19:36 Exo. 12:46; Num. 9:12; Sal. 34:20    ‡ 19:37 Zac. 12:10; Pal. 1:7    § 19:39 Jn. 3:1-2; 7:50

\* 19:39 Nan aloe at naara as nan usa ay karasen chi mura. Naosar ad kasin as akias ya fiangfiangru.

\* 20:2 Jn. 1:40; 13:23; 18:15; 21:24

kan chicha, “Enaracha nan anchor nan Apo hid-i’s lufok, ya achimi ammu nan nangiyuyancha kan hiya.”

<sup>3</sup> As nan nanngoran Pedro ya nan usa ay disipulu, naannuuycha as lufok. <sup>4</sup> Tenmagtagcha ay chuwa, ngem kiapú ta fekfekkas nan usa mu hi Pedro, emmon-oná ay inumchan as lufok. <sup>5</sup> Nunyongyong ay nangila ad chur-um, ya inilana nan an-anchu ay lopot ay naepotepot kan Jesus, ngem chaan sinungkop hiya. <sup>6</sup> Kun pay inumchan hi Simon Pedro ay cha umun-unud, nunchakpos ay sinungkop as nan lufok. Inilana nan an-anchu ay lopot ay naepapatang hid-i <sup>7</sup> ya nan panyu ay naepotepot as nan uron Jesus. Nan nauy panyu at chaan naetatapi as nan an-anchú ay lopot, ngem nalelekop as nan mismu ay kawad-ana. <sup>8</sup> Angkiay ya sinungkop us nan usa ay disipulu ay emnon-oná ay inumchan as lufok. As nan nangil-ana as nan chiyuycha lopot ay wacha hid-i, enafurotna ay nataku hi Jesus manipud as nan utúy. <sup>9</sup> Ngem chaancha pay naawatan nan naisurat as nan Kalen Apo Dios ay kanana un masapor matakú hiya manipud as nan utúy.

<sup>10</sup> Kun pay narpas sa, kenmatam nan chuwa ay disipulus.

#### *Nan Nulpail-an Jesus Kan Maria Magdalena (Mat. 28:9-10; Mar. 16:9-11)*

<sup>11</sup> Hi Maria at nangatakchug ay cha mun-ag-akor as luwar nan lufok. Kun pay cha mun-ag-akor, nunyongyong ay nangila ad chur-um. <sup>12</sup> Inilana nan chuwa ay anghel ay nunfiafiachu as munpupukaw ay nangatokor as nan naepapab-ukian nan anchor Jesus as nan chaána pay natakuwan manipud as nan utúy. Nan usa at nangatokor as nan ulluwana, ya nan usa at as nan kawad-an nan sukina. <sup>13</sup> Senarudsud nan nauycha chuwa ay anghelles kan hiya, “Ammi, anuyka cha mun-ag-akor?”

“O, tay enlayawcha nan ok Apo, ya achek ammu nan nangiyuyancha kan hiya,” ensongfiatna.

<sup>14</sup> Kuna pay kenali na, nunsakong ya inilana hi Jesus ay nangatakchug, ngem chaana enmatonan ay hi Jesus chi. <sup>15</sup> “*Ammi, anuyka cha mun-ag-akor? Ngachana nan cham anapun?*” senarudsud Jesus kan hiya.

Ka-anan Maria mu hiyachi nan mun-ay-aywan as nan naetatanman chi ongor ay kaiw, isunga kenalina kan hiya, “Sir, mu he-a nan nangek-ak kan hiya, ifiakiam mu ay chaud nan nangiyuyam ta uyku epaara.”

<sup>16</sup> “*Maria,*” kenalen Jesus kan hiya. Hiya at chi, nunsakong hi Maria, ya kanana, “*Rabboni!*” Nan laychuna ay kanan as nan kalen chi Hebreo at “Misturu”.

<sup>17</sup> Infiakian Jesus kan hiya, “*Achiyak un-unnan, tay chaanak pay ngenmatu ay munfiangad kan Ama. Ngem kunmu at uy ifiakia as nan ib-ak un munfian-gachak kan Amak ay hiya nan Amayu, ya as nan Diosku ay hiya nan Diosyu.*”

<sup>18</sup> As nan hiyachi, inmuy hi Maria Magdalena as nan disipulus Jesus, ya kanana, “Inilak nan Apo!” Infiakiana kan chicha nan kenalen Jesus kan hiya.

#### *Nan Nulpail-an Jesus As Nan Disipulusna (Mat. 28:16-20; Mar. 16:14-18; Luc. 24:36-49)*

<sup>19</sup> As nan lafen nan hiyachi ay Chumingku, naamong nan disipulus Jesus as nan usa ay afong. Nan chiyuycha unub at nunkaichakigcha, tay umugyatcha as nan anap-apon chi Judio. Kalina at ya wacha hi Jesus ay naketatakchug kan chicha, ya kanana kan chicha, “*Nan natalna ay numnum nan mawawacha koma kan chakayu.*” <sup>20</sup> Kuna pay kenali na, enpailana

kan chicha nan chuwa ay limana ya nan kapinilingna. As nan hiyachi, naragsakan as solet nan disipulus as nan nangil-ancha as nan Apo.

<sup>21</sup> Angkiay ya kasin kenalen Jesus kan chicha, “*Nan natalna ay numnum nan mawawacha koma kan chakayu. Kaman as nan nangifaoran Ama kan ha-un at assesa us ay ifiaorku chakayu.*” <sup>22</sup> Kuna pay kenali na, senop-okana chicha, ya kanana, “Awatunyu nan Espiritu Santo. <sup>23</sup> Mu pakawanunyu nan uray ngachana as nan fiasfiasorna, mapakawan hiya. Mu achiyu pakawanun chicha, achicha mapakawan.”

### *Nan Nulpail-an Jesus Kan Tomas*

<sup>24</sup> As nan lafi ay nunpail-an Jesus as nan disipulusna, maid kan chicha hi Tomas ay makali un Apel ay usa as nan hinpuru ya chuwa ay disipulus.

<sup>25</sup> Isunga infiakian nan tapina ay disipulus kan hiya, “Inilami nan Apo!”

Ngem tinumfor hi Tomas kan chicha, “Achek afurotun sukúdku ilaun ay mismu nan filat as limana as nan naelansaana. Achek challu afurotun sukúdku kaprosun nan filat as nan limana ya kapinilingna.”

<sup>26</sup> Kun pay inmuy chi usa ay chumingku, naamong kasin nan disipulus Jesus as nan afong, ya wacha hi Tomas kan chicha. Nunkaichakig nan chiyucha unub, ngem kalina at ya wacha hi Jesus ay naketatakchug kan chicha, ya kanana, “*Nan natalna ay numnum nan mawawacha koma kan chakayu.*” <sup>27</sup> Angkiay ya kenalina kan Tomas, “*Nauycha nan limak. Ayu, ichawchawmu nan limam ta kaprosun nan filatku as nan kapinilingku. Ikinakmu man ay munchuwachuwa, ngem kunka at omafurot!*”

<sup>28</sup> Tinumfor hi Tomas kan hiya, “Apok ya Diosku!”

<sup>29</sup> Kenalen Jesus kan hiya, “*Ad wani, kiapú ta inilaak at enmafurotka? Nakiasatcha nan chaan nangila kan ha-un, ngem omafurotcha.*”

### *Nan Pangkep Nan Nauy Ay Liblu*

<sup>30</sup> Ongor pay nan tapina ay nakaskaschaaw ay sinyar ay enkamkaman Jesus ay inilan nan disipulusna ay chaan naisurat as nan nauy ay liblu.

<sup>31</sup> Ngem naisurat chaná ta afurotunyu ay hi Jesus nan Cristo ay Anak Apo Dios ya ta babaen as nan pammatiyu kan hiya at mawad-an kayu as fiyag ay maid patingkiana.

## 21

### *Nan Kasin Nunpail-an Jesus As Nan Disipulusna*

<sup>1</sup> As nan narpasan tona, nunpaila kasin hi Jesus as nan disipulusna henan olet nan fiayfiay ay makali un Tiberias. Nan enkamana ay nunpaila at hiyana. <sup>2</sup> Naaamong am-in cha Simon Pedro, Tomas ay makali un Apel, hi Natanael ay i-Cana ad Galilea, nan chiyucha potot Zebedeo, ya nan chuwa pay ay disipulus Jesus. <sup>3</sup> Kenalen Simon Pedro kan chicha, “Uyak manafukor.”

“Makeali kami kan he-a,” kenalicha kan hiya. Isunga uycha nunlukian as nan fiangka. Ngem as nan hiyachi ay lafi, maid tenafukorancha.

<sup>4</sup> Kun pay cha fomoknag nan urkiw, nangatakchug hi Jesus henan olet nan fiayfiay, ngem chaan naematonan nan disipulus ay hi Jesus chi. <sup>5</sup> Infukiau Jesus kan chicha, “*Kiakiayum, ay wachay enarayu?*”

“Maid mampay!” ensongfiatcha kan hiya.

<sup>6</sup> “*Etap-oryu nan tafukor as apét kannawan nan fiangka, at wachay konaunyu,*” kenalina kan chicha. As nan nangetap-orancha tit-iwa, chaancha at nakainat, tay ongor chi nakna.

<sup>7</sup> Angkiay ya kenalen nan chiyuy disipulu ay laylaychun Jesus kan Pedro, "Nan Apo payat chi!" As nan nanngoran Simon Pedro un nan Apo chi, nuniyammana nan kakiyna, (tay kenakaana) ya tinmifok ay umuy kan Jesus. <sup>8</sup> Ngem nan tapina ay disipulus at nunfiafiangkacha ay cha mangikiayad as nan tafukor ay nanapnu as natafukoran. Achi achawwi henan oletna ay kun kiayud hinkiasot ay metros nan kaachawwicha.

<sup>9</sup> Kuncha pay temmakchang, inilacha nan uling ay finmafiara ay naikukumfiaan chi fiangos ya wacha us chi tenapay. <sup>10</sup> Kenalen Jesus kan chicha, "Ayu! Umiyali kayu as tapen nan katabtafukoryu." <sup>11</sup> Isunga nunfiangad hi Pedro as nan fiangka, ya finmachang as nan kakadwana ay nangikuyud as nan tafukor ay nanapnu as anad-acha ay nakna. Nan filang nan am-in ay nakna at hinkiasot ya leman puru ya turu. Uray mu hiyachi nan kaongor nan enaracha, chaan challu narakset nan tafukor.

<sup>12</sup> Kenalen Jesus kan chicha, "Akayu ta mangan takú." As nan hiyachi, maid naturud as nan disipulus ay nangsarudsud, "Ngachanmu," tay ammucha ay nan Apo. <sup>13</sup> Enaran Jesus nan tenapay, ya inchatna kan chicha. Assesa us nan enatna as nan fiangos. <sup>14</sup> Hiyana nan maekatlu ay nunpail-an Jesus as nan disipulusna as nan narpasan nan natakuwana manipud as nan utúy.

### Nan Infiakan Jesus Kan Pedro

<sup>15</sup> As nan narpasancha ay nangan, senarudsud Jesus kan Simon Pedro, "Simon ay potot Juan, ay ong-ongor nan layadmu kan ha-un mu nan nauycha tapina ay disipulus?"

"O, Apo, ammom met ay laylaychok he-a," ensongfiat Pedro.

"Mu hiyasa, aywanam nan chiyuycha enmafurot kan ha-un ay chicha nan maepachong as nan korderok," kenalen Jesus.

<sup>16</sup> Senarudsud kasin Jesus kan hiya, "Simon ay potot Juan, ay laylaychunak?"

"O, Apo, ammom met ay laylaychok he-a," ensongfiat kasin Pedro kan hiya.

"Mu hiyasa, aywanam nan chiyuycha enmafurot kan ha-un ay chicha nan maepachong as nan karnerok."

<sup>17</sup> Senarudsud Jesus as nan maekapitlu, "Simon ay potot Juan, ay laylaychunak?"

Nginmuyus hi Pedro, tay namen turu ay senarudsud Jesus kan hiya, "Ay laylaychunak?" Tinumfor hi Pedro, "Apo, ammom met nan am-in. Ammom met ay laylaychok he-a."

Kenalen Jesus kan hiya, "Aywanam nan karnerok. <sup>18</sup> Ifiakiak kan he-a nan tit-iwa. As nan kafiab-arom, kikiadka ay nunfiadiachi, ya inmuyka as nan laylaychum. Ngem kunka pay marakay, uyachumtu nan takraymu, ya tukuntu nan mangfiarud as nan limam ay mangiyuytu kan he-a as nan achim laychun ay ay-ayan." <sup>19</sup> Kenalen Jesus na ta mangepakaammuwana as nan atun Pedro ay matuy ay mangichayaw kan Apo Dios. Kun pay narpas na, kenalen Jesus kan hiya, "Unuchunak!"

### Hi Jesus Ya Nan Laylaychuna Ay Disipulu

<sup>20</sup> Nunsakong hi Pedro, ya inilana ay cha umunud kan chicha nan disipulu ay laylaychun Jesus. Nan disipulu ay anna nan semasachag kan Jesus as nan naschum ay nanganancha ya nan nunsarudsud kan hiya, "Apo, ngachana nan mangesepsep kan he-a?" <sup>21</sup> As nan nangil-an Pedro kan hiya, senarudsudna kan Jesus, "Apo, hi tona ngay us, ngachana nan ommat kan hiya?"

*22 Tinumfor hi Jesus, “Mu laychok ay matakú hiya inkiana munfiangachak at maid fiyangmu’s chi. Aka at, unuchunak!”*

*23 Kiapú as nan nauy ay kenalen Jesus, naepachamag as nan chiyuycha enmafurot ay achi matmatuy nan nauy ay disipulu. Ngem chaana kenali un achi matmatuy nan nauy ay disipulu. Nan kenalina yangkiay at, “Mu laychok ay matakú hiya inkiana munfiangachak at maid fiyangmu’s chi.”*

### *Nan Anongos Nan Surat*

*24 Ha-un nan chiyuy disipulu ay inflagfiakian Jesus hena. Ha-un us nan nangepaneknek ya nangisurat as nan nauycha ay maepangkep kan Jesus. O, ammumi ay tit-iwa chaná ay insuratku.*

*25 Ongoongor pay nan tapina ay enkamkaman Jesus. Mu maisurat am-in nan enkamkaman Jesus, as nan munnumnumnumku at achi ommat nan intiru ay luta ay maepay-an nan chiyuycha liblu ay maisuratancha.*

## Nan En-enat Nan Apostoles (Aramid) Nan Omona Ay Ammuwun

Nan nauy ay liblu at maekadwa ay surat Lucas kan Teofilo. As nan emnon-onay liblu, insurat Lucas nan maepangkep as nan enmaliyan Apo Jesus asna's luta ya maepangkep as nan enkamkaman Jesus as nan kawad-ana hena. Ngem as nan nauy ay liblu, enpakaammon Lucas nan maepangkep as nan naiwarwarawakian nan Ammay ay Chamag nunlapu ad Jerusalem inkiana ad Roma. Insuratna nan maepangkep as nan chiyucha nakaskaschaaw ay en-enat nan apostoles, kaskasir kan cha Pedro' kan Pablo, ya nan enom-ommat as nan chiyucha omaafurot kiapú as nan pammatica kan Jesus. Enpakaammuna us nan maepangkep as nan enmaliyan nan Espiritu Santo ay mangepapigsa ya mangfiachang kan chicha as nan mangekaskasabaancha as nan nauy Ammay ay Chamag (Jn. 14:16-17; Ara. 2:1-47).

Hi Lucas mismu at penaneknekana nan tapina ay enom-ommat, tay naketaktakin hiya kan Pablo as nan tapen nan nunfiabfaatana. Isunga as nan nauy ay liblu, wachacha nan naisurat ay "kami" ya "chakami" (16:10-40; 20:5-28:31).

Sakbay nunfiangad hi Jesus ad chaya, inflina as nan disipulusna ay masapor umuyucha henan intiru ay luta ya ekasabacha nan Ammay ay Chamag as nan am-in ay tataku (Mt. 28:19-20). Isunga enlapon nan apostoles ay nangekasaba as nan Ammay ay Chamag nunlapu ad Jerusalem inkiana inumchancha henan probinsiya ay Judea ya Samaria ya uray pay henan anachawwi ay il-ili (1:8). As nan turon puru ay tawwun, nan Ammay ay Chamag at naepachamag ad Roma (28:16-31). Chaan nunkuyat hid-i, tay ad wani at cha munchinamag henan intiru ay luta.

Mafiasa takú as nan nauy liblu ay chaan enafurot nan chiyucha anap-apu ay Judio ay hi Jesus nan Cristo ay Anak Apo Dios. Nan nunummú-muncha yangkiay at nan manongtongparancha as nan chiyucha lintigcha. Enpapaticha ay mangepakinak kan cha Pedro kan Juan as nan mune-kaskasabaancha. Isunga penachascha ay mangpatuy kan chicha, ya tit-iwa ay penatuycha hi Santiago. Ngem uray mu hiyasa, kiapú as nan fiachang nan Espiritu Santo kan cha Pedro, nan ongoongor ay Judio ya Gentil at enmafurotcha kan Jesus. Kun pay nan chiyucha omaafurot, inturturuycha ay naam-among as inurkiw as nan fiattaw nan Templo, ya enpapasnekcha ay nangchaychayaw kan Apo Dios. Nan am-in ay tataku at rinispitucha nan chiyucha omaafurot, ya inurkiw us ay wachachay enpaetaben Apo Dios as nan chiyucha omaafurot (2:47).

Isunga insurat Lucas as nan nauy ay liblu nan chiyucha en-enat nan apostoles ta paneknekana ay hi Jesus at tit-iwa ay Anak Apo Dios ya hiya nan mangesarakan as nan tataku.

Ongor nan Judio ay enmafurot kan Jesus. Ongor us chi Gentil ay enmafurot. Ngem kanan nan chiyucha Judio un achicha maesarakan nan chiyucha Gentil mu achicha unuchun nan iniili ay ukialen chi Judio. Isunga enpakaammon Apo Dios as nan apostoles ay uray Judio wiinu Gentil at maesarakan, ya nan Espiritu Santo at mawacha kan hiya kiapú as nan pammatina kan Jesu Cristo (10:1-11:18; 15:1-34).

Nan Roma nan kapital nan Italia ay kawad-an nan kangatuwan ay mangetortoray kan chicha ay makali un Emperador. Hiya nan mangetortoray as

nan tataku ay enamis nan sosorchachuna, ya hiya us nan mangchutok as nan gogobernador ay mangetoray kan chicha. Nan chiyucha naiyanak ad Roma at makalicha un i-Roma ya nan chiyucha enmara as sichoracha as nan gobernon chi Roma at makalicha un Romano. Am-in ay enmara as sichora as nan gobernon chi Roma at wachay makianabcha. Kaspangarigan, epawan nan lintigcha ay machusa nan Romano mu chaan nafistikiar onona. Ngem nan fiakun Romano at mafialin ay saplituncha ta peletuncha ay mangifiakia as nan tit-iwa mu wachay fiasorna. Nan usa pay ay atun nan Romano at mafialina ay chawatun ay maiyuy nan kasona as nan emperador. Ngem kun pay nan fiakun Romano at achi mafialin. Isunga hiyana nan nunumnumun takú as nan mamasaan takú as nan maepangkep kan Pablo, tay uray mu Judio hiya, maifilang hiya as Romano, tay enmara as sichoran chi Romano.

Ongorcha pay nan mafiasa takú as nan nauy liblu ay maepangkep as nan ongor ay nakaskaschaaw ay enom-ommatt as nan chiyucha enmafurot.

### **Nan Nakudkudwaan Nan Nauy Liblu**

Nan Nunsakianaan Nan Apostoles Ay Mun-epanekekne 1:1-26

Nan Nun-ekaskasabaan Nan Apostoles Ad Jerusalem 2:1-8;<sup>3</sup>

Nan Nun-ekaskasabaan Nan Apostoles Ad Judea Ya Samaria 8:4-12:25

Nan Nun-ekaskasabaan Pablo 13:1-28:31

Nan Omona Ay Nunfiaatan Pablo 13:1-14:28

Nan Nunmitinancha Ad Jerusalem 15:1-35

Nan Maekadwa Ay Nunfiaatan Pablo 15:36-18:22

Nan Maekatlu Ay Nunfiaatan Pablo 18:23-21:16

Nan Nunfiaatan Cha Pablo Ad Jerusalem, Cesarea ya Roma 21:17-28:31

<sup>1</sup> Kan he-a Teofilo,

As nan enmon-oná ay suratku, insuratku am-in nan en-enat ya insursuron Jesus nunlapu as nan nunlapuwana ay nun-isuru <sup>2</sup> inkiana as nan urkiw ay naetag-uyana ad chaya. Sakbay enommat chi, babaen as nan pannakafialin nan Espiritu Santo, infilina nan atun nan apostoles<sup>\*</sup> ay pinilina. <sup>3</sup> Kun pay narpas ay nun-iliwas ya natuy, nunpaipaila hiya as nan apostolesna, ya babaen as nan ongor ay en-enatna at naepaneknek ay tit-iwa ay nataku hiya. As nan opat puru ay urkiw, nunpappaila hiya kan chicha, ya infiagfiakiana kan chicha nan maepangkep henan muntorayan Apo Dios.<sup>†</sup>

<sup>4</sup> As nan hin-urkiw ay nakepagyangan Jesus kan chicha, infilina, “Achi kayu mak-ak hena ad Jerusalem, ngem kunyu at sad-un nan enkaren nan Ama ay ichatna kan chakayu ay hiyachi nan infiakiak kan chakayu. <sup>5</sup> Finunyakian Juan nan tataku as chanum, ngem karpasan chi kaat ay urkiw at mafunyakian kayuntu as Espiritu Santo.”‡

### ***Nan Naetag-uyan Jesus Ad Chaya***

<sup>6</sup> Kuncha pay kasin naamong ay kadwacha hi Jesus, senarudsud nan apostoles kan Jesus, “Apo, ay fiakun ad wani nan mangepakaanam as nan i-Roma ay muntotoray kan chitaku ta chitaku ay kianak Israel nan muntoray kasin?”

<sup>7</sup> Kenalen Jesus kan chicha, “Achiyu masapor ammuwun nan timpu winnu urkiw ay ommatana ay enkeddeng Ama babaen as nan mismu ay kalibfengana.

<sup>8</sup> Ngem maettan kayuntu as pannakafialin as nan omaliyan nan Espiritu

---

\* <sup>1:2</sup> Nan apostol at usa ay nasonag as pannakaachor Jesus. † <sup>1:3</sup> 1 Co. 15:5-8 ‡ <sup>1:5</sup> Luc. 24:49; Ara. 11:16

*Santo ay mawawacha kan chakayu. Chakayuntu nan mangepaneknek as nan maepangkep kan ha-un ad Jerusalem ya henan intiru ay probinsiya ad Judea ya Samaria inkiana henan am-in ay lukiar asna's luta.*”<sup>9</sup> Kuna pay lenpas ay kenali na, as nan nangiil-ancha kan hiya, naetag-uy hiya ad chaya inkiana nalingfian as nan lifuu.

<sup>10</sup> Kuncha pay cha etottotoongan ad chaya as nan chana umyan, kalina at ya wachacha nan chuwa ay lanaraki ay nunfiafiachu as munpupukaw ay naketatakchug kan chicha. <sup>11</sup> Kenalicha, “Chakayu ay i-Galilea, adchi t'uy kayu kukutug ay tomatakchug hena ay muntatangad ad chaya? Hi Jesus ay anna ay naetag-uy ad chaya at munfiangadtu ay kaman as nan inilayu ay enatna ay inmuy ad chaya.”

### *Nan Nangesokat Kan Judas Iscariote*

<sup>12</sup> Angkiay nunfiangad nan apostoles ad Jerusalem ay nurpu henan chuntung ay Olivo ay uy at usa ay kilometro nan kaachawwiña henan siyudad. <sup>13</sup> As nan inumchanancha ad Jerusalem, inmuycha as nan nunngangatu ay kuwarton nan afong ay mamagyanancha. Chicha chaná: cha Pedro, Juan, Santiago, Andres, Felipe, Tomas, Bartolome, Mateo, Santiago ay potot Alfeo, Simon ay mangesasaket as ilina ya hi Judas ay potot Santiago. <sup>14</sup> Kun anaka un naam-amongcha am-in ay mun-us-usa ay munkarkararag. Naetatapi kan chicha nan fianafai ya hi Maria ay enan Jesus, ya nan lanaraki ay en-auchen Jesus.

<sup>15</sup> Kun pay inmuy chi kaat ay urkiw, naamong nan umuy as hinkiasot ya chuwan puru ay omaafurot kan Jesus. As nan hiyasa, temmakchug hi Pedro, ya kanana, <sup>16</sup> “Chakayu ay iib-ak, masapor matongpar nan naisurat as nan Kalen Apo Dios ay enpaepadton nan Espiritu Santo kan David maepangkep kan Judas ay nangepangu as nan tataku ay naniliw kan Jesus. <sup>17</sup> Hi Judas at kadwami ad kasin, tay usa us hiya ay pinilen Apo Jesus ay makiserfi kan chakami ay apostoles.”

<sup>18</sup> (Nan siping ay lagfon Judas as nan mangotettet ay enatna at enlakuna as luta. Hid-i nan natuyana as nan nag-asana. Finumtak nan achorna ya naiwakascha nan intiru ay putuna. <sup>19</sup> Nachamag am-in nan tataku ad Jerusalem nan enommat kan hiya. Isunga ngenadnancha nan chiyu luta as Akeldama as nan kalicha. Nan laychun ay kanan nan hana ay ngachan at “Luta ay Nacharaan.”)\*

<sup>20</sup> Kenalen pay Pedro, “Nauy nan naisurat maepangkep kan Judas as nan liblu ay Salmo ay kanana,  
‘Maenganuy koma nan afongna,

ya maid koma kasin uy omab-afong hid-i.’

Wacha us nan naisurat ay kanana,

‘Wacha komay mangisubrat as nan libfenguna.’†

<sup>21</sup> “Mu hiyasa, masapor munpili takú as usa as nan chiyuycha kanayon ay nikituntun-ud kan chakami as nan kawad-an Apo Jesus kan chitaku <sup>22</sup> nunlapu as nan namunyakian Juan kan hiya inkiana as nan naetag-uyana ad chaya ay naek-ak kan chitaku. O, masapor wachay usa as maetapi kan chakami ay munfialin as mangepaneknek as nan maepangkep as nan inilana ay natakuwan Apo Jesus manipud as nan utúy.”

<sup>23</sup> Isunga infiakiacha nan chuwa ay ngachan ay munpiliyancha. Nan usa at hi Jose winnu Barsabas ay nangadnan us as Justo, ya nan usa at

hi Matias. <sup>24</sup> Angkiay ya nunkararagcha. Kenalicha, “Apo, ammom am-in nan numnum chi tataku. Isunga epakaammom ngarud kan chakami mu ngachana nan pinilem kan chatona ay chuwa <sup>25</sup> ay mangesokat kan Judas as nan nauy ay chununa ay kenaapostol. Tay hi Judas at inmuy henan lukiar ay maifiakiay kan hiya as ay-ayana.” <sup>26</sup> Angkiay ya as nan nunfifinnunotancha as nan nauy chuwa, hi Matias nan napili ay maetapi as nan hinpuru ya usa ay apostoles.

## 2

### *Nan Omaliyan Nan Espiritu Santo*

<sup>1</sup> Kun pay inumchan nan urkiw ay Pentecostes,\* naamongcha am-in nan omaafurot as nan usa ay afong. <sup>2</sup> Kalina at ya wachay ngangak ay nurpu ad chaya ay kaman atifufud chi angin, ya pinnuna nan intiru ay afong ay naaamongancha. <sup>3</sup> Angkiay ya inilacha nan maepachong as nan apuy ay nasisiyen, ya waschi un naepatang as nan uron nan tunggal usa kan chicha. <sup>4</sup> Napnucha am-in as pannakafialin nan Espiritu Santo, ya enlapucha ay nukalasi tukutukún ay kali ay enpakalen nan Espiritu Santo.

<sup>5</sup> As nan hiyachi, wachacha nan Judio ay manangchaychayaw kan Apo Dios ay nakepapagyán ad Jerusalem ay nurpu henan tukutukún ay nasyon asna's luta. <sup>6</sup> Kuncha pay chinngor sa ay ngangak, nagrubcha nan ongoongor ay tataku ay enmali, ya naschaawcha, tay waschi un chinngorna nan mismu ay kalina ay enkalen nan chiyucha omaafurot. <sup>7</sup> Naschaawcha as solet, ya senarudsudcha, “Ay kun fiakun i-Galilea chaná am-in ay cha munkarkali? <sup>8</sup> Anuy atun nan tunggal usa kan chitaku ay manngor as nan mismu ay kali takú ay chacha ekarkali? <sup>9</sup> Nan tapina met kan chitaku at i-Partia, i-Media, i-Elam, i-Mesopotamia, i-Judea, i-Capadocia, i-Ponto, i-Asia. <sup>10</sup> Nan tapina pay at i-Frigia, i-Pamfilia, i-Egipto, ya nurpu henan sakop nan Libya ay sag-un nan Cirene. Wachacha us kan chitaku nan i-Roma <sup>11</sup> ay Judio ya fiakun Judio ay mangun-unud as nan inibili ay ukialen chi Judio. Wachachay i-Creta ya i-Arabia. Ngem chungrun takú met challu nan mismu ay kali takú ay chacha ekali ay mangifiabiaag as nan nakaskaschaaw ay enenat Apo Dios!” <sup>12</sup> Naschaawcha am-in as solet, ya nalilifok chi numnumcha ay cha munsesennarudsud, “Anan laychun ngun tonay' kanan?”

<sup>13</sup> Ngem nan chiyucha tapina ay tataku at enot-otyokcha nan chiyucha omaafurot kan Jesus. Kenalicha, “Ku-uncha man nunkafutang.”

### *Nan Enkasaban Pedro*

<sup>14</sup> Ngem tenmakchug hi Pedro ya nan hinpuru ya usa ay iib-ana ay apostoles. Angkiay kenalen Pedro ay nangipigsa as nan ongor ay tataku, “Iib-ak ay Judio ya am-in kayu ay umiili hena ad Jerusalem, chumngor kayu man paat as nan epakaawatku maepangkep kan chatona am-in. <sup>15</sup> Chaan nafutang chaná ay tataku ay kaman as nan ka-ananyu, tay maid mafutang as nan uras chi alas nuebe as nan wiet. <sup>16</sup> Ngem nauy nan kenalen Joel ay pomapadtu:

<sup>17</sup> ‘Infiakan Apo Dios,

As nan chiyucha anongos ay urkiw, sonakoktu nan Espiritok as nan am-in ay tataku. Nan an-akyu ay lanaraki ya fianafiai at epadtuchantu nan epakaammok kan chicha. Nan fiafiallu at ilauchantu nan

\* <sup>2:1</sup> Nan Pentecostes at maeakaleman puru ay urkiw nunlapu as nan Fiestan chi Munlausán.

chiuyucha kaman iitaw. Kun pay nan anam-amá at epaiitawkuntu nan laychok ay epakaammu kan chicha.

- 18 O, uray as nan chiuyucha lanaraki ya fianafiai ay fiabfiaarok at son-akotu nan Espiritok as nan hanacha ay urkiw, ya chichantu nan mangepadtu as nan epakaammok kan chicha.
- 19 Omepailaaktu as nakaskaschaaw ad chaya. Uray asna's luta at ome-pailaaktu as sinyar ay chara, apuy ya mun-alepotapot ay asok.
- 20 Nan urkiw at ngomongottu, ya nan furan at komaman as chara. Chatosa nan ommat sakbay omali nan am-amud ya machayaw ay urkiw nan Apo.

21 Angkiay ya am-in ay munpasug-ang as nan Apo at maesarakanchantu.' †

22 Inturuy pay Pedro, "Iib-a ay kianak Israel, chumngor kayu as nan ifiakiak. Hi Jesus ay i-Nazaret nan finaor Apo Dios. Penaneknekan Apo Dios na kan chakayu babaen as nan ongor ay enpakamkamana kan Jesus ay milagro, nakaskaschaaw ya sinyar. Ammuyu sa, tay enommat chaná hena's kawad-anyu. 23 Hi Jesus ay anna at ad pus-uy, plenaplanon ya sikud ay ammon Apo Dios mismu ay maipurang kan chakayu. Chakayu at enpapatuyyu hiya as nan manangotettet chi ukialicha ay tataku as nan nangelansaancha kan hiya as nan koros. 24 Ngem tenakon Apo Dios hi Jesus manipud as nan utúy, ya wenayawayayaana hiya as nan pannakafialin chi utúy, tay achi poros mafialin ay nan utúy nan mangetoray kan hiya. 25 Tay nauy nan infiakian David maepangkep kan Jesus:

'Kanayon ay iilaok nan Apo ay wacha kan ha-un. Kiapú ta as-op as solet hiya ay mamadfiachang kan ha-un, achiyak umugyat.

26 Isunga naragsakak as solet, ya ifiakiak nan lagsakku. Uray matuy nan achorku, wacha nan namnamaok,

27 tay ammok ay achim enganganuy nan lenawak ad Hades† winnu eparufus ay mabrok nan anchor nan Nasantowan as nan lufok.

28 Enpakaammom kan ha-un nan charan ay muntoróng as nan fiyag ay maid patingkiana. He-a nan mangeparagsaktu as solet kan ha-un kiapú ta mawawachaka kan ha-un.'§  
Hiyasa nan kenalen Ari David.'

29 Inturuy pay Pedro, "Chakayu ay iib-a, laychok ay epakaammu ay ustu nan maepangkep as nan ama takú ad pus-uy ay hi Ari David. Natuy hiya, at nailufok, ya inkiana ad wani at wacha hena nan lufokna. 30 Ngem kiapú ta usa hiya ay pomapadtu, ammunan enkaren Apo Dios kan hiya ay mun-ikianak hiya as usa ay ari ay kaman kan hiya. 31 Aammon David nan atun Apo Dios as tapen chi urkiw, ya infiakiana nan maepangkep as nan matakuan Cristo manipud as nan utúy ay chaan naenganuy nan lenawana ad Hades winnu nabrok nan achorna. 32 "Hi Jesus ay anna at tenakon Apo Dios manipud as nan utúy, ya chakami am-in nan mangepaneknek, tay inilami. 33 Naetag-uy hi Jesus ad chaya as apét kannawan Apo Dios. Inchat Dios Ama kan hiya nan toray ay mangsonag as nan Espiritu Santo kan chakami ay kaman as nan enkarina. Chatona nan chayu il-ilaun ya chungchungrun ad wani. 34 Tay chaan naetag-uy hi David ad chaya. Uray mu hiyachi, kanana,

'Nan kanan nan Apo as nan Apok at tomokorka as apét kannawanku

† 2:21 Joel 2:28-32    ‡ 2:27 Ad Hades nan kawad-an nan nunkatuy.    § 2:28 Sal. 16:8-11

35 inkiana amisok nan chiyuycha kafusormu ay kaman chicha nan kiakiati-nam.\*

36 Isunga chakayu am-in ay kianak Israel, masapor siguradu ay maam-muwanyu ay hi Jesus ay anna ay penatuyyu as nan nangepalansaanyu as nan koros at hiya nan nunfialinun Apo Dios as Apo ya Cristo.”

<sup>37</sup> Kun pay chinngor nan tataku sa, nalilifokancha as solet, ya kanancha kan Pedro ya as nan tapina ay apostoles, “lib-a, anan atunmi ngay ngarud?”

<sup>38</sup> Tinumfor hi Pedro kan chicha, “Tunggal usa kan chakayu at munfiafiawi as nan fiasfiasorna ya munpafunyag ay mangepakaammu ay hi Jesu Cristo nan Apona<sup>†</sup> ta mapakawan kayu as nan fiasfiasoryu. Mu atunyu sa at maawatyuntu nan ichat Apo Dios kan chakayu ay hiya nan Espiritu Santo.

<sup>39</sup> Tay nan enkaren Apo Dios at para kan chakayu ya as nan kianakyu ya as nan am-in ay tataku henan achawwi ay luglukiar. O, nan enkarina at para as nan am-in ay piliyun nan Apo ay Dios takú.”

<sup>40</sup> Ongor pay nan tapina ay kenarkalen Pedro ay nanukutukun kan chicha ya finag-ana chicha, “Esarakanyu koma nan achoryu as nan chusantu nan tataku ad wani ay manangotettet chi ukialicha ay mangachi kan Jesus.” <sup>41</sup> Angkiay ya nan chiyuycha emmafurot as nan kenalen Pedro at nunpafunyagcha. Umuycha as turon lifu nan naetapi as nan omaafurot kan Jesus as nan hiyachi ay urkiw. <sup>42</sup> Enpanaaagcha ya inunudcha nan insuron nan apostoles, ya tenatanudcha ay makekadkadwa as nan tapina ay omaafurot. Nakekkekancha us kan chicha as nan tenapay ay hiyasa nan mangnumnumnumancha as nan natuyan Jesus, ya nun-us-usacha ay nunkarkararag.

### *Nan Panagfiyag Nan Omaafurot*

<sup>43</sup> As nan hiyachi, naschaawcha am-in nan tataku, ya kiapú as nan pan-nakafialin Apo Dios ay inchatna as nan apostoles, ongor nan nakaskaschaaw ya sinyar ay en-enatcha. <sup>44</sup> Inturturuy am-in nan omaafurot ay cha maam-among, ya nun-eennettancha as nan am-in ay wacha kan chicha.

<sup>45</sup> Enlakucha nan lutacha ya nan tapina ay kuk-uwacha. Angkiay inchatcha nan lakuna as nan am-in ay omaafurot ay makasapor. <sup>46</sup> Inurkiw ay inturturuycha ay maam-among as nan fiattaw nan Templo. As nan mun-ub-ufongancha us as ab-afongcha at naragsakcha ya napakumbabacha ay mangan as nan tenapay ay hiyasa nan mangnumnumnumancha as nan natuyan Jesus. <sup>47</sup> Kuncha pay naamong, chinachayawcha hi Apo Dios, ya rinisrispiton nan tataku chicha. Inurkiw ay entapen Apo Dios kan chicha nan chiyuycha fierú ay naesarakan.

## 3

### *Nan Enmammayan Nan Usa'y Pilud*

<sup>1</sup> As nan hin-urkiw, tinmikid cha Pedro kan Juan as Templo as nan alas tres as nan makiayud ay hiyasa nan munkarkarakian chi Judio. <sup>2</sup> Wacha nan usa ay laraki ay naiyanak ay pilud ay nangatokor as nan Templo as nan sag-un nan sugpan ay makali un Am-ammay. Inurkiw ay maokwat hiya ay maiyuy hid-i ta munlemos as nan chiyuycha sungkop. <sup>3</sup> Kuna pay inila cha Pedro kan Juan ay uy sungkop as Templo, nunlemos kan chicha. <sup>4</sup> Entoongan

---

\* <sup>2:35</sup> Sal. 110:1      † <sup>2:38</sup> As nan kali ay Griego at kanana, “mafundayakan kayu as nan ngachan Jesus,” 10:48.

cha Pedro kan Juan hiya, ya kanan Pedro, "Ilaum chakami." <sup>5</sup> Isunga inilana chicha ay maman-ud as ichatcha.

<sup>6</sup> Angkiay ya kenalen Pedro, "Maid poros sipingku. Ngem nan wacha kan ha-un at hiya nan ichatku kan he-a. Babaen as nan pannakafialin nan ngachan Jesus ay i-Nazaret, manaranka." <sup>7</sup> Angkiay ya inunnan Pedro nan kannawan ay liman nan laraki ay pilud ya finadngana hiya ay tomakchug. Hiya at chi ya kinumnugcha nan suken nan pilud. <sup>8</sup> Natannakchug, ya enlapuna ay manaran. Haat makiskop hiya kan cha Pedro kan Juan as Templo. As nan chana manarcharanan, cha muntattat-allok ya munchaychayaw kan Apo Dios. <sup>9</sup> Inilan am-in nan tataku hiya ay cha manarcharan ya cha munchaychayaw kan Apo Dios. <sup>10</sup> Kuncha pay emmatonan ay hiya payat nan nangatokor ay munlemos as nan Templo as nan sag-un nan sugpan ay makali un Am-ammay, naschaawcha as solet as nan enommat kan hiya.

### *Nan Enkasaban Pedro As Templo*

<sup>11</sup> As nan hiyachi, penmapakud nan enmammay ay laraki kan cha Pedro kan Juan. Tenmagtag am-in nan tataku as nan kawad-an cha Pedro kan Juan henan makalí un Fiangsar Solomon, tay naschaawcha as nan enommat as nan chiyuy pilud. <sup>12</sup> Kun pay inilan Pedro nan tataku, kenalina kan chicha, "Chakayu ay iib-ak ay kianak Israel, adchi t'uy kayu maschaaw as na? Adchi t'uy chakami etotoongan? Ay kananyu un nan mismu ay kafaelanmi winnu ustu ay panagchayawmi nan nangepacharan kan tona ay taku?" <sup>13</sup> Hi Apo Dios ay Dios cha Abraham, Isaac ya Jacob ay kaap-uwan takú nan nangepacharan kan hiya, fiakun chakami ta maila nan kaichayawan Jesus ay fiabfiaaruna. Hi Jesus ay anna at hiya nan inpurangyu kan Gobernador Pilato. Enachiyu pay hiya as nan sangwanan Pilato uray mu plenanuna ay ilufus hiya. <sup>14</sup> Ngem enachiyu hiya ay nasantowan ya nalintig, ya chinawatyu kan Pilato ay ilufusna nan usa ay pomapatuy. <sup>15</sup> Enpapatuyyu nan mangichat as tit-iwa ay fiyag, ngem tenakon Apo Dios hiya manipud as nan utý. Chakami ngarud nan mangepaneknek as nan maepangkep as na, tay inilami. <sup>16</sup> Kiapú as nan pannakafialin nan ngachan Jesus, finmikas nan nauy laraki ay iilaunyu ya am-ammuyu. O, kiapú as nan pannakafialin nan ngachan Jesus ya pammati kan hiya, nakaan nan piniludna ay hiyasa nan iilaunyu am-in.

<sup>17</sup> "Ad wani chakayu ay iib-a, ammok ay achiyu maawatan ay hi Jesus nan Cristo as nan nangepapatuyanyu kan hiya. Kaman us nan anap-apuyu at achicha maawatan. <sup>18</sup> Nan enatyu kan Jesus at hiyasa nan natongparan nan enpaepadton Apo Dios as nan am-in ay pomapadtu ay hi Cristo at masapor mun-iliwas ya matuy. <sup>19</sup> Isunga munfiafiawi kayu as nan fiasfiasoryu, ya munfiangad kayu kan Apo Dios ta pakawanuna chakayu as nan fiasfiasoryu. <sup>20</sup> Tay mu atunyu na, wachantuy mangepapigsaantu Apo Dios as nan numnumyu. Ifiaornantu kasin nan chinutokana ay hi Jesus ay hiya nan Cristo ay mangesarakan ya mangetoray as nan am-in ay omafurot kan hiya.\* <sup>21</sup> Masapor mayaschi hi Jesus ad chaya inkiana umchan nan timpu ay mangepafiaruwan Apo Dios as nan am-in ay enpaepadtuna as nan chiyucha nasantowan ay pomapadtu ad pus-uy. <sup>22</sup> Hi Moises at kenalina un,  
"Hi Apo Dios at somnagtua as usa ay pomapadtu ay kaman kan ha-un ya murpu kan chakayu ay Judio. Masapor epanaagyu ya tongparunyu nan am-in ay ifiakiana kan chakayu."

\* **3:20** Mat. 24:14; Mar. 13:10; 2 Ped. 3:12

<sup>23</sup> Mu wachay achi mangtongpar as nan ifiakian nan hana ay pomapadtu, maisiyantu hiya as nan tatakon Apo Dios, ya machusantu hiya inkiana.<sup>†</sup>

<sup>24</sup> Am-in nan pomapadtu patí hi Samuel ya nan chiyuycha senmokat kan hiya at enkasabacha us nan cha om-ommat as nan nauycha urkiw ad wani.

<sup>25</sup> Chitaku am-in nan manawid as nan enkaren Apo Dios ay enpaepadtuna as nan chiyuycha pomapadtu, ya maetapi kayu as nan inturag Apo Dios as nan kaap-uwanyu. Tay kenalina kan Abraham un, ‘Babaen as nan kianakmu, bendisyonak am-in nan tataku asna’s luta.’<sup>‡</sup> <sup>26</sup> Isunga, chakayu ay Judio nan enmon-ona ay nangifiaoran Apo Dios kan Cristo ay fiabfiaaruna ta bendisyonana chakayu babaen as nan mangchukkiananyu as nan mangotettet ay panagfiyagu.”

## 4

### *Nan Naifiaruchan Cha Pedro Kan Juan*

<sup>1</sup> Kun pay kutug ay cha munkarkali cha Pedro kan Juan as nan tataku, enmali kan chicha nan papachi, nan kapetan chi kukuwarcha as nan Templo ya nan chiyuycha Saduceo. <sup>2</sup> Finzungatcha, tay insuron cha Pedro as nan tataku nan maepangkep kan Jesus ya enkasabacha ay nataku hiya manipud as nan utúy ay hiyana nan mangpaneknek ay matakam am-in nan nunkatay. <sup>3</sup> Angkiay ya tiniliwcha cha Pedro kan Juan, at enpaifiarudcha inkiana as nan kafikiatana, tay naschum at. <sup>4</sup> Ngem ongor as nan chiyuycha nangor as nan kenalen cha Pedro kan Juan nan enmafurot. Nan filang nan lanaraki ay enmafurot kan Jesus at umuy as leman lifu.\*

<sup>5</sup> As nan kafikiatana, nan chiyuycha membron nan Sanhedrin ay chicha nan anap-apu, nan anam-amá ya nan mun-isursuru as Lintig at naa-mongcha ad Jerusalem. <sup>6</sup> Nakimitincha kan Anas ay hiya nan kangatuwan ay pachi, ya kan cha Caifas, Juan ay nurpu as nan pamilyan Anas, Alejandro ya nan tapina'y lanaraki as nan pamilyan nan kangatuwan ay pachi. <sup>7</sup> Enpatakchugcha cha Pedro kan Juan as nan sangwanancha, ya finistikiar-chicha. Kenalicha, “Ngachana nan nurpuwan nan pannakafialin ay nangepaammay as nan nauy napilud? Ngachana nan nakin kalibfengan as nangekamananyu’s na?”

<sup>8</sup> Hi Pedro at napnu as pannakafialin nan Espiritu Santo, ya tinumfor hiya kan chicha, “Chakayu ay totoray ya anam-amá, <sup>9</sup> mu fistikiarunyu chakami ad wani maepangkep as nan ammay ay enaenatmi as nan napilud ya mu anan enatna ay nakacharan, nauy ifiakiami kan chakayu. <sup>10</sup> Masapor ngarud maammuanyu am-in ya am-in us ay kianak Israel ay babaen as nan pannakafialin nan ngachan Jesu Cristo ay i-Nazaret at enmammay nan nauy laraki ay nangatakchug as nan sangwananyu. Hi Jesu Cristo at hiya nan enpalansayu as nan koros ay tenakon Apo Dios manipud as nan utúy. <sup>11</sup> Hi Jesus nan maepachong as nan nauy naisurat as nan Kalen Apo Dios ay kanana un, ‘Nan chiyuy fiatu ay enachen nan chiyuycha muntuptuping at hiyasa nan nunfialin as kaamuchan ay maipugnad.’<sup>†</sup>

<sup>12</sup> Hiya yangkiay nan mafialin ay mangesarakan as nan tataku, tay maid poros tapina asna’s luta ay infiaor Apo Dios ay mangesarakan kan chitaku mu achi yangkiay hiya.”

† <sup>3:23</sup> Deut. 18:15, 18-19; Ara. 7:37    ‡ <sup>3:25</sup> Gen. 22:18    \* <sup>4:4</sup> Ara. 2:41    † <sup>4:11</sup> Sal. 118:22; Isa. 28:16

<sup>13</sup> Kun pay inilan nan chiyuycha membron nan Sanhedrin nan kenaturud cha Pedro kan Juan ay tumfor, ya as nan nangammuwancha ay kun apapud ay tataku cha Pedro kan Juan ay chaan nakaachar, naschaawcha. As nan hiyachi, enmatonan nan anap-apu cha Pedro kan Juan ay chicha nan naktuntun-ud kan Jesus. <sup>14</sup> Ngem kiapú ta iilauncha nan laraki ay nakaan nan piniludna ay naketatakchug kan cha Pedro, maid at makanancha ay maekontra kan chicha. <sup>15</sup> Isunga enpak-akcha cha Pedro kan Juan as nan munmitmitinan nan Sanhedrin, at enapatcha mu anan atuncha kan chicha. <sup>16</sup> Nunsenennarudsudcha, “Anan atun takú ngun kan chatona ay lanaraki? Chakus met naammuwan nan am-in ay umili ad Jerusalem nan nauy nakaskaschaaw ay enatcha, ya achi takú met maesaot. <sup>17</sup> Ngem ad wani ta achi maiturturuy ay maiwaras na ay chamag as nan tataku at ugugyatun takú chicha ta achicha kasin os-osarun nan ngachan Jesus as nan munkarkaliyancha as nan tataku.” <sup>18</sup> Angkiay ya kasincha enayakian cha Pedro kan Juan, ya inflinchka kan chicha, “Ikinakyu at man ay fukfukikun winnu isurusuru nan maepangkep as nan ngachan Jesus.”

<sup>19</sup> Ngem tinumfor cha Pedro kan Juan, “Chakayu nan mangifiakia mu ustu kan Apo Dios ay chakayu nan tongparunmi, fiakun hiya, <sup>20</sup> tay achimi mafialin ay ikinak ay mangifiaag as nan inilami ya chinngormi kan Jesus.”

<sup>21</sup> Kun pay kasiñ inug-ugyat nan chiyuycha membron nan Sanhedrin chicha, enparufuscha chicha ay mak-ak. Achicha ammu nan atuncha ay manusa kan chicha, tay am-in nan tataku at chacha munchaychayaw kan Apo Dios kiapú as nan nakaskaschaaw ay enommat. <sup>22</sup> Tay nan laraki ay enommattan nan nauy ay nakaskaschaaw ay pannakapaammay at nasorok as opat puru nan tawwuna.

### *Nan Luwaron Nan Omaafurot*

<sup>23</sup> Kun pay nailufus cha Pedro kan Juan, nunfiangadcha as nan kawadan nan kakadwacha, at enpachamagcha nan kenarkalen nan anap-apon chi papachi ya nan anam-amá. <sup>24</sup> Kun pay chinngor nan kakadwacha nan nauy, nun-us-usacha ay nunkararag kan Apo Dios. Kenalicha, “Mannakafialin ay Apo Dios, he-a nan namayang henan chaya ya luta ya nan chanum ya am-in ay wacha kan chicha.<sup>‡</sup> <sup>25</sup> Babaen as nan Espiritu Santo, enpaifiakiam kan David ay kaap-uwanmi ay fiabfiaarum un,

‘Adchi t’uycha fumufungat nan chiyuycha Gentil ay mangkontra kan Apo Dios? Adchi t’uy cha planplanuwun nan chiyuycha Judio nan maid kotkotokna?

<sup>26</sup> Nunsakiana ay makikufiat nan ar-ari asna’s luta, ya naamong nan anap-apu ay mangkufiat kan Apo Dios ya kan Cristo ay pinilina.’<sup>§</sup>

<sup>27</sup> Natongpar nan insurat David, tay henan nauy siyudad ay Jerusalem at nakeamong cha Ari Herodes ya hi Poncio Pilato as nan chiyuycha Gentil ya nan chiyuycha kianak Israel ta kontrauncha nan nasantowan ay fiabfiaarum ay hi Jesus ay pinilem. <sup>28</sup> Naamongcha ay mangekaman as nan am-in ay enkeddengmu ay ommat kiapú as nan laychum ya pannakafialinmu. <sup>29</sup> Ad wani Apo, chungrum man paat nan chacha iyug-ugyat kan chakami. Fiadngam chakami ay fiabfiaarum ta tumurud kami ay uy mangepakaammu as nan kalem. <sup>30</sup> Epailam man paat nan pannakafialinmu ta mafialin ay omammay nan munsaket, ya maekaman nan chiyuycha sinyar ya nan

<sup>‡</sup> [4:24](#) Exo. 20:11; Neh. 9:6; Sal. 146:6      <sup>§</sup> [4:26](#) Sal. 2:1-2

chiyuycha nakaskaschaaw babaen as nan pannakafialin ay inchat Jesus ay nasantowan ay fiabfiaarum.”

<sup>31</sup> Kuncha pay narpas ay nunkararag, nunwawud nan afong ay naaamon-gancha. Waschi un napnu as Espiritu Santo, ya tinmurudcha ay nangi-warakiawag as nan kalen Apo Dios.

### *Nan Nun-us-usaan Nan Am-in Ay Omaafurot*

<sup>32</sup> As nan hiyachi, am-in nan omaafurot kan Jesus at nun-us-usacha as nan numnum ya pusucha. Maid kan chicha nan nangali un fukchana nan uray ngachana as nan kuk-uwana, ngem kuncha at nun-eennettan as nan am-in. <sup>33</sup> Babaen as nan pannakafialin Apo Dios, inturturuy nan apostoles ay mangepaneknek as nan maepangkep as nan natakuwan Apo Jesus manipud as nan utúy. As nan hiyachi, benendisyonan Apo Dios as solet chicha am-in. <sup>34</sup> Maid usa kan chicha as namaichan as kasaporana, tay nan chiyuycha wachay luta ya ab-afongcha at enlakucha chasa ay kuk-uwacha. Kun pay narpas, inyalicha nan lakon nan hanacha <sup>35</sup> as nan apostoles ay nangepakchang as nan chiyuycha makasapor.

<sup>36</sup> Assesa us nan enat Jose ay kianak Levi ay i-Chipre. Ngenadnan nan chiyuycha apostoles hiya as Bernabe. (Nan laychuna ay kanan at “Anak ay Lumiwiwa.”) <sup>37</sup> Enlakuna nan usa ay payyiwna, at inyuyna nan lakuna as nan apostoles.

## 5

### *Nan Enat Cha Ananias Kan Safira*

<sup>1</sup> Ngem wacha nan hen-asawa ay cha Ananias kan Safira ay nangelaku as tapen nan lutacha. <sup>2</sup> Intupug Ananias nan tapen nan lakuna ay aammon asawana, ya inyuyna nan tapina yangkiay as nan apostoles.

<sup>3</sup> Ngem kenalen Pedro kan hiya, “Ananias, adchi t'uymu enparufus hi Satanas ay mangetoray kan he-a, t'uymu inkutuman nan Espiritu Santo ya intupugmu nan tapen chi lakon nan lutam? <sup>4</sup> Sakbay elakom nan luta at kuk-uwam met, ya as nan nangelkawm as sa, kikiadka met challu as atum as nan lakuna. Adchi ngay ngarud t'uymu ninumnum ay mangekaman as assesa? Fiakun taku nan inkutumam ngem hi Apo Dios.”

<sup>5</sup> Kun pay chinngor Ananias chaná ay kali, nunkakatuy hiya ya natu-ug. Nunsidlay ugyat nan am-in ay nanngor as nan hana. <sup>6</sup> Angkiay ya inmuy nan fiafiallu kan Ananias, at lenekfotancha hiya. Hacha at ipitiw ay uy nangilufok.

<sup>7</sup> Kun pay inmuy chi turu ay uras, enmali hi asawan Ananias ya sinungkop ay achina ammu nan enommat. <sup>8</sup> Angkiay kenalen Pedro kan hiya, “Ifiakiam kan ha-un, ay hiyana kayong nan ustу ay lakon nan lutayu?”

“O-ya hiyasa,” ensongfiat Safira. <sup>9</sup> Ngem kenalen Pedro kan hiya, “Anuyyu payat nunturakian ay hen-asawa ay manisting as nan Espiriton Apo Dios? Ilaum, nan chiyuycha nangilufok kan asawam ad kianad at hanacha as pantiw, ya uy chaká us ilufok kan chicha.” <sup>10</sup> Nunkakatuy hi Safira ya natu-ug as nan suken Pedro. Kun pay sinungkop nan fiafiallu, ya ininchanchancha ay nanatuy hi Safira, inpitwcha ay uy nangilufok kan hiya as nan sag-un asawana. <sup>11</sup> Nunsidlay ugyat nan am-in ay omaafurot ya am-in nan tapina ay nanngor as nan enommat.

### *Nan Nakaskaschaaw Ay En-enat Nan Apostoles*

<sup>12</sup> As nan hiyachi, ongor nan en-enat nan apostoles ay sinyar ya nakaskaschaaw as nan tataku. Tenatanud am-in nan omaafurot ay naam-among as nan makali un Fiangsar Solomon as Templo. <sup>13</sup> Maid naturud as nan chaan enmafurot kan Jesus ay maetapi kan chicha. Ngem uray mu hiyasa, rinispitucha challu nan nauycha omaafurot. <sup>14</sup> Enmongoongorcha us nan naetapi ay lanaraki ya fianafiai ay enmafurot kan Jesus. <sup>15</sup> Kiapú as nan en-enat nan apostoles, nan chiyuycha munsaket at inyuy nan tataku as nan korsa, ya enpapab-ugcha as nan inyapragcha ta as nan mar-osan Pedro at paat maaiwan koma nan tapina kan chicha. <sup>16</sup> Nanongoongor us ay tataku ay nurpu henan am-in ay ili ay nangliliwus ad Jerusalem at inyalicha nan chiyuycha munsaket ya nunkaanennetan, at enmammaycha am-in.

### Nan Liglikiat Nan Apostoles

<sup>17</sup> As nan hiyachi, nan kangatuwan ay pachi ya nan am-in ay kakadwana ay Saduceo at enmaposcha as solet. <sup>18</sup> Isunga enpatiliwcha nan apostoles, at inpaifiarudcha chicha. <sup>19</sup> Ngem as nan lafi, enmali nan anghel Apo Dios, ya tenkafiana nan pantiw nan pagfiaruchan, at inpitiwna chicha. Kenalina kan chicha, <sup>20</sup> “Uy kayu as Templo ya ifiakiayu as nan tataku nan maepangkep as nan nauy fieru ay fiyag.” <sup>21</sup> Enafurot nan apostoles nan kenalina. As nan nakapis, innuycha as Templo, ya enlapucha ay nun-isuru as nan tataku.

Kun pay naaw-awni, as nan emmaliyan nan kangatuwan ay pachi ya nan kakadwana as Templo, enpaayagcha am-in nan am-in ay membron nan Sanhedrin ay chicha nan anap-apon chi Judio ya nan anam-amá ay Judio ta munmimitincha. Hacha at ifiaor nan kukuwarcha ay umuy as pagfiaruchan ay mangiyuy as nan apostoles kan chicha. <sup>22</sup> Ngem as nan inumchanancha as pagfiaruchan, maidcha at nan apostoles. Isunga nunfiangadcha ya en-pachamagcha as nan chiyuycha membron nan Sanhedrin nan maepangkep as na. <sup>23</sup> Kenalicha, “As nan inumchananmi, kutug ay naetotorfek nan pagfiaruchan, ya wachacha am-in nan nunkukuwarcha ay nangatackhug as nan pantiw. Ngem kunmi pay tenkafian, maid tagtakuwan as fieruy.”

<sup>24</sup> Kun pay chinngor nan kapetan nan kukuwarcha as Templo ya nan anap-apon chi papachi nan nauycha naifiakia, nalilifokancha as solet mu anan enommat as nan apostoles.

<sup>25</sup> Angkiay ya wacha at nan emmali ay nurpu as nan kawad-an nan Templo, ya kanana kan chicha, “Chumngor kayu! Nan lanaraki ay infiarudyu at wachacha as Templo ay cha mun-is-isuru as nan tataku.”

<sup>26</sup> Kuncha pay chinngor sa, innuy nan kapetan ya nan kukuwarcha ay uy ngagara kan chicha. Ngem chaancha kinuyud chicha, tay umugyatcha as nan mangkiayangan nan tataku kan chicha.

<sup>27</sup> Kuncha pay inyali nan apostoles, enpatakchugcha chicha as nan sang-wanan nan Sanhedrin, ya finistikiar nan kangatuwan ay pachi chicha.

<sup>28</sup> Kenalina, “Ilurugtokyu! Infilini met ay ustu kan chakayu ay achi kayu mun-is-isuru babaen as nan kalibfengan nan nauy ay ngachan. Ilaunyu, nunchinamag at henan intiru ay Jerusalem nan insursuruyu, ya chakami at nan uyyu pafiasorun as nangpatuy kan hiya.”

<sup>29</sup> Ngem tinumfor hi Pedro ya nan tapina ay apostoles, “Masapor hi Apo Dios nan tongparunni, fiakun nan tataku. <sup>30</sup> Nan Apo Dios ay chinay-chayaw nan kaap-uwan takú at tenakuna hi Jesus ay penatuyyu as nan nangepalansaanyu as nan koros. <sup>31</sup> Hiya nan entag-uy Apo Dios as apét kannawana. Nunfialinuna hiya as Muntoray ya Omesarakan. Enat Apo

Dios chi ta wachay chansan nan chiyuycha kianak Israel ay munfiafiawi ya mapakawan as nan fiasfiasorcha.<sup>32</sup> Chakami nan mangepaneknek ay tit-iwa chaná. Assesa us as nan Espiritu Santo ay inchat Apo Dios as nan chiyuycha mangtongpar kan hiya.”

<sup>33</sup> Kun pay chinngor nan chiyuycha membron nan Sanhedrin nan hana kenalen cha Pedro, finmungatcha as solet, ya laychuncha ay patayun nan apostoles. <sup>34</sup> Ngem wacha kan chicha nan usa ay Fariseo ay nan ngachana at Gamaliel ay mun-isursuru as Lintig ya rispituwun am-in nan tataku. Temakchug hiya, ya finilina nan kukuwarcha ay epapitiwcha nan apostoles as hen-omaketan. <sup>35</sup> Angkiay ya kenalina as nan chiyuycha membron nan Sanhedrin, “Chakayu ay iib-ak ay kianak Israel, il-ilaunyu nan atunyu kan chatosa ay tataku. <sup>36</sup> Tay ad kasin, wacha hi Teudas ay nangali un usa hiya ay nangatu ay taku. Umuy as opat kiasot ay tataku nan naetapi ay inmunud kan hiya. Ngem napatuy hiya, ya am-in ay inmun-unud kan hiya at nasisiyancha, ya maid nunfianakian nan insursuruna. <sup>37</sup> Kun pay narpas sa, wacha us hi Judas ay i-Galilea as nan timpon nan munsensosan as tataku. Ongor chi nunfialinuna as pasorotna ay nangkuru as nan goberno. Uray hiya at napatuy ya nasisiyancha us nan inmun-unud kan hiya. <sup>38</sup> Isunga ad wani, ifiakiak kan chakayu ay kunyu at man ukiayun chicha. O, yasa ta kikiadcha. Tay mu as nan numnum nan tataku nan nurpuwan nan chacha at-atun winnu planplanuwun, achi maturuy. <sup>39</sup> Ngem mu kan Apo Dios nan nurpuwana, achi kayu makaamis kan chicha, tay anaka ya kunyu at lawá kontraunu hi Apo Dios.”

<sup>40</sup> Inyafudcha nan hana kenalen Gamaliel. Kuncha pay enpaayag kasin nan apostoles, enpasapletcha chicha. Angkiay ya finilinchha chicha ay achicha kasin os-osarun nan ngachan Jesus as nan munkarkaliyancha as nan tataku, ya influfuscha chicha.

<sup>41</sup> As nan nanaynanan nan apostoles as nan chiyuycha membron nan Sanhedrin, nunlagsakcha, tay infilang Apo Dios chicha as maekari ay maetapi ay mun-iliwas as pannakaifiafiaiñ kiapú kan Jesus. <sup>42</sup> Inurkiw ay wachacha as nan fiattaw nan Templo ya as nan tukutukún ay afong. Inturturuycha ay nangisursuru ya nangekaskasaba ay hi Jesus nan Cristo.

## 6

### *Nan Pitu Ay Napili Ay Fumadfiachang As Nan Apostoles*

<sup>1</sup> As nan nauycha ay timpu, as nan emongoongoran nan omaafurot, nurmuy lilen nan chiyuycha Judio ay munkali as Griego as nan chiyuycha Judio ay munkali as Hebreo. Nunlili nan chiyuycha munkali as Griego, tay nan uycha eellakas at naenganuycha as nan inurkiw ay maiwarasan chi rasyon para as nan chiyuycha makasapor.\* <sup>2</sup> Isunga enayakian nan apostoles nan am-in ay omaafurot ta munmimitincha. Kenalicha, “Achi ustu challu ay enganuymi ay mangekasaba as nan kalen Apo Dios ta chakami nan mangfiachang as nan eellakas. <sup>3</sup> Isunga chakayu ay iib-a, pumili kayu as pitu ay lanaraki kan chakayu ay ammay chi kaap-apatancha ay napnu as pannakafialin nan Espiritu Santo ya kenasilib. Chicha nan chutokanmintu ay mangekaman as nan nauy ay chunu. <sup>4</sup> Mu hiyasa, kunmi yangkiy osarun nan timpumi ay munkarkararag ya mangekaskasaba as nan kalen Apo Dios.”

\* **6:1** Nan naichat ay rasyon at siping winnu makan.

<sup>5</sup> Nan kenalen nan apostoles at penalaylayadna nan am-in ay naamong hid-i. Pinilicha hi Esteban ay laraki ay napigsay pammartinia ya napnu as pannakafialin nan Espiritu Santo ya cha Felipe, Procoro, Niconor, Timon, Parmenos ya hi Nicolas ay Gentil ay i-Antioquia ay mangunud as nan iniili ay ukialen chi Judio. <sup>6</sup> Angkiay ya inuyucha chicha as nan sangwanan nan apostoles ay nangekararag ya nangepatay as limacha as nan uron nan tunggal usa ay napili ta machutokancha ay mangekaman as nan nauy ay chunu.

<sup>7</sup> Isunga kaskasin nunchinamag nan kalen Apo Dios. Enmongoongorcha nan omaafurot ad Jerusalem, ya ontoongorcha us nan papachi ay enmafurot.

### *Nan Natiliwan Esteban*

<sup>8</sup> Hi Esteban ay napnu as bendisyon Apo Dios ya pannakafialin nan Espiritu Santo at ongor chi nakaskaschaaw ya sinyar ay en-enatna as nan tataku. <sup>9</sup> Ngem nan tapina ay Judio ay tatakon nan makali un Senagogan chi Nawayawayaan Ay Tataku ya nan chiyuuya Judio ay i-Cirene, i-Alejandria, i-Cilicia ya i-Asia at nakesosekcha kan Esteban. <sup>10</sup> Ngem chaancha nakasongfiat as nan kenasilib Esteban winnu nan empakalen nan Espiritu Santo kan hiya.

<sup>11</sup> Isunga penasoksokancha nan tapen nan lanaraki ta pafiasoruncha hi Esteban. Kenalicha, “Chinngormi ay nunkali hiya as maifusor kan Moises ya kan Apo Dios.” <sup>12</sup> As nan hiyasa ay enatcha, linumuchay kuru as nan tataku, anap-apu ya mun-isursuru as Lintig. Angkiay tiniliwcha hi Esteban, ya inuyucha hiya as nan chiyuuya membron nan Sanhedrin. <sup>13</sup> Enmayagcha as nunkangutum ay nangpaneknek un, “Hi tonia ay taku at achina ikinak ay cha munkalikalí as maifusor as nan nauy nasantowan ay Templo ya as nan Lintig Moises, <sup>14</sup> tay chinngormi ay kenalina un, ‘Hi Jesus ay anna ay i-Nazaret at paraw-unantu nan nauy Templo, ya sokatana am-in nan chiyuuya iniili ay ukiali ay empatawid Moises kan chitaku.’” <sup>15</sup> Am-in nan chiyuuya nangatokor as nan maam-amongan nan chiyuuya membron nan Sanhedrin at kuncha entotoongan hi Esteban, ya inilacha ay kaman lupan chi anghel nan lupana.

## 7

### *Nan Songfiat Esteban*

<sup>1</sup> Angkiay ya senarudsud nan kangatuwan ay pachi kan Esteban, “Ay tit-iwa chaná ay chacha epabpfiasor kan he-a?”

<sup>2</sup> Tinumfor hi Esteban, “Chakayu ay ib-a ya am-a, chungrunu nan ifiakiak kan chakayu. Hi Apo Dios ay machaychayaw at nunpaila kan apu takú ay Abraham as nan kawad-ana pay laing ad Mesopotamia sakbay uy makiili ad Haran. <sup>3</sup> Kenalen Apo Dios kan hiya, ‘Taynam nan ilem ya nan iib-am, ya umuyka henan luta ay epailak kan he-a.’\* <sup>4</sup> Isunga tenaynana tit-iwa nan lutan chi i-Caldeo ay nakiiliyana, ya uy nagyan ad Haran. Kun pay natuy hi amana ay entatakina, infiaor Apo Dios hiya as nan nauy luta ay umiiliyanyu ad wani. <sup>5</sup> Maid poros empatawid Apo Dios kan hiya hid-i as uray ak-akettuy ay luta. Ngem enkaren Apo Dios kan hiya ay ichatnantu na ay luta ay kuwaunantu ya nan chiyuuya kianakna, uray mu maid pay anakna as nan hiyachi ay nun-ekariyan Apo Dios kan hiya. <sup>6</sup> Nauy nan kenalen Apo Dios kan Abraham, ‘Nan chiyuuya kianakmu at magyanchantu henan lutan

\* <sup>7:3</sup> Gen. 12:1

chi tukún, ya munfialinchantu as mafiabfiaor ya maparpalikiatchantu as opat kiasot ay tawwun. <sup>7</sup> Ngem chusaoktu nan chiyuycha umili hid-i ay mamabfiaortu kan chicha. As nan marpasan chatosa, mak-akchantu as nan hana ay luta, ya chaychayawunak henan nauy ay lukiar.’ † <sup>8</sup> Kenalen pay Esteban, ‘Inchat Apo Dios kan cha Abraham nan filin ay sugyatancha nan an-akcha ay lallaraki ay hiyasa nan sinyar nan inturag Apo Dios kan hiya. Isunga sinugatan Abraham nan pototna ay hi Isaac as nan maekawaru ay urkiw nunlapu as nan naiyankana. Sinugatan Isaac hi Jacob ay pototna. Assesa us nan enat Jacob as nan chiyuycha pototna ay hinpuru ya chuwa ay machaychayaw ay kaap-uwan takú.

<sup>9</sup> ‘Nan chiyuycha kaap-uwan takú ay potot Jacob at enapsancha nan sunúdcha ay hi Jose. Enlakucha hiya ay nunfialin as mafiabfiaor ad Egipto. Ngem nawawacha hi Apo Dios kan Jose, <sup>10</sup> ya ensarakana hiya as nan am-in ay nunliglikiatana. Inchat Apo Dios kan hiyay laing, ya nelaylaychan nan Faraon ay ari ad Egipto kan hiya. Isunga chinutokana hiya as muntoray as nan intiru ay Egipto ya mangenongnongnong us as nan am-in ay kuk uwana.‡

<sup>11</sup> ‘Angkiay ya as nan inumchanan chi fitel as nan intiru ay Egipto ya Canaan, ongor chi likiat nan tataku hid-i, ya maid omor-an nan kaap uwan takú as kanuncha. <sup>12</sup> Kun pay chinngor Jacob ay wachay makan ad Egipto, infiaorna nan kaap-uwan takú ay lomaku as kanuncha. Hiyachi nan emnon-oná ay inmuyancha ad Egipto. <sup>13</sup> As nan maekadwa ay inmuyancha, empakaammon Jose nan maepangkep as nan achorna as nan susnúdna, ya naam-ammon nan Faraon nan pamilyan Jose. <sup>14</sup> Angkiay enpaayag Jose hi Jacob ay amana ya am-in ay pamilyan amana ay omalicha ad Egipto. Piton puru ya lemacha am-in. <sup>15</sup> Inmuy hi Jacob ad Egipto ay hid-i nan natuyana ya nan an-akna ay kaap-uwan takú. <sup>16</sup> Nan achorcha at naiyaton ay naifiangad ad Sikem, ya inlufokcha as nan liyang ay lenakwan Abraham ad pus-uy as nan chiyuycha kianak Hamor.

<sup>17</sup> ‘As nan kiayud umchanan nan timpu ay ommatan nan enkaren Apo Dios kan Abraham ad pus-uy, kaskasin natapiyan nan kaap-uwan takú ad Egipto. <sup>18</sup> Nasennokat chi ari ad Egipto inkiana naesokat nan usa ay ari ay achi nangammu kan Jose.§ <sup>19</sup> Nan chiyuy ay ari at enallilawna ya penarpalikiatna nan kaap-uwan takú ya kun songel kan chicha. Peneletna chicha ay mangenganuy as mutuncha ta kuncha matuy.

<sup>20</sup> ‘Hiyana nan timpu ay naiyankan Moises ay fusfusellan ay onga. Turu ay furan nan nangay-aywanan enana kan hiya as afongcha. <sup>21</sup> Kuncha pay achi maetafun hiya as afongcha, empaiyachawwicha ya tenaynancha hiya. Ngem ininchanan nan fiafiai ay potot nan Faraon ya enpaurúgna hiya as kaman tit-iwa ay anakna.\* <sup>22</sup> Naisursuruwan hi Moises as am-in aykenasilib nan i-Egipto, ya nunfialin hiya as mafifigfig as nan am-in ay infflagfiakiana ya en-enatna.

<sup>23</sup> ‘Kun pay nun-opat puru nan tawwuna, ninumnumna ay uy mangammenamu as nan kakailiyana ay kianak Israel. <sup>24</sup> As nan inmuyana, enasporana nan usa ay kailiyana ay cha palikiatun nan i-Egipto. Inyapanan kayman hiya, ya enes-angna babaen as nan nangpatuyana as nan i-Egipto. <sup>25</sup> Kanan Moises mu maawatan nan kakailiyana ay hiya nan osarun Apo Dios ay mangwayawaya kan chicha, ngem chaancha naawatan. <sup>26</sup> As nan

† 7:7 Gen. 15:13-14; Exo. 3:12    ‡ 7:10 Gen. 37; 39-41

§ 7:18 Exo. 1:8

\* 7:21 Exo. 2:1-10

kafikiatana, as nan nangil-ana as nan chuwa ay kakailiyana ay kianak Israel ay cha munpatuy, penachasna ay mangpakappia kan chatona ay chuwa. Kenalina, ‘Ilb-a, munpachong kayu ay kianak Israel ya, anuy kayu cha munpatpatuy?’

<sup>27</sup> “Ngem nan usa ay namalikiat as nan kailiyana at inturchuna hi Moises, ya kanana, ‘Anan nangchutok kayong kan he-a ay mangetoray ya mangokóm kan chakami? <sup>28</sup> Ku-unak man laychun ay patayun kan he-a ay kaman as nan nangpatuyum ad kugkia as nan usa ay i-Egipto.’<sup>†</sup> <sup>29</sup> Kun pay chinngor Moises na, lenmayaw hiya, ya nagyan ad Midian ay achawwi ay lúkiar. Hid-i nan enmasaw-ana, ya nawad-an hiya as chuwa ay potot ay lanaraki.

<sup>30</sup> “Kun pay inmuy chi opat puru ay tawwun, nunpaila kan hiya nan usa ay anghel as nan cha kumarkiarud ay ek-eket ay kaiw ay wacha henan disyerto as nan sag-un nan Chuntug Sinai. <sup>31</sup> Naschaaw hi Moises as nan chiyuy inilana. Kun pay naesnop hiya ay uy mangemamad, chinngorna hi Apo Dios ay nangali kan hiya un, <sup>32</sup> ‘Ha-un nan Dios nan kaap-uwam, nan Dios cha Abraham, Isaac, ya Jacob.’<sup>‡</sup> Kun pay chinngor Moises chi, penmayagpag hiya kiapú as ugyatna, ya achina at maiturud ay mangila's chi. <sup>33</sup> Kenalen Apo Dios kan hiya, ‘Kaanum nan sapatosmu, tay nan luta ay nangatackchukiam at nasantowan.’<sup>§</sup> <sup>34</sup> Inilak nan maparpalikiat ay tatakok ad Egipto, ya chinngorku nan mun-an-ananaancha kiapú as nan iliwascha. Isunga kenomsopak ay mangwayawaya kan chicha. Aka, ta ifiaorku he-a ay munfiangad ad Egipto.”\*

<sup>35</sup> Inturuy pay Esteban, “Hi Moises ay anna nan enachen nan chiyuycha kianak Israel as nan nangaliyancha un, ‘Anan mangali un he-a nan mange-toray ya mangokóm kan chakami?’ Ngem hiya nan infiaor Apo Dios ta muntoray ya wayawayana chicha babaen as nan fiachang nan anghel ay nunpaila kan hiya as nan cha kumarkiarud ay kaiw. <sup>36</sup> Enpangon Moises chicha ay nak-ak ad Egipto. Ongor nan enkamkamana ay nakaskaschaaw ya sinyar ad Egipto, henan Munchachara ay Fiayfiay, ya kaman us as nan nanarcharanancha henan disyerto as opat puru ay tawwun. <sup>37</sup> Hi Moises ay anna nan nangali as nan chiyuycha kianak Israel un, ‘Hi Apo Dios at umifiaortu kan chakayu as usa ay pomapadtu ay kaman kan ha-un ay murpu as nan kianak Israel.’<sup>†</sup> <sup>38</sup> Hi Moises nan naetatapi as nan kaap-awan takú ay naamong henan disyerto. O, hiya nan wacha kan chicha ya nan anghel ay nunkali kan hiya henan chuntug ay Sinai. Hiya us nan nanawat as nan chiyuycha maid patingkiana ay kalen Apo Dios ay enpatawidna kan chitaku.

<sup>39</sup> “Ngem nan kaap-awan takú at enachicha ay mangtongpar as nan infiagfiakian Moises kan chicha. Kuncha at chinukkian hiya, ya nan ninunumnumcha yangkiay at nan munfiangchana ad Egipto. <sup>40</sup> Kiapú ta nafiyag hi Moises henan chuntug ay Sinai, kenalicha kan Aaron ay pachicha, ‘Mun-ammaka as tapína ay didiosenmi ay mangepangu kan chakami. Nan nauy taku ay hi Moises ay nangek-ak kan chitakú ad Egipto at achi takú ammu nan enommat kan hiya.’<sup>‡</sup> <sup>41</sup> Hiyachi nan timpu ay nunammaancha as didiosencha ay finakfiaka, nun-ichatchatoncha as nan hana ay didiosen, ya nunlagragsakcha ay nunsicha kiapú as nan enammaancha. <sup>42</sup> Ngem chinukkian Apo Dios chicha, ya inukiayna chicha ta uray ud-ay

† **7:28** Exo. 2:13   ‡ **7:32** Exo. 3:6   § **7:33** Exo. 3:5   \* **7:34** 3:1-10   † **7:37** Deut. 18:15; Ara. 3:22   ‡ **7:40** Exo. 32:1

chayawuncha nan taraw ad chaya ay kaman as nan naisurat as nan liblon  
nan chiyucha pomapadtu ay kanana,

‘Chakayu ay kianak Israel, ay ha-un nan enpartiyanyu as animar ya nun-  
ichatonanyu as opat puru ay tawwun ay nanarcharananyu henan  
disyerto?

**43** Fiakun, tay nan intitiinyu at hiya nan fiawi ay naamma as larat ay naipuy-  
an nan didiosenyu ay Moloc ya nan tenartaraw ay makali un Refam.  
Chicha nan didiosen ay enammaanyu ay chinaychayawyu. Isunga  
hiyana nan kiapón nan nangepak-akak kan chakayu ta umuy kayu as  
nan ad-achawwi mu nan Babilonia.’ §

**44** Inturuy pay Esteban, “Nan kaap-awan takú at wacha kan chicha nan  
fiawi ay naamma as larat henan disyerto ay mangepaila ay wacha hi Apo  
Dios kan chicha. Naammaan chi ay maiyunud as nan infilin Apo Dios kan  
Moises ya maiyunud as nan kapadpachong nan inilan Moises. **45** Kun pay  
natuy hi Moises, naesokat hi Josue ay nangepangu as nan kaap-awan takú.  
Nan chiyuy fiawi ay naamma as larat ay tenawidcha at entatakincha henan  
luta ay sinubratcha as nan inmili hid-i ay empak-ak Apo Dios. Nan hana fiawi  
ay naamma as larat at wacha inkiana as nan timpon Ari David. **46** Hi David at  
penalaylayadna hi Apo Dios. As nan hiyachi, chinawat David kan Apo Dios  
mu mafialin ay mun-amma hiya as magyanan nan Dios ay chinaychayaw  
Jacob. **47** Ngem fiakun hi David nan nangamma, kun at nan pototna ay hi  
Solomon.

**48** “Uray mu hiyasa, nan Kangatuwan ay hi Apo Dios at fiakun as nan  
chiuyucha afong ay enammaan chi tataku nan omaafongana ay kaman as  
nan kenalen nan usa ay pomapadtu un,

**49** ‘Ad chaya nan tronok, ya asna’s luta nan kiakiatinak. Anan kaassenan nan  
afong ay ammaanyu para kan ha-un? Ay chaud nan mun-iblayak?

**50** Ay kun fiakun ha-un nan nangamma am-in kan chatona?\*  
Hiyana nan kenalen Apo Dios.”

**51** Inturuy pay Esteban, “Nunsidlay kenasokelyu, ya naturak kayu ay  
manngor as nan kalen Apo Dios! Kun kayu tit-iwa kaman as nan kaap-  
uwanyu ay kanayon ay mangontra as nan Espiritu Santo! **52** Ay wachay uray  
usa as nan chiyucha pomapadtu ay chaan penalikiat nan kaap-uwanyu?  
Maid met. Penatuycha nan chiyucha nangepadtu as nan omaliyan nan  
Nalintig. Ad wani chakayu mismu nan nangesepsep ya nangepapatuy kan  
hiya. **53** Chakayu nan nang-awat as nan lintig ay nurpu kan Apo Dios babaen  
as nan angheslesna ad pus-uy, ngem kunyu challu chaan tenongpar.”

### *Nan Nanglomtakancha Kan Esteban*

**54** Kun pay chinngor nan chiyucha membron nan Sanhedrin nan kenalen  
Esteban, nunngesat nan fiab-acha as fungatcha as solet kan hiya. **55** Ngem  
hi Esteban ay napnu as Espiritu Santo at nuntangad ad chaya, ya inilana  
nan kaichayawan Apo Dios ya hi Jesus ay nangatackhug as apét kannawana.  
**56** Kenalina, “Uy! Ilaunuay kay! Iilaok ay naeelwang ad chaya, ya iilaok nan  
Anak chi taku ay hi Jesus ay nangatackhug as nan apét kannawan Apo Dios.”

**57** Ngem kuncha at kahifufudtak ay nanangpop as ingacha. Angkiay  
kenamucha ay nangarufong kan hiya, **58** at inkiayadcha ay mangek-ak  
henan siyudad ya enlapucha ay manglomtak. Nan chiyucha nuntistigu ay  
nangepafiasor kan hiya at kenaancha nan kakiaycha ya enpad-uncha as nan

laraki ay nan ngachana at Saulo. <sup>59</sup> Kuncha pay cha lomlomtakun hi Esteban, nunkararag hiya. Kenalina, “Apo Jesus, awatum nan lenawak.” <sup>60</sup> Angkiay ya nunpalintumang hiya, ya infukiawna, “Apo, achim ifilang na as fiasor kan chicha.” Kenalina chi, ya natuy.

## 8

### *Nan Namalikiatan Saulo As Nan Chiyuycha Omaafurot*

<sup>1-2</sup> As nan hiyachi, wachacha nan tapen nan manangchaychayaw kan Apo Dios ay uy nangilufok kan Esteban, ya nunsidlay tangugngugcha kiapú as nan natuyana. Hi Saulo at usa ay nangiyafud as nan nangpatuyancha kan Esteban.

As nan hiyasa challu ay urkiw, nunlapu nan maparpalikiatanan as solet nan chiyuycha omaafurot ad Jerusalem. Am-in nan omaafurot hid-i at lenmayawcha ay nasisiyen henan intiru ay Judea ya Samaria omangkiay nan apostoles. <sup>3</sup> Ngem hi Saulo at enlapuna ay mamalikiat as solet as nan am-in ay omaafurot. Sinungsungkop as nan tukutukún ay afong ay nangikuyud as nan lanaraki ya fianafiai ta uyna ifiarud chicha.

### *Nan Nangekaskasabaan Felipe As Nan Ammay Ay Chamag Ad Samaria*

<sup>4</sup> Nan chiyuycha omaafurot ay nasisiyen at inmuycha henan uray ngachana ay luglukiay ay uy nangekaskasaba as nan kalen Apo Dios maepangkep kan Jesus. <sup>5</sup> Hi Felipe nan usa ay inmuy henan usa'y siyudad henan probinsiya ay Samaria, ya enkaskasabana nan maepangkep kan Cristo. <sup>6</sup> As nan nanngoran nanongoongor ay tataku kan hiya ya nangilancha as nan chiyuycha nakaskaschaaw ay sinyar ay enatna, nun-us-usacha am-in ay chinumngor ay ustus as nan kenalina. <sup>7</sup> Nak-ak nan chiyuycha anen-net as nan ongor ay nunkaanennetan ay cha munfugfukiaw, ya ongorcha us nan paralitiko ya nunkapilud ay enmammay. <sup>8</sup> Isunga naragsakcha as solet nan umiili henan nauy siyudad ad Samaria.

<sup>9</sup> Wacha hid-i nan usa ay taku ay nan ngachana at Simon ay somasaromangka ay nun-ekamkaman as naschaawan nan chiyuycha i-Samaria. Enpangasna pay un hiya at usa ay nakaskaschaaw ay taku. <sup>10</sup> Am-in nan tataku hid-i uray ngachanay kasasaadcha at chinumngorcha kan hiya. Kenarkalicha, “Hi tona ay taku at makali un Amud ay Pannakafialin Apo Dios.” <sup>11</sup> O, chinumngorcha ay ustus hiya, tay nafiyag ay penaschaawna nan tataku babaen as nan nunsarsaromangkaana. <sup>12</sup> Ngem kuncha pay enafurot nan enkasaban Felipe ay Ammay ay Chamag maepangkep henan muntorayan Apo Dios ya maepangkep kan Jesu Cristo, nunpafunyagcha, lanaraki ya fianafiai. <sup>13</sup> Uray us hi Simon at enmafurot. Kun pay narpas ay nafunyakian hiya, inturturuya ay inmunud kan Felipe. Naschaaw hiya as nan inilana ay nakaskaschaaw ay sinyar ya milagro ay en-enat Felipe.

<sup>14</sup> Kun pay chinngor nan apostoles ad Jerusalem ay enafurot nan chiyuycha i-Samaria nan kalen Apo Dios, infiaorcha cha Pedro kan Juan ay umuy kan chicha. <sup>15</sup> As nan inumchanancha hid-i, enkararakiancha nan chiyuycha omaafurot ta awatuncha koma nan Espiritu Santo, <sup>16</sup> tay chaan pay emmalí nan Espiritu Santo as nan uray usa kan chicha. Nafunyakiancha yangkiay as nan ngachan Apo Jesus. <sup>17</sup> Angkiay ya as nan nangepatayan cha Pedro kan Juan as nan limacha as nan chiyuycha omaafurot, enawatcha nan Espiritu Santo.

**18** Kun pay inilan Simon ay inchat Apo Dios nan Espiritu Santo babaen as nan nangepatayan nan apostoles as limacha as nan chiyuycha omaafurot, inchawchawnay siping kan cha Pedro kan Juan. **19** Chinawat Simon kan chicha, “Ichatyu man paat na ay pannakafialin kan ha-un ta mu ngachana nan mangepatayak as limak at urum ya maawatna nan Espiritu Santo.”

**20** Ngem tinumfor hi Pedro kan hiya, “Maetapi koma nan sipingmu kan he-a ay mapuoran ad inferno, tay kunmu ka-anan un malakwan chi siping nan ichat Apo Dios. **21** Maid fiyangmu as nan chunumi, tay achi ustу nan numnummu as nan mangilan Apo Dios. **22** Isunga munfiafiawika as nan mangotettet ay ninumnummu, ya munkararagka kan Apo Dios ta mu mafialin koma at pakawanun chaká as nan hana mangotettet ay pangkepmu. **23** Tay nan mailak at nangapposka as solet ya kamanka nafiafiarud babaen as nan fiasormu.”

**24** Angkiay ya tinumfor hi Simon, “Ekararakianak man paat as nan Apo ta achi challu maekaman kan ha-un nan kenaliyu.”

**25** Kun pay lenpas cha Pedro kan Juan ay nangepaneknek as nan maepangkep kan Jesus ya nangekasaba as nan kalen Apo Dios, nunfiangadcha ad Jerusalem. As nan chacha marmar-osan henan ongor ay fiabruy ad Samaria, enkaskasabacha nan Ammay ay Chamag.

### *Hi Felipe Ya Nan Opisyar Ay I-Etiopia*

**26** As nan hiyachi, nunpaila kan Felipe nan usa ay anghel Apo Dios, ya kanana kan hiya, “Maligwatka, ya umuyka as apét filáng, as nan korsa ay murpu ad Jerusalem ya muntoróng ad Gaza.” Nan nauy ay korsa at muntoróng henan disyerto. **27** Naligwat hiya, ya inmuy as nan korsa ay ansa. As nan chana umuyan, sinib-atna nan i-Etiopia ay yunuku. Hi tona at usa ay mafigfigfig ay opisyar ay mangenongnongnong as nan am-in ay kuk uwani reyna ad Etiopia ay makalí un Candace. Nurpu hiya ad Jerusalem ay uy nunchayaw kan Apo Dios. **28** Nunlurukian hiya as nan kalesana ay munfiangad as ilina ya cha munfiasfiasa as nan insurat Isaias ay pomapadtu. **29** As nan hiyachi, kenalen nan Espiritu Santo kan Felipe, “Uyka. Maesnopka as nan hana nunlurukian as nan kalesa.”

**30** Natannagtag hi Felipe ay naesnop, ya chinngorna ay cha fiasfiasaun nan opisyar nan insurat Isaias ay pomapadtu. Angkiay ya senarudsud Felipe kan hiya, “Ay maawatam nan cham fiasfiasaun?”

**31** “Achek mampay maawatan sukúd kun wachay mangelawlawag kan ha-un,” ensongfiat nan opisyar. Angkiay ya enayakiana hi Felipe ay makilukian kan hiya. **32** Nan chana fiasfiasaun ay naisurat as nan Kalen Apo Dios at hiyana:

“Maepachong hiya as nan karnero ay cha maiyuy ay maparti, winnu maepachong as nan kordero ay kun kinkinak uray cha mapukisan nan chotchetna. Maid poros kankananca.

**33** As nan naifiafinana, nakaan nan kalibfengana ay maokóm. Anan makaifiakia as nan maepangkep as nan kianakna, tay napapug at met nan fiyagna asna’s luta?”\*

**34** Kenalen nan yunuku kan Felipe, “Ifiakiam pay kan ha-un mu anan cha mangaliyan nan pomapadtu as na? Ay maepangkep kan hiya mismu winnu maepangkep as nan tukún ay taku?” **35** Angkiay ya enlapon Felipe ay munkali nunlapu as nan naisurat as nan Kalen Apo Dios ay finasan nan

\* **8:33** Isa. 53:7-8

yunuku, ya enlawlawagna kan hiya nan Ammay ay Chamag maepangkep kan Jesus. <sup>36</sup> Kuncha pay inturturuy ay nanarcharan as nan korsa, inum-chancha as nan kawad-an nan chanum. Kenalen nan yunuku, “Ilaum! Nauy chi chanum, anan mangepawa as ok mafunyakianan?”

<sup>37</sup> [Kenalen Felipe kan hiya, “Mafialinka ay mafunyakian mu as nan am-in ay numnummu at omafurotka.”]

Tinumfor nan yunuku, “Afurotok ay hi Jesu Cristo nan anak Apo Dios.”<sup>†</sup> <sup>38</sup> Enpakinak nan yunuku nan kalesa ay nunlurukianancha, ya kenomsopcha ay chuwa as nan chanum, at finunyakian Felipe hiya. <sup>39</sup> Kuncha pay tenmakchang as nan chanum, enek-ak nan Espiriton Apo Dios hi Felipe. Chaan kasing inil-ilan nan yunuku hiya, ngem naragsak ‘nan yunuku’ ay nangituryay inmuy as ay-ayana. <sup>40</sup> Kun pay hi Felipe at naammuwana ay kalina at ya wacha hiya payat ad Azoto. As nan hiyachi, inmuy ad Cesarea, ya as nan chinmag-osana henan am-in ay ili ay maraosana at enkaskasabana nan Ammay ay Chamag.

## 9

### *Nan Omafurotan Saulo Kan Jesus*

(Ara. 22:6-16; 26:12-18)

<sup>1</sup> As nan hana ay timpu ay enommattan chatona, inturturuy Saulo ay nangug-ugyat ay mangpatuy as nan chiyuchya omaafurot. Isunga inmuy hiya as nan kangatuwan ay pachi <sup>2</sup>ta chumawat as sursurat ay pammarufus ay iyuyna as nan anap-apu as nan chiyuchya senagoga henan siyudad ay Damasco. Hiyasa nan atuna ta mu kay wachay mad-anana as lanaraki winnu fianafiai ay cha omab-afurot as nan makali un Charan Apo Jesus at wachantuy kalibfengana ay mangtiliw kan chicha ay uy mangfiarud ad Jerusalem. <sup>3</sup> As nan kiayud umchanan Saulo ad Damasco, kalina at ya nachiyat chi silaw ay nurpu ad chaya ay nangliwus kan hiya. <sup>4</sup> Natu-ug hi Saulo as nan luta ya chinngorna nan kali ay nangali kan hiya, “Saulo, Saulo, adchi t’uyak palikiatiun?”

<sup>5</sup> “Ngachanmu Apo?” senarudsud Saulo.

Tinumfor nan Apo, “Ha-un hi Jesus ay champalikiatiun. <sup>6</sup> Tomakchugka, ya umuyka henan siyudad, at wacha hid-i nan mangifiakia kan he-a as nan masapor ay atum.”

<sup>7</sup> Nan chiyuchya kakadwan Saulo at kuncha nasngang as nan nanngorancha as nan kali ngem maid inilacha as taku. <sup>8</sup> Naligwat hi Saulo as nan luta, ya as nan nanglitakiana as nan matana, achi poros makaila. Isunga kuncha penapachang ay nangiyuy kan hiya ad Damasco. <sup>9</sup> As nan turu ay urkiw at achi makaila hiya. Chaan pay nangnangan ya chaan inmig-ikop.

<sup>10</sup> Wacha nan usa ay omaafurot ad Damasco ay nan ngachana at Ananias. Nunkali hi Apo Jesus kan hiya babaen as nan kaman iitaw ya kanana, “Ananias!”

“Nauyak Apo,” ensongfiatna.

<sup>11</sup> Kenalen nan Apo kan hiya, “Maligwatka, ya umuyka as nan korsa ay makali un Lutug. Sarudsuchum as nan chiyuchya wacha as afong Judas nan i-Tarso ay nan ngachana at Saulo, tay wacha hid-i ay cha munkarkararag.

<sup>12</sup> Babaen as nan kaman iitaw, inilana ay cha sungkop nan laraki ay nan ngachana at Ananias, ya chana epatay nan limana kan hiya ta makaila kasing.”

<sup>†</sup> 8:37 As nan tapen nan manuskritu as nan kali ay Griego at maid na ay versikulu.

<sup>13</sup> Ngem tinumfor hi Ananias, “Apo, ongor met chi nachamagku as nan tataku maepangkep kan tonay ay taku ya maepangkep as nan am-in ay enenatna ay kauugyat as nan tatakom ad Jerusalem. <sup>14</sup> Ad wani, enmali hiya hena ad Damasco ay wachay pammarufusna ay nurpu as nan anap-apon chi papachi ad Jerusalem ta mafialina ay tiliwun nan am-in ay munchaychayaw kan he-a.”

<sup>15</sup> Ngem kenalen nan Apo kan Ananias, “*Uyka, tay pinilek hiya as fiabfi-aarok ay uy mangepakaammu as nan ngachanku as nan chiyuycha Gentil, as nan ar-ari, ya as nan chiyuycha kianak Israel.* <sup>16</sup> *Ha-un mismu nan mangepaila kan hiya as nan ongor ay iliwasna as nan mangepakaammuwana as nan ngachanku.*”\*

<sup>17</sup> Isunga inmuy hi Ananias as nan afong ay kawad-an Saulo, at enpatayna nan limana kan hiya, ya kanana, “Ifiak ay Saulo, hi Apo Jesus ay nunpaila kan he-a as nan cham omaliyan hena nan nangifiaor kan ha-un ta kasinka makaila, ya mapnuka as Espiritu Santo.” <sup>18</sup> Hiya at chi ya nag-as nan kaman seksek as matan Saulo, ya kasin makaila hiya. Angkiay nalgivat hiya ya nafunyakian. <sup>19</sup> Kun pay narpas chaná, uy nangan, ya finmikas kasin.

### *Nan Nun-ekaskasabaan Saulo Ad Damasco*

As nan kaat ay urkiw, nakepagyan hi Saulo as nan chiyuycha omaafurot ad Damasco. <sup>20</sup> Hiya at chi ya inmuy as nan chiyuycha senagoga ay nangelapu ay mangekasaba ay hi Jesus at Anak Apo Dios. <sup>21</sup> Am-in nan chinumngor kan hiya at naschaawcha. Waschi un senarudsudna, “Ay fiakun challu hi tonay nan laraki ay namarpalikiat as nan chiyuycha munchaychayaw kan Jesus ad Jerusalem? Ay fiakun nan enmaliyana hena at ta uyna tiliwun nan omaafurot ay mangepafiangad as nan anap-apon chi papachi hid-i?” <sup>22</sup> Ngem kaskasin napapigsa hi Saulo ay nun-ekasaba ya makaawis as solet nan enatna ay nangépaneknek ay hi Jesus nan Cristo. Isunga achi poros makasongfiat nan chiyuycha Judio ay umili ad Damasco.

<sup>23</sup> Kun pay inmuy chi kaat ay timpu, plenanon nan chiyuycha Judio mu anan atuncha ay mangpatuy kan Saulo.<sup>†</sup> <sup>24</sup> Inurkiw ya lenafi ay ensasanubcha hiya as nan am-in ay sungkopan henan siyudad ta patayuncha hiya mu mak-ak. Ngem naammuwan Saulo nan planucha kan hiya. <sup>25</sup> Ngem as nan henlafi, nan iib-ana ay omaafurot at inittucha hiya as nan tekles ay tenaliyancha, ya inuy-uchya hiya as nan nangatu ay tuping nan siyudad ta lomayaw.

### *Hi Saulo Ad Jerusalem*

<sup>26</sup> Kun pay inumchan hi Saulo ad Jerusalem, penachasna ay maetapi as nan chiyuycha omaafurot, ngem inmugyatcha am-in kan hiya, tay achicha afurotun ay usa us hiya ay tit-iwa ay omaafurot. <sup>27</sup> Ngem uy finadngan Bernabe hiya ya kenadwaana hiya ay inmuy as nan apostoles. Infiakiana kan chicha nan enat Saulo ay nangila as nan Apo as nan korsa ad Damasco ya nan nunkaliyan nan Apo kan hiya. Infiakiana us nan kenaturud Saulo ay nangekaskasaba as nan maepangkep kan Jesus ad Damasco. <sup>28</sup> Kiappú ta assid-i, nakekadkadwa hi Saulo kan chicha ad Jerusalem, ya naturud’hiya ay uy nangekaskasaba as nan maepangkep kan Apo Jesus. <sup>29</sup> Nakekali ya nakesosek hiya as nan chiyuycha Judio ay munkali as Griego, ngem kuncha at anapun chi atuncha ay mangpatuy kan hiya. <sup>30</sup> Kun pay naammuwan

\* <sup>9:16</sup> Ara. 20:23; 2 Co. 11:23-27; 1 Tim. 1:11-16; 2 Tim. 1:11-12      † <sup>9:23</sup> 2 Co. 11:32-33

nan iib-a ay omaafurot sa, inturudcha hi Saulo ay chinmayyu ad Cesarea, at infiaorcha hiya ad Tarsö. <sup>31</sup> As nan hiyachi, nakyat nan maparpalikiatanan nan chiyucha iglesia henan intiru ay probinsiya ay Judea, Galilea ya Samaria. Pimigisa nan pammaticha ya naawischa babaen as nan namad-fiadngan nan Espiritu Santo kan chicha. Enmongoongorcha nan omaafurot ya inturuycha ay nunchaychayaw as nan Apo as nan panagfiyagcha.

### *Hi Pedro Ad Lidda Ya Ad Joppe*

<sup>32</sup> Kun pay hi Pedro at cha munfiabfiaat henan tukutukún ay lukiar ay kawad-an nan tatakon Apo Dios. As nan namingsan, uyna finisita nan tatakon Apo Dios ad Lidda. <sup>33</sup> Inilana hid-i nan usa aylaraki ay nan ngachana at Eneas. Hiya at kun u-uumfug as nan ufugna as waru ay tawwun, tay naparalitiko. <sup>34</sup> Kenalen Pedro kan hiya, “Eneas, paammayun chaká kan Jesu Cristo. Fumangunka ya lekopum nan apragmu.” Hiya at chi ya finmangun hi Eneas. <sup>35</sup> As nan nangil-an nan am-in ay inmiili ad Lidda ya Sarona as nan enommat kan Eneas, enmafurotcha kan Apo Jesus.

<sup>36</sup> Ad Joppe, wacha nan fiafiai ay nan ngachana at Tabita ay usa ay omaafurot. Nan ngachana as nan kalen chi Griego at Dorcas ay nan laychuna ay kanan at usga. Kanayona ay atun chi ammay ya fiadngana nan chiyucha pugli. <sup>37</sup> As nan hana ay timpu ay kawad-an Pedro ad Lidda, nunsaket hi Tabita, at natuy. Angkiay ya kuncha pay inmus hiya, enpab-ugcha as nan nunngangatu ay kuwartu. <sup>38</sup> Kiapú ta nan ili ay Lidda at achi achawwi ad Joppe, as nan nanngoran nan chiyucha omaafurot ay wacha hi Pedro ad Lidda, inmifiaorcha as chuwa ay lanaraki ay uy munpakaasi kan hiya. As nan inumchanancha, kenalicha, “Pangaasem ta kamuwum ay makeali kan chakami ad Joppe.” <sup>39</sup> Isunga nunkaliligwat hi Pedro ya nakiuy kan chicha. Kuncha pay inumchan, enpangucha hiya as nan nunngangatu ay kuwartu. Am-in nan eellakas at enarufongcha hi Pedro. Chacha mun-ag-akor ya chacha epaila kan hiya nan chiyucha kamisita ya tapen chi kakiay ay enammaan Dorcas as nan natatakuwana.

<sup>40</sup> Ngem enpapitiw Pedro chicha am-in as nan kuwartu, at nunpalintumang hiya ya nunkararag. Angkiay ya nunsakong hiya as nan natuy, ya kanana, “Tabita, fumangunka.” Hiya at chi ya nunlitag hi Tabita. Kuna pay inila hi Pedro, finmangun ya temmokor. <sup>41</sup> Inunnan Pedro nan limana, ya finadngana hiya ay tomakchug. Angkiay ya enayakiana nan chiyucha ellakas ya nan tapina ay kakadwacha ay omaafurot, ya enpailana kan chicha hi Dorcas ay nataku. <sup>42</sup> Nan nauy ay chamag at naammuwanan henan intiru ay Joppe, ya ongorcha nan enmafurot kan Apo Jesus. <sup>43</sup> Nagyan hi Pedro ad Joppe as ongor ay urkiw as nan afong Simon ay mun-amamma as larat.

## 10

### *Cha Pedro Kan Cornelio*

<sup>1</sup> Wacha ad Cesarea nan usa ay laraki ay nan ngachana at Cornelio ay kapetan chi hinkiasot ay sosorchachu. Nan nauy ay bunggowna at makali un “Italiana ay Sosorchachu”. <sup>2</sup> Uray Gentil hiya at relihiyoso challu, ya munchaychayaw hiya kan Apo Dios patí nan pamilyana. Ongor us chi enenata ay finmachang as nan chiyucha Judio ay pugli, ya kanayon hiya ay munkararag kan Apo Dios.

<sup>3</sup> As nan usa ay makiayud as nan kiayud alas tres, babaen as nan kaman iitaw, inilana nan usa ay anghel Apo Dios ay sinungkop as nan kawad-ana, ya kanana kan hiya, "Cornelio."

<sup>4</sup> Entotoongan Cornelio nan anghel as ugyatna as solet, ya kanana, "Apo, ngachanay ifiakiam?"

Tinumfor nan anghel, "Nalaylaychan hi Apo Dios as nan chiyuycha kararagmu ya as nan ongor ay fiachangmu as nan pugli. Enawat at Apo Dios chasa ay kamanmu chaton kan hiya. <sup>5</sup> Ad wani umifiaorka as lanaraki ay umuy ad Joppe ay uy mangayag kan Simon ay nan usa ay ngachana at Pedro. <sup>6</sup> Hiya nan mangili as afong Simon ay mun-am-amma as larat ay wacha henan olet nan fiayfiay."

<sup>7</sup> Kun pay nak-ak nan anghel, enayakian Cornelio nan chuwa as nan chiyuycha mafiabfiaor ya usa ay relihiyoso ay sorchachu ay usa as nan fumadfiachang kan hiya mismu, <sup>8</sup> at infiakiana kan chicha nan am-in ay enommat. Hana at ifiaor chicha ay umuy ad Joppe.

<sup>9</sup> As nan kafikiatana as nan kiayud munkiawa, chacha manarcharan ay maesnop ad Joppe. As nan hiyachi challu ay uras, inmuy hi Pedro as nan nuntatapor ay tabfongan nan afong ay uyna munkararakian. <sup>10</sup> Kun pay naaw-awni, nunchukiaang hi Pedro, ya laychuna ay mangan. Ngem as nan cha mangeskianaan nan tapina as makan, wacha nan enpailan Apo Dios kan hiya babaen as nan kaman iitaw. <sup>11</sup> Inilana ad chaya ay naelwang, ya cha mauy-uy asna's luta nan kaman afluig ay urus ay nasisiluwian nan opat ay sulina. <sup>12</sup> Nan naiittu as nan urus ay anchi at am-in ay tukutukün ay animar, chiyuycha munkadkachap asna's luta ya chiyuycha kossel. <sup>13</sup> As nan hiyachi, wacha nan nangali kan hiya, "Pedro, maligwatka. Pomartika as nan hanacha ya kanum."

<sup>14</sup> Ngem kenalen Pedro, "Annaw pay, Apo! Maid met kenkenanku as paniyiwun nan lintigmi ay Judio winnu kenkenanku ay naifilang as achi nacharos."

<sup>15</sup> Kasin kenalen nan kali kan hiya, "Nan infilang Apo Dios as nacharos at achim paniyiwun." <sup>16</sup> Namitlu ay enommat sa, at narab-et nan chiyuy urus ad chaya.

<sup>17</sup> As nan cha mangnumnumnumun Pedro as nan inilana mu anan lay-chun tud-i ay kanan, naanapan nan laraki ay finaor Cornelio nan afong Simon, ya nangatakchugcha as nan sugpan. <sup>18</sup> Nufukiaawcha ay nanarudsud, "Ay wachay mangiliyu hena ay nan ngachana at Simon, ya nan usa pay ay ngachana at Pedro?"

<sup>19</sup> Kun pay kutug ay cha numnumnumun Pedro nan enpailan Apo Dios kan hiya, kenalen nan Espiritu Santo kan hiya, "Wachacha nan turu ay lanaraki ay cha manganap kan he-a. <sup>20</sup> Maligwatka ya chumayyuka. Achika mun-ad-achi ay makiuy kan chicha, tay ha-un nan nangifiaor kan chicha."

<sup>21</sup> Hiya at chi ya chinmayyu hi Pedro, ya kanana as nan lanaraki, "Ha-un nan chayu anapun. Ngachana man paat nan pangkepyu ay enmali hena?"

<sup>22</sup> "Finaor chakami kan Kapetan Cornelio," ensongfiatcha kan Pedro. "Hiya at usa ay nalintig ay taku ya manangchaychayaw kan Apo Dios. Ammay us nan kaap-apatana as nan am-in ay tataku ay Judio. Nan usa ay anghel Apo Dios at infiakiana kan hiya babaen as nan kaman iitaw ay epaayag chaká as afongna ta chungruna nan maifiakiam." <sup>23</sup> Isunga empaskop ya menangilen Pedro chicha.

As nan kafikiatana, nunligwat hiya, ya nakiuy kan chicha ay kadwana nan tapina ay omafurot ay i-Joppe. <sup>24</sup> As nan somarunu ay urkiw, inumchancha ad Cesarea. Cha sassasad-un Cornelio chicha as afongna ay kadwana nan enayakiana ay iib-ana ya kiakiayyumna. <sup>25</sup> Kun pay sinungkop hi Pedro as nan hana ay afong, sinib-at at Cornelio hiya ya nunpalintumang as nan sukina ay mangchayaw kan hiya. <sup>26</sup> Ngem nun-epatakchug Pedro hiya, ya kanana, “Tomakchugka, tay kunak us lawá taku.” <sup>27</sup> As nan cha muntag-takiatforan cha Pedro kan Cornelio ay sungkop as fiaruy, inilan Pedro nan ongor ay tataku ay naaamong. <sup>28</sup> Kenalina kan chicha, “Chakayu ay mismu at aammuyu ay paniywun nan lintigmi ay Judio nan makekadkadwaanmi as nan Gentil winnu uymi mangfsitaan kan chicha. Ngem enpailan Apo Dios kan ha-un ay achek challu paniywun ay makekadkadwa as nan uray ngachana ay taku. <sup>29</sup> Isunga as nan nangepaayakianyu kan ha-un, chaanak nun-ad-achi ay nakeali. Ad wani, sarudsuchok man paat kan chakayu mu adchi t'uyak enpaayag.”

<sup>30</sup> Tinumfor hi Cornelio, “Ad ossanchi as nan assena ay alas tres as nan makiayud, as nan chak munkarkarakian as afongku, kalina at ya wacha nan usa ay laraki ay nangatakchug as nan sangwanak ay mun-aliling chi fiachuna. <sup>31</sup> Kenalina kan ha-un un, ‘Cornelio, chinngor Apo Dios nan kararagmu, ya manunumnumna nan infiadfiachangmu as nan chiyucha pugli. <sup>32</sup> Umifiaorka as umuy ad Joppe ay uy mangayag kan Simon ay nan usa ay ngachana at Pedro. Hiya nan mangili as afong Simon ay mun-amamma as larat ay wacha henan olet nan fiayfiay.’ <sup>33</sup> Hiyana nan kiapúna ay as nan hiyachi challu ay timpu at enpaayagku he-a. Ammay met, tay enanosam ay enmali. Ad wani, nauy kami am-in hena as nan sangwanan Apo Dios ay manngor as nan am-in ay infilina kan he-a ay epakaammom kan chakami.”

<sup>34</sup> Angkiay kenalen Pedro, “Tit-iwa ay maawatak ad wani ay hi Apo Dios at mapapchong nan atuna as nan am-in ay tataku. <sup>35</sup> Tay henan tunggal nasyon, nan ngachana ay manangchaychayaw kan hiya ya atuna nan nalintig at awatun Apo Dios. <sup>36</sup> Ammuyu met nan chamag ay enpakaammon Apo Dios as nan chiyucha kianak Israel. Hiyachi nan Ammay ay Chamag ay maekaskasaba ta mafialin ay makekappia nan taku kan Apo Dios babaen kan Jesu Cristo ay Apon am-in chi tataku. <sup>37</sup> Nachamagyutnan enommat henan intiru ay probinsiya ay Judea manipud ad Galilea as nan nunlopasan Juan ay nangekaskasaba as nan maepangkep as funyag. <sup>38</sup> Ammuyu us nan enat Apo Dios ay nangichat kan Jesus ay i-Nazaret as Espiritu Santo ya pannakafialin. O, ammuyu nan enat Jesus ay as nan uray ngachana ay enay-ayana at enkamkamanay ammay, enpappaammayna nan am-in ay tataku ay penarpalikiat Satanas, tay wacha hi Apo Dios kan hiya. <sup>39</sup> Chakami nan mangepaneknek as nan am-in ay en-enatna ad Jerusalem ya henan intiru ay Judea. Penatuycha hiya as nan nangepalansaancha as nan koros. <sup>40</sup> Ngem tenakon Apo Dios hiya manipud as nan utúy as nan maekatu ay urkiw, ya enpailana hiya kan chakami. <sup>41</sup> Chaana enpaila hiya as nan am-in ay tataku, ngem kan chakami yangkiay ay pinilen Apo Dios ay mangepaneknek as nan inilami. Tay chakami at nakekkekan ya nakiig-ikop kami kan hiya as nan natakuwana manipud as nan utúy. <sup>42</sup> Firilin Apo Jesus chakami ay uy mangekasaba as nan Ammay ay Chamag as nan tataku ya uy mangepaneknek ay hiya nan pinilen Apo Dios ay mangokóm as nan am-in ay matataku ya nunkatuy. <sup>43</sup> Nan maepangkep kan Jesus nan paneknekan am-in nan pomapadtu as nan insuratcha ay nan am-in ay omafurot kan hiya

at mapakawancha as nan fiasfiasorcha kiapú as nan enat Jesus.”

### *Nan Nang-awatan Nan Gentil As Nan Espiritu Santo*

<sup>44</sup> Kun pay kutug ay cha munkarkali hi Pedro, kalina at ya kenomsop ay sinungkop nan Espiritu Santo as nan am-in ay chuchumngor. <sup>45</sup> Naschaaw nan chiyucha omaafurot ay Judio ay nakiuy kan Pedro, tay inchat Apo Dios nan Espiritu Santo ta mawawacha uray as nan chiyucha Gentil. <sup>46</sup> Tay chinngorcha ay chacha munkarkali as tanuktukún ay kali ay epakalen nan Espiritu Santo ya chacha munchaychayaw kan Apo Dios. Angkiay kenalen Pedro, <sup>47</sup> “Enha! Ay wachay mangepawa kan chicha as uycha mafunyakianan as chanum? Chatona ay tataku at enawatcha nan Espiritu Santo ay kaman kan chitaku.” <sup>48</sup> As nan hiyachi, finilina cha Cornelio ay mafunyakiancha ay mangepaila ay hi Jesu Cristo nan Apocha.\* Angkiay ya chinawatcha kan Pedro un mayaschi hiya kan chicha as kaat ay urkiw.

## 11

### *Nan Enpachamag Pedro Ad Jerusalem*

<sup>1</sup> As nan hiyachi, nan apostoles ya nan chiyucha omaafurot ad Judea at chinngorcha ay enawat us nan chiyucha Gentil nan kallen Apo Dios. <sup>2</sup> As nan enmabratan Pedro ad Jerusalem, nan chiyucha Judio ay mangun-unud as nan panagsugyat at ensotcha hiya. <sup>3</sup> Kenalicha, “Nunsidlaka! Inmuyka met as nan chiyucha chaan nasugyanan ay Gentil, ya nakekanka pay kan chicha.”

<sup>4</sup> Angkiay ya enlapon Pedro ay naagetot-orpang ay nangifiakia kan chicha as nan am-in ay enommat. <sup>5</sup> Kenalina, “As nan kawad-ak henan siyudad ay Joppe, as nan chak munkarkarakian, wacha nan kaman iitaw ay enpailan Apo Dios kan ha-un. Inilak nan cha mauy-uy ay nurpu ad chaya ay kaman afilug ay urus ay nasisiluhan nan opat ay sulina ya naesaad as nan kawad-ak. <sup>6</sup> Enmamacdu ay nangila mu anan naittu as nan urus ay anchi, ya inilak chi tukutukún ay tarakon ya atap ay animar, chiyucha munkadkachap asna's luta ya chiyucha kossel. <sup>7</sup> Angkiay chinngorku nan kali ay cha mangali kan ha-un un, ‘Pedro, maligwatka. Pomartika as nan hanacha ya kanum.’ <sup>8</sup> Ngem kenalek un, ‘Annaw pay, Apo! Maid met kenkenanku as paniyiwan nan lintigmi ay Judio winnu kenkenanku as naifilang as achi nacharos.’

<sup>9</sup> “Ngem kasin tinumfor nan kali ay nurpu ad chaya. Kenalina un, ‘Nan infilang Apo Dios as nacharos at achim paniyiwan.’ <sup>10</sup> Namithu ay enommat sa, at narab-et chachi am-in ad chaya.

<sup>11</sup> “As nan hiyachi challu ay timpu, nan turu ay lanaraki ay naifiaor ay nurpu ad Cesarea ay uy mangayag kan ha-un at inumchancha as nan afong ay chinmawusak. <sup>12</sup> Infiakian nan Espiritu Santo kan ha-un ay achiyak mun-ad-achi ay makiuy kan chicha. Nan nauycha unum ay iib-a ay omaafurot ay i-Joppe at nakealicha kan ha-un ad Cesarea, at sinungkop kami am-in as afong Cornelio. <sup>13</sup> Infiakian Cornelio kan chakami nan enatna ay nangila as nan anghel ay nangatakchug as afongna ay nangali kan hiya un, ‘Umifiaorka as umuy ad Joppe ay uy mangayag kan Simon ay nan usa ay ngachana at Pedro. <sup>14</sup> Hiya nan mangifiakia as nan chamag kan chakayu ay hiyasa nan maesarakanantu ya nan pamilyam.’ <sup>15</sup> Kunku pay enlapu ay nunkali, kenomsop ay sinungkop nan Espiritu Santo kan chicha ay kaman as nan

\* 10:48 2:38

sinungkopana kan chitaku as nan laplapuna. <sup>16</sup> Angkiay ninumnumku nan kenalen Apo Jesus un, ‘*Hi Juan at funyakiana nan tataku as chanum, ngem mafunyakian kayuntu as Espiritu Santo.*’\* <sup>17</sup> Ad wani ngarud, mu munpachong nan inchat Apo Dios kan chicha ay Gentil as nan inchatna kan chitaku as nan enmafurotan takú kan Apo Jesu Cristo, anan ngachanku paat ay mangepawa kan Apo Dios as atuna?’

<sup>18</sup> Kuncha pay chinngor na, inkinakcha ay nanggot kan hiya, ya chinyaychawacha hi Apo Dios. Kenalicha, “Uray as nan chiyuycha Gentil at inchat Apo Dios nan chansacha ay munfiafiawi ta mawad-ancha as fiyag ay maid patingkiana.”

### *Nan Iglesia Ad Antioikia*

<sup>19</sup> As nan hiyachi, nan chiyuycha omaafurot ay nasisiyan kiapú as nan naparpalikiatanancha ay linmun nan napatuyan Esteban at nunfiaatcha inkiana ad Fenicia, Chipre ya Antioquia. Chacha ifiagfiakia nan kalen Apo Dios as nan chiyuycha Judio yangkiay. <sup>20</sup> Ngem wachacha nan tapina kan chicha ay Ianaraki ay i-Chipre ya i-Cirene ay inmuy ad Antioquia. As nan chiyuycha Gentil nan nangelapuwancha ay nangifiagfiakia ya nangekaskasaba as nan Ammay ay Chamag maepangkep kan Jesus. <sup>21</sup> Kiapú ta wacha nan pannakafialin Apo Dios kan chicha, ongoongorcha nan tataku ay enmafurot ya nuntalek kan Apo Jesus.

<sup>22</sup> Kun pay nachamag nan iglesia ad Jerusalem ay enmafurot nan chiyuycha i-Antioquia, finaorcha hi Bernabe ay umuy ad Antioquia. <sup>23</sup> As nan inumchanana ya nangil-ana as nan bendisyon Apo Dios kan chicha, naragsakan hiya. Tinukutukuna chicha am-in ay mangiturturuy ay omafurot kan Apo Jesus as nan am-in ay numnumcha. <sup>24</sup> Hi Bernabe at ammay ay taku, napnu as Espiritu Santo, ya napigsa nan pammatica. Isunga emongoongor nan tataku ay naetapi kan chicha ay enmafurot as nan Apo.

<sup>25</sup> Angkiay ya inmuy hi Bernabe ad Tarso ay uy manganap kan Saulo. <sup>26</sup> Kuna pay ininchanan hiya, entakina hiya ad Antioquia. Kun pay makatawwuncha hid-i, nakekadkadwacha as nan chiyuycha omaafurot, ya insursuruwancha nan ongoongor ay tataku. Ad Antioquia nan enmon-oná ay nangadnanan nan chiyuycha omaafurot as Cristiano.

<sup>27</sup> As nan hiyachi ay timpu, wachacha nan tapen nan pomapadtu ay nurpu ad Jerusalem ay inmuy ad Antioquia. <sup>28</sup> Nan usa kan chicha at hi Agabo. Tenmakchug hiya as nan naamongan nan chiyuycha omaafurot, ya enpaepadton nan Espiritu Santo kan hiya ay omalintuy usa ay nunsidla ay fitel henan intiru ay luta. (Enommat na tit-iwa as nan nuntotorayan Emperador Claudio.) <sup>29</sup> Isunga nan chiyuycha omaafurot ad Antioquia at nuntuturagcha ay omepeaw-et as ifiachangcha ay maiyunud as nan kafaelan nan tunggal usa para as nan iib-acha ay omaafurot ay umili ad Judea. <sup>30</sup> Enpaw-etcha na tit-iwa kan cha Bernabe kan Saulo ay nangiyuy as nan chiyuycha mangepangpanguru as nan omaafurot ad Jerusalem.

## 12

### *Nan Nailufusan Pedro As Nan Pagfiaruchan*

<sup>1</sup> As nan hiyasa us ay timpu, enlapon Ari Herodes ay namalikiat as nan tapen nan omaafurot. <sup>2</sup> Enpasiwatna nan uron Santiago ay sunúd Juan. <sup>3</sup> Kuna pay inila ay nalaylaychan nan chiyuycha Judio as nan nauy enatna,

\* **11:16** Ara. 1:5

insubratna ay mangepatiliw us kan Pedro. Enommat na as nan makali un Fiastan chi Tenapay ay Maid Lebadurana. <sup>4</sup> Kuna pay enpatiliw hi Pedro, enpaifiarudna ya enpafiantayna as opat ay hen-op-at ay munsinsinnubrat ay sosorchachu. Tay as nan marpasan nan fiasta, plenanon Herodes ay mangokóm kan hiya as nan kaongoran chi tataku.

<sup>5</sup> Isunga naifiaflarud hi Pedro. Ngem uray mu hiyasa, chaan inkinkinak nan iib-ana ay omaafurot ay nangekarkararag kan hiya.

<sup>6</sup> As nan hiyachi challu ay lafi, sakbay epapitiw Herodes hi Pedro as nan kafikiatana, nanassuy hi Pedro ay nunkiakiaw-an nan chuwa ay kuwarcha. Nakokor-ongan nan chuwa ay limana, ya wachacha pay nan nunkukuwar-cha as nan pantiw nan pagfiaruchan.

<sup>7</sup> Kalina at ya nunpaila nan usa ay anghel nan Apo, ya wachay silaw ay nangepapaway as nan kawad-ana. Sinikchud nan anghel nan pukor Pedro ay namangun kan hiya, ya kanana, "Kamuuum! Maligwatka!" Hiya at chi ya nag-as nan chiyuuya kor-ong nan chiyuuya limana. <sup>8</sup> Kenalen nan anghel kan hiya, "Iyam-ammam nan fiachom, ya munsandalka." Enat Pedro chi. Angkiay ya kenalen kasin nan anghel, "Esalifudmu nan kakiaymu, ya umunudka kan ha-un." <sup>9</sup> Inunud Pedro nan anghel ay pinmitiw, ngem achina ammu ay nan cha at-atun nan anghel ay mangfiachang kan hiya at tit-iwa. Tay nan chana numnumnumun at cha mun-iitaw hiya. <sup>10</sup> Kuncha pay lenaosan nan omona ya nan maekadwa ay kuwarcha, inumchancha as nan lanchok ay unub nan sugpan ay muntoróng henan siyudad. Kun kalina ya natkafian nan lanchok ay unub ya pinmitiwcha. As nan nanaranancha as akét as nan korsa, kalina at ya namaid nan anghel.

<sup>11</sup> Hiyachi nan nangammawan Pedro ay fiakuna payat iitaw chi, ya kanana, "Ad wani, ammok ay tit-iwa ay infiaor Apo Dios nan anghelna ay mangesarakan kan ha-un as nan panagtoray Herodes ya as nan am-in ay cha namnamaun nan iib-ak ay Judio ay ommat kan ha-un."

<sup>12</sup> Kun pay ninumnum Pedro na, inmuy hiya as afong Maria ay enan Juan ay makali us un Marcos. Hid-i nan naaamongan nan ongor ay omaafurot ay cha munkarkararag. <sup>13</sup> Nunkokkok hi Pedro as nan pantiw. Angkiay ya nan mafiabfiaor ay fiafiai ay nan ngachana at Roda at uyna chingor mu ngachan tud-i. <sup>14</sup> Kuna pay enmatonan nan kalen Pedro ya kiapü as lagsakna as solet, liniw-ana ay nankab as nan pantiw. Kun at tenmagtag ay nunfiangad ay nangifiakia un wacha hi Pedro ay nangatakchug as nan pantiw as chará.

<sup>15</sup> "Ay kunka natongok?" kenalicha kan hiya. Ngem enpapeletna challu ay tit-iwa chi. Isunga kenalicha, "Ku-un anghelna mu."

<sup>16</sup> Ngem cha challu munkokkokkok hi Pedro. Kuncha pay tenkafian nan pantiw, inilacha hiya, ya naschaawcha as solet. <sup>17</sup> Sininyasana chicha ay kuminak, ya infiakiana kan chicha nan enat Apo Dios ay nangipitiw kan hiya as nan pagfiaruchan. Kenalina kan chicha, "Ifiakiayu pay na kan Santiago ya as nan tapina ay iib-a takú ay omaafurot." Angkiay nak-ak hi Pedro, ya inmuy henan tukún ay lukiar.

<sup>18</sup> As nan kafikiatana, nalilifok ya inmugyat as solet nan sosorchachu mu anan enommat kan Pedro. <sup>19</sup> Enpaanap Herodes hiya, ngem chaancha naanapan. Isunga finistikiarna nan sosorchachu ay nangukuwarcha kan Pedro, at infilina ay maepapatuycha. Kun pay narpas sa, chinmayyu hi Ari Herodes ay nurpu ad Judea, ya nafiyag ay nagyan ad Cesarea.

### *Nan Natuyan Ari Herodes*

<sup>20</sup> As nan nanagyanan Ari Herodes hid-i, finzungat hiya as solet as nan chiyucha umiili ad Tiro ya Sidon. Isunga nun-us-usacha ay mangiaior as nan usa ay grupo ay hiyasa nan pannakaachorcha ay uy manakiang kan Herodes. Kinayyumcha on-oná hi Blasto ay usa ay tenalek Herodes ay mangenongnongnong as nan palasyu ta hiya nan mangfiachang kan chicha. Angkiay ya inmuycha kan Herodes ta chumawatcha as kappia, tay henan sasakopuna nan omor-ancha as kanuncha.

<sup>21</sup> Kun pay inumchan nan urkiw ay pinilen Herodes, nunfiachu as fiachon chi ari ya temmokor as nan tronona, at nunchiskursu as nan tataku. <sup>22</sup> Kun pay narpas chi, chacha ifugfukiaw, “Uy! Munkali payat hiya ay kaman as nan atun chi dios, fiakun kaman as nan atun chi taku.” <sup>23</sup> Hiya at chi ya enpasaket nan usa ay anghel Apo Dios hiya, tay chaana inchat kan Apo Dios nan pammachayaw. Angkiay ya nakrangan hiya, at natuy.

<sup>24</sup> Ngem nan kalen Apo Dios at kaskasin nunchinamag, ya enmongorchha nan enmafurot kan Jesu Cristo.

<sup>25</sup> Kun pay cha Bernabe kan Saulo at lenpascha nan naekeddeng ay atuncha ad Jerusalem, at nunfiangadcha ad Antioquia. Entakincha hi Juan ay makali us un Marcos as kadwacha.\*

## 13

### *Nan Naifiaoran Cha Bernabe Kan Saulo*

<sup>1</sup> As nan iglesia\* ad Antioquia, wachacha nan pomapadtu ya mun-isursuru as kalen Apo Dios. Chicha cha Bernabe, Simeón ay makali un Ngutug, Lucio ay i-Cirene, hi Manaen ay naepaurúg ay kadwan Herodes ay gobernador ad Galilea, ya hi Saulo.

<sup>2</sup> As nan hin-urkiw, as nan chacha munchaychayawan kan Apo Dios ya mun-ay-ayunaran, kenalen nan Espiritu Santo kan chicha, “Chutokanyu cha Bernabe kan Saulo as munserfi kan ha-un as nan chunu ay nangayakiak kan chicha.”

<sup>3</sup> Kuncha pay narpas ay nun-ayunar ya nunkararag, enpataycha nan limacha† kan cha Bernabe kan Saulo, at penaligwatcha chicha.

### *Ad Chipre*

<sup>4</sup> Isunga kiapú as nan nangetorongan nan Espiritu Santo kan cha Bernabe kan Saulo, chinmayyucha on-oná ad Seleucia. Nunlapu hid-i, nunpaporcha ay inmuy ad Chipre. <sup>5</sup> Kuncha pay inumchan ad Salamina ad Chipre, enkaskasabacha nan kalen Apo Dios as nan chiyucha senagogan chi Judío. Kadwacha hi Juan Marcos ay mangfiachang kan chicha.

<sup>6</sup> Nar-oscha ad Chipre inkiana inumchancha ad Pafo. Hid-i nan nanibatancha as nan usa ay somasaromangka ay Judío ay nan ngachana at Bar-Jesus ay nangali un pomapadtu hiya. <sup>7</sup> Hiya at kiayyum nan gobernador ad Chipre ay hi Sergio Paulo ay naraing ay taku. Enpaayag nan gobernador cha Bernabe kan Saulo, tay laychuna ay chungrun nan kalen Apo Dios. <sup>8</sup> Ngem hi Elimas ay sumasaromangka, (hiyasa nan ngachan Bar-Jesus as nan kali ay Griego) at chana konkontraun chicha, ya penachasna ay iyachawwi nan gobernador as nan omafurotana kan Jesus. <sup>9</sup> Ngem hi Saulo ay makali us un Pablo ay napnu as pannakafialin nan Espiritu Santo at entoonganai hi

\* **12:25** Ara. 11:29-30    \* **13:1** Nan laychun tona ay kanan at chiyucha enmafurot kan Cristo.

† **13:3** Ara. 6:6

Elimas, ya kanana, <sup>10</sup> “He-a ay anak Satanas! He-a nan kafusor chi am-in ay kenalintig. Napnuka as am-in ay kenasikap ya kenasator. Ay achim ikinak ay cha mamarfialinsuwek as nan kenatit-iwa ay isursuron Apo Dios? <sup>11</sup> Ad wani, chusaun chaká kan Apo Dios, ya mafuragka ya achim maila nan lawag nan urkiw as kaat ay urkiw.” Hiya at chi ya naleknana ay kaman liningfian chi munngungutug ay lifuu nan matana, ya nunkapkapukap ay nun-anap as mangpachang kan hiya.

<sup>12</sup> Kun pay inilan nan gobernador nan enommat, enmafurot hiya kan Apo Jesus, tay naschaaw as nan insurucha maepangkep as nan Apo.

#### *Ad Antioquia Henan Probinsiya Ay Pisidia*

<sup>13</sup> Nunpapor hi Pablo ya nan kakadwana nunlapu ad Pafo, at inumchan-cha ad Perge henan probinsiya ay Pamfilia. Hid-i nan nanaynanan Juan Marcos kan chicha, at nunfiangad hiya ad Jerusalem. <sup>14</sup> Nanarcharan cha Pablo kan Bernabe nunlapu ad Perge inkiana inumchancha ad Antioquia henan probinsiya ay Pisidia. As nan Urkiw ay Mun-iblayan, sinungkopcha as nan senagoga ya nakedokorchha. <sup>15</sup> Wacha nan nangifiasa as nan Lintig Moises ya nan insurat nan chiyuycha pomapadtu. Kun pay narpas, en-paiifiakan nan totoray as nan senagoga kan cha Pablo, “Iib-a, mu wachay itukunyu as pumigsaan chi numnum nan tataku at mafialinyu ay ifiakia.”

<sup>16</sup> Isunga tenmakchug hi Pablo ya nunsinyas ay nangepakinak kan chicha. Kenalina, “Iib-ak ay kianak Israel ya chakayu am-in ay Gentil ay man-aychayaw kan Apo Dios, chumngor kayu kan ha-un. <sup>17</sup> Nan Dios nan chiyuycha kianak Israel at pinilina nan kaap-uwan takú as tatakuna, ya enpaongoongorna chicha as nan nagyanancha as kaili ad Egipto. As nan nafiayag ay timpu, babaen as nan pannakafialina, enpanguna chicha ay nak-ak hid-i. <sup>18</sup> As nan umuy as opat puru ay tawwun ay kawad-ancha henan disyerto, enan-anosan ya enay-aywanan Apo Dios chicha. <sup>19</sup> Kuncha pay inumchan nan kaap-uwan takú ad Canaan, enpaamis Apo Dios nan tataku ay wacha henan pitu ay nasyon, ya enpatawidna as nan kaap-uwan takú nan lutan nan hanacha ay nasyon.

<sup>20</sup> “Am-in chaná ay enommat, nunlapu as nan inmuyancha ad Egipto inkiana as nan nangamisancha as nan chiyuycha i-Canaan at umuy as opat kiasot ya leman puru ay tawwun. Kun pay narpas sa, inchat Apo Dios kan chichay tukutukún ay huwis inkiana as nan timpon Samuel ay pomapadtu. <sup>21</sup> Angkiay ya as nan chinmawatan nan tataku kan Apo Dios as ari, inchatna hi Saulo ay potot Kis ay kianak Benjamin. Nun-ari hi Saulo kan chicha as opat puru ay tawwun. <sup>22</sup> Kun pay kenaan Apo Dios hi Saulo, ensokatna hi David as aricha. Nauy nan kenalen Apo Dios maepangkep kan David: ‘Hi David ay potot Jesse at hiya nan mangepalayayad kan ha-un. Hiya nan mangtongpartu as nan am-in ay laychok.’<sup>‡</sup> <sup>23</sup> Nan nurpu as nan chiyuycha kianak David ay hi Jesus ay Mangesarakan as nan chiyuycha kianak Israel at finaor Apo Dios ay kaman as nan enkarina. <sup>24</sup> As nan chaan pay nangelapuan Jesus as nan chununa, enkaskasaban Juan as nan am-in ay kianak Israel ay masapor munfiafiawicha as nan fiasfiasorcha ya munpafunyagcha. <sup>25</sup> Kun pay kiayud lopasun Juan nan chununa, kenalina as nan tataku, Ngachana nan kananyu maepangkep kan ha-un? Fiakun ha-un nan chayu sassasad-un. Ngem wacha nan usa ay cha umunud kan ha-un ay uray nan kiarot chi sapatosna at achiyak maekari ay mangfokat.’<sup>§</sup>

<sup>‡</sup> **13:22** 1 Sam. 13:14; Sal. 89:20; 2 Sam. 7:12-14; Ara. 7:46    <sup>§</sup> **13:25** Mat. 3:11; Mar. 1:7; Luc. 3:16; Jn. 1:20, 27

<sup>26</sup> “Iib-ak ay kianak Abraham ya am-in ay Gentil ay wacha hena ay munchaychayaw kan Apo Dios, chumngor kayu. Tit-iwa ay kan chitaku nan nangifiaoran Apo Dios as nan nauy naifiakia ay maepangkep as kae-sarakanan. <sup>27</sup> Ngem nan chiyuycha inmiili ad Jerusalem ya nan anap-apucha at chaancha enmatonan ay hi Jesus nan infiaor Apo Dios winnu naawatan nan insurat nan chiyuycha pomapadtu ad pus-uy ay naifiasa as nan tunggal Urkiw ay Mun-iblayan. Uray muhiyasa, chicha nan nangtong-par as nan infiakian nan chiyuycha pomapadtu as nan nangekeddengancha kan hiya ay matuy. <sup>28</sup> Uray maid naanapancha as finmasorana as uycha nangepapatuyan kan hiya, chinawatcha challu kan Pilato ay epapatuyna hiya. <sup>29</sup> Kuncha pay enat nan am-in ay naisurat as nan Kalen Apo Dios maepangkep kan hiya, kensopcha hiya as nan koros, ya uycha inlufok. <sup>30</sup> Ngem tenakon Apo Dios hiya manipud as nan utúy. <sup>31</sup> As nan ongor ay urkiw, nunpappaila hiya as nan chiyuycha nakiuy kan hiya nunlapu ad Galilea inkiana ad Jerusalem. Ad wani chicha nan mangepaneknek kan chitaku ay Judio as nan maepangkep kan hiya. <sup>32</sup> Ad wani, chakami nan mangifiakia as nan nauy Ammay ay Chamag kan chakayu: Nan enkaren Apo Dios as nan kaap-uwan takú ad pus-uy <sup>33</sup> at tenongparna kan chitaku ay kianakcha babaen as nan nangtakuwana kan Jesus manipud as nan utúy. Hiyana challu nan naisurat as nan maekadwa ay Salmo ay kanana, ‘He-a nan Anakku. Ad wani epailak ay ha-un nan Amam.’\*

<sup>34</sup> Nauy nan kenalen Apo Dios maepangkep as nan nangtakuwana kan Jesus manipud as nan utúy ay achi kasin matmatuy, tay achi poros mabrok hiya as nan lufok:

‘Ichatkuntu kan chakayu nan chiyuycha nasantowan ay bendisyon ay siguradu ay matongpar ay enkarek kan David.’†

<sup>35</sup> Isunga kenalina us as nan tukún ay naisurat as nan Salmo:  
‘Achim eparufus ay mabrok nan Nasantowan as nan lufok.’‡

<sup>36</sup> Ngem fiakun maepangkep kan David nan laychuna ay kanan as na. Tay as nan narpasan David ay nangtongpar as nan penangkep Apo Dios kan hiya as nan natatakuwana, natuy hiya. Naetapi hiya ay nailufok as nan kaap-uwana, at nabrok nan achorna. <sup>37</sup> Ngem hi Jesus ay tenakon Apo Dios manipud as nan utúy at chaan nabrok. <sup>38</sup> Isunga chakayu ay iib-ak, masapor maammuwanyu ay kiapú as nan enkaman Jesus, naekasaba kan chakayu nan mapakawan chi fiasfiasor. <sup>39</sup> Tit-iwa ay babaen kan hiya, tunggal omafurot at naifilang as nalintig as nan sangwanan Apo Dios, tay achi maefialin ay palintikun nan Lintig Moises. <sup>40</sup> Isunga il-ilaunyu ta achi koma maekaman kan chakayu nan nauy kenalen nan chiyuycha pomapadtu:

<sup>41</sup> ‘Ilaunyu, chakayu ay mun-ot-otyok! Maschaaw kayuntu, ya matuy kayuntu challu. Tay wachay kauugyat as solet ay atoktu as nan matatakuwanyu ay achiyuntu challu afurotun, uray kun wacha nan mangepakaawat ay ustu kan chakayu.’ §

<sup>42</sup> As nan cha pumitiwan cha Pablo kan Bernabe as nan senagoga, chinawat nan tataku kan chicha ay mu maefialin koma, isurucha pay chaná as nan somarunu ay Urkiw ay Mun-iblayan. <sup>43</sup> Kun pay nak-ak am-in nan tataku as nan senagoga, ongor ay Judio ya Gentil ay mangun-unud as nan iniili ay ukialen chi Judio nan innumund kan chicha. Naketakiatfor cha Pablo

---

\* <sup>13:33</sup> Sal. 2:7; Heb. 1:5    † <sup>13:34</sup> 2 Sam. 7:12-14; 1 Ar. 2:1-4; Sal. 132:11; Isa. 55:3    ‡ <sup>13:35</sup> Sal. 16:10; Ara. 2:27    § <sup>13:41</sup> Hab. 1:5

ya enawischa chicha ay mangiturturuy ay muntalek as nan grasyan Apo Dios.

<sup>44</sup> As nan senmarunu ay Urkiw ay Mun-iblayan, kiayud am-in nan umili at naamongcha ay uy manngor as nan kalen Apo Dios. <sup>45</sup> Ngem kun pay inilan nan chiyucha Judio nan ongoongor ay tataku, enmaposcha as solet. Kenontracha nan kenalen Pablo ya enkak-aliyancha hiya.

<sup>46</sup> Ngem kaskasin timurud cha Pablo kan Bernabe, ya kanancha, "Mas-apor chakayu ay Judio nan omon-onay maifiag-an nan kallen Apo Dios. Kiapú ta enachiyu, chakayu mismu nan achi mangifilang as achoryu ay mawad-an as fiyag ay maid patingkiana, taynanmi chakayu, ya umuy kami as nan chiyucha Gentil. <sup>47</sup> Tay hiyana nan inflin Apo Dios kan chakami ay kanana un,

'Pinilek he-a ay manilaw as numnum nan chiyucha Gentil ta am-in nan tataku asna's luta at maesarakancha kiapú kan he-a.' <sup>\*\*</sup>

<sup>48</sup> As nan nanngoran nan chiyucha Gentil as sa, naragsakancha ya chinaychayawcha nan kallen Apo Dios. Nan chiyucha pinipilen Apo Dios ay mawad-antu as fiyag ay maid patingkiana at emmafurotcha.

<sup>49</sup> Angkiay ya naepachamag nan kallen Apo Dios henan hana intiru ay lukiari. <sup>50</sup> Ngem chinorchor nan chiyucha Judio nan nunkafiaknang ay fianafiai ay manangchaychayaw kan Apo Dios ya nan anap-apu henan siyudad. Enlapucha ay mamalikiat kan cha Pablo kan Bernabe, ya empak-akcha chicha henan lukiarcha. <sup>51</sup> Ngem penokpokan cha Pablo nan chapancha ay mangepaila as nan umili ay kikiadcha as nan mismu ay chusacha. Kun pay narpas sa, inmuycha ad Iconio. <sup>†</sup> <sup>52</sup> Ngem uray mu assesa, nan chiyucha emmafurot kan Jesus ad Antiokia at ongor chi lagsakcha, ya napnucha as pannakafialin nan Espiritu Santo.

## 14

### *Ad Iconio*

<sup>1</sup> Ad Iconio us, sinungkop cha Pablo kan Bernabe as nan senagogan chi Judio. Kiapú as nan makaawis as solet ay enatcha ay nangisursuru as nan kallen Apo Dios hid-i, ongoongorcha nan Judio ya Gentil ay emmafurot. <sup>2</sup> Ngem nan chiyucha chaan emmafurot ay Judio at chinorchorcha nan chiyucha Gentil ta ingluncha nan chiyucha omaafurot. <sup>3</sup> Uray mu assesa, nafiyag chi nakepagyanan cha Pablo kan Bernabe ad Iconio, ya naturudcha ay nangisursuru as nan kallen Apo Dios. Penanecknekan Apo Dios ay tit-iwa nan insursurucha maepangkep as nan grasyana babaen as nan nangichatana kan chicha as pannakafialin ay mangekaman as nan chiyucha nakaskaschaaw ay sinyar ya milagro. <sup>4</sup> Ngem nakudwacha nan chiyucha umiili hid-i ay siyudad. Nan tapina kan chicha at inunudcha nan chiyucha Judio, ya nan tapina at inunudcha cha Pablo kan Bernabe ay apostoles. <sup>5</sup> Angkiay ya nakiturag nan chiyucha Gentil ya nan chiyucha Judio as nan anap-apucha ay mamalikiat ya manglomtak as nan apostoles. <sup>6</sup> Kun pay naammuwanan apostoles nan planucha, lenmayawcha ay inmuy henan probinsiya ay Licaonia henan chiyucha siyudad ay Listra ya Derbe, ya henan tukutukún ay luglukiar henan probinsiya ay ansa. <sup>7</sup> Hid-i nan nangiturturuyancha ay nangekasaba as nan Ammay ay Chamag.

### *Ad Listra Ya Ad Derbe*

\* <sup>13:47</sup> Isa. 42:6; 49:6    † <sup>13:51</sup> Mat. 10:14; Mar. 6:11

<sup>8</sup> Ad Listra, wacha nan usa ay laraki ay nangatokor ay napilud nunlapu as nan naiyankana ya chaan poros nanarcharan. <sup>9</sup> Chinumngor hiya as nan cha kankanan Pablo. Entoongan Pablo hiya, ya inilana ay wacha nan pammartinay makaan nan saketna. <sup>10</sup> Isunga kenalina ay nangipipigsa, “Tomakchugka!” As nan hiyachi, natannakchug nan laraki, ya enlapuna ay manaran.

<sup>11</sup> Kun pay inilan nanongoongor ay tataku nan enat Pablo, infukiawcha as nan kalicha ay Linicaonia, “Nunfialin nan chiyucha dios as kaman tataku, ya kinmuwabcha kan chitaku.” <sup>12</sup> Ngenadnancha hi Bernabe as Zeus, ya hi Pablo as Hermes, tay hiya nan para karkali. <sup>13</sup> Nan templo ay munchaychayawancha as nan dios ay Zeus at wacha henan fiakun sakop nan siyudad. Nan pachi ay munserserfi as nan hana ay templo at inyuyñay chuwa ay laki ay fiaka ya appong ay sabsafong as nan sungkopan henan siyudad, tay hiya ya nanongoongor ay tataku at laychuncha ay ichatonan cha Pablo kan Bernabe.

<sup>14</sup> Ngem kun pay chinngor cha Bernabe kan Pablo sa, lenaksetcha nan fiachucha,\* ya tenmagtagcha ay inmuy as nan kawad-an chi ontoongor ay tataku. Chacha ifugfukiaw as nan tataku, <sup>15</sup> “Iib-a, adchi t'uyyu cha atun na? Kun kami us kaman kan chakayu ay tataku ya! Enmali kami hena ay mangepakaammu kan chakayu as nan Ammay ay Chamag maepangkep kan Apo Jesus. O, enmali kami ay mangifiakia kan chakayu ay chukkianyu nan panagchaychayaw as nan chiyucha achi tit-iwa ay dios ta omafurot kayu as nan matataku ay Dios ay namayang as nan chaya, nan luta, nan fiayfiay, ya nan am-in ay wacha kan chicha. <sup>16</sup> Ad pus-uy, penarufusan Apo Dios nan am-in ay tataku ay munchaychayaw as nan laylaychuncha. <sup>17</sup> Uray mu hiyasa, narawag challu ay wachay pammaneknek ay hiya nan tit-iwa ay Apo Dios babaen as nan ammay ay atuna. Enpar-ina nan uchan ay nurpu ad chaya, ya inchatna nan apetyu as nan ustу ay timpu. Penennekna chakayu as ongor ay kanunyu ya lagsakyu.” <sup>18</sup> Uray mu assena nan inflagfiakian nan apostoles kan chicha, nalikiatancha challu ay nangepawa as nan tataku as nan munichatonancha kan chicha.

<sup>19</sup> As nan hiyachi, inumchan nan tapen nan Judio ay nurpu ad Antiokia ya Iconio. Chinorchorcha nan tataku ad Listra ay manglomtak kan Pablo. Kuncha pay lenpas ay nanglomtak kan hiya, inkiyadcha hiya ay nangek-ak henan siyudad, tay ka-anancha mu natuy. <sup>20</sup> Ngem kun pay enarufong nan chiyucha omaafurot hiya, naligwat hi Pablo, ya nunfiangad henan chiyuy siyudad. As nan kafikiatana, inmuy cha Pablo kan Bernabe ad Derbe.

### *Nan Nunfiangchancha Ad Antiokia Henan Probinsiya Ay Siria*

<sup>21</sup> Enkaskasaban cha Pablo kan Bernabe nan Ammay ay Chamag ad Derbe, ya ongchorcha nan enmafurot. Angkiay nunfiangadcha ad Listra, ad Iconio, ya ad Antiokia ay siyudad ad Pisidia. <sup>22</sup> Penapigsacha nan pammatten nan chiyucha omaafurot hid-i ay il-ili, ya enawischa chicha ay munturturuy as nan pammatica kan Apo Dios. Kenalicha kan chicha, “Masapor mapachasan takú ongor ay likiat as nan maetapiyan takú henan muntorayan Apo Dios.”† <sup>23</sup> Chinmutok cha Pablo kan Bernabe as mangepangpanguru

---

\* <sup>14:14</sup> Nan laychun ay kanan nan nanglaksetancha as fiachucha at hiyasa nan mangepail-ancha as fungatcha ya saket chi numnumcha winnu maekontra nan cha at-atun nan tataku as nan cha at-atun cha Pablo kan Bernabe. † <sup>14:22</sup> Rom. 5:3-5; San. 1:2-4; 1 Ped. 2:21

as nan tunggal iglesia. As nan narpasancha ay nunkararag ya nun-ayunar, entalekcha chicha as nan Apo ay hiya nan enafurotcha.

<sup>24</sup> Kun pay nar-os cha Pablo henan sakop nan Pisidia, emmalicha henan probinsiya ay Pamfilia. <sup>25</sup> Henan siyudad ay Perge, enkasabacha nan kallen Apo Dios. Angkiay ya kinmuwabcha ad Atalia. <sup>26</sup> Nunlapu ad Atalia, nunpaporcha ay nunfiangad ad Antiokia henan probinsiya ay Siria. Hid-i nan nangekarkarakrakan nan iib-a ay nangetalek kan chicha as nan panang-aywan ya sug-ang Apo Dios para kan chicha as nan chunucha ay hiyasa nan lenpascha ad wani.

<sup>27</sup> Kuncha pay inumchan ad Antiokia, enamongcha nan chiyucha membro as nan iglesia. Empachamagcha nan am-in ay en-enat Apo Dios babaen kan chicha ya nan en-enatna ta nan chiyucha Gentil at omafurotcha koma kan Apo Jesus. <sup>28</sup> Nafayag nan nakepapagyanan cha Pablo kan Bernabe as nan chiyucha omafurot ad Antiokia.

## 15

### *Nan Mitin Nan Omafurot Ad Jerusalem*

<sup>1</sup> As nan hiyachi, wachacha nan tapen nan lanaraki ay nurpu ad Judea ay chinmayyu ad Antiokia. Enlapucha ay mun-isuru as nan chiyucha emmafurot kan Jesu Cristo, ya kanancha, “Mu achi kayu masugyatan ay maiyunud as nan iniili ay ukiali ay insuron Moises at achi kayu maesarkan.” <sup>2</sup> Pararuy enat cha Pablo kan Bernabe ay nakesongfiat kan chicha maepangkep as sa. Isunga nachutokan cha Pablo kan Bernabe ya nan tapina ay omafurot ad Antiokia ay omabrat ad Jerusalem ya makeapat as nan apostoles ya as nan chiyucha anam-amá maepangkep as sa. <sup>3</sup> Angkiay ya penaligwat nan chiyucha omafurot cha Pablo. As nan chacha mar-osan ad Fenicia ya Samaria, infiakiacha as nan chiyucha omafurot hid-i nan emmafurotan nan chiyucha Gentil. As nan nanngorancha as nan hana ay chamag, ongor chi lagsak am-in nan chiyucha omafurot. <sup>4</sup> Kuncha pay inumchan ad Jerusalem, nan iglesia, nan apostoles, ya nan chiyucha mangepangpangguru at enawatcha chicha. As nan narpasan ton, empachamag cha Pablo nan am-in ay enat Apo Dios babaen kan chicha.

<sup>5</sup> Ngem nan tapen nan omafurot ay wacha as nan bunggoy nan chiyucha Fariseo at tenmakchugcha, ya kanancha, “Masapor masugyatan nan chiyucha Gentil ya mafiag-ancha ay mangtongpar as nan Lintig Moises.”

<sup>6</sup> As nan hiyachi, nummimitincha nan apostoles ya nan chiyucha mangepangpangguru ay mangapat as nan maepangkep as sa. <sup>7</sup> Kun pay nafayag chi nangapatancha as sa, tenmakchug hi Pedro, ya kanana kan chicha, “Iib-a, aammuyu met ay ad kasin at piniliyak kan Apo Dios kan chakayu ay uy mangekasaba as nan Ammay ay Chamag as nan chiyucha Gentil ta chumngorcha ya omafurotcha. <sup>8</sup> Hi Apo Dios ay nangammu as numnum nan am-in ay tataku at enpailana ay enawatna nan chiyucha Gentil babaen as nan nangichatana as Espiritu Santo kan chicha ay kaman as nan enatna kan chitaku. <sup>9</sup> Maid enat Apo Dios as natkunan takú kan chicha, taypenakawana chicha as nan fiasfiasorcha as nan emmafurotancha ay kaman kan chitaku. <sup>10</sup> Isunga adchi t'uyyu chischistingun hi Apo Dios as nan nangepad-unanyu kan chicha as nan uchun ay achicha kafaelan? Uray met nan kaap-uwan takú ya chitaku mismu at achi takú challu kafaelan. <sup>11</sup> Numnumunyu kay! Afurotun takú ay naesarakan takú babaen as nan grasyan Apo Jesus ay kaman challu kan chicha.”

<sup>12</sup> As nan hiyachi, kinminakcha am-in nan tataku, ya chinumngorcha as nan cha kankanan cha Bernabe kan Pablo. Enpachamagcha nan maepangkep as nan am-in ay nakaskaschaaw ay sinyar ya milagro ay enat Apo Dios as nan chiyucha Gentil babaen kan chicha.

<sup>13</sup> As nan narpasancha ay nunkali, kenalen Santiago, “lib-a, chumngor kayu kan ha-un. <sup>14</sup> Kaifiagflakian Simon Pedro nan omona ay nangepail-an Apo Dios as sug-angna as nan chiyucha Gentil ta munpili hiya kan chicha as tatakuna. <sup>15</sup> Nan nauy ay enat Apo Dios at inyafudna nan insurat nan chiyucha pomapadtu. Kaman as nan naisurat as nan Kalen Apo Dios ay kanana,

<sup>16</sup> Mu marpas na, munfiangachak ya kasek kiaufun nan mamagyanan Ari David ay nachachael. Kiaufok kasin nan nachachael ya kasinku patakchukun

<sup>17</sup> ta am-in nan tapina pay ay tataku ya am-in nan Gentil ay pinilek as tatakok at anapuncha nan Apo.

<sup>18</sup> Hiyana nan kenalen nan Apo ay nangepakaammu as na ad pus-uy.\*

<sup>19</sup> “Isunga nan wacha as numnumku at achi takú koma lilifokun nan chiyucha Gentil ay cha omafurot kan Apo Dios. <sup>20</sup> Kun takú at masapor munsurat kan chicha ay mangifiaag ay achicha ischa nan naichaton as nan didiosen, nan naparti ay chaan nauykukan, ya nan chara. Nan usa pay at chukkiancha nan mangepapasan as assi ay lachok. <sup>21</sup> Tay nan Lintig Moises at naekasaba nunlapu ad pus-uy henan tunggal ili ya naifiasa as nan kasenasenagoga as nan tunggal Urkiw ay Mun-iblayan.”

### *Nan Surat As Nan Chiyucha Gentil Ay Omaafurot*

<sup>22</sup> Angkiay nan apostoles ya nan mangepangpanguru patí nan intiru ay iglesia at ninumnumcha ay munpili as lanaraki kan chicha ay makiuy kan cha Pablo kan Bernabe ad Antioquia. Pinilicha hi Judas ay makali us un Barsabas ya hi Silas ay chicha nan chuwa ay mangepangpanguru as nan iiba. <sup>23</sup> Cha Judas kan Silas nan nangepaw-etanca as nan nauy ay surat as nan chiyucha Gentil:

“Chakami ay apostoles ya nan mangepangpanguru ay iib-ayu ad Jerusalem at nauy nan suratmi kan chakayu am-in ay Gentil ay omaafurot henan siudad ay Antioquia ya henan sakop nan Siria ya Cilicia. Komosta kayu?

<sup>24</sup> Chinngormi ay wachacha nan nurpu hena ay ib-ami ay inmuy hesa ay nanglilikay ya nangpachanag kan chakayu babaen as nan infiakiacha, uray mu fiakun chakami nan nangifilin kan chicha.

<sup>25</sup> Isunga nunmitin kami ya inyafud nan am-in ay pumili kami as lanaraki ay maifiaor as umuy hesa kan chakayu. Makitun-udcha as nan laylaychun takú ay kiakiyyum ay cha Pablo kan Bernabe

<sup>26</sup> ay nangeposta as fiyagcha ay munserfi kan Apo takú ay Jesu Cristo.

<sup>27</sup> Isunga ifiaormi cha Judas kan Silas ay chicha mismu nan mangpaneknek kan chakayu as nan pachong nan insuratmi.

<sup>28</sup> Enpakaammon nan Espiritu Santo kan chakami ya inyafudmi ay achimi epapelet ay mangepad-un kan chakayu as nan ukialimi. Nan masapor ay tongparunyu at nan nauycha filin yangkay:

<sup>29</sup> Achiyu ischa nan naichaton as nan didiosen, nan chara, ya nan naparti ay chaan nauykukan. Nan usa pay at chukkianyu nan mangepapasan

---

\* <sup>15:18</sup> Amos 9:11-12

as assi ay lachok. Omammaytuy aatunyu mu tongparunyu chaná ay inflinmi. Hiyasa yangkiay nan ifiakiami.”

<sup>30</sup> Kuncha pay lenpas nan suratcha, naepaligwatcha nan nangiyuy ay umuy ad Antioquia. As nan inumchanancha hid-i, enamongcha nan chiyuya omaafurot, at inchatcha nan surat. <sup>31</sup> Kun pay finasan nan chiyuya omaafurot ay i-Antioquia nan surat, ongor chi lagsakcha as nan ammay ay naitukun kan chicha.

<sup>32</sup> Cha Judas kan Silas ay pomapadtu ay mismu at ongor chi infiagfiakiacha ay nanukun ya nangepapigsa as pammatten nan iib-a. <sup>33</sup> Kun pay inmuy chi kaat ay chumingkucha hid-i, penaligwat nan iib-a chicha ay nunfiangad as nan nangifiaor kan chicha, ya kanancha, “Aywanan chakayu koma kan Apo Dios.” <sup>34</sup> [Ngem ninumnum Silas ay mayagyag.] <sup>35</sup> Cha Pablo kan Bernabe at nayagyagcha ad Antiokia ay nangisursurü ya nangekaskasaba as nan kalen nan Apo ay kadwacha nan ongor ay iib-acha ay omaafurot.

#### *Nan Nunsianan Cha Pablo Kan Bernabe*

<sup>36</sup> Kun pay inmuy chi kaat ay urkiw, kenalen Pablo kan Bernabe, “Munfiangadta ay uy mangfisita as nan iib-a takú henan am-in ay ili ay nangekaskasabaanta as nan kalen nan Apo ta ilaunta mu anan chacha attun.” <sup>37</sup> Hi Bernabe at laraychuna ay etakincha hi Juan ay makali us un Marcos, <sup>38</sup> ngem enpapelet Pablo ay un-unuyna mu achicha etakin hiya, tay tenaynana chicha ad Pamfilia, ya chaana inturuy ay finmachang as nan chunucha.<sup>†</sup> <sup>39</sup> Kiapú ta nunsuma as solet cha Pablo kan Bernabe, nunsiancha. Entakin Bernabe hi Marcos, ya nunpaporcha ay inmuy ad Chipre. <sup>40</sup> Ngem hi Pablo at pinilina hi Silas as kadwana. Entalek nan iib-a chicha as nan panang-aywan ya sug-ang Apo Dios henan am-in ay ay-ayancha. Angkiay nunligwatcha, <sup>41</sup> at nar-oscha ad Siria ya Cilicia ay nangepappigsa as nan chiyuya iglesia hid-i.

## 16

#### *Nan Naetapiyan Timoteo Kan Cha Pablo Kan Silas*

<sup>1</sup> Nunfiaat us cha Pablo ad Derbe, angkiay ya ad Listra. Wacha ad Listra nan usa ay omaafurot ay nan ngachana at Timoteo. Hi enana at usa ay Judio ay omaafurot, ngem hi amana at Griego. <sup>2</sup> Hi Timoteo ay anna at ammay chi kaap-apatana as nan am-in ay iib-a ay omaafurot ad Listra ya ad Iconio. <sup>3</sup> Laychun Pablo ay etakin hi Timoteo. Isunga enpasugyatna hiya ta achintu achiyun nan chiyuya Judio hiya henan hanacha lukiar ay ay-ayanchantu. Tay am-in nan Judio at naammuwancha ay Griego hi amana. <sup>4</sup> As nan nunfiaatancha henan il-ili, chacha epakaammu as nan chiyuya Gentil ay omaafurot nan filfilin ay unuchuncha ay inyafud nan apostoles ya nan anam-amá ad Jerusalem. <sup>5</sup> Isunga nan chiyuya iglesia at pinmigsa nan pammadicha ya inurkiw ay omongorchha.

#### *Nan Naepaila Kan Pablo Ad Troas*

<sup>6</sup> Angkiay ya nunfiaat cha Pablo ay nar-os henan sakop nan Frigia ya Galacia, tay chaan enparufus nan Espiritu Santo ay ekasabacha nan kalen Apo Dios henan probinsiya ad Asia. <sup>7</sup> Kuncha pay inumchan henan tikiad nán probinsiya ay Misia, penachascha ay umuy henan probinsiya ay Bitinia, ngem chaan enparufus nan Espiritu Apo Jesus. <sup>8</sup> Isunga nar-oscha ad Misia inkiana inumchancha ad Troas.

<sup>†</sup> 15:38 Ara. 13:13

<sup>9</sup> As nan hiyachi ay lafi, wacha nan enpailan Apo Dios kan Pablo babaen as nan kaman iitaw. Inilana nan usa ay laraki ay i-Macedonia ay nangatakchug ay cha munpakpakaasi. Kenalina kan Pablo, “Omalika man paat ad Macedonia ay mangfiachang kan chakami.”

<sup>10</sup> Kun pay narpas ay inilan Pablo nan kaman iitaw, hiya at chi ya nun-anap kami\* as munlukiananmi ay umuy ad Macedonia, tay naawatanmi ay enayakan chakami kan Apo Dios ay uy mangekasaba as nan Ammay ay Chamag as nan tataku hid-i.

### *Nan Enmafurotan Lydia Ad Filipos*

<sup>11</sup> Nunlapu ad Troas as nan nunlukiananmi as nan papor, nunchakpos kami ad Samotracia. As nan kafikiatana, inumchan kami ad Neapolis. <sup>12</sup> Nunlapu hid-i, nanarcharan kami ay inmuy ad Filipos ay usa ay mafifigfig ay siyudad henan sakop nan Macedonia. Nan kaongoran ay inmili henan hana ay siyudad at Romano. Nagyan kami hid-i as kaat ay urkiw.

<sup>13</sup> As nan Urkiw ay Mun-iblayan, nak-ak kami henan hana ay siyudad, ya inmuy kami henan olet nan wawwang, tay ninumnummi mu wachay lukiar ay maam-amongan chi Judio ay munkararag. Naketokor ya naketakiatfor kami as nan fianafiai ay naamong hid-i. <sup>14</sup> Nan usa as nan chiyuchcha chinumngor kan chakami at hi Lydia ay nurpu henan siyudad ay Tiatira ay mun-el-elaku as nangingina ay lopot. Hiya at usa ay Gentil ay man-angchaychayaw kan Apo Dios. Inchat Apo Dios kan hiyay pannakaawat ta omafurot as nan cha kankanan Pablo. <sup>15</sup> Angkiay nunpafunyagcha ay hinfiaruy. Kun pay narpas sa, kenalina kan chakami, “Mu afurotunyu ay tit-iwa'y enmafurotak kan Apo Jesus, chumawus kayu ngarud as afongmi.” Inturuya ay nangayag kan chakami inkiana nakiuy kami kan hiya.

### *Nan Naifiaruchan Cha Pablo Ad Filipos*

<sup>16</sup> As nan hin-urkiw, as nan chami umuyan henan lukiar ay munkarkarakian, sinib-at chakami as nan mafiabfiaor ay fiasang ay naanennetan. Nakasiping as ongor nan fiasang para as nan chiyuchcha amona kiapú as nan enpaifiakian nan anennet kan hiya ay ommat as tapen chi urkiw. <sup>17</sup> Inmunud kan chakami kan Pablo, ya chana ifugfukiaw, “Chatona ay lanaraki at munserserficha as nan Kangatuwan ay Dios ay cha mangekaskasaba kan chakayu as nan atunyu ay maesarakan!” <sup>18</sup> Enaenatna sa as kaat ay urkiw. Kun pay enmayu as solet hi Pablo, nunsakong, ya kanana as nan anennet, “As nan ngachan Jesu Cristo, filinok he-a ay fomoknag kan hiyal!” Hiya at chi ya fenmoknag tit-iwa nan anennet.

<sup>19</sup> Kun pay inilan nan chiyuchcha amona ay maid at chansacha ay makasipping, lenabkischcha cha Pablo kan Silas. Inkiayadcha chicha ay nangiyuy as nan kawad-an nan totoray as nan mun-el-elakwan. <sup>20</sup> Kuncha pay inyuy chicha as nan chiyuchcha opisyar ay Romano,† kenalicha, “Chatona ay lanaraki at Judiocha, ya chacha munkurkuru henan siyudad takú. <sup>21</sup> Chacha mun-is-isuru as iniili ay ug-ukiali ay komontra as nan lintig takú, ya achi mafialin ay unuchun takú ay Romano.” <sup>22</sup> Angkiay ya naetapi nan ongor ay tataku ay namudtak kan chicha. Nan chiyuchcha opisyar at lenafusancha cha Pablo kan Silas, ya inflinchay masapletcha. <sup>23</sup> Kuncha pay lenpas ay nanaplesaplet kan chicha, enpafiarudcha chicha. Inflinchay as nan munkukuwarcha ay

\* **16:10** Hi Lucas ay nangisurat hena ay liblu at naetapi kan cha Pablo. † **16:20** Nan makali un Romano at taku ay emmara as sichorana as nan gobernon chi Roma.

kuwarchaana chicha ay ustu. <sup>24</sup> Kiapú ta assid-i nan inflin nan chiyuycha opisyar as nan munkukuwarcha, empokokna cha Pablo kan Silas as nan paat nunchuchuku ay kuwartu as pagfiaruchan. Enpatangna nan sukicha as nan nukaketangan ay nun-oomam ay tabra, ya nun-akmuna.

<sup>25</sup> Ngem as nan kiayud tongan chi lafi, cha munkarkararag ya munkankanta cha Pablo kan Silas ay manaychayaw kan Apo Dios, ya nan tapina ay fiarud at chuchumngorcha kan chicha. <sup>26</sup> Kalina at ya kinmichu as napigsa ay nangiawud as nan nasasad-an nan pagfiaruchan. Hiya at chi ya natkafian nan kapantipantiw ya nag-as nan chiyuycha kor-onq nan am-in ay fiarud.

<sup>27</sup> Kun pay finmangun nan kuwarcha, ya inilana ay nanatkafian nan chiyuycha pantiw nan pagfiaruchan, enoknosna nan espadana ya kiayudna patayun nan achorna, tay ninumnumna ay lenmayawcha nan chiyuycha fiarud. <sup>28</sup> Ngem infukiaw Pablo, “Achim patayun nan achormu, tay nauy kami am-in hena.”

<sup>29</sup> Kun pay chinngor nan kuwarcha na, nunpaara hiya as silaw. Tenaggagna ay inmuy as nan kawad-an cha Pablo kan Silas, ya cha munpapayag-pag as ugyatna ay numpalintumang as sangwanancha. <sup>30</sup> Angkiay inpitwiña chicha, ya senarudsudna, “Panguruwan, ngachana ngay nan masapor ay atok ta maesarakananak?”

<sup>31</sup> Tinumforcha, “Omafurotka kan Apo Jesus. Mu hiyasa nan atum, maesarakankantu ya nan pamilyam.” <sup>32</sup> Angkiay ya enkasabacha nan kallen nan Apo kan hiya ya as nan am-in ay tataku as afongna. <sup>33</sup> As nan hiyachi challu ay uras as nan lafi, inyuy nan kuwarcha cha Pablo kan Silas as nan kawad-an nan chanum, ya enlasana nan sugsukiatcha. Kun pay narpas, nunpafunyag hiya ya patí nan pamilyana. <sup>34</sup> Angkiay ya enayakiana cha Pablo kan Silas as afongna, ya ensakianaana chicha as kanuncha. Ongor chi lagsakna patí nan pamilyana, tay enmafurotcha kan Apo Dios.

<sup>35</sup> As nan kafikiatana, inmifiaor nan chiyuycha opisyar ay Romano as pupulis ay uy mangifilin as nan kukuwarcha, “Ilufusmu nan hanacha lanaraki.”

<sup>36</sup> Angkiay infiakian nan kuwarcha kan Pablo, “Inflin nan chiyuycha opisyar ay Romano ay mailufus kayu kan Silas. Ad wani, mafialin at ay makak kayu, ya wacha komay talna kan chakayu.”

<sup>37</sup> Ngem kenalen Pablo as nan pupulis, “Kun chakami cha enpasaplet as nan kaongoran chi tataku ya. Chaan chakami pay finistikiar on-oná. Uray mu Romano kami, enpaifiarud chakami pay laing. Angkiay ad wani, laychun chakami ay ilufus kan chakayu ay maid mangam-ammu? Achi mafialin! Masapor chicha mismu nan omali ay mangilufus kan chakami.”

<sup>38</sup> Empachamag nan pupulis chaná ay kenalen Pablo as nan chiyuycha opisyar. Inmugyatcha as nan nanngorancha ay Romano payat cha Pablo kan Silas. <sup>39</sup> Isunga kenamucha ay inmuy as nan pagfiaruchan, at nunpakawanancha kan cha Pablo kan Silas. Angkiay inpitwiña chicha as pagfiaruchan, ya chinawatcha kan chicha ay mak-akcha henan siyudad. <sup>40</sup> As nan nakakan cha Pablo kan Silas as pagfiaruchan, inmuycha as afong Lydia. Hid-i nan nanib-atancha as nan iib-a ay omaafurot, ya penapigsan cha Pablo nan pammatichcha babaen as nan kenalicha. Angkiay nak-akcha henan hana ay siyudad.

## 17

### *Ad Tesalonica*

<sup>1</sup> Nunlapu ad Filipos, nanarcharan cha Pablo ay nanguy henan siyudad ay Amfipolis ya Apolonia inkiana inumchancha ad Tesalonica ay kawadan nan usa as nan chiyuycha senagogan chi Judio. <sup>2</sup> As nan hiyachi, inmuy hi Pablo as nan senagoga ay hiyachi challu nan chana atuutun. As nan turu ay Urkiw ay Mun-iblayan, nakeap-apat hiya as nan naamong ay tataku maepangkep as nan naisurat as nan Kalen Apo Dios. <sup>3</sup> Enlawlawag ya penanekekan Pablo ay nan Cristo at masapor munlikiat ya matak manipud as nan utúy. Kenalina kan chicha, “Hi Jesus ay anna ay chak ifiagfiakia kan chakayu at hiya nan Cristo.” <sup>4</sup> Nan tapina kan chicha at enmafurotcha ya naetapicha kan cha Pablo kan Silas. Kaman us as nan ongoongor ay Griego ay manangchaychayaw kan Apo Dios ya nan ongor ay mafifigfigfig ay fianafiai.

<sup>5</sup> Ngem enmapos nan chiyuycha Judio ay achi omaafurot. Isunga enamongcha nan chiyuycha lanaraki ay nunkapadsok ay kun yangkiay cha munforforakfor as nan mun-el-elakwan, ya entapicha as nan enamongcha ay ongor ay tataku. Kun pay chaan nafiayag, nunlumucha as kuru henan siyudad. Peneletcha ay sungkop as nan afong Jason, tay nan ammuchu at maanapancha cha Pablo kan Silas ta papitiwuncha chicha ay mangiyuy as nan sangwanan nan tataku. <sup>6</sup> Ngem kuncha pay chaan naanapan chicha, hi Jason ya nan tapen nan iib-a at inkiyadcha ay nangiyuy as nan anap-apu henan siyudad. Chacha ifugfukiaw, “Nan nauycha tataku ay nunkurukuru henan am-in ay lukiar asna's luta at emalicha hena ay munkuru kan chitaku, <sup>7</sup> at menangileng Jason chicha. Am-in chaná at chacha lablabsingun nan chiyuycha lintig Emperador ay kanancha un wachay tukún ay ari ay nan ngachana at Jesus.” <sup>8</sup> As nan nanngoran nan ongor ay tataku ya nan anap-apu henan siyudad as na, nurmuy kuru. <sup>9</sup> Nunfiansaun nan chiyuycha toray cha Jason ya nan iib-a, at inlufuscha chicha.

### *Ad Berea*

<sup>10</sup> As nan hiyachi challu ay lafi, penaligwat nan iib-a cha Pablo kan Silas ay umuy ad Berea. Kuncha pay inumchan hid-i, inmuycha as nan senagogan chi Judio. <sup>11</sup> Nan chiyuycha Judio ay wacha ad Berea at mannakaawatcha mu nan i-Tesalonica, tay ongor chi layadcha ay nanngor as nan kalen Apo Dios. Inurkiw ay chacha achaacharun nan naisurat as nan Kalen Apo Dios ta ammuwuncha mu tit-iwa nan kenarkalen Pablo. <sup>12</sup> Ongor as nan chiyuycha Judio nan enmafurot, ya ongor nan enmafurot as nan chiyuycha Griego ay fianafiai ay nunkafiaknang ya ongor us nan lanaraki ay Griego.

<sup>13</sup> Ngem kun pay chinngor nan chiyuycha Judio ad Tesalonica ay cha us ekaskasaban Pablo nan kalen Apo Dios ad Berea, inmuycha us hid-i, at enlapucha ay nanugsug ya nangkuru as nan tataku. <sup>14</sup> Hiya at chi ya penaligwat nan iib-a ay omaafurot cha Pablo ay chumayyu henan olet nan fiayfiay, ngem nayagyag cha Silas kan Timoteo ad Berea. <sup>15</sup> Nan chiyuycha nangitun-ud kan Pablo at inturudcha hiya inkiana henan siyudad ay Atenas. Angkiay nunfiangadcha ay uy nangifiakia as nan infilin Pablo ay kamuwun koma cha Silas kan Timoteo ay umunud kan hiya.

### *Hi Pablo Ad Atenas*

<sup>16</sup> As nan nunsusuchan Pablo ad Atenas kan cha Silas kan Timoteo, nalilifok as solet nan numnumna as nan nangil-ana as nan ongoongor ay didiosen henan hana ay siyudad. <sup>17</sup> Isunga inmuy hiya as nan senagoga ay

nakeap-apat as nan chiyucha Judio ya as nan chiyucha Gentil ay man-angchaychayaw kan Apo Dios. Uray as nan mun-el-elakwancha, inurkiw ay uy nakeap-apat hiya as nan kumpurmi ay tataku ay nad-anana.<sup>18</sup> Wachacha nan tapen chi mimisturu ay makali un Epicureo\* ya Estoico ay uy nakesosek us kan hiya. Senarudsud nan tapina kan chicha, “Anan cha ngun lawá kankanan toná ay taku ay maid acharna?” Nan tapina us at kenalicha, “Kamana cha ekaskasaba nan chiyucha kaili ay dios.” Kenalicha sa, tay enkasaban Pablo nan maepangkep kan Jesus ya nan matakawan manipud as nan utúy.

<sup>19</sup> Angkiay enpaiuyucha hiya as nan anap-apon chi umili ay makali un Areopago, ya kanancha, “Laychunmi man ay ammuwun nan nauy fiarú ay sursuru ay cham kankanan,<sup>20</sup> tay nan kenarkalem at maid poros chinchingormi as kaman as nan nauycha, ya laychunmi ay ammuwun nan laychun nan nauycha ay kanan.”<sup>21</sup> Am-in nan umili ad Atenas ya uray nan chiyucha kaili ay nagyan hid-i at kuncha laychun ay cha mangifiagfiakia ya cha manmanngor as nan fiarú ay sursuru.

<sup>22</sup> Isunga temakchug hi Pablo as nan sangwanan nan anap-apon chi umili ay makali un Areopago, ya kanana, “Chakayu ay umiili hena ad Atenas, mailak ay as nan am-in at relihiyoso kayu.<sup>23</sup> Tay as nan numpaspas yorak henan siyudadyu ya as nan nangil-il-ak as nan chiyucha mun-chaychayawanyu, inuchanak nan altar ay naisuratan nan kali ay kanana, ‘Para as nan Dios ay Achimi Am-ammu.’ Nan chiyuy chayu chaychayawun ay achiyu am-ammu at hiya nan chak epakaammu kan chakayu ad wani.<sup>24</sup> Nan Dios ay namayang as nan lufong ya as nan am-in ay wacha hena at hiya nan Apo ad chaya ya asna’s luta, ya achi mamagyan as nan chiyucha templo ay enammaan chi taku.<sup>25</sup> Maid poros kasaporana as ifiachang chi taku kan hiya, tay hiya mismu nan mangichat as fiyag, long-ag ya am-in ay kasaporan takú.<sup>26</sup> Manipud as nan usa yangkiay ay taku, finayang Apo Dios nan am-in ay karasen chi tataku ya epapagyana chicha henan intiru ay luta. Enkeddengna us nan chiyucha ustuustu ay timpu ya nan chiyucha munpatingkiaan nan tikiad nan nasyoncha.<sup>27</sup> Enat Apo Dios na ta anapun nan tataku hiya ya uchanancha hiya as nan chacha munkapkapokapan ay manganap kan hiya. Nan kenatit-iwana at achi achawwi hiya as nan tunggal usa kan chitaku.<sup>28</sup> Tay wacha nan nangali un,

‘Hiya nan mangichat as nan fiyag kan chitaku ya mangaywan kan chitaku as nan ay-ayan takú ya matatakuwan takú.’

Kaman as nan kenalen nan tapen nan uyyu sumusurat,  
‘Chitaku nan an-akna.’

<sup>29</sup> Kiapú ta an-ak chitaku kan Apo Dios, achi takú ngarud numnumnumun ay maepachong nan kenadiosna as nan kumpurmi ay dios ay fialetok, silver, winnu fiatu ay enammaan chi taku ay nurpu as nan laingna ya mismu ay numnumna.<sup>30</sup> As nan timpu ay chaan pay nangammuwan nan tataku kan Apo Dios at inyangkiayana nan fiasfiasorcha. Ngem ad wani, infilina as nan am-in ay tataku henan uray ngachana ay lukiar ay munfiafiawicha as nan am-in ay fiasorcha.<sup>31</sup> Tay enkekeddeng at Apo Dios nan urkiw ay mangokomanantu as nan am-in ay tataku asna’s luta. Nalintigu nan atuna ay mun-okóm babaen as nan usa ay taku ay pinilina. Penaneknekan Apo Dios

\* **17:18** Chatona nan mangali un unuchun koma nan taku nan wacha as numnumna, tay nan numnum yangkiay nan mangetoray as nan achor.

na as nan am-in ay tataku babaen as nan nangtakuwana kan hiya manipud as nan utúy.”

<sup>32</sup> Kuncha pay chinngor nan kenalen Pablo maepangkep as nan matakwan manipud as nan utúy, nan tapina at enot-otyokcha hiya. Ngem wachacha nan tapina ay nangali, “Laychunmi ay chungrun kasin kan he-a nan maepangkep as nan kenalem.” <sup>33</sup> As nan hiyachi, tenaynan Pablo chicha. <sup>34</sup> Ngem wachacha nan tapina ay inmunud kan Pablo ya enmafurot kan Jesus. Nan usa kan chicha at hi Dionisio ay usa ay membron nan Areopago. Nan usa us at fiafiai ay nan ngachana at Damaris, ya wachacha pay nan tapina.

## 18

### *Ad Corinto*

<sup>1</sup> Kun pay narpas sa, nak-ak hi Pablo ad Atenas, ya inmuy hiya ad Corinto. <sup>2</sup> Hid-i nan nangam-ammuwana as nan usa ay Judio ay nan ngachana at Akila ay naiyanak ad Ponto. Kaar-ali hiya ay nurpu ad Italia ay kadwana hi asawana ay Priscila, tay infilin Emperador Claudio ay am-in nan Judio at mak-akcha ad Roma. Uy finisitan Pablo chicha. <sup>3</sup> Kiapú ta pachongna chicha ay mun-am-amma as fiawi ay naamma as larat, nakeafong ya nakidnu hiya kan chicha. <sup>4</sup> Kun kay Urkiw ay Mun-iblayan un inmuy hi Pablo as nan senagoga ay uy makeap-apat ta awisuna nan chiyucha Judio ya nan chiyucha Griego.

<sup>5</sup> Kun pay inumchan cha Silas kan Timoteo ad Corinto as nan nurpuwan-cha ad Macedonia, kun yangkiay nun-ekaskasaba hi Pablo ay mangepan-paneknek as nan chiyucha Judio ay hi Jesus nan Cristo. <sup>6</sup> Kuncha pay kenontra ya enkak-aliyan hiya, inyagyagna nan tapok as fiachuna ta epailana ay maid at fiyangna kan chicha, ya kanana, “Chakayu ay mismu nan kikiad as nan machusaanyu! Maid fiasorku's sa. Munlapu ad wani, umuyak as nan chiyucha Gentil.”

<sup>7</sup> Nak-ak hiya hid-i, ya uy nakepagyan as nan afong nan usa ay laraki ay nan ngachana at Ticio Justo ay manangchaychayaw kan Apo Dios. Nan afongna at naesasag-un as nan senagoga. <sup>8</sup> Hi Crispio ay ap-apu as nan senagoga at enmafurot kan Apo Jesus patí nan pamilyana. Nan ongor us as nan i-Corinto ay nanngor as nan enkaskasaban Pablo at enmafurotcha ya nunpafunyagcha.

<sup>9</sup> As nan henlafi, kenalen nan Apo kan Pablo babaen as nan kaman iitaw, “Achika umug-ugyat. Kunmu at iturturuy ay mun-ekaskasaba, ya achim ikinkinak nan cham at-atun, <sup>10</sup> tay wachaak kan he-a. Maid taku ay manusfusor ay mangsukiat kan he-a, tay ongor nan tatakok henan nauy ay siyudad.” <sup>11</sup> Isunga nakepagyan hi Pablo hid-i as usa ay tawwun ya unum ay furan ay nangisursuru as kalen Apo Dios as nan tataku.

<sup>12</sup> Kun pay nun-gobernador hi Galion ad Acaya, nun-us-usacha nan Judio ay naniliw kan Pablo, ya inyuycha as nan kurti. <sup>13</sup> Kenalicha, “Hi tona ay taku at chana sugsukian nan tataku ta nan atuncha ay munchaychayaw kan Apo Dios at maekontra as nan lintig.”

<sup>14</sup> Uy koma munkali hi Pablo, ngem nunkanan Galion as nan chiyucha Judio, “Mu nan charumyu at maepangkep as nan achi ustу winnu mangotetet ay naekaman, mafialin ay uray anosak ay chumngor kan chakayu ay Judio.

<sup>15</sup> Ngem kiapú ta maepangkep yangkiay as nan chiyucha kali, ngachan ya nan lintig ay chayu un-unuchun, kikiad kayu's sa ay mangenongnong.

Achek laychun ay ha-un chi mangokóm as nan hanacha.” <sup>16</sup> Angkiay ya enpak-akna chicha as nan kurti. <sup>17</sup> As nan hiyachi, lenabkischa hi Sostenes ay ap-apu as nan senagoga, ya penak-opak-orcha hiya as nan sangwanan nan kurti. Ngem kun inyangkiayan Galion chicha.

### *Nan Nunfiangchan Pablo Ad Antioquia*

<sup>18</sup> Nakepagyan hi Pablo ad Corinto as ongor pay ay urkiw as nan iib-ana ay omaafurot. Angkiay ya as nan nanaynanana kan chicha ay uy munpapor ay munfiangad ad Siria ay kadwana cha Priscila kan Akila. Nanarcharancha at inmuy ad Cencrea ay hid-i nan nunpapollokan Pablo ta mangepail-ana ay natongpar nan ensapatanan kan Apo Dios. <sup>19</sup> Kun pay inumchan nan papor ad Efeso, tenaynan Pablo cha Priscila kan Akila. Inmuy hiya as nan senagoga, ya nakesossosek as nan chiyucha Judio. <sup>20</sup> Chinawatcha kan hiya ay mafiayfiayag pay koma hiya hid-i, ngem chaana lenayad. <sup>21</sup> Kun at as nan nunpakachaana kan chicha, kenalina kan chicha, “Munfiangachaktu kan chakayu mu eparufus Apo Dios.” Angkiay ya nunlukian hiya as nan papor ay mak-ak ad Efeso.

<sup>22</sup> Kun pay inumchan hiya ad Cesarea, enmabrat ad Jerusalem ay uy mangepakomosta as nan chiyucha omaafurot hid-i. Angkiay kinmuwab ad Antioquia. <sup>23</sup> Kun pay inmuy chi kaat ay timpuna hid-i, nak-ak hiya, ya inmuy henan sakop nan Galacia ya Frigia ay cha mangepappapigsa as pammaten nan am-in ay omaafurot.

### *Nan Nun-isuruwan Apolos Ad Efeso Ya Ad Corinto*

<sup>24</sup> As nan hiyachi us ay timpu, wacha nan usa ay Judio ay enmali ad Efeso ay nan ngachana at Apolos ay i-Alejandria. Naraing hiya ay mun-isuru ya ongor chi ammunaa as nan naisurat as nan Kalen Apo Dios. <sup>25</sup> Naisursuruwan hiya as nan makali un Charan Apo Jesus, ya makakud hiya ay nangifiagfiakia ya nangisursuru ay ustus as nan maepangkep kan Jesus. Ngem nan ammunaa yangkiay at nan funyag ay insuron Juan. <sup>26</sup> Enlapuna ay mun-isuru ay wachay turudna as nan senagoga. Kun pay chinngor cha Priscila kan Akila nan chana kankanan, enayakiancha hiya as afongcha, ya enlawlawagcha kan hiya nan achina pay laing ammu maepangkep kan Jesus ya nan charan ay muntoróng as nan panangesarakan Apo Dios as nan tataku. <sup>27</sup> Kun pay plenanon Apolos ay kumchang ad Acaya, penapigsan nan iib-a ay omaafurot ad Efeso nan numnumna. Nunsuratcha as nan iib-a ay omaafurot ay wacha ad Acaya ta ayakianchantu hi Apolos mu umchan’ hiya hid-i. Kun pay inumchan hiya hid-i, ongor chi infiachangna as nan chiyucha omaafurot babaen as nan grasyan Apo Dios. <sup>28</sup> Pararuy enatna ay nakesosek as nan chiyucha Judio as nan kaongoran chi tataku, ya enamisna chicha babaen as nan penaneknekana kan chicha ay nurpu as nan chiyucha naisurat as nan Kalen Apo Dios ay hi Jesus nan Cristo.

## 19

### *Hi Pablo Ad Efeso*

<sup>1</sup> As nan kawad-an Apolos ad Corinto, nunfiaat hi Pablo ay nanguy henan sakop nan Galacia ya Frigia inkiana inumchan ad Efeso. Hid-i nan nanguchanana as nan tapen nan omaafurot. <sup>2</sup> Senarudsudna kan chicha, “Ay enawatu nan Espiritu Santo as nan enmafurotanu kan Jesus?”

“Chaan!” ensongfiatcha, “Maid poros chinchinngormi ay wacha payat chi Espiritu Santo.”

<sup>3</sup> Kenalen Pablo, "Mu hiyasa, ngachana ngay ay funyag nan enawatyu?" "Nan funyag ay insuron Juan," ensongfiatcha.

<sup>4</sup> Angkiay ya kenalen Pablo, "Nan funyag ay insuron Juan at para as nan tataku ay nunfiafiawi as nan fiasfiasorcha. Infiakiana as nan tataku ay masapor omafurotcha as nan umunudtu kan hiya ay hi Jesus."

<sup>5</sup> As nan nanngorancha as sa, nunpafunyagcha ay mangepaila ay hi Jesus nan Apocha. <sup>6</sup> Kun pay enpatay Pablo nan limana kan chicha, enmali kan chicha nan Espiritu Santo. As nan hiyachi, nunkakalicha as tanuktukún ay kali ay enpakalen nan Espiritu Santo, ya empakaammucha nan enpaifiakian Apo Dios kan chicha. <sup>7</sup> Nan filang nan chiyuycha lanaraki at umuy as hinpuru ya chuwa am-in.

<sup>8</sup> Kun kay Urkiw ay Mun-iblayan, as nan turu ay furan ay kawad-an Pablo hid-i, sinungbungkop hiya as nan senagoga, ya naturud ay nunkarkali as nan tataku. Nakesossosek hiya ay mangawis kan chicha ta afurotuncha koma nan maepangkep henan muntorayan Apo Dios. <sup>9</sup> Ngem wachacha nan tapina kan chicha ay nunkasokel ya achi poros omafurot. Enkakaliyancha nan makali un Charan Apo Jesus as nan sangwanan nan am-in ay naamong. Isunga tenaynan Pablo chicha, ya entakina nan chiyuycha omafurot. Inurkiw ay nakesossosek hiya kan chicha as nan oswelaan Tirano. <sup>10</sup> Nunturturuy na ay en-enat Pablo as chuwa ay tawwun ta am-in nan chiyuycha umili henan probinsiya ay Asia ay chicha nan chiyuycha Judio ya Gentil at chungruncha nan kalen Apo Dios maepangkep kan Apo Jesus.

### *Nan Lanaraki Ay Potot Sceva*

<sup>11</sup> En-enat Apo Dios chi nakaskaschaaw as solet ay milagro babaen kan Pablo. <sup>12</sup> Isunga uray nan chiyuycha panyuna ya pangchunu ay fiachuna at as nan naiuyuchan as nan chiyuycha munsaket ya naanennetan, nakaan nan saketcha ya femoknagcha nan anennet kan chicha. <sup>13</sup> As nan hiyachi ay timpu, wachacha nan tapina ay Judio ay nurliklikud ay cha mangepakpak-ak as anennet. Penachascha ay mangos-osar as nan ngachan Jesus. Kenalicha as nan chiyuycha anennet, "Filinok chakayu, kiapú as nan pannakafialin nan ngachan Jesus ay ekaskasaban Pablo, mak-ak kayu."

<sup>14</sup> Nan pitu ay potot Sceva ay usa ay kangatuwan ay pachen chi Judio nan cha mangekamkaman as na. <sup>15</sup> Ngem as nan hin-urkiw kenalen nan anennet kan chicha, "Hi Jesus at am-ammok ya hi Pablo at am-ammok us, ngem chakayu ngay, anan ngachanyu?" <sup>16</sup> Angkiay ya enmagkiang nan laraki ay naanennetan as nan pitu ay potot Sceva, ya sinukiatarana chicha as solet inkiana enamisna am-in chicha. Nan pitu at lenmayawcha ay nunkalafusan ya nunkasukiatan ay nak-ak as nan chiyuy ay afong.

<sup>17</sup> Kun pay naammuwan am-in nan chiyuycha Judio ya nan chiyuycha Gentil ay inmiili ad Efeso nan enommat, inmugyatcha am-in as solet, ya naichaychayaw nan ngachan Apo Jesus. <sup>18</sup> Nan ongor us as nan chiyuycha emmafurot at enmalicha ay nangipudnu ya nangepakaammu as nan man-angotettet ay en-enatcha. <sup>19</sup> Nan tapina kan chicha ay nunsarsaromangka at enamongcha nan libliblucha ya piuorancha am-in ay iilaun chi ongor ay tataku. Finilangcha nan fioror nan chiyuycha liblu at umuy as leman puru ay lifu as nan sipingcha. <sup>20</sup> Isunga nunchinamag nan kalen Apo Dios maepangkep kan Apo Jesus, ya enmongoongor nan emmafurot kan hiya.

### *Nan Nunkukuruwancha Ad Efeso*

<sup>21</sup> Kun pay narpas chaná ay enommat, enkeddeng Pablo ay manguy ad Macedonia ya ad Acaya as nan umuyana ad Jerusalem. Kenalina, “Mu marpasak ay umuy hid-i, masapor us umuyak ad Roma.” <sup>22</sup> Enpaon-onana nan chuwa ay fumadfiachang kan hiya ay cha Timoteo kan Erasto ay umuy ad Macedonia. Kun pay hiya at nayagyag as henkemad henan probinsiya ay Asia.

<sup>23</sup> As nan hiyachi ay timpu ay kawad-an Pablo ad Efeso, nunlapuy kauugyat ay kuru kiapú as nan makali un Charan Apo Jesus. <sup>24</sup> Tay hi Demetrio ay munfusfusór as silver ay lanchok at ongor chi kiaransiyán nan chiyucha munlaglagfuwuna ay mun-am-amma as ab-abfong nan dioscha ay fiafai ay hi Artemis. <sup>25</sup> Isunga enamong Demetrio nan am-in ay munlaglagfuwuna ya nan chiyucha pachongna ay munfusfusór. Kenalina kan chicha, “Kakadwa, ammuyu met ay nan nauy chunu takú at hiyana nan omor-an takú as kenafiaknang takú. <sup>26</sup> Ilaunyu ya chungrunu ay hi Pablo ay anna at enawisna ya ensallana nan ongoongor ay tataku, fiakun yangkiay hena ad Efeso ngem kiayud am-in henan intiru ay probinsiya ay Asia. Chana kanan un nan didiosen ay enammaan chi taku at fiakun tit-iwa ay dios. <sup>27</sup> Nan iyugyat takú at mu mangisiw nan kaapatan nan chunu takú, maidtu lomaku. Fiakun yangkiay sa, tay uray nan templon nan amud ay dios ay fiafai ay hi Artemis at mamaid nan kotokna. Uray hi Artemis mismu ay chaychayawun nan tataku henan intiru ay Asia ya henan intiru ay luta at machachael nan kenadiosna.”

<sup>28</sup> Kuncha pay chinngor nan nauy kenalen Demetrio, finnungatcha as solet, ya infukiawcha, “Machaychayaw hi Artemis ay dios ay fiafai ad Efeso!” <sup>29</sup> Kun pay chaan nafiyag, nakuru nan hana intiru ay siyudad. Nan ongor ay tataku at tiniliwcha nan chuwa ay i-Macedonia ay cha Gayo kan Aristarco ay nakifiabfaat kan Pablo. Nakigsan nan tataku ay tenmagtag ay cha mangikiaykiayad as nan nauycha chuwa ay umuy as nan ad-achaan ay maam-amongan nan umili. <sup>30</sup> Laraychun Pablo ay umuy hid-i ay maesakiang as nan ongor ay tataku, ngem enpawan nan chiyucha omaafurot. <sup>31</sup> Nan tapen nan totoray henan probinsiya ay kiakiayyum Pablo at inmifiaorchas uy munpasug-ang kan hiya ay achi uy munpaila hiya as nan maam-amongan.

<sup>32</sup> Nan chiyucha naamong ay tataku at munngangakcha as solet. Chacha ifugfukiaw chi achi mapapchong, tay kaongoran kan chicha nan achi nangammu as nan kiapúna as uycha naamongan. <sup>33</sup> Kiapú as sa, enpasakiang nan tapen nan Judío nan usa ay kadwacha ay hi Alejandro as nan naaamong ay tataku. Angkiay insinyas Alejandro nan limana ay mangepakinak as nan tataku ta elawlawagna kan chicha ay nan nauy kuru at chaan nurpu as nan chiyucha Judío. <sup>34</sup> Ngem kuncha pay enmatonan ay Judío hiya, nagnagrubcha ay nangifugfukiaw as nan nauy as nan kiayud chuwa ay uras: “Machaychayaw hi Artemis ay dios takú ad Efeso!”

<sup>35</sup> Kun pay enpakinak nan ap-apu henan siyudad chicha, kenalina, “Kailiyak ay i-Efeso, ay kun challu wachay uray usa ay tatu as achi nangammu ay chitaku ay i-Efeso nan mangay-aywan as nan templon nan machaychayaw ay Artemis ya nan nasantowan ay fiatu ay kapadpachongna ay nag-as ay nurpu ad chaya ad kasin? Maid met! <sup>36</sup> Maid makaesaot as nan nauycha. Isunga masapor kuminak kayu, ya achi kayu munkiakianat. <sup>37</sup> Uyyu lawá inyali chaná ay lanaraki uray kun maid enak-akiwcha as nan

chiyuycha templo winnu kenarkalicha as maifusor maepangkep as nan dios takú ay fiafiai. <sup>38</sup> Mu hi Demetrio ya nan munfusor ay kakadwana at wachay charumcha as nan kumpurmi ay taku, wacha nan chiyuycha urkiw ay munchunuan as kurti ya wachacha hid-i nan totoray. Hid-i koma nan munchichinnarumancha. <sup>39</sup> Ngem mu wachacha pay chi tapina ay laychunyu ay ifiakia, maenongnongtu as nan timpu ay munmitmitinan chi umili. <sup>40</sup> Tay nan maiyugyat at nan maicharuman takú kiapú as nan nauy enommat ay kuru ad wani. Mu hiyasa, maid poros ustus as maepanfor takú maepangkep as nan nauy kuru.” <sup>41</sup> Kuna pay kenali na, empak-akna nanongoongor ay tataku.

## 20

### *Nan Nunfiangchan Cha Pablo Ad Macedonia Ya Ad Grecia*

<sup>1</sup> Kun pay narpas nan kuru, enpaamong Pablo nan chiyuycha omaafurot ya penapigsana nan pammaticha. Angkiay nunpakacha hiya ay umuy ad Macedonia. <sup>2</sup> Kun pay inumchan hiya ad Macedonia, nun-ekaskasaba ay nangepapigsa as nan pammatten nan chiyuycha omaafurot henan am-in ay siyudad ay inuyna. Angkiay inmuy hiya ad Acaya ay makali us un Grecia <sup>3</sup> ay hid-i nan nagyanana as turu ay furan. As nan kiayudna munpaporan ay umuy koma ad Siria, naammuiana ay nuntuturag nan chiyuycha Judio ay mangpatuy kan hiya. Isunga enkeddengna ay kun at munfiangad ay manarcharan ay mar-os ad Macedonia. <sup>4</sup> Nan chiyuycha nangadwa kan hiya at hi Sopatro ay potot Pirro ay i-Berea, cha Aristarco kan Segundo ay i-Tesalonica, hi Gayo ay i-Derbe, hi Timoteo,\* cha Tikico kan Trofimo ay nurpu henan probinsiya ay Asia. <sup>5</sup> Nangon-oná chaná am-in ya sisin-ud chakami ad Troas. <sup>6</sup> As nan narpasan nan Fiastan chi Tenapay ay Maid Lebadurana, nunpapor kami nunlapu ad Filipos. Kun pay inmuy chi lema ay urkiw, inumchan kami ad Troas, at ininchananmi nan iib-ami ay nangon-oná ad Troas ay hid-i nan nagyananmi as pitu ay urkiw.

### *Nan Nangtakuan Pablo As Nan Natuy Ad Troas*

<sup>7</sup> As nan Chumingku, nakeamong kami as nan chiyuycha omaafurot ay i-Troas ay makekan as nan tenapay ay mangnumnumnumumanmi as nan natuyan Apo Jesus. Kun pay narpas sa, nun-isuru hi Pablo as nan tataku, ya kiapú ta plenanuna ay mak-ak as nan kafikiatana, inturuyna inkiana tongan chi lafi. <sup>8</sup> Ongor chi silaw as nan nunngangatu ay kuwartu ay naamonganmi. <sup>9</sup> Wacha nan fumarfiaru ay nan ngachana at Eutico ay nangatokor as nan sawang. Kiapú ta nafiyag chi cha mun-isursuruwan Pablo, nunyumyumug hi Eutico inkiana naimugmug, at nag-as manipud as nan maekatlu ay kiarachu inkiana as chará. As nan nangokwatancha, nanatuy at hiya. <sup>10</sup> Ngem chinmayyu ay dagus hi Pablo, at nunyongyong ya enakworna nan fumarfiaru, ya kanana, “Achi kayu machanakian, tay kutug ay matataku hiya.” <sup>11</sup> As nan kasin enmabratan Pablo, nakekan kami as nan tenapay ay mangnumnumnumumanmi as nan natuyan Jesus. As nan narpasanmi ay nangan, inturuyna ay nun-isuru inkiana cha mawaor. Angkiay nak-ak kami. <sup>12</sup> Enkatamcha nan fumarfiaru ay kutug ay matataku, ya ongor chi lagsakcha.

### *Nan Inmuyan Pablo Ad Miletu*

---

\* **20:4** Ara. 16:1-3

<sup>13</sup> Enmon-onam ihi ay nunpapor, ya immuy kami ad Asson ay hid-i nan manag-usanmi kan Pablo. Hiyana nan infiakiana kan chakami, tay kun kanu manarcharan hiya ay umuy hid-i. <sup>14</sup> As nan nanib-atana kan chakami ad Asson, nakilukian hiya kan chakami ay nangituryu ad Mitilene. <sup>15</sup> As nan kafikiatana, inumchan kami henan chuchumangun nan Chio. As nan maekadwa ay urkiw, enmali kami ad Samos. Kun pay as nan maekatlu ay urkiw, inumchan kami ad Milet. <sup>16</sup> Ninumnum Pablo ay achi kami munchag-os ad Efeso ta achi matakta hiya henan probinsiya ay Asia. Cha munkakamu hiya ay umchan ad Jerusalem ta mu mafialin, umchan hiya hid-i sakbay ay Fiastan chi Pentecostes.

### *Nan Nunpakachaan Pablo Ad Efeso*

<sup>17</sup> As nan kawad-anmi ad Milet, enpaayag Pablo nan chiyucha mangepangpanguru as nan iglesia ad Efeso ay maisib-at kan hiya. <sup>18</sup> Kuncha pay inumchan, kenalina kan chicha, "Chakayu ay mismu nan nangammu as nan panagfiyagku as nan napkepagpagyanak kan chakayu nunlapu as nan omona ay urkiw ay emmaliyak hena ay probinsiya ay Asia. <sup>19</sup> Nunserifiyak kan Apo Jesus at tit-iwa ay nunpakumbabaak ya limmuwaak. Nachistingak pay as solet kiapú as nan planon nan chiyucha iib-ak ay Judio ay mangpatuy kan ha-un. <sup>20</sup> Ammuyu ay maid chaanku infiakia ay para as nan omammayanyu as nan nunkaskasabaak ya nun-is-isuruwak kan chakayu as nan kaongoran chi tataku ya as nan ab-afongyu. <sup>21</sup> Finag-ak nan chiyucha Judio ya Gentil ay masapor munfiafiawicha as nan fiasfiasorcha kan Apo Dios, ya omafurotcha kan Apo takú ay Jesu Cristo.

<sup>22</sup> "Ad wani, kiapú as nan nangepanguwan nan Espiritu Santo kan ha-un, umuyak ad Jerusalem, uray achek ammu mu anan ommattu kan ha-un hid-i. <sup>23</sup> Nan ammok yangkiay at finag-anak as nan Espiritu Santo ay maifiaruchaktu ya mapalikiataktu henan am-in ay siyudad ay ay-ayak. <sup>24</sup> Ngem achek ayyiwan nan fiyagku ay kaman achi napateg kan ha-un ta lopasok nan enpadnon Apo Jesus ay hiyasa nan mangekasabaak as nan Ammay ay Chamag maepangkep as nan grasyan Apo Dios.

<sup>25</sup> "Ad wani, ammok ay chakayu am-in ay nangekaskasabaak as nan maepangkep henan muntorayan Apo Dios nan achintu kasin mangil-ila kan ha-un. <sup>26</sup> Isunga epapeletku ay mangifiakia kan chakayu ad wani ay urkiw ay maid fiasorku mu wachachay tapina kan chakayu ay maisiyan kan Apo Dios ta machusa. <sup>27</sup> Tay maid met chaanku infiakia kan chakayu as nan am-in ay penangkep Apo Dios.

<sup>28</sup> "Aywananyu nan mismu ay pammatiyu ya am-in nan chiyucha omaafurot ay enpaaywan nan Espiritu Santo kan chakayu. O, chakayu ay maepachong as nan munpaspastor at aywananyu nan tatakon Apo Dios ay kinuwana babaen as nan charan nan mismu ay anakna. <sup>29</sup> Ammok ay as nan mak-akak, ongorchantu nan omali kan chakayu ay uy mun-isuru as achi ustu. Chicha at maepachongcha as nan nunkaatap ay asu ay mangpatuy as karnero, ya maid poros sug-angcha as nan chiyucha karnero ay chicha nan chiyucha omaafurot. <sup>30</sup> Uray kan chakayu ay omaafurot at wachachantuy tomakchug ay mun-isursuru as achi tit-iwa ta awisuncha nan chiyucha omaafurot ay umunud kan chicha. <sup>31</sup> Nunumnumunyu ay as nan turu ay tawwun ay kawad-ak kan chakayu at kanayonku ay finag-an chakayu as inurkiw ya lenafi uray kunak lumuwa.

<sup>32</sup> "Ad wani, etalekku chakayu as nan panangaywan Apo Dios ya as nan kalina maepangkep as nan grasyana. Nan hana kalina nan makafiel ay

mangepapigsa as pammatiyu ya mangichat as nan chiyuycha bendisyon ay intutupug Apo Dios para as nan am-in ay tatakuna.<sup>33</sup> Maid kinkinchawku as kuwan chi kumpurmi ay silver winnu fialetok winnu fiachu.<sup>34</sup> Ammuyu ay mismu ay enosarku nan nauyucha limak ay nunchunu as kasaporak ya kasaporan nan iib-ak.<sup>35</sup> As nan am-in ay en-enatku, empailak kan chakayu ay babaen as nan komakuchan ay munchunu at masapor fumachang takú as nan nakapuy, ya masapor numnumun takú nan nauy kenalen Apo Jesus un: 'Nakiaskiasat nan umichat mu nan omawat.'

<sup>36</sup> Kun pay narpas hi Pablo ay nunkali, nakepalintumang ya nakekararag hiya kan chicha am-in.<sup>37</sup> Kahichaaakor ay nangakwor ya namisitu kan Pablo as nan nunpakachaancha.<sup>38</sup> Kaskasincha nunnunungu kiapú as nan kenalina ay achichantu kasin il-laun hiya. Angkiay inturudcha hiya inkiana as nan kawad-an nan papor.

## 21

### *Nan Inmuyen Pablo Ad Jerusalem*

<sup>1</sup> Kunmi pay tenaynan chicha, nunpapor kami ya nunchakpos kami ad Coos. As nan kafikiatana, inumchan kami ad Rodas. Angkiay nak-ak kami hid-i, ya inmuy kami ad Patara. <sup>2</sup> Hid-i nan nanginchananmi as nan papor ay kiayud kumchang henan probinsiya ay Fenicia. As nan hiyachi, nunlukian kami, at nak-ak kami. <sup>3</sup> Kun kami pay enmali as nan mangil-anmi ad Chipre, nar-os kami as apét filáng ya inturuymi inkiana henan probinsiya ay Siria. Inumchan kami henan siyudad ay Tiro, tay hid-i nan nangichissaakian nan papor as karkiana. <sup>4</sup> As nan nanginchananmi as nan tapen nan omaafurot hid-i, nakepagyan kami kan chicha as pitu ay urkiw. Babaen as nan empakaammon nan Espiritu Santo, tinugtukuncha hi Pablo ay achi umuy ad Jerusalem. <sup>5</sup> Kun pay inmuy nan timpu ay nanagyananmi hid-i, nak-ak kami ay mangituryu ay munfiaat. Am-incha ay omaafurot patí nan as-awa ay fianafiai ya nan an-akcha at inturud chakami inkiana henan fiayfiay ay papug nan siyudad. Hid-i, nunpalintumang kami am-in ya nunkararag kami. <sup>6</sup> Kun kami pay narpas ay nunpepennakacha, nunlukian kami as nan papor, ya kenmatamcha nan chiyuycha omaafurot.

<sup>7</sup> Inturuymi ay nunpapor nunlapu ad Tiro inkiana inumchan kami ad Tolemaida. Hid-i nan nangpacomostaanmi as nan iib-a ay omaafurot ya nakepagyan kami kan chicha as hin-urkiw. <sup>8</sup> As nan kafikiatana, nunligwat kami, at inumchan kami ad Cesarea. Hid-i, chinmawus kami as afong Felipe ay usa ay mangekaskasaba as nan Ammay ay Chamag. Usa hiya as nan chiyuycha pitu ay lanaraki ay napili ad Jerusalem ay fumadfiachang as nan apostoles.\* <sup>9</sup> Wachacha nan opat ay fiafiarasang ay an-akna ay nun-epadpadtu. <sup>10</sup> As nan kawad-anmi hid-i as kaat ay urkiw, wacha naa usa ay pomapadtu ay nan ngachana at Agabo ay chinmayyu ay nurpu ad Judea. <sup>11</sup> As nan enmaliyana kan chakami, enarana nan sinturun Pablo, ya infiarudna as nan mismu'y chuwa ay suki ya limana, ya kanana, "Nauy nan kenalen nan Espiritu Santo: 'Assena nan atuntu nan chiyuycha Judio ad Jerusalem ay mangfiarud as nan nunkuwa as nan nauy ay sinturun, ya ipurangchantu as nan chiyuycha Gentil.'"

<sup>12</sup> As nan nanngoranmi as na, chakami ya nan tapina ay wacha hid-i at nunpakaasi kami kan Pablo ay achi koma omabrat hiya ad Jerusalem.

\* **21:8** Ara. 6:5

**13** Ngem tinumfor hi Pablo, “Adchi t'uyak cha ag-akiaran? Adchi t'uyyu lawá pangayaun chi numnumku? Nakasakianaak ay achi yangkiay maifiarud ngem uray matuy ad Jerusalem kiapú kan Apo Jesus.”

**14** Kunmi pay chaan naawis hiya, kinminak kami ya kunmi kenali, “Nan laychun koma Apo Dios nan ommat.”

**15** Kun pay inmuy chi kaat ay urkiw ay nanagyananmi hid-i, nunsakiana kami, at enmabrat kami ad Jerusalem. **16** Nan tapen nan omaafurot ay i-Cesarea at nakiuycha kan chakami ya enpangu chakami as nan chumawchawsan ay afong Manason ay i-Chipre ay usa as nan chiyuycha emnon-oná ay enmafurot.

### *Nan Uy Nangfisitaan Pablo Kan Santiago*

**17** Kun kami pay inumchan ad Jerusalem, nunlaylayadcha nan omaafurot ay nang-awat kan chakami. **18** As nan kafikiatana, nakiuy hi Pablo kan chakami ay uy mangila kan Santiago. Am-in nan mangepangpanguru as nan chiyuycha omaafurot at wachacha hid-i. **19** Penakomostan Pablo chicha, at empachamagna nan am-in ay en-enat Apo Dios as nan chiyuycha Gentil as nan nun-ekaskasabaana kan chicha.

**20** As nan nanngorancha's na, chinaychayawcha am-in hi Apo Dios. Angkiay kenalicha kan Pablo, “Ifiami, ammom ay kaat ay lifu ay Judio nan enmafurot kan Jesu Cristo, ya kuncha am-in epapasnek ay mangunud as nan lintig takú ay Judio. **21** Nachamagcha ay insursuruwam kanu am-in nan chiyuycha Judio ay nakiili as nan chiyuycha Gentil ay mankug as nan Lintig Moises. Infiagiakiam pay kanu kan chicha ay achicha sugyatan nan an-akcha ay lanaraki winnu unuchun nan inili ay ukiali takú ay Judio.

**22** Anan atun takú ngay ta maammuwancha ay fiakun tit-iwa chasa, tay chungrunchantu challu ay enmalika? **23** Isunga atum nan ifiakiami kan he-a. Wachacha kan chakami nan opat ay lanaraki ay nunsapata kan Apo Dios. **24** Etakinmu chicha as Templo ya makikisanka kan chicha ay mangekaman as nan panagcharos ay maiyunud as nan Lintig. Usa pay at he-a nan mamayad as nan kiastoscha ta mafialinchá ay munpaapollok ay mangtongpar as nan karicha.<sup>†</sup> As nan nauy ay atum, maammuwantu nan am-in ay maid kenatit-iwan nan naifiakia kan chicha maepangkep kan he-a. Ngem kunmu at cha unuchun nan Lintig Moises. **25** Ngem nan chiyuycha Gentil ay omaafurot at masapor unuchuna yangkiay nan nauycha filfilin ay enpaw-etmi ay insuratmi kan chicha. Achicha kanun nan naichaton as nan didiosen winnu ischay chara winnu kumpurmi ay chaan nauykukan ay animar. Usa pay at masapor chukkiancha nan mangepapasan as assi ay lachok.”<sup>‡</sup>

**26** As nan kafikiatana, entakin Pablo nan opat ay lanaraki, ya nakikisan hiya kan chicha ay nangekaman as nan panagcharos. Angkiay sinungkop as nan Templo ay mangepakaammu as nan pachi mu kaat ay urkiw nan marpasan nan panagcharos ya nan mun-ichatonan nan tunggal usa kan chicha.

### *Nan Natiliwan Pablo As Nan Templo*

**27** Kun pay kiayud marpas nan pitu ay urkiw, wachacha nan tapen chi Judio ay nurpu henan probinsiya ay Asia ay nangila kan cha Pablo as nan Templo. Kinurucha nan am-in ay tataku hid-i, ya tiniliwcha hi Pablo.

<sup>†</sup> **21:24** Masapor atun Pablo nan panagcharos, tay inflang nan chiyuycha Judio ay naruket hiya, tay nunfiabfaat hiya henan luglukiay ay umiliyan chi Gentil. <sup>‡</sup> **21:25** Ara. 15:23-29

<sup>28</sup> Infukiawcha, “Iib-ami ay kianak Israel! Akayu ta fudngun takú na! Hi tona nan nangisursuru as nan am-in ay tataku henan am-in ay lukiar as maekontra kan chitaku ay kianak Israel, as nan Lintig Moises ya as nan nauy Templo. Ad wani, empaskopna us nan tapen chi Gentil as nan Templo ya linuketancha<sup>§</sup> nan nauy nasantowan ay lukiar.” <sup>29</sup> Kenalicha na, tay inilacha ay nakiliklikud hi Trofimo ay i-Efeso kan Pablo ad Jerusalem, ya kananancha un iniskop Pablo hiya as nan Templo.

<sup>30</sup> Kun pay chaan nafiyag, nakurucha am-in nan umili ad Jerusalem, ya nagrubačha ay tenmagtag ay inmuy as nan Templo ay kawad-an Pablo. Lenabkischa ya inkiayadcha hiya ay nangipitiw as nan Templo. Hiya at chi ya nain-ub nan chiyucha pantiw nan Templo. <sup>31</sup> Kuncha pay cha pachasun ay mangpatuy kan hiya, wacha at nan uy nangifiakia as nan komander chi sosorchachon chi i-Roma ay nunkukurucha am-in nan tataku ad Jerusalem. <sup>32</sup> Hiya at chi ya, enmetakin nan komander as tapen nan kakapetan patí sosorchachucha, ya tenmagtagcha ay kinmuwab as nan kawad-an nan tataku. Kun pay inilan nan tataku nan komander ya nan sosorchachu, kinyatcha ay cha manoprat kan Pablo. <sup>33</sup> Kun pay næsnop nan komander kan Pablo, enpatiliwna hiya, ya infilina ay fiaruchuncha nan limana as chuwa ay kor-on. Angkiay ya senarudsudna as nan tataku, “Anan ngachan tona ay tatu? Anan enatna man?” <sup>34</sup> Ngem nagrubačha nan ongor ay tataku ay nangifugfukiaw as achi mapapchong. Kiapú ta achi mafialin ay maammuwnan komander nan tit-iwa ay enommat, tay nunsidlay ngangak nan ongor ay tataku, infilina as nan sosorchachu ay iyuycha hi Pablo as kampucha. <sup>35</sup> Kuncha pay inumchan as nan agchan, kapeletan ay enokwat nan sosorchachu hi Pablo, tay nunsidlay fungat nan ongor ay tataku kan hiya. <sup>36</sup> Cha umun-unud nan hanacha ongor ay tataku ay cha mangifugfukiaw, “Patayunu hiya!”

### *Nan Nangifiag-an Pablo As Nan Maepangkep Kan Hiya*

<sup>37</sup> Kuncha pay kiayud id-an hi Pablo as kampucha, kenalina as nan komander, “Wacha man paat nan ifiakiak kan he-a.”

Kenalen nan komander, “Ay, makakalika payat as kalen chi Griego!

<sup>38</sup> Fiakun ngarud he-a nan chiyuy i-Egipto ay nunkuru ad kasin ya nangepangu as nan opat lifu ay kumukuru henan disyerto.”

<sup>39</sup> “Fiakun ya,” ensongfiat Pablo. “Ha-un at Judiowak ay naiyanak ad Tarso ay mafifigfig ay siyudad henan probinsiya ay Cilicia. Parufusanak pay ay munkali as nan tataku.”

<sup>40</sup> As nan nangparufusan nan komander, tenmakchug hi Pablo as nan agchan, ya sininyasana nan tataku ta kuminakcha. Kuncha pay kinminak, nunkali hi Pablo kan chicha as Henebreo.

## 22

<sup>1</sup> “Ib-a ya am-a, chumngor kayu as nan esongfiatku kan chakayu.” <sup>2</sup> Kuncha pay chinngor hiya ay nunkali as Henebreo, kaskasincha kinminak. Angkiay inturuy Pablo, <sup>3</sup> “Ha-un at Judiowak ay naiyanak ad Tarso henan probinsiya ay Cilicia, ngem hena ad Jerusalem nan nasiknak. Hi Gamaliel nan nangacharak ay ustу as nan am-in ay lintig nan kaap-uwan takú, ya makakuchak ay munserserfi kan Apo Dios ay kaman as nan uray ngachana kan chakayu ad wani. <sup>4</sup> Penarpalikiatku ay nangepapatuy pay as nan tataku

§ **21:28** Nan laychun ay kanan nan ‘linuketancha nan nauy nasantowan ay lukiar’ at chinachaelcha nan kenasanton nan Templo.

ay nangun-unud as nan makali un Charan Apo Jesus. Tiniliwku nan lanaraki ya fianfiai, ya uyku enpaifiarud chicha. <sup>5</sup> Nan kangatuwan ay pachi ya am-in nan membron nan Sanhedrin at chicha nan mangpaneknek ay tit-iwa na, tay kan chicha nan nangor-ak as nan chiyuycha surat ay iyuyku as nan iib-a takú ay Judio ad Damasco. Isunga nunfiaatak hid-i ay maniliw as nan hanacha tataku ya mangifiangad kan chicha ay napoposasan hena ad Jerusalem ta machusacha.

<sup>6</sup> “Kunak pay cha maesnop ad Damasco as nan kiayud munkiawa, kalina at ya liniwusak as nan napigsa ay silaw ay nurpu ad chaya. <sup>7</sup> Angkiay ya natu-ukiak as nan luta, ya chinngorku nan kali ay cha mangali kan ha-un, ‘*Saulo, Saulo, adchi t'uyak palikiatun?*’

<sup>8</sup> “Tinumforak, ‘Anan ngachanmu Apo?’

“*'Ha-un hi Jesus ay i-Nazaret ay cham parpalikiatun,'* ensongfiatna. <sup>9</sup> Nan chiyuycha tutun-udku at inilacha nan silaw, ngem chaancha chinngor nan kalen nan cha maketagtakiatfor kan ha-un. <sup>10</sup> Angkiay senarudsudku un, ‘Ngachana ngay nan atok Apo?’

“Tinumfor nan Apo kan ha-un, ‘*Maligwatka ya ituruymu ay umuy ad Damasco, at wacha hid-i nan mangifiakia kan he-a as nan am-in ay enkeddeng Apo Dios ay atum.*’ <sup>11</sup> As nan hiyachi, nafurakiak kiapú as nan sumili ay silaw. Isunga kunak penapachang as nan chiyuycha tutun-udku inkiana inumchan kami ad Damasco.

<sup>12</sup> “Wacha nan laraki hid-i ay nan ngachana at Ananias ay usa ay mangchaychayaw kan Apo Dios ay manangtongpar as nan Lintig Moises. Ammay chi kaap-apatana as nan am-in ay Judio ay umiili hid-i. <sup>13</sup> Enmali hiya ya temmakchug as nan sag-unku, ya kanana, ‘Ifiak ay Saulo, ad wani, makailaka kasin! Hiya at chi ya nakailaak, ya inilak hiya. <sup>14</sup> Kenalina, ‘Nan Dios nan kaap-uwan takú at pinili chaká ay mangammu as nan laychuna ya mangila as nan Nalintig ya manngor as nan kali ay nurpu mismu kan hiya. <sup>15</sup> Tay he-a at tistigu chakantu kan hiya ay mangepakaammu as nan am-in ay tataku as nan inilam ya nan chinngormu. <sup>16</sup> Ad wani, anum pay laing iyaawni? Maligwatka at, ya munpafunyagka. Munkararagka ay chumawat as nan Apo as pannakapakawanmu as nan fiasfiasormu.’

<sup>17</sup> “Kunak pay nunfiangad ad Jerusalem ya as nan chak munkarkarakian as nan Templo, wacha nan enpailan Apo Dios kan ha-un babaen as nan kaman iitaw. <sup>18</sup> Inilak nan Apo ay cha mangali kan ha-un un, ‘*Kamuwum ay mak-ak ad Jerusalem, tay achi afurotun nan tataku hena nan ifiakiam ay maepangkep kan ha-un.*’

<sup>19</sup> “‘Apo,’ ensongfiatku, ‘ammucha met ay mismu ay as nan in-inmuyak as nan chiyuycha senagoga, enpaifiarudku ya senaplesapletku nan chiyuycha enmafurot kan he-a. <sup>20</sup> As nan napatuyan Esteban ay usa ay mangepanpaneknek as nan maepangkep kan he-a, wachaak mismu hid-i ay nangiyafud ya nangfiantay as nan fiadfiachon nan chiyuycha namatuy kan hiya.’

<sup>21</sup> “Kenalen nan Apo kan ha-un, ‘*Uray, umuya ka at, tay ifiaorkuntu he-a henan achawwi ay kawad-an nan tataku ay Gentil.*’”

<sup>22</sup> Enpapanaakian nan tataku hiya inkiana kenalina sa. Angkiay ya infukiawcha as solet, “Iyachawwiyu na ay taku! Patayunu! Achi kis-an matakuy assesa ay taku.” <sup>23</sup> Chacha munfugfukiaw ay mangiwetwetwet as fiadfiachucha, ya chacha esafuwag chi luta ay mangepatarok kiapú as fungatcha kan hiya. <sup>24</sup> As nan hiyachi, infilin nan komander as nan sosorchachuna ay iskopcha hi Pablo as nan kampucha ya saplituncha hiya ta

maammuwancha mu adchi t'uy assesay infugfukiaw nan tataku ay maekontra kan hiya. <sup>25</sup> Ngem as nan namafiaruchancha kan hiya ta saplituncha koma, kenalen Pablo as nan kapetan ay nangatakchug hid-i, “Ay eparufus nan lintig ay saplitunyu nan Romano, uray mu chaan nafistikiar on-on?”

<sup>26</sup> Kun pay chinngor nan kapetan na, inmuy as nan komander, ya chinamagna kan hiya, “Anan atum ngay? Romano met payat hiya.”

<sup>27</sup> Isunga inmuy nan komander kan Pablo, ya senarudsudna kan hiya, “Ifiakiam kan ha-un, ay Romanoka?”

“O,” ensongfiat Pablo.

<sup>28</sup> Kenalen nan komander, “Uray met ha-un at ongor chi kinastosku as nan naifilangak as Romano.”

Tinumfor hi Pablo, “Ngem ha-un at naiyanakak ay Romano.”

<sup>29</sup> Hiya at chi ya nan chiyuycha inmuy ay manaplet ya mamistikiar kan Pablo at tenmaakcha kan hiya. Uray nan komander at ongor chi ugyatna as nan nangammuwana ay apudna lawá enpaposas nan usa ay Romano.

### *Nan Namistikiaran Nan Chiyuycha Membron Nan Sanhedrin Kan Pablo*

<sup>30</sup> Laychun nan komander ay mangammu mu anan ustу as kiapón nan nangepafiasoran nan chiyuycha Judio kan Pablo. Isunga as nan kafikiatana, inlufusna hiya ya inflina ay maamongcha nan anap-apon chi papachi ya nan am-in ay membron nan Sanhedrin. Angkiay ya enpatakchugna hi Pablo as nan sangwanancha.

## 23

<sup>1</sup> Entoongan Pablo nan Sanhedrin, ya kanana, “Iib-a, nacharos nan numnumku ay matataku as nan mangilan Apo Dios uray inkiana ad wani ay urkiw.” <sup>2</sup> As nan nangaliyana's chi, inflin nan kangatuwan ay pachi ay hi Ananias as nan chiyuycha nangatakchug as nan sag-un Pablo ay tampakuncha nan tapakna. <sup>3</sup> Angkiay nunkanan Pablo kan hiya, “Hi Apo Dios nan manampaktu kan he-a! Il-ilaum, he-a ay pakamankaman ay maepachong as nan arad ay napentoran as munpupukaw! Mangatokorka hesa ay mangokóm kan ha-un ay maiyunud as nan Lintig, ngem lenabsingmu met nan hana ay Lintig babaen as nan nangifilinam kan chicha ay tampakunak!”

<sup>4</sup> Angkiay nan chiyuycha naeesnop kan Pablo at kenalicha, “Adchi t'uyumu ekaliyan nan kangatuwan ay pachen Apo Dios?”

<sup>5</sup> Tinumfor hi Pablo, “Iib-a, achek met ammu ay hiya nan kangatuwan ay pachi. Wacha nan naisurat as nan Kalen Apo Dios ay kanana un, ‘Achim ekak-aliyan nan mangetortoray as nan tatakuyu.’ ”\*

<sup>6</sup> Kun pay inilan Pablo ay nan tapen nan membron nan Sanhedrin at Saduceo ya nan tapina at Fariseo, infukiawna kan chicha, “Iib-a, usaak ay Fariseo, ya pototak us as Fariseo. Nan mangnamnamaak ay matakuntu nan chiyuycha natuy manipud as nan utúy nan kiapúna ay chaak maokóm ad wani.”

<sup>7</sup> Kuna pay kenali na, nan chiyuycha Fariseo ya nan chiyuycha Saduceo at enlapucha ay masusuma ya nakudwacha. <sup>8</sup> (Tay nan kenalen nan chiyuycha Saduceo at maid matak manipud as nan utúy winnu maid anghel winnu espiritu. Ngem nan chiyuycha Fariseo at afurotuncha nan nauycha am-in.) <sup>9</sup> Kiapú as sa, pimmgapsiga nan nunfifinnukiawancha. Angkiay temmakchugcha nan tapen nan mun-isursuru as Lintig ay membro as nan bunggoy nan Fariseo, ya nunsidlay susumacha. Kenalicha, “Maid met payat

\* <sup>23:5</sup> Exo. 22:28

fiasor tonas as ininchananmi! Uy at man tit-iwa ay wachay anghel winnu espiritu ay nunkali kan hiya.”

<sup>10</sup> Kun pay kenmaskasin chi susumacha, inmugyat nan komander chi sosorchachu mu forgetuncha hi Pablo. Isunga inflina as nan sosorchachu ay chumayuucha as nan kawad-an Pablo ay uy mangikuyud kan hiya ay mangek-ak as nan tataku ya iskopcha hiya as nan kampucha.

<sup>11</sup> As nan hiyachi ay lafi, nunpaila nan Apo kan Pablo, ya kanana, “*Achika umug-ugyat! Tay kaman as nan nangepanéneknekam as nan maepangkep kan ha-un ad Jerusalem at masapor assesa us nan atum ad Roma.*”

### *Laychun Nan Judio Ay Patayun Hi Pablo*

<sup>12</sup> As nan kafikiatana, nan tapen nan Judio at nuntuturagcha, ya ensapat-acha ay achicha mangmangan winnu umig-ikop as uray kumpurmi inkiana patayuncha hi Pablo. <sup>13</sup> Sorok as opat puru ay lanaraki nan nuntuturag as na. <sup>14</sup> Angkiay inmuyucha as nan anap-apon nan papachi ya as nan anam-amá. Kenalicha, “Nunsapata kami ay achi kami poros mangmangan as kumpurmi inkiana patayunmi hi Pablo. <sup>15</sup> Isunga chakayu ya nan chiyuucha membron nan Sanhedrin at umiliaor kayu as mangifiakia as nan komander nan sosorchachu ay iyalina hi Pablo as nan sangwananyu ay kamanyu kanu fistikiarun pay nan maepangkep as nan kasona. Ngem nakasakiana kamintu ay mangpatuy kan hiya sakbay ay umchan hiya hena.”

<sup>16</sup> Ngem chinngor nan laraki ay anak nan fiafai ay sunúd Pablo nan nuntuturakiancha ay uycha esasanub hiya. Isunga sinungkop as nan kampu, ya uyna infiakia kan Pablo. <sup>17</sup> Angkiay enayakian Pablo nan usa as nan kapetan, ya kanana kan hiya, “Itun-udmu pay na ay fierfiaru as nan komander, tay wacha nan ifiakiana kan hiya.”

<sup>18</sup> Isunga intun-ud nan kapetan hiya as nan komander. Kuncha pay inumchan, kenalen nan kapetan, “Nan fierud ay hi Pablo at enayakianak ya chinawatna kan ha-un ay kadwaak nan fierfiaru ay anna, tay wacha kanu nan ifiakiana kan he-a.”

<sup>19</sup> Penachang nan komander nan fierfiaru, ya entaakna as akét as nan ibana. Senarudsudna, “Ngachana nan ifiakiam kan ha-un?”

<sup>20</sup> Angkiay kenalen nan fierfiaru, “Nan anap-apon chi Judio at waschi un inyafudna ay chawatuncha kan he-a ay iyalem hi Pablo as nan sangwanan nan chiyuucha membron nan Sanhedrin as wiet ay kamancha fistikiarun pay kanu ay ustу hiya. <sup>21</sup> Ngem achika maawis kan chicha, tay sorok as opat puru ay lanaraki nan uy muttafun ay mangesanub kan hiya. Ensapat-acha ay achicha mangmangan winnu umig-ikop inkiana patayuncha hiya. Nakasakianacha ad wani, ya kuncha yangkiay sasad-un nan kanam.”

<sup>22</sup> Isunga tinukun nan komander nan fierfiaru, “Maid poros mangifiagfiag-am ay enpakaammom na kan ha-un.” Angkiay enpaketam nan ap-apu nan fierfiaru.

### *Nan Nangiyuyancha Kan Pablo Kan Gobernador Felix*

<sup>23</sup> Angkiay ya enayakian nan komander nan chuwa as nan uyna kakapetan, ya kanana, “Esakianayu nan chuwan kiasot ay sosorchachu, nan piton puru ay nakakafiayu ya nan chuwan kiasot ay kafiangfiangkawan, ya iyuyuyuntu hi Pablo ad Cesarea as nan alas nuebe as maschum.

<sup>24</sup> Omesakiana kayu us as tapen nan kafiayu ay munlukianan Pablo, ya id-anyu hiya kan Gobernador Felix ay maid mangisiw as om-ommatt.”

<sup>25</sup> Nunsurat pay nan komander ay assena nan kenalina: <sup>26</sup> “Machayaw ay

Gobernador Felix. Ha-un hi Claudio Lisias ay mangepakomosta kan he-a. <sup>27</sup> Nan nauy taku ay enpaiyalek hesa kan he-a at tiniliw nan chiyucha Judio ya kiayudcha patayun hiya. Kunku pay naammuwan ay Romano hiya, nakiuyak as nan sosorchachok ya uyku esarakan hiya. <sup>28</sup> Kiapú ta lenayadku ay maammuwan mu ngachana nan chacha epabpaflasor kan hiya, inyuyku hiya as nan kawad-an nan ap-apucha ay nan Sanhedrin. <sup>29</sup> Naammuwan ay nan chacha mangicharuman kan hiya at maepangkep as nan lintigcha, ngem maid payat fiasorna as uycha mangpatuyan winnu mangifiaruchan kan hiya. <sup>30</sup> Kun pay naepachamag kan ha-un ay nuntuturag nan chiyucha Judio ay mangpatuy kan hiya, kenamok ay nangepaiyali kan hiya kan he-a. Infilinku us as nan chiyucha cha mangicharum kan hiya ay uycha muncharum kan he-a. Hiyana yangkiay nan kanak.”

<sup>31</sup> Isunga nan sosorchachu at enatcha nan naifilin kan chicha, ya inyuycha hi Pablo as nan hiyachi challu ay lafi inkiana henan siyudad ay Antipatrisa. <sup>32</sup> As nan kafikiatana at kun yangkiay nan kakabkafiyawan nan nangituryay nangitun-ud kan Pablo, ya nunfiangad nan chiyucha nanarcharan ay sosorchachu as kampucha ad Jerusalem. <sup>33</sup> Kuncha pay inumchan ad Cesarea, inchatcha nan surat as nan gobernador, ya inpurangcha us hi Pablo kan hiya. <sup>34</sup> Kun pay finasan nan gobernador nan surat, senarudsudna kan Pablo mu ngachana ay probinsiya nan naiyankana. Kuna pay naammuwan ay i-Silicia hiya, <sup>35</sup> kenalina, “Chungroktu nan kanam as nan omaliyantu nan chiyucha mangicharum kan he-a.” Angkiay infilina ay kuwarchaancha hi Pablo as nan palasyu ay enpaamman Ari Herodes.

## 24

### *Nan Namistikiaran Felix Kan Pablo*

<sup>1</sup> Kun pay inmuy chi lema ay urkiw, nan kangatuwan ay pachi ay hi Ananias at kinmuwab ad Cesarea patí nan tapen nan anam-amá ya nan abogadocha ay hi Tertulo. Inmuycha as nan gobernador ta icharumcha hi Pablo. <sup>2</sup> Kun pay enpaayag nan gobernador hi Pablo, enlapon Tertulo ay nangicharum kan hiya. Kenalina, “Machayaw ay Gobernador Felix, kiapú as nan laingmu ay mangetortoray kan chakami, nafiayag ay natalna nan fiyagmi hena, ya ongor us nan enpaiyam-ammam henan nauy ay nasyon. <sup>3</sup> Isunga as nan am-in ay ay-ayanmi, figfikunmi nan am-in ay en-enatmu, ya munyaman kami as solet kan he-a. <sup>4</sup> Achech laychun ay taktakun he-a, ngem mu mafialin, anosam man paat ay manngor as nan akét ay ifiakiami.

<sup>5</sup> “Naammuwanmi ay kun payat omaabkor na ay taku ya lumulumu as kuru as nan chiyucha Judio as nan uray ngachana ay lukiar asna’s luta. Hiya nan mange pangpanguru as nan bunggoy nan usa ay i-Nazaret. <sup>6</sup> Penachasna us ay luketan nan Templo, ngem tiniliwmi hiya. [Chami numnumun ay mangokóm kan hiya ay maiyunud as nan mismu ay lintig takú. <sup>7</sup> Ngem nan komander ay Lisias at enmali ya enpalabkisna hiya ay nangek-ak kan chakami. <sup>8</sup> Infilina as nan chiyucha muncharum kan hiya ay omalicha as nan sangwanam.] Mu fistikiarum hiya, mafialinmu ay maammuwan ay tit-iwa am-in nan charummi kan hiya.” <sup>9</sup> Nan iib-ana ay Judio at naetapicha as nan chiyuy ay charum, ya infiakiacha ay tit-iwa chaná am-in.

<sup>10</sup> Kun pay sininyasan nan gobernador hi Pablo ay munkali, tinumfor hiya, “Machayaw ay Gobernador, ammok ay ongor ay tawwun nan nunok-okomám henan nasyon ay anna. Isunga naragsakak ay manfor as nan

enpafiasorcha kan ha-un. <sup>11</sup> Narakam ay mapaneknekan ay mismu ay achi nasorok as hinpuru ya chuwa ay urkiw nan inmuy nunlapu as nan embratak ad Jerusalem as nan uyku nunchayawan kan Apo Dios. <sup>12</sup> As nan kawad-ak as Templo, maid as nan chiyucha mangicharum kan ha-un nan nangila kan ha-un ay nakesongsongfiat as nan kumpurmi ay taku, winnu nangurkuru as tataku as nan chiyucha senagoga, wiñnu as nan kumpurmi henan siudad. <sup>13</sup> Maid us maepailacha kan he-a as pammaneknek ay titiwa nan nauy charumcha ad wani kan ha-un. <sup>14</sup> Ngem nauy nan ipudnok kan he-a: Chaychayawok hi Apo Dios ay Dios nan kaap-uwanmi babaen as nan mangun-unuchak as nan makali un Charan Apo Jesus ay kenalen nan iib-ak ay Judio un achi ustu. Ngem uray mu hiyasa, afurotok us am-in nan naisurat as nan Lintig Moises ya nan insurat nan chiyucha pomapadtu ad pus-uy. <sup>15</sup> Nan namnamaok ay pachong nan namnamaun chatona ay tataku at hi Apo Dios nan mangtaku as nan am-in ay nunkatuy manipud as nan utúy ay nalintig ya achi nalintig. <sup>16</sup> Isunga kanayon ay epapatek ay mangekaman as ammay ta nacharos chi numnumku as nan mangiilan Apo Dios ya nan tataku.

<sup>17</sup> “Kun pay inmuy chi kaat ay tawwun ay namamaichak ad Jerusalem, nunfiangachak hid-i ay mangiyuy as nan siping as nan chiyucha kailiyak ay makasapor ya mangichat as nan chiyucha chatonku kan Apo Dios as Templo. <sup>18</sup> As nan chak mangekamanan as na, ininchananak as nan tapen nan Judio ay nurpu ad Asia. As nan hiyachi, karkarpasku ay nangekaman as nan iniili ay ukiali takú ay Judio maepangkep as panagcharos. Maid poros ongor ay tataku ay naetatapi kan ha-un ya maid us kuru.” <sup>19</sup> Nan hanacha Judio ay nurpu ad Asia ay wacha as nan hiyachi at chicha koma nan omali hena ay mangicharum kan ha-un kan he-a mu wachay kumpurmi as epafiasorcha kan ha-un. <sup>20</sup> Winnu kikiad man nan nauycha tataku hena nan mangifiakia mu ngachanay naanapancha as fiasorku as nan temmakchukiak as nan sangwanan nan chiyucha membron nan Sanhedrin ad Jerusalem. <sup>21</sup> Maid met, omangkiay nan nauy usa ay nangifukiawak as nan sangwanancha un, ‘Nan namnamaok at matakuntu nan nunkatuy manipud as nan utúy.’ Hiyasa nan kiapúna ay chaak maokóm ad wani as nan sangwananyu.”†

<sup>22</sup> Hi Gobernador Felix ay ongor chi ammunma maepangkep as nan makali un Charan Apo Jesus at enpakinakna nan kason Pablo, ya kanana, “As nan omaliyan Lisias ay komander chi sosorchachu at enongnongkuntu nan kasom.” <sup>23</sup> Angkiay ya infilina as nan kapetan ay makuwarchaan hi Pablo, ngem ettana hiya as akét ay wayawayana, ya parufusana nan kiakiayyumna ay mangiyuy as kasaporana.

<sup>24</sup> Kun pay inmuy chi kaat ay urkiw, enmali cha Felix kan asawana ay Drusila ay usa ay Judio. Enpaayagna hi Pablo ya chinumngor as nan infiaagna maepangkep as nan pammati kan Cristo Jesus. <sup>25</sup> Ngem as nan cha mangelawlawakian Pablo as nan maepangkep as nan kenalintig, nan panang-etpor as nan laylaychun nan anchor ya nan umchanantu nan urkiw ay mangokomán Apo Dios as nan tataku, inmugyat at hi Felix, ya kanana, “Ustu sa! Uyka ud-day. Epaayagkuntu kasing he-a mu wachay timpok.” <sup>26</sup> Namnamauna us ay pasoksokan Pablo hiya. Isunga kanayona ay enpaayag hi Pablo ya tenagtakiatforna hiya.

\* <sup>24:18</sup> Ara. 21: 17-28 † <sup>24:21</sup> Ara. 23:6

<sup>27</sup> Kun pay inmuy chi chuwa ay tawwun, naesokat hi Porcio Festo kan Felix ay mun-gobernador. Kiapú ta laychun Felix ay palaylaychun nan chiyucha Judio, inukiayna hi Pablo as pagfiaruchan.

## 25

### *Nan Chinmawatan Pablo Ay Maiyuy Hiya As Nan Emperador*

<sup>1</sup> Kun pay inmuy chi turu ay urkiw nunlapu as nan inumchanan Festo ay mun-gobernador ad Cesarea, enmabrat hiya ad Jerusalem. <sup>2</sup> Hid-i ay inmuy kan Festo nan anap-apon chi papachi ya nan anap-apon chi Judio ay uy mangicharum kan Pablo. <sup>3</sup> Nunpakaasicha kan Festo ay ifiaorna hi Pablo ad Jerusalem ta hid-i nan mangokománcha as nan kasuna, tay nuntuturakiancha ay patayun hiya as nan charan. <sup>4</sup> Ngem tinumfor hi Festo, “Hi Pablo at kukutug ay usa ay makukuwarchaan ad Cesarea, ya achi mafiayag at munfiangachaktu hid-i. <sup>5</sup> Isunga parufusunu nan tapen nan mafigfigfig kan chakayu ay makichayyu kan ha-un ad Cesarea, ya mu wachay enat tosa ay taku as achi ustу, hid-i nan mangicharumancha kan hiya.”

<sup>6</sup> Kun pay nakepagyan hi Festo as achi umuy as waru winnu hinpuru ay urkiw ad Jerusalem, nunfiangad ad Cesarea. As nan kafikiatana, tenmokor hiya as nan mun-ok-okomána, ya enpaayagna hi Pablo. <sup>7</sup> Kun pay inumchan hi Pablo, nan chiyucha Judio ay enmali ay nurpu ad Jerusalem at temakchugcha ay nangarufong kan hiya. Ongor chi chagsun ay enpafiasorcha kan hiya ay achicha poros mapanecknekan ay tit-iwa.

<sup>8</sup> Angkiay tinumfor hi Pablo ay nangekalintikan as achorna, “Maid poros en-enatku as achi ustу ay maekontra as nan lintig nan Judio winnu as nan Templo winnu as nan Emperador.”

<sup>9</sup> Ngem kiapú ta lenayad Festo ay mangpalayayad as nan chiyucha Judio, senarudsudna kan Pablo, “Ay laychum ay umuy ad Jerusalem ya hid-i nan mangfistikiarak kan he-a maepangkep as nan kasom?”

<sup>10</sup> Ngem kenalen Pablo kan hiya, “Nananauyak met as nan sangwanam ay pannakaachor Emperador, ya nauyak as nan mun-ok-okomán ay hena nan masapor maokomák. Ammom met ay ustу ay maid poros en-enatku as nan iib-ak ay Judio as achi ustу. <sup>11</sup> Mu wachay enatku as libfengna as matuyak, acheck elayawan sa ay chusa. Ngem mu maid kenatit-iwan nan enpabpfiasorcha kan ha-un, maid kalibfengan chi kumpurmi ay taku ay mangipurang kan ha-un kan chicha. Nan Emperador ad Roma nan chawatok ay mangokóm kan ha-un.”

<sup>12</sup> Kun pay narpas ay naketakiatfor hi Festo as nan chiyucha totoray ay kafiachangna, tinumfor kan Pablo, “Kiapú ta chinawatmu ay nan Emperador nan mangenongnong as nan kasom, kan Emperador pay ngarud nan ay-ayam.”

### *Nan Nangifiag-an Festo As Nan Maepangkep Kan Pablo Kan Ari Agripa*

<sup>13</sup> Kun pay inmuy chi kaat ay urkiw, cha Ari Agripa kan Bernice ay sunúdна at inumchancha ad Cesarea ta uycha pakomostaun hi Festo ay fiarú ay gobernador hid-i. <sup>14</sup> Kun pay inmuy chi ongor ay urkiw ay nakepagayanancha hid-i, enlawlawag Gobernador Festo kan Ari Agripa nan maepangkep as nan kason Pablo. Kenalina, “Wacha nan laraki ay fiarud hena ay tenaynan Felix. <sup>15</sup> As nan enay-ayak ad Jerusalem, nan anap-apon chi papachi ya nan anam-amán chi Judio at incharumcha hiya, ya chinawatcha ay epapatuyku

kanu hiya. <sup>16</sup> Ngem kenalek kan chicha un fiakun ukialen chi Romano ay mangipurang as nan naicharum as nan tukún sakbay munsesennakiangcha as nan chiyucha nangicharum kan hiya ya mawad-an hiya as chansana ay manongfiat as nan charumcha kan hiya. <sup>17</sup> Isunga as nan nakealiyancha kan ha-un hena, chaanku tenaktak nan kasuna. As nan kafikiatana, temmokorak as nan mun-ok-okomák, ya enpaayagku nan fierud. <sup>18</sup> Kuncha paytenmakchug nan chiyucha nuncharum ay munkali, ka-anak mu wacha paat chi mangotettet as enatna ay epafiasorcha kan hiya, ngem maid met. <sup>19</sup> Kun at wachay tapen chi maekontra kan hiya ay maepangkep as nan mismu ay relihiyoncha ya maepangkep as nan nakin ngachan as Jesus ay natuy ay kenalen Pablo un nataku manipud as nan utú. <sup>20</sup> Kiapú ta acheck maenongnong nan nauy ay kasu, senarudsudku kan Pablo mu laychuna ay umuy ad Jerusalem, ya hid-i nan mafistikiaran nan kasuna. <sup>21</sup> Ngem kuna at chinawat ay makuwarchaan ya enongnong nan Emperador nan kasuna. Isunga empakuwarchak hiya inkiana mafialin ay ifiaorku hiya as nan Emperador.”

<sup>22</sup> Angkiay kenalen Ari Agripa kan Festo, “Uray ha-un at laychok mismu ay chungrun nan ifiakian tosa ay taku.”

“As wiet at chungrumtu nan ifiakiana,” kenalen Festo.

<sup>23</sup> Isunga as nan kafikiatana, enmali cha Ari Agripa kan Bernice ay nunfiafiachu as anam-ammay, ya nummarchacha pati nan chiyucha komander chi sosorchachu ya nan anap-apo henan siyudad ay sungkop as nan mun-ok-okomán. As nan sinungkopancha am-in, infilin Festo ay epaskopcha hi Pablo. <sup>24</sup> Kuncha pay enpaskop hi Pablo, kenalen Festo, “Machayaw ay Ari Agripa ya chakayu am-in ay wacha hena, mailayu na ay taku. Hi tona nan incharum am-in nan chiyucha Judio kan ha-un ad Jerusalem ya uray hena. Infugfukiawcha un achi kis-an matakú pay hiya. <sup>25</sup> Ngem maid met naanapak as enatna's fiasor as kiapón chi maepapatuyana, ya kiapú ta chinawatna ay nan Emperador nan mamistikiar as nan kasuna, enkeddengku ay maiyuy hiya hid-i. <sup>26</sup> Ngem maid ammok as ustу ay isuratku kan Emperador as maepangkep kan hiya. Isunga enpaiyalek hiya hena as nan sangwananyu am-in, kaskasin kan he-a Ari Agripa ta mu marpas nan mamistikiaran takú kan hiya at wachay maisuratkuntu. <sup>27</sup> Tay nan wacha as numnumku at maid kotkotokna mu ipurangku nan fierud as nan Emperador mu maid ustу as maifisaran nan naepafiasor kan hiya.”

## 26

### *Hi Pablo As Nan Sangwanan Ari Agripa*

<sup>1</sup> Angkiay ya kenalen Ari Agripa kan Pablo, “Mafialinmu ay ekalintikian nan mismu ay achormu.” Tenag-uy Pablo nan limana ay mangepakinak as nan tataku, ya senongfiatana nan enpafiasorcha kan hiya. Kenalina, <sup>2</sup> “Machayaw ay Ari Agripa, mu maepangkep as nan am-in ay charum nan nauyucha Judio kan ha-un, ifilangku ay nakiasatak ay manongfiat as nan sangwanan ad wani, <sup>3</sup> kaskasin tay ammom as solet nan am-in ay iniili ay ukialen chi Judio ya nan masussusumaan takú. Isunga chawatok ay anosanak koma ay chungrun.

<sup>4</sup> “Ammon am-in nan Judio nan panagfiayagku nunlapu as nan kaongak, tay nakiiliyak kan chicha henan ilimi ya ad Jerusalem. <sup>5</sup> O, am-ammuwak kan chicha as nafiayag. Mu laychuncha, mafialincha ay paneknekan ay nan panagfiayagku at maiyunud ay ustу as nan istriktu as solet ay relihiyon

takú ay wacha as nan bunggoy nan Fariseo. <sup>6</sup> Nauyak hena ad wani ay cha maicharum, tay wachay namnamak ay tongparun Apo Dios nan enkarina as nan kaap-uwan takú ay matakú nan nunkatuy manipud as nan utúy. <sup>7</sup> Nan matongparan nan nauy kari nan namnamaun nan hinpuru ya chuwa ay tribu takú ay awatuncha as nan mangepapasnekancha ay munchaychayaw kan Apo Dios as inurkiw ya lenafi. Machayaw ay Ari, kiapú ta afurotok nan nauy ay namnama, hiyana nan kiapúna as nangicharuman nan chiyucha Judio kan ha-un. <sup>8</sup> Adchi paat t'uyyu likiatun ay mangafurot ay takuwun Apo Dios nan nunkatuy manipud as nan utúy?

<sup>9</sup> "Uray ha-un ay mismu ad kasin at ka-anak un masapor atok nan am-in ay mangkontra as nan chiyucha enmafurot kan Jesus ay i-Nazaret. <sup>10</sup> Hiyasa challu nan en-enatku ad Jerusalem. Inchat pay nan anap-apon chi papachi kan ha-un nan pammarufus ay mangepafiarud as nan ongor ay omaafurot. Kuncha pay maekeddeng ay maepapatuy, usaak ay nangiyafud. <sup>11</sup> Namen ongor ay chinusak chicha as nan am-in ay senagoga, ya penachasku ay namelet kan chicha ay mangesaot as nan pammaticha kan Apo Jesus. Kiapú ta ongor chi fungatku kan chicha, inmuyák pay henan chiyucha achawwi ay siyudad chi Gentil ay mangpalikiat kan chicha.

<sup>12</sup> "Isunga nunfiaatak ad Damasco ay wacha kan ha-un nan kalibfengan ya pammarufus ay nurpu as nan anap-apon chi papachi. <sup>13</sup> Kun pay nunkiawa as nan kawad-ák as nan charan, machayaw ay Ari, kalina at ya inilak nan silaw ay nurpu ad chaya ay kaskasin sumili mu nan urkiw ay nangliwus kan ha-un ya nan kakadwak. <sup>14</sup> Kun kami pay natu-ug am-in as nan luta, chinngorku nan kali ay cha mangali kan ha-un as nan kalen chi Hebreo, 'Saulo, Saulo, adchi t'uyak palikiatun? Nan achormu at pay iwa nan cham parpalikiatun ay kaman as nan nuwang ay manatchat-onq as nan subsub nan arachu.'

<sup>15</sup> "Senarudsudku, 'Anan ngachanmu, Apo?'

"Tinumfor nan Apo, 'Ha-un hi Jesus ay cham parpalikiatun. <sup>16</sup> Ad wani, tomakchugka. Nunpilaak ay mangchutok kan he-a ay munserfi ya mangpaneknek as nan inilam kan ha-un ad wani ay urkiw ya nan epailaktu kan he-a as tapen chi urkiw. <sup>17</sup> Esarakaktu he-a as nan ib-am ay Judio ya as nan chiyucha Gentil ay mangifiaorak kan he-a. <sup>18</sup> Ifaorku he-a ay manilaw as numnumcha as nan maepangkep kan ha-un ta chukkiancha nan ngongot ay panagnumnumnum ya nan pannakafialin Satanas, ya ta munsakongcha as nan silaw ya kan Apo Dios. Mu hiyasa, mapakawanchantu as nan fiasfisorcha, ya maetapichantu as nan pinilen Apo Dios ay tatakuna babaen as nan pammaticha kan ha-un.' Hiyana nan kenalen Jesus kan ha-un.

<sup>19</sup> "Isunga machayaw ay Ari Agripa, chaanku senokel nan enpailan Apo Dios kan ha-un ay nurpu ad chaya. <sup>20</sup> Nun-ekasabaak on-oná as nan tataku ad Damasco, angkiay ad Jerusalem, ya henan intiru ay probinsya ay Judea ya uray as nan chiyucha Gentil. O, enkaskasabak kan chicha ay masapor munfiafiawicha as nan fiasfisorcha, munsakongcha kan Apo Dios, ya atuncha nan ammay ay mangepaila ay tit-iwa ay nunfiafiawicha. <sup>21</sup> Hiyana nan kiapúna as naniliwanak as nan chiyucha Judio as nan kawad-ák as nan Templo, ya nangpachasancha ay mangpatuy kan ha-un. <sup>22</sup> Ngem finadfiadnganak kan Apo Dios uray inkiana ad wani ay urkiw. Isunga nauyak hena ay nangatachug ay cha mangepaneknek as nan am-in ay tataku ay ap-apud winnu nangangatu. Nan chak ifiagfiakia at munpachong as nan kenarkalen nan chiyucha pomapadtu ya nan kenalen Moises ay

ommattu. <sup>23</sup> Tay enpadtucha ay nan Cristo at masapor munlikiat ya matuy. Enpadtucha us ay hiyantu nan omon-oná ay matakú manipud as nan utúy ta silawana nan numnum nan chiyucha Judío ya nan chiyucha Gentil as nan maepangkep as nan mangesarakanan Apo Dios kan chicha.”\*

<sup>24</sup> As nan cha mangekalintikian Pablo as achorna, finudtakan Gobernador Festo hiya. Kenalina, “Natongokka Pablo! Nan ongor ay sinurom nan cha manongok kan he-a!”

<sup>25</sup> Ngem kenalen Pablo, “Chaanak natongok, machayaw ay Gobernador Festo! Nan chak met ifiagfiakia at tit-iwa, ya takuwak ay ustuy numnumna.

<sup>26</sup> He-a Ari Agripa at ammom met nan maepangkep as nan nauycha, ya mafialinku ay ifiakia kan he-a ay maid ugyatku. Siguraduwak ay mailam chaná am-in, tay chaan naetatafun nan enommatancha. <sup>27</sup> Ari Agripa, ay afurotum nan insurat nan chiyucha pomapadtu? Ammok ay afurotum.”

<sup>28</sup> Nunkanan at Ari Agripa kan Pablo, “Nakkuran ka! Ay kunmu ka-anan un henkemad chi mangawisam kan ha-un ay munfialin as Kristiano?”

<sup>29</sup> Angkiay tinumfor hi Pablo, “Henkemad man winnu mafayag, ekararagku kan Apo Dios ay fiakun he-a yangkiay ngem uray us nan am-in ay cha munchungchungor kan ha-un ad wani ay urkiw at komaman kayu koma am-in kan ha-un ay omaafurot kan Cristo omangkiay nan achiyu makor-onganán.”

<sup>30</sup> Angkiay ya tenmakchug nan ari, nan gobernador, hi Bernice ya am-in nan naketotokor kan chicha. <sup>31</sup> As nan nak-akancha, natatakiatforcha, “Maid met payat enat tona ay taku as libfengna ay uy maepapatuyan winnu maifiaruchan.” <sup>32</sup> Kenalen Agripa kan Festo, “Nailufus na koma ay taku mu kuna chaan chinawat ay nan Emperador nan mangenongnong as nan kasuna.”

## 27

### *Nan Nunligwatan Cha Pablo Ay Umuy Ad Roma*

<sup>1</sup> Kun pay inumchan nan naekeddeng ay urkiw ay umuyanmi ad Italia, inpurangcha hi Pablo ya nan tapen nan fierud kan Julio ay usa ay kapetan nan sosorchachu as nan makali un Bunggoy Emperador.\* <sup>2</sup> Angkiay uy kami nunlukian as nan papor ay nurpu ad Adrumeto ay kiayud munligwat ay umuy henan mangiyaw-awniyan chi papor henan probinsiya ay Asia. As nan nunligwatanmi, nan kadwami at hi Aristarco ay i-Tesalonica henan sakop nan Macedonia.

<sup>3</sup> As nan kafikiatana, inumchan kami ad Sidon. Kiapú as sug-ang Kapetan Julio kan Pablo, penarufusana hiya ay uy nangila as nan kiakiayumna hid-i ta maettan hiya as kasaporana. <sup>4</sup> Kun kami pay kasin nunligwat ad Sidon, nar-os nan papor as apét senakiangan nan Chipre, tay kun chakami sisib-atun as angin. <sup>5</sup> As nan kinumchanganmi henan fiayfiay ay naeesnop henan probinsiya ay Cilicia ya Pamfilia, inumchan kami ad Mira ay siyudad henan probinsiya ay Licia. <sup>6</sup> Hid-i nan nanginchanan Kapetan Julio as nan papor ay nurpu ad Alejandria ay kiayud umuy ad Italia, at hiyachi nan nangilukianana kan chakami. <sup>7</sup> As nan kaat ay urkiw, inyar-arunuy nan papor ay nunlurukiananmi, ya napalikiatan ay inumchan henan ili

\* **26:23** Isa. 9:2; 42:6; 49:6    \* **27:1** Nan “Bunggoy Emperador” at unum kiasot ay sosorchachu nan membrona. Nan tukún ay ngachana at “Sosorchachon Augusto”. Kun pay hi Augusto at hiya hi Cesar Augusto ay nunchinamag ay emperadorcha.

ay Cnido. Kiapú ta sisib-atunmi pay laing nan angin, chaanmi inturuy ay naesnop hid-i. Isunga kunmi at inuy as apét filáng, at nar-os kami ad Salmon henan luta ay Creta ay liniliwus nan fiayfiay.<sup>8</sup> Nalikiatan kami ay nangoolet henan fiayfiay ad Creta inkiana inumchan kami henan lukiar ay makali un Ammay as Mangiyaw-awniyan chi papor ay asnop henan ili ay Lasea.

<sup>9</sup> Nafiyag chi nataktakanmi hid-i, ya kenmauugyat at ay munpapor ay kumchang henan fiayfiay, tay kahipuwak ay hiyasa nan narpasan nan Urkiw ay Mun-ayunaran.<sup>†</sup> Isunga finag-an Pablo chicha,<sup>10</sup> “Iib-a, mailak ay mu ituruy takú ay kumchang henan fiayfiay ad wani, ongor nan maiwagkia ay karkia takú, ya machachaeltu nan nauy papor, ya mafialin ay wachacha us chi matuy.”<sup>11</sup> Ngem kaskasin chinumngor nan kapetan chi sosorchachu as nan kenalen nan nunkuwa ya as nan kenalen nan kapetan as nan papor mu as nan kenalen Pablo.<sup>12</sup> Achi ammay nan mangiyaw-awniyan chi papor as nan kahipuwak. Isunga kaongoran kan chakami nan nangiyafud ay mangituryu ta mu mafialin at umchan kami koma ad Fenix. Tay ad Fenix nan kawad-an nan usa ay mangiyaw-awniyan chi papor ad Creta ay achi manasara as nan kurpuwan chi angin.

### *Cha Pablo As Nan Fiayfiay As Nan Pinmuwakana*

<sup>13</sup> Kun pay enmali nan nakapuy ay angin ay nurpu as apét filáng, kanaganancha mu mafialinchá ay tongparun nan planucha. Isunga inkuyudcha ay nangetag-uy as nan lanchok ay nangepapakinak as nan papor, at enooletmi ad Creta. <sup>14</sup> Ngem kun pay chaan nafiyag, kalina at ya enmali nan puwak ay nurpu as nan ngaton nan Creta. <sup>15</sup> Kun pay naiturchun nan papor, ya achina at sisib-attun nan chiyuy puwak, inyangkiayanmi, ya kun kami naituturchun. <sup>16</sup> Kun kami pay nar-os henan luta ay Cauda ay liniliwus chi fiayfiay, enmolet kami as apét filáng. As nan hiyachi, uray nalikiatan kami as solet at naetag-uy ya naetakudmi nan fianfian-ug ay fiangka ay cha ikuykuyud nan papor. <sup>17</sup> Kun pay narpas ay naetakud nan fiangka, penotepotancha ay ustu nan papor as anad-acha ay tali ta achi makiakkiak. Kiapú ta inyugyatcha nan maichusngoran nan papor as nan lenagkian henan olet nan Sirte, kensopcha nan afilug ay lopot ay hiyasa nan iturturchun nan angin, ya kun as mangiyuan nan angin kan chakami. <sup>18</sup> Kutug ay napigsa as solet nan puwak. Isunga as nan kafikiatana, inchus-orcha nan tapen nan karkia henan fiayfiay ta yumapyap-iw nan papor. <sup>19</sup> As nan maekatu ay urkiw, inwagkiacha nan tapen nan lamenta ay maosar as nan papor henan fiayfiay. <sup>20</sup> Kunmi pay chaan inil-ila nan urkiw ya nan chiyuchya taraw as nan ongor ay urkiw, ya kutug us ay napigsa nan puwak, maid poros namnamami ay maesarakan.

<sup>21</sup> Kiapú ta kaat ay urkiw ay chaancha nangnangan, tenmakchug hi Pablo as nan sangwanancha, ya kanana, “Iib-a, mu kun kayu chinumngor as nan kenalek ya chaan takú nunligwat ad Creta, maid koma nachachael ya naiwagkia. <sup>22</sup> Ngem uray mu hiyasa, pangaasiyu ta papigsaunyu nan numnumyu, tay maid matuy kan chakayu omangkiay nan papor as machachael. <sup>23</sup> Tay ad kia-u, nan usa ay anghel Apo Dios ay nakius-usaak ya chaychayawok at tenmakchug as nan kawad-ak. <sup>24</sup> Kenalen nan anghel kan ha-un, ‘Achika umugyat, Pablo. Masapor tomakchugka as nan sangwanan nan Emperador. Kiapú ta hi Apo Dios at sinug-angan chaká, sug-angana us nan

<sup>†</sup> 27:9 Nan “Urkiw ay Mun-ayunaran” at maselselebrar as nan tapos chi Septembre winnu munlapu as nan Octubre ay timpon chi kahipuwak.

am-in ay kalukianam ya maid matuy kan chicha.<sup>25</sup> Isunga papigsaunyu nan numnumyu ay iib-a, tay muntalekak kan Apo Dios ay maekamantu nan kaman as nan kenalina kan ha-un.<sup>26</sup> Ngem kapeletan ay maesadsad nan papor henan usa ay luta ay liniliwus chi fiayfiay."

<sup>27</sup> As nan maekahinpuru ya opat ay lafi, kukutug kami ay cha iturturchun nan puwak henan fiayfiay ay makali un Adriatico. Kun pay kiayud tongan chi lafi, ninumnum nan chiyucha munchunchunu as nan papor un kiayud kami maesnop henan luta.<sup>28</sup> Isunga linkudcha nan kaposongna, ya naammuwancha ay umuy as turon puru ya unum ay metros. Kun kami pay naslig as akét, kasinchha linkud, ya umuy as chuwan puru ya pitu ay metros.<sup>29</sup> Kiapú ta inmugyatcha ay maichusngor nan papor as nan chiyucha fiatu, inuy-uchay opat ay lanchok ay naetatakud as nan uchichen nan papor ta pakikinkuna. Angkiay ya enkararagcha ay henkemad koma nan mafigtana.<sup>30</sup> Nan chiyucha munchunchunu as nan papor at penachascha ay lomayaw. Isunga kensopcha nan fiangka as nan chanum ay kamancha cha kospun nan tapen nan lanchok as nan pangon nan papor.<sup>31</sup> Kenalen Pablo as nan kapetan ya sosorchachu, "Mu mak-ák nan hanácha munchunchunu as nan papor, maidtu maesarakan kan chakayu."<sup>32</sup> Isunga finsat nan sosorchachu nan tali ay naisisilu as nan fiangka, ya inukiaycha ay maiyanud henan fiayfiay.

<sup>33</sup> Kun pay cha mawaor, nunpakaasi hi Pablo kan chicha am-in ta mangancha. Kenalina, "Hinpuru ya opat ay urkiw chi nunsusuuchanyu as kuminkan chi puwak, ya inkiana ad wani at chaan kayu nangnangan.<sup>34</sup> Pangaasiyu ta mangan kayu ta pumigsa kayu. Maidtu uray usa kan chakaya as matuy winnu masukiatan."<sup>35</sup> Kun pay narpas ay kenalen Pablo na, emmara as tenapay, ya nunyaman kan Apo Dios as nan sangwanancha am-in. Angkiay pinutput-ingna, ya enlapuna ay mangan.<sup>36</sup> Kun pay inilan nan iib-ana, pimigsa nan numnumcha. Angkiay nangancha us am-in.<sup>37</sup> Chuwan kiasot ya piton puru ya unum kami am-in ay nunlurukian as nan papor.<sup>38</sup> Kun kami pay am-in narpas ay nangan, inchus-orcha nan am-in ay naesasaku ay trigo henan fiayfiay ta yomapyap-iw pay nan papor.

### *Nan Nachachaelan Nan Papor*

<sup>39</sup> Kun pay nafikiat, chaan enmatonan nan chiyucha munchunchunu as nan papor nan luta, ngem inilacha nan malakian ay lukiar henan olet nan fiayfiay. As nan hiyachi, nuntuturakiancha ay mu mafialin at hid-icha ay esadsad nan papor.<sup>40</sup> Isunga nan chiyucha tali ay nanatakud as nan chiyucha lanchok at finsatcha, ya inkiascha as nan chanum. As nan chacha mangekamanan as sa, chacha us fokatan nan chiyucha tali ay nanatakud as nan chiyucha kaiw ay osaruncha ay mangetoróng as nan papor. Angkiay penatakchugcha nan afileg ay lopot ta ituturchun nan angin ay umuy as nan oletna.

<sup>41</sup> Ngem naichusngor nan papor as nan tinmutunu ay lakian. Naitunak nan pangu, ya maid atuna ay makaan. Nan uchichina at nakiakkiak kiapú as nan nanongchongparan nan chiyucha challuyon ay napigsa.

<sup>42</sup> As nan hiyachi, nan plenaplanon nan sosorchachu at patayuncha nan am-in ay fierud ta maid usa as kumiyat ay lomayaw.<sup>43</sup> Ngem kiapú ta laychun nan kapetan chi sosorchachu ay mangesarakan kan Pablo, enpawana ay tongparuncha nan planucha. Kuna at infilin ay nan chiyucha makakiyat at omagkiangcha as nan chanum omon-oná, ya kumiyatka ay umuy as oletna.<sup>44</sup> Nan tapina at inmunudcha ay penmapakud as nan chiyucha

tabra winnu nachachael ay parten nan papor. Hiyana nan enatmi am-in ay tenmakchang, ya maid nurning kan chakami.

## 28

### *Hi Pablo Ad Malta*

<sup>1</sup> Kun kami pay tenmakchang, hiyachi nan nangammuanmi ay nan luta ay anchi at nangadnan as Malta. <sup>2</sup> Nan chiyuchcha umiili hid-i at enpailacha nan pararu ay sug-angcha kan chakami. Inyapuchcha ay nangmangili kan chakami am-in, tay enlapuna ay umuchan ya tungnin. <sup>3</sup> Kun pay hi Pablo, uy nanmong as hinfiatak. As nan chana mangitungawan as nan apuy, fenmoknag at nan usa ay urug kiapú as nan atong nan apuy, ya intumtumna nan liman Pablo. <sup>4</sup> Kun pay inilan nan umiili hid-i nan urug ay cha muntagayon as nan liman Pablo, natatakiatforcha, “Pomapatuy man na ay taku! Uray mu chaan nurning hiya henan fiayfiay, nan dioscha ay makali un Nalintig at achina cha parufusun hiya ay matak.” <sup>5</sup> Ngem inwaratken Pablo nan urug as nan apuy ay maid enom-ommatt kan hiya.\* <sup>6</sup> Sisin-ud nan umili nan fumrorana winnu munkatutu-ukiana ay matuy. Ngem kun pay nafiyag chi nanan-uchancha ya maid inilacha as enommat kan hiya, finaliwancha nan numnumcha maepangkep kan hiya, ya kanancha, “Usa payat hiya ay dios!”

<sup>7</sup> As nan sag-un nan lukiar ay enommatan nan hana at wacha nan lutan Publio ay hiya nan ap-apu henan hana ay luta ay liniliwus chi fiayfiay. Enayakiana chakami as afongna, ya ammay chi enatna ay nangmangili kan chakami as turu ay urkiw. <sup>8</sup> Hiyachi us ay timpu nan cha munpuchotan ya cha mun-etaiyan aman Publio as chara. Inmuy hi Pablo as nan kawadana ya enkararakiana hiya. As nan nangepatayana as nan limana kan hiya, enmammay. <sup>9</sup> Kun pay enommat na, am-in nan kahisasaket henan intiru ay luta ay anchi at enmalicha kan Pablo, ya enmammaycha. <sup>10</sup> Ongor chi inchatcha as pangrispitucha kan chakami. As nan munligwatanmi, ongor chi inyalicha as nan papor ay masapormi as nan munfiaatanmi.

### *Nan Inumchanan Cha Pablo Ad Roma*

<sup>11</sup> Kun pay inmuy chi turu ay furan, nunlukian kami as nan papor ay makali un Nan Apel ay Dios ay nurpu ad Alejandria ay nafofoon ad Malta as nan kahipuwak. <sup>12</sup> As nan inumchananmi henan siyudad ay Siracusa, nagyan kami hid-i as turu ay urkiw. <sup>13</sup> Nunlapu hid-i, inturuyumi ay nunpapor, ya inumchan kami ad Regio. As nan kafikiatana, kalina at ya wachay angin ay nurpu as apét filáng. As nan maekadwa ay urkiw, inumchan kami ad Puteoli. <sup>14</sup> Hid-i nan nanginchananmi as nan tapen nan omaafurot ay nangayag kan chakami ay makepagyan kan chicha as pitu ay urkiw. As nan narpasan tono, inturturuyumi ay nanarcharan ay umuy ad Roma. <sup>15</sup> Kun pay chinngor nan iib-a ay omaafurot ad Roma nan chami omaliyan, nunligwatcha ay nanib-at kan chakami. Nan tapina kan chicha at nanarcharancha inkiana as nan makali un Mun-el-elakwan ad Appio, ya nan tapina at inumchancha as nan makali un Turu ay Chumawchawsan. Kun pay inilan Pablo chicha, nunyaman kan Apo Dios, ya pinmigsa nan numnumna.

<sup>16</sup> Kun kami pay inumchan ad Roma, penarufusan nan totoray hi Pablo ay magyan as nan usa ay afong ya empakuwarchacha as nan usa ay sorchachu.

\* <sup>28:5</sup> Mar. 16:18

### *Nan Naketakiatforan Pablo As Nan Chiyuycha Judio Ad Roma*

<sup>17</sup> Kun pay inmuy chi turu ay urkiw, enpaamong Pablo nan anap-apon chi Judio. As nan naamongancha, kenalen Pablo kan chicha, “Iib-ak, uray mu maid finmasorak as nan pachong takú ay Judio winnu as nan iniili ay ukialen nan kaap-uwan takú, natiliwak challu ad Jerusalem ya naipurangak as nan chiyuycha Romano. <sup>18</sup> Kunak pay finistikiar kan chicha, lenayadchha ay mangilufus kan ha-un, tay maid naanapancha as kiapúna as mangpatuyan-chha kan ha-un. <sup>19</sup> Ngem kun pay kenontran nan chiyuycha pachongku ay Judio na, napeletanak ay mangiyuy as nan kasok as nan Emperador uray maid charumku kan chicha. <sup>20</sup> Hiyasa nan nangepaayakiak kan chakayu ta makiinnilaak ya maketakiatforak kan chakayu. Tay laychok ay epakaawat kan chakayu ay nan naifiaruchak at kiapú as nan pammatek kan Jesus ay namnamaun takú ay kianak Israel.”

<sup>21</sup> Angkiay kenalicha kan hiya, “Maid met naaw-awatmi as surat ay nurpu ad Judea maepangkep kan he-a. Maid us enpadpachamag nan iib-a ay emar-ali ay nurpu hid-i winnu kenarkalicha as mangotettet maepangkep kan he-a. <sup>22</sup> Ngem uray mu hiyasa, laychunmi challu ay chungrun nan wacha as numnummu maepangkep as nan bunggoy ay mangun-unud kan Jesus. Tay ammumi ay henan am-in ay lukiar at kun maekontray cha kankanan nan tataku as nan nauy ay sursuru ay cham un-unuchun.”

<sup>23</sup> As nan nangtuturakiancha as nan urkiw ay kasingcha maamongan, ongoongorcha nan enmali as nan mamagyangan Pablo. Enlapon Pablo as nan wiet inkiana as nan naschum ay mangelawlawag ya mangpaneknek kan chicha as nan maepangkep henan muntorayan Apo Dios. Penachasna ay mangawis kan chicha ay omaafurot kan Apo Jesus babaen as nan Lintig Moises ya nan insurat nan chiyuycha pomapadtu. <sup>24</sup> Nan tapina kan chicha at naawischa as nan kenalina. Ngem nan tapina at chaancha enafurot. <sup>25</sup> Nakudkudwacha maepangkep as nan enlawlawag Pablo kan chicha, isunga nak-akcha. Ngem sakbay mak-akcha, kenalen Pablo kan chicha, “Tit-iwa nan enpaifiakian nan Espiritu Santo kan Isaias ay pomapadtu as nan kaap-uwanyu! <sup>26</sup> Kenalina,

‘Uyka, ya kanam as nan nauycha tataku, Uray mu chungruchungrunu, achiyu challu maawatan, ya uray mu ilailaunyu, achiyu challu mae-matonan,

<sup>27</sup> tay tenmangken chi numnum chatona ay nunkasokel! Penonetancha nan ingacha, ya kenekemetcha nan matacha. Tay mu makailacha, makadngorcha, ya makaawatcha, nunfiangadcha koma kan ha-un ta paammayok chicha.<sup>†</sup>

<sup>28</sup> Isunga masapor ngarud maammuwanu ay wachacha nan infiaor Apo Dios ay uy mangifiakia as nan maepangkep as nan atuna ay mangesarakan as nan chiyuycha Gentil. Chunngorchantul!” <sup>29</sup> [Kun pay kenalen Pablo na, nak-ak nan chiyuycha Judio, ya nunsidlay atuncha ay masosek.]

<sup>30</sup> Nagyan hi Pablo hid-i as chuwa ay tawwun as nan afong ay abafiangana, ya menangilina nan am-in ay inmuy kan hiya. <sup>31</sup> Enkaskasabana nan maepangkep henan muntorayan Apo Dios ya insursuruna nan maepangkep kan Apo Jesu Cristo. Naturud hiya, ya maid nangepawpawa kan hiya as nan hanacha en-enatna.

† 28:27 Isa. 6:9-10

## Nan Surat Pablo As Nan Chiyuycha

### I-Roma

## A. Nan Omona Ay Ammuwun Maepangkep Kan Pablo Ya Nan Sursuratna

Nan maepangkep as nan fiyag Pablo at mafiasa as nan liblu ay En-enat Nan Apostoles. As nan hana ay liblu, enpakaammon Lucas nan maepangkep as nan enmafurotan ya nunfiabfiaatan Pablo as nan uyna nun-ekaskasabaan ad Asia, Bitinia, Capadocia, Macedonia ya ad Acaya. Angkiay ya enpakaammon us Lucas nan enommat kan Pablo ay fierud as nan chana umuyan ad Roma.

Babaen as nan pannakafialin nan Espiritu Santo, infiaten Pablo nan ongor ay suratna as nan chiyuycha omaafurot. Nauycha nan sursuratna:

1. Nan suratna as nan chiyuycha i-Roma (A.D. 57-58)
2. Nan omona ay suratna as nan chiyuycha i-Corinto (A.D. 55)
3. Nan maekadwa ay suratna as nan chiyuycha i-Corinto (A.D. 56)
4. Nan suratna as nan chiyuycha i-Galacia (A.D. 40-49)
5. Nan suratna as nan chiyuycha i-Efeso (A.D. 60-62)
6. Nan suratna as nan chiyuycha i-Filipos (A.D. 62-63)
7. Nan suratna as nan chiyuycha i-Colosas (A.D. 60-62)
8. Nan omona ay suratna as nan chiyuycha i-Tesalonica (A.D. 50-52)
9. Nan maekadwa ay suratna as nan chiyuycha i-Tesalonica (A.D. 52-53)
10. Nan omona ay suratna kan Timoteo (A.D. 64-66)
11. Nan maekadwa ay suratna kan Timoteo (A.D. 67)
12. Nan suratna kan Tito (A.D. 64-66)
13. Nan suratna kan Filemon (A.D. 60-62)

### B. Nan Omona Ay Ammuwun As Nan Nauy Surat

Nan nauy ay surat at insurat Pablo para as nan chiyuycha omaafurot kan Cristo ay wacha henan siyudad ay Roma. Nan nauy ay siyudad nan kaadachaan ay siyudad ad Italia, ya hena us nan kawad-an nan emperadorcha ay makalí un “Caesar”.

Uray mu chaan pay inumchan hi Pablo ad Roma, wachacha challu nan omaafurot kan Cristo ay naamong hid-i ay nurpu ad Judea, Asia ya Africa. Wachacha us nan tapina kan chicha ay tanig ay i-Roma ay Gentil ay naetapi as nan chiyuycha enmafurot kan Cristo. Ongor chi layad Pablo ay mangfisita kan chicha ad Roma (1:10-11; 15:21-24) ta munsisinnurucha ya ta munfifinnchangcha. Kenalen Pablo ay penachasna ay umuy kan chicha (1:13), ngem narachaw hiya kiapú as nan ongor ay chununa ad Asia.

As nan nauy surat, laychun Pablo ay epakaammu as nan chiyuycha i-Roma ay maid poros tukún as kaesarakanan mu achi babaen as pammati kan Cristo yangkiay. Tay babaen as nan natuyana as nan koros at mawadan nan tataku as chansa ay maesnop kan Apo Dios (3:21-22; 5:1-9). Uray mu ngachana nan atun nan taku ay mangepalintig as achorna, machusa challu hiya, tay chakus at nakafiasor, at nakekeddengan hiya ay matuy (7:14-24). Tay nan lintig at maid poros pannakafialina ay mangepalintig as taku (3:20-22).

Kun pay maepangkep kan chitaku, ad kasin, kaman chitaku kafusor kan Apo Dios (5:10). Ngem ad wani, kiapú as nan enat Jesus ay hiya nan pannakaachor takú kan Apo Dios, naiyesnop takú kan Apo Dios, ya naifilang takú as an-akna. Kiapú us kan Cristo, nawad-an takú as kalibfengan ay

mangawag kan Apo Dios as “Ama” (8:15). Kiapú ta hiyana nan enatna para kan chitaku babaen kan Cristo, enpapkakaasen Pablo ay osarun takú nan fiyag ya achor takú ay munserfi as nan Apo (12:1). Masapor fialiwan takú nan chiyucha manangisiw ay panagfiyag takú, ya eparufus takú ay hi Apo Dios nan mangepafiarú as nan katataku takú ta ammuwun takú nan ustu ay laychun Apo Dios kan chitaku.

Kun pay maepangkép as nan chiyucha Judio, as nan kapitulo 9-11, enlawlawag Pablo nan planon Apo Dios maepangkép as nan tukutukún ay nasyon asna's luta. Enpakaammuna ay nan nangachiyan nan chiyucha Judio kan Cristo at achina kanan un maid at fiyagcha kan Apo Dios (11:1-6), tay hiyana nan sikud ay planuna ta nan chiyucha Gentil at mawadancha as chansa ay maesnop kan Apo Dios (11:11), ya tay achi laychun Apo Dios ay wachay uray usa ay Judio winnu Gentil ay malitaw (11:30-32). Nan chiyucha Judio at maepachongcha as nan chiyucha panga ay senpak Apo Dios. O, enatna na ta wachay somaliping as fiarú ay panga ay munfunga as ongoongor (11:17-24). Ad wani, maid paspasikun Apo Dios as Judio winnu fiakun Judio, tay nan chiyucha yangkiay omafurot kan Cristo nan maekari ay munfialin as an-akna.

Wacha challu nan kaesarakanan nan chiyucha Judio. Mu omafurotcha kan Cristo, maetapichantu as nan pamilyan Apo Dios ay hiyasa challu nan sikud ay enkaren Apo Dios kan Abraham ad pus-uy. Isunga uray Judio winnu Gentil at kun usa nan Amacha ya mangesarakán kan chicha. As nan munfiangchantu Cristo Jesus ay mangara as nan tatakuna, maetapi takú am-in kiapú as nan pammati takú kan hiya (1:16-17).

### Nan Nakudkudwaan Nan Nauy Surat

Nan Laplapon Nan Surat 1:1-17

Nan Kiapúna Ay Masapor Chi Takuy Kaesarakanan 1:18-3:20

Nan Kenalintig Apo Dios 3:21-4:25

Nan Fiarú Ay Fiyag Kan Cristo 5:1-8:39

Nan Maepangkép As Nan Chiyucha Judio 9:1-11:36

Nan Panagfiyag Nan Chiyucha Omafurot Kan Cristo 12:1-15:13

Nan Nun-ekaskasabaan Pablo 15:14-33

Nan Chiyucha Anongos Ay Pakomosta 16:1-27

### Nan Laplapon Nan Surat

<sup>1</sup> Ha-un hi Pablo ay usa ay fiabfiaarun Cristo Jesus. Piniliyak kan Apo Dios as apostolna, ya chinutokanak ay mangekaskasaba as nan Ammay ay Chamag ay nurpu kan hiya.

<sup>2</sup> Nan nauy Ammay ay Chamag at enkaren Apo Dios ad pus-uy ya naisurat as nan Kalen Apo Dios babaen as nan chiyucha pomapadtuna. <sup>3</sup> O, nan nauy Ammay ay Chamag at maepangkép as nan Anak Apo Dios ay hi Apo takú ay Jesu Cristo. Mu maepangkép as nan katatakuna at nurpu hiya as nan kianak Ari David.\* <sup>4</sup> Mu maepangkép as nan nasantowan ay kenadiosna, naepaila ay hiya nan mannakafialin ay Anak Apo Dios babaen as nan nangtakuan Apo Dios kan hiya manipud as nan utúy. <sup>5</sup> Babaen kan Cristo, inchat Apo Dios nan grasyana kan ha-un, at nunfialinunak as apostol ay uy mangawis as nan tataku henan am-in ay nasyon ta afurotuncha ya tongparuncha hi Cristo ta maichayaw koma hiya in-inkiana.† <sup>6</sup> Uray

\* <sup>1:3</sup> Nan maepangkép as nan “Karen Apo Dios” at maila as nan nauycha ay liblu: 2 Sam 7:12-16; Sal. 89:3-24; 132:17; Isa. 11:1-5; Jer. 23:5-6      † <sup>1:5</sup> Ara. 22:21; 26:15-18; Gal. 1:1

chakayu ay wacha hesa ad Roma at naetatapi kayu us as nan tataku ay enayakian Apo Dios ay makius-usa kan Jesu Cristo.

<sup>7</sup> Isunga nauy nan suratku kan chakayu am-in hesa ad Roma ay laylaychun Apo Dios ya pinilina ay munfialin as tatakuna.

Sapay koma ta mawawacha kan chakayu nan grasya<sup>‡</sup> ya natalna ay numnum ay nurpu kan Apo Dios ay Ama takú ya kan Apo Jesu Cristo.

### *Nan Munlaychan Pablo Ay Umyu Ad Roma*

<sup>8</sup> Nan omona ay ifiakiak at babaen as nan enat Jesu Cristo, munyamanak kan Apo Dios kiapú kan chakayu am-in, tay nan chamag maepangkep as nan pammatiyu at naammuwan henan am-in ay lukiar asna's luta. <sup>9</sup> Hi Apo Dios ay chak munserserfiyan as nan am-in ay numnumku ay mangekaskasaba as nan Ammay ay Chamag maepangkep as nan Anakna at paneknekana ay as nan am-in ay munkarkararakia, chak ekarkarakian chakayu. <sup>10</sup> Chak chawchawatun kan Apo Dios ay mu eparufusna at makaaliyak challu hesa ay mangfisita kan chakayu. Tit-iwa ay nafiyag ay laraychok ay mangfisita kan chakayu. <sup>11</sup> Tay ongor chi layadku ay mangfisita kan chakayu ta ifingayku kan chakayu nan nurpu as nan Espiritu Santo ay bendisyon ay mangepapigsa as nan pammatiyu. <sup>12</sup> Nan laychok ay kanan at munpepen-napigsa takú am-in as pammati. Mafiadnganan kiapú as nan mangil-ak as nan pammatiyu ya mafiadnganan kayu us babaen as nan pammatek.

<sup>13</sup> Chakayu ay iib-a, laychok ay epakaammu kan chakayu ay namen ongor ay plenanok ay uy mangfisita kan chakayu, ngem inkiana ad wani, wacha nan cha mamaspas-iw kan ha-un. Laraychok ay omali hesa ta wacha us komay awisok kan chakayu ay omafurot ay kaman as nan enommat as nan chiyucha Gentil henan tapina ay il-ili. <sup>14</sup> Wachay libfengku ay uy mangekaskasaba as nan Ammay ay Chamag as nan am-in ay karasen chi tataku. O, wachay libfengku as nan chiyucha nangangatu winnu ap-apud ay tataku, ya as nan chiyucha nakaachar ya chaan nakaachar. <sup>15</sup> Isunga laraychok ay mangekasaba as nan Ammay ay Chamag kan chakayu us hesa ad Roma.

### *Nan Pannakafialin Nan Ammay Ay Chamag*

<sup>16</sup> Achiyak poros mafiain ay mangekaskasaba as nan Ammay ay Chamag, tay hiyana nan kail-an nan pannakafialin Apo Dios ay mangesarakan as nan am-in ay omafurot. Nan nauy ay chamag at naekasaba on-onas as nan chiyucha Judio, angkiay ya as nan chiyucha Gentil. <sup>17</sup> Tay babaen as nan nauy Ammay ay Chamag at maammuwan takú nan atun Apo Dios ay mangiflang as nan tataku as nalintig as nan mangiilana. Nan nauy ay kenalintig at maifisar as nan pammati yangkiay, kaman as nan naisurat as nan Kalen Apo Dios ay kanana,

“Nan taku ay inflang Apo Dios as nalintig babaen as nan pammatina at wacha kan hiya nan fiyag ay maid patingkiana.”<sup>§</sup>

### *Nan Am-in Ay Tataku At Fumafiasorcha*

<sup>18</sup> Hi Apo Dios ad chaya at empakaammuna ay chusauna nan am-in ay achi omafurot kan hiya ya nan am-in ay mangekamkaman as mangotettet. Tay

<sup>‡</sup> **1:7** Nan laychun ay kanan nan “grasya” at bendisyon winnu maid maepachongan ay layad ya kenaanos, ya fiachang Apo Dios kan chitaku.    <sup>§</sup> **1:17** Hab. 2:4; Gal. 3:11; Heb. 10:38

nan chiyuycha mangekaman as mangotettet at epapawachay maepakaam-muwan nan kenatit-iwa maepangkep kan hiya.\*<sup>19</sup> Tay nan mafialin ay maammuwan maepangkep kan Apo Dios at naraka ay maammuwan, tay hi Apo Dios challu nan nangepakaammu kan chicha.<sup>20</sup> Tay nunlapu as nan nafiayangan nan nauy luta at naraka ay maawatan nan tataku nan maepangkep as nan kenadiosna ya pannakafialina ay maid patingkiana uray mu achi maila hiya, tay maila as nan finayangna. Isunga maid panfor-cha ay achi mangammu as nan kenatit-iwa.<sup>21</sup> Tay uray aammucha ay wacha hi Apo Dios at kinukuratcha challu ay achi munchayaw ya munyaman kan hiya ay Dios. Ngem kun at nan numnumcha at nunfialin as maid kotokna, isunga ngenmongot as solet nan numnumcha.<sup>22</sup> Chacha kankanan un masilibcha, ngem nunfialinchha met as maid am-ammucha.<sup>23</sup> Tay nan chinaychayawcha at fiakun hi Apo Dios ay achi matmatuy, ngem kun at nan enam-ammaancha ay didiosen ay kaman ilan chi taku ay matuy, kossel, animar, winnu munkadkachap ay finayang.<sup>†</sup>

<sup>24</sup> Isunga inukiay Apo Dios chicha ay cha ud-ay mangekamkaman as manangotettet ay mawawacha as nan numnumcha ay laylaychuncha. O, inukiay Apo Dios chicha ta atuncha nan am-in ay karasen chi kafiafiai in ay chacha atuatun as nan tunggal usa.<sup>25</sup> Hiyachi nan chacha at-atun, tay chinukkiancha nan kenatit-iwa maepangkep kan Apo Dios ta nan kinukutum nan afurotuncha. Tay nan chinaychayawcha ya nan nunserserfiyancha at as nan chiyuycha finayang Apo Dios, fiakun hi Apo Dios ay fumafiyang. Hi Apo Dios yangkiay nan wachay kalibfengana ay maichaychayaw in-inkiana! Amen.

<sup>26</sup> Kiapú as sa, inukiay Apo Dios chicha ay mangekamkaman as nan kafiafiai in ay laylaychun nan achorcha. Uray nan fianafiai at senokatancha nan ustu ay mangepapasan as lachok, ya kuncha at epapas nan lachokcha as nan pachongcha ay fianafiai.<sup>27</sup> Kaman us nan lanaraki at chinukkiancha nan layadcha as nan fianafiai, ya kuncha at epapas nan assi ay lachokcha as nan pachongcha ay lanaraki. Isunga ekaruchantu nan chusa ay maifiakiay as nan kaiisiw ay en-enatcha.

<sup>28</sup> Kiapú ta chaancha finigfig hi Apo Dios, inukiay Apo Dios chicha ay mangnumnum as mangotettet ay cha atuatun, at hiyasa nan mangekamanancha as manangotettet ay achicha koma atun.<sup>29</sup> Kanayon ay chacha at-atun nan am-in ay ilan chi kenamangisiw, kenamangotettet, kenaakum ya kenamanang-abkor. Nangapposcha, pomapatuycha ya mannakisum-sumacha, nunkasikapcha, munplanucha ay mamalikiat as pachongcha ay taku, omekak-alicha,<sup>30</sup> nangossotha, ya ingoruncha hi Apo Dios. Maid rispitucha as uray ngachana ay taku, nunkapangascha ya nachayiwcha. Kanayon ay munnumnumnumcha as tapina ay ilan chi mangotettet ay atuncha, ya achicha poros chumngor as nan chanakchakorcha.<sup>31</sup> Maid poros ammay as numnumcha ya achicha poros mapiyar ay tataku. Maid layadcha ya sug-angcha as nan iib-acha.<sup>32</sup> Uray aammucha nan lintig Apo Dios ay machusa in-inkiana nan cha mangekamkaman as assisid-i, chacha pay laing iturturuy ay mangekaman. Fiakun yangkiay chachi, tay munlagsakcha mu unuchun nan tapina ay tataku nan cha mangekamkaman as assisid-i.

\* <sup>1:18</sup> Sal. 14:1; 53:11; 73:11; Rom. 1:25; 2:15    † <sup>1:23</sup> Sal. 106:20; Isa. 46:1-7

### *Nan Atun Apo Dios Ay Mun-okóm*

<sup>1</sup> Isunga chakayu ay oomsot, maid poros maepanforyu uray ngachana nan katatakuyu mu okomúnyu nan tapina, tay chayu us challu ekamkaman nan chacha at-atun. As nan chayu mangok-okomán kan chicha, nan achoryu challu nan chayu ok-okomún. <sup>2</sup> Ammu takú met ay nalintig ya ustу nan atun Apo Dios ay mangokóm as nan tataku ay mangekamkaman as assisid-i ay mangotettet. <sup>3</sup> Isunga mu okomúnyu nan chiyuyla mangekamkaman as assisid-i ay manangotettet, ya assisid-i us challu nan chayu at-atun, ay kananyu un maelayawanyuntu nan manusaan Apo Dios kan chakayu? <sup>4</sup> Figifikunu met nan ongor ay fiachang ya tata-un Apo Dios kan chakayu. Ammuyu met ay nan hana ongor ay kenaammay Apo Dios kan chakayu nan mangetoróng kan chakayu ay munfiafiawi as nan fiasfisoryu. <sup>5</sup> Nan kenatit-iwana at kunyu challu patatangkenun chi numnumyu ya achiyu laychun ay munfiafiawi. Isunga chayu tapitapiyan nan chusayu as nan urkiw ay manusaan Apo Dios as nan chiyuyla achi omaafurot. As nan hana ay urkiw, maila nan ustу ay atun Apo Dios ay mun-okóm. <sup>6</sup> Tay gun-gunaanantu nan am-in ay tataku ay maiyunud as nan en-enatcha.\* <sup>7</sup> Nan tataku ay mangepapasnek ay mangekaman as ammay ya mangiturturuy ay manganap as kaichayawancha ay murpu kan Apo Dios ya manganap as nan pannakawayawayacha as nan utúy at ichat Apo Dios kan chicha nan fiyag ay maid patingkiana. <sup>8</sup> Ngem nan tataku ay nangekot ya achicha laychun ay mangtongpar as nan kenatit-iwa, ngem kuncha at ekaman chi manangotettet as nan mangilan Apo Dios at chusaantu Apo Dios chicha as makasolet. <sup>9</sup> Awni at munlikiat ya malilifok nan am-in ay mangekamkaman as mangotettet, kaskasin nan chiyuyla Judio ya uray nan chiyuyla Griego. <sup>10</sup> Ngem nan tataku ay mangekamkaman as ammay at ichattu Apo Dios nan talna ya kaichayawan kan chicha, kaskasin nan chiyuyla Judio ya uray nan chiyuyla Gentil. <sup>11</sup> Tay hi Apo Dios at mapapchong nan atuna as nan mun-okomana.†

<sup>12</sup> O, am-in ay finmasor at maisiyancha kan Apo Dios ta machusacha inkiana. Nan chiyuyla Gentil ay achi nangammu as nan Lintig Moises at achi ifisar Apo Dios nan ekeddengna ay chusacha as nan hana ay Lintig. Kun pay nan chiyuyla Judio ay nangammu as nan Lintig Moises at ifisar Apo Dios nan ekeddengna ay chusacha as nan hana ay Lintig. <sup>13</sup> Tay fiakun nan chiyuyla munchungchungor yangkiay as nan Lintig nan ifilang Apo Dios as nalintig as nan mangilana, ngem kun at nan chiyuyla manongtongpar as nan lintigna. <sup>14</sup> Uray achi ammon nan chiyuyla Gentil nan Lintig ay naichat kan Moises, mu maiyunud challu nan panagfiyagcha as nan hanacha filfilin as nan Lintig ay ansa, naepaila ay kaman lintig kan chicha nan numnumcha. O, assesha challu uray maid kan chicha nan hana naisurat ay lintig. <sup>15</sup> Epailacha babaen as nan chacha ekamkaman ay wacha as numnumcha nan inflifilin nan Lintig. Nan numnumcha us nan mangepanekeknek kan chicha mu ustу winnu achi ustу nan chacha at-atun. <sup>16</sup> Assesa nan ommat as nan urkiw ay mangokomán Apo Dios as nan am-in babaen kan Jesu

\* <sup>2:6</sup> Sal. 62:12; Prov. 24:12 † <sup>2:11</sup> Deut. 10:17; Ara. 10:34; Efe. 6:9

Cristo. O, okomúntu Apo Dios nan am-in ay tataku uray nan chaan naam-ammuwan ay wacha as numnumcha. Hiyana us nan chak ifiagfiakia as nan chak mangekaskasabaan as nan Ammay ay Chamag.<sup>‡</sup>

### *Nan Chiyuyucha Judio Ya Nan Lintig*

<sup>17</sup> Chakayu ay iib-ak ay Judio, figfikunyu met kayman ay Judio kayu, ya muntalek kayu ay esarakan chakayu kan Apo Dios kiapú as nan chayu manongtongparan as nan Lintig ay inchatna kan Moises. Chayu us epang-pangas ay tatakon Apo Dios chakayu. <sup>18</sup> Kananyu us un ammuyu nan lay-chuna ay atunyu ya naraing kayu ay munpili as kaammayan, tay enacharyu nan Lintig. <sup>19</sup> Siguradu kayu pay ay chakayu nan mangisuru as nan tataku ay nunkafurag as nan maepangkep kan Apo Dios ta masilawan nan ngongot ay numnumcha. <sup>20</sup> Kananyu un kafiaelanyu ay manukun ya mangisuru as nan tataku ay kaman ongong-a ay achi nangammu as nan kenatit-iwa. Kananyu chi, tay nan munnunumnumyu at ammuyu nan lintig Apo Dios ay kawad-an nan am-in ay kenasilib ya kenatit-iwa. Ngem achiyu met ammu. <sup>21</sup> Mu hiyasa ay chakayu nan mangisursuru as nan tapina, adchi ngarud t'uyyu achi isuruwan nan mismu ay achoryu? Chayu met ekaskasaba kan chicha un achicha mangak-akiw, at adchi t'uy kayu cha mangakiw? <sup>22</sup> Chayu isursuru ay achicha umiwei, at adchi t'uy kayu cha umiwei? Achiyu met kayman laraychun ay chaychayawun nan chiyuyucha didiosen, ngem sung-sungkop kayu met as nan templocha ay mangakiw as nan chiyuyucha wacha hid-i. <sup>23</sup> Chayu epangas ay wacha kan chakayu nan lintig Apo Dios, ngem chayu met ifiafiaiñ hi Apo Dios babaen as nan chayu manglablабsingan as nan hana ay lintig. <sup>24</sup> Tay kaman as nan naisurat as nan Kalen Apo Dios ay kanana,

“Nan chiyuyucha Gentil at chacha munkarkali as maifusor kan Apo Dios kiapú kan chakayu ay Judio.”<sup>§</sup>

<sup>25</sup> Wacha met chi kotok nan nasugyatananyu mu tongparunyu nan lintig Apo Dios. Ngem mu achiyu tongparun, maid kotokna, tay kaman kayu as nan chiyuyucha Gentil ay fiakun tatakon Apo Dios. <sup>26</sup> Kaman us as nan chiyuyucha Gentil, uray chaancha nasugyatan, ngem mu tongparuncha nan lintig Apo Dios, ifilang Apo Dios chicha as tatakuna, tay infilangna chicha as nasugyatan as nan numnumcha. <sup>27</sup> Isunga chakayu ay Judio, uray nasugyatan kayu as nan achoryu ya wacha kan chakayu nan naisurat ay lintig Apo Dios, mu chayu pay laing lablабsingun nan hana ay lintig at maokóm kayuntu ta machusa kayu. O, nan chiyuyucha Gentil ay chaan nasugyatan ngem chacha challu tongtongparun nan lintig at chicha nan mangepaneknek as nan fiasfiasoryu. <sup>28</sup> Tay nan tit-iwa ay tatakon Apo Dios at fiakun taku ay naiyanak as nan Judio ya nasugyatan ay mamaila ay maekaman as nan achor. <sup>29</sup> Ngem nan tit-iwa ay Judio at nan taku ay nafiarfialiwan nan numnumna babaen as nan Espiriton Apo Dios, fiakun nan mangtongparan as nan sugyat. Nan assena ay taku at fiakun nan pachongna ay tataku nan mangichayaw kan hiya, ngem hi Apo Dios.

## 3

### *Nan Maepangkep As Nan Chiyuyucha Judio (Rom. 9:4, 5)*

<sup>‡</sup> **2:16** Mat. 25:31-36; Jn. 5:22; Ara. 17:30-31; 2 Co. 5:10

<sup>§</sup> **2:24** Isa. 52:5; Ezek. 36:22

<sup>1</sup> Uy at wachay manarudsud un mu hiyasa ngarud, anan kotok ngay chi kenaJudiom? Winnu anan kotok nan nasugyatananmi? <sup>2</sup> O, ong-ongor met nan kotok nan kenaAudio. Omona, entalek Apo Dios kan chitaku nan empaisuratna ay kali. <sup>3</sup> Tit-iwa ay wachacha nan Judio ay achi mapiyar, ngem ay kun laychun tosa ay kanan at achi us mapiyar hi Apo Diós ay mangtongpar as nan enkarina? <sup>4</sup> Fiakun hiyasa nan laychuna ay kanan! Tay uray nangutum am-in ay tataku at achi poros mafialin ay munkutum hi Apo Dios.\* Kaman as nan naisurat as nan Kalen Apo Dios ay kanana, “Mu munkalika Apo Dios, maammuan ay ústu nan cham kankanan. Mu wachay mangepfiasor kan he-a, achika mafialin ay maamis.”†

<sup>5</sup> Ngem mu nan mangotettet ay cha takú ekamkaman at narawag ay epailana nan kenalintig Apo Dios, ngachana nan maifiakia takú? Ay kun achi nalintig hi Apo Dios ay manusua kan chitaku? (Hiyana nan cha kankanan nan tapen nan tataku.) <sup>6</sup> Achi! Tay mu achi nalintig hi Apo Dios, anan atuna ay mang-okóm as nan am-in ay tataku?

<sup>7</sup> Ngem mafialin ay wachacha nan mangarkali, “Mu kiapú as nan kenangutumku at kaskasin maila nan kenatit-iwan Apo Diós ya nan kaichayawana, adchi ngay t'uyak pay laing makeddengan ay machusa?”<sup>8</sup> Nan tataku ay mangarkali as sa at kamancha cha kanan, “Atun takú nan mangotettet ta fomoknag nan ammay.”

Tit-iwa ay wachacha nan tataku ay mangarkali un hiyana kanu nan insurok, ngem achi tit-iwa sa. Libfengna ngarud ay machusachantu.

### *Maid Nalintig As Nan Sangwanan Apo Dios*

<sup>9</sup> Ngachana ngarud nan maifiakia takú? Ay kaskasin ammay nan kasasaad nan Judio as nan mangiilan Apo Dios mu nan Gentil? Achi! Tay infiafiakiak met ay am-in ay tataku, Judio man winnu Gentil at cha etortorayan chi fiasor. <sup>10</sup> Tay hiyana challu nan naisurat as nan Kalen Apo Dios ay kanana, “Maid poros uray usa ay taku as nalintig.

<sup>11</sup> Maid makaawat ay ustu as nan maepangkep kan Apo Dios, ya maid manganap ay mangam-ammu kan hiya.

<sup>12</sup> Chinukkiancha am-in hi Apo Dios, isunga nunfialinchas tataku ay maid kotokcha. Maid uray usa ay mangekaman as ammay.”‡

<sup>13</sup> “Nan tapakcha at kaman as nan nanatkafian ay lufok ay mun-akub, tay manangotettet nan chacha kankanan.”§ “Osaruncha nan chilacha ay mangallilaw as pachongcha ay taku, ya nan chacha kankanan at chumachael ay kaman as nan puwison chi urug.”\*

<sup>14</sup> “Kanayon ay chacha mun-itudtuchor ya finufungat chi chacha kankanan.”†

<sup>15</sup> “Malanlannigwatcha ay uy pomatu.”‡

<sup>16</sup> “As nan kumpurmi ay ay-ayancha at wachay chachaeluncha ya panunungwuncha.”§

<sup>17</sup> “Maid poros ammucha ay makekappia as nan pachongcha ay tataku.”\*

<sup>18</sup> “Achicha us ammu ay munchaychayaw kan Apo Dios.”†

\* <sup>3:4</sup> Deut. 4:23-27; 28:58-62; 2 Tim. 2:11-13      † <sup>3:4</sup> Sal. 51:4      ‡ <sup>3:12</sup> Sal. 14:1-3; 53:1-3; 143:2; Prov. 20:9; Ecl. 7:20; Rom. 3:23      § <sup>3:13</sup> Sal. 5:9      \* <sup>3:13</sup> Sal. 140:3      † <sup>3:14</sup> Sal. 10:7      ‡ <sup>3:15</sup> Isa. 59:7-8      § <sup>3:16</sup> Sal. 36:1      \* <sup>3:17</sup> Isa. 59:7-8      † <sup>3:18</sup> Sal. 36:1

<sup>19</sup> Hiyasa nan naisurat as nan Kalen Apo Dios. Ad wani, ammu takú ay am-in ay naisurat ay Lintig Apo Dios at naichat ta tongparun nan chiyuycha naichatana. Isunga achi mafialin ay munpanfor nan uray ngachana ay taku ay mangali un maid fiasorna, ya nan muntongparana at okomún Apo Dios nan am-in ay tataku. <sup>20</sup> Tay maid taku as ifilang Apo Dios as nalintig kiapú as nan chana manongtongparan as nan lintig. Naichat yangkiay nan lintig ta mangammuan nan taku ay hiya at wachay fiasorna.

### *Nan Atun Apo Dios Ay Mangifilang As Nan Taku As Nalintig*

<sup>21</sup> Ngem ad wani, naepakaammu nan atun Apo Dios ay mangifilang as nan tataku as nalintig as nan mangiilana, ngem fiakun kiapú as nan chacha manongtongparan as nan lintigna. Nan nauy planuna at penaneknekan challu nan Lintig Moises ya nan chiyuycha pomapadtu. <sup>22</sup> Ifilang Apo Dios as nalintig nan tataku kiapú as nan pammaticha kan Jesu Cristo, tay mapapchong nan atuna as nan uray ngachana ay taku. <sup>23</sup> Tay am-in ay tataku at finmasorcha, at kinmurangcha<sup>‡</sup> as nan panang-aprobar Apo Dios kan chicha.<sup>§</sup> <sup>24</sup> Ngem kiapú as nan grasyan Apo Dios ay inchatna kan chitaku, ifilangna chitaku as nalintig babaen as nan nangwayawayaan Cristo Jesus kan chitaku. <sup>25</sup> Infiaor Apo Dios hi Jesu Cristo ay matuy ta ekarona nan chusan nan fiasfiasor takú babaen as nan enmayas ay charana. Kiapú ta hiyasa, mafialin takú ay mapakawan as nan fiasfiasor takú mu omafurot takú kan hiya. Enat Apo Dios chi ta epailana nan kenalintigna ay mun-okóm. O, nalintig hi Apo Dios uray kuna enan-anosan nan fiasfiasor nan tataku ad pus-uy ya chaana chinusa ay dagus chicha. <sup>26</sup> Ngem ad wani, empailana ay chaana liniwiliw-an nan chiyuycha fiasfiasor, ngem kuna at entapi as nan fiasfiasor ay senakfiatan Jesus as nan koros. O, nalintig hi Apo Dios as nan mangifilangana as nan am-in ay tataku as nalintig kiapú ta omafurotcha kan Jesus.

<sup>27</sup> Ad wani, ay mafialin ay epangas takú nan kenalintig takú? Achi! Tay fiakun as nan manongtongparan takú as nan lintig nan maifilangan takú as nalintig, ngem babaen yangkiay as nan pammati takú kan Cristo. <sup>28</sup> Tay afurotun takú ay babaen as nan pammati yangkiay nan maifilangan nan taku as nalintig as nan mangiilan Apo Dios, ya fiakun as nan manongtongparan as nan lintig. <sup>29</sup> O, fiakun yangkiay nan chiyuycha Judio nan nakin Dios kan Apo Dios, ngem kun at nan am-in ay mawawachay pammaticha kan Jesus, uray Judio winnu Gentil. <sup>30</sup> Kiapú ta us-usa hi Apo Dios, ifilangnantu nan chiyuycha Judio ya uray nan chiyuycha Gentil as nalintig ay maiyunud as nan pammaticha kan Apo Jesus. <sup>31</sup> Mu hiyasa, ay nan laychuna ay kanan at maichun takú nan lintig kiapú ta omafurot takú kan Apo Jesus? Achi! Tay mu omafurot takú kan Jesu Cristo, kaskasin takú tongparun nan lintigna.

## 4

### *Nan Naifilangan Abraham As Nalintig (Gal. 3:6-10)*

<sup>1</sup> Ngachana nan maifiakia takú maepangkep kan Abraham ay nurpuwan chi kianak takú ay Judio. Ngachana nan kiapúna as naifilangana as nalintig?

<sup>‡</sup> **3:23** Rom. 3:12    <sup>§</sup> **3:23** Nan usa ay laychun nan nauy ay kanan at hiyana: “Tay finmasor takú am-in ya achawwi takú as nan panangesarakan Apo Dios kan chitaku.”

<sup>2</sup> Mu nan en-enatna nan kiapúna as nangifilangan Apo Dios kan hiya as nalintig ay taku, wacha komay epangasna. Ngem fiakun sa, tay nan kenatitiwana at maid mafialina ay epangas as nan sangwanan Apo Dios. <sup>3</sup> Tay wacha nan naisurat as nan Kalen Apo Dios ay kanana, “Enafurot Abraham nan inflakian Apo Dios, isunga infilang Apo Dios hiya as nalintig.”\*

<sup>4</sup> Mu munlagfu nan taku, achi takú ifilang as kinchawna nan lagfuna, ngem kun at sokat chi forayna. <sup>5</sup> Mu achi idnuwan nan taku nan kae-sarakanana ngem kun at muntalek kan Apo Dios ay mangekeddeng as nan fumafiasor as nalintig, nan pammartinan kiapúna as mangifilangan Apo Dios kan hiya as nalintig. <sup>6</sup> Hiyana us nan laychun Ari David ay kanan as nan nangaliyana un nakiasat nan taku ay ifilang Apo Dios as nalintig as nan mangilana, fiakun kiapú as nan en-enatna.<sup>†</sup>

<sup>7</sup> Nauy nan kenalen David, “Nakiasat nan taku ay penakawan Apo Dios ya nakaan nan fiasfiasorna.

<sup>8</sup> Nakiasat nan taku ay keneddengan Apo Dios as maid fiasorna.”‡

<sup>9</sup> Ay nan kenakiasat ay anna at para as nan chiyuycha Judio yangkiay ay nasugyat? Fiakun! Para us as nan chiyuycha Gentil uray chaancha nasugyat. Numnumtan takú kasin nan naisurat as nan Kalen Apo Dios maepangkep kan Abraham ad pus-uy ay infilang Apo Dios as nalintig ay taku ay maifisar yangkiay as nan pammartinan. <sup>10</sup> Kaatna nan enommatan ton? Ay as nan narpasanana ay nasugyat winnu as nan chaana pay nasugyatanan? As nan chaana pay laing nasugyatanan, fiakun as nan narpasan nan nasugyatanan. <sup>11</sup> Nunpasugyat hiya as nan naawni, ya nan pannakasugyatna nan sinyar ay mangepaneknek ay infilang Apo Dios hiya as nalintig ay taku babaen as nan pammartinan as nan chaana pay nasugyatanan. Isunga hiya nan pannakaaman nan am-in ay omaafurot ay keneddengan Apo Dios as nalintig uray chaancha nasugyat. <sup>12</sup> Hi Abraham us nan pannakaaman nan chiyuycha Judio ay chicha nan chaan yangkiay nasugyat, ngem turturachuncha us nan pammatten Abraham as nan chaana pay laing nasugyatanan.

### Nan Enkaren Apo Dios Kan Abraham

<sup>13</sup> Enkaren Apo Dios kan Abraham ya as nan kianakna ay chicha nan manawid henan nauy lufong. Ngem enkaren Apo Dios na ay chaan naiyunud as nan nanongtongparan Abraham as nan lintig, ngem kun at naiyunud as nan pammartinan ay nan nunfianakiana at infilang Apo Dios hiya as nalintig. § <sup>14</sup> Tay mu maichat nan enkaren Apo Dios as nan chiyuycha yangkiay manongtongpar as nan lintig at maid ngarud kaosaran nan pammati, ya maid kotok nan enkaren Apo Dios. <sup>15</sup> Tit-iwa ay kiapú ta cha labsilabsingun nan tataku nan lintig, nan munfianakiana at keddengan Apo chicha ay machusa. Ngem as nan tukún ay fianag, mu maid lintig, maid us munlабsing.

<sup>16</sup> Isunga nan enkaren Apo Dios at matongpar yangkiay as nan tataku ay omafurot kan hiya ta maifisar as nan grasyana. Tay mu as nan grasyana nan kaifisarana, siguradu ay matongpar kan chitaku am-in ay maifilang as kianak Abraham. O, matongpar sa fiakun yangkiay as nan chiyuycha Judio ay nangammu as nan lintig, ngem as nan am-in us ay omafurot ay kaman kan Abraham. Tay hi Abraham at hiya nan pannakaama takú am-in. <sup>17</sup> Tay kaman as nan naisurat as nan Kalen Apo Dios ay kanana, “Munfialinok he-a

---

\* **4:3** Gen. 15:6; Gal. 3:6; San. 2:23    † **4:6** Efe. 2:8    ‡ **4:8** Sal. 32:1-2    § **4:13** Gen. 12:2-3;  
17:4-22; 18:16-19; Rom. 8:16-17; Gal. 3:29

as pannakaaman chi ongor ay tataku henan ongor ay nasyon.”\* Natongpar chi, tay hi Abraham nan pannakaama takú am-in as nan mangililan Apo Dios. Hi Apo Dios ay enab-afurotna at wachay pannakafialina ay mangtaku as nan nunkatuy ya mangepawacha as maid. <sup>18</sup> Enafurot Abraham ay matongpar nan enkaren Apo Dios kan hiya, uray kaman achi maflalin ay matongpar nan nenamnamana. O, naifilang hi Abraham as pannakaaman chi tataku henan ongor ay nasyon ay maifisar as nan enkaren Apo Dios kan hiya, “Kaman as nan taraw nan filang nan kianakmu.”† <sup>19</sup> Chaan poros kenmapuy nan pammatten Abraham as nan nangnumnumana ay kiayud hinkiasot chi tawwuna, ya hi Sara ay asawana at fiasig. <sup>20</sup> Inturturyna ay enmafurot ya chaan us nunchuwachuwa ay tongparun Apo Dios nan nauy enkarina kan hiya. Kun at kaskasin pinmigsa nan pammattina, ya chinaychayawna hi Apo Dios. <sup>21</sup> Chaan poros nunchuwachuwa hiya ay kafiaelan Apo Dios ay mangtongpar as nan enkarina. <sup>22</sup> Isunga kiapú as nan hana pammatten Abraham, infilang Apo Dios hiya as nalintig ay taku. <sup>23</sup> Nan nauy naisurat ay kali ay kanana un infilang Apo Dios hiya as nalintig at chaan naisurat para kan Abraham yangkiay, <sup>24</sup> ngem naetapi takú us. Tay hi Apo Dios ay nangtaku kan Apo takú ay Jesu Cristo manipud as nan utú at ifilangna us chitaku ay omafurot kan hiya as nalintig. <sup>25</sup> Inpurang Apo Dios hi Jesus ay matuy kiapú as nan fiasfiasor takú, ya tenakuna hiya manipud as nan utú ta maifilang takú as nalintig as nan mangilana.‡

## 5

### *Nan Munfianakian Nan Maifilangan Nan Taku As Nalintig*

<sup>1</sup> Isunga kiapú ta infilang chitaku kan Apo Dios as nalintig babaen as nan pammati takú, nakekappia takú kan hiya babaen as nan enat Apo takú ay Jesu Cristo. <sup>2</sup> O, babaen kan hiya, naetapi takú as nan grasyan Apo Dios ay cha takú kiankianasun ad wani. Munlagragsak takú ngarud, tay namnamaun takú ay makelak-am takú as nan kaichayawan Apo Dios. <sup>3</sup> Fiakun yangkiay chachi as munlagragsakan takú, ngem munlagragsak takú us as nan liglikiat takú, tay ammu takú ay nan likiat at lumuwunay anos.\* <sup>4</sup> O, mu maanosan takú nan likiat, epailan Apo Dios nan panang-aprobarna kan chitaku. Isunga namnamaun takú ay matongpar nan planon Apo Dios para kan chitaku. <sup>5</sup> Nan nauy ay namnamaun takú at achi ome padismaya, tay ammu takú ay matongpar babaen as nan Espiritu Santo ay inchat Apo Dios kan chitaku, tay chana eparpalekna kan chitaku nan ongor ay layad Apo Dios.†

<sup>6</sup> O, enpailan Apo Dios nan kenaongor nan layadna kan chitaku, tay as nan ustu ay timpu ay pinilen Apo Dios ya as nan kamaid pay laing nan kafiaelan takú ay mangekaman as nan laychun Apo Dios, natuy hi Cristo para kan chitaku ay fumafiasor. <sup>7</sup> Nalikiat ay anapun chi usa ay taku ay matuy para as nan mangtongpar as nan lintig. Ma-afinalin ay wachay naturud ay matuy para as nan ammay ay taku. <sup>8</sup> Ngem enpailan Apo Dios nan kenaongor nan layadna kan chitaku, tay as nan cha takú pay laing fumasfiasoran, natuy hi Cristo para kan chitaku.

<sup>9</sup> Isunga mu chakus chitaku infilang kan Apo Dios as nalintig ay tataku babaen as nan charan Cristo ay enmayas as nan natuyana, siguradu ay

\* <sup>4:17</sup> Gen. 17:5    † <sup>4:18</sup> Gen. 15:5    ‡ <sup>4:25</sup> Isa. 53:4-5; 1 Co. 15:17; 2 Co. 5:15; Gal. 2:20    \* <sup>5:3</sup>

Jn. 16:33; San. 1:2-4, 12    † <sup>5:5</sup> Joel 2:28-29; Ara. 2:17; 10:45

esarkan chitaku kan Cristo as nan munchusaan Apo Dios. <sup>10</sup> Tay mu inflangna chitaku as kiakiayumna babaen as nan natuyan nan Anakna as nan timpu ay kafusor chitaku pay laing kan Apo Dios, kaskasin takuntu mae-sarakan babaen as nan matatakuwan Cristo, tay chakus takú nakekappia kan Apo Dios. <sup>11</sup> Ngem fiakun yangkiay chi as namnamaun takú, tay uray ad wani at munlagragsak takú kiapú as nan makekadkadwaan takú kan Apo Dios babaen kan Apo takú ay Jesu Cristo ay nangepakappia kan chitaku kan Apo Dios.

*Nan Nuntongparan Nan Enat Chin Adan Ya Nan Enat Cristo  
(Gen. 3:6; 1 Co. 15:22, 45)*

<sup>12</sup> Ammu takú ay finmasor chin Adan ad pus-uy, at hiyachi nan nunlupwan chi fumasiasoran chi tataku. Kiapú as nan fiasor Adan, naked-dengan hiya ay matuy. Isunga nunlapu as nan hiyachi, am-in ay tataku at matuycha, tay finmasorcha am-in. <sup>13</sup> As nan chaan pay nangichatan Apo Dios as nan lintigna kan Moises, finmasor challu nan tataku. Ngem nan fiasiasorcha at chaan naifilang as nunlablabsingancha as nan lintig. <sup>14</sup> Ngem uray chaancha lenablabsing nan usa as nan filfilin Apo Dios ay kaman as nan finmasoran Adan, ammu takú ay wacha challu nan fiasfiasorcha. Ammu takú na, tay nunlapu as nan timpon Adan inkiana as nan timpon Moises, natunatuycha nan tataku.

Hi Adan at wacha nan maepachongana kan Cristo ay chaan pay naiyanak asna's luta as nan timpon Adan. Nan enatcha ay chuwa at wacha nan nunfianakiancha as nan am-in ay tataku. <sup>15</sup> Ngem achi munpachong nan enatcha ay chuwa, tay nan grasyan Apo Dios ay inchatna babaen kan Cristo at ongor nan natkunana as nan enommat kiapú as nan fiasor Adan. Tay kiapú as nan fiasor nan usa ay ansa, am-in ay tataku at nakeddengancha ay matuy. Ngem ong-ongor as solet nan grasyan Apo Dios, ya kaman us as nan inchatna as nan am-in ay tataku babaen as nan grasyan nan usa ay hi Jesu Cristo. <sup>16</sup> Nan usa us ay achi munpachongan nan ichat Apo Dios ya nan nuntongparan nan usa ay fiasor nan usa ay taku at hiyana: Am-in ay tataku at nakeddengancha ay machusa. Ngem babaen as nan grasya ay inchat Apo Dios, am-in ay tataku at mafialinchay mapakawan as nan ongor ay fiasfiasorcha ya maifilangcha as nalintig as nan mangilan Apo Dios. <sup>17</sup> Tit-iwa ay masapor matuy nan am-in ay tataku kiapú as nan fiasor nan us-usa ay taku, ngem am-ammay as solet nan nuntongparan nan enat nan usa ay taku ay hi Jesu Cristo. Tay babaen kan hiya, am-in ay mang-awat as nan ongor ay grasyan Apo Dios ya nan inchatna ay kenalintig at matakuchantu in-inkiana, ya maetapicha kan Cristo henan muntorayana.

<sup>18</sup> Isunga kiapú as nan us-usa ay fiasor nan usa ay taku, am-in ay tataku at nakeddengancha ay matuy. Ngem babaen as nan us-usa ay nalintig ay enat Jesu Cristo ay hiyachi nan natuyana as nan koros, mafialin us ay maifilang nan am-in ay tataku as nalintig ta mawad-ancha as fiyag ay maid patingkiana. <sup>19</sup> Tay kiapú as nan chaan nangtongparan nan usa ay taku as nan infilin Apo Dios, am-in ay tataku at nailubnakcha as nan fiasor. Assesa us ay kiapú as nan nangtongparan nan usa ay taku kan Apo Dios, am-in ay omafurot kan hiya at munfialinchay as nalintig.

<sup>20</sup> Inchat Apo Dios nan lintigna kan Moises ta mangammuwan nan tataku ay cha omongoongor chi fiasfiasorcha. Ngem uray kun enmongoongor nan fiasfiasor, kaskasin challu somafi nan inchat Apo Dios ay grasyana.‡

‡ **5:20** Rom. 3:20; 7:7; Gal. 3:19

**21** Isunga tit-iwa ay am-in ay tataku at etortorayan nan fiasor ta matuycha ya maisiyancha kan Apo Dios. Tit-iwa us ay mangafiah nan grasyan Apo Dios babaen as nan nangifilangana as nan am-in ay tataku as nalintig. Ad wani, muntoray nan grasyan Apo Dios, ya nan munfianakiana at babaen as nan enat Jesu Cristo ay Apo takú, inchat Apo Dios nan fiyag ay maid patingkiana.

## 6

### *Nan Maetapiyan Takú Kan Cristo*

**1** Ngachana ngarud nan maifiakia takú ad wani? Ay uray iturturuy takú ay cha fumasfiasor ta omong-ongor pay nan grasyan Apo Dios? **2** Achi poros maifialin! Anan atun takú ay mangiturturuy ay fumasfiasor mu nan pannakafialin chi fiasor at nakaan at kan chitaku? Maid atun takú, tay kaman takú met natuy mu maepangkep as fiasor. **3** Ay achiyu ammu ay as nan nafunyakianan takú kiapú as nan pammati takú kan Cristo Jesus at kaman takú us naetapi ay natuy as nan natuyana? Ammuyu met!\* **4** As nan nafunyakianan takú, naetapi takú ay natuy as nan natuyana ya as nan nailubkana ta kaman as nan natakuwan Cristo manipud as nan utúy babaen as nan nakaskaschaaw ay pannakafialin Apo Dios ay Ama takú at maifialin takú us ay maetapi as nan fiarú ay fiyagna.

**5** Tay mu tit-iwa ay naetapi takú kan hiya as nan natuyana, tit-iwa us ay maetapi takú kan hiya as nan natakuwan manipud as nan utúy. **6** Ammu takú ay naetapi nan sikud ay fiyag takú kan Cristo as nan naelansaana as nan koros ta mamaid nan pannakafialin chi fiasor kan chitaku ya ta achi chitaku kasin fiabfiaarun as nan fiasor. **7** Tay nan taku ay natuy at nawawayayaan as nan pannakafialin nan fiasor. **8** Ad wani, mu afurotun takú ay naetapi takú ay natuy as nan natuyan Cristo, maetapi takú us ay mataku as nan fiarú ay fiyagna. **9** Tay ammu takú ay nataku hi Cristo manipud as nan utúy ya achi poros kasin matuy. Namaid at nan pannakafialin nan utúy kan hiya. **10** Namingsan yangkiay ay natuy hi Cristo ta kaanuna nan pannakafialin nan fiasor, ngem ad wani, matataku hiya ta maichayaw hi Apo Dios. **11** Isunga masapor numnumunyu us ay nunpatingkia nan pannakafialin nan fiasor kan chakayu, ngem kun kayu at matataku ay munserfi kan Apo Dios kiapú as nan nakius-usaanyu kan Cristo Jesus.

**12** Isunga masapor achi takú eparufus ay muntoray nan fiasor kan chitaku ta achi takú tongtongparun nan mun-ongosán takú. **13** Kaman us ay achi takú etorok ay fumasor chi uray usa ay parten nan anchor takú ay maosar ay mangekaman as mangotettet. Ngem kun takú at ichaton nan am-in ay parten nan anchor takú kan Apo Dios ta maosar ay mangekaman as nalintig, tay hiyachi nan maifiakiay as nan taku ay kaman nanatuy ngem enettan Apo Dios as fiarú ay fiyag. **14** Tay achi chitaku maifialin ay etorayan kasin as nan fiasor, tay ad wani, nan maifisaran nan kaesarakanan takú at fiakun as nan manontongparan takú as nan lintig, ngem kun at as nan grasyan Apo Dios.

### *Nan Fiabfiaarun Chi Kenalintig*

**15** Ngachana ngarud nan laychun tona ay kanan? Uy at wachachay mangali un mu maifisar nan kaesarakanan takú as nan grasyan Apo Dios ya fiakun as nan manontongparan takú as nan lintig, ay iturturuy takú pay ay fumasfiasor? Achi maifialin! **16** Ay achiyu ammu ay mu ichatyu

\* **6:3** 1 Co. 12:13; Gal. 3:27

nan achoryu as fiabfiaarun nan usa ay taku as munserserfi kan hiya at hiya nan amoyu? Isunga mu fiasor nan chayu munpaetortorayan, fiasor us challu nan amoyu, ya kiapú as nan chayu munpaetortorayan as nan fiasor at maisiyan kayu kan Apo Dios ta machusa kayu. Ngem mu hi Apo Dios nan chayu munpaetortorayan, maifilang kayu as nalintig as nan mangiilan Apo Dios. <sup>17</sup> Munyamanak kan Apo Dios, tay uray mu fiabfiaarun chakayu as fiasor ad kasin, epapasnekyu challu ad wani ay mangab-afurot as nan tit-iwa ay sursuru ay naisursuru kan chakayu. <sup>18</sup> Ad wani, nawayawayaan kayu as nan fiasor, ya nunfialin kayu as fiabfiaarun nan nalintig ay Apo Dios. <sup>19</sup> Chak os-osarun nan maepadpachongan ay naraka ay maawatan chi tataku, tay chaan pay laing naonngan nan pammatiyu. Ad kasin, inpurangyu nan am-in ay parten nan achoryu as nan fiasor ta masopsop ay ekamanyu nan kumpurmi ay karasen chi mangotettet. Ad wani, masapor faliwanyu chi ta munfialin kayu as fiabfiaarun nan nalintig ay Apo Dios ta nasantowan nan panagfiayagu.

<sup>20</sup> Tay ad kasin, as nan namabfiaoran chakayu as nan fiasor at chaan chakayu entortorayan as nan kenalintig. <sup>21</sup> Ngem ay wachay ammay as enawatyu as nan enkamkamanyu ad kasin mu achi nan maifiafainanyu ad wani? Maid met! Tay nan muntorongan tud-i ay naekamkaman at katuyan ya maisiyanan kan Apo Dios in-inkiana. <sup>22</sup> Ngem ad wani, kiapú ta nawayawayaan kayu as nan fiasfiasor ya nunfialin kayu as fiabfiaarun Apo Dios, chayu laklak-amun nan fiyag ay nasantowan, ya nan muntongparana at fiyag ay maid patingkiana. <sup>23</sup> Tay nan elagfon nan fiasor as nan chiyucha fiabfiaaruna at utúy ay maid patingkiana. Ngem nan ichat Apo Dios at fiyag ay maid patingkiana babaen as nan nakius-usaan takú kan Cristo Jesus ay Apo takú.

## 7

### *Nawayawayaan Takí As Nan Lintig*

<sup>1</sup> Chakayu ay iib-a, maid chuwachuwa ay maawatanyu nan nauy ifiakiak, tay enpaingssayu met nan am-in ay maepangkep as nan lintig. Ammyu met us ay nan lintig at wachay kalibfengana ay mangetoray as nan taku as nan matatakuwana yangkiay. <sup>2</sup> Kaman as nan naasaw-an ay fiafiai. Kanan nan lintig un achi mafialin ay makeasawa as tukún ay laraki mu kutug ay matataku nan asawana.\* Ngem mu matuy nan asawana, mawayawayaan nan fiafiai as nan lintig ay ansa, at mafialin ay makeasawa kasin. <sup>3</sup> Isunga mu kutug ay matataku nan laraki ay asawana ya maetepon as tukún ay laraki at kanan takú un umiwet hiya. Ngem mu matuy nan asawana, mamaid nan kalibfengnan lintig ay ansa kan hiya, isunga achi maifilang as umiwet mu kasin omasawa.

<sup>4</sup> Assesa us kan chakayu ay iib-a. Nawayawayaan kayu as nan kalibfengnan lintig babaen as nan naifilanganyu as natuy, tay naetapi kayu ay natuy as nan natuyan Cristo. Ad wani, chakayu at kuwan Cristo, tay naetapi kayu kan hiya ay nataku manipud as nan utúy ta munserserfi takú am-in kan Apo Dios. <sup>5</sup> Tay ad kasin, as nan nanongtongparan takú as nan mun-ongosán nan anchor takú, kaskasin enmongor nan hanacha mun-ongosán takú kiapú ta ammu takú ay epawan nan lintig. Mu assesa, enkamkaman takú nan mangetoróng kan chitaku as nan katuyan takú. <sup>6</sup> Ngem ad wani, kiapú ta

\* <sup>7:2</sup> 1 Co. 7:39

naetapi takú ay natuy as nan natuyan Cristo, nawayawayaan takú as nan lintig ay nangifiafiarud kan chitaku. Nan cha takú munserserfiyan kan Apo Dios ad wani at achi maifisar as nan mangun-unuchan takú as nan naisurat ay lintig ay kaman as nan en-enat takú ad kasin, ngem kun at maifisar as nan fiarú ay fiyag ay nurpu as nan Espiritu Santo.

### *Nan Lintig Ya Nan Fiasor*

<sup>7</sup> Ngachana ngarud nan maifiakia takú? Ay kanan takú un mangotettet nan lintig? Achi! Tay mu maid nan lintig, chaanku koma naammuwán nan fiasor. Mu maid nan lintig ay mangifilin, "Achiyu akuman nan kuk-uwan chi tapina,"<sup>†</sup> acheck koma ammu ay fiasor payat chi kenaakum. <sup>8</sup> Ngem kiapú ta fumafiasorak, kaskasinak naakum, tay ammok ay epawan nan lintig nan kenaakum. Tay mu maid nan lintig, maid us kalibfengan chi fiasor. <sup>9</sup> Ad kasin, as nan timpu ay acheck pay laing maawatan nan lintig, ammay nan numnumku. Ngem kunku pay naawatan nan laychun ay kanan nan lintig, finigfigku ay fumafiasorak. Kaman nataku nan fiasor ya kamanak us natuy. <sup>10</sup> Tay nan nauy lintig ay umichat koma as fiyag at hiya nan nangekeddeng kan ha-un ay matuy kiapú as nan chaanku nanongtongparan as nan lintig ay anna. <sup>11</sup> Tay babaen as nan lintig, inilan nan fiasor nan chansana ay mangallilaw kan ha-un, ya babaen challu as nan lintig, nakeddenganak ay maisiyan kan Apo Dios in-inkiana.

<sup>12</sup> Isunga narawag ay nan lintig at nurpu kan Apo Dios, ya am-in ay filin as nan lintig at nasantowan, ustu ya ammay.<sup>‡</sup>

<sup>13</sup> Ay nan laychun tona ay kanan at maisiyan takú kan Apo Dios kiapú as nan ammay ay lintigna? Fiakun! Tay nan fiasorku at hiyana nan kiapón nan machusaak. Ngem nan planon Apo Dios maepangkep as nan lintigna at ta maila koma nan kenamangotettet nan fiasor. Tay kiapú as nan fiasfiasor takú, nunfialinun takú nan ammay ay lintig Apo Dios as osaruna ay mangekeddeng kan chitaku. Isunga babaen as nan lintigna at kaskasin maila nan nunsidla ay kenamangotettet nan fiasor.

### *Nan Mangokontra As Nan Numnum Takú*

<sup>14</sup> Ammu takú ay ammay nan lintig, tay nurpu as nan Espiriton Apo Dios. Ngem ha-un at kunak lawá taku ay naraka ay fumasor. Kamanak naelaku as fiabfiaarun chi fiasor. <sup>15</sup> Acheck maawatan nan chak atuatun, tay nan laychok ay atun at acheck atun, ya nan acheck lachun ay atun at atok. <sup>16</sup> Ad wani, nan acheck manglaychanan ay mangekaman as mangotettet ay chak at-atun at hiyasa nan mangepaila ay iyafudku ay ammay tit-iwa nan lintig.

<sup>17</sup> Isunga fiakun ha-un nan cha mangekamkaman as mangotettet, ngem kun at nan pannakafialin nan fiasor ay naisisikud kan ha-un. <sup>18</sup> Tay ammok ay maid poros ammay ay ukiali ay naisisikud ay wacha kan ha-un, tay uray laraychok ay mangekaman as ammay, achiyak challu makaekaman. <sup>19</sup> Tay nan chiyucha ammay ay laychok ay atun at chicha nan acheck maekaman, ngem nan manangotettet ay acheck laychun ay atun at chicha nan chak ekamkaman. <sup>20</sup> Ad wani, mu atok nan acheck laychun, naraka ay maila ay fiakun ha-un nan mangekaman, ngem kun at nan pannakafialin nan fiasor ay naisisikud kan ha-un.

<sup>21</sup> Isunga nan napadpachasak at hiyana: Laychok ay atun nan ammay, ngem nan fiasor at etorongak met ay mangekaman as mangotettet. <sup>22</sup> Tay

<sup>†</sup> 7:7 Exo. 20:17; Deut. 5:21    <sup>‡</sup> 7:12 1 Tim. 1:8

as nan munnunumnumku at aprobarak nan lintig Apo Dios,<sup>23</sup> ngem tukún nan cha mangetortoray as nan achorku. Nan cha mangetortoray as nan achorku at hiya nan fiasor ay naisisikud kan ha-un, at chana fusorun nan lintig Apo Dios ay laylachun nan numnumku. Isunga nan nuntongparana at kamanak finafiarud as nan fiasor ay naisisikud kan ha-un.<sup>24</sup> Anuyak paat kasusug-ang! Ngachana nan mangesarakan kan ha-un as nan nauy fumafiasor ay achorku ay kiapón nan katuyak?<sup>25</sup> Munyamanak kan Apo Dios, tay hiya nan nangesarakan kan ha-un babaen kan Apo takú ay Jesu Cristo!

Nauy ngarud nan kasasaadku: As nan munnunumnumku at laychok ay tongparun nan lintig Apo Dios, ngem kiapú as nan fiasor ay naisisikud kan ha-un, chaak challu fumasofiasor.

## 8

### *Nan Fiyag Ay Etortorayan Nan Espiritu Santo*

<sup>1</sup> Isunga am-in takú ay nakius-usa kan Cristo Jesus at achi takú poros machusa. <sup>2</sup> Tay babaen as nan nakius-usaan takú kan Cristo Jesus, wacha nan fiarú ay fiyag ay inchat nan Espiritu Santo kan chitaku. O, nan pannakafialin nan Espiritu Santo nan nangwayawaya kan chitaku as nan pannakafialin nan fiasor ya as nan muntongparan as nan utúy. <sup>3</sup> Achi poros kafaelan nan Lintig Moises ay mangwayawaya kan chitaku as nan panagtoryay chi fiasor, tay nakapuy takú ay mangtongpar as nan filfilina. Ngem enat Apo Dios nan achi kafaelan nan lintig ay atun. Finaor Apo Dios nan Anakna ay nunfialin as taku ay kaman kan chitaku ta hiya nan mangekaru as nan pannakachusan nan am-in ay tataku ta makaan nan fiasfiasorcha. O, kenaan Apo Dios nan pannakafialin nan fiasor ay cha mangetortoray kan chitaku.\* <sup>4</sup> Enat Apo Dios chi ta tongparun takú ay ustuuustu nan laychun nan lintigna. O, mafialin takú ay tongparun na mu nan Espiritu Santo nan parufusun takú ay mangetoróng as nan katakuwan takú, fiakun nan laylachun nan anchor takú.

<sup>5</sup> Nan tataku ay manongtongpar as nan laylachun nan anchorcha at nan hana ay laylachun nan anchorcha nan cha mangetortoray as nan numnumcha. Ngem nan tataku ay manongtongpar as nan laychun nan Espiriton Apo Dios at nan Espiriton Apo Dios nan cha mangetortoray as nan numnumcha. <sup>6</sup> Mu nan nunumnumun takú at nan laylachun nan anchor takú, nan muntongparan takú at nan maisiyanan kan Apo Dios inkiana. Ngem mu nan Espiriton Apo Dios nan mangetoray as numnum takú, mawad-an takú as fiyag ay maid patingkiana ya makekappia takú kan Apo Dios. <sup>7</sup> Tay mu nan taku at munpaetoray as nan numnumna, munfialin hiya as kafusor Apo Dios. Achina tongparun nan lintig Apo Dios, tay nan kenatit-iwana at achina kafaelan ay mangtongpar. <sup>8</sup> Isunga nan taku ay manongtongpar as nan laylachun nan achorna at achina mafialin ay palaylachun hi Apo Dios.

<sup>9</sup> Ngem fiakun assesa kan chakayu, tay etorayan chakayu as nan Espiriton Apo Dios. Mu tit-iwa ay wacha nan Espiriton Apo Dios kan chakayu, tongparunyu nan epakaammuna, fiakun nan laylachun nan achoryu. Numnumunyu ay nan taku ay maid kan hiya nan Espiriton Cristo at fiakun takon Cristo. <sup>10</sup> Ngem mu mawawacha hi Cristo kan chakayu, uray mu

\* **8:3** Isa. 53:4-6; Jn. 1:29; Rom. 5:6-9; 2 Co. 5:21; Gal. 3:13

matuy nan achoryu kiapú as fiasor, matakú challu nan espirituyu as nan kawad-an Apo Dios, tay infilang chakayu kan Apo Dios as nalintig.<sup>†</sup> <sup>11</sup> Mu etorayan chakayu as nan Espiriton Apo Dios ay nangtaku kan Jesu Cristo manipud as nan utúy, takuwunantu us nan achoryu ay matuy babaen as nan Espirituna ay mawawacha kan chakayu.<sup>‡</sup>

<sup>12</sup> Isunga iib-a, wacha nan libfengun takú ay tongparun, ngem achi maiyunud as nan sikud ay panagfiyag takú. <sup>13</sup> Tay mu epaetoray takú nan numnum takú as nan mun-ongosán nan achor takú, siguradu ay maisiyan takú kan Apo Dios in-inkiana. Ngem mu awatun takú nan fiachang nan Espiriton Apo Dios ta chukkian takú nan mangotettet ay cha takú atuatun, mawad-an takú as fiyag ay maid patingkiana. <sup>14</sup> Tay nan tataku ay cha etortoróng nan Espiriton Apo Dios at an-ak Apo Dios. <sup>15</sup> Tay nan Espíritu ay inchat Apo Dios kan chitaku at chaan chitaku nunfialinun as mafiabfiaor ay umugyat ay machusa ay kaman as nan kasasaad takú ad kasin, ngem kun chitaku at infilang as an-ak Apo Dios. Isunga babaen as nan Espirituna, mafialin takú ay awakian hi Apo Dios as, “Ama”. <sup>16</sup> Nan Espiriton Apo Dios at hiya nan cha mangepanekeknek as nan numnum takú ay chitaku nan titiwi ay an-ak Apo Dios. <sup>17</sup> Kiapú ta an-ak chitaku kan Apo Dios, tawichun takuntu nan chiuyucha intutupugna ay bendisyon ay para as nan tatakuna. Maketawid takú us kan Cristo as nan intutupug Apo Dios ay para kan hiya. Tay mu mapalikiat takú ay kaman takú cha makiliglikiat kan Cristo, maetapi takú us kan hiya as nan kaichayawana.<sup>§</sup>

### *Nan Kaichayawan Takú As Tapen Chi Urkiw*

<sup>18</sup> Ifilangku ay nan likiat ay cha takú iliwlwas ad wani at achi poros maekari ay maepachong as nan kaichayawan ay epailan Apo Dios kan chitaku as tapen chi urkiw. <sup>19</sup> Tay am-in ay finayang Apo Dios at laraychuncha ay omali nan timpu ay mangepail-an Apo Dios as nan kasasaad takú ay an-akna. <sup>20</sup> O, am-in chaná ay finayang Apo Dios at nakeddengancha ay munfialin as maid kotkotokcha. Fiakun chicha nan nunplanu ay manglakam as nan assesa ay chusa, tay planon Apo Dios chi. Ngem wacha challu nan manamnama,\* <sup>21</sup> tay planon Apo Dios ay mawayawaantu nan am-in ay finayangna as nan pannakafialin nan chunot, ya makelak-amchantu as nan nakaskaschaaw ay pannakawayawayan nan an-akna. <sup>22</sup> Tay ammu takú ay nunlapu ad maliyam inkiana ad wani, chacha mun-an-anana nan am-in ay nafiyang kiapú as likiatcha ay kaman as nan fiafai ay munpasikar as nan omankana. <sup>23</sup> Ngem fiakun chicha yangkay nan cha munliglikiat, tay uray us chitaku ay naichatan nan Espíritu Santo ay hiya nan omona ay inchat Apo Dios kan chitaku ay enmafurot. Kaman takú us cha mun-an-anana as numnum takú as nan munsusuuchan takú as nan timpu ay mangepail-an Apo Dios as nan nangifilangana kan chitaku as an-akna ya sokatana nan nauy achor takú as fierú ay achor ay achi matmatuy. <sup>24</sup> Tay hiyana nan nenamnama takú nunlapu as nan naesarakanan takú. Ngem mu natongpar nan nauy nenamnama takú, fiakun chi as makali un namnama. Tay ay kun

<sup>†</sup> **8:10** As nan kalen chi Griego, nan usa ay laychun nan nauy ay kanan at hiyana: “Ngem mu mawawacha hi Cristo kan chakayu, uray mu matuy nan achoryu kiapú as nan fiasoryu, ichat challu nan Espíritu Santo kan chakayu nan fiyag ay maid patingkiana.” <sup>‡</sup> **8:11** 1 Co. 15:51-54 <sup>§</sup> **8:17**

takú namnamaun nan chakus wacha ay iilaun takú? <sup>25</sup> Ngem mu achi pay laing matongpar nan nenamnama takú, an-anosan takú ay maman-ud.

<sup>26</sup> Fiakun yangkiay nan namnama takú nan mamadfiachang kan chitaku, ngem fumadfiachang us nan Espiritu Santo as nan kenakapuy takú. Tay achi takú ammu ay munkararag ay ustu, ngem nan Espiritu Santo nan makekali kan Apo Dios para kan chitaku as nan kali ay achi takú maifialekas. <sup>27</sup> Hi Apo Dios ay nangammu as nan wacha as numnum takú at ammuna us nan wacha as numnum nan Espirituna, tay nan maketagtakiatforana kan Apo Dios at para kan chitaku áy tatakuna ay maiyunud as nan enkeddeng Apo Dios.

<sup>28</sup> Ammu takú us ay am-in ay cha om-ommat as nan chiyuya manglay-layad kan Apo Dios,<sup>†</sup> ay chicha nan enayakiana ay maiyunud as nan pangkepna at ammay nan munfianakiana kan chicha. <sup>29</sup> Tay nan chiyuya sikud ay pinipilen Apo Dios at chicha nan sikud ay keneddengana ay komaman as nan Anakna ta hiya nan panguruwan takú am-in ay hen-anag-i. <sup>30</sup> Nan chiyuya keneddengana ay komaman as nan Anakna at enayakiana us chicha, ya nan enayakiana at inflangna us chicha as nalintig. Fiakun yangkiay chi, ngem entapina us chicha as nan kaichayawan nan Anakna.

### *Nan Layad Apo Dios Ay Enpailan Cristo*

<sup>31</sup> Ngachana ngarud nan maifiakia takú maepangkep as nan nauycha cha at-atun Apo Dios para kan chitaku? Mu wacha hi Apo Dios kan chitaku, ay wachay mangamis kan chitaku? Maid! <sup>32</sup> Chaan inyekot Apo Dios nan mismu ay Anakna, ngem kuna at inpurang ay matuy para kan chitaku am-in. Mu enatna chi as nan mismu ay Anakna para kan chitaku, ay achina maifalin ay ichat us kan chitaku nan am-in ay kasaporan takú? Ichatna met!

<sup>33</sup> Ngachana nan mangicharum kan chitaku ay pinilen Apo Dios? Tay hi Apo Dios at hiya met nan nangifilang kan chitaku as nalintig. <sup>34</sup> Ngachana ngarud nan makafiael ay mangokóm kan chitaku? Tay hi Jesu Cristo at hiya met nan natuy para kan chitaku, ya fiakun yangkiay chi, ngem nataku us hiya manipud as nan utúy. Ad wani, wacha hiya as apét kannawan Apo Dios. Hiya pay nan cha maketagtakiatfor kan Apo Dios para kan chitaku. <sup>35</sup> Isunga anan makaisiyan ngarud kan chitaku as nan layad Cristo? Maid! Ay maifalin chi likiat winnu changan winnu nan mamalikiatan chi tataku kan chitaku? Achi! Ay maifalin us chi chukiaang winnu kenakurang chi fiachu winnu kauugyat ay cha om-ommat winnu uray nan mapatuyan takú? Achi challu!

<sup>36</sup> Nan kaman as nan nauycha ay liglikiat at chicha challu nan naifiagfiakia as nan naisurat as nan Kalen Apo Dios ay kanana,

“Kiapú kan he-a Apo, kanayon ay sakiangunmi nan utúy. Maifilang kami as kaman as nan chiyuya karnero ay kiayud maparti.”<sup>‡</sup>

<sup>37</sup> Ngem uray mu mapachasan takú nan nauycha am-in ay likiat, maid kafaelancha ay mangamis kan chitaku, tay mangaafiak takú challu babaen kan Cristo ay manglaylayad kan chitaku. <sup>38</sup> Tay ammok challu ay maid poros makaisiyan kan chitaku as nan layadna. Uray mu matuy takú winnu matataku takú, achi takú challu maisiyan as nan layadna. Uray nan anghelles winnu nan chiyuya anennet winnu tapina ay wachay pannakafialinchá at achicha kafaelan ay mangisiyan kan chitaku as nan layadna. Uray nan cha om-ommat ad wani winnu nan chaan pay enommat,<sup>§</sup> <sup>39</sup> uray nan wacha ad

<sup>†</sup> 8:28 winnu, “Muntimpuyukun Apo Dios nan am-in ay cha om-ommat.” <sup>‡</sup> 8:36 Sal. 44:22; 1

Co. 15:31 <sup>§</sup> 8:38 Efe. 1:21

chaya winnu nan wacha ad chur-um, ya uray us ngachana ay nafiayang at maid poros makaisiyán kan chitaku as nan layad Apo Dios ay lak-amun takú babaen kan Cristo Jesus ay Apo takú.

## 9

### *Nan Sug-ang Apo Dios As Nan Chiyuycha Judio Ay Tatakuna*

<sup>1</sup> Nan nauy chak ifiagfiakia kan chakayu at tit-iwa. O, achiyak munkutkum, tay usaak ay omaafurot kan Cristo. Uray nan numnumku ay etor-torayan nan Espiritu Santo at paneknekana ay achiyak munkutkum. <sup>2</sup> Nan laychok ay ifiakia at kunak ngumunguyus as solet. Kanayon us ay nasaket chi numnumku kiapú as nan kacharaak ay Judio. <sup>3</sup> Mu mafialin koma at uray ha-un nan maesokat kan chicha ay machusa ya maisiyán kan Cristo. <sup>4</sup> Tay chicha nan kianak Israel ay chicha nan pinilen Apo Dios as tatakuna, ya chicha nan inflangna as an-akna. Chicha us nan nangepail-ana as nan kaichayawana.\* Chicha nan manawid as nan inturag Apo Dios as nan kaap uwancha. Chicha challu nan nangichatan Apo Dios as nan lintigna ya nangepakaammuwana as nan ustу ay atuncha ay manaychayaw kan hiya. Chicha us nan nangekariyan Apo Dios as nan maepangkep as nan Mesias ay mangesarakan kan chicha. <sup>5</sup> Nan kaap uwancha at napategcha ay tataku ad pus-uy. Uray nan Cristo at kianak chi Judio mu maepangkep as nan katatakuna, ya hiya at Dios us ay mangetortoray as nan ám-in ay wacha. Machaychayaw koma hiya in-inkiana. Amen.

<sup>6</sup> Ngem uray mu enachen nan kakailiyak ay kianak Israel hi Cristo, acheck kanan un chaan tenongpar Apo Dios nan enkarina as nan tatakuna. Tay nan kianak Israel at fiakuncha am-in tatakon Apo Dios. <sup>7</sup> Fiakun us am-in ay kianak Abraham<sup>†</sup> at maetapicha ay manawid as nan enkaren Apo Dios, tay kenalen Apo Dios kan Abraham, “Nan kianak Isaac yangkiay nan maifilang as kianakmu.”‡ <sup>8</sup> Nan laychun tona ay kanan at fiakun am-in nan kianak Abraham nan ifilang Apo Dios as tit-iwa ay an-akna, ngem kun yangkiay nan maiyanak ay matongparan nan enkarina. <sup>9</sup> Tay nauy nan enkaren Apo Dios kan Abraham maepangkep kan Isaac: “Munfiangachaktu as nan assena ay timpu as tawwun, ya hi Sara ay asawam at omanaktu as larakí.”§

<sup>10</sup> Fiakun yangkiay chi, ngem numnumunu us nan enat Apo Dios ay nunpili as nan apel ay an-ak Rebecca ay enpotot Isaac ay kaap uwan takú. <sup>11-12</sup> Tay as nan chaan pay naiyankan nan hanacha chuwa, ya maid pay laing enkamancha as ammay winnu mangisiw, kenalen Apo Dios kan Rebecca, “Nan panguru nan munserserfintu as nan enauchi.”\* Kenalen Apo Dios chi ta maammuwan ay nan nangpiliyana as nan usa at achi maifisar as nan enatcha ay chuwa, ngem kun at as nan sikud ay pangkepna ay nangayag. <sup>13</sup> Kaman challu as nan naisurat as nan Kalen Apo Dios ay kanana, “Lenayadku hi Jacob, ngem enachek hi Esau.”†

<sup>14</sup> Ngachana ngay nan maifiakia takú? Ay achi nalintig hi Apo Dios? Nalintig met! <sup>15</sup> Tay kenalen Apo Dios kan Moises, “Sug-angak nan laychok ay sug-angan.”‡ <sup>16</sup> Isunga hiyasa nan mangammuwan takú ay nan mangpiliyan Apo Dios as nan tataku at fiakun kiapú as nan laychun nan tataku winnu as nan chacha atuatun, ngem kun at kiapú as nan sug-ang

---

\* <sup>9:4</sup> Exo. 19:18; 40:34-38    † <sup>9:7</sup> Gen. 25:1    ‡ <sup>9:7</sup> Gen. 21:12    § <sup>9:9</sup> Gen. 18:10    \* <sup>9:11-12</sup> Gen. 25:23    † <sup>9:13</sup> Mal. 1:2-3    ‡ <sup>9:15</sup> Exo. 33:19

Apo Dios. <sup>17</sup> Nan usa pay ay numnumunyu at nan naisurat as nan Kalen Apo Dios ad pus-uy maepangkep as nan Faraon ay ari ad Egipto ay kanana, “Nunfialinok he-a as ari ta epailak nan pannakafialinku babaen kan he-a ya ta epakaammok nan ngachanku henan am-in ay lukiar asna's luta.”<sup>§</sup> <sup>18</sup> Isunga mu hiyasa, sug-angan Apo Dios nan laychuna ay sug-angan ya patangkenuna nan numnum nan taku ay laychuna ay patangkenun.

### *Nan Fungat Ya Nan Sug-ang Apo Dios*

<sup>19</sup> Uy at wacha kan chakayu nan manarudsud, “Mu hiyasa ngarud, adchi ngay t'uy pay laing pafiasorun Apo Dios nan tataku? Anan ngachana man challu nan makafiael ay mangontra as nan laychun Apo Dios?” <sup>20</sup> Ngem kanak un he-a ay kun lawá taku, ay wachay kalibfengam ay manongfiat kan Apo Dios? Maid met! Kaman as nan fianga, ay mafialin ay kanana as nan nangamma kan hiya, “Adchi t'uy assenay enatmu ay nangamma kan ha-un?”\* <sup>21</sup> Achi mafialin, tay nan mun-amamma as oknet ay fianga at wachay kalibfengana ay mangosar as nan oknet ta ammaana as laychuna. Mu laychuna, libfengna ay munamma as oknet ay fianga as chuwa ay karasi ay fianga, nan usa at napateg nan kaosarana ya nan usa at kumpurmi as kaosarana.

<sup>22</sup> Assesa us kan Apo Dios. Wacha nan kalibfengana ay mangekaman as laychuna. Laychuna ay mangepaila as nan pannakafialina ya fungatna ay manusia as nan tataku ay nakeddengan ay machusa. Chaana enat chi ngem kuna at enan-anosan chicha <sup>23</sup> ta epailana us nan nakaskaschaaw ay kaichayawana as nan tataku ay susug-angana ay sikud ay ensakianana ay maketaku kan hiya ad chaya.† <sup>24</sup> Chitaku nan tataku ay enayakian Apo Dios, ya fiakun yangkiay chitaku ay Judio ngem uray us nan chiyucha Gentil. <sup>25</sup> Hiyasa challu nan empaisurat Apo Dios kan Oseas ay kanana, “Nan chiyucha fiakun tatakok ad kasin at awakiaktu chicha as tatakok. Nan chiyucha chaanku lenayad ad kasin at awakiaktu chicha as laylay-chok.”‡

<sup>26</sup> “Nan lukiar ay nangifiag-ak un fiakun chicha nan tatakok at hid-i nan maawakianancha as an-ak nan matataku ay Dios.”§

<sup>27</sup> Wacha us nan empadton Isaias maepangkep as nan chiyucha kianak Israel ay kanana, “Uray kun kaman as nan lakian henan olet nan fiayfiay nan kaongor nan chiyucha kianak Israel, akét yangkiay challu kan chicha nan maesarakan.

<sup>28</sup> Tay tongparun challu Apo Dios nan enkekeddenga ay munchusaana asna's luta. O, henkemachuna ay manglopas ay mangtongpar as sa.”\*

<sup>29</sup> Kaman us as nan empadton Isaias ay kanana, “Mu maid yinagyag nan Dios ay Mannakafialin as nan am-in as akét kan chakami ay Judio, namaid kami koma am-in ay kaman as nan enommat as nan chiyucha i-Sodoma ya i-Gomorra.”†

### *Nan Chiyucha Kianak Israel Ya Nan Ammay Ay Chamag*

<sup>30</sup> Ngachana ngarud nan maifiakia takú? Hiyana: Nan chiyucha Gentil ay chaan nangepasnek ay maifilang as nalintig as nan mangilan Apo Dios

---

§ **9:17** Exo. 9:16   \* **9:20** Isa. 29:16; 45:9; Jer. 18:6; 2 Tim. 2:20   † **9:23** Rom. 8:28-30; Efe. 2:10  
 ‡ **9:25** Ose. 2:23   § **9:26** Ose. 1:6, 8-10   \* **9:28** Isa. 10:22-23   † **9:29** Gen. 19:24-25; Isa. 1:9

at naifilangcha challu as nalintig babaen as nan pammaticha yangkiay kan Cristo. <sup>31</sup> Ngem nan chiyucha kianak Israel ay nangepapati ay nangununud as nan lintig ta maifilangcha as nalintig as nan mangilana at chaancha challu naifilang as nalintig, tay chaancha tenongpar nan hana lintig. <sup>32</sup> Adchi pay? Tay chaancha enanap nan naifilangancha as nalintig babaen as pammaticha, ngem kun at babaen as nan chacha atuatuun ay mangtongpar as nan lintig. Naesakiaw chaná ay Judio as nan pammaticha kan Cristo ay maepachong as nan omesakiaw ay fiat. <sup>33</sup> Kaman as nan naisurat as nan Kalen Apo Dios ay kanana,

“Ilaunyu, wacha nan inpuuyku ay fiat ad Sion ay mangesakiaw ya manokchag as tataku.

Ngem uray ngachana ay taku ay omafurot kan hiya at achi poros mafainan.”<sup>‡</sup>

## 10

### *Nan Kenalintig Nan Tataku Ya Nan Kenalintig Apo Dios*

<sup>1</sup> Iib-a, nan laraychok paat at maesarakancha koma nan kacharaak ay Judio. Hiyana nan kanayon ay ekararagku kan Apo Dios. <sup>2</sup> Mapaneknekak ay epapatichayaw kan Apo Dios, ngem nan panaghchayawchayawcha kan hiya at achi maiyunud as nan tit-iwa ay pannakaammu. <sup>3</sup> Tay achicha maawatan nan atun Apo Dios ay mangifilang as nan tataku as nalintig, kuncha at penachapachas ay munfalin as nalintig babaen as nan chiyucha chacha atuatuun ay mangtongpar as nan hana lintig. Isunga chaancha nunpaetoray as nan panangifilang Apo Dios kan chicha as nalintig. <sup>4</sup> Tay nan kenatit-iwana at hi Cristo nan namapug as nan lintig. Isunga am-in ay omafurot kan hiya at maifilangcha as nalintig as nan mangilan Apo Dios.

### *Nan Kaesarakanan At Para As Nan Am-in*

<sup>5</sup> Nauy nan insurat Moises maepangkep as nan kenalintig ay maifisar as nan panangtongpar as nan Lintig: “Nan taku ay mangtongpar as nan am-in ay filin as nan Lintig at matakuntu in-inkiana.”\* <sup>6</sup> Ngem mu maepangkep as nan panangifilang Apo Dios as nan tataku as nalintig ay maifisar yangkiay as nan pammaticha kan Cristo, wacha us nan naisurat as nan Kalen Apo Dios ay kanana,

“Achiyu kanan as numnumyu un, ‘Ngachana nan umuy ad chaya?’ (ay uy mangayag kan Jesu Cristo ta kumuwab asna’s luta, tay kinmuwab met at hiya!)

<sup>7</sup> Winnu, achiyu kanan un, ‘Ngachana nan umuy ad chur-um as nan kawadan nan natuy?’ (ay uy mangtaku kan Cristo manipud as nan utúy, tay nataku met at hiya manipud as nan utúy!)”

<sup>8</sup> Tay nauy nan naisurat as nan Kalen Apo Dios ay kanana,

“Nan kalen Apo Dios at naeesnop kan chakayu. Wacha as numnumyu ya mafalin ay chayu ifiagfiakia.”†

Nan nauy kalen Apo Dios at hiyana nan maepangkep as pammaticha ay chami ekaskasaba. <sup>9</sup> Mu ipudnuyu ay afurotunyu ay hi Jesus nan kangatuwan ay Apo ya mu tit-iwa ay afurotunyu ay tenakon Apo Dios hiya manipud as nan utúy, maesarakan kayu. <sup>10</sup> Tay mu tit-iwa ay omafurot takú, ifilang

<sup>‡</sup> 9:33 Isa. 8:14; 28:16; Mat. 21:42; Rom. 10:11, 1 Ped. 2:6-8  
Deut. 30:10-14

\* 10:5 Lev. 18:5; Gal. 3:12

† 10:8

chitaku kan Apo Dios as nalintig, ya babaen as nan mangipudnuwan takú ay omafurot takú at maesarakan takú. <sup>11</sup> Tay wacha nan naisurat as nan Kalen Apo Dios ay kanana, “Nan ngachana ay omafurot kan Jesus at achintu mafainan as nan sangwanan Apo Dios.”<sup>‡</sup> <sup>12</sup> Nan laychun nan nauy ay kanan at sinug-angan Apo Dios nan am-in ay tataku, tay maid natkunan nan chiyuycha Judio as nan chiyuycha Gentil as nan mangiilana. Tay us-usa yangkiay nan Apon nan am-in, ya bendisyonana as chamuna nan am-in ay chumawat as fiachang kan hiya. <sup>13</sup> Tay kaman as nan naisurat as nan Kalen Apo Dios ay kanana, “Nan am-in ay tataku ay chumawat as fiachang as nan Apo at maesarakanchantu.”<sup>§</sup>

*Maid Panfor Nan Chiyuycha Judio Ay Achi Omafurot kan Cristo*

<sup>14</sup> Ngem anan atuncha ngay ay chumawat as fiachang kan hiya mu chaancha enmafurot? Anan atuncha ngay us ay omafurot kan hiya mu chaancha chinngor nan maepangkep kan hiya? Anan atuncha us ay chumngor mu maid uy mun-ekasaba kan chicha? <sup>15</sup> Anan atun ngay us nan tataku ay uy mun-ekasaba mu achicha maifiaor? Ngem naifiaorcha, tay wacha nan naisurat as nan Kalen Apo Dios ay kanana, “Anuy paat omeperagsak as solet nan omaliyan nan mangekaskasaba as nan ammay ay chamag.”\* <sup>16</sup> Ngem akét nan enmafurot as nan ammay ay chamag, tay kaman as nan kenalen Isaias ay mismu, “Apo, akét yangkiay nan enmafurot as nan insursumi.”† <sup>17</sup> Isunga narawag challu ay omafurotcha nan tataku babaen as nan munchungorancha, ya nan chungruncha at nan chamag maepangkep yangkiay kan Cristo.

<sup>18</sup> Ngem sarudsuchok pay na: Ay chaan tit-iwa chinchinngor nan chiyuycha Judio nan hana ay chamag? Chinngorcha met, tay wacha nan naisurat as nan Kalen Apo Dios ay kanana,  
“Nadngor nan kalicha henan uray ngachana ay lukiar. Naepakaammu nan infiagiakiacha henan am-in ay lukiar asna's luta.”‡

<sup>19</sup> Nauy pay nan usa ay sarudsuchok: Ay kun chaan naawatan nan chiyuycha Judio nan chinngorcha? Naawatancha met, tay uray nan chiyuycha Gentil at naawatancha. Numnumunyu nan enpadton Moises ay enpaisurat Apo Dios ay kanana,

“Paaposok chakayu kiapú as nan chiyuycha kanancha un achi maifilang as tatakok.  
Pafungtok us chakayu kiapú as nan tataku ay ka-ananyu ay achi nangammu as nan maepangkep kan ha-un.”§

<sup>20</sup> Naturturud pay hi Isaias ay nangifiakia babaen as nan insuratna as nan Kalen Apo Dios maepangkep as nan chiyuycha Gentil ay kanana,  
“Ininchananak as nan tataku ay chaan nangan-anap kan ha-un.

Nunpailaak as nan tataku ay chaan nanarsarudsud as nan maepangkep kan ha-un.”\*

<sup>21</sup> Ngem mu maepangkep as nan chiyuycha Judio, assena nan naisurat as nan Kalen Apo Dios ay kanana,

“Inurkiw ay ichatkuy kappia as nan tataku ay achi omafurot ya as nan tataku ay mangontra kan ha-un.”†

---

<sup>‡</sup> **10:11** Isa. 28:16; Rom. 9:33    <sup>§</sup> **10:13** Joel 2:32    \* **10:15** Isa. 52:7; Nah. 1:15; Efe. 6:15    † **10:16**  
Isa. 53:1    ‡ **10:18** Sal. 19:4    § **10:19** Deut. 32:21    \* **10:20** Isa. 65:1    † **10:21** Isa. 65:2

## 11

### *Nan Sug-ang Apo Dios As Nan Chiyuycha Judio*

<sup>1</sup> Sarudsuchok ngarud: Ay enachen Apo Dios nan chiyuycha mismu ay tatakuna? Chaan! Tay ha-un'ay mismu at usaak ay Judio ay kianak Abraham, ya nurpuwak as nan tribon Benjamin.\* <sup>2</sup> Chaan enachen Apo Dios nan sikud ay pinilina ay tatakuna. Ammuyu met nan naisurat as nan Kalen Apo Dios ay lilen Elias maepangkep as nan kakailiyana ay Judio ay kanana, <sup>3</sup> “Apo, penatuycha nan chiyuycha pomapadtom. Chinachaelcha us nan chiyuycha mun-ichatchatonan nan tataku as animar kan he-a. Ha-un yangkay nan nayagyag, ya laychuncha us ay mangpatuy kan ha-un.”† <sup>4</sup> Ngem ngachana nan ensongfiat Apo Dios kan hiya? Kenalina, “Wachacha nan piton lifu ay tatakok ay yinagyagku ay chaan poros nanaychayaw as nan didiosen ay Baal.”‡ <sup>5</sup> Kaman us challu ad wani ay timpu, wachacha nan akét ay pinilen Apo Dios ay Judio, ya pinilina chicha kiapú as nan grasyana kan chicha. <sup>6</sup> Mu kiapú as grasyana nan nangpiliyana kan chicha, fiakun ngarud kiapú as nan nanongtongparancha as nan lintig. Tay mu kiapú as nan ammay ay enkamkamancha nan nangpiliyana kan chicha, achi takú mafialin ay kanan un grasyana chi.

<sup>7</sup> Nan enommat at hiyana: Chaan naanapan nan kaongoran ay Judio nan chacha anaanapun. Nan akét yangkay ay pinilen Apo Dios nan nakaanap. Ngem am-in ay tapina ay Judio at penatangken Apo Dios nan numnumcha.

<sup>8</sup> Kaman as nan naisurat as nan Kalen Apo Dios ay kanana,

“Kaman enpassuy Apo Dios nan numnumcha ya pannakaawatcha. Isunga inkiana ad wani, uray kun wachay matacha, achicha makaila, ya uray wachay ingacha, achicha makadngor.”§

<sup>9</sup> Wacha us nan enpaisurat Apo Dios kan Ari David ay kanana,

“Sapay koma ta kalina at ya madpapcha as nan chacha mangkianianasan ay mangan as tukutukún ay makan ay kaman kossel ay mailkian winnu animar ay mafituwan ta machusacha ay ustu.

<sup>10</sup> Ngomongot koma us nan numnumcha ta achicha maawatan nan tit-iwa. Mapalikiatcha koma in-inkiana.”\*

<sup>11</sup> Sarudsuchok ngarud: As nan naesakiawan nan chiyuycha Judio ta mag-ascha, ay chaancha nakafiangun? Chaancha met! Nan kenatit-iwana at kiapú ta finmasorcha, napachasan nan chiyuycha Gentil nan kaesarakanan. Assesa nan enommat ta omapos nan chiyuycha Judio as nan chiyuycha Gentil ya ta maesarakanchantu. <sup>12</sup> Numnumun takú na ngarud: Mu nabendisyonan as solet nan tataku asna's luta kiapú as nan fiasfiasor nan chiyuycha Judio ya kiapú as nan nangachiyancha kan Cristo, ay achicha kaskasin mabendisyonan mu maesarakan nan ustuustu ay filang nan chiyuycha Judio?

### *Nan Maesarakanan Nan Chiyuycha Gentil*

<sup>13</sup> Ad wani, wacha nan ifiakiak kan chakayu ay Gentil. Kiapú ta piniliyak kan Apo Dios as apostolna ay mangisuru kan chakayu, epategku na ay chunok <sup>14</sup> ta urum ya omaposcha nan iib-ak ay Judio kan chakayu. Mu

---

\* **11:1** 2 Co. 11:22-23; Filip. 3:5-6   † **11:3** 1 Ar. 19:10, 14   ‡ **11:4** 1 Ar. 19:18   § **11:8** Deut. 29:4; Isa. 29:10; Mat. 13:13-17   \* **11:10** Sal. 69:22-23

hiyasa, maesarakanchantu nan tapina kan chicha. <sup>15</sup> Tay as nan nangachiyan Apo Dios kan chicha, nunfalin nan chiyuycha Gentil as kiakiayum Apo Dios. Isunga ammay as solet mu kasin awatun Apo Dios chicha, tay kamancha nataku manipud as nan utúy.

<sup>16</sup> Maepachong nan chiyuycha Judio as nan tenapay. Mu maichaton kan Apo Dios nan omona ay put-ing, maifilang as kuwan us Apo Dios nan naputtingana. Nan usa us ay maepachonganca at as nan kaiw, tay mu maichaton kan Apo Dios nan lamotna, kuwan us Apo Dios nan pangana. <sup>17</sup> Nauy pay nan maepachongan nan chiyuycha Judio. Maepachongcha as nan kaiw ay olivo ay entanum ya enay-aywanan Apo Dios. Ngem senpak Apo Dios nan tapen nan pangana. Chakayu us ay Gentil at maepachong kayu as nan olivo ay kun lawá tinmutufu. Nan enat Apo Dios at enarana chakayu ya ensoop chakayu as nan entanumna ta maetapi kayu as nan sikud ay panga ay nayagyag. Ad wani, makelaklak-am kayu as nan ammay ay cha murmurpu as nan lamotna. <sup>18</sup> Isunga achiyu epangas ay chakayu nan kaskasin ammay mu nan chiyuycha Judio ay enachen Apo Dios ay chicha nan maepachong as nan chiyuycha panga ay senpaka. Kun kayu yangkiay panga ay ensoopna. Nan kenatit-iwana at fiakun nan panga nan manikun as nan lamot, ngem kun at nan lamot nan manikun as nan panga.

<sup>19</sup> Mafialin ay wachacha kan chakayu nan mangali, “Tit-iwa sa, ngem senpak Apo Dios nan tapen chi panga ta chakami nan maesokat.” <sup>20</sup> Manuwat sa, senpaka chicha kiapú ta chaancha enmafurot, ngem chakayu at kun kayu yangkiay naesoop kiapú ta enmafurot kayu. Isunga achi kayu munpangpangas, ngem kun kayu at munpakumbaba ay mangtongpar as nan laychun Apo Dios. <sup>21</sup> Tay mu chaan enanosan Apo Dios nan chiyuycha sikud ay pangá ay chicha nán Judio, ay maanosana at ngun chakayú mu achi kayu omafurot kan hiya? Achi a! <sup>22</sup> Nunumnumunyu na: Manangsugang hi Apo Dios, ngem ammunu us ay chumusa. Tay nan chiyuycha chaan enmafurot at chinusana chicha, ngem chakayu at susug-angana challu mu iturturuyyu ay omafurot. Ngem mu achiyu iturturuy, sopakun chakayuntu us kan Apo Dios. <sup>23</sup> Kaman us as nan chiyuycha Judio, mu sakonguncha hi Apo Dios ta omafurotcha kisin, ifiangadtu Apo Dios chicha as nan nakaanancha, tay wachay pannakafialina met ay mangekaman as chi. <sup>24</sup> Chakayu ay Gentil at maepachong kayu as nan pangan nan olivo ay kun lawá tinmutufu, ya ensoop Apo Dios as nan tenanumna ay olivo ay fiakunyu nurpuwan. Mu kenafaelana ay nangekaman as chi kan chakayu, ay achina at ngun kaskasin kafaelan ay mangifiangad as nan chiyuycha senpaka ay panga as nan chiyuy tenanumna ay nurpuwancha?

### *Nan Sug-ang Apo Dios As Nan Am-in Ay Tataku*

<sup>25</sup> Chakayu ay iib-ak, wacha nan chaan naepakaammu ad pus-uy ay laychok ay maawatanyu ta achi kayu munpangpangas ay mangali un masilib kayu. Nan epakaammok kan chakayu at hiyana: Achi munturturuy ininkiana nan kenasokel nan tapen chi Judio, ngem munturturuy yangkiay inkiana umustuu nan filang nan chiyuycha Gentil ay maesaran. <sup>26</sup> Angkiay ya maesarakanchantu am-in ay Judio, kaman as nan naisurat as nan Kalen Apo Dios ay kanana,

“Omalintu nan Omesarakan ay murpu ad Sion,<sup>†</sup> ya kaanuna nan am-in ay kenasokel nan chiyuycha kianak Jacob.

---

<sup>†</sup> **11:26** Sion winnu kianak Jacob winnu kianak Israel.

<sup>27</sup> Hiyachi nan matongparan nan enkarek kan chicha ay kaanok nan fiasfiasorcha.”†

<sup>28</sup> Mu maepangkep as nan nangachiyian nan chiyuycha Judio as nan Ammay ay Chamag, maifilangcha as kafusor Apo Dios. Hiyasa nan chansayu ay Gentil ay mang-awat as nan kaesarakananu. Ngem mu maepangkep as nan nangpiliyan Apo Dios kan chicha at epatpategna challu chicha kiapú kan cha Abraham ay kaap-uwancha. <sup>29</sup> Tay achi poros sokatan Apo Dios nan pangkepna maepangkep as nan chiyuycha enayakiana ya nan enkarina kan chicha. <sup>30</sup> Chakayu ay Gentil at chaanyu enafurot hi Apo Dios ad kasin. Ngem ad wani, sinug-angan chakayu kan Apo Dios kiapú as nan chaan emafurotan nan chiyuycha Judio. <sup>31</sup> Assesa us as nan chiyuycha Judio. Ad wani, achicha afurotun hi Apo Dios. Ngem kiapú ta sinug-angan Apo Dios chakayu ay Gentil, awatuntu nan chiyuycha Judio nan sug-ang ay ichat Apo Dios kan chicha. <sup>32</sup> Tay keneddengan Apo Dios nan am-in ay tataku as fumafiasor kiapú ta chaancha emafurot ta sug-angana chicha am-in.

### *Masapor Maichayaw Hi Apo Dios*

<sup>33</sup> Machaychayaw hi Apo Dios, tay nan sug-angna at kaman chanum ay somabsaifi ay omayas as nan tatakuna! Maid munpattingkiaan nan kenasilibna ya pannakaammuna! Ngachana ngarud nan makalukud as nan wacha as numnumna ya makaawat as nan planuna? <sup>34</sup> Tay kaman as nan naisurat as nan Kalen Apo Dios ay kanana,

“Ay wachay nangammu as nan numnum Apo Dios? Ay wachay makatukun kan hiya?§

<sup>35</sup> Ay wachay nangepautang kan Apo Dios as masapor fiayachana? Maid met!”\*

<sup>36</sup> Tay hiya met nan namayang as nan am-in. Hiya us nan mangetoray as nan am-in. Nafiyang nan am-in ta maichaychayaw hiya. Sapay koma ta maichaychayaw hiya in-inkiana. Amen.

## 12

### *Nan Libfengun Nan Chiyuycha Omaafurot Kan Cristo*

<sup>1</sup> Chakayu ay iib-a, kiapú as nan ongor ay sug-ang Apo Dios kan chitaku, ichatonyu man paat kan Apo Dios nan achoryu as chaton ay matataku ay nakasakiana ay munserfi kan hiya. O, ichatonyu kan hiya nan achoryu as chaton ay nasantowan ya omeopalaylayad kan hiya, tay hiyachi nan ustу ay atunyu koma ay mangichaychayaw kan hiya. <sup>2</sup> Achiyu turturachun nan ukialen nan tataku ay achi omafurot kan Apo Dios, ngem kunyu at parufusun hi Apo Dios ay mangpaifiarú as nan numnumyu ta mapafiariú us nan fiyagyu. Tay mu hiyasa nan atunyu, maammuwanyu nan pangkep Apo Dios kan chakayu. O, maammuwanyu mu ngachana nan ammay, nan enkeddenga as nan ustу.\*

<sup>3</sup> Babaen as nan kalibfengak ay inchat Apo Dios kan ha-un, tukunok nan tunggal usa kan chakayu am-in ta achiyu ichayaw nan achoryu as nangatngatu mu nan ustу. Kun at masapor napudnu ya napakumbaba nan tunggal usa, ya waschi un numnumuna nan mismu ay achorna ay maiyunud as nan pammati ay inchat Apo Dios kan hiya. <sup>4</sup> Tay nan anchor takú ay tataku at ongor nan partina ya tukutukún us nan kaiyosarancha.

† **11:27** Sal. 14:7; Isa. 27:9a; 59:20-21; Jer. 31:31-34      § **11:34** Isa. 40:13; Jer. 23:18; 1 Co. 2:16

\* **11:35** Job 41:11      \* **12:2** Efe. 4:23

<sup>5</sup> Assid-i us kan chitaku ay omaafurot, tay uray kun takú ongor, maepachong takú as nan parten nan us-usa ay achor kiapú as nan nakius-usaan takú kan Cristo. Isunga nan tunggal usa kan chitaku at parten nan us-usa ay achor, isunga nakamkammang takú am-in. <sup>6</sup> Masapor osarunyu ngarud nan tukutukún ay kafaelan ay inchat Apo Dios kan chakayu kiapú as nan grasyana. Mu nan kafaelan ay naichat kan chakayu at mangepadtu as nan epakaammon Apo Dios, atunyu chi ay maiyunud as nan pammatiyu. <sup>7</sup> Mu nan kafaelanyu at munserfi as nan pachongyu ay taku, matalek kayu koma ay munserfi. Mu nan kafaelanyu at mun-isuru as kalen Apo Dios, mun-isuru kayu ay ustu. <sup>8</sup> Mu nan kafaelanyu at mangepapigsa as pammatten nan iib-ayu, epapasnekyu ay mangekaman. Mu nan kafaelanyu at mangifingay as nan wacha kan chakayu as nan makasapor, masapor atunyu chi ay maid kenangekot kan chakayu. Mu nan kafaelanyu at mangepanguru as nan iib-ayu, masapor makakud kayu. Mu nan kafaelanyu at fumachang as nan chiyuycha kasusug-ang, masapor naragsak kayu ay mangekaman.

<sup>9</sup> Napudnu koma nan layadyu. Inglunyu nan mangotettet, ya kanayonyu ay unuchun nan ammay. <sup>10</sup> Munleennayad kayu ay kaman as nan atun nan hen-anag-i, ya masapor ifilangyu nan iib-ayu ay omaafurot as napat-pateg mu nan mismu ay achoryu. <sup>11</sup> Achi kayu pomadpadsok, kun kayu at komakud as solet, ya epapasnekyu koma ay munserfi kan Apo Jesus. <sup>12</sup> Munlagsak kayu kiapú ta siguradu ay matongpar nan namnamaunyu, anosanyu nan liglikiat, ya kanayon ay munkararag kayu. <sup>13</sup> Mu wachacha nan iib-ayu ay omaafurot ay makasapor as fiachang, ifingayyu nan wacha kan chakayu, ya nakasakiana kayu koma ay munmangili.

<sup>14</sup> Mu wachacha nan mamalikiat kan chakayu, ekararakianyu chicha ta bendisyonian Apo Dios chicha. O, hiyasa koma nan atunyu. Achiyu chawatun ay ituchor Apo Dios chicha. <sup>15</sup> Makelagragssak kayu as nan chiyuycha naragsák, ya makingunguyus kayu as nan chiyuycha munnunguyus. <sup>16</sup> Muntotornos kayu koma. Achi kayu munpangpangas, ngem kun kayu at makikiayyum as nan chiyuycha napakumbaba. Achiyu kanan un naraing kayu.<sup>†</sup>

<sup>17</sup> Mu wachay mangekaman as mangotettet kan chakayu, achiyu es-es-ang. Ngem kunyu at atun nan ammay ta maid atun nan tataku ay mangsot kan chitaku ay omaafurot.<sup>‡</sup> <sup>18</sup> Atunyu nan am-in ay kafaelanyu ay makekappia as nan am-in ay tataku. <sup>19</sup> Chakayu ay iib-a ay laylaychok, achi kayu omes-ang, ngem pay-anyu ta hi Apo Dios ay wachay kalibfengana nan chumusa, tay wacha nan naisurat as nan Kalen Apo Dios ay kanana, “Ha-un ay Apo Dios at wachay kalibfengak ay omes-ang. Ha-un nan manusakan chicha.”<sup>§</sup>

<sup>20</sup> Isunga atun takú nan kaman as nan naisurat as nan Kalen Apo Dios ay kanana, “Mu cha munchukiaang nan kafusormu, pakanum hiya. Mu nasketan hiya, paikopum. Tay mu hiyachi nan atum, mafiainantu hiya kiapú as nan enatna.”\*

<sup>21</sup> Achi takú munpaamis as nan mangotettet ay chacha atuatun, ngem kun takú at amisun nan mangotettet babaen as nan ammay ay cha takú atuatun.

† <sup>12:16</sup> Prov. 3:7   ‡ <sup>12:17</sup> Prov. 20:22; 24:29; Mat. 5:11-12; Rom. 12:19   § <sup>12:19</sup> Deut. 32:35

\* <sup>12:20</sup> Prov. 25:21-22; Mat. 5:44; Luc. 6:27-36 As nan nauy proverbio at kanana un kamanmu tenotor-op chi cha fumarfiara ay uling as uruna.

## 13

### *Nan Libfengun Chi Taku As Nan Goberno (Tit. 3:1; 1 Ped. 2:13-17)*

<sup>1</sup> Nan am-in ay tataku at masapor munpaetoraycha \* as nan totoray as nan goberno, tay maid kalibfengancha ay muntoray sukúd murpu sa ay kalibfengancha kan Apó Dios, ya am-in ay cha muntortoray at hi Apo Diós nan nangichat as toraycha. <sup>2</sup> Isunga nan taku ay mangachi as nan totoray at achiyuna us nan chinutokan Apo Dios. Isunga machusantu hiya kiapú as nan enatna. <sup>3</sup> Nan cha mangekamkaman as ammay at maid umugyatana as nan totoray, ngem nan cha mangekamkaman as mangotettet at umugyat. Isunga mu laychunyu ay achi umugyat as nan chiyucha toray, ammay koma nan ekamanyu, at chayawun chakayuntu kan chicha. <sup>4</sup> Tay munserserficha kan Apo Dios para as nan omammayanyu. Ngem mu mangotettet nan atunyu, umugyat kayu koma, tay tit-iwa nan kalibfengancha ay chumusa. O, nan nauyucha fiabfiaarun Apo Dios at wachay kalibfengancha ay manusa as nan tataku ay mangekamkaman as mangotettet. <sup>5</sup> Isunga masapor munpaetoray kayu as nan totoray, fiakun yangkiay kiapú ta umugyat kayu ay machusa, ngem kiapú ta ammuyu ay hiyana nan ustу ay maekaman.

<sup>6</sup> Hiyana us challu nan kiapúna as chayu munfiayfiayachan as fiaror, tay nan totoray at chacha munserserfi kan Apo Dios as nan chacha manongtongparan as nan libfenguncha. <sup>7</sup> Isunga fiayachanyu nan am-in ay utangyu kan chicha, kaman as nan fiaror ya tapina pay ay libfengunu ay fiayachan. Risipituwunyu ya chayawunyu ay ustу nan chiyucha mangetortoray kan chakayu.

### *Nan Libfengun As Nan Pachong Ay Taku (Exo. 20:13-17; Efe. 5:1-14; 1 Tes. 5:1-11)*

<sup>8</sup> Mu wachay utangyu, achi koma mafiyag nan mamayachanyu. Ngem nan libfengyu ay manglaylayad as nan pachongyu ay taku at ifilangyu as utangyu in-inkiana. Tay nan taku ay manglaylayad as nan iib-ana at chana tongtongparun nan lintig Apo Dios. <sup>9</sup> Tay wacha nan filfilin Apo Dios ay kanana,

“Achika umiwet. Achika pomatuy. Achika mangakiw. Achim akuman nan kuk-awan chi tapina,”

ya nan tapina pay ay filfilin at matongparcha am-in babaen as nan us-usa ay filin ay kanana,

“Laylaychum nan pachongmu ay taku ay kaman as nan atum ay manglaylayad as nan achormu.”†

<sup>10</sup> Tay mu tit-iwa ay laylaychunyu nan pachongyu ay taku, maid ekamkamanyu as mangotettet kan chicha. Isunga nan taku ay manglaylayad as nan pachongna ay taku at chana tongtongparun nan am-in ay lintig Apo Dios.

### *Nan Panagfiyag Nan Taku Ay Wacha As Nan Lawag (Efe. 5:1-14; 1 Tes. 5:1-11)*

<sup>11</sup> Masapor atunyu sa, tay ammuyu ay napateg nan timpu ay matatakuwan takú ad wani. Achi kayu kaman as nan chiyucha nanassuy, ngem kun kayu at kaman as nan chiyucha finmaifangun, tay kiayud omali nan kaesarakanan takú mu as nan puspus-uy ay enmafurotan takú. <sup>12</sup> Tay as nan timpu ay chaanyu nangam-ammuwan kan Apo Dios at kaman kayu wacha

\* **13:1** Tit. 3:1    † **13:9** Lev. 19:18; Deut. 5:17-19, 21; Mat. 19:18; 22:37-40

as nan ngongot. Ngem ad wani ay enmafurot kayu kan Cristo, kaman kiayud mafikiat as nan kawad-anyu. Isunga kaanunyu nan am-in ay mangotetted ay ukiali ay kaman as nan cha atutun nan tataku as nan ngongot ta esokatyu nan armas ay maifiakiay as nan sorchachu ay wacha as nan lawag.<sup>13</sup> Nan panagfiyag ay unuchunyu koma at nan nacharos ya ammay ay maifiakiay as nan tatu ay wacha as nan lawag. Achi kayu munfututang ya maetaptapi as nan narafus ay lagragsak. Achiyu us ekamkaman nan mangepapasan as assi ay lachok ya tapina ay kafiafain ay ekamkaman. Achi kayu makisumsuma ya omap-apos.<sup>14</sup> Nan atunyu koma at turachunyu nan panagfiyag Apo Jesu Cristo ta hiyasa nan kaman armas ay ifiachuyu, ya il-ilaunyu ta achi kayu munnumnumnum ay mangekaman as nan mun-ongosán chi achor.

## 14

### *Achi Takú Okomún Nan Iib-a Takú Ay Omaafurot (1 Co. 8:1-13; 10:23-33)*

<sup>1</sup> Mu wachay omali as ifia takú ay nakapuy pay laing chi pammatica, awatunyuhiya. Ngem achi kayu makesososek kan hiya maepangkep as nan natkunan nan maawatana. <sup>2</sup> Kaman as nan makan, wachacha nan chaan naonngan chi pammatica ay mangafurot ay panyiw mu umischacha as karni, isunga manangchangcha as nating yangkiay. Kun pay nan tapina at afurotuncha ay maid panyiw as makan, isunga umischacha as kumpurmi. <sup>3</sup> Nan chiyucha umischa as kumpurmi at achicha koma elayusan nan tataku ay umischa as natnating yangkiay, ya nan chiyucha umischa as natnating yangkiay at achicha us koma okomún nan chiyucha umischa as kumpurmi, tay enawat Apo Dios chicha. <sup>4</sup> Isunga chakayu ay mangok-okóm as iib-ayu, maid kalibfenganyu ay mangekaman as sa as nan chiyucha fiabfiaarun chi tukún. Tay hi Apo Dios ay Apocha nan mangekeddeng mu nalintig winnu achi nan chachá at-atun. Enpailan Apo Dios nan panangaprobara ay nalintigcha, tay kafaelana ay mangfiachang kan chicha ay mangekaman as nalintig.

<sup>5</sup> Wachacha nan tataku ay mamigfig ay wachay urkiw ay napatpateg mu nan tapina ay urkiw. Kun pay nan tapina ay tataku at kanancha un mapapchong am-in chi urkiw. Mu maepangkep as na, masapor achi munchuwachuwa nan numnum nan tunggal usa ay ustu nan chaná at-atun as nan mangilan Apo Dios. <sup>6</sup> Nan tatu ay mangifilang ay napatpateg nan usa ay urkiw mu nan tapina at atuna chi as mangichayawana kan Apo Jesus. Kaman us as nan tatu ay mangischa as karni at atuna chi as mangichayawana kan Apo Jesus, tay munyaman kan Apo Dios as nan ischana. Uray us nan achi umischa as karni at atuna chi as mangichayawana kan Apo Jesus, ya munyaman us as nan kanuna. <sup>7</sup> Tay am-in takú ay omaafurot at fiakun yangkiaynan laychun takú nan cha takú tongtongparun, kun at nan laychun Apo Dios. O, as nan matatakuwan takú ya uray as nan matuyan takú at tatakuna chitaku. <sup>8</sup> Tay as nan matatakuwan takú asna's luta winnu uray matuy takú at hi Apo Dios challu nan maichaychayaw. Isunga uray mu matataku takú winnu matuy takú, nan Apo nan nakin kuwa kan chitaku. <sup>9</sup> Tay hiyana nan kiapúna ay natuy ya nataku hi Cristo manipud as nan utúy ta hiya nan Apon nan matataku ya kaman us nan nunkatuy. <sup>10</sup> Isunga achi takú mun-eennokóm ya munleennayus, tay sakiangun takú am-in challu nan Apo ta okomuna chitaku. <sup>11</sup> Tay kaman as nan naisurat as nan Kalen Apo Dios ay kanana,

"Kiapú ta wacha kan ha-un nan fiyag ay maid patingkiana, ekarek ay siguradu ay ommat nan nauy ifiakiak ay munpalintumangtu nan am-in ay tataku as nan sangwanak, ya ipudnuchantu ay ha-un nan Dioscha."\*

<sup>12</sup> Isunga tunggal usa kan chitaku at maesakiang ay mangipudnu kan Apo Dios as nan en-enatna asna's luta.

### *Achi Takú Awisun Nan Iib-a Takú Ay Fumasor*

<sup>13</sup> Achi takú ngarud mun-eennokóm, ngem kun takú at masapor numnumay achi takú poros ekaman chi uray ngachana ay maesakiawan winnu fumasoran nan iib-a takú ay omaafurot. <sup>14</sup> Kiapú as nan nakius-usaak kan Apo Jesus, ammok ay maid makan as paniyw as nan mangiilan Apo Dios. Ngem mu afurotun nan usa ay taku ay paniyw chi, munfialin as paniyw para kan hiya.† <sup>15</sup> Iib-ak ay omaafurot, mu nasaktan chi numnum nan iib-a takú kiapú as nan kanun takú ay paniywuncha, fiakun layad nan cha takú epaila kan chicha mu epapati takú ay mangkakan as nan hana. Isunga il-ilau takú ta achi takú chachaelun nan pammatten nan iib-a takú kiapú yangkiay as makan, tay natuy hi Cristo para kan chicha us. <sup>16</sup> Isunga uray mu ammay as numnum takú, achi takú atun nan uray ngachana mu nan munfianakiana at ostuncha nan ifilang takú as ustу. <sup>17</sup> Tay nan napateg henan muntorayan Apo Dios at fiakun nan kanun takú winnu ikopun takú, ngem kun at nan kenalintig, nan talna, ya nan lagsak ay ichat nan Espiritu Santo. <sup>18</sup> Mu assena nan panagfiyag takú as nan munsererfiyan takú kan Cristo, malaylaychan hi Apo Dios kan chitaku, ya ichayaw chitaku us as nan tapina ay tataku.

<sup>19</sup> Isunga epapati takú nan kafaelan takú ay mangekaman as nan umichat as talna ya omepapigsa as pammatten chi tunggal usa. <sup>20</sup> Kiapú as makan yangkiay, achi takú koma chachaelun nan enat Apo Dios. Tit-iwa met ay maid makan as mapaniyw, ngem fiasor takú challu mu nan kumpurmi ay kanun takú nan kiapón chi fumasoran nan iib-a takú. <sup>21</sup> Ammay at mu achi takú umischa as karni winnu umikop as fiayas winnu omekaman as kumpurmi ay fumasoran chi iib-a takú.

<sup>22</sup> Mu ngachana nan enafurot nan tunggal usa maepangkep as na, achina ud-ay ekakak as nan iib-ana ta chicha yangkiay ay chuwa kan Apo Dios nan nangammu. Nakiasat nan taku ay achi munchuwachuwa kiapú as nan ninumnumna ay ustу ay atuna. <sup>23</sup> Ngem nan taku ay munchuwachuwa maepangkep as nan kanuna ya chana pay laing kanun at finmasor hiya, tay achi maiyunud nan enatna as nan pammartinia. Tay uray ngachana ay achi maiyunud as nan pammati takú at fiasor takú chi mu epapati takú ay ekaman.

## 15

### *Nan Omepalayayad As Nan Pachong Ay Taku (Gal. 6:1-5)*

<sup>1</sup> Chitaku ay naonngan nan pammartinia at masapor anosan takú nan munkururangan nan pannakaawat nan chiyucha nakapuy chi pammaticha ya makeleknas takú us kan chicha. Fiakun nan anchor takú nan ninumnumun takú ay palayayachun, <sup>2</sup> ngem kun takú at numnumun nan omepalayayad as nan iib-a takú ta pumigsa nan pammaticha. <sup>3</sup> Tay uray hi

\* <sup>14:11</sup> Isa. 45:23; Filp. 2:10-11 † <sup>14:14</sup> 1 Co. 6:12-20; 8:1-13

Cristo at fiakun nan mangepalayayad as achorna nan ninumnumnumna, tay kaman as nan naisurat as nan Kalen Apo Dios maepangkep kan Cristo ay kanana, “Nan nangos-osotan nan tataku kan he-a Apo Dios at ha-un nan naos-osot.”\* <sup>4</sup> Am-in ay naisurat as nan Kalen Apo Dios ad pus-uy at naisuratcha as mun-acharan takú ta pumigsa nan numnum takú, ya mafialin takú ay eta-un nan likiat ta achi takú munchuwachuwa as nan namnama takú ay tongparun Apo Dios nan enkarina.

<sup>5</sup> Hi Apo Dios challu nan nurpuwan chi anos ya pigsan chi numnum takú. Sapay koma ta hiya nan mamadfiachang kan chakayu ta muntetennornos kayu kiapú as nan chayu manurturachan as nan ukialen Cristo Jesus. <sup>6</sup> Tay mu hiyasa nan atunyu, mun-us-usa nan numnumyu ay mangichaychayaw kan Apo Dios ay Aman Apo takú ay Jesu Cristo.

### *Nan Ammay Ay Chamag Para As Nan Chiyucha Gentil*

<sup>7</sup> Awatunyu ngarud nan tunggal usa ay kaman as nan nang-awatan Cristo kan chakayu ta maichayaw hi Apo Dios. <sup>8</sup> Tay ifiakiak kan chakayu ay emnali hi Cristo ay munserserfi as nan chiyucha Judio ta epailana ay matalek hi Apo Dios ay mangtongpar as nan enkarina ad pus-uy as nan kaap-uwancha <sup>9</sup> ya ta chaychayawun us nan chiyucha Gentil hi Apo Dios kiapú as nan sugangna kan chicha. Kaman challu as nan naisurat as nan Kalen Apo Dios ay kanana,

“Maetapiyak as nan chiyucha Gentil ay mangichaychayaw kan he-a, ya ekankantak ay mangichayaw as nan ngachanmu.”†

<sup>10</sup> Wacha kasin nan naisurat as nan Kalen Apo Dios ay kanana, “Chakayu ay Gentil, makelagragasak kayu as nan pinilen Apo Dios ay tatakuna.”‡

<sup>11</sup> Nan usa pay at kanana,  
“Chakayu ay Gentil, chaychayawunuhi Apo Dios. Am-in kayu ay tataku, chaychayawunuhiya!”§

<sup>12</sup> Wacha us nan insurat Isaias ay kanana,  
“Wachantu nan omali ay murpu as nan kianak Jesse.”\*  
“Etag-uytu Apo Dios hiya ay mangetoray as nan am-in ay Gentil, ya hiyantu nan namnamauncha ay mangesarakan kan chicha.”†

<sup>13</sup> Sapay koma ta hi Apo Dios ay kurpuwan chi namnama takú at ichatna us chi ongor ay lagsak ya natalna ay numnum kan chakayu kiapú as nan pammatiyu kan hiya ta mataptapiyan pay nan namnamayu babaen as nan pannakafialin nan Espiritu Santo.

### *Nan Kiapón Nan Kenaturud Pablo Ay Munsurat*

<sup>14</sup> Chakayu ay iib-ak, maid chuwatchuwak ay ammay as solet chi ukialiyu ya maawatanyu ay ustu nan maepangkep as nan pammati takú. O, ammok ay kafiaelanyu ay munsisinnuru ya munititinnukun. <sup>15</sup> Ngem uray mu hiyasa, naturuchak ay munsurat kan chakayu ad wani ta achiyu liw-an na ay sursuru. Tit-iwa, naturuchak kiapú as nan kalibfengak as usa ay apostol ay inchat Apo Dios kan ha-un <sup>16</sup> ay munserserfi kan Cristo Jesus babaen as nan mun-is-isuruwak as nan chiyucha Gentil. O, munserserfiyak ay kaman pachi ay mangekaskasaba as nan Ammay ay Chamag ay nurpu kan Apo Dios as nan chiyucha Gentil ta babaen as nan pannakafialin nan Espiritu

---

\* <sup>15:3</sup> Sal. 69:9   † <sup>15:9</sup> Sal. 18:49   ‡ <sup>15:10</sup> Deut. 32:43   § <sup>15:11</sup> Sal. 117:1   \* <sup>15:12</sup> 1 Sam. 16:11-13   † <sup>15:12</sup> Isa. 11:1, 10

Santo, munfialincha nan chiyucha omaafurot as nasantowan ay chaton ay mangepalaylayad kan Apo Dios. <sup>17</sup> Isunga kiapú as nan nakius-usaak kan Cristo Jesus, mafialin ay epangasku nan nauy chak munserserfiyan kan Apo Dios. <sup>18</sup> Ngem maid tukún as mafialin ay epangasku mu achi nan en-enat Cristo babaen kan ha-un ay nangaw-awis as nan chiyucha Gentil ta omafurotcha kan Apo Dios babaen as nan enkaskasabak ya en-enatku. <sup>19</sup> Tit-iwa ay enatku am-in chaná ay nakaskaschaaw ay sinyar ya milagro babaen as nan pannakafialin nan Espiritu Santo. Isunga lenpasku ay nangekaskasaba as nan Ammay ay Chamag maepangkep kan Cristo nunlapu ad Jerusalem inkiana ad Illiricum.<sup>‡</sup> <sup>20</sup> Tay penapangkepku ay uy mangekasaba as nan Ammay ay Chamag as nan tataku henan il-ili ay achi mangammu as nan maepangkep kan Cristo ta acheck ituruy nan chunon chi tukún ay taku.<sup>§</sup> <sup>21</sup> Nan enatku at maiyunud as nan naisurat as nan Kalen Apo Dios ay kanana,

“Nan chiyucha chaan nannanngor as nan maepangkep kan hiya at ilaunchantu hiya ya maawatanchantu nan maepangkep kan hiya.”\*

*Nan Planon Pablo Ay Umuy Ad Roma  
(1 Co. 16:1-4; 2 Co. 8:16-9:5)*

<sup>22</sup> Kiapú as nan nauy ay chunok, namen ongor ay napas-iw nan omaliyak kan chakayu. <sup>23</sup> Ngem ad wani, kiapú ta lenpasku nan chunok henan nauycha ay il-ili, ya kiapú ta nafiyag us ay laraychok ay omali kan chakayu, <sup>24</sup> isunga namnamaok ay tongparok ad wani. As nan umuyak ad Espanya, laychok ay chumag-os hesa ad Roma ay mangila kan chakayu, ya mu mafialin, fiadnganak koma kan chakayu ay umuy hid-i as nan marpasan nan hen-omaketan ay naragsak ay makilid-iwaak kan chakayu. <sup>25</sup> Ngem ad wani, umuyak ad Jerusalem ay mangiyuy as fiachang as nan tatakon Apo Dios hid-i. <sup>26</sup> Tay laychun nan chiyucha iglesia ad Macedonia ya Acaya ay mangamong as ifiachangcha as nan tatakon Apo Dios ay wacha ad Jerusalem ay makasapor as fiachang. <sup>27</sup> Chicha challu kayman nan nunplanu ay fumachang. Ngem nan kenatit-iwana at libfengcha ay fumachang as nan chiyucha makasapor as fiachang ad Jerusalem. Tay mu nakelak-am nan chiyucha Gentil as nan naespirituwan ay bendisyon nan chiyucha Judio, libfeng us ngarud nan chiyucha Gentil ay umichat as kasaporan nan chiyucha Judio as pagfiyyagcha. <sup>28</sup> Isunga as nan manglopašak ay mangamong ya mangipurang as nan siping kan chicha, munligwataku ay umuy ad Espanya, at chumag-osak hesa. <sup>29</sup> As nan omaliyak hesa, ammok ay mapachasanyu us nan maid munkurangana ay bendisyon ay murpu kan Cristo.

<sup>30</sup> Iib-ak, babaen kan Apo takú ay Jesu Cristo ya babaen us as nan layad takú ay ichat nan Espiritu Santo, pangaasiyu ta epapasnekyu ay makekararag kan ha-un ta fiadfiadnganak kan Apo Dios. <sup>31</sup> O, epapasnekyu ay mangekararag kan ha-un ta mailisiyak as nan chiyucha achi omafurot ad Judea. Ekararagyu us ta malaylaychan nan tatakon Apo Dios ad Jerusalem ay mang-awat as nan fiachang ay iyuyku kan chicha.<sup>†</sup> <sup>32</sup> Pangaasiyu ta ekararakianak ta omongortu nan lagsakku ay omali kan

‡ **15:19** Ara. 20:1-12    § **15:20** As nan kali ay Griego at kanana, “ta achiyak muntuping as pugnад nan tapina.”    \* **15:21** Isa. 52:15    † **15:31** Ara. 13:50; 14:19; 17:5, 13; 18:6, 12; 20:3; 21:27-32

chakayu mu eparufus Apo Dios, ya pumigsa nan numnumku as nan oma-liyak kan chakayu. <sup>33</sup> Sapay koma ta hi Apo Dios ay umid-ichat as natalna ay numnum at mawawacha kan chakayu am-in. Amen.

## 16

### *Nan Pakomostan Pablo As Nan Omaafurot Ad Roma*

<sup>1</sup> Malaylaychanak paat ay mangiyam-ammu kan chakayu as nan usa ay fiafiai ay omaafurot. Hiya hi Febe ay munserserfi as nan iglesia ad Cencrea. <sup>2</sup> As nan umchanana hesa, awatunyu hiya as usa ay omaafurot kan Apo Jesus, tay hiyasa nan libfeng ay atun nan tatakon Apo Dios. Fiadnganyu us hiya mu wachay kasaporana, tay ongorcha kayman chi finadfiadngana, ya ha-un nan usa.

<sup>3</sup> Pakomostaok cha Priscila kan Akila ay kakadwak ay munserserfi kan Cristo Jesus. <sup>4</sup> Enpostacha kayman nan fiyagcha kiapú kan ha-un. Ngem fiakun yangkiay ha-un nan munyaman kan chicha mu achi us nan am-in ay iglesia henan il-ilen chi Gentil. <sup>5</sup> Pakomostaok us nan iglesia ay munchaychayaw kan Apo Dios as afongcha.

Pakomostaok us hi Epeneto ay laylaychok ay hiya nan enmon-oná ay enmafurot kan Cristo henan probinsiya ay Asia. <sup>6</sup> Pakomostaok us hi Maria ay kenmakud ay namadfiachang kan chakayu. <sup>7</sup> Pakomostaok pay cha Andronico kan Junia ay ib-ak ay Judio ay kakadwak ay naifiarud ad kasin. Am-ammon as solet nan apostoles chicha ya enmon-onacha ay enmafurot kan Cristo mu ha-un.

<sup>8</sup> Pakomostaok us hi Ampliato ay laylaychok ay kiayyumku kiapú as nan nakius-usaana kan Apo Jesus. <sup>9</sup> Pakomostaok us hi Urbano ay cha makid-kidnu kan chitaku ay munserserfi kan Cristo, ya hi Estakis ay laylaychok ay kiayyumku. <sup>10</sup> Pakomostaok us hi Apeles ay usa ay napaneknekan ay matalek kan Cristo as nan nachischistingan nan pammartinia. Uray us nan pamilyan Aristobulo, <sup>11</sup> ya hi Herodion ay pachongku ay Judio ya nan chiyucha omaafurot as nan pamilyan Narciso at komostacha am-in.

<sup>12</sup> Pakomostaok us cha Trifena kan Trifosa ay cha munserserfi kan Apo Jesus, kaman us kan Persida ay laylaychok ay kiayyum ay makakud kay-man ay munserserfi para kan Apo Jesus. <sup>13</sup> Pakomostaok us hi Rufo, ay nunchinngor ay munserserfi kan Apo Jesus, ya uray hi enana ay inflangku as enak. <sup>14</sup> Pakomostaok us cha Asincrito, Flegonte, Hermes, Patrobas, Hermas ya am-in ay tapina ay iib-a takú ay omaafurot ay naetatapi kan chicha. <sup>15</sup> Pakomostaok pay cha Filologo kan Julia, hi Nereo, ya nan sunúndna ay fiafiai ya hi Olimpas, ya am-in ay tatakon Apo Dios ay naetatapi kan chicha.

<sup>16</sup> Munpepennakomosta kayu us ay mangepaila ay munlelennayad kayu. Am-in nan enmafurot kan Cristo at chacha kayu pakomostaun hesa.

### *Nan Anongos Ay Tukun Pablo*

<sup>17</sup> Chakayu ay iib-a, pangaasiyu ta il-ilaunyu nan tataku ay mangepasisiyu kan chakayu ya mangallilaw as pammatiyu babaen as nan isur-surucha ay maekontra as nan ustu ay sinuruyu ad kasin. Achi kayu makekadkadwa kan chicha. <sup>18</sup> Tay nan assisid-i ay tataku at fiakun hi Cristo ay Apo takú nan chacha munserserfiyan, ngem kun at nan kiankianasan nan achorcha yangkiay nan nunumnumunucha. Babaen as nan makaawis ya ammay ay kalicha, allilawuncha nan chiyucha naraka ay maawis. <sup>19</sup> Nunchinngor nan nanongtongparanyu as nan sursuron Cristo uray henan

chiyuycha achawwi ay il-ili. Isunga naragsakak as solet kiapú kan chakayu, ngem laychok ay naraing kayu maepangkep as nan ammay, ya achi kayu masulisukian ay mangekaman as mangotettet. <sup>20</sup> Kun pay achi mafiyag, hi Apo Dios ay umid-ichat as talna at amisunantu hi Sátanas babaen kan chakayu.

Sapay koma ta mawawacha kan chakayu am-in nan grasyan Apo Jesu Cristo.

<sup>21</sup> Hi Timoteo ay cha makidkidnu kan ha-un at chana us pakomostaun chakayu, kaman us as nan iib-ak ay Judio ay cha Lucio, Jason ya hi Sosipatro.

<sup>22</sup> Hi Tercio ay ifia takú ay omaafurot ay nangepasuratak as nan nauy ay suratku at chana pakomostaun chakayu.

<sup>23</sup> Cha chakayu pakomostaun kan Gayo. Hiya nan nunmangmangili kan ha-un, ya hiya nan nakin afong as nan cha maam-amongan nan omaafurot ay munchaychayaw kan Apo Dios. O iwa, uray hi Erasto ay toserero hena ay siyudad ya hi Cuarto ay ifia takú at cha chakayu pakomostaun.

<sup>24</sup> [Sapay koma ta mawawacha kan chakayu am-in nan grasyan Apo takú ay Jesu Cristo.]\*

#### *Nan Nanayawan Pablo Kan Apo Dios*

<sup>25</sup> Machaychayaw hi Apo Dios! Hiya at kafiaelana ay mangepapigsa as nan pammatiyu ay maiyunud as nan enkaskasabak ay Ammay ay Chamag maepangkep kan Jesu Cristo ya maiyunud as nan chaan naepakpakaammu ad solet ay kenatit-iwa. <sup>26</sup> Ngem ad wani at naepakaammu nan nauy kenatitiwa babaen as nan chiyuycha insurat nan chiyuycha pomapadtu as nan Kalen Apo Dios. Tay hi Apo Dios ay maid laplapuna ya maid patingkiana at infilina ay maepakaammu nan nauy Ammay ay Chamag henan am-in ay nasyon ta nan am-in ay tataku at omafurotcha.

<sup>27</sup> Hiya yangkiay ay masilib as nan am-in at maichaychayaw koma inkiana babaen kan Jesu Cristo. Amen.

---

\* **16:24** As nan tapen nan manuskritu as nan kali ay Griego at maid na ay versikulu.

## Nan Omona Ay Surat Pablo As Nan Chiyuycha I-Corinto Nan Omona Ay Ammuwun

Nan Corinto as nan timpon Pablo at ad-acha ay siyudad ay sikud ay lutan nan chiyuycha Griego ya kapital nan probinsiya ay Acaya. Nan hana ay siyudad ay Corinto at wacha henan olet nan fiayfiay, isunga hesa nan masisib-atan chi ongor ay nigosyante ay nurpu henan tukutukún ay lukiar. Nunchinngor sa ay siyudad kiapú as nan kenafiaknang nan tataku, kiapú as nan nunsidla ay mangepapasancha as assi ay lachok, mangchay-chayawancha as tukutukún ay didiosen, ya mangischaancha as nan karnen nan chiyuycha naichaton as nan chiyuycha didiosen. Nunkapangascha pay, ya as nan nunsidla'y lagragsak yangkiay nan mangosarancha as urascha.

As nan maekdawa ay nunfiaatan Pablo ay uy nangekaskasaba as nan Ammay ay Chamag, inumchan henan nauy ay siyudad ay Corinto. Nagyan hiya hena as hentawwun ya kakudwa. As nan nun-is-isuruwana hena, ongor nan tataku ay enmafurot kan Cristo Jesus, kaskasin nan chiyuycha Gentil (Ara. 18:1-18).

As nan nak-akan Pablo hid-i ay umuy ad Efeso, wachacha nan tukún ay uy nun-isuru kan chicha. Nan usa kan chicha at hi Apolos ay usa ay omaafurot ay nurpu ad Egipto. Hi Apolos ay anna at masilib ya napigsa nan pammatina. Nafiyag ay nagyan hi Apolos hid-i ay nangisursuru as nan Kalen Apo Dios (Ara. 18:26-28; 1 Co. 3:4, 16:12; Tit. 3:13).

As nan kawad-an Pablo ad Efeso, wachacha nan i-Corinto ay enmali kan hiya (16:17-18) ay nangichat as surat ay nurpu as nan omaafurot ad Corinto. As nan nang-awatan Pablo as nan surat, sinufialetana nan suratcha. Hiyana nan omona ay suratna as nan chiyuycha i-Corinto.

As nan mamasaan takú as nan nauy surat, ongor nan maila takú ay achi laychun Pablo kan chicha ay kaman as nan nauyucha: nan achicha mamfigikian as nan kalibfengan Pablo as usa ay apostol (9:2), nan nangepfialinancha as achorcha as kaamuchan (4:8), nan mangifilangan-chha as nan panagnumnumnumcha as ustу, ya nan mangaliyancha ay chicha nan etortoróng nan Espiritu Santo, ngem para kan Pablo at fiakun.

Ngem laraychun Pablo ay mangisuru kan chicha as nan maepangkep as nan kenaornoscha as nan maam-amongancha ay mangchayaw kan Apo Dios. Senengarana chicha kiapú as nan masusumaancha (1:10-13) ya ke-naranokcha as nan manganancha as nan mangnumnumnumancha as nan natuyan Jesus (11:18-34). Insuruwana us chicha as nan maepangkep as nan kasin omaliyan Apo Jesus asna's luta ya maepangkep as nan matakawan manipud as nan utúy.

### **Nan Nakudkudwaan Nan Nauy Surat**

Nan Laplapon Nan Surat 1:1-9

Nan Nasusumaancha As Nan Iglesia 1:10-4:21

Nan Maepangkep As Nan Mangepapasán As Assi Ay Lachok 5:1-5:13

Nan Maepangkep As Charum As Nan Chiyuycha Omaafurot 6:1-11

Nan Ustu Ay Sursuru Maepangkep As Nan Áchor Chi Taku 6:12-20

Nan Sarudsud Maepangkep As Nan Omasaw-an Ya Achi Omasaw-an 7:1-40

Nan Sarudsud Maepangkep As Makan Ay Naichaton As Nan Chiyuycha Didiosen 8:1-11:1

Nan Dalongdong Nan Fianafiai As Nan Munchaychayawancha 11:2-16  
 Nan Mangnumnumnum As Nan Natuyan Jesus 11:17-34  
 Nan Chiyuycha Kafiaelan Ay Ichat Nan Espiritu Santo 12:1-14:40  
 Nan Matakuwantu Nan Nunkatuy 15:1-58  
 Nan Maifiachang As Nan Omaafurot 16:1-4  
 Nan Planon Pablo 16:5-12  
 Nan Anongos Nan Surat 16:13-24

### *Nan Laplapon Nan Surat*

<sup>1</sup> Ha-un hi Pablo ay chinutokan Cristo Jesus as apostolna kiapú ta hiyasa nan enkeddeng Apo Dios. Hi Sostenes ay ifia takú ay omaafurot at hiya nan kadwak hena.

<sup>2</sup> Nauy nan suratmi kan chakayu ay iglesia ad Corinto ay nunfialinun Apo Dios as nasantowan kiapú as nan nakius-usaanyu kan Cristo Jesus. Fiakun chakayu yangkiay nan enayakiana ay munfialin as nasantowan ay tatakuna, ngem am-in ay tataku henan am-in ay lukiar ay munchaychayaw kan Apo Jesu Cristo ay Apocha ya Apo takú us.

<sup>3</sup> Sapay koma ta mawawacha kan chakayu nan grasya ya nan natalna ay numnum ay nurpu kan Apo Dios ay Ama takú ya kan Apo Jesu Cristo.

### *Nan Nunnyamanan Pablo Kan Apo Dios*

<sup>4</sup> Kanayonak ay munyaman kan Apo Dios kiapú as nan grasya ay inchatna kan chakayu as nan nakius-usaanyu kan Cristo Jesus. <sup>5</sup> O, kiapú as nan nakius-usaanyu kan hiya, nabendisyonan kayu as solet as nan am-in ay karasen chi naespirituwan ay kafiaelan ta mafialin kayu ay munserfi kan hiya. Inchatna kan chakayu nan laingyu ay munkali as nan kalen Apo Dios ya pannakaawatyu as nan kenatit-iwa as nan laychun Apo Dios. <sup>6</sup> Nan nauycha bendisyon at paneknekancha ay tit-iwa challu nan insursurumi maepangkep kan Cristo. <sup>7</sup> Isunga maid poros munkuranganyu as nan uray ngachana ay naespirituwan ay bendisyon ay ichat Apo Dios as nan chayu manman-uchan as nan kasin omaliyan Apo takú ay Jesu Cristo. <sup>8</sup> Hiya nan mangepapapigsa as nan pammatiyu inkiana as nan anongos nan fiyagyu ta maid maepafiasoranyu as nan urkiw ay kasina omaliyan. <sup>9</sup> Matalek hi Apo Dios ay nangayag kan chakayu ta makekadwa kayu as nan Anakna ay hi Jesu Cristo ay Apo takú.

### *Nan Achi Muntetennornosan Nan Iglesia*

<sup>10</sup> Iib-ak, babaen as nan kalibfengan ay inchat Apo takú ay Jesu Cristo kan ha-un, pangaasiyu ta muntetennornos kayu am-in. Maid koma masisiyan kan chakayu, ngem kun at us-usa nan numnumunyu ya pangkepyu. <sup>11</sup> Iib-ak, kenalek chi, tay wachacha as nan pamilyan Kloë nañ nangepachamag kan ha-un ay wachacha kan chakayu nan cha masusuma. <sup>12</sup> Nan laychok ay kanan at tukutukún nan chayu kankanan. Tay wachacha kanu nan mangali, “Ha-un at unuchok hi Pablo.” Kanan kanu nan tapina, “Ha-un at unuchok hi Apolos.” Nan tapina at kanancha, “Ha-un at unuchok hi Pedro.” Kun pay nan tapina at kanancha, “Ha-un at hi Cristo yangkiay nan unuchok.” <sup>13</sup> Nakkuran kayu! Ay kun nakudwakudwa hi Cristo? Ay kun ha-un ay Pablo nan natuy as nan koros para kan chakayu? Ay nafunyakian kayu ay nangosar as nan ngachan Pablo?

<sup>14</sup> Munyamanak kan Apo Dios, tay maid ok finunyakian hesa mu achi yangkiay cha Crispo kan Gayo\* <sup>15</sup> ta maid makafiael ay mangali un nafun-

\* <sup>1:14</sup> Ara. 18:8; Rom. 16:23

yakian kayu as nan ngachanku. <sup>16</sup>(O iwa, finunyakiak us nan pamilyan Estefanas, ngem maid tapina as manumnumku ay finunyakiak.) <sup>17</sup>Tay chaanak infiaor kan Cristo ay uy munfunyag, ngem infiaorak ay uy mangekasaba as nan Ammay ay Chamag. As nan mangekamanak as na, achiyak mun-osar as kenasilib chi taku ta achi mamaid nan pannakafialin nan natuyan Cristo as nan koros.

### *Hi Cristo Nan Mangepaila As Nan Pannakafialin Ya Kenasilib Apo Dios*

<sup>18</sup>Tay nan Ammay ay Chamag maepangkep as nan natuyan Cristo as nan koros at maid kotkotokna as nan chiyuycha cha umuy as nan maid patingkiana ay pannakachusa. Ngem chitaku ay cha omafurot as nan hana Ammay ay Chamag at ammu takú ay hiyana nan pannakafialin Apo Dios ay mangesarakan kan chitaku. <sup>19</sup>Tay wacha nan naisurat as nan Kalen Apo Dios ay kanana,  
“Chachaelok nan kenasilib nan nunkasilib, ya nan pannakaawat nan

nunkaacharan at maichok.”<sup>†</sup>

<sup>20</sup>Ay mafialin ay maesarkan nan masilib babaen as nan silihna, winnu nan mun-isursuru as Lintig babaen as nan Lintig? Nan naraing ngay ay makesososek ad wani, ay mafialin ay maesarkan babaen as nan ammay ay sosekna? Achi challu! Tay enpailan met Apo Dios ay maid kotkotok nan kenasilib asna's luta!

<sup>21</sup>Tay kiapú as nan kenasilib Apo Dios, achi poros mafialin ay maam-muwani chi tataku hiya babaen as nan mismu ay kenasilibcha. Kun at nalaylaychan hi Apo Dios ay mangesarakan as nan chiyuycha omafurot babaen as nan chami ekaskasaba ay kanan nan chiyuycha achi omafurot un maid kotkotokna. <sup>22</sup>Tay nan chiyuycha Judio at achicha omafurot sukúdcha ilaua on-oná nan nakaskaschaaw ay sinyar. Nan chiyuycha Griego at anapuncha nan kanancha un kenasilib ay nurpu as nan tataku. <sup>23</sup>Ngem chakami at ekasabami nan maepangkep kan Cristo ay naelansa as nan koros. Hiyasa nan elalayusan nan chiyuycha Judio ay mangesakiaw kan chicha ya ifilang nan chiyuycha Gentil as maid kotkotokna. <sup>24</sup>Ngem para kan chitaku ay enayakian Apo Dios ay munfialin as tatakuna, uray Judio winnu Griego at ammu takú ay hi Cristo nan pannakafialin Apo Dios ya kenasilib Apo Dios. <sup>25</sup>Tay nan kanancha ay kenamaid kotkotok nan planon Apo Dios as nan natuyan Cristo at masilsilib mu nan kenasilib chi tataku, ya nan kanancha un kenakapuy nan planon Apo Dios at mannakafialin as solet mu nan kenaifikas chi taku.

<sup>26</sup>Iib-ak, numnumunyu mu anan kasasaadyu as nan nangayakian chakayu kan Apo Dios. As nan hiyachi, achi ongor kan chakayu nan mamasilib as nan mangilan chi tataku, ya ak-akét kayu ay totoray winnu an-ak chi fiaknang. <sup>27</sup>Ngem nan maid acharna ay maifilang challu as maid kotkotokna as nan tataku asna's luta at pinilen Apo Dios ta mafialinan nan mamasilib. Nan chiyuycha achi mafifigfig ay nakapuy at pinilina ta mafialinan nan chiyuycha mafifigfig ay mafikas. <sup>28</sup>Kaman us as nan chiyuycha pugli ay maelalayusan ya maid filangcha at pinilina ta maichuna nan ifilang nan tataku as am-amud asna's luta. <sup>29</sup>Enatna chi ta maid poros mangepangas as achorna as nan mangilan Apo Dios. <sup>30</sup>Maid epangasyu, tay hi Apo Dios nan nurpuwan nan nakius-usaanyu kan Cristo Jesus, ya nunfialinuna hi Cristo as mangesarakan kan chitaku ay hiyana nan kenasilib Apo Dios para kan chitaku. Babaen kan hiya, maifilang takú as nalintig,

<sup>†</sup> 1:19 Isa. 29:14

munfialin takú as nasantowan ay tatakon Apo Dios, ya mawayawayaan takú. <sup>31</sup> Isunga unuchun takú koma nan naisurat as nan Kalen Apo Dios ay kanana, “Mu wachay munlayad ay munpangas, nan enat nan Apo yangkiy nan masapor epangasna.”†

## 2

### *Nan Atun Pablo Ay Mun-ekasaba*

<sup>1</sup>Iib-ak, as nan enmaliyak kan chakayu ay nangekasaba as nan empakaammon Apo Dios ay maepangkep kan Cristo, chaanak nunkali as nunkaunig winnu nun-osar as kenasilib nan chiyuycha nakaachar. <sup>2</sup>Tay as nan kawadak pay laing kan chakayu, enkeddengku ay maid tukún as epakaammok mu achi yangkiy nan maepangkep kan Jesu Cristo, kaskasin nan naelansaana as nan koros. <sup>3</sup>As nan enmona ay enmaliyak kan chakayu, nakapuy nan leknak ya nunpapayagpakiak kiapú as ugyatku mu acheck maekaman nan laychun Apo Dios. <sup>4</sup>As nan nun-isuruwak ya nun-ekasabaak kan chakayu, chaanku enosar nan chiyuycha makaawis ay kaly ay nurpu as nan kenasilib chi taku, ngem kun at naepaila nan pannakafialin nan Espiriton Apo Dios babaen as nan enkaskasabak. <sup>5</sup>Hiyasa nan enatku ta nan pammatiyu at achi maifisar as nan kenasilib chi taku, ngem kun at as nan pannakafialin Apo Dios.

### *Nan Kenasilib Ay Nurpu Kan Apo Dios*

<sup>6</sup>Uray mu assid-i, as nan chiyuycha naonngan chi pammaticha at ifiakiami kan chicha nan maepangkep as kenasilib. Ngem fiakun nan kenasilib ad wani ay murpu as nan numnum chi tataku winnu murpu as nan anap-apu asna's luta ay munpattingkiantuy toraycha. <sup>7</sup>Kun at nan chami ifiagfiakia at nan kenasilib ay nurpu kan Apo Dios ay hiyasa nan planuna ay chaan pay naepakpakaammu as nan tataku. Nan hana planuna at enkekeddengna sakbay mafiyang nan lufong para kan chitaku ta maetapi takú kan hiya as nan kaichayawana. <sup>8</sup>Maid nakaawat ay anap-apu asna's luta as nan nauy kenasilib Apo Dios, tay mu kuncha naawatan, chaancha koma enlansa nan machaychayaw ay Apo as nan koros. <sup>9</sup>Ngem kaman sa as nan naisurat as nan Kalen Apo Dios ad pus-uy ay kanana,

“Maid pay tataku as nakaila winnu nakadgor winnu uray nakanumnum as nan chiyuycha nakaskaschaaw ay ensakianan Apo Dios para as nan chiyuycha munlarayad kan hiya.”†

<sup>10</sup>Ngem kan chitaku nan nangepakammuwan Apo Dios as nan hana babaen as nan Espirituna. Tay nan Espiriton Apo Dios at chana emamad ay mangammu as nan am-in uray nan naunig ay numnum Apo Dios.

<sup>11</sup>Maid nangammu as nan wacha as nan numnum nan usa ay taku mu achi hiya yangkiy mismu. Assid-i us kan Apo Dios ay maid nangammu as nan numnumna mu achi yangkiy nan Espirituna. <sup>12</sup>Ad wani, nan panagnumnumnum takú at fiakun kaman as nan panagnumnumnum chi tataku ay wacha asna's luta, tay enawat takú nan Espiritu ay nurpu kan Apo Dios ta maawatan takú nan maepangkep as nan am-in ay inchatna kan chitaku.

<sup>13</sup>As nan mangifiag-anmi as maepangkep kan Apo Dios, achimi osarun nan kali ay nurpu as nan kenasilib chi taku. Ngem kun at nan ifiakiami at nan insuron nan Espiriton Apo Dios kan chakami as nan chami

‡ 1:31 Jer. 9:24; 2 Co. 10:17

\* 2:2 Gal. 6:14

† 2:9 Isa. 64:4

mangepakaawatan as nan kenatit-iwa as nan tataku ay wacha nan Espiritu Santo kan chicha. <sup>14</sup> Nan taku ay maid Espiriton Apo Dios kan hiya at achina mafialin ay awutun nan chiyuycha nurpu as nan Espiriton Apo Dios, tay maid kotkotok nan hanacha kan hiya. Achi makaawat hiya, tay babaen as nan Espiritu Santo yangkiay at mafialina ay emamad chasa. <sup>15</sup> Nan taku ay mawawad-an as Espiriton Apo Dios at mafialina ay emamad nan kotok nan am-in ay nurpu as nan Espiriton Apo Dios. Ngem nan taku ay maid Espiriton Apo Dios kan hiya at achina kafiaelan ay mangokóm as nan taku ay nawad-an as Espiritu Santo. <sup>16</sup> Tay kanan nan naisurat as nan kalen Apo Dios, "Ay wachay nangammu as nan numnum Apo Dios? Ay wachay makatukun kan hiya?"‡

Ngem mu chitaku, wacha kan chitaku nan numnum Cristo.

### 3

#### *Nan Atun Ay Munserfi Kan Apo Dios*

<sup>1</sup> Iib-ak, as nan kawad-ak kan chakayu, chaanku kenafiaelan ay nunkali kan chakayu ay kaman as nan enatku as nan chiyuycha naonngan chi pammaticha. Ngem kunak at nunkali kan chakayu ay kaman as nan atok ay munkali as nan chiyuycha chaan enmafurot ya kaman mutun as nan pammaticha kan Cristo. <sup>2</sup> Nan insurok kan chakayu at nan maepachong as nan kiatas ay ikopun chi mutun, fiakun nan maepachong as nan foras ay makan, tay chaankayu pay nakasakiana ay makaawat as naunig ay sursuru. Uray ad wani at achi kayu pay laing makaawat, <sup>3</sup> tay kutug ay chayu ununuchun nan cha at-atun nan chiyuycha chaan enmafurot. Kiapú ta muneennapos kayu ya masussusuma kayu, ay kunyu achi cha epaila ay nan panagfiyagyu at pachong nan panagfiyag chi tataku asna's luta? Ay nan chayu at-atun at pachong nan cha at-atun nan chiyuycha achi omaafurot? Pachong na met! <sup>4</sup> Tay mu kanan nan usa ay, "Ha-un at hi Pablo nan unuchok," ya kanan nan usa, "Ha-un at hi Apolos nan unuchok," chayu epaila ay maepachong nan panagfiyagyu as nan tataku ay achi omaafurot.

<sup>5</sup> Numnumunyu na. Ay am-amud kami kan Apolos? Kun kami met yangkiay munserserfi kan Apo Dios ay enosarna ta omafurot kayu kan Jesus. Tay tunggal usa kan chakami at atuna nan naetalek kan hiya. <sup>6</sup> Maepachongak as nan nangetanum as fokel, hi Apolos nan nangsifug, ngem hi Apo Dios nan nangsikun. <sup>7</sup> Isunga achi challu amud nan nangtanum ya nangsifug. Hi Apo Dios yangkiay nan amud, tay hiya nan manikun. <sup>8</sup> Mumpachong nan pangkep nan muntanum ya nan munsifug, tay waschi un gun-gunaan Apo Dios ay maiyunud as nan mismu ay enatna. <sup>9</sup> Tay chakami at munserserfi kami kan Apo Dios, ya chakayu nan maepachong as nan payyiwna ay munchunchunuwanmi.

#### *Nan Maepadpachongan Nan Afong Apo Dios*

Maepachong kayu us as nan afong Apo Dios. <sup>10</sup> Babaen as nan kafiaelan ay inchat Apo Dios kan ha-un, ha-un nan maepachong as nan naraing ay nangkiaub as nan fondasyon nan afong, ya tukún nan mangituruy as nan lenapuwak. Ngem masapor waschiwaschi un ilauna nan ammaana ta ustuuustu nan etapina, <sup>11</sup> tay maid tukún as fondasyon ay mafialin ay osarun chi uray ngachana ay taku mu achi yangkiay nan chakus nakiaub ay hi Jesu Cristo. <sup>12</sup> Ngem nan chiyuycha mangiyamma at tukutukún nan

‡ <sup>2:16</sup> Isa. 40:13; Rom. 11:34-36

iyosoncha as nan fondasyon. Nan tapen nan maiyamma at fialetok, silver winnu nunkangina ay fiatu, ya nan tapina at kaiw, koron winnu chakiами. <sup>13</sup> Nan chunon nan tunggal usa at mailantu ay ustу. Tay as nan urkiw ay maokomántu nan am-in ay tataku, elawlawagtu Cristo chasa ay ustу. O, tay as nan hana ay urkiw, maepakaammuntu chasa babaen as nan apuy ay manisting as nan kenafiakud nan chunon nan tunggal usa. <sup>14</sup> Mu achi mapuoran nan inyamman nan nangiyamma as nan fondasyon at ichattu Apo Dios kan hiya nan gun-gunana. <sup>15</sup> Mu mapuoran nan naiyamma at maidtu awatun nan nangiyamma as gun-gunana. Ngem uray mu assesa, maesarakantu hiya ay maepachong as nan taku ay kun lenmayaw as nan cha mapuoran ay afong.

<sup>16</sup> Ay achiyu ammu ay chakayu nan maepachong as nan templo ay kawadan Apo Dios ya magyanan nan Espirituna? <sup>17</sup> Mu wachay mangepasisiyan kan chakayu ay maepachong as nan templon Apo Dios, chusauntu Apo Dios as solet hiya. Tay nan templon Apo Dios at nasantowan, ya chakayu mismu nan templona.

<sup>18</sup> Achiyu al-allilawun nan achoryu. Mu wachay mangifilang as achorna as masilib ay maiyunud as nan kenasilib nan tataku asna's luta, masapor chukkiana na. O, masapor eparufusna ay ifilang nan chiyuycha achi omaafurot hiya as maid am-ammuna ta sumilib hiya tit-iwa. <sup>19</sup> Tay nan kenasilib ay ifilang nan tataku asna's luta at maid kotkotokna as nan mangilan Apo Dios. O, nan nauy at kaman as nan naisurat as nan Kalen Apo Dios ay kanana, "Hi Apo Dios nan mangkona as nan chiyuycha mangifilang as achorcha as masilib babaen as nan mismu ay kenasikapcha."\* <sup>20</sup> Wacha pay nan naisurat as nan Kalen Apo Dios ay kanana, "Ammon Apo Dios ay maid kotkotok nan panagnumnumnum nan chiyuycha nunkasikap."†

<sup>21</sup> Isunga achiyu epangpangas chi maekaman chi taku. Tay nan am-in at inchat Apo Dios para as nan omammayanyu. <sup>22</sup> Uray ha-un, hi Apolos, hi Pedro, nan nauy luta, nan fiyag, nan utúy, nan urkiw ad wani winnu nan tapen chi urkiw at inchat Apo Dios am-in chaná para as nan omammayanyu.

<sup>23</sup> Kun pay chakayu at kuwan Cristo, ya hi Cristo at kuwan Apo Dios.

## 4

### Nan Panagserserfen Nan Apostoles

<sup>1</sup> Isunga ifilangyu chakami as munserserfi kan Cristo ya nangetalekan Apo Dios as nan chunu ay mangisuru as nan kenatit-iwa ay chaana en-pakpakaammu ad pus-uy. <sup>2</sup> Nan usa pay at nan taku ay maetalekan nan hana ay chunu at masapor matalek. <sup>3</sup> Ngem kun pay ha-un, maid fiyangku mu fistikiarunak kan chakayu winnu nan tapina ay tataku mu ammay nan chak at-atun ay munchunu winnu achi. Uray ha-un at acheck atun sa as nan achorku. <sup>4</sup> Nacharos challu nan numnumku, ngem achina laychun ay kanan un maid fiasorku, tay hi Apo Jesus yangkiay nan mamistikiar kan ha-un. <sup>5</sup> Isunga achiyu oon-onaua ay mangokóm as nan uray ngachana ay taku sakbay omali nan ustу ay timpu. Sad-unyu nan omaliyan nan Apo ay hiyantu nan manilaw as nan chiyuycha naetatafun as nan ngongot. Nan laychuna ay kanan at epailanantu nan chiyuycha chaan pay naifiakia ay pangkep chi

\* <sup>3:19</sup> Job 5:13    † <sup>3:20</sup> Sal. 94:11

tataku. As nan hiyachi, waschintu un awatuna nan pammachayaw Apo Dios ay maiyunud as nan en-enatna.

<sup>6</sup> Iib-ak, am-in chaná ay infiafiakiak at chakami mismu kan Apolos nan enosarmi as nan chiyuycha maepadpachongan para as nan omammayanyu ta babaen kan chakami, acharunyu nan laychun ay kanan nan naisurat as nan Kalen Apo Dios ay kanana, "Achiyu labsingun nan naisurat as nan Kalen Apo Dios." Mu unuchunyu na, maid kan chakayu nan mangepangas as nan usa ay taku as nan tapina. <sup>7</sup> Tay anan ngachana nan nangepfialin kan chakayu as nangatngatu mu nan tapina? Ngachana nan wacha kan chakayu ay chaan inchat Apo Dios? Mu ngarud hi Apo Dios nan nangichat, anuy kayu lawá munpangpangas ay kaman chakayu nan nurpuwana?

<sup>8</sup> Kenomsaw kayu ay i-Corinto! Ka-ananyu mu napnek kayu as nan am-in ay naespirituwan ay fianag ya finmaknang kayu as nan chiyuycha bendisyon Apo Dios. Ka-ananyu mu nunfialin kayu as ar-ari, uray mu fiakun kami ar-ari! Ammay koma mu kun tit-iwa ay ar-ari kayu ta maketoray kami kan chakayu. <sup>9</sup> Tay as nan munnumnumnumku at nunfialinun Apo Dios chakami ay apostoles as maepachong as nan chiyuycha fiarud ay naepauchichi as nan paradan chi nangafia. O, maepachong kami as nan tataku ay nakeddengan ay matuy as nan sangwanan chi ongoongor ay tataku ta fuyaun nan angeles ya nan am-in ay tataku. <sup>10</sup> Kiapú as nan munserserfiyanmi kan Cristo, maid kanu am-ammumi asna's luta. Ngem chakayu at ka-ananyu mu mamasilib kayu kiapú as nan nakius-usaanyu kanu kan hiya. Chakami at maid kanu kafaelanmi, ngem chakayu at ka-ananyu mu kafaelanyu nan am-in. Chakayu kayman nan chaychayawun nan tataku, ngem os-ostuncha chakami. <sup>11</sup> Uray inkiana ad wani at kanayon kami ay munchukiaang ya masketan. Naragrag-uy chi fiachumi. Maparpali-wasan kami, ya kun kami munfiabfaat ay maid afongmi.\* <sup>12</sup> Makakud kami ay munchunu babaen as nan mismu ay limami ta wachay pagfiaygmi. As nan maituchoranmi, kunmi at bendisyonan chicha. As nan mapaliki-atananmi, etata-unmi. <sup>13</sup> As nan maekak-aliyanmi, ammay nan atunmi ay somongfiat. Uray inkiana ad wani at ifilang chakami as kaman fiasura. O, kaman kami luket asna's luta.

<sup>14</sup> Achek isurat chaná ta pafiaink chakayu, ngem ta tukunok chakayu as kaman mismu ay an-akku ay laylaychok. <sup>15</sup> Tay uray mu liniblifu nan mangay-aywan as nan fiaygu as nan nakius-usaanyu kan Cristo, kun us-usa challu nan pannakaamayu as nan pammati. Kiapú as nan enmafurotanyu kan Cristo Jesus, nunfialinak as amayu babaen as nan nangekasabaak as nan Ammay ay Chamag kan chakayu. <sup>16</sup> Isunga pangaasiyu ta ha-un nan turachunyu. <sup>17</sup> Hiyana nan kiapúna ay infiaorku hi Timoteo kan chakayu. Hiya nan usa ay ifilangku as laylaychok ay anakku ay matalek ay munchunu para kan Apo Jesus. Epanumnumnantu kan chakayu nan panagfiay ay chak un-unuchun babaen as nan pammatek kan Cristo Jesus ay maiyunud as nan chak isursuru as nan am-in ay iglesia henan am-in ay lukiar.

<sup>18</sup> Wacha kanu kan chakayu nan penmangas, tay ka-anancha un achiyak omali ay mangila kan chakayu hesa. <sup>19</sup> Ngem achi mafiayag at omaliyaktu hesa kan chakayu mu laychun nan Apo. As nan hiyachi, maammuwaktu mismu nan fiakun yangkiay nan cha ap-apatun nan nauycha nunkapangas, ngem maammuwaktu us mu tit-iwa ay wacha kan chicha nan pannakafialin Apo Dios. <sup>20</sup> Tay nan mangepaneknek ay naetapi takú henan muntorayan

\* <sup>4:11</sup> Ara. 16:23; 2 Co. 6:5; 11:23-33

Apo Dios at fiakun nan apat takú, ngem kun at nan pannakafialin Apo Dios as nan fiyang takú. <sup>21</sup> Isunga anan laychunu ay atok? Ay masapor omaliyak ay mangdisiplina kan chakayu babaen as nan saplet, winnu omaliyak ay mangepaila as layadku ya anosku kan chakayu?

## 5

### *Nan Mangaanan As Nan Omaafurot Ay Mangepappapas As Assi Ay Lachok*

<sup>1</sup> Tit-iwa ay naepachamag kan ha-un ay wacha kan chakayu nan nangepappapas as assi ay lachok. Nunsidla sa as enatna, tay uray nan chiyuycha achi omaafurot at achicha poros eparufus sa. O, naepachamag kan ha-un ay nakiskissuy nan usa ay omaafurot as nan maekadwa ay asawan amana. <sup>2</sup> Anuy kayu paat nunkapangas! Kun kayu at met koma ngumunguyus as solet, ya masapor kaanunuhiya as membron nan uyyu iglesia! <sup>3</sup> Tay uray mu maichak mismu hesa, kamanak wacha challu kan chakayu, ya chakusku at enkeddeng ay machusa nan hana taku babaen as nan kalibfengan ay inchat Apo takú ay hi Jesus kan ha-un. <sup>4</sup> As nan maamonganyu ya wacha kan chakayu nan pannakafialin Apo takú ay hi Jesus, ifilangyu ay kamanak makius-usa kan chakayu uray mu maichak hesa mismu. <sup>5</sup> Kaanunu nan laraki ay ansa, ya ipurangyu hiya kan Satanas ta palikiatun Satanas nan achorna. Tay mu assesa, munfiafiawi hiya, ya maesarakantu hiya as nan urkiw ay kasin omaliyan Apo Jesus.\*

<sup>6</sup> Mangisiw chi chayu epangpangas. Ay achiyu ammu ay uray kun akét ay lebadura at alisana nan am-in ay maekar-otana? <sup>7</sup> Kaman as nan mangaanan nan chiyuycha Judio as nan lukiak ay lebadura as nan Fiastan chi Munlausan, kaanunu nan hana laraki ta maid cha fumasfiasor kan chakayu. O, atunyu na ta munfialin kayu as kaman fiarú ay tenapay ay maid lebadurana. Nan laychuna ay kanan at maid kan chakayu nan mangekaman as mangotettet. Tay hi Cristo ay maepachong as nan kordero takú ay maichaton as nan Fiastan chi Munlausán at chakus naichaton ay manaros kan chitaku as nan fiasfiasor takú.† <sup>8</sup> Isunga as nan makifastaan takú as nan Fiastan chi Munlausan, kaanun takú koma nan am-in ay mangotettet ay pangkep ya cha atuatun ay maepachong as nan mangaanan nan chiyuycha Judio as nan lebadura as nan tenapaycha ay hiyasa nan inili ay ukialicha. Kun takú at makifiasta ay wachay kenaammay ya kenatit-iwa kan chitaku.

<sup>9</sup> Insuratku ad kasin kan chakayu ay achi kayu makekadkadwa as nan tataku ay mangepappapas as assi ay lachok. <sup>10</sup> Ngem nan laychok ay kanan at fiakun nan chiyuycha achi omaafurot ay mangepappapas as assi ay lachok winnu naakum winnu mangaakiw winnu munchaychayaw as didiosen. Tay mu chatud-i nan achiyu makekadkadwaan, masapor makak kayu asna's luta. <sup>11</sup> Nan laychok ay kanan as nan suratku at achi kayu makekadkadwa as nan uray ngachana ay mangali un omaafurot mu epappapasna nan assi ay lachok, naakum, munchaychayaw as didiosen, omekakkak-ali, futtang winnu mangaakiw. Uray as nan mangananyu at achi kayu makiub-ufong kan hiya.

<sup>12-13</sup> Tay as nan fiakun takú iib-a ay omaafurot, maid fiyang takú kan chicha. Hi Apo Dios nan mangokóm kan chicha. Ngem wacha challu nan kalibfenganyu ay mangokóm as nan chiyuycha mismu ay membro as nan uyyu iglesia. Tay wacha nan naisurat as nan Kalen Apo Dios ay kanana,

\* 5:5 1 Tim. 1:19-20

† 5:7 Exo. 12

“Kaanunyu nan mangotettet ay taku ay naetatapi kan chakayu.”‡

## 6

### *Nan Mangicharuman As Nan Ib-a Ay Omaafurot*

<sup>1</sup> Mu wachay usa kan chakayu ay mangicharum as nan pachongyu ay omaafurot, ay achi kayu mafiain ay nan mangenongnong as nan kasuyu at huwis ay achi omaafurot? Kun at met koma nan tatakon Apo Dios nan mangenongnong as nan kasuyu! <sup>2</sup> Ay achiyu poros ammu ay nan tatakon Apo Dios nan mangokómtu as nan tataku asna's luta? Mu hiyasa, ay kunyu achi maenongnong chi achi chagsun ay kasu?\* <sup>3</sup> Ay kunyu achi ammu ay chitakuntu nan mangokóm as nan anghelles? Mu hiyasa, ay achi takú kaskasin kafiaelan ay mangenongnong as nan maepangkep as nan chiyucha fianag as nan nauy ay fiyag? <sup>4</sup> Mu maepangkep ngarud as assesa ay kasu, anuy nan chiyucha achi ifilang nan iglesia as marispitu nan mangenongnong? <sup>5</sup> Nunsidla ay kafiaflain sa! Ay kun paat maid masilib kan chakayu ay mangaligu as kasuyu as nan pachongyu ay omaafurot? <sup>6</sup> Ngem kunyu at met icharum chi ifiayu as nan sangwanan nan chiyucha achi omaafurot ta chicha nan mangenongnong as nan kasuyu!

<sup>7</sup> Nan munchedichinnarumanyu at epailana ay chakus kayu at naamis. Ay achi un-unuya ay iliwasyu nan chacha ekamkaman ay achi nalintig kan chakayu? Ay achi un-unuya ay masator kayu? Un-unuya a! <sup>8</sup> Ngem kun at nan chayu at-atun at chakayu mismu nan mangekaman as achi nalintig ya satorunuy tataku, uray pay nan mismu ay ib-ayu ay omaafurot. <sup>9</sup> Ay achiyu ammu ay achi maetapi nan mangekamkaman as mangotettet henan muntorayan Apo Dios? Achi kayu munpappaallilaw. Nan chiyucha mangepappapas as assi ay lachok, munchedichayaw as didiosen, umiwet, bakla winnu tumboy, <sup>10</sup> mangaakiw, naaakum, futtang, omekakkak-ali winnu popomros at achicha poros maetapi henan muntorayan Apo Dios. <sup>11</sup> Ad kasing at assesesa nan en-enat nan tapina kan chakayu. Ngem ad wani at nacharasan kayu as nan fiasfiasoryu, nunfialin kayu as nasantowan ay tatakon Apo Dios, ya naifilang kayu as nalintig as nan mangilana. Am-in chaná ay naekaman at kiapú as nan nakius-usaanyu kan Apo Jesu Cristo ya kiapú as nan pannakafialin nan Espiriton Apo Dios takú.

### *Nan Mangosaran Takú As Nan Achor Takú As Nan Kaichayawan Apo Dios (Rom. 14:13-23; 1 Co. 8:7-13; 10:23-30)*

<sup>12</sup> Wacha nan mangali, “Am-in ay atok at maparufusanak.” Tit-iwa sa, ngem nan am-in at achi makafiachang. Uray kanak un maparufusanak ay mangekaman as nan am-in ay laychok, aches challu atun chi. Tay ha-un at achiyak munpaetoray as nan laylaychok.† <sup>13</sup> Wacha us nan mangali, “Nan makan at para as nan putu, ya nan putu at para as nan makan.” Tit-iwa sa, ngem as tapen chi urkiw, maichuntu Apo Dios chasa ay chuwa. Nan kaosaran nan achor at fiakun as nan mangepapas as assi ay lachok, ngem kun at as nan munserfiyan kan Apo Jesus, ya hi Apo Jesus at aywanana nan achor. <sup>14</sup> Hi Apo Dios ay nangtaku kan Apo Jesus manipud as nan utýu at hiya us nan mangtaku kan chitaku babaen as nan pannakafialina.

<sup>15</sup> Ay achiyu ammu ay naifilang takú ay omaafurot as parten nan achor Cristo? Ammuyu met. Ay mafialin ngarud ay etapi takú nan parten nan

‡ 5:12-13 Deut. 13:5; 17:7; 19:19; 22:21, 24; 24:7

\* 6:2 Dan. 7:22; Mat. 19:28; Luc. 22:28-30

† 6:12

achor Cristo as nan usa ay fiafiai ay mangepabpafiayad as achorna? Achi a! <sup>16</sup> Ay achiyu ammu ay nan laraki ay makissuy as nan assesia ay fiafiai at munfialinchia as usa ay achor? Tay kaman as nan naisurat as nan Kalen Apo Dios ay kanana, “Nan chuwa at munfialinchia as usa.”<sup>‡</sup> <sup>17</sup> Ngem nan maetapi kan Apo Jesus at makius-usa nan espiritu as nan espiriton Jesus.

<sup>18</sup> Achiyu poros epapas nan assi ay lachok. Nan am-in ay tapina ay fiasfiasor at fiakun nan achor nan chachaeluncha. Ngem nan taku ay mangepapas as assi ay lachok at chachaeluna nan mismu ay achorna. <sup>19</sup> Ay kunyu achi ammu ay nan achoryu at magyanan nan Espiritu Santo ay wacha at kan chakayu ay inchat Apo Dios? Fiakun chakayu nan nakin kuwa as nan achoryu ngem hi Apo Dios, <sup>20</sup> tay nangina nan namrak Apo Dios kan chakayu ta munfialin kayu as tatakuna. Isunga osarunyu nan achoryu ay munchayaw kan hiya.

## 7

### *Nan Sarudsud Maepangkep As Pannakeasawa*

<sup>1</sup> Ad wani, nauy nan songfiatku as nan sarudsudyu as nan suratyu:

Un-unuya mu achi makissuy nan usa ay laraki as nan usa ay fiafiai.\*

<sup>2</sup> Ngem kiapú ta ongor nan tataku ay cha mangepapas as assi ay lachok, un-unuya ay tunggal laraki ya fiafiai at waschi un wachay mismu ay asawana.

<sup>3</sup> Nan naasaw-an ay laraki at masapor atuna nan libfenguna kan asawana. Kaman us as nan naasaw-an ay fiafiai at masapor atuna nan libfenguna kan asawana ta mapnekcha ay chuwa. <sup>4</sup> Tay nan naasaw-an ay fiafiai at fiakun hiya yangkiay nan nakin kuwa as nan mismu ay achorna, ngem kuwan us asawana. Kaman us as nan naasaw-an ay laraki at fiakun hiya yangkiay nan nakin kuwa as nan mismu ay achorna, ngem kuwan us asawana.

<sup>5</sup> Achi kayu mun-en-ennachi as achoryu, omangkiay mu munturag kayu ay achi kayu munchor-ag ay massuy as kaat ay urkiw ta panagkararag nan epapasnekyu. Kun pay marpas, munchor-ag kayu kasin ta achi kayu masulisug kan Satanas kiapú as nan lachokyu ay achiyu maetporan.

<sup>6</sup> Ifiakiak na ta maammuwanyu ay eparufusku, ngem fiakun filin. <sup>7</sup> Nan laychok at kafiaelan koma nan am-in ay tataku ay achi omasawa ay kaman kan ha-un. Ngem uray mu hiyasa, achi mapapchong nan kafiaelan ay inchat Apo Dios as nan tunggal usa kan chitaku.

<sup>8</sup> Ad wani, chakayu ay maid asawana ya chakayu ay ellakas, kanak un un-unuya ay ituruyyu ay achi omasawa ay kaman kan ha-un. <sup>9</sup> Ngem mu achi kayu makaetpor as lachokyu, omasawa kayu ud-ay, tay un-unuya ay omasawa kayu mu nan iliwasyu nan achiyu mangpennekan as kenarachokyu.

<sup>10</sup> Kun pay kan chakayu ay naasaw-an, nauy nan ifiakiak kan chakayu ay fiakunku filin, ngem kun at filin Apo Jesus: Masapor achi iyichang nan fiafiai hi asawana.<sup>†</sup> <sup>11</sup> Ngem mu iyichangna hiya, masapor achi omasawa as tukún, mu achi kay at maketepon kan asawana. Kun pay nan laraki, masapor achina us iyichang hi asawana.

<sup>12</sup> As nan tapina, ha-un (o, ha-un, fiakun hi Apo Jesus) nan mangifiakia as na: Nan omaafurot ay laraki ay nangasawa as achi omaafurot, mu iyafud nan asawana ay mangituryu ay maketepon kan hiya, masapor achi iyichang nan laraki hi asawana. <sup>13</sup> Assesa us as nan omaafurot ay fiafiai ay

<sup>‡</sup> **6:16** Gen. 2:24; Efe. 5:31      \* **7:1** Winnu, “Un-unuya mu achi omasawa nan laraki.”

Mat. 5:31-32; 19:3-9; Mar. 10:2-12; Luc. 16:18

<sup>†</sup> **7:10**

nakeasawa as nan achi omaafurot, mu iyafud nan asawana ay mangituruy ay mangetepon kan hiya, masapor achi iyichang nan fiafiai hi asawana. <sup>14</sup> Tay nan naasaw-an ay laraki ay fiakun pay laing omaafurot at maifilang us as kuwan Apo Dios babaen as nan asawana ay omaafurot. Assesa us as nan naasaw-an ay fiafiai ay achi omaafurot ay nan asawana at omaafurot. Mu achi tit-iwa na, maifilang nan an-akcha as an-ak chi maid pammatina. Ngem nan kenatit-iwana at maifilangcha us as kuwan Apo Dios. <sup>15</sup> Ngem mu laychun nan achi omaafurot ay makiichang hiya kan asawana ay omaafurot, maeparufus sa. Mu hiyasa, mawayawayaan nan omaafurot ay asawa uray laraki winnu fiafiai as nan sikud ay karina. Uray mu hiyasa, enayakian Apo Dios chitaku ta mawad-an takú as natalna ay fiyag. <sup>16</sup> Tay he-a naasaw-an ay fiafiai winnu laraki ay omaafurot at achim ammu mu he-a ay nan mangepaafurottu kan asawam ta maesarkan.

### *Nan Kumukutukian As Nan Kasasaad*

<sup>17</sup> Waschi un masapor kumukutug as nan kasasaad ay enkeddeng Apo Dios para kan hiya. O, masapor kumukutug hiya as nan kasasaadna ay nangayakian Apo Dios kan hiya. Hiyana nan ifilinku as nan am-in ay iglesia. <sup>18</sup> Mu chakus nasugyanan chi laraki as nan nangayakian Apo Dios kan hiya, achina masapor esaot nan kasasaadna as nasugyanan. Winnu mu chaan nasugyanan hiya, achi masapor munpasugyat. <sup>19</sup> Tay maid kotkotokna kan Apo Dios nan nasugyanan winnu nan chaan. Ngem nan amud at nan manongtongparan as nan filfilin Apo Dios. <sup>20</sup> Isunga waschi un masapor kumukutug as nan kasasaadna ay nangayakian Apo Dios kan hiya. <sup>21</sup> Ay mafiabfiaorka as nan nangayakian Apo Dios kan he-a? Uray ud-ay. Ngem mu wachay chansam ay mawayawayaan, osarum sa. <sup>22</sup> Tay mu mafiabfiaorka as nan naayakianam ay maetapi kan Apo Jesus, nunfialinka as nawayawayaan as nan pannakafialin chi fiasor ta munserfika kan hiya. Assesa us ay mu fiakunka mafiabfiaor as nan nangayakian chaká kan Apo Dios, nunfialinka as kaman mafiabfiaor ay munserfi kan Cristo. <sup>23</sup> Nangina nan namrak Apo Dios kan chakayu ta munfialin kayu as tatakuna. Isunga achiyu eparparufus ay munfialin kayu as fiabfiaarun chi taku. <sup>24</sup> Iib-ak, ifiakiak kasin kan chakayu ay waschi un kumukutug ay makekadkadwa kan Apo Dios, ya kumukutug hiya as nan sikud ay kasasaadna as nan nangayakian Apo Dios kan hiya.

### *Nan Chiyuchya Maid Asawana Ya Nan Chiyuchya Ellakas*

<sup>25</sup> Ad wani, mu maepangkep as nan maid asawana, maid ifilinku ay nurpu kan Apo Jesus. Ngem ifiakiak nan wacha as numnumku, tay kiapú as nan sug-angna kan ha-un, nunfialinak as mafalinyu ay talekun.

<sup>26</sup> Kiapú as nan liglikiat ay cha om-ommat ad wani, as nan munnumnumku at un-unuya mu kun kayu kumukutug as nan kasasaadyu. <sup>27</sup> He-a ay laraki, ay wachay asawam? Mu wacha, achim iyichang. Ay maid asawam? Mu maid, achika mun-anap. <sup>28</sup> Ngem mu omasawaka, fiakun fiasor chi, ya mu omasawa nan fiafiai, fiakun fiasor chi. Ngem ifiakiak ay un-unuya mu achi kayu omasawa, tay achen laychun ay lak-amunyuntu nan liglikiat nan chiyuchya naasaw-an.

<sup>29</sup> Iib-ak, nan laychok ay kanan at akét yangkiay nan timpu ay nayagyag as nan omaliyantu Cristo. Isunga munlapu ad wani, nan chiyuchya naasaw-an at fiakun man paat nan as-awacha nan mangepapakud as nan munserfiyancha kan Apo Dios. <sup>30</sup> As nan chiyuchya mun-ag-akor ya chiyuchya

munlagragsak at fiakun koma nan ag-akor ya lagragsakcha nan mangepak-inak as nan munseriyancha kan Apo Dios. Assesa us as nan chiyuycha cha lomaklaku at fiakun koma nan lenakwancha nan mangepapakud as nan munseriyancha kan Apo Dios. <sup>31</sup> As nan chiyuycha cha mangos-osar as nan wacha asna's luta at fiakun koma chatona nan kanayon ay nunumnumun-cha. Tay nan panagfiyag ad wani asna's luta at achi kumukutug.

<sup>32</sup> Laychok ay maid munchanakianyu. Nan laraki ay maid asawana at mafialin ay nunumnumuna nan maepangkep as nan atuna ay munserfi ya mangepalaylayad as nan Apo. <sup>33</sup> Ngem nan wachay asawana at nunumnumuna nan maepangkep as nan fiyagcha ay hen-asawa asna's luta ya as nan atuna ay mangepalaylayad kan asawana. <sup>34</sup> Kun makukudwa nan numnumna. Assesa us as nan maid asawana ay en-ena<sup>†</sup> winnu fiarasang. Nunumnumuna nan atuna ay munserfi as nan Apo. Tay nan pangkepna at nasantowan hiya as nan achorna ya numnumna. Ngem nan fiafai ay wachay asawana at nunumnumuna nan maepangkep as nan fiyagcha ay hen-asawa asna's luta ya maepangkep as nan mangepalaylaychana kan asawana.

<sup>35</sup> Ifiakiak na para as nan omammayanyu. Achek epawa ay omasawa kayu. Ngem kun at nan laychok yangkiay at nalintig ya ustу nan fiyagyu, ya maid mangukudwa as nan atunyu ay munserfi as nan Apo.

<sup>36</sup> Mu numnumun nan usa ay laraki ay achi ustу nan planuna ay achi mangituruy ay mangasawa as nan fiafai ay chakus naetfor ay asaw-una, ya mu achina maetporan nan lachokna, ya mu numnumuna ay ustу ay omasawa hiya at masapor atuna nan laychuna. Fiakun fiasor chi. O, mafialincha ay mun-asawa. <sup>37</sup> Ngem mu achi munchuwachuwa nan laraki as nan numnumna ay achi omasawa ay maid us mangepelet kan hiya, ngem maetporana nan mismu ay laychuna, ya enkeddengna ay hiyasa nan ammay kan hiya, ustу sa as atuna. <sup>38</sup> Isunga ammay ay omasawa, ngem am-ammay mu achi omasawa.

<sup>39</sup> Mu maepangkep us as nan fiafai ay naasaw-an, achi mafialin ay mawayawayaan ay kasin omasawa mu kukutug ay matataku hi asawana. Ngem mu matuy hi asawana, mawayawayaan ay kasin omasawa as nan laychuna, ngem masapor omafurot nan asaw-una. <sup>40</sup> Ngem naragragsak hiya mu kumukutug hiya as nan kasasaadna. As nan munnunumnumku at nan Espiriton Apo Dios nan nangetoróng kan ha-un.

## 8

### *Nan Makan Ay Naichaton As Nan Chiyuycha Didiosen (Rom. 14:13-23; 1 Co. 6:12-20)*

<sup>1</sup> Nauy nan songfiatku as nan sarudsudyu maepangkep as nan makan ay maichaton as nan chiyuycha didiosen.

Ammu takú ay chitaku am-in at wachay pannakaammu takú maepangkep as na. Nan pannakaammu, munfialinuna nan taku as napangas, ngem mu layad nan wacha kan hiya, munfialinuna hiya as makafiachang as nan pachongna ay taku. <sup>2</sup> Nan taku ay as nan munnunumnumna at wachay

---

<sup>†</sup> **7:34** Winnu ellakas      <sup>§</sup> **7:36** Winnu, "mu numnumun nan usa ay ama ay achi ustу nan chana at-atan as nan fiarasang ay pototna, tay chaana penarufusan hiya ay omasawa, ya mu cha omen-ena nan fiarasang ay pototna ya mu numnumuna ay ustу ay omasawa hiya at masapor atuna nan laychuna. Masapor parufusana nan pototna ay omasawa. Fiakun fiasor chi."

ammuna, chana epaila ay maid pay laing ustу as ammunа. <sup>3</sup> Ngem nan taku ay manglayayad kan Apo Dios at figfikun Apo Dios hiya as takuna.

<sup>4</sup> Isunga, mu maepangkep as nan mangkakanan as nan makan ay naichaton as nan chiyuycha didiosen, ammu takú ay maid fiyag nan chiyuycha didiosen. Ammu takú met ay hi Apo Dios nan us-usa ay Dios. <sup>5</sup> Tay uray mu wachacha nan makali un dios ay wacha ad chaya winnu asna's luta, ya uray mu afurotun challu nan tataku nan nauyucha dios ya apo, <sup>6</sup> ngem kan chitaku ay omaafurot, kun us-usa challu hi Apo Dios. Hiya nan Ama ay namayang as nan am-in ay ka-ichin, ya chitaku at matakу takú ay mangchayaw kan hiya. Us-usa nan Apo ay hi Jesu Cristo. Enpafiyang Apo Dios kan hiya nan am-in ay ka-ichin, ya kiapú kan hiya, matakу takú as tataku.

<sup>7</sup> Ngem achi pay laing ammon nan am-in ay omaafurot sa. O, wachacha nan tapina ay iib-a ay inmiingsa as solet ad kasin ay manaychayaw as nan didiosen. Isunga uray ad wani ay kuncha kay kanun nan makan ay naichaton as nan chiyuycha didiosen, nunumnumuncha ay kuwan nan chiyuycha didiosen nan hanacha makan. Kiapú ta nakapuy nan numnumcha, naleknacha ay finmasorcha as nan nanganancha as nan hana makan. <sup>8</sup> Ngem fiakun nan makan nan mangesnop kan chitaku kan Apo Dios. Achi takú us machachael kiapú as nan achi takú kanun winnu omammay kiapú as nan kanun takú.

<sup>9</sup> Ngem il-launyu, mu ngay nan wayawayayu nan kiapón chi fumasoran nan iib-ayu ay nakapuy pay laing chi numnumcha. <sup>10</sup> Tay he-a ay wachay pannakaammuna maepangkep as na, mu chaka makekan as nan templon nan didiosen, ya ilaun chaká as nan nakapuy chi numnumna, ay kun achi mapapigsa nan numnumna ay mangan? <sup>11</sup> Isunga kiapú as nan pannakaammom, machachaeltu nan pammaten nan nauy ifiam ay nakapuy chi numnumna. Tay hi tonu ay ifiam at para kan hiya us nan natuyan Cristo. <sup>12</sup> Mu assid-i nan fumasoram as nan iib-ayu ya epakamanmu kan chicha nan ifilangcha as achi ustу as nan nakapuy ay numnumcha, kan Cristo nan fumasoram. <sup>13</sup> Isunga mu nan manganak as nan naichaton as nan didiosen nan kiapón nan fumasorak as nan ifiak, achiyak poros mangmangan as nan hana naichaton.

## 9

### *Nan Chiyuycha Kalibfengan Ya Chunon Nan Apostol (2 Co. 11:7-12; 1 Tes. 2:7-9)*

<sup>1</sup> Ay kunak achi nawayawayaan ay pachong nan am-in ay omaafurot kan Cristo? Ay kunak fiakun usa ay apostol? Ay kunku chaan inila hi Jesus ay Apo takú? Ay kun fiakun chakayu nan nunfianakian nan nunserserfiyak as nan Apo? Chakyu met! <sup>2</sup> Mu nan tapina at achiyak ifilang as apostol, siguradu ay chakayu at ifilangak. Tay nan enmafurotanyu kan Apo Jesus at hiyana nan mangepanekekneky ay usaak ay apostol.

<sup>3</sup> Nan songfiatku as nan chiyuycha mangmansot kan ha-un at hiyana: <sup>4</sup> Ay maid kalibfengak ay mapakan kiapú's nan chunok as usa ay apostol? Wacha met! <sup>5</sup> Mu wachay asawak ay omaafurot, ay maid kalibfengak ay mangetaktakin as nan munfiabiaatak ay kaman as nan cha at-atun nan tapina ay apostoles, nan susnúd Jesus ya kaman kan Pedro? <sup>6</sup> Ay chakami yangkiay kan Bernabe nan masapor ay munchunu as pagfiyagmi? <sup>7</sup> Ay wachay sorchachu ay hiya mismu nan munkiastos as pagfiyagna? Ay wachay mannaron ay fiakuna libfeng ay mangan as nan mismu ay fungan

nan murana? Winnu ay wachay munpaspastor as karnero ay fiakuna libfeng ay mangosar as nan kiatas nan mismu ay karnerona? Maid!

<sup>8</sup> Fiakun nurpu as numnum chi taku nan nauycha ay infiagfiakiak, tay assena us challu nan wacha as nan Lintig Moises. <sup>9</sup> Tay wacha nan naisurat as nan Lintig Moises ay kanana, “Achim fudfuchan nan tapak nan fiaka mu cha mun-elek.”\* Ay nan fiaka nan nunumnumun Apo Dios as nan nangepasuratana's na? Fiakun! <sup>10</sup> Ngem kun at siguradu ay para kan chitaku nan nauy naisurat as nan Kalen Apo Dios. Tay nan uy makearachu winnu makeani at wacha nan namnamauncha ay kudwacha as nan maani. <sup>11</sup> Mu chakami nan nangekaskasaba kan chakayu as nan Ammay ay Chamag ay maepachong as nan nangetanmanmi as nan naespirituwan ay fokel kan chakayu, ay kun nalikiat as solet para kan chakayu mu munnamnamna kami as kasaporanmi kan chakayu? <sup>12</sup> Mu wachay kalibfengan nan tapina ay kumchaw as fiachangyu, ay kun achi kaskasin kan chakami?

Uray mu hiyasa, chaanmi enosar nan nauy kalibfenganmi. Ngem kunmi at eta-un chi am-in ay likiat ta achi mapas-iw nan maekasabaan nan Ammay ay Chamag maepangkep kan Cristo. <sup>13</sup> Ay achiyu ammu ay nan chiyuycha munchunchunu as nan Templo at maettancha as kanuncha? Ay achiyu us ammu ay nan chiyuycha cha mun-ichatchaton as nan altar at wacha nan kudwacha as nan chiyuycha naichaton? Ammuyu met! <sup>14</sup> Assesa us ay inflin nan Apo ay nan chiyuycha mangekaskasaba as nan Ammay ay Chamag at murpu koma as nan nauy chunucha nan pagfiyagcha.

<sup>15</sup> Ngem ha-un at chaanku poros enos-osar chaná ay kalibfengan, winnu acheck cha isurat na ta ichatyu nan pagfiyagku. Un-ununya ay matuyak as chukiaangku mu nan wachay mangaan as nan kalibfengak ay mangepangas ay achiyak cha malaglagfuwan ay mun-ekasaba. <sup>16</sup> Tay as nan mangekaskasabaak as nan Ammay ay Chamag, maid kalibfengak ay munpangas, tay enkeddeng Apo Dios ay libfengku sa. Kasusug-angak mu acheck ekasaba nan Ammay ay Chamag! <sup>17</sup> Mu laychok mismu ay mangekaskasaba as nan Ammay ay Chamag, wachay kalibfengak ay malag-fuwan. Ngem kiapú ta fiakun ha-un nan namili as nan chunu ay entalek Apo Dios kan ha-un, masapor atok sa. <sup>18</sup> Anan gun-gunak ngarud? Maid tukún mu achi yangkiay nan lagsakku ay mangekaskasaba as nan Ammay ay Chamag ay achi fiayachan nan munchungor uray mu wachay kalibfengak koma ay chumawat as pagfiyagku.

<sup>19</sup> Tay uray mu nawawayayaanak ay maid mamabfiaor kan ha-un, nunfi-alinok challu nan anchorku as mafiafbfiaor as nan am-in ay tataku ta omongongor nan awisok ay omafurot. <sup>20</sup> Mu maetapiyak as nan chiyuycha Judío, unuchok nan iniili ay ukialicha ta awisok chicha ay omafurot kan Cristo. As nan tapina ay mangunud as nan Lintig Moises, komamanak as nan usa ay naépatoray as nan Lintig (uray achiyak etorayan as nan Lintig) ta maawischa. <sup>21</sup> Assesa us as nan maetapiyak as nan chiyuycha Gentil ay achi mangunud as nan lintig nan Judío. Unuchok nan iniili ay ukialen nan chiyuycha Gentil ta awisok chicha. Achi laychun tosa'y kanan un acheck afurotun nan lintig Apo Dios. Ngem nan kenatit-iwana at afurotok met nan lintig Cristo. <sup>22</sup> As nan kawad-ak as nan chiyuycha nakapuy nan pammaticha, iyunudku nan ukialek kan chicha ta awisok chicha ay omafurot ay ustu. O, iyunudku nan ukialek as nan am-in ay tataku ta uray ngachana ay pamuspusan at wachachay maesarakan kan chicha.

\* **9:9** Deut. 25:4; 1 Tim. 5:18

<sup>23</sup> Atok am-in chaná ta maekasaba nan Ammay ay Chamag. Mu hiyasa, maeranuchak as nan chiyucha bendisyon ay ichat Apo Dios kiapú as nan Ammay ay Chamag. <sup>24</sup> Ammuyu met ay uray mu ongor nan maketennagtag, us-usa challu nan mangafiai ay magun-gunaan. Isunga chakayu us at tomagtag kayu ta maawatyu nan gun-guna ay ichat Apo Dios. <sup>25</sup> Am-in ay makeab-abfiak at paingsauncha as solet nan achorcha ay mun-etpor ta maawatcha nan korona ay mapapug ay gun-gunacha.<sup>†</sup> Ngem kun pay chitaku, maawat takú nan gun-guna ay mawawacha in-inkiana. <sup>26</sup> Isunga mu ha-un, maepachongak as nan makeab-abfiak as tennagtakian ay mun-chachakpos as nan munpatingkiaan. Maepachongak us as nan fumufuksing ay achi maek-eksaw nan sudpakuna. <sup>27</sup> O, maepachongak as nan fumufuksing ay mangepaingsa as nan chiyucha sudpak ya mangetpor as nan chiyucha laylaychok ta as nan marpasak ay mun-ekasaba as nan tapina, achiyak maifilang ay achi maekari ay mang-awat as nan gun-gunana.

## 10

### *Nan Tukun Maepangkep As Didiosen*

<sup>1</sup> Iib-ak, laychok ay numnumunyu nan enommat as nan kaap-uwan takú ay nanganud kan Moises. Am-incha at nanarancha babaen as nan panangaywana ya nangepanguwan nan lifuu ay inchat Apo Dios kan chicha, ya nanarancha ay kinumchang as nan kiawan nan Munchachara ay Fiayfiay.\* <sup>2</sup> As nan nanglenongan nan lifuu kan chicha ya as nan nanaranancha henan fiayfiay, kamancha am-in nafunyakian ay nakius-usa kan Moises, tay finigfigcha hiya as mangepangpanguru kan chicha. <sup>3</sup> Nangnangancha am-in as nan makan ay inchat Apo Dios,<sup>†</sup> <sup>4</sup> ya inmig-ikopcha am-in as nan chanum ay enpafoknagna as nan fiat. Nan maepachongan nan chiyuy fiat at hi Cristo, tay hiya nan nangadkadwa kan chicha ay nangid-ichat as kasaporancha.<sup>‡</sup> <sup>5</sup> Ngem uray mu hiyasa, chaan nalaylaychan hi Apo Dios as nan kaongoran kan chicha. Hiyana nan kiapúna ay natuycha ay kun naiwaklet henan disyerto.

<sup>6</sup> Am-in chaná at kafiq-anan takú ta achi takú mun-ongós as mangotettet ay kaman as nan en-enatcha. <sup>7</sup> Achi takú chaychayawun chi didiosen ay kaman as nan en-enat nan tapina kan chicha. Taywacha nan naisurat as nan Kalen Apo Dios ay kanana, “Tenmokor nan tataku ay mangan ya umikop. Angkiay ya nunligwatcha ay munsasara as kaiisiw ay mangichayaw as nan didiosen.”<sup>§</sup> <sup>8</sup> Achi takú epapas chi assi ay lachok ay kaman as nan en-enat nan tapina kan chicha. Nan nuntongparan nan hana at as nan hinurkiw natuy nan chuwan puru ya turu'y lifu kan chicha.\* <sup>9</sup> Achi takú chischistingun nan Apo ay kaman as nan en-enat nan tapina kan chicha. Nan nuntongparan nan hana at natuycha babaen as nan chiyucha urug.<sup>†</sup> <sup>10</sup> Achi takú munlili kan hiya ay kaman as nan enat nan tapina kan chicha. Nan nuntongparan nan hana at napatuycha babaen as nan anghel ay infiaor Apo Dios.<sup>‡</sup>

<sup>†</sup> **9:25** Nan gun-gunacha as nan hiyachi ay timpu at hiyana nan naraka ay makling ay forong ay korona. \* **10:1** Exo. 14:15-31 † **10:3** Exo. 16:1-31 ‡ **10:4** Exo. 17:1-7 § **10:7** Exo. 32:1-6

\* **10:8** Num. 25:1-9 † **10:9** Num. 21:4-7; Sal. 78:18 ‡ **10:10** Exo. 12:23; Num. 16:41-50

<sup>11</sup> Am-in chaná at enommat kan chicha as mafiaq-anan nan tapina, ya naisuratcha as mun-acharan takú ay matataku as nan kiayud anongos ay timpu.

<sup>12</sup> Isunga mu kananyu un kunug nan pammatiyu, masapor il-ilaunyu, tay anakya kaman kayu munkatutu-ug ay fumasor. <sup>13</sup> Nan sulisug ay omali kan chakayu at kiakiangay chi ay omali as nan tataku. Ngem matalek hi Apo Dios, ya achina eparufus ay masulisug kayu as nan kafaelanyu ay eta-un. Ngem mu masulisukian kayu, ichatna nan atunyu ay makalisi ta kafaelanyu ay mun-eta-un. §

<sup>14</sup> Isunga chakayu ay laylaychok, achi kayu poros munchaychayaw as nan chiyuycha didiosen. <sup>15</sup> Chakayu ay masilib at kan chakayu nan munkaliyak. Isunga numnumunyu pay mu tit-iwa winnu achi nan nauy ifiakiak. <sup>16</sup> Nan mangikopan takú as nan unus chi ubas as nan panagyaman takú kan Apo Dios at hiyana nan mangepaila as nan makeranuchan takú as nan emayasan nan charan Cristo. Nan manganan takú as nan naputput-ing ay tenapay at hiyana nan mangepaila as nan maketapiyan takú kan hiya as nan natuyana. <sup>17</sup> Kiapú ta us-usa nan tenapay, uray mu ongor takú at kaman takú us-usa, tay mangan takú as nan us-usa ay tenapay.

<sup>18</sup> Numnumunyu nan chiyuycha kianak Israel. Nan chiyuycha mangan as nan naichaton kan Apo Dios at makichaychayawcha us as nan chiyuycha munserserfi as nan altar. <sup>19</sup> Ay nan laychok ay kanan at wachay kotok nan didiosen winnu nan chaton ay para kan chicha? <sup>20</sup> Fiakun. Nan laychok ay kanan at hiyana: nan naichaton as nan chiyuycha didiosen at as nan chiyuycha anennet nan naichatonancha, fiakun kan Apo Dios. Achek laychun ay maketapi kayu as nan chiyuycha anennet. <sup>21</sup> Achi kayu mafialin ay umikop ya mangan as nan mangnumnuman takú as nan natuyan nan Apo, angkiay umikop ya mangan kayu as nan naichaton as nan chiyuycha anennet. <sup>22</sup> Ay laychun takú kayong ay paaposun nan Apo? Ay kanan takú un mafifikas takú mu hiya?

<sup>23</sup> Wacha nan mangali, “Am-in ay fianag at maparufusan takú ay mangekaman.” Tit-iwa sa, ngem nan am-in at achi makafiachang, ya achicha us mapapigsa nan pammatten nan iib-a takú. <sup>24</sup> Achi koma waschi un nan mismu oy omammayana nan nunumnumuna, ngem kun at nan omammayan nan ib-ana.

<sup>25</sup> Mafilelinyu ay ischa chi kumpurmi ay karni ay malakwan as nan mune-el-elakwan ay achiyu epoppoot mu naichaton as nan didiosen kiapú ta malilifok nan numnumyu. <sup>26</sup> Tay wacha nan naisurat as nan Kalen Apo Dios ay kanana,

“Nan luta ya nan am-in ay wacha as na at kuwan Apo Dios.”\*

<sup>27</sup> Mu ayakian chakayu as nan achi omaafurot ay uy makekan ya laychunu ay umuy, kanunyu nan kumpurmi ay esangucha kan chakayu. Achiyu epoppoot mu naichaton as nan chiyuycha didiosen kiapú ta malilifok nan numnumyu. <sup>28</sup> Ngem mu wachay makekan ay mangifiakia kan chakayu, “Naichaton pay sa,” achiyu kanun sa kiapú as nan omammayana ya achi malilifokanan nan numnumna. <sup>29</sup> Nan laychok ay kanan at numnum nan taku ay nangifiakia as nan hana, fiakunyu numnum.

Wacha pay nan mangali, “Nawayawayaanak met ay mangekaman as nan laychok. Adchi pay laing t'uyak pas-iwun as nan nalilifok ay numnum nan

tapina? <sup>30</sup> Mu munyamanak kan Apo Dios para as nan kanok, adchi t'uyak uy ostun maepangkep as nan chiyuy makan ay nunyamanak?"

<sup>31</sup> Isunga uray mangan kayu winnu umikop kayu winnu uray ngachana ay atunyu at atunyu koma para as nan pakaichaychayawan Apo Dios. <sup>32</sup> Achiyu atun nan uray ngachana ay kiapón chi maesakiawan nan chiyuycha Judio winnu chiyuycha Griego winnu nan iglesian Apo Dios. <sup>33</sup> Turachunak as nan mangepapatiyak ay mangepalaylayad as nan am-in ay tataku as nan am-in ay atok. Tay fiakun nan omammayak nan nunumnumok, ngem nan omammayan chi kaongoran ta ongor nan maesarakan.

## 11

<sup>1</sup> Turachunak ngarud kaman as nan manurachak kan Cristo.

### *Nan Atun Nan Fianafiai As Nan Munchayawancha*

<sup>2</sup> Ichayawku chakayu, tay nunumnumunak as nan am-in ay chayu atun ya tay chayu un-unuchun nan chiyuycha sursuru ay insurok us kan chakayu. <sup>3</sup> Ngem nauy pay nan laychok ay maawatanyu. Nan apon nan tunggal laraki at hi Cristo. Nan apon nan fiafiai at nan laraki, ya nan apon Cristo at hi Apo Dios. <sup>4</sup> Isunga uray ngachana ay laraki ay munkararag winnu mangifiakia as nan empakaammon Apo Dios kan hiya as nan maamonganyu ay munchaychayaw at masapor achi mundalongdong. Tay mu atuna, ifiafiaina nan Apona ay hi Cristo. <sup>5</sup> Ngem uray ngachana ay fiafiai ay munkararag winnu mangifiakia as nan empakaammon Apo Dios kan hiya as nan maamonganyu ay munchaychayaw at masapor mundadalongdong. Tay mu achina atun, ifiafiaina nan pannakauruna ay hi asawana. Maepachong hiya as nan fiafiai ay naapollokan. <sup>6</sup> Mu achi mundalongdong nan fiafiai, un-ununya ay munpapukis ay kaman as nan fook chi laraki. Ngem kiapú ta kafiafiai ay munpapukis winnu munpaapollok nan fiafiai, mundalongdong koma hiya.

<sup>7</sup> Achi ud-ay mundalongdong nan laraki kiapú ta hiya nan kail-an nan ilan ya kaichayawan Apo Dios. Ngem kun pay nan fiafiai at hiya nan kail-an nan kaichayawan nan laraki. <sup>8</sup> Tay nan laraki at chaan nafiyang ay nurpu as nan fiafiai, ngem kun at nan fiafiai nan nurpu as nan laraki.\* <sup>9</sup> Assesa us ay nan laraki at chaan nafiyang para as nan fiafiai, ngem kun at nafiyang nan fiafiai para as nan laraki.† <sup>10</sup> Hiyana nan kiapúna ay masapor mundalongdong nan fiafiai ta epailana ay munpaetoray hiya as nan laraki, tay uray nan anheles at iilauncha.‡ <sup>11</sup> Uray mu assesa, as nan nakius-usaan takú kan Apo Jesus, nan fiafiai at achina mafialin ay kanan un achina masapor nan fiafiai.§ <sup>12</sup> Tay uray nurpu nan enmona ay fiafiai as nan laraki, nunlapu as nan hiyachi, nan laraki at maiyanak as nan fiafiai. Uray mu hiyasa, am-in ay wacha at nurpucha kan Apo Dios.

<sup>13</sup> Numnumunyu mismu, ay ustu mu achi mundalongdong nan fiafiai as nan munkararakiana kan Apo Dios as nan maamonganyu ay munchaychayaw?\* <sup>14</sup> Ay achi naisisikud ay naisuru kan chitaku ay kafiafiai nan laraki mu an-anchora nan fookna? <sup>15</sup> Ngem nan fiafiai ay an-anchoray fookna at hiyasa nan kaichayawana, tay inchat Apo Dios sa kan hiya ay kaman hiyasa nan dalongdongna. <sup>16</sup> Mu wacha nan makesosek maepangkep as na, nan

\* <sup>11:8</sup> Gen. 2:22   † <sup>11:9</sup> Gen. 2:18   ‡ <sup>11:10</sup> Isa. 6:2-3; Ezek. 1:11   § <sup>11:11</sup> Efe. 5:21-33

\* <sup>11:13</sup> 1 Co. 14:34

ifiakiak yangkiay kan hiya at achimi figfikun chi tukún ay iniili ay ukiali as nan maam-amonganmi ay munchaychayaw. Hiyana us challu nan unuchun nan chiyuycha iglesian Apo Dios.

### *Nan Manganan Ay Mangnumnumnum As Nan Natuyan Cristo*

<sup>17</sup> Mu maepangkep as nan nauycha tapina ay filfilin ay ifiakiak, achek chayawun chakayu. Tay as nan maam-amonganyu ay munchaychayaw kan Apo Dios, nan muntongparana at para as nan momangisiwanyu, fiakun para as nan omammayanyu. <sup>18</sup> Nan omona at as nan maamonganyu, nacham-agku ay makukudwa kayu kanu. O, kiayudku afurotun, <sup>19</sup> tay masapor challu makudkudwa kayu ta mailantu ay ustu mu ngachana kan chakayu nan tit-iwa ay aprobaran Apo Dios. <sup>20</sup> As nan maamonganyu ay mangan as nan mangnumnumnumanyu as nan natuyan Jesus, fiakun hiyasa nan nunumnumunyu. <sup>21</sup> Tay as nan mangananyu, waschi un chana kanun nan mismu ay sangatna ay achina sad-un nan pachongna ay omaafurot. Isunga wachachay munchukiaang ya wachachay mafutang. <sup>22</sup> Ilurugtokyu! Ay kun maid afongyu as mangananyu ya umikopanyu? Ay elalayusanyu nan chiyuycha omaafurot kan Apo Dios ya ifiafiainyu nan pachongyu ay pugli? Ngachana nan namnamaunyu ay maifiakiak maepangkep as nan hana chayu at-atun? Ay ichayawku chakayu? Achi!

<sup>23</sup> Tay nan sursuru ay naawatku kan Apo Jesus ay chak isursuru kan chakayu at hiyana: As nan lafi ay naesepsepan Apo Jesus, enarana nan tenapay. <sup>24</sup> Kun pay narpas ay nunyaman kan Apo Dios, pinutput-ingna, ya kanana, "Hiyana nan achorku para kan chakayu. Atunyu na as mangnumnumnumanyu kan ha-un."† <sup>25</sup> Assid-i us ay as nan narpasancha ay nangan, enarana nan tasa, ya kanana, "Nan nauy naetatasa at hiyana nan fiarú ay nakiturakian Apo Dios as nan tataku ay paneknekan nan charak. Kunyu kay ikopun na, atunyu na as mangnumnumnumanyu kan ha-un."

<sup>26</sup> Tay kunyu kay kanun nan nauy tenapay ya ikopun nan nauy naetatasa, chayu epakpakaammu nan natuyan nan Apo inkiana as nan kasina oma-liyan.

<sup>27</sup> Isunga mu ngachana nan mangan as nan tenapay winnu umikop as nan tasán nan Apo as nan achi ustú ay panangchayaw at fumasor as nan Apo, tay elalayusana nan achor ya charan Apo Jesus. <sup>28</sup> Masapor waschi un numnumuna ay ustú mu ustú nan pangkepna sakbay mangan as nan tenapay ya umikop as nan naetatasa. <sup>29</sup> Tay uray ngachana ay mangan as nan tenapay ya umikop as nan naetatasa ay achi mamigfig ay ustú as nan laychun ay kanan nan achor Cristo at hiya mismu nan mangepachusa as achorna as nan mangekamanana as chi. <sup>30</sup> Hiyasa nan kiapúna ay ongor kan chakayu nan nakapuy ya munsaket, ya wachacha pay nan natnatuy. <sup>31</sup> Ngem mu emamat takú ay mangnumnum omona as nan tit-iwa ay pangkep takú, achi chitakuntu okomún kan Apo Dios. <sup>32</sup> Ngem as nan mangokomán chitaku as nan Apo, hiyasa nan madisiplinaanan takú ta achi takú maetapi ay machusa as nan achi omaafurot as nan machusaananchantu.

<sup>33</sup> Isunga iib-ak, mu maamong kayu ngarud ay mangan as nan mangnumnumnumanyu as nan natuyan nan Apo, munisisinnuud kayu. <sup>34</sup> Mu wachay munchukiaang kan chakayu, masapor mangan hiya on-oná as afongna ta nan munfianakian nan maam-amonganmi at achi kayu machusa. Mu

† 11:24 Mat. 26:26; Luc. 22:19

maepangkep as nan tapina ay laychok ay ifilin kan chakayu, ifiakiaktu as nan omaliyak hesa.

## 12

### *Nan Chiyuycha Naespirituwan Ay Kafaelan Ay Ichat Nan Espiritu Santo (Efe. 4:1-16)*

<sup>1</sup> Ad wani ay iib-ak, mu maepangkep as nan chiyuycha kafaelan ay ichat nan Espiritu Santo, laychok ay maammuwanyu ay ustu. <sup>2</sup> Ammuyu met ay as nan chaanyu enmafurotan at natingwi kayu ay munchaychayaw as nan chiyuycha didiosen ay maid fiyagcha. <sup>3</sup> Isunga laychok ay maammuwanyu ay nan taku ay munkarkali babaen as nan Espiritu Santo at achina kanan, "Maituchor hi Jesus!" Assesa us ay maid taku ay makafael ay mangali, "Hi Jesus nan Apo," omangkiy mu mawawacha nan Espiritu Santo kan hiya.

<sup>4</sup> Tukutukún nan naespirituwan ay kafaelan ay maichat kan chitaku ay omaafurot, ngem us-usa nan mangichat ay hiya nan Espiritu Santo.\*

<sup>5</sup> Tukutukún nan panagserfi takú, ngem us-usa ay Apo nan munserfiyan takú. <sup>6</sup> Tukutukún nan atun Apo Dios ay munchunu as nan fiyag takú, ngem us-usa ay Apo Dios nan munchunu babaen kan chitaku am-in. <sup>7</sup> Waschi un naettan as naespirituwan ay kafaelan ay mangepaila ay wacha nan Espiritu Santo para as nan omammayan nan am-in. <sup>8</sup> As nan usa ay taku, ichat nan Espiritu Santo nan kafaelan ay mangepakaammu as nan kenasilib Apo Dios.

As nan usa at ichat nan hana ay Espiritu nan kafaelan ay mangisuru as nan maepangkep kan Apo Dios. <sup>9</sup> As nan usa at ichat nan hana Espiritu challu nan napigsa ay pammati. Kun pay as nan tapina at nan kafaelan ay mangaan as saket babaen as nan hana us-usa ay Espiritu. <sup>10</sup> As nan usa pay, ichat nan Espiritu Santo nan kafaelan ay mangekaman as milagro, ya as nan tapina at kafaelan ay mangifiakia as nan epakaammon Apo Dios. As nan tapina us at ichatna nan kafaelan ay mangelasìn mu kan Apo Dios nan nurpuwan nan naifiakia winnu nurpu as nan chiyuycha anennet. As nan tapina pay at ichat nan Espiritu Santo nan kafaelan ay munkali as tukutukún ay kali ay epakalina, ya as nan tapina pay at ichatna nan kafaelan ay mangelawlawag as nan hanacha tukutukún ay kali.† <sup>11</sup> Am-in chaná ay kafaelan at nan hana us-usa ay Espiritu nan mangichat as nan tunggal taku ay maiyunud as nan laychuna.

### *Nan Achor Ya Nan Ongor Ay Partina*

<sup>12</sup> Nan achor nan taku at us-usa challu, ngem ongor chi partina. Uray tukutukún chi partina, nunfialinchá challu as us-usa ay achor. Assesa us as nan chiyuycha omaafurot kan Cristo. <sup>13</sup> Tay babaen as nan us-usa ay Espiritu, nafunyakian takú am-in ta munfialin takú as kaman us-usa ay achor. O, uray Judío winnu Gentil, mafiabfiaor winnu fiakun at nan us-usa ay Espiritu nan naichat kan chitaku am-in.

<sup>14</sup> Tit-iwa ay achi maammaan nan achor as kun us-usa ay parti, ngem kun at ongor ay parti. <sup>15</sup> Mu kanan nan suki un, "Tay fiakunak met lima, fiakunak ngarud parten nan achor." Uray mu assena nan kanana, parten pay laing nan achor hiya. <sup>16</sup> Mu kanan nan inga un, "Tay fiakunak met mata, fiakunak ngarud parten nan achor." Uray mu assesa, parten challu nan achor hiya. <sup>17</sup> Mu nan intiru ay achor at mata yangkiy, anan atuna ay makadngor? Mu

\* <sup>12:4</sup> Rom. 12:6-8; 1 Co. 12:28

† <sup>12:10</sup> 1 Co. 12:28; 1 Jn. 4:1

inga yangkiay, anan atuna ay makasongsong? <sup>18</sup> Ngem nan kenatit-iwana at inyam-amman Apo Dios nan am-in ay parten nan anchor ay maiyunud as nan laychuna. <sup>19</sup> Mu kun us-usa yangkiay nan partina, maid anchor! <sup>20</sup> Ngem nan kenatit-iwana at uray mu ongor nan partina, kun us-usa ay anchor.

<sup>21</sup> Isunga achi mafialin ay kanan nan mata as nan lima winnu nan uru as nan suki, "Acheh masapor he-a!" <sup>22</sup> Ngem uray mu hiyasa, nan chiyuycha parten nan anchor ay kaman nakapkapuy mu nan tapina at kaskasin takú kasaporan. <sup>23</sup> Nan chiyuycha parten nan anchor ay ifilang takú as akéti chi kotokcha at kaskasin takú aywanan, ya nan chiyuycha ekafiai takú at kaskasin takú fiachuwan. <sup>24</sup> Nan chiyuycha achi maekafiaiay parten nan anchor takú at achicha kasaporan nan hana ay panang-aywan. Ngem hi Apo Dios ay nangiyornos as nan am-in ay parten nan anchor at enettana nan chiyuycha akéti chi kotokna as ong-ongor ay kotok. <sup>25</sup> Enatna chi ta maid maisiyan as nan intiru ay anchor. Ngem kuncha at mapapchong am-in ay parti babaen as nan mun-eennaywanancha. <sup>26</sup> Mu munsaket nan usa ay parten nan anchor, munsaketcha us nan am-in ay parti, ya mu maichayaw nan usa, munlagragsakcha us am-in.

<sup>27</sup> Chakayu at kaman kayu ngarud anchor Cristo, ya waschi un parten nan achorna. <sup>28</sup> O, nan anchor Cristo at nan iglesia, ya wachacha nan chinutokan Apo Dios ay mangekaman as nan pangkepná as nan iglesia. Nan omona at nan chiyuycha apostoles, nan maekadlu at nan chiyuycha mangifiakia as nan epakaammon Apo Dios, nan maekatlu at nan chiyuycha mun-isursuru as kalina. Nan tapina ay chinutokan Apo Dios at nan chiyuycha wachay pannakafialina ay mangekamkaman as milagro, nan chiyuycha wachay pannakafialina ay mangaan as saket, nan mamadfiachang as nan makasapor, nan mangepangpanguru ya mangor-ornos as nan iglesia, ya nan chiyuycha munkali as tukutukún ay kali ay epakalen nan Espiritu Santo. <sup>29</sup> Ay am-in ay tataku at apostolescha, winnu mangifiagiakia as nan epakaammon Apo Dios? Ay am-incha at mun-isursuru as kalina? Ay am-incha at wachay pannakafialincha ay mangekaman as milagro? <sup>30</sup> Ay am-incha at munkaancha as saket, winnu munkalicha as nan chiyuycha kali ay epakalen nan Espiritu Santo? Ay am-incha at epakaawatcha nan hana ay naifiakia? Achicha met! <sup>31</sup> Ngem kiapú ta achi mafialin ay wacha as nan tunggal usa nan am-in ay kafiaelan ay ichat Apo Dios, laraychunyu koma ay mang-awat as nan chiyuycha amud ay kafiaelan as para as nan omammayan nan am-in.

Ad wani, epailak kan chakayu nan kaammayan ay unuchunyu.

## 13

### Nan Maepangkep As Nan Layad

<sup>1</sup> Uray mu makakaliyak as tukutukún ay kalen chi tataku ya anghesles, ngem mu maid layadku as nan pachongku ay taku, kunak munngangak ay kaman as nan komanangkang ay kiangsa winnu maneset ay tingting.

<sup>2</sup> Uray mu wachay kafiaelak ay mangifiagiakia as nan epakaammon Apo Dios kan ha-un, ya ammok nan am-in ay chaan enpakpakaammon Apo Dios as nan tapina, ya maawatak nan am-in ay pannakaammu, ya napigsa nan pammatek ta mafialinku ay iyaton nan chiyuycha chuntug, ngem mu maid layadku as nan pachongku ay taku, maid kotkotokku. <sup>3</sup> Uray mu epakakchangku as nan chiyuycha pugli nan am-in ay kuk-uwak, ya eparufusko ay mapuoran nan achorku, ngem mu maid layadku as nan pachongku ay taku, maid challu omammayak.

<sup>4</sup> Nan taku ay mananglayad at naanos ya manangfiachang. Achi nanggappos, winnu achina ichayaw nan mismu ay achorna winnu napangas. <sup>5</sup> Narispitu, achina epelet chi laychuna winnu achi fungngat. Achina oonongun nan mangisiw ay naekaman kan hiya. <sup>6</sup> Achina munlagsakan chi mangotettet ay cha atuatan, ngem kun at nan kenatit-iwa. <sup>7</sup> O, nan taku ay mananglayad at kafaelana nan am-in ay kasasaad, ya kanayon ay muntalek, munnamnnama as nan am-in, ya eta-una us nan am-in.

<sup>8</sup> Mu maepangkep as layad at achi munpatpatingkia. Ngem kun pay nan chiyuycha maifiakia ay epakaammon Apo Dios, nan chiyuycha kali ay epakalen nan Espiritu Santo ya nan pannakaammu at munpatpingkiacha am-in. <sup>9</sup> Tay ad wani at kurang pay laing nan ammu takú, ya kurang pay nan ifiagfiakia takú ay epakaammon Apo Dios kan chitaku. <sup>10</sup> Ngem as nan umchanan nan maid munkurangana, mamaidtu nan kenakurang ad wani.

<sup>11</sup> Kaman kan ha-un as nan kaongak at enoonga nan panagkarkalek ya panagnumnumnumku ya panaglaslonku. Kunak pay naonngan, ke-naanku nan enoonga ay ukialek. <sup>12</sup> Assesa kan chitaku ad wani, tay kaman takú iilaun hi Apo Dios as nan nakokorafuhan ay sarming. Ngem as tapen chi urkiw at maesakiang takú kan hiya ay mangila as nan ustu ay kail-ana. Ad wani, kurang pay laing nan pannakaammok kan hiya. Ngem as tapen chi urkiw at maidtu munkurangak ay kaman as nan pannakaammon Apo Dios as solet kan ha-un.

<sup>13</sup> In-inkiana ay mawawachay pammati, namnama ya layad. As nan nauycha ay turu, nan kaamuchan at layad.

## 14

### Nan Tukutukún Ay Kali As Nan Munkararakian

<sup>1</sup> Pawadwad-unyu nan layad as nan am-in ay pangkepyu, ya laraychunyu koma ay mang-awat as nan chiyuycha kafaelan ay ichat nan Espiritu Santo, kaskasin nan kafaelan ay mangifiakia as nan epakaammon Apo Dios kan chakayu. <sup>2</sup> Nan munkali as kali ay epakalen nan Espiritu Santo at fiakun as nan tataku nan chana makeap-apatan ngem kan Apo Dios, tay maid tataku as makaawat as nan chana kankanan. Ngem uray mu hiyasa, babaen as nan pannakafialin nan Espiritu Santo at ifiakiana nan naetatafun ay numnum Apo Dios. <sup>3</sup> Ngem nan mangifiagfiakia as nan epakaammon Apo Dios kan hiya at tataku nan chana makeap-apatan ta papigsaua nan iglesia, fiadngana ya liwliwauna chicha as nan liglikiatcha. <sup>4</sup> Nan taku ay munkali as kali ay epakalen nan Espiritu Santo at achorna yangkiay nan fiadngana. Ngem nan mangifiagfiakia as nan epakaammon Apo Dios kan hiya at fiadngana nan intiru ay iglesia.

<sup>5</sup> Laychok ay chakayu am-in at mawad-an kayu as kafaelan ay munkali as nan chiyuycha kali ay epakalen nan Espiritu Santo. Ngem nan kaskasinku laychun at mawad-an kayu koma as kafaelan ay mangifiagfiakia as nan epakaammon Apo Dios kan chakayu. Tay nan mangifiagfiakia as nan epakaammon Apo Dios kan hiya at ong-ongor nan kotokna mu nan munkali as nan chiyuycha kali ay epakalen nan Espiritu Santo sukúd challu wachay mangepakaawat as nan laychuna ay kanan ta mafiadngan nan iglesia.

<sup>6</sup> Iib-ak, mu omaliyak kan chakayu ay munkali as nan chiyuycha kali ay epakalen nan Espiritu Santo, ay wachay omammayanyu? Maid sukúdku epakaammu nan naepaila kan ha-un winnu nan kenasilib Apo Dios winnu nan enpakaammon Apo Dios kan ha-un, winnu sukúdku isuru nan ammok

maepangkep kan hiya. <sup>7</sup> Uray nan chiyucha maid fiyagcha ay maosar as nan musika, kaman as nan koraling winnu arpa, anan ngachanay makaelas in as nan ustu ay ayugcha mu achi ustu nan atuncha ay maepakiangos? <sup>8</sup> Assesa us ay mu achi narawag nan kiangos nan tarampet ay osarun nan sorchachu, ngachana nan munsakiana ay uy makikufiat? Maid! <sup>9</sup> Assesa us kan chakayu ay mu nan kali ay achi maawatan nan osarunay, anan atun nan munchungor ay mangawat as nan uyyu kanan? Maid! Kun kayu at kaman cha makekarkali as nan angin. <sup>10</sup> Tit-iwa ay ongor nan tukutukún ay kali asna's luta, ya waschi un wacha nan laychuna ay kanan. <sup>11</sup> Ngem mu achek ammu nan kali ay cha maifiagfiakia, ifflangak as nan cha maketagtaktiatfor kan ha-un as kaili ay achi am-ammu, ya assesa us hiya kan ha-un. <sup>12</sup> Kaman us kan chakayu ay kiapú ta laraychunyu ay mawad-an as nan chiyucha kafaelan ay ichat nan Espiritu Santo, epapatiyu ay mangosar as nan chiyucha kafaelan ay mangepapigsa as nan iglesia.

<sup>13</sup> Isunga nan munkali as kali ay epakalen nan Espiritu Santo at masapor munkararag ta mawad-an as kafaelan ay mangepakaawat as nan laychuna ay kanan. <sup>14</sup> Tay mu munkararakiak ay mangosar as nan kali ay epakalen nan Espiritu Santo, nan espiritol nan cha munkararag, ngem nan numnumku at achi cha makifyang. <sup>15</sup> Ngachana ngarud nan atok? Nan atok at munkararakiak babaen as nan espiritol ay mangosar as nan kali ay epakalen nan Espiritu Santo, ya munkararakiak us as nan kali ay ammok. Assesa us ay munkantaak babaen as nan espiritol ay mangosar as nan kali ay epakalen nan Espiritu Santo, ya munkantaak us as nan kali ay ammok. <sup>16</sup> Tay mu fiakun assesa, mu munkararagka ay munyaman kan Apo Dios babaen as nan espiritol, nan iib-am ay cha munchaychayaw at achicha kanan un "Amen" as nan panagyamanmu, tay achicha met maawatan nan infiakiam. <sup>17</sup> Tay uray mu ammay nan kararagmu ay munyaman kan Apo Dios, nan ifiam at achim poros mapapigsa nan pammartinia.

<sup>18</sup> Munyamanak kan Apo Dios, tay ong-ongor nan kafaelak ay munkali as nan chiyucha kali ay epakalen nan Espiritu Santo mu chakayu am-in. <sup>19</sup> Ngem as nan makeam-amongak as nan chiyucha omaafurot at laychok ay uray kun lemlema yangkiay ay kali ay maawatan nan ifiakiak ta maisuruwan nan iib-ak mu nan ifiakiak chi linibilu ay tukutukún ay kali ay achek ammu.

<sup>20</sup> Iib-ak, ikinakyu nan enoonga ay panagnumnumnumyu. Mu maepangkep as nan mangotettet, munfialin kayu as kaman mutun. Ngem mu maepangkep as nan panagnumnumnumyu, munfialin kayu koma as naonngan. <sup>21</sup> Numnumunyu nan naisurat as nan Kalen Apo Dios ay kanana, "Babaen as nan tukutukún ay kali ya babaen as nan chiyucha kaili ay achi am-ammu, munkaliyak kan chatosa ay tataku."

Ngem uray mu assid-i, achiyak challu chungrun kan chicha."\*

<sup>22</sup> Isunga nan chiyucha kali ay epakalen nan Espiritu Santo at sinyar ay fiakun para as nan chiyucha omaafurot, ngem para as nan chiyucha achi omaafurot. Kun pay nan mangifiagfiakia as nan epakaammon Apo Dios at sinyar ay fiakun para as nan chiyucha achi omaafurot, ngem para as nan chiyucha omaafurot.

<sup>23</sup> Isunga mu maam-among kayu am-in ay omaafurot ya am-in kayu at munkali kayu as nan chiyucha kali ay epakalen nan Espiritu Santo, angkiay wachachay sungkop ay achi nangammu as nan pammatiyu winnu achi

\* <sup>14:21</sup> Isa. 28:11-12

omaafurot, ay kuchantu achi kanan un nunkatongok kayu? Kanancha a! <sup>24</sup> Ngem mu nan am-in ay ifiakiacha nan epakaammon Apo Dios, angkiay ya wacha nan sungkop ay achi omaafurot winnu achi nangammu as nan pammatiyu, figfikantu ay fumafiasor hiya babaen as nan am-in ay chinngorna, ya ammonantu ay maokóm hiya babaen as nan am-in ay chinngorna. <sup>25</sup> Nan chiyuycha naetatafun ay pangkep as numnumna at mae-pailachantu kan hiya mismu. Nan muntongparana at munpalintumangtu ya munchayawtu hiya kan Apo Dios. Kananantu, "Tit-iwa ay wacha hi Apo Dios kan chakayu."

### *Nan Muntotornosan Nan Iglesia*

<sup>26</sup> Iib-ak, nauy nan laychok ay kanan: As nan maam-amonganyu ay munchayaw kan Apo Dios, waschi un esakianana nan kafiaelan ay inchat nan Espiritu Santo kan hiya. Nan usa at munkanta. Nan usa at mun-isuru as kalen Apo Dios. Nan usa at ifiakiana nan epakaammon Apo Dios kan hiya. Nan usa us at munkali as kali ay epakalen nan Espiritu Santo, ya nan usa pay at epakaawatna nan naifiakia. Am-in chaná ay atuncha at masapor maekaman para as nan pumigsaan nan iglesia. <sup>27</sup> Mu wachay munkali kan chakayu as kali ay epakalen nan Espiritu Santo, masapor achi somorok as chuwa inkiana turu nan munsesennokat ay munkali. Masapor us wachay usa ay mangepakaawat as nan laychun ay kanan nan naifiakia. <sup>28</sup> Ngem mu maid mangepakaawat, masapor ikinakna as nan maam-amongan ta kun yangkiay as nan achorna ya kan Apo Dios nan makeapatana. <sup>29</sup> Mu wachay mangifiagfiakia as nan epakaammon Apo Dios, chuwa winnu turu koma nan munkali. Kuncha pay ifiakia, nan tapina at masapor numnumcha ay ustu nan laychun ay kanan nan hana cha maifiakia. <sup>30</sup> Mu cha munkarkali nan usa, angkiay wachay epakaammon Apo Dios as nan ifiana ay nangatokor, masapor kuminak nan cha munkarkali ta maesokat nan ifiana. <sup>31</sup> Tay mafialin ay munsesennokat kayu am-in ay mangifiagfiakia as nan epakaammon Apo Dios kan chakayu ta nan am-in at malsuruwancha ya mafiadngancha. <sup>32</sup> Nan chiyuycha mangifiagfiakia as nan epakaammon Apo Dios kan chicha at mafialincha ay etporan nan mismu ay achorcha ay munkali winnu achi. <sup>33</sup> Tay hi Apo Dios at fiakun Dios nan kenamaid ornos ngem Dios nan ornos.

Kaman as nan cha maun-unud as nan am-in ay iglesia, <sup>34</sup> nan fianafai at masapor kumikinakcha. Achicha maparufusan ay munkali as nan iglesia, ngem kuncha at masapor munpaetoray as nan lanaraki ay kaman as nan naisurat as nan lintig. <sup>35</sup> Mu wachay laychuncha ay maammuan, as afongchantu nan manarudsuchancha as nan as-awacha, tay kafiafiai mu munkali nan fiafiai as nan maam-amongancha.

<sup>36</sup> Nakkuran kayu! Ay kan chakayu nan nurpuwan nan kalen Apo Dios, winnu ay kan chakayu yangkiay nan naichatan nan kalina? Fiakun met. <sup>37</sup> Mu wachay mangali un hiya at mun-iflagfiakia as epakaammon Apo Dios winnu wacha kan hiyay naespirituwan ay kafiaelan, masapor figfikuna ay nan chak isursurat kan chakayu at hi Apo Jesus nan nangifilin. <sup>38</sup> Ngem mu achina figfikun sa, achiyu us figfikun hiya.

<sup>39</sup> Isunga iib-ak, laraychunyu koma ay mangifiagfiakia as nan epakaammon Apo Dios. Achiyu epawa nan munkali as nan chiyuycha kali ay epakalen nan Espiritu Santo. <sup>40</sup> Ngem am-in ay maekaman as nan maam-amonganyu at masapor ustу ya naornos.

## 15

### *Nan Maepangkep As Nan Natakuwan Cristo Manipud As Nan Utý*

<sup>1</sup> Ad wani ay iib-ak, laychok ay epanumnum kan chakayu nan Ammay ay Chamag ay enkasabak kan chakayu ay hiyasa nan enawatyu ya kaifisaran nan kukumnukian nan pammatiyu. <sup>2</sup> Maesarakan kayu mu iturturuyu ay omafurot as nan nauy Ammay ay Chamag ay enkasabak kan chakayu. Ngem mu achi kayu popomkat as nan pammatiyu, maid kotkotok nan omafurotanyu.

<sup>3</sup> Tay epakaammok kan chakayu nan nauy kaamuchan ay enawatku: Natuy hi Cristo kiapú as nan fiasfiasor takú ay maiyunud as nan naisurat as nan Kalen Apo Dios. <sup>4</sup> Nailufok hiya, at tenakon Apo Dios as nan maekatlu ay urkiw ay maiyunud us challu as nan naisurat as nan Kalen Apo Dios. <sup>5</sup> Angkiay ya nunpaila hiya kan Pedro, haat as nan am-in ay hinpuru ya chuwa ay apostolesna. <sup>6</sup> Kun pay narpas sa, nunpaila as nan nasorok as leman kiasot ay omaafurot ay naaamong. Kukutug ay matatakucha nan kaongoran, ngem natuycha nan tapina kan chicha. <sup>7</sup> Angkiay ya nunpaila kan Santiago. Angkiay ya nunpaila as nan am-in ay apostoles.

<sup>8</sup> Nan anongos ay nunpail-anu at kan ha-un ay usa ay kaman naiyanak as nan achi ustu ay timpu mu maepangkep as nan nunfialinak as apostolna.

<sup>9</sup> Tay ha-un nan kababaan as nan am-in ay apostoles. Achiyak met koma maifilang ay makali un apostolna, tay penarpalikiatku nan iglesian Apo Dios. <sup>10</sup> Ngem babaen as nan grasyan Apo Dios, nunfialinak as assena ay usa ay apostol, ya nan grasyana kan ha-un at wachachay nuntongparana, tay makaggakuchak mu nan tapina ay apostoles. Uray mu hiyasa, chaanku enat chasa babaen as nan fikasku yangkiay, ngem babaen as nan grasyan Apo Dios ay wacha kan ha-un. <sup>11</sup> Isunga uray mu ha-un winnu chicha nan munekasaba, munpachong nan ekaskasabami am-in ay hiyachi nan enafurotyu.

### *Nan Matakuwan Nan Omaafurot Manipud As Nan Utý*

<sup>12</sup> Ad wani, kiapú ta maepangkep kan Cristo ay nataku manipud as nan utý nan chami ekaskasaba, adchi t'uy kanan nan tapina kan chakayu un achi matakú nan nunkatuy manipud as nan utý? <sup>13</sup> Mu tit-iwa ay achi matakú nan nunkatuy manipud as nan utý, uray us a ngarud hi Cristo at chaan nataku manipud as nan utý hi Cristo, maid kotkotok nan chami ekaskasaba ya kaman us nan pammatiyu. <sup>15</sup> Mu hiyasa, maepaila ay cha kami munkutkutum as nan maepangkep kan Apo Dios, tay paneknekanmi ay tenakon Apo Dios hi Cristo manipud as nan utý. Ngem achi takuwun Apo Dios hiya mu tit-iwa ay achi matakú nan nunkatuy manipud as nan utý. <sup>16</sup> Tay mu achi matakú nan nunkatuy manipud as nan utý, uray hi Cristo at chaan us ngarud nataku manipud as nan utý. <sup>17</sup> Mu chaan nataku hi Cristo manipud as nan utý, maid kotkotok nan pammatiyu, ya kukutug ay chaan kayu napakawan as nan fiasfiasoryu. <sup>18</sup> Mu hiyasa, nan chiyuycha natuy ay omaafurot kan Cristo at achichantu maesarakan. <sup>19</sup> Mu nan fiyag takú asna's luta yangkiay nan munpapatingkiaan nan namnama takú kan Cristo, chitaku a nan kasusug-ang as solet as nan am-in ay tataku.

<sup>20</sup> Ngem nan kenatit-iwana at nataku challu hi Cristo manipud as nan utý, ya hiya nan enmona ay nataku in-inkiana as nan nunkatuy ay hiyana

---

\* <sup>15:3</sup> 1 Co. 11:23; Gal. 1:12

nan mangepaila ay siguradu ay matakuntu nan chiyucha omaafurot ay natuy. <sup>21</sup> Tay kiapú as nan enat nan usa ay taku ad solet ay hi Adan, matuy nan tataku. Assesa us ay kiapú as nan enat nan usa pay ay taku ay hi Cristo, matakú nan nunkatuy manipud as nan utúy. <sup>22</sup> Tay am-in nan nurpu as nan kianak Adan at matuycha. Assesa us ay am-in nan nakius-usa kan Cristo at matakuchantu manipud as nan utúy.<sup>†</sup> <sup>23</sup> Ngem maetotorpangtu nan matakawan nan tunggal usa manipud as nan utúy: Hi Cristo challu nan enmona ay nataku manipud as nan utúy. Angkiay ya as nan kasina omaliyan, chitaku ay tatakuna nan somarunu ay matakú manipud as nan utúy. <sup>24</sup> Angkiay ya umchantu nan anongos ay timpu ay ipurangtu Cristo nan muntorayan kan Dios Ama. Atunantu na as nan marpasan nan mapapukian nan am-in ay wachay torayna, kalibfengana ya am-in ay wachay pannakafialina. <sup>25</sup> Tay masapor challu muntoray hi Cristo inkiana amisuna nan am-in ay mamusor kan hiya ay kamana ikiatin chicha.<sup>‡</sup> <sup>26</sup> Nan anongos ay kafusor ay maamis at nan katuyan chi tataku. <sup>27</sup> Tay wacha nan naisurat as nan Kalen Apo Dios ay kanana, “Am-in ay wacha at enpaetoray Apo Dios kan hiya ay kamana enpakiati chicha.” Narawag ay nan kali ay “am-in” at achi maetapi hi Apo Dios ay munpaetoray kan Cristo, tay hi Apo Dios nan nangepaetoray as nan am-in kan hiya.<sup>§</sup> <sup>28</sup> Kun pay maepaetoray nan am-in kan Cristo, hi Cristo mismu ay Anak Apo Dios at maepaetoraytu us kan Apo Dios ay sikud ay mangepaetoray as nan am-in kan Cristo. Hiyasa nan maekaman ta hi Apo Dios nan mangetoray as nan am-in ay wacha.

<sup>29</sup> Ad wani, anan kotok ngay nan iniili ay ukialicha ay munfunyag para as nan nunkatuy? O, mu tit-iwa ay achi matakú nan nunkatuy manipud as nan utúy, ngachana nan kiapúna ay munpafunyagcha para kan chatosa? <sup>30</sup> Mu para kan chakami, mu achi tit-iwa nan matakawan nan nunkatuy manipud as nan utúy, adchi t'uymi kanayon ay epostay fiyagmi? <sup>31</sup> Iib-ak, inurkiw challu ay epostak nan fiyagku ay matuy. Nan kenatit-iwan nan hana at kaman as nan panangepongasku kan chakayu kiapú as nan nakius-usaanyu kan Cristo Jesus ay Apo takú. <sup>32</sup> Mu maiyunud as nan panagnumnumnum chi taku, ay wachay kotok nan nangontraak as nan chiyucha mangiingor as solet kan ha-un ad Efeso ay kamanak nakepatuy as nan sanongel ay animar? Mu tit-iwa ay achi matakú nan nunkatuy manipud as nan utúy, atun takú ngarud nan kanan nan tataku un, “Mangmangan takú ya umig-ikop takú, tay as wiet at matuy takú.”\*

<sup>33</sup> Achi kayu maar-allilaw, tay wacha nan kanan nan tataku, “Mu makekadkadwaka as nan taku ay mangisiw chi ukialina, machachael nan ammay ay ukiale.” <sup>34</sup> Ayu, munfiangad kayu as nan sikud ay ustu ay panagnumnumnumyu, ya chukkianyu nan fumasfiasoranyu. Tay nan tapina kan chakayu at achicha poros ammu hi Apo Dios. Kanak na ta mafainan kayu.

### Nan Matakawan Nan Achor Manipud As Nan Utúy (2 Co. 5:1-5)

<sup>35</sup> Ngem wachantuy manarudsud, “Anan atun chi natuy ay matakú manipud as nan utúy? Anan kaassenan chi achorcha?” <sup>36</sup> Nangokngokka! Mu etanumumu nan fing-i, achi tumufu sukúd matuy on-oná. <sup>37</sup> Nan maetenam

---

† **15:22** Rom. 5:12-21    ‡ **15:25** Sal. 110:1-3; Mat. 22:44; Ara. 2:35; Heb. 1:13    § **15:27** Sal. 8:6;  
Heb. 2:8-9    \* **15:32** Isa. 22:13; 1 Co. 16:9

at fiakun nan mura ay chakus tinmutufu mu achi yangkiay nan fing-i ay trigo winnu tapina ay fokel. <sup>38</sup> Ngem hi Apo Dios nan mangichat as achor nan hana fing-i ay maiyunud as nan laychuna, ya as nan tunggal fing-i at ichatna us nan maifiakiay ay achorna.

<sup>39</sup> Nan lamán nan am-in ay matataku at achi mapapchong. Tukún nan lamán nan tataku, tukún as nan chiyuycha animar, tukún as nan chiyuycha kossel, ya tukún as nan chiyuycha finayang henan fiayfiay.

<sup>40</sup> Wachachay sumilsilaw ad chaya, ya wachachay ka-ichin asna's luta. Uray mu assesa, nan kaichayawan nan wacha ad chaya at natkún as nan kaichayawan nan wacha asna's luta. <sup>41</sup> Nan kaichayawan nan urkiw at natkún as nan kaichayawan nan furan ya nan taraw. Uray nan chiyuycha taraw mismu at achi mapapchong chi kaichayawancha.

<sup>42</sup> Assesa us as nan matakwanter nan nunkatuy manipud as nan utúy. Nan achor takú at maepachong as nan fing-i ay maekaub ya mabrok. Nan achor ay takuwun Apo Dios manipud as nan utúy at achi mabmabrok inkiana. <sup>43</sup> As nan nailubkan nan achor chi natuy at maelalayusan ya maid kafaelana. As nan matakwan nan achor manipud as nan utúy at maichayaw ya wachay pannakafialina. <sup>44</sup> As nan nailubkan nan achor chi natuy at maifiakiay yangkiay as nan fiyag asna's luta. As nan matakwan nan achor manipud as nan utúy at wachantu nan naespirituwan ay achor ay maifiakiay as nan fiyag ad chaya. Ilaunyu! Mu wachay achor ay maifiakiay asna's luta, siguradu ay wachay achor ad chaya. <sup>45</sup> Tay kaman as nan naisurat as nan Kalen Apo Dios ay kanana, "Nan enmon-oná ay taku ay hi Adan at nunfialin as matataku." Nan makali un anongos ay Adan ay hi Cristo at nunfialin as umid-ichat as fiyag ay maid patingkiana. <sup>46</sup> Uray mu hiyasa, nan enmon-oná ay naichat kan chitaku at fiakun nan maifiakiay ad chaya ngem nan maifiakiay asna's luta. Angkiay ya maichat nan achor ad chaya. <sup>47</sup> Nan chiyuy enmon-oná ay Adan at nurpu asna's luta, tay naammaan manipud as nan tapok. Nan chiyuy maekadwa ay Adan at nurpu ad chaya. <sup>48</sup> Kaman kan Adan ay natuy ay naammaan manipud as nan tapok, assesa us ay matuy nan tataku asna's luta. Kaman kan Cristo ay nurpu ad chaya, nan tataku ay omaufurot kan hiya at mawad-anchantu as achor ay maepachong kan hiya ay maifiakiay ad chaya. <sup>49</sup> Uray mu pachong takú nan chiyuy naammaan as nan tapok, pachong takuntu hi Cristo ay nurpu ad chaya.

<sup>50</sup> Nauy nan laychok ay kanan kan chakayu ay iib-ak: Achi mafialin ay nan achor takú ay wachay lamán ya charana at maetapi henan muntorayan Apo Dios, winnu achi mafialin ay nan matuy ay achor at maetapi as nan achi poros matmatuy.

<sup>51</sup> Chumngor kayu as nan nauy ifiakiak ay chaan naepakpakaammu ad pus-uy: Am-in takú at achi takú matuy sakbay omali nan Apo, ngem am-in takú at mafialiwan takuntu. <sup>52</sup> O, munkafiafialiwan takuntu ay kaman as nan kapaspas nan munkimkiman chi mata as nan maepakiangosan nan anongos ay tarampet. Tay as nan maepakiangosantu nan chiyuy tarampet, nan nunkatuy at matakuchantu in-inkiana manipud as nan utúy. Angkiay chitaku ay matataku pay laing at mafialiwan takuntu. <sup>53</sup> Tay masapor masokatan nan achor takú ay mabrok as achor ay achi mabmabrok, ya mafialiwan nan achor ay matuy as achor ay achi matmatuy. <sup>54</sup> As nan om-matantu nan mafialiwanan nan mabrok as achi mabmabrok ya mafialiwan

† 15:45 Gen. 2:7

nan matuy as achi matmatuy at matongpartu nan naisurat as nan Kalen Apo Dios ay kanana,

“Maafiak ya mamaid challu nan utúy.”‡

55 Angkiay ya mafialin ay ifiakian nan chiyuycha nangafiak,  
“He-a ay utúy, ay wachay nangafiakam?

He-a ay utúy, ay chaud nan siludmu?”§

56 Tay nan kurpuwan nan pangsilud nan utúy at as nan fiasor, ya nan kurpuwan nan pannakafialin nan fiasor at as nan manglabsingan as nan lintig Apo Dios.\* 57 Ngem munyaman takú kan Apo Dios ay hiya nan mangidichat kan chitaku as pannakafialin takú ay mangamis as fiasor ya utúy babaen kan Apo takú ay hi Jesu Cristo.

58 Isunga chakayu ay iib-ak ay laylaychok, kukumnug kayu as nan pamatiyu, ya maid koma chuwachuwayu as nan numnumyu. Kanayon kayu koma ay komakud ay munserfi kan Apo Jesus, tay ammuyu met ay nan am-in ay atunyu para kan hiya at achi poros masayang.

## 16

### *Nan Ifiachang As Nan Iib-a Ay Omaafurot*

1 Ad wani, mu maepangkep as nan maamong ay siping ay ifiachang as nan tatakon Apo Dios ad Jerusalem, atunyu nan kaman as nar infilinku as nan chiyuycha iglesia ad Galacia.\* 2 As nan Chinumingku, waschiwaschi un masapor omelasin as tapen chi sipingna ay maiyunud as nan lagfuna, ya itupugna ta as nan omaliyak hesa, achiyu kis-an elapu ay mun-among.  
3 As nan umchanak hesa, nan chiyuycha enaprobaranyu at kan chicha nan mangepaw-etak as nan chiyuycha surat ay hiyasa nan mangiyammuwak kan chicha as nan chiyuycha mangichatancha ad Jerusalem.  
4 Mu ammay ay umuyak us, makiuycha kan ha-un.

### *Nan Planon Pablo*

(2 Co. 1:15-24)

5 Awni at omaliyak ay mangfisita kan chakayu as nan murpuwak ad Macedonia, tay planok ay mar-os hesa. 6 Makepagyanaktu siguru kan chakayu as kaat ay urkiw winnu uray inkiana marpas nan chinamuy ta mafiadnganak kan chakayu as nan munturuyak ay munfiaat as nan kumpurmi ay ay-ayak.  
7 Tay achek laychun ay kun hen-omaketan nan mangil-ak kan chakayu as nan mar-osak hesa ad wani. Laychok ay mafiyayag kan chakayu mu eparufus nan Apo.

8 Ngem mayasnaak ad Efeso inkiana umchan nan fiasta ay makali un Pentecostes,† 9 tay ongor chi chansak ay mun-ekasaba ay ammaytu nan muntongparana. Uray mu hiyasa, ongorcha challu nan komontra kan ha-un.

10 Mu omali hi Timoteo hesa, mangiliyunyu hiya ay ustu, tay kaman us hiya kan ha-un ay cha munchunchunu as nan Apo. 11 Isunga ilaunyu ta maid mangelalayus kan hiya, ngem kunyu at fiadngan hiya as nan mangituruyana ay munfiaat ay ammay chi numnumta munfiangad hiya kan ha-un, tay sasad-ok hiya patí nan iib-a ay omaafurot.

‡ 15:54 Isa. 25:8    § 15:55 Ose. 13:14    \* 15:56 Rom. 5:12; 7:7-13    \* 16:1 Rom. 15:25-28

† 16:8 Exo. 34:22; Lev. 23:15-21; Deut. 16:9-11; Ara. 2:1

<sup>12</sup> Kun pay hi Apolos ay ifia takú, enpapatek ay mangawis kan hiya ay makiuy as nan ib-a ay mangila kan chakayu hesa, ngem chaana lenayad ad wani. Omalintu hesa mu wachay wayana.

*Nan Anongos Ay Tukun Ya Pakomostan Pablo*

<sup>13</sup> Etatalengaanyu ya kukumnug kayu as nan pammatiyu. Tumurud kayu ya papigsaanyu nan numnumyu. <sup>14</sup> As nan am-in ay atunyu, epailayu nan layadyu.

<sup>15</sup> Iib-ak, ammuyu ay cha Estefanas ay hinfiaruy at chicha nan enmon-oná ay enmafurot ad Acaya, ya epapasnekcha ay munserserfi as nan tatakon Apo Dios. <sup>16</sup> Epakpakaasek kan chakayu ay munpaetoray kayu as nan kaman kan chatona ay tataku ya uray as nan am-in ay makakud ay makidnu kan chicha.

<sup>17</sup> Maragsakanak as nan enmaliyan cha Estefanas, Fortunato ya hi Acaico hena, tay nakakkaanan nan iliwku kan chakayu kiapú kan chicha. <sup>18</sup> Penaragsakak ay kaman as nan enatcha kan chakayu. Rispituwunyu ay ustu nan assesena ay tataku.

<sup>19</sup> Cha chakayu pakomostaun as nan chiyuycha iglesia henan probinsiya ay Asia. Cha Akila kan Priscila patí nan tapina ay omaafurot ay maam-among as afongcha at ongor chi layadcha ay mangpakomosta kan chakayu kiapú as nan nakius-usaanyu kan Apo Jesus. <sup>20</sup> Cha chakayu us pakomostaun as nan am-in ay iib-a takú ay omaafurot hena.

Munpeppennakomosta kayu am-in ay mangepaila ay munleennayad kayu.

<sup>21</sup> Nan nauy anongos ay pakomosta at ha-un ay Pablo mismu nan cha mangisurat.

<sup>22</sup> Mu wachay taku ay achi manglayayad kan Apo Jesu Cristo, maituchor koma hiya.

Apo, omalika!

<sup>23</sup> Sapay koma ta mawawacha kan chakayu nan grasyan Apo Jesus.

<sup>24</sup> Mawawacha koma nan layadku kan chakayu am-in kiapú as nan nakius-usaanyu kan Cristo Jesus. Amen.

## Nan Maekadwa Ay Surat Pablo As Nan Chiyuycha I-Corinto Nan Omona Ay Ammuwun

As nan omona ay surat Pablo as nan chiyuycha i-Corinto, senengarana chicha kiapú as nan susumacha (1 Co. 1:11), kenamaid ornoscha as nan maam-amongancha ay mangchayaw kan Apo Dios (1 Co. 11:20-34), ya nan manangotettet ay ekamkaman nan tapina kan chicha (1 Co. 5:1-13). Ngem chaancha pay laing tenongpar nan tukuna kan chicha as nan omona ay suratna (1 Corinto). Isunga inmuy hi Pablo mismu ay nangfisita kan chicha (2:1; 12:14; 13:1-2) ta fiadngana chicha ay munfiangad as nan ustу ay pammaticha, ngem chaancha challu enafurot hiya. Isunga nasaktan as solet hi Pablo ay nunfiangad ad Efeso (2:1, 5).

As nan hiyasa, senokatan Pablo nan planuna ay mangfisita kasin kan chicha ad Corinto, tay anakya ya kuna lawá sengaran chicha (1:12-23). Isunga finaorna hi Tito ay umuy kan chicha ta hiya nan mangid-an as nan somarunu ay tukuna kan chicha.

Kun pay nak-ak hi Pablo ad Efeso, uy nun-ekaskasaba hiya henan siyudad ay Troas, tay planuna us ay manib-at kan Tito hid-i. Ngem as nan chaana nanib-atan kan Tito ad Troas, nchanakian hiya, isunga uyna enanap hiya henan probinsiya ay Macedonia. Hid-i nan nanib-atanan kan Tito ay kurkurupu ad Corinto (2:12-14).

Naragsak as solet hi Pablo as nan nangepakaammuwan Tito ay nunfiafi-awi nan chiyuycha i-Corinto as nan fiasfiasorcha. Nailiwcha kan hiya ya lenarayadcha ay mangiyapa kan hiya (2 Co. 7:5-7). As nan kawad-an Pablo ad Macedonia, insuratna nan nauy maekadwa ay surat kan chicha.

Turu nan laychun Pablo ay epakaammu as nan nauy surat. Nan omona at (1:1-7:16) nan nangelawlawkiana as nan maepangkep as nan lagsakna as nan nangchamakiana ay nunfiafiawicha nan i-Corinto as nan fiasfiasorcha. Enpanumnumna nan pangkepna kan chicha, tay fiakun maepangkep as achorna nan chana ekaskasaba, ngem maepangkep kan Jesu Cristo yangkiay. Hi Pablo at kun yangkiay mun-epadpachamag ay finaor Cristo, ya munserserfi hiya as nan chiyuycha i-Corinto kiapú kan Cristo yangkiay (4:5). Nan maekadwa (8:1-9:15) at nan nangisuruwan Pablo as nan maepangkep as nan mangamongancha as siping ad Corinto. Enpanumnumna kan chicha ay umichat koma nan tunggal usa ay achi mapelpelet, tay laylaychun Apo Dios nan naragsak ay umichat (9:7) Nan maekatlu (10:1-12:21) at nan nangekalintikian Pablo as nan kenaapostolna kan Jesu Cristo. Wachacha nan tapen chi Judio ay nangali un hi Pablo at fiakun usa ay apostol, tay chaan nakekadkadwa as nan chiyuycha hinpuru ya chuwa ay apostoles Jesus as nan nangisursuruwan Jesus kan chicha. Nan ensongfiat Pablo as na at nan Apo mismu nan nangichat kan hiya as nan nauy chununa.

### **Nan Nakudkudwaan Nan Nauy Surat**

Nan Laplapon Nan Surat 1:1-11

Nan Nangnumnuman Pablo As Nan Chiyuycha I-Corinto 1:12-7:16

Nan Siping Ay Ifiachang Nan Chiyuycha I-Corinto 8:1-9:15

Nan Nangekalintikian Pablo As Nan Kenaapostolna 10:1-12:21

Nan Anongos Nan Nauy Surat 13:1-14

<sup>1</sup> Ha-un hi Pablo ay apostol Cristo Jesus, tay hiyana nan enkeddeng Apo Dios. Hi Timoteo ay ifia takú ay omaafurot at hiya nan kadwak hena. Nauy nan suratmi as nan iglesia ad Corinto ya as nan am-in ay tatakon Apo Dios henan intiru ay probinsiya ay Acaya. <sup>2</sup> Sapay koma ta mawawacha kan chakayu nan grasya ya nan natalna ay numnum ay murpu kan Apo Dios ay Ama takú ya kan Apo takú ay Jesu Cristo.

### *Nan Mangfiadngan Apo Dios Kan Chitaku As Nan Likiat Takú*

<sup>3</sup> Chayawun takú hi Apo Dios ay hiya nan Dios ya Aman Apo takú ay Jesu Cristo. Hiya nan manangsug-ang ay Ama takú ay kurpuwan chi am-in ay fiachang ya liwliwa. <sup>4</sup> Liwliwauna chitaku as nan am-in ay liglikiat takú ta mafialin takú us ay liwliwaun nan iib-a takú ay cha mun-ililiwas ya ta iliwiwa takú kan chichá nan inliwiwan Apo Dios kan chitaku. <sup>5</sup> Tay kaman as nan makiliglikiatan takú kan Cristo at hiyasa us challu nan makelak-aman takú as nan ifiachang Apo Dios. <sup>6</sup> Uray mapalikiat kami as nan mangekasabaanmi as nan Ammay ay Chamag kan chakayu, kiangayna sa mu kun at nan muntongparana at mapapigsa nan numnumyu ya maesarakan kayu. Mu maliwliwa kami at hiyasa nan chansami ay mangliwiwa kan chakayu us ta mafialinyu ay eta-un nan likiat ay kaman as nan liglikiatmi. <sup>7</sup> Isunga achi mamammaid nan namnamami kan chakayu, tay ammumi ay as nan makilikiatanyu kan chakami, makelak-am kayu us kan chakami as nan mangfiadngan Apo Dios kan chakami.

<sup>8</sup> Iib-ak, laychunmi ay maammuwanyu nan pararu ay likiat ay napad-pachasanmi as nan kawad-anmi henan probinsiya ay Asia. O, ongor paat chi likiatmi ya napaliwasan kami as solet ya maid us namnamami ay matakú. <sup>9</sup> Nan kenatit-iwana at naleknami ay kaman kami nakeddengan ay matuy. Ngem enommat chi ta manuruwanmi ay fiakun nan achormi nan talekunmi, ngem kun at hi Apo Dios yangkiay ay makafiael ay mangtaku as nan matuy. <sup>10</sup> Tit-iwa ay ensarakana chakami as nan kauugyat ay likiat, at esarakantanu chakami kasin. Hiya us challu nan namnamaunmi ay mangiturturuy ay mangesarakan kan chakami. <sup>11</sup> Nan chawatok at fiadnganak babaen as nan kararagyu. Mu hiyasa nan atunyu, songfiatan Apo Dios nan kararagyu ya ongor nan munyaman kan hiya kiapú as nan bendisyon ay inchatna kan chakami.

### *Nan Kiapúna As Nanokatan Pablo As Nan Planuna*

*(1 Co. 16:5-9)*

<sup>12</sup> Naragsak kami ay mangepaneknek as nan wacha as numnummi ay nan en-enatmi ya inflaifiakiami as nan pachongmi ay tataku at nacharos ya tit-iwa, kaskasin kan chakayu. Fiakun as nan silib nan taku nan nurpuwan chatona, ngem kun at nurpu as nan grasyan Apo Dios. <sup>13-14</sup> Nan suratmi kan chakayu at maid naetatafun as laychuna ay kanan, ngem kun at naraka ay mafiasa ya maawatan. Ammok ay achiyu pay laing maawatan ay ustу ad wani nan numnum ya ukialimi, ngem namnamaok ay maawatanyuntu chakami ay ustу ta nan lagsakyu kan chakami at kaman as nan lagsakmi kan chakayu as nan urkiw ay kasin omaliyan Apo Jesus.

<sup>15</sup> Kiapú ta maid chuwatchuwak ay maragsakan kayu kan chakami, ninum-numku ay mamen chuwalk fisitaun chakayu ta mamen chuwa kayu us ay mabendisyonan. <sup>16</sup> Nan sikud ay planok at muncag-osak koma kan chakayu as nan umuyak ad Macedonia, ya kasinak fumisita kan chakayu as nan murpuwak hid-i ta chakayu nan mangepaligwat kan ha-un as nan munfiaatak ad Judea. <sup>17</sup> Kiapú ta chaan naturuy nan nauy planok, siguru

wachay mangali un naraka ay mafiarfialiwan nan numnumku. Achi! Achiyak munplanplanu ay kaman as nan atun nan taku ay achi nangammu kan Apo Dios ay munkisanuna ay mangali un, “O” ya “Achi”. <sup>18</sup> Tay as nan sangwanan Apo Dios ay achi poros munkutu, nan ifiagfiakiak kan chakayu at tit-iwa ya achiyak poros munchuwachuwa. <sup>19</sup> Tay hi Silas, Timoteo ya ha-un at enkaskasabami kan chakayu nan maepangkep kan Jesu Cristo ay Anak Apo Dios. Hi Jesu Cristo at maid iyafudna as achina tongparun. Hiya nan maid patingkiana ay “O” kan Apo Dios. <sup>20</sup> Tay babaen kan Jesu Cristo at natongpar nan am-in ay enkarkaren Apo Dios. Isunga mafialin takú ay iyafud ay tit-iwa nan am-in ay karen Apo Dios as nan mangaliyan takú “Amen.” As nan hiyasa ay atun takú, maichaychayaw hi Apo Dios. <sup>21</sup> Hi Apo Dios nan mangepapigsa as nan pammati takú kan Cristo, ya hiya mismu nan nangpili kan chitaku ay munserfi kan hiya. <sup>22</sup> Inchatna us kan chitaku nan Espiritu Santo as mangematonan ay tatakuna chitaku, ya kiapú ta wacha nan Espirituna kan chitaku at ammu takú ay siguradu ay tongparuna nan am-in ay enkarina kan chitaku.

<sup>23</sup> Ipudnok ad wani nan kiapón nan chaanku enmaliyan kasin hesa ad Corinto. Chaanak enmali ta wachay chansayu ay munfiaifiawi as nan fiasfiasoryu ta acheck masapor chusaun chakayu. Ammon Apo Dios ay tit-iwa chi. <sup>24</sup> Ngem acheck laychun ay kanan un libfengmi ay mangepapelet mu ngachana nan afurotunyu, tay napigsa kayu met as nan pammatiyu. Ngem laychunmi yangkiay ay makidnu kan chakayu ta matapiyan nan lagsakyu.

## 2

<sup>1</sup> Isunga ninumnumku ay achiyak umuy hesa ay kasin mangepan-guyus kan chakayu. <sup>2</sup> Tay mu panguyusok chakayu, ngachana ngay nan mangepalagsak kan ha-un mu fiakun chakayu ay enpanguyusku? <sup>3</sup> Hiyasa nan kiapúna as nunsuratak kan chakayu ad kasin ta mu umuyak hesa, achiyak panguyusun kan chakayu ay mangepalagsak koma kan ha-un. Tay maid chuwachuwak ay mu naragsakak at naragsak kayu us am-in. <sup>4</sup> Isunga as nan nangisuratak as nan chiyu tukún ay suratku kan chakayu, nalilifok as solet nan numnumku ya linmuwaak kiapú as nan ongor ay ngunguyusku. Ngem chaanak nunsurat ta panguyusok chakayu, ngem kunku at laychun ay maammuwayu ay ongor nan layadku kan chakayu.

### *Nan Mamakawanan As Nan Nakafiasor*

<sup>5</sup> Ad wani, mu wacha kan chakayu nan nangepanguyus as ib-ana, fiakun yangkiay ha-un nan penanguyusna ngem uray chakayu, ngem fiakun chakayu am-in. Kanak un fiakun chakayu am-in, tay acheck laychun ay pakaskasinun nan fiasorna. <sup>6</sup> Ommat nan nanusaan nan kaongoran kan chakayu kan hiya. <sup>7</sup> Ad wani, nan atunyu at pakawanunyu hiya ya papigsaunu nan numnumna ta achi komaskasin chi ngunguyusna ay muntongpar as nan achina makalayawan as nan kauugyat ay likiatna. <sup>8</sup> Isunga pangaasiyu ta epailayu kasin ay laylaychunyu hiya. <sup>9</sup> Nan usa ay kiapúna as nunsuratak kan chakayu ad kasin at ta mapanekeknekan mu manangtongpar kayu. <sup>10</sup> Mu wachay pakawanunyu, pakawanok us. O, nan kenatit-iwana at mu wachay masapor ay pakawanok, penakawanku at as nan mangilan Cristo ta mabendisyonan kayu am-in. <sup>11</sup> Enatku chi ta achi takú maawis ya maamis kan Satanas, tay ammu takú at nan mangotettet ay penapangkepna kan chitaku.

### *Nan Nunchanakian Pablo Ad Troas*

<sup>12</sup> As nan inumchanak ad Troas ay uy mangekasaba as nan Ammay ay Chamag maepangkep kan Cristo, naammuwak ay inchat at nan Apo nan chansak ay nun-isuru hid-i. <sup>13</sup> Ngem uray mu hiyasa, nuchanakianak as solet, tay maid sinib-atku kan Tito ay ifiak ay omaafurot. Isunga tenaynak nan iib-a takú hid-i, at inturuyku ay inmuy ad Macedonia.

### *Nan Mangafiakan Babaen Kan Cristo*

<sup>14</sup> Ngem munyamanak as solet kan Apo Dios, tay kiapú as nan nakius-usaanmi kan Cristo, kanayon kami ay makelak-am as nan nangafiakan. \* Hi Apo Dios at osarun chakami ay mangepakaammu as nan tataku henan am-in ay lukiar as nan maepangkep kan Cristo ay hiya nan kaman munfiangu ay insenso. <sup>15</sup> Tay nan panangekaskasabami as nan maepangkep kan Cristo at kaman munfiangu ay insenso ay kapnekan Apo Dios ay songsongsongun nan am-in ay manngor ay omaafurot ya nan chiyucha us maetoróng as nan pakachachaelancha. <sup>16</sup> As nan taku ay maesarakan, munfiangu nan manosongsongna, tay ometoróng as nan fiyag ay maid patingkiana. Ngem as nan malitaw, mun-akub ay kaman as nan akub chi natuy, tay ometoróng as nan chusa ay maid patingkiana. Ngachana ngarud nan makaekaman as nan nauy ay chunu? <sup>17</sup> Chakami nan makaekaman, tay finaor chakami kan Apo Dios, at tit-iwa nan am-in ay ifiagfiakami as nan mangilana kiapú as nan nakius-usaanmi kan Cristo. Achi kami kaman as nan ongor ay mangisursuru as kalen Apo Dios ay nan pangkepcha at ta fumaknangcha.

## 3

### *Nan Kafaelan Cha Pablo At Nurpu Kan Apo Dios*

<sup>1</sup> As nan nangifiag-anmi as na, ay kananyu un kasinmi cha elapu ay mangichaychayaw as achormi? Ay masapor omepraila kami as surat ay mangiyam-ammu as achormi kan chakayu? Winnu ay masapor epasuratmi kan chakayu ta epailami as nan tataku henan tukún ay il-ili ay ay-ayanmi? Achi! Hiyachi nan cha at-atun nan tapina, ngem achimi masapor atun chi. <sup>2</sup> Chakayu ay mismu nan kaman pannakasuratmi ay mangepakaammu as nan chunumi. Nan panagfiaygu ya pammatiyu at kaman surat as nan numnummi, at naraka ay fiasaun nan uray ngachana ay taku.\* <sup>3</sup> Mamaila as nan fiyaygu ay chakayu nan kaman surat Cristo ay enpaepaw-etna kan chakami. Fiakun tinta nan naosar as nan surat, ngem kun at nan Espiriton nan matataku ay Apo Dios.† Fiakun us kaman as nan nachappichap ay fiatu ay naisuratan nan Lintig Moises nan nangisuratana, ngem kun at as nan numnumyu.

<sup>4</sup> Kananmi un tit-iwa chaná, tay hi Apo Dios nan muntalekanmi ay mangfiachang kan chakami kiapú kan Cristo. <sup>5</sup> Achimi kanan un nurpu as nan mismu ay kafaelanmi nan nangekamananmi as nan nauy ay chunu, tay nan kafaelanmi at murpu kan Apo Dios. <sup>6</sup> Hiya challu nan nangichat as kafaelanmi ay munserfi as nan maepangkep as nan fiarú ay inturagna as nan katakutaku. Nan nauy fiarú ay turag ay maifisar as nan pannakafialin nan Espiritu at achi kaman as nan naisurat ay lintig ay infiakian Apo Dios kan

\* **2:14** Ad pus-uy, mu mangafiak nan chiyucha sorchachu ay i-Roma, munmarchacha as nan mangilinan tataku ta epailacha ay nangafiakcha as nan kufiat. \* **3:2** Jer. 31:33; 1 Co. 9:1-2;

1 Tes. 2:17-20 † **3:3** 1 Co. 2:4; Gal. 3:2-5; 1 Tes. 1:5-6

Moises. Tay nan ichat nan naisurat ay lintig at chusa ay maid patingkiana, ngem nan ichat nan Espiritu Santo at fiyag ay maid patingkiana.‡

*Nan Kaichayawan Nan Fiarú Ay Turag  
(Heb. 8:1-13)*

<sup>7</sup> Numnumun takú nan nangepail-an Apo Dios kan Moises as nan pan-nakafialina as nan nangichatana as nan lintigna ay naituktuk as nan fiatu. As nan hana ay timpu, enpailan Apo Dios as nan tataku nan kaichayawana babaen as nan lulan Moises ay kaman sumili. Uray mu cha komapukapuy nan sumiliyana, chaan poros naetoongan nan chiyucha kianak Israel hiya. Mu assid-i nan pannakafialin ay enpailan Apo Dios as nan nangichatana as nan lintig ay mangichat as chusa ay maid patingkiana,§ <sup>8</sup> ay kun achi kaskasin maila nan kaichayawana as nan mangichatana as nan Espirituna babaen as nan Ammay ay Chamag maepangkep kan Jesu Cristo ay chami ekaskasaba? <sup>9</sup> Tay mu naila nan kaichayawan Apo Dios as nan nangichatana as nan lintig ay mangichat as chusa ay maid patingkiana, kaskasin maila nan kaichayawana as nan mangiflangana as nan tataku as nalintig as nan mangilana. <sup>10</sup> Nan kenatit-iwana at namaid nan sikud ay kenaamud nan lintig, tay naesokat ad wani nan maid kaepachongana ay kaichayawan nan karen Apo Dios. <sup>11</sup> Tay mu wachay kaichayawan nan nasokatan, kaskasin wachay maid kaepachongana ay kaichayawan nan naesokat ay mawawacha in-inkiana.

<sup>12</sup> Kiapú ta namnamaunmi sa, naturud kami ay mun-is-isuru. <sup>13</sup> Achi kami kaman kan Moises ay liningfiana nan lupana ta achi mailan nan chiyucha kianak Israel nan cha komapuy ay sumiliyan nan lupana.\* <sup>14</sup> Ngem temangken nan numnum nan chiyucha kianak Israel, at chaancha naawatan nan laychun ay kanan nan enommat kan Moises. Uray nan chiyucha kianak Israel ad wani as nan mangfiasaancha as nan insurat Moises at kaman nalilingfian challu nan numnumcha, tay achicha maawatan nan ustу ay laychun tona ay kanan.† Makaan yangkiay nan manglilingub as nan numnumcha mu maetapicha kan Cristo. <sup>15</sup> O tit-iwa sa, tay uray ad wani ay mu maifiasi naan Lintig Moises, kaman wacha nan manglilingub as nan numnumcha. <sup>16</sup> Ngem mu munsakong ay omafurot nan taku as nan Apo, makaantu nan manglilingub as nan numnumna. <sup>17</sup> Nan “Apo” ay infiakiak as na at hiya nan Espiriton nan Apo, at as nan ngachana ay kawad-an tona ay Espiritu at wacha nan wayawayana as nan lintig ay mangichat as chusa ay maid patingkiana.‡ <sup>18</sup> Isunga chitaku am-in ay emmafurot achi malilingfian chi lupana ay kaman kan Moises at kaman takú sarming ay mangepaila as nan kaichayawan Apo Jesus, ya kanayon takú ay mafiarfialiwan ay omammay inkiana komaman takú kan hiya. Nan cha mangekaman as na kan chitaku at nan Apo challu ay hiya nan Espiritu Santo.

## 4

*Nan Fianga Ay Maid Pategna Ay Naittuwan Chi Napapateg*

<sup>1</sup> Isunga achi kami machischismaya, tay babaen as nan sug-ang Apo Dios, naichat kan chakami nan nauy ay panagserfi. <sup>2</sup> Achiyunmi nan am-in ay naetatafun ya kafiafiaiay ukialen chi tataku, ya maid us sikskapanmi.

‡ 3:6 Rom. 7:6; 8:2; Gal. 4:21-31    § 3:7 Exo. 34:29-35    \* 3:13 Exo. 34:29-35    † 3:14 Deut. 29:4;  
Isa. 6:9-10; Ezek. 12:2    ‡ 3:17 1 Co. 6:17

Achimi soksokatan nan kalen Apo Dios, ngem kunmi at epakaawat ay ustu nan tit-iwa. Assesa nan panagfiyagmi as nan mangiilan Apo Dios ta mangammuan nan uray ngachana ay taku ay ammay nan ukialimi. <sup>3</sup> Uray mu hiyasa, wachacha us nan tapina ay achicha maawatan. Ngem mu naetatafun nan Ammay ay Chamag ay chami ekaskasaba, naetatafun yangkiy as nan chiyuycha machusa in-inkiana. <sup>4</sup> Achicha omafurot, tay hi Satanas ay toray asna's luta ngamin ay mangetortoray kan chicha nan manglilingub as nan numnumcha. O, linilingfiana nan numnumcha ta achicha ilau nan silaw ay murpu as nan Ammay ay Chamag maepangkep as nan kaichayawan Cristo ay kail-an nan ustu ay ilan Apo Dios. <sup>5</sup> Fiakun nan achormi nan chami ekaskasaba, ngem kun at nan Apo ay hi Jesu Cristo. Kun pay chakami at fiabfiaarun chakami kan Cristo ta munserfi kami kan chakayu para kan hiya. <sup>6</sup> Tay hi Apo Dios nan nangifilin, "Mawacha nan silaw as nan kawad-an chi ngongot."\* Hi Apo Dios us challu nan nanilaw as nan numnummi ta maammuwanmi nan kaichayawan Apo Dios ay maila as nan lupon Cristo.

<sup>7</sup> Ngem chakami at maepachong kami as nan maid pategna ay fianga ay naittuwan chi napapateg, tay entalek Apo Dios kan chakami nan Ammay ay Chamag. Enatna sa ta maila ay nan nurpuwan nan kafaelan ay maid maepachongana at kan hiya, fiakun kan chakami ay apud ay tataku. <sup>8</sup> Kanayon kami ay machachagsunan as likiat, ngem achi kami munpaamis. Namen ongor ay nalilifok kami, ngem achi kami poros machischismaya. <sup>9</sup> Parpalikiatun chakami as nan tataku, ngem achi chakami enganganuy kan Apo Dios. Uray mu kiayud chakami patayun, ngem chaan kami natuy. <sup>10</sup> O, kanayonmi ay sasakiangun nan utý ay kaman as nan enommat kan Jesus as nan kawad-ana pay laing asna's luta ta nan fiyag ay inchatna at maila us as nan achormi. <sup>11</sup> Tit-iwa ay as nan matatakuwanmi, namen ongor ay kiayud kami matuy kiapú as nan enmafurotanmi kan Jesus ta maila koma as nan achormi ay matuy nan fiyag ay inchatna. <sup>12</sup> Isunga uray mu apparun chakami as nan utý, nan muntongparana at maichat kan chakayu nan fiyag ay maid patingkiana.

<sup>13</sup> Wacha nan naisurat as nan Kalen Apo Dios ay kanana, "Enmafurotak kan Apo Dios, isunga wacha nan infiakiak."† Kiapú ta assesa us ay pammati nan wacha kan chakami, uray mu maparpalikiat kami, ituruymi challu ay mangifiakia as nan pammati. <sup>14</sup> Tay ammumi ay hi Apo Dios ay nangtaku kan Apo Jesus manipud as nan utý at takuwunantus chakami kiapú as nan nakius-usaanmi kan Apo Jesus. Assesa us ay etakinantu chakami pati chakayu am-in ay omaafurot as nan kawad-ana.‡ <sup>15</sup> Am-in chaná ay liglikiatmi at para kan chakayu ta omong-ongor nan tataku ay manglakam as nan grasyan Apo Dios. Mu hiyasa, omong-ongor us nan tataku ay munyaman kan Apo Dios ya maichaychayaw hiya in-inkiana.

### Nan Panagfiyag Nan Omaafurot

<sup>16</sup> Isunga achi kami machischismaya. Uray mu cha komapukapuy nan achormi, inurkiw ay cha pumigsapigsa nan achi matmatuy ay fiyag ay wacha kan chakami. <sup>17</sup> Tay nan nauy liglikiat ad wani at kun henkemad ya yap-iw mu numnumun takú nan fiyag asna's luta ay munpeatingkiantu, ngem nan muntongparan nan nauycha liglikiat at fiyag ay maid patingkiana

\* **4:6** Gen. 1:3   † **4:13** Sal. 116:10   ‡ **4:14** Rom. 8:11; 1 Co. 6:14; 15:20-23; 1 Tes. 4:13-18

ya maid maepachongana. <sup>18</sup> Isunga nan nunumnumun takú yangkiay at fiakun nan mamaile asna's luta, ngem kun at nan achi mamaile ay wacha ad chaya. Tay nan mamaile asna's luta at wacha nan munpatingkiaana, ngem nan achi mamaile at maid munpatingkiaana.

## 5

### *Nan Fiarú Ay Achor Ay Nannamaun Nan Omaafurot (Rom. 8:11; 1 Co. 15:35-38; Filp. 1:20-26; 3:20-21)*

<sup>1</sup> Ammu takú ay mu matuy nan achor takú ay maepachong as nan fiawi ay naraka ay machachael, sokantau Apo Dios as fiarú ay achor ay maepachong as nan afong ay achi machadchachael ay wacha ad chaya ay fiakun taku nan nangkiaub, ngem hi Apo Dios mismu. <sup>2</sup> As nan matatakuwan takú asna's luta at kaman takú cha mun-anaanana kiapú as nan liglikiat takú. Isunga laraychun takú ay masokatan nan sikud ay achor takú as fiarú ay achor ay murpu ad chaya. <sup>3</sup> Tay mu hiyasa ay masokatan nan sikud ay achor takú as fiarú ay kaman takú nafiachuwan, achi takú mad-anan ay forfollachan. <sup>4</sup> As nan mamagyangan takú asna's luta, kaman takú cha mun-anaanana kiapú as nan liglikiat takú. Achek kanan un laychun takú ay matuy ya mad-anan ay forfollachan, ngem kun takú at ifiachu nan fiarú ay achor ay achi matmatuy. Mu hiyasa, nan nauy matuy ay achor at elas-iyanaan fiyag. <sup>5</sup> Hi Apo Dios nan nangesakiana kan chitaku para as nan nauy fiarú ay achor takú, ya inchatna us nan Espirituna ay hiya nan mangepasiguradu ay tongparun Apo Dios nan enkarina.

<sup>6</sup> Isunga napigsa nan numnummi. Ammumi ay as nan matatakuwan nan achormi asna's luta, maid kami pay laing as nan kawad-an nan Apo,\* <sup>7</sup> tay nan matatakuwanmi asna's luta at maiyunud as nan pammati, fiakun as nan mamaile. <sup>8</sup> Tit-iwa ay napigsa nan numnummi, ya kaskasinmi laylaychun as solet ay taynan nan achormi ta makeafong kami as nan Apo. <sup>9</sup> Ngem uray mu asna's luta nan kawad-anmi winnu ad chaya ay kawad-an nan Apo, nan pangkepmi yangkiay at palaylaychunmi hiya. <sup>10</sup> Tay masapor sakiangun takú am-in hi Cristo ta okomuna chitaku. Hiya nan mangichattu as nan gun-gunan nan tunggal usa ay maiyunud as nan en-enatna ay ammay winnu mangisiw as nan natatakuwana asna's luta.

### *Nan Makekappiaan Kan Apo Dios Babaen Kan Cristo (Rom. 5:9-11; Col. 1:19-22)*

<sup>11</sup> Kiapú ta ammumi ay kauugyat nan panang-okóm Apo Jesus, epapatimi nan kafaelanmi ay mangawis as nan tataku ta omafurotcha kan hiya. Ammon Apo Dios nan am-in ay pangkepmi, ya sapay koma ta ammuyu us. <sup>12</sup> Fiakunmi pangkep ay mangichaychayaw as achormi kasin kan chakayu as nan nauy ay infiakiami. Ngem kunmi at epakaammu yangkiay kan chakayu nan kiapúna as mangichayawanyu kan chakami ta ammuyu nan esongfiatyu as nan tataku ay mangichayaw as nan mamaile ay kasasaad nan taku, fiakun nan wacha as nan numnumna. <sup>13</sup> Mu wachay mangali un natongok kami, uray, tay para kan Apo Dios met nan am-in ay atunmi. Mu kanan us nan tapina un ustu nan numnummi, mafialin us, tay para met us as nan omammayanyu nan chunumi. <sup>14</sup> Tay nan layad Cristo nan mangetortoray kan chakami as nan am-in ay atunmi, tay siguradu kami ay natuy nan usa ay taku ay hi Cristo para as nan am-in, ya babaen kan

\* <sup>5:6</sup> Heb. 11:13

hiya, nan am-in ay tataku at maifilang as natuy.<sup>†</sup> **15** O, natuy hiya para as nan am-in ta as nan panagfiyang takú at fiakun koma nan laylaychun takú nan unuchun takú, ngem kun at nan laylaychun Cristo ay natuy ya nataku manipud as nan utúy para kan chitaku.

**16** Isunga ad wani, achimi at okomún nan uray ngachana ay taku ay maifisar as nan mamaaila ay kasasaad chi taku. Iyafudku ay ad kasin at nan namigfikanmi kan Cristo at maifisar as nan mamaaila, ngem ad wani, naflaliwan nan mangnunumnumumi kan hiya. **17** Tay uray ngachana ay taku ay makius-usa kan Cristo at munfialinun Apo Dios sa ay taku as fierú ay taku. Nan sikud ay katakatura at napapug ya nasokatan as fierú! **18** Hi Apo Dios nan nangekaman kan chatona am-in. Enpakappiana chitaku kan hiya babaen as nan enat Cristo. Inchatna us kan chakami nan nauy ay chunu ay mangepakappia as nan tataku kan hiya. **19** Nan laychunmi ay kanan at cha epakappian Apo Dios nan am-in ay tataku kan hiya babaen as nan natuyan Cristo as nan koros. O, babaen kan Cristo, penakawan Apo Dios nan am-in ay tataku as nan fiasfiasorcha, ya chaana infilang chasa as maekontra kan chicha. Hiyana nan entalek Apo Dios kan chakami ay uymi isuru. **20** Isunga chakami nan pannakaachor Cristo, ya babaen as nan epakpakaammumi kan chakayu, kaman hi Apo Dios mismu nan cha mangaw-awis as nan katakutaku. Kiapú kan Cristo, epakpakaasimi ngarud ay makekappia kayu kan Apo Dios. **21** Tay hiyana nan enat Apo Dios para kan chitaku: Uray mu maid poros fiasor Cristo, infilang Apo Dios as fiasor Cristo nan fiasfiasor takú. Enatna na ta babaen as nan nakius-usaan takú kan Cristo, maetapi takú as nan kenalintig Apo Dios.

## 6

**1** Isunga kiapú ta makidkidnu kami kan Apo Dios, epakpakaasimi na kan chakayu: Achiyu eparufus ay nan grasyan Apo Dios ay enawatyu at mamaid nan kotokna as nan panagfiyangyu. **2** Tay wacha nan naisurat as nan Kalen Apo Dios ay kanana,  
“Chingorku nan kararagyu as nan timpu ay enkeddengku ay manug-angak

kan chakayu, ya finadngak chakayu as nan inumchanan nan ustу ay urkiw ay enkeddengku ay mangesarakanan kan chakayu.”\*

Chungrunyu na! Ad wani nan hana ustу ay timpu ay mang-awatanyu as nan grasyan Apo Dios. Ad wani nan hana ustу ay urkiw ay maesarakanananyu.

### *Nan Chiyuycha Liglikiat Pablo*

**3** Achimi laychun ay wachay kaskas-otan nan enpadnon Apo Dios kan chakami. Isunga il-ilaunmi ta maid ekamkamanmi as kiapón chi mae-sakiawan chi pachongmi ay tataku.<sup>†</sup> **4** Kunmi at epaila ay munserserfi kami kan Apo Dios as nan am-in ay atunmi. O, anosanmi nan am-in ay mailiwiwas, liglikiat, ya kauugyat ay cha om-ommat kan chakami.

**5** Enan-anosanmi ay napakpak-or, naifiarfiarud ya nakurkuru. Nabnabray kami as solet, ya napachasanmi ay chaan nasnassuy ya nangnangan.<sup>‡</sup>

**6** Epailami us ay munserserfi kami kan Apo Dios babaen as nan nacharos ay ukialimi, pannakaammumi kan Apo Dios, kenamanang-eta-unmi ya nan kenamanangsug-angmi as nan iib-ami. O, epailami chasa babaen as nan pannakafialin nan Espiritu Santo ay wacha kan chakami, ya babaen

† 5:14 Ara. 2:37-41; 16:30-31 \* 6:2 Isa. 49:8 † 6:3 1 Co. 10:32 ‡ 6:5 Ara. 16:23; 19:23; 1 Co. 4:11; 2 Co. 11:23-33

as nan tit-iwa ay layadmi <sup>7</sup> ya mangisursuruwanmi as nan kenatit-iwa, ya babaen as nan pannakafialin Apo Dios. Wacha us nan kenalintigmi ay inchat Apo Dios ay maepachong as nan fiangkaw ya karasaymi. <sup>8</sup> As nan munserseriyamni at mapadpachayawan kami, ya mu mamingsan at mapabpfaiinan kami. Masmas-ot kami, ngem mu mamingsan at marisrispu kami. Uray mu maifilang kami as nangutum, tit-iwa challu nan chami ifiagfiakia. <sup>9</sup> Kanan nan tapina un maid filangmi as tataku, ngem nunchinngor kami met. Kaman kami natuy as nan mangilan nan tapina, ngem kukutug kami met ay matataku. Maparpaliwasan kami, ngem chaan kami met challu natuy. <sup>10</sup> Uray mu mamingsan at ngumuyus kami, kanayon kami challu ay munlagsak. Uray mu pugli kami, pafiaknangunmi nan ongor ay tataku. Maid kinakumi asna's luta, ngem kuwami nan am-in.

<sup>11</sup> Iib-ak ay i-Corinto, maid poros entafunmi kan chakayu, ngem kunmi at infiakia kan chakayu. Ongor pay chi layadmi kan chakayu. <sup>12</sup> Fiakun chakami nan achi manglaylayad kan chakayu, ngem kun at chakayu nan nafiaiw nan layadna kan chakami. <sup>13</sup> Isunga chakayu ay ifilangku as an-akku, pangaasiyu ta sufialetanyu nan ongor ay layadmi kan chakayu.

#### *Nan Tukun Maepangkep As Nan Makekadkadwaan As Nan Achi Omaafurot*

<sup>14</sup> Achi kayu makius-usa as nan chiyuycha achi omaafurot. Tay ay kun mafialin ay munkatornosan nan nalintig ya nan achi nalintig ay taku? Ay kun mafialin ay munlamong nan lawag ya nan ngongot? <sup>15</sup> Achi poros munpachong nan numnum cha Cristo kan Satanas, isunga achi us munpachong nan omaafurot ya achi omaafurot. <sup>16</sup> Ay kun mafialin ay maetapi nan didiosen as nan templon Apo Dios? Achi! Isunga assesa us kán chitaku, tay chitaku nan templo ay omaafongan nan matataku ay Apo Dios. Tay kanan Apo Dios ay mismu,

“Omafongak kan chicha ya kadkadwaok chicha. Ha-un nan Apo Dioscha ya chicha nan tatakok.”<sup>§</sup>

<sup>17</sup> Isunga kanan us Apo Dios,  
“Taynanyu chicha ta maisiyan kayu kan chicha. Achi kayu maes-esnop as nan assi ta awatok chakayu.”\*

<sup>18</sup> “Mu hiyasa nan atunyu, ha-untu nan Amayu ya chakayuntu nan an-akku.” Hiyachi nan kenalen nan Mannakafialin ay Apo Dios.<sup>†</sup>

## 7

<sup>1</sup> Chakayu ay laylaychok, kiapú kan chatona ay enkaren Apo Dios kan chitaku, kaanun takú nan am-in ay mangepaassi as nan achor ya numnum takú. Epapati takú nan kafaelan takú ay mangunud as nan nasantowan ay panagfiyag inkiana maid munkurangan takú babaen as nan manay-chayawan takú kan Apo Dios.

#### *Nan Lagsak Pablo As Nan I-Corinto*

<sup>2</sup> Pangaasiyu ta epailayu nan layadyu kan chakami, tay maid met enenatmi as achi nalintig kan chakayu. Maid chinachaelmi as pammatina kan chakayu, ya maid us insiksikapanmi kan chakayu. <sup>3</sup> Achek kanan na ay mangepafiasor kan chakayu, tay pararu met nan layadmi kan chakayu ay kaman as nan inflafiafiakiak kan chakayu ad kasin. Isunga uray mu ngachana

---

§ **6:16** Lev. 26:12; Jer. 32:38; Pal. 21:3      \* **6:17** Isa. 52:11      † **6:18** Isa. 43:6; Jer. 31:9

nan ommat kan chitaku as nan matatakuwan winnu matuyan takú, achi munfialiw nan nauy layadmi kan chakayu. <sup>4</sup> Talekok chakayu as solet, ya ichayawku chakayu as nan tapina. O, uray as nan am-in ay likiatku at naragsakak chaluu, tay pinnigisa nan numnumku kiapú kan chakayu.

<sup>5</sup> Tay as nan inumchananmi ad Macedonia, chaan nun-ib-iblay nan achormi ya nan numnummi kiapú as nan ongor ay malilifokanamni. Tay henan kumpurmi ay ay-ayanmi at wachacha nan nangonkontra kan chakami, ya wachacha us nan nunchanchanakianmi. <sup>6</sup> Ngem hi Apo Dios ay mangepapigsa as nan numnum nan chiyucha machischismaya at penapigsana nan numnummi babaen as nan nangepafiangchana kan Tito kan chakami. <sup>7</sup> Fiakun yangkiay nan enmaliyana nan nangepapigsa as numnummi, ngem babaen us as nan nangepachamakiana as nan maepangkep as nan nangepapigsaanyu as nan numnumna. Infiakiana us ay mailiw kayu kan ha-un, ya nunfiafiawi kayu as solet as nan nangsaktananyu kan ha-un ad kasin. Kanana pay un laychunyu kanu ay mangiyapa ya mangesaket kan ha-un. Isunga kaskasinak naragsak ad wani.

<sup>8</sup> Uray mu nginmuyus kayu kiapú as nan chiyuy suratku, achiyak munfiafiawi ad wani ay nangisurat as chi. Ngem nunfiafiwiyak as akét as nan nangammuwak ay nginmuyus kayu, uray mu henkemad yangkiay. <sup>9</sup> Ad wani, naragsakak chaluu, fiakun kiapú as nan nangepanguyusak kan chakayu, ngem kiapú as nan nunfiafiwiyanyu ay hiyasa nan nunfianakian nan nangepanguyusak kan chakayu. Tay nan hana ngunguyusyu at enosar Apo Dios ta maid mangisiw as om-ommat kan chakayu babaen kan chakami. <sup>10</sup> Achi takú ifiafiawi nan nginmunguyusanyu. Tay nan ngunguyus ay osarun Apo Dios at muntongpar as nan munfiafiwiyan nan tataku as nan achi ustу ta maesarakancha. Ngem nan ngunguyus nan chiyucha achi omaafurot at muntongpar as nan chusa ay maid patingkiana. <sup>11</sup> Numnumunyu nan ammay ay en-enat Apo Dios kan chakayu babaen as nan nauy ngunguyusyu! Tay ad wani at alistu kayu ay mangiafiawi as nan fiasoryu. Finnungat kayu as nan mangisiw ay ekamkaman nan iib-ayu. Inmugyat kayu, tay anaká ya machusa kayu. Laraychunyu ay omaammay kasiñ nan munkakadwaan takú. Chinusayu ay ustу nan nakafiasor. Kiapú kan chatona am-in ay en-enatyu, empailayu ay maid maepafiasor kan chakayu. <sup>12</sup> As nan nunsuratak, fiakun yangkiay nan taku ay nakafiasor winnu nan taku ay nakafiasorana nan kiapúna, ngem kunak at nunsurat ta epakaammok kan chakayu as nan mangiilan Apo Dios ay tit-iwa ay lalaychunyu ay mangepalaylayad kan chakami. <sup>13</sup> Isunga pinnigisa nan numnummu.

Fiakun yangkiay chatud-i nan nunlagsakanmi, ngem kaskasin kami nalaylaychan as nan nangil-anmi ay naragsak hi Tito, tay nakaan nan chanagna kan chakayu kiapú ta naragsak kayu am-in as nan nang-awatanyu kan hiya. <sup>14</sup> Tay ad kasiñ, inchayawku chakayu kan hiya, ya chaanak nafainan kiapú as nan infiagfiakiak. O, kaman as nan kenatit-iwan nan am-in ay infiagfiakiami kan chakayu at tit-iwa us nan kenarkalimi ay nangichayaw kan chakayu. <sup>15</sup> Isunga cha pumigsapigsa nan layadna kan chakayu ad wani, tay nunumnumuna ay naragsak kayu am-in ay mangtongpar as nan infiakiana kan chakayu, ya empailayu us nan rispituyu as nan nangmangiliyanyu kan hiya. <sup>16</sup> Ongor paat chi lagsakku ad wani, tay ammok ay maflalin ay talekok chakayu as nan am-in.

### Nan Mamadngan As Nan Makasapor

<sup>1</sup> Iib-ak, laychunmi ay maammuwanyu nan ammay ay nuntongparan nan grasyan Apo Dios as nan chiyuycha iglesia ad Macedonia. <sup>2</sup> Tay uray mu nunsidlay likiatcha ya uray mu pugliche as solet, ong-ongor challu nan inchatcha ay fiachang as nan iib-acha ay omaafurot kiapú as nan ongor ay lagsakcha kan Apo Dios. <sup>3</sup> Paneknekak ay inchatcha nan kafaelancha ay ichat, ya nasorsorok pay mu nan kafaelancha ay ichat. Hiyasa nan enatcha, tay chaancha napelpellet. <sup>4</sup> Enpapaticha ay nangepakaasi kan chakami ta maettancha as chansacha ay umichat as fiachangcha as nan chiyuycha tatakon Apo Dios ad Judea.\* <sup>5</sup> Ong-ongor nan enatcha mu nan nemnamamami. Tay entalekcha on-ona nan mismu ay fiyagcha as nan Apo, haat kan chakami, tay ammucha ay hiyasa nan enkeddeng Apo Dios ay atuncha.

<sup>6</sup> Kiapú ta hi Tito nan chakus nangelapu as nan hana ay planuyu ay mun-among as ifiachangyu as nan kawad-ana pay laing kan chakayu, enawismi hiya ay munfiangad hesa ta fiadngana chakayu ay manglopas as nan hana planuyu ay mun-among ay mangepaila as sug-angyu. <sup>7</sup> Nafiaknang kayu met kayman as nan pammatiyu, as nan mangam-ammuwanyu kan Apo Dios ya as nan kafaelanyu ay mun-isuru. Makakud kayu pay ay munserfi kan Apo Dios, ya ongor us chi layadyu kan chakami. Isunga ay achi mafialin ay epailayu us ay nafiaknang kayu as layad ay fumachang as nan iib-ayu ay maid kenagekot kan chakayu?†

<sup>8</sup> Achek kanan un filinku na kan chakayu. Laychok yangkiay ay epakaammu kan chakayu ay laraychun nan tapina ay fumachang ta mu turachunyu chicha, paneknekanyu us ay tit-iwa nan layadyu. <sup>9</sup> Ammuyu met nan grasyan Apo takú ay Jesu Cristo, tay uray mu nafiaknang hiya ad chaya, nunfialin hiya as pugli para kan chakayu as nan nunfialinana as taku ta fumaknang kayu babaen as nan hana ay kenapugli.

<sup>10</sup> Isunga as nan munnunumnumku maepangkep as na at un-unuyna mu lopasunyu nan enlapuyu ad tawwun, tay chakayu nan enmon-oná ay nunnumnum ya enmon-oná challu ay nangelapu as sa. <sup>11</sup> Epapatiyu ngarud ay manglopas ay mangichat as nan kafaelanyu ay ichat ta nan manglaraychanyu ay munlopas ay umichat at kaman as nan manglaraychanyu ay nunplanu ay umichat. <sup>12</sup> Tay mu tit-iwa ay laraychunyu ay umichat, awatuntu Apo Dios nan ichatyu ay maiyunud as nan kafaelanyu ay ichat, tay achina namnamaun ay ichatyu nan achiyu kafaelan ay ichat.

<sup>13</sup> Achek kanan un munlikiat kayu ta fumaknang koma nan tapina kiapú as nan chayu id-ichat. <sup>14</sup> Nan laychok yangkiay ay kanan at mapapchong kayu koma. Kiapú ta wachay subrayu ad wani, ammay mu ifiachangyu chachi as nan makasapor ta mu as tapen chi urkiw ay chakayu nan makasapor, ichatcha us nan subracha kan chakayu. Mu hiyasa nan atunyu, mapapchong kayu am-in. <sup>15</sup> Kaman as nan naisurat as nan Kalen Apo Dios ay kanana,

“Nan taku ay ongor chi enamongna at maid subrana, ya nan taku ay akéti chi enamongna at maid munkurangana.”‡

\* <sup>8:4</sup> Ara. 11:27-30; 24:17; Rom. 15:25-27

† <sup>8:7</sup> 1 Co. 1:5; 12:10

‡ <sup>8:15</sup> Exo. 16:1-18

*Nan Naifiaoran Cha Tito Ad Corinto  
(1 Co. 16:1-4)*

<sup>16</sup> Munyamanak kan Apo Dios, tay tit-iwa ay laraychun Tito ay fumachang ay kaman as nan manglaraychananmi ay fumachang kan chakayu. <sup>17</sup> Ammok ay tit-iwa na, tay fiakun yangkiay nan chinawatmi nan inyafudna, ngem hiya mismu nan nunnumnum ay omali kan chakayu kiapú as layadna ay fumachang kan chakayu. <sup>18</sup> Nan ifiaormi us ay kadwan Tito at nan usa ay ifia takú ay omaafurot ay nunchinngor as nan am-in ay iglesia kiapú as nan nangekaskasabaana as nan Ammay ay Chamag. <sup>19</sup> Fiakun yangkiay sa, tay hiya at usa us ay chinutokan nan chiyuycha iglesia ay makeali kan chakami ay mangiyuy as nan enamongyu ad Jerusalem. Atunmi na ta maichayaw hi Apo Dios ya ta epailami nan layadmi ay fumachang. <sup>20</sup> Il-ilaunmi nan chami at-atun ay mangor-ornong ya mangiwar-waras as nan hanaongoongor ay maifiachang ta maid mangepafiasor kan chakami. <sup>21</sup> Tay nan pangkepmi at atunmi nan ustus ay maekaman, fiakun yangkiay as nan mangiilan Apo Dios, ngem as nan mangiilan us nan tataku.

<sup>22</sup> Wacha pay nan usa ay ifia takú ay ifiaormi ay makiuy kan chicha. Namen ongor ay penaneknekanmi nan kenamakakudna ay munserfi kan Apo Dios. Ad wani, kiapú as nan ongor ay talekna kan chakayu, kaskasina laychun ay mangfiachang kan chakayu. <sup>23</sup> Kun pay hi Tito, hiya nan kadwak ay mangfiachang kan chakayu. Kun pay nan chiyuycha chuwa ay iib-a takú ay makiuy kan hiya, chicha nan pannakaachor nan chiyuycha iglesia, ya babaen kan chicha, maichaychayaw hi Cristo. <sup>24</sup> Epailayu ngarud nan layadyu kan chicha ta mapaneknekan as nan chiyuycha iglesia hena ay napudnu nan layadyu ya tit-iwa us nan mangichaychayawanmi kan chakayu.

## 9

*Nan Mangfiadnganan As Nan Makasapor*

<sup>1</sup> Ammok ay achiyak masapor munsurat kan chakayu as maepangkep as nan nauy ay ifiachang as nan tatakon Apo Dios ad Judea. <sup>2</sup> Tay naammuwak at ay laraychunyu ay fumachang ay hiyasa nan kiapúna ay inchayawku nan maepangkep kan chakayu as nan chiyuycha i-Macedonia. O, inchayawku chakayu ay i-Acaya, tay nakasakiana kayu ay fumachang nunlapu ad tawwun, ya kiapú as nan nauy manglaraychananyu ay fumachang, naawis nan kaongoran kan chicha ay mun-among us as ifiachangcha.\* <sup>3</sup> Ngem ifiaorku nan nauycha iib-a ta nan nauy panangichayawku maepangkep kan chakayu at mapaneknekan ay fiakun yangkiay karkali ya ta nakasakiana kayu ay fumachang ay kaman as nan inflakiak. <sup>4</sup> Tay mu maketakin nan iib-a takú ay i-Macedonia kan ha-un as nan omaliyak hesa, ya maammuwancha ay chaan kayu nakasakiana as ifiachangyu, mafainan kamintu as solet, tay achi tit-iwa nan panangichayawmi maepangkep kan chakayu. Assesa us ay mafainan kayuntu. <sup>5</sup> Isunga ninumnumku ay epaon-onak chaná ay iib-a ta fiadngancha chakayu ay mangamong as nan enkariyu ay ifiachangyu ya ta nakasakianantu sa as nan umchanak hesa. Tay mu hiyasa nan atunyu, maepailantu nan manglaraychananyu ay umichat ay achi kayu mapelpellet.

<sup>6</sup> Numnumunyu na: Nan taku ay akét chi etanumna at akét us nan apituna, ngem nan taku ay ongor chi etanumna at ongor us nan apituna. <sup>7</sup> Isunga

\* 9:2 Nan siyudad ay Corinto at siyudad henan Probinsiya ay Acaya.

waschi koma un numnumuna omona nan mafialin ay ichatna, angkiay ichatna kiapú as lagsakna. Achi poros nasaket chi numnumna ay umichat winnu achi mapelepet. Tay laychun Apo Dios nan naragsak ay umichat.<sup>†</sup> <sup>8</sup> Kafaelan Apo Dios ay mangichat kan chakayu as ong-ongor mu nan kasaporanyu ta kanayon ay maid munkuranganyu ya ta ong-ongor pay nan masubra ay maifiachangyu as nan tapina ay tataku. <sup>9</sup> Kaman as nan naisurat as nan Kalen Apo Dios maepangkep as nan nalintig ay taku ay kanana, “Maid ek-ekotna ay umichat as nan chiyuycha makasapor. Isunga achi maliwliw-an nan ammay ay ekamkamana in-inkiana.”<sup>‡</sup>

<sup>10</sup> Tay hi Apo Dios ay mangid-ichat as fing-i as nan muntantanum ya nan kahun chi tataku at hiya challu nan mangid-ichat ya mangepaong-ongor as nan wacha kan chakayu ta mataptapiyan nan ammay ay chayu at-atun ay umidichat. <sup>11</sup> Pafiaknanganantu chakayu as am-in ay karasen chi kenafiaknang ta mafiadnganyu ay kankanayon nan makasapor. Mu awatuchantu nan fiachangyu ay epaw-etyu kan chakami, ongorchantu nan munyaman kan Apo Dios. <sup>12</sup> Nan nauy chayu at-atun ay fumadfiachang at achi yangkiay maichat nan kasaporan nan tatakon Apo Dios, ngem omong-ongorcha us nan munyaman kan Apo Dios. <sup>13</sup> Kiapú ta napaneknekan ay tit-iwa nan hana chayu at-atun ay fumachang, ongorchantu nan mangichaychayaw kan Apo Dios, tay mailacha ay chayu tongtongparun nan Ammay ay Chamag maepangkep kan Cristo. Nan usa pay at chayawuncha hiya kiapú ta maid ek-ekotyu ay fumachang kan chicha ya as nan tapina ay omaafurot. <sup>14</sup> Epapasnekchantu ay mangekararag kan chakayu, ya mailiwha kan chakayu kiapú as nan grasya ay maid kaepachongana ay inchat Apo Dios kan chakayu. <sup>15</sup> Munyaman takú kan Apo Dios kiapú as nan achi mafilang chi fiarorna ay inchatna kan chitaku.

## 10

### Nan Kalibfengan Pablo

<sup>1</sup> Wachacha kanu nan mangarkali un napakumbabaak mu maesasakian-gak kan chakayu, ngem mu achawwiyyak, naturuchak as nan suratku kan chakayu. Isunga ha-un ay Pablo at wacha nan laychok ay chawatun kan chakayu kiapú as nan kenapakumbaba ya kenaanos Cristo ay chak tururachun. <sup>2</sup> Pangaasiyu ta achiyak koma peletun ay mangepaila as nan kenaturudku as nan omaliyyak hesa. Tay tit-iwa ay naturuchak ay maningor as nan chiyuycha mangarkali un nan ukialimi ya pangkepmi at nurpu as nan laylaychun chi taku yangkiay. <sup>3</sup> Tit-iwa ay taku kami yangkiay ay kaman kan chakayu, ngem nan atunmi ay makikufiat as nan mangotettet at achi kaman as nan atun chi taku ay makikufiat. <sup>4</sup> Tay nan armas ay os-osarunmi at fiakun nan os-osarun chi tataku asna's luta, ngem nan armas Apo Dios ay wachay pannakafialina ay mangamis as nan mangontra kan hiya. <sup>5</sup> Isunga amisunmi nan achi tit-iwa ay panagpanpanfor ya numnum nan nunkanganas ay tataku ay manglilingub as nan pannakaawatcha ta achicha afurotun nan kenatit-iwa maepangkep kan Apo Dios. O, amisunmi nan sososekcha ta mafialwan nan numnumcha ay mangunud as nan laychun Cristo. <sup>6</sup> As nan mangepail-anyu ay maid kenakurang nan panagtalekyu kan Cristo, nakasakiana kami ay mangchusa as nan am-in ay nunkasokel.

<sup>†</sup> 9:7 Exo. 25:2; Deut. 15:10; Rom. 12:8; 2 Co. 8:12    <sup>‡</sup> 9:9 Sal. 112:9

<sup>7</sup> Kokomsaw kayu, tay ilaunyu yangkiay nan mamaila as nan usa ay taku fiakun nan wacha as numnumna. Mu wacha kan chakayu hesa nan mangali un takon Cristo hiya, masapor numnumuna ay chakami us at tatakon Cristo. <sup>8</sup> Tay uray mu pararu nan enatku ay nangichayaw as nan kalibfenganmi, achiyak mafainan, tay nan Apo nan nangichat kan chakami as nan nauy ay kalibfengan ta papigsaunmi nan pammatiyu, achiimi chachaelun. <sup>9</sup> Infiakiak na ta achiyu kanan un chak padpachasun ay mangug-ugyat kan chakayu babaen as nan sursuratku. <sup>10</sup> Tay wachacha nan tapina kan chakayu hesa ay mangali, “Naturud ya natoray hi Pablo as nan suratna, ngem mu wacha hiya kan chitaku, kaman maid kafaelana ya nan kanana at kaman maid kotkotokna.” <sup>11</sup> Nan cha mangarkali as assesa at masapor maawatana ay nan empakaammumi as nan suratmi at hiyasa us challu nan atunmi mu wacha kami hesa kan chakayu.

<sup>12</sup> Achiimi poros laychun ay mangepachong as achormi as nan chiyuycha mangichaychayaw as nan mismu ay achorcha. Nan panglukudcha as nan kenaammaycha at nan mismu ay achorcha. Kaman nakutiw chi numnumcha! <sup>13</sup> Ngem mu chakami, nan epangasmi yangkiay at nan ifiakian Apo Dios. Tay nan mafalin yangkiay ay epangasmi at nan maepangkep as nan chunu ay entalek Apo Dios kan chakami, at naetapi kayu as nan nauy chunumi. <sup>14</sup> Isunga chaanmi lenafus ay nangepangas as nan kalibfenganmi ay mun-ekasaba kan chakayu hesa, tay chakami met nan enmon-onu ay nangekasaba as nan Ammay ay Chamag maepangkep kan Cristo as nan enmaliyanmi kan chakayu. <sup>15</sup> Achiimi us ifilang nan chunon nan tapina as chunumi ta epangasmi, ngem kunmi at namnamaun ay pumigsa nan pammatiyu ta kaskasinyu ichayaw chakami kiapú as nan chunumi kan chakayu <sup>16</sup> ya ta ekasabami nan Ammay ay Chamag henan tapina ay achaachawwi ay il-ili ay maid pay uy nun-ekaskasaba. Tay nan achiimi laychun at nan mangepangasanmi as nan chinnon nan tapina ay mangali un fiyangmi chi ay chunu. <sup>17</sup> Unuchun takú nan naisurat as nan Kalen Apo Dios ay kanana, “Mu wachay munlayad ay munpangas, nan enat nan Apo yangkiay nan masapor epangasna.”\*

<sup>18</sup> Tay nan tit-iwa ay maifilang as ammay ay taku at nan achi mangichayaw as achorna, ngem kun at hi Apo Dios nan mangichayaw kan hiya.

## 11

### *Nan Infiakian Pablo Maepangkep As Nan Achi Tit-iwa Ay Apostoles (1 Co. 9:1-18)*

<sup>1</sup> Sapay koma ta anosanyu ay chungrun nan akét ay ifiakiak kan chakayu, uray mu nan munnunumnumyu at nangokngokak. Pangaasiyu ta anosanak. <sup>2</sup> Tay tit-iwa ay esasaketku chakayu ay kaman as nan panangesaket Apo Dios as nan tatakuna. Tay maepachong kayu as nan fiarasang ay inturagku ay epaasawa as nan us-usa ay laraki ay hi Cristo, isunga laychok ay nacharos kayu as nan urkiw ay munchuyasanyu. <sup>3</sup> Ngem umugyatak, tay atun at mu maallilaw kayu ay kaman kan Eva ay naisikapan as nan kenasikap nan urug, at taynanyu nan tit-iwa ay layadyu kan Cristo.\* <sup>4</sup> Tay mu wachay omali ay tukún chi ekaskasabana maepangkep kan Jesus, hiya met nan chungrunu. Naraka kayu pay ay omawat as tukún ay espiritu ay fiakun nan Espiritu Santo ay sikud ay enawatyu. Naraka kayu us ay omafurot as nan chamag ay kanancha un ammay, ngem tukún as nan

\* **10:17** Jer. 9:24; 1 Co. 1:31    \* **11:3** Gen. 3:1-6

Ammay ay Chamag ay enkaskasabami kan chakayu. Ay apo kayu! Fiakun met koma assesay atunyu! <sup>5</sup> Nan kanak at, "Ay kunak nababbaba mu nan nunkangatu kanu ay apostolesyu?" Achiyak met! <sup>6</sup> Uray mu achiyak naraing ay munkali, achiyak met munkurang as pannakaammu as nan maepangkep kan Apo Dios. Ammuyu ay tit-iwa na, tay kankanayon ay enpappaialami kan chakayu nan kenatit-iwa maepangkep kan hiya as nan am-in ay nun-isuruwanmi.

<sup>7</sup> Maid poros enar-arak kan chakayu as lagfok ay nangekaskasaba as nan Ammay ay Chamag ay nurpu kan Apo Dios. Nunpákumbabaak ta maepangatu kayu kiapú as nan insursurok. Ay fiasorku nan nangekamanak as chi? Fiakun! <sup>8</sup> Nan kenatit-iwana at kamanku enakiwan chi tapina ay iglesia, tay as nan nunserserfiyak kan chakayu at enaw-awatku nan inchatcha ta mafiadngak chakayu. <sup>9</sup> As nan kawad-ak kan chakayu, chaanak kinumkumchaw kan chakayu as nan kinmurangan nan kasaporak, tay wachacha nan iib-a takú ay nurpu ad Macedonia ay nangiyali as kasaporak. Isunga chaanku poros penarpalikiat chakayu, at assesa us nan atok as tapen chi urkiw.<sup>†</sup> <sup>10</sup> Nan kenatit-iwa ay nurpu kan Cristo at hiyachi nan wacha kan ha-un ay chak ifiagfiakia. Maid ngarud makaepakinak kan ha-un ay mangepangpangas as na, tay chaanak poros kinumkumchaw as fiachang kan chakayu winnu as nan tapina ay tataku henan il-ili ad Acaya. <sup>11</sup> Ngachana ngata nan kiapúna as achek kumkumchawan kan chakayu? Ay kiapú ta achek laylaychun chakayu? Ammon Apo Dios ay laylaychok chakayu!

<sup>12</sup> Ituruyku challu ay achi kumkumchaw kan chakayu ta maid chansan nan chiyucha achi tit-iwa ay apostoles ay mangepangas as chunucha ay mangarkali un maid natkunan nan chacha at-atun as nan chami at-atun. <sup>13</sup> Tay nan assesesa ay tataku at fiakuncha tit-iwa apostoles. Omallilawcha as nan am-in ay atuncha ya nunpamarangcha yangkiay as tit-iwa ay apostoles Cristo. <sup>14</sup> Achi takú koma masmaschaaw as chi, tay uray hi Satanás at mafialin ay munpaila as kaman sumili ay anghel ay nurpu kan Apo Dios. <sup>15</sup> Isunga mu kafaelana chi, achi kayu us masmaschaaw mu nan chiyucha munserserfi kan hiya at munpailacha us as kaman nalintig ay munserserfi kan Apo Dios. Ngem nan ommat kan chicha as tapen chi urkiw at maifisar as nan mangotettet ay chacha atuutan.

### *Nan Likiat Pablo Kiapú As Nan Kenaapostolna*

<sup>16</sup> Kasek kanan un masapor achiyu cha numnumnumun ay nangokngokak kiapú ta nan achorku nan ifiagfiakiak. Ngem uray mu assesa nan mangnunumnumyu kan ha-un, anosanak koma ya chungrunu pay nan akét us ay ichayiwku ay kaman as nan atun nan tapina. <sup>17</sup> Nan nauy mangichayawak as achorku at achi maifisar as nan ukialen Apo Jesus, ngem kun at as nan ukialen chi nangokngok. <sup>18</sup> Ngem kiapú ta ongorcha nan cha mangichayaw as achorcha ay maifisar as nan numnum nan tataku asna's luta, hiyasa us nan atok. <sup>19</sup> Tay ensa kananyu un mamasilib kayu, anosanyu ay chungrun nan kanan nan nunkangokngok ay tataku kan chakayu, ya maragsakan kayu pay. Anuy paat nunsidla sa as kenasilibyu! <sup>20</sup> Tay munfialfialinuncha chakayu as fiabfiaaruncha, winnu aminuncha nan kinakuyu, winnu isiksikapan chakayu, winnu epangpangaschay achorcha kan chakayu, winnu pararu ay pabpfainancha chakayu, ngem eta-ta-unyu

<sup>†</sup> **11:9** Ara. 18:3; 20:33-35; Filp. 4:14-15; 1 Tes. 2:9

pay laing chi ekamkamancha. <sup>21</sup> Kananyu un nakapuyak tay acheck atun chi assisid-i. Mafainak as solet, tay kurang chi turudmi ay mangekaman as assisid-i.

Ngem mu maepangkep as turudcha ay mangichayaw as achorcha, ayu munkaliyak us ay kaman as nan taku ay nangokngok. <sup>22</sup> Kanancha un Hebreocha. Uray met us ha-un at Hebreowak. Kanancha un kianak Israel chicha. Uray ha-un at kianakak kan Israel. Kanancha us un apucha chin Abraham. Uray us ha-un at apok hiya. <sup>23</sup> Kanancha us un munserserficha kan Cristo. Kamanak natongtongok ay cha mangifiagfiakia as na, ngem epapatek ay mangali un napatpateg nan nunserserfiyak kan Cristo, tay makagkakuchak ay munchunu para kan Cristo mu chicha. Ong-ongor nan naifiarfiaruchak kiapú kan hiya, ya achi us maflang nan nasapsapletak. Namen ongor ay kiayuchak matuy.† <sup>24</sup> Namen lema ay senapletak as nan kakailiyak ay Judio as hintutlon pupuru ya siyam.§ <sup>25</sup> Namitluwak penak-opak-or as nan chiyuchya i-Roma,\* ya namingsanak us nalomtak inkiana kiayuchak matuy.† As nan chiyuchya nunluglukianak as papor, namitlok napachasan ay nunlukian as papor ay nachachaelan henan fiay-fiay,‡ ya as nan namingsan, wachaak henan fiayfiay ay cha tomaptaprak as hin-urkiy ya henlafi. <sup>26</sup> As nan ongor ay nunfiabfaatak,ongoongor us nan kauugyat ay enom-ommat kan ha-un. Nalikiatanak ay kinumkumchang as nan ontoongor ay chanum as nan wawwang, ya napachasak ay naakiwan as nan chiyuchya homohold-up. Wacha us nan kauugyat ay enkamkaman nan pachongku ay Judio, nan chiyuchya Gentil ya nan chiyuchya agin-aafurot kan Cristo. Wachacha pay nan kauugyat henan chiyuchya siyudad, henan disyerto ya as nan nakiluglukianak as nan papor. <sup>27</sup> Nunchunuchunuwak inkiana nabranabrayak. Namen ongor ay chaanak nasnassuy. Nunchugchukiaangak ya nasnasketanak. Nasnaskawak us, tay kurang chi fiachok. Namen ongor ay chaanak nangnangan kiapú as nan chunok. <sup>28</sup> Fiakun yangkiy chaná, tay kankanayon ay machanchanakanan kiapú as nan mangnumnummak as nan am-in ay iglesia. <sup>29</sup> Tay mu wachay nakapuy chi pammatica, makelekleknaak us kan hiya. Mu wacha us nan masulisay ug fumasor, mangisi paat chi numnumku.

<sup>30</sup> Acheck laychun ay mangichayaw as achorku, ngem mu masapor eka-munku chi, ichyawku nan chiyuchya mangepaila as nan kenakapuyku. <sup>31</sup> Hi Apo Dios ay Dios ya Aman Apo Jesus at ammunu ay fiakun kinukutum nan ifiagfiakiak. Machaychayaw hiya in-inkiana. <sup>32</sup> Ifiakiak nan usa ay enommat ay mangepaila as nan kenakapuyku. Ad kasin, as nan kawadku ad Damasco, nan gobernador ay chinutokan Ari Aretas at lenayadna ay mangepatiliw kan ha-un. Isunga infiaorna nan sosorchachu ay uy mangkuwarcha as nan sugpan nan chiyuy ili. <sup>33</sup> Ngem wachacha nan finmachang ay iib-ak ay nangittu kan ha-un as nan tekles. Hacha at uy-uyun as nan kaman sawang nan arad nan ili, at enlayawak sa ay gobernador.§

## 12

### Nan Enpailan Ya Enpakaammon Apo Jesus Kan Pablo

<sup>1</sup> Masapor ituruwyu ay mangichayaw as nan achorku, uray mu maid kotokna. Isunga ifiakiak kan chakayu ad wani nan enpappailan Apo Jesus

‡ 11:23 1 Co. 15:10; Ara. 16:23    § 11:24 Deut. 25:3    \* 11:25 Ara. 16:22    † 11:25 Ara. 7:58;  
14:19-20    ‡ 11:25 Ara. 27:39-44    § 11:33 Ara. 9:20-25

kan ha-un ay kaman iitaw ya nan enpakaammuna us kan ha-un. <sup>2</sup> Hinpuru ya opat at ay tawwun nan inmuy as nan enommattan nan nauy estoryaok. Wacha nan ammok ay taku ay enmafurot kan Cristo ay narab-et ad chaya\* as nan kawad-an Apo Dios. Achek ammu mu nan lenawana yangkiay winnu naetapi us nan achorna ay narab-et. Hi Apo Dios yangkiay nan nangammu. <sup>3</sup> Ammok ay narab-et hiya ay naiyuy ad Paraiso. Ngemachek mampay ammu mu nan lenawana yangkiay nan narab-et winnu naetapi us nan achorna. Hi Apo Dios yangkiay nan nangammu. <sup>4</sup> As nan kawad-ana hid-i, wacha nan chinngorna ay achi mafialin ay maifiakia as nan kalen chi taku, ya achi us eparufus Apo Dios ay maifiakia. <sup>5</sup> Mu laychok ay ichayaw nan kaman kan tud-i ay taku kiapú as nan naekaman kan hiya at libfengku chi. Ngem mu maepangkep as nan fiyagku asna's luta, maid maichayawku mu achi nan mangepaila as nan kenakapuyku. <sup>6</sup> Ngem uray mu laychok ay ichayaw nan achorku, achiyak nangokngok mu atok chi, tay tit-iwa met nan chak ifiagfiakia. Ngemachek atun chi, tayachek laychun ay masubraan nan mangnunumnum nan tataku as nan maepangkep kan ha-un. Nauy koma yangkiay nan numnumuncha: am-in aý inilachay ay en-enatku ya chinngorcha ay insursurok.

<sup>7</sup> Kiapú ta achi laychun Apo Dios ay munpangpangasak kiapú as nan ongor ay nakaskaschaaw ay naepappaila kan ha-un, enparufusna nan usa ay fiabfiaarun Satanas ay mangichat as kaman sufet ay kanayon ay marmpalikiat kan ha-un ta achiyak munpangpangas. <sup>8</sup> Namitlok enkararag kan Apo Jesus ta kaanuna na koma, <sup>9</sup> ngemkenalina kan ha-un, "Ommat nan grasyak kan he-a ta maanosam nan likiatmu, tay maepaila ay ustu nan pannakafialinku as nan kenakapuyu chi taku." Isunga kiapú as nan ensongfiatna, maragragsakanak ay mangichayaw as nan kenakapuyku ta kanayon ay mawawacha kan ha-un nan pannakafialin Cristo. <sup>10</sup> Isunga mapnekak as nan kenakapuyku, tapina pay ay liglikiat winnu kauugyat ay om-ommat kiapú as nan munserserfiyak kan Cristo. O, mapnekak us challu mu wachay mangepabpafiaiin winnu mamarpalikiat kan ha-un kiapú as nan munserserfiyak kan Cristo. Tay mu leknaok nan kenakapuyku, pumigaak kiapú as nan mangepapigsaana kan ha-un.

### Nan Panangesasaket Pablo As Nan Chiyuchya I-Corinto

<sup>11</sup> Kamanak nangokngok ay taku kiapú as nan nangichayawak as nan achorku, ngem chakayu met nan namelet kan ha-un. Chakayu koma nan mangichayaw kan ha-un. Tay uray mu maid kafaelak, fiakunak challu ap-apud mu nan chiyuchya achi tit-iwa ay apostoles ay mangarkali un chicha kanu nan kangatuwan. <sup>12</sup> As nan kawadku kan chakayu, inil-ilayu ay tit-iwa ay apostolak babaen as nan chiyuchya sinyar, as nan chiyuchya nakaskaschaaw ya as nan tukutukún ay milagro ay enan-anosak ay nangekamkaman. <sup>13</sup> Ayu, ifiakiyu! Ay wachay ammay as enkamkamanku para as nan chiyuchya tapina ay iglesia ay chaanku enkamkaman para kan chakayu? Nan yangkiay natkunan nan enatku kan chakayu at nan chaanku nunfig-an kan chakayu as kasaporak ta achi kayu malikiatan. Mu hiyasa nan fiasorku, pangaasiyu ta pakawanunak.

---

\* <sup>12:2</sup> Nan kanana as nan kalen chi Griego at narab-et hiya as nan maekatlu ay chaya. As nan Biblia, ifiakiana ay turu nan chaya. Nan kababaan at nan kawad-an chi lifuu. Nan maekadwa at kawad-an nan urkiw, furan ya tataraw. Nan maekatlu at nan kawad-an Apo Dios. † <sup>12:3</sup> Luc. 23:43

<sup>14</sup> Nakasakianaak ad wani ay uy kasin mangfisita kan chakayu, at hiyana nan maekatlu ay omaliyaktu hesa. Achiyak omali ay kumchaw kan chakayu as kasaporak ta achi kayu malikiatan, tay chakayu ay mismu nan nunum-numok, fiakun nan kuk-uwayu. Tay nan an-ak at fiakun chicha nan mun-ornong para as nan amacha, ngem kun at libfengun nan ama sa. <sup>15</sup> Isunga ongor chi lagsakku ay mam-inan as siping ya pigsa para kan chakayu. Ay maak-aketan nan layadyu kan ha-un kiapú as nan omam-amuchan nan layadku kan chakayu? Ay mafialin sa?

<sup>16</sup> Mafialin siguru ay iyafudyu ay chaanak kinumkumchaw kan chakayu as pagfiyagku, ngem wachacha nan mangarkali un somasatorak ay taku, tay insiksikapak chakayu. <sup>17</sup> Anan enatku ay nangekamkaman as chi? Ay insiksikapak chakayu babaen as nan chiyuycha infiafbiaorku ay inmuy hesa kan chakayu? <sup>18</sup> Enawisku hi Tito ay omali hesa ya nan infiaorku ay usa ay ifia ay omaafurot as kadwana. Ay insiksikapancha chakayu? Chaan! Ay kun achi us-usa nan enpappailami kan chakayu ay pangkep ya ukialimi? Us-usa met!

<sup>19</sup> Mafialin ay nan wacha as numnumyu at chami ekalkalintikan nan achormi as nan sangwananyu. Ngem nan kenatit-iwana at maid pangkepmi mu achi nan pumigsaan nan pammatiyu ay laylaychok. O, hi Apo Dios nan mangepaneknek, ya kiapú as nan nakius-usaani kan Cristo, ifiakiak kan chakayu nan tit-iwa. <sup>20</sup> Umugyatak ay mu omaliyak hesa, uchanak chakayu ay cha mangekamkaman asache laychun ay ilau. Mu assid-i nan ommat, achiyu met us laychun nan atok kan chakayu. Tit-iwa ay umugyatak, tay anaka ya wachachay uchanak ay cha masussusuma, cha muneennapos, munfifinnungat, mun-eennakum, munkekennak-ali, munpepen-namangisiw, munpepennangas ya munkiinnuru. <sup>21</sup> Umugyatak ay as nan kasek omaliyan, ipidwan Apo Dios ay mangepafiaiñ kan ha-un kiapú as nan hanacha chayu at-atun ay manangotettet. Nan munfianakian nan hanacha at masaktan chi numnumku kiapú as nan ongoongor ay nakafiasor ad kasin ya chaancha pay infiaifiwi nan assi ay en-enatcha ay kaman as nan mangepapasan as assi ay lachok ya nan tapina ay manangotettet ay ukiali.

## 13

### Nan Anongos Ay Tukun Pablo

<sup>1</sup> Hiyana nan maekatlu ay mangfisitaak kan chakayu. Numnumunu nan naisurat as nan Kalen Apo Dios ay kanana,

“Mu wachay mangicharum as nan ib-aná, masapor wachay chuwa winnu turu ay muntistigu ay mangepaneknek as nan kenatit-iwana.”\*

<sup>2</sup> As nan maekadwa ay nangfisitaak kan chakayu, finag-ak nan chiyuya cha nakafiasor ad kasin ya nan tapina kan chakayu ay fumasofiasor ay chusaoktu chicha as nan munfiangchak mu achicha pay laing munfiawi. Ad wani, uray mu maichak hesa as kawad-anyu, kasek ifukun kan chicha un maid makalayaw as nan muncusahaak. <sup>3</sup> Kiapú ta laychunyu ay paneknekak ay hi Cristo nan cha munkarkali babaen kan ha-un, epailak ngarud nan kenatit-iwana as nan manusaa as nan chiyuycha cha mangekamkaman as mangotettet. Tay hi Cristo at achi nakapuy ay manusa as nan nakafiasor, ngem kuna at epaila nan pannakafialina. <sup>4</sup> Tay tit-iwa ay naila nan kenakapuy Cristo as nan naelansaana as nan koros, ngem nan pannakafialin Apo Dios nan maila ad wani as nan matatakuwana. Makelak-am kami us as nan

\* <sup>13:1</sup> Deut. 19:15

kenakapuyna babaen as nan nakius-usaanmi kan hiya, ngem babaen as nan maketakuwanmi kan hiya, epailamintu us nan pannakafialin ay nurpu kan Apo Dios as nan omaliyanmintu kan chakayu.

<sup>5</sup> Fistikiarunyu ay ustu nan mismu ay achoryu ta paneknekanyu mu tit-iwa nan pammatiyu. O, chistingunu mismu nan achoryu, tay narakayu met ay maematonan ay wacha hi Cristo Jesus kan chakayu sukúd mapaneknekan ay maid payat pammatiyu. <sup>6</sup> Mu assid-i nan atunyu, namnamaok ay maammuwanyu us ay tit-iwa ay apostolak. <sup>7</sup> Ekarkararagmi kan Apo Dios ay maid koma chayu at-atun as mangotettet. Nan ki-apúna as mangekarakarakanmi's chi at fiakun kiapú ta laychunmi ay mapaneknekan nan kenaapostolmi. Laychunmi yangkiay ay ammay ya ustu nan am-in ay chayu at-atun uray maid chansami ay mangepaila as nan kenaapostolmi babaen as nan manusaanmi kan chakayu. <sup>8</sup> Tay achimi kafaelan ay mangontra kan chakayu mu chayu un-unuchun nan tit-iwa ay sursuru, ngem kunmi at fiadngan chakayu. <sup>9</sup> Isunga maragsakan kami mu nakapuy nan mangiilan nan tataku kan chakami, mu kun kayu at napigsa. Tay nan ekarkararagmi at kasin koma omammay nan chayu at-atun. <sup>10</sup> Isunga isuratku na ad wani as nan kamaidku kan chakayu ta as nan omaliyak hesa at acek koma masapor epaila nan kalibfengak ay inchat nan Apo kan ha-un ay hiyasa nan osarok ay manusa kan chakayu. Tay nan ustu ay kaosaran nan nauy kalibfengak at achi chumachael, ngem kun at omepapigsa as pammatiyu.

<sup>11</sup> Ad wani, anongos na ay ifiakiak kan chakayu ay iib-a! Paammayunyu kasin nan chayu at-atun. Chumngor kayu as nan tukunku kan chakayu. Mun-us-usaunyu nan numnumyu ya muntotornos kayu, tay mu assesa nan atunyu, wacha kan chakayu hi Apo Dios ay kurpuwan chi layad ya talna.

<sup>12</sup> Munpepennakomosta kayu ay mangepaila ay munlelennayad kayu.  
<sup>13</sup> Am-in nan tatakon Apo Dios hena at cha chakayu pakomostau.

<sup>14</sup> Sapay koma ta mawawacha kan chakayu am-in nan grasyan Apo Jesu Cristo, nan layad Apo Dios ya nan makekakadwaan nan Espiritu Santo kan chakayu.

## Nan Surat Pablo As Nan Chiyuycha I-Galacia Nan Omona Ay Ammuwun

Nan nauy surat Pablo at para as nan chiyuycha iglesia henan probinsiya ay Galacia, kaskasin henan il-ili ay Iconium, Listra, Derbe ya Antioquia. Henan hanacha ay il-ili nan inmuyań cha Pablo kan Bernabe as nan omona ay nunfiaatancha ay nangekaskasaba as nan Ammay ay Chamag (Ara. 13-14). As nan kawad-an cha Pablo hid-i, ongor nan enmafurot kan Cristo. Ngem as nan nanaynanan cha Pablo kan chicha, wachacha nan Judio ay inmuy hid-i, ya enallilawcha nan numnum nan chiyuycha enmafurot babaen as nan nanokatancha as nan sursuru maepangkep kan Cristo (1:7). Nan chacha isursuru at maesarakan yangkiay nan taku mu mumpasugyat ya tongparuna nan am-in ay Lintig Moises (3:2-3,10; 4:10; 5:2-4). Nan usa pay ay enatcha at chaancha finigfig nan kenaapostol Pablo. Kenalicha un fiakun apostol hi Pablo, tay chaan nakekadkadwa as nan chiyuycha hinpuru ya chuwa ay apostoles Jesus as nan nangisursuruwan Jesus kan chicha.

Kun pay nachamag Pablo ay ongor nan naallilaw kiapú as nan kinukutum ay sursuru (1:6; 3:1-5; 4:8-9,15-16; 5:7), insuratna nan nauy ay surat ta epafiangadna chicha as nan tit-iwa ay sursuron Cristo. Omona, penaneknekana ay kan Apo Dios nan nurpuwan nan Ammay ay Chamag, fiakun as nan numnum chi taku, ngem kun at empakaammon Jesu Cristo kan hiya (1:11-12,15) ta ekasabana. Enlawlawagna kan chicha ay achicha mapalintig babaen as nan mangtongparancha as nan Lintig Moises, kun at babaen as nan pammaticha (3:11) kan Jesus ya as nan mangafurotancha as nan natuyana as nan koros. Ad wani, an-ak Apo Dios chicha kiapú yangkiay as nan nakius-usaancha kan Cristo (3:26). Nawawayawaancha as nan Lintig Moises (3:25; 5:1), ya nan unuchuncha at nan filin Cristo. Nan filina at nan munpaetorongan chi tunggal usa as nan Espiritu Santo (5:16-18,25), ya nan munfifinnachangan kiapú as layad (5:6,13; 6:2).

### **Nan Nakudkudwaan Nan Nauy Surat**

Nan Laplapon Nan Surat 1:1-10

Nan Nangepaneknekan Pablo As Nan Kenaapostolna 1:11-2:21

Nan Tataku Ay Napalintig As Nan Sangwanan Apo Dios 3:1-4:31

Nan Maesarakanan Ya Matakuwan Babaen As Nan Espiritu Santo 5:1-6:10

Nan Anongos Nan Surat 6:11-18

### *Nan Laplapon Nan Surat*

<sup>1</sup> Ha-un hi Pablo ay nachutokan ay apostol Jesu Cristo. Fiakun taku nan nangchutok winnu nangifiaor kan ha-un ay munfialin as apostol, mu achi hi Jesu Cristo ya hi Dios Ama ay nangtaku kan Jesu Cristo manipud as nan utúy. <sup>2</sup> Nauy nan suratku as nan tunggal usa ay iglesia ad Galacia. Ha-un ya nan am-in ay iib-a hena ay omaafurot at chami pakomostaun chakayu.

<sup>3</sup> Sapay koma ta mawawacha kan chakayu nan grasya ya talna ay nurpu kan Dios Ama ya kan Apo takú ay Jesu Cristo.

<sup>4</sup> Inchat Cristo nan fiyagna ta mapakawan takú as nan fiasfiasor takú. Enatna chi, tay hiyachi nan laychun Apo Dios ay Ama takú ta maesarakan ya mawayawayaan takú as nan manangotetet ay wacha asna's luta.

<sup>5</sup> Machaychayaw koma hi Apo Dios in-inkiana! Amen.

### *Maid Tapina As Ammay Ay Chamag*

<sup>6</sup> Maschaawak kan chakayu, tay kun henkemad ya chinukkianyu hi Apo Dios ay nangayag kan chakayu babaen as nan grasyan Cristo, at inmunun kayu kanu as nan tukún ay sursuru ay kananyu un ammay ay chamag. <sup>7</sup> Nan kenatit-iwana at maid tapina as tukún ay Ammay ay Chamag. Kenalek na, tay wachacha nan cha mangal-allilaw kan chakayu. Chacha padpachasun ay manoksokat as nan Ammay ay Chamag maepangkep kan Cristo. <sup>8</sup> Ngem nan mangekaskasaba as tuktukún mu nan enkaskasabami kan chakayu uray mu chakami ay mismu winnu anghel ay nurpu ad chaya at sapay koma ta machusa hiya ad inferno in-inkiana.\* <sup>9</sup> Infiakiami na kan chakayu ad kasin, ngem kasek ifiakia ay mu wachay mangekasaba kan chakayu as Ammay ay Chamag ay tuktukún mu nan enawatyu ad kasin at sapay koma ta machusa hiya ad inferno in-inkiana!

<sup>10</sup> Ay kunak cha mun-an-anap as taku ay mangchayaw kan ha-un as nan assesa ay chak ifiagfiaikia? Achi! Nan chak anapun at nan mangepalaylayad kan Apo Dios, tay mu nan panangchayaw nan tataku nan chak anapun, chaanak koma nunfialin as fiabfiaarun Cristo.

### *Nan Enat Pablo Ay Nunfialin As Apostol Cristo*

<sup>11</sup> Iib-a, laychok ay maammuwanyu ay fiakun takuy nanglumu as nan Ammay ay Chamag ay enkaskasabak kan chakayu. <sup>12</sup> Tay fiakun as nan taku nan nang-awatak winnu nanuruwak as nan nauy Ammay ay Chamag mu achi kan Jesu Cristo mismu ay nangepakaammu kan ha-un.

<sup>13</sup> Chinngoryu met nan maepangkep as nan sikud ay katatakok as nan nangab-afurotak as nan ukialen chi Judio. Ammuyu ay pararuy penarparlikiatku nan tatakon Apo Dios, ya enpapatek nan kafaelak ay nanachael kan chicha.<sup>†</sup> <sup>14</sup> Mu maepangkep as nan nanongtongparak as nan lintig chi Judio, ha-un nan kaskasin makakud ay munchunu mu nan chiyuycha ongor ay katawwunak, tay enpapatek as solet ay nangekaman as nan tenawidmi as nan kaap-uwanmi.<sup>‡</sup>

<sup>15</sup> Ngem ad wani, naammuwak nan pangkep Apo Dios. Babaen as nan grasyana, pinipiliyak kan hiya as nan chaanku pay naiyankan, ya enayakianak ta munserifiyak kan hiya. <sup>16</sup> Kun pay inumchan nan timpu ay nanglaychanan Apo Dios ay mangepaila as nan Anakna kan ha-un ta ekasabak nan maepangkep as nan Anakna as nan chiyuycha Gentil, maid usa ay taku as uyku nunpaisuruwan. <sup>17</sup> Chaanak us in-inmuy ad Jerusalem ay uy nunpaisuru as nan chiyuycha apostoles ay enmon-onna mu ha-un, ngem kunak at inmuy ay dagus henan disyerto ay Arabia. Angkiay ya nunfiangachak kasin henan siyudad ay Damasco. <sup>18</sup> As nan inmuyan chi turu ay tawwun nunlapu as nan enmafurotak, enmabratak ad Jerusalem ta uyak maketakiatfor kan Pedro, at nakepagyanak kan hiya as chuwa ay chumingku. <sup>19</sup> Ngem maid inilak as tapina ay apostoles mu achi yangkiay hi Pedro ya hi Santiago ay sunúd nan Apo takú.

<sup>20</sup> Ammon Apo Dios ay tit-iwa nan nauy chak isurat kan chakayu, fiakun kinukutum.

<sup>21</sup> Kun pay narpas chi, inmuyak henan chiyuycha sakop nan Siria ya Cilicia. <sup>22</sup> As nan hiyachi ay timpu, chaanak pay inil-ila as nan chiyuycha omaafurot ay nakius-usa kan Cristo ad Judea. <sup>23</sup> Nan chinchingorcha yangkiay at hiyana: “Nan namarpalikiat kan chitaku ad kasin kiapú as nan

\* <sup>1:8</sup> Rom. 9:3; 1 Co. 16:22    † <sup>1:13</sup> Ara. 7:58; 8:1; 9:1-2    ‡ <sup>1:14</sup> Filip. 3:4-6

pammati takú kan Cristo at chana ekaskasaba ad wani nan nauy pammati ay penachasna ay maichun.” <sup>24</sup> Isunga chinaychayawcha hi Apo Dios kiapú kan ha-un.

## 2

### *Nan Nuntuturakian Cha Pablo*

<sup>1</sup> Kun pay inmuy chi hinpuru ya opat ay tawwun, nunfiangachak ad Jerusalem ay kadwak hi Bernabe. Entakinmi us hi Tito. <sup>2</sup> Inmuyak hid-i, tay enpakaammon Apo Dios ay masapor umuyak. Enlawlawagku as nan chiyuchya yangkiay mangepangpanguru as nan iglesia nan Ammay ay Chamag ay enkaskasabak as nan chiyuchya Gentil. Énatku chi ta maammuwak mu aprobarancha nan enlawlawagku. Tay mu achicha aprobaran, maid kotkotok nan nunforforayak ya nan chak munforforayan ad wani. <sup>3</sup> Isunga nan nunfianakiana at enaprobarancha nan insursurok. Kun pay hi Tito ay kadwak ay uray mu Griego at chaancha penelet ay epasugyat ay kaman as nan kanan nan Lintig Moises, <sup>4</sup> uray mu wachacha nan tapina ay Judio ay manglayad ay manugyat kan hiya. Chatona nan tataku ay naetapi kan chakami ay nunpammarang as iib-ami, at enmalicha ay nanisiim kan chakami ta maammuwancha nan maepangkep as nan wayawaya takú as nan nakius-usaan takú kan Cristo Jesus. Tay laychuncha ay mafiabfiaor takú kasin babaen as nan mangun-unuchan takú as nan Lintig Moises. <sup>5</sup> Ngem chaanmi poros inyafud nan kanancha ta achi masoksokatan nan kenatit-iwan nan Ammay ay Chamag ay chayu ab-afurotun.

<sup>6</sup> Kun pay nan chiyuchya maifilang as mangepangpanguru as nan iglesia, maid kenalicha as munkurangan nan isursurok. (Uray mu hiyasa, achi napateg kan ha-un nan saadcha, tay mapapchong am-in nan tataku kan Apo Dios.) <sup>7</sup> Ngem kuncha at naawatan ay entalek Apo Dios kan ha-un nan panangekasaba as nan Ammay ay Chamag as nan chiyuchya Gentil, kaman as nan nangetalekana kan Pedro ay mun-ekasaba as nan chiyuchya Judio. <sup>8</sup> Tay nunfialinuk kan Apo Dios as apostolna as nan chiyuchya Gentil, kaman kan Pedro ay nunfialinuna hiya as apostolna as nan chiyuchya Judio. <sup>9</sup> As nan nangammuwan cha Santiago, Pedro ya Juan ay maifilang as mangepangpanguru as nan iglesia hid-i ay benendisyonian Apo Dios nan nauy chunu ay entalekna kan ha-un, lenamanu chakami ay mangepaila ay us-usa nan pangkepmi. Nuntuturag kami ay iturturuymi ay umuy as nan chiyuchya Gentil ya iturturuycha ay umuy as nan chiyuchya Judio. <sup>10</sup> Nan paatcha inflin kan chakami at iturturuymi ay mamadfiachang as nan chiyuchya pugli ay omaafurot ad Jerusalem. Hiyana challu nan komakuchak.\*

### *Nan Nangontraan Pablo Kan Pedro*

<sup>11</sup> Ngem as nan enmaliyan Pedro ad Antiokia, kenontrak hiya as nan sangwanan nan chiyuchya omaafurot, tay narawag ay achi ustу nan enatna. <sup>12</sup> Tay as nan kaar-alina, nakekkekan hiya as nan chiyuchya Gentil ay omaafurot. Ngem as nan enmaliyan nan chiyuchya Judio ay infiaor Santiago, chaana at inturuy ay nakekkekan kan chicha, tay umugyat hiya as nan chiyuchya Judio ay mangepapelet ay maunud nan Lintig Moises. <sup>13</sup> Kiapú as nan nauy ay enat Pedro, nan tapina ay Judio ay omaafurot at tinuradcha hiya uray mu ammucha ay achi ustу nan chana at-atun. Uray hi Bernabe at naetapi us kan chicha. <sup>14</sup> Kunku pay naammuwan ay nan chacha at-atun at

\* <sup>2:10</sup> Ara. 11:30, 2 Co. 9:1

maekontra as nan tit-iwa ay isursuron nan Ammay ay Chamag, infiakiak kan Pedro as nan sangwanancha am-in, "Usaka ay Judio, ngem chaanmu inun-unud nan tapina ay inibili ay ukialen chi Judio, ya inun-unudmu nan tapina ay inibili ay ukialen nan Gentil. Uray mu assesa, adchi t'uymu peletun nan Gentil ay mangekaman as nan cha takú un-unuchun ay Judio?"

### *Maesarakan Nan Judio Ya Gentil Babaen As Pammati*

<sup>15</sup> Kenalek pay kan cha Pedro, "Tit-iwa ay Judio kami, tay naiyanak kami as nan Judio ay chanakchakor. Fiakun kami Gentil ay achi nangammu as nan lintig Apo Dios. <sup>16</sup> Ngem ammumi ay achi maifilang as nalintig nan usa ay taku as nan mangilan Apo Dios babaen as nan manongtongparana as nan Lintig Moises mu achi yangkiay babaen as nan pammatina kan Jesu Cristo. Isunga uray chakami ay Judio at enmafurot kami kan Cristo Jesus ta ifilang chakami kan Apo Dios as nalintig babaen as nan pammatimi kan Cristo, fiakun babaen as nan manongtongparanmi as nan Lintig, tay maid poros maifilang as nalintig babaen as nan manongtongparan as nan Lintig. <sup>17</sup> Ngem mu as nan chami paat manganapan as mangifilangan chakami kan Cristo as nalintig, angkiay ya naanapan ay naifilang kami as fumafiasor ay kaman as nan chiyucha Gentil, ay nan laychun tona ay kanan at hi Cristo nan nagetoróng kan chakami as nan fumasoranmi? Fiakun met! <sup>18</sup> Mu munfiangachak ay mangunud kasin as nan Lintig ay chinukkiak ad kasin, maifilangak as fumafiasor. <sup>19</sup> Tay mu maepangkep as nan Lintig, achek kafiaelan ay tongparun ya hiyasa nan nangammuwak ay nakeddenganak ay matuy ay maisiyan kan Apo Dios. Isunga kiapú ta naifilangak as natuy mu maepangkep as nan Lintig, nawayawayaanak as nan nauy ay Lintig ay matakua para kan Apo Dios. <sup>† 20</sup> O, kamanak naetapi ay naelansa as nan koros. Isunga fiakun ha-un nan matataku, mu achi hi Cristo ay wacha kan ha-un. Ad wani, matatakuwak babaen as nan pammatek as nan Anak Apo Dios ay nangichat as fiyagna kiapú as layadna kan ha-un. <sup>21</sup> Achek ifilang nan grasyan Apo Dios as maid kotkotokna. Tay mu maifilang as nalintig nan usa ay taku as nan mangilan Apo Dios babaen as nan manongtongparana as nan Lintig, maid kotkotok nan natuyan Cristo." Hiyana nan ifiakiak as nan iglesia ad Antioquia.

## 3

### *Nan Lintig Winnu Nan Pammati*

<sup>1</sup> Chakayu ay i-Galacia, anuy kayu kaman nunkangokngok! Ngachana nan nangallilaw kan chakayu? Ay achi narawag nan infiaagku kan chakayu maepangkep as nan natuyan Jesu Cristo as nan koros? <sup>2</sup> Sarudsuchok man na kan chakayu: Ay enawatyu nan Espiriton Apo Dios babaen as nan nangtongparanyu as nan Lintig Moises winnu babaen as nan nangafurotanyu as nan Ammay ay Chamag ay chinngoryu? <sup>3</sup> Uyaka sa kayong as kenangokngokyu! Lenapuwanyu met nan fierú ay fiyagu kan Cristo babaen as nan pannakafialin nan Espiriton Apo Dios. Angkiay ya ad wani, laychunyu ay maifilang as nalintig as nan mangilan Apo Dios babaen as nan mismu ay kafiaelanyu. <sup>4</sup> Ay kun paat maid kotkotok nan am-in ay enommat kan chakayu as nan enmafurotanyu? Sapay koma ta wacha! <sup>5</sup> Ay kananyu un babaen as nan nanongtongparanyu as nan Lintig Moises nan nangichatan Apo Dios as Espirituna kan chakayu ya nan nangekamananana

<sup>†</sup> **2:19** Rom. 6:1-11; 7:1-6

as nakaskascaaw winnu babaen as nan enmafurotanyu as nan Ammay ay Chamag ay chinngoryu? Fiakun!

<sup>6</sup> Numnumunyu nan naisurat as nan Kalen Apo Dios maepangkep kan Abraham ay kanana, “Enafurotna hi Apo Dios, at kiapú as nan pammatica, infilang Apo Dios hiya as nalintig.”\* <sup>7</sup> Isunga masapor maawatanyu ay nan chiyucha omafurot kan Apo Dios nan maifilang as tit-iwa ay an-ak Abraham. <sup>8</sup> Naepadtu as nan naisurat as nan Kalen Apo Dios ay iflangtu Apo Dios nan chiyucha Gentil as nalintig babaen as nan pammatica. Hiyana nan enpapakaammon nan Ammay ay Chamag kan Abraham ay kanana, “Kiapú kan he-a, mabendisyonan nan am-in ay tataku asna's luta.”† <sup>9</sup> Isunga mabendisyonan am-in nan omafurot kan Apo Dios ay kaman as nan pannakabendisyon Abraham babaen as nan pammatica.

<sup>10</sup> Ngem nan am-in ay muntaltalek as nan manongtongparancha as nan Lintig at machusacha in-inkiana. Tay wacha nan naisurat as nan Kalen Apo Dios ay kanana, “Machusa in-inkiana nan uray usa ay achi mangtongpar as nan am-in ay naisurat as nan liblon nan Lintig Apo Dios.”‡ <sup>11</sup> Narawag tit-iwa ay maid taku ay maifilang as nalintig as nan sangwanan Apo Dios babaen as nan manongtongparana as nan Lintig, tay wacha nan naisurat as nan Kalen Apo Dios ay kanana, “Nan taku ay maifilang as nalintig babaen as nan pammatica at mawad-an as fiyag ay maid patingkiana.”§ <sup>12</sup> Ngem tukún nan Lintig as nan pammati, tay wacha nan naisurat as nan Kalen Apo Dios ay kanana, “Nan taku ay mangtongpar as nan am-in ay epakaman nan Lintig at matakhiya in-inkiana.”\*

<sup>13</sup> Ngem maid makatongpar as nan am-in ay filin nan Lintig, isunga masapor machusa takú am-in. Ngem wenayawayaan chitaku kan Cristo as nan chusa takú babaen as nan natuyana as nan koros, tay wacha nan naisurat as nan Kalen Apo Dios ay kanana, “As nan maelansaan nan taku as nan kaiw, maila ay chinusan Apo Dios hiya.”† <sup>14</sup> Enat Cristo Jesus chi ta babaen kan hiya, maichat us as nan chiyucha Gentil nan bendisyon ay enkaren Apo Dios ay naichat kan Abraham, ya babaen as nan pammati takú, maawat takú us koma nan enkarina ay Espirituna.

### Nan Lintig Ya Nan Enkaren Apo Dios

<sup>15</sup> Iib-a, epachongku nan enkaren Apo Dios kan Abraham. Mu munturag nan chuwa ay taku ya penermaancha nan nunturakiancha, achi mafialin ay maichun winnu tapiyan nan naisurat. <sup>16</sup> Hiyasa nan enkaren Apo Dios kan Abraham ya as nan usa ay kianakna. Chaan kenalen nan naisurat as nan Kalen Apo Dios, “As nan chiyucha kianakmu,” ay kaman kun ongor ay tataku nan laychuna ay kanan, ngem nan enpaisurat Apo Dios at hiyana, “As nan kianakmu.” Nan laychuna ay kanan at us-usa yangkiay ay taku, ya nan hana ay taku at hi Cristo.‡ <sup>17</sup> Nauy nan laychok ay kanan: Wacha nan enkaren Apo Dios ay inturagna kan Abraham. Isunga nan Lintig ay inchat Apo Dios kan Moises as nan narpasan chi opat kiasot ya turon puru ay tawwun at achina mafialin ay maichun nan emnon-onay turag ay enkarina. Tay kukutug nan enkaren Apo Dios, ya siguradu ay atuna. <sup>18</sup> Tay mu tawichun takú nan enkaren Apo Dios babaen as nan manongtongparan takú as nan Lintig, maid kotkotok nan chiyuy karina.

---

\* <sup>3:6</sup> Gen. 15:6; Rom. 4:3; San. 2:23      † <sup>3:8</sup> Gen. 12:3b; Ara. 3:25      ‡ <sup>3:10</sup> Deut. 27:26; Gal. 5:3;  
San. 2:10      § <sup>3:11</sup> Hab. 2:4; Rom. 1:17      \* <sup>3:12</sup> Lev. 18:5; Rom. 10:5      † <sup>3:13</sup> Deut. 21:23      ‡ <sup>3:16</sup>  
Gen. 22:17-18

Ngem fiakun assesa, tay nan kenatit-iwana at enpakchaw Apo Dios kan Abraham kiapú ta enkarina kan hiya.

### *Nan Atun Nan Lintig*

**19** Mu hiyasa, ngachana ngay ngarud nan kotok nan Lintig ay naichat? Enammaan Apo Dios nan nauy Lintig ta epailana nan panagfiasor nan tataku babaen as nan achicha mangtongparan as nan hana ay Lintig. O, enkeddeng Apo Dios ay munturturuy nan hana Lintig inkiana as nan omaliyan nan kianak Abraham ay hi Cristo ay matongparan nan enkarina. Naraka ay maematonan ay napatpateg nan karina mu nan Lintig, tay nan angheles nan enosar Apo Dios ay nangichat as nan Lintig kan Moises, ya hi Moises nan nangifiakia as nan tataku. **20** Ngem chaan enosar Apo Dios chi maketagtakiatfor as para kan Abraham as nan nakiturakiana kan hiya, tay hiya mismu nan nun-ekari kan Abraham.

**21** Ay kontraun ngarud nan Lintig nan enkaren Apo Dios? Achi poros mafialin! Tay mu wachay lintig ay inchat Apo Dios ay mafialin ay tomaku, mafialin ay mapalintig nan taku as nan mangilan Apo Dios babaen as nan manongtongparana as nan lintig. **22** Ngem maid nakaekaman as sa, tay wacha nan naisurat as nan Kalen Apo Dios ay kanana un nafiafiarud nan am-in ay tataku as nan pannakafialin nan fiasor. Isunga maiyunud as nan pangkep Apo Dios, nan enkaren Apo Dios at maichat babaen yangkiay as nan omafurotan nan taku kan Jesu Cristo.

**23** Sakhay inumchan nan timpu ay enmafurotan nan tataku kan Cristo, kaman takú fierud ay kinukuwarchaan nan Lintig inkiana enmali hi Cristo ay enafurot takú. **24** Nan Lintig us at kaman as nan mamanfiantay as onga, tay finanfiantayana chitaku inkiana enmali hi Cristo ta mapalintig takú as nan sangwanan Apo Dios kiapú as pammati kan Cristo. **25** Ngem ad wani, kiapú ta enmali nan timpu ay omafurotan nan tataku kan Cristo, napapug nan nangukuwarchaan nan Lintig kan chitaku.

**26** Ad wani, chakayu ay nakius-usa kan Cristo babaen as nan pammatiyu kan hiya at naifilang kayu am-in as an-ak Apo Dios, **27** tay nafunyakian kayu am-in ay nakius-usa kan Cristo. Isunga kamanyu senokatan as ukialen Cristo nan ukialiuy ay maila as nan panagfiyagu. **28** As nan mangilan Apo Dios, maid natkunan nan Judio as nan Gentil, kaman us nan mafiabfiaor as nan achi, laraki as nan fiafiai. **§** Tay nun-us-usa kayu am-in babaen as nan nakius-usaanyu kan Cristo Jesus. **29** Isunga mu makius-usa kayu kan Cristo, maifilang kayu as kianak Abraham, at maketawid kayuntu as nan enkaren Apo Dios.

## 4

**1** Nauy pay nan usa ay laychok ay kanan maepangkep as nan tomawid: Mu kutug ay onga nan manawid as nan tawid amána, maepapachong challu hiya as nan chiyucha fiabfiaarun amana uray mu kuwana nan am-in, **2** tay wachacha nan mangisursuru kan hiya ya mangil-ila as nan kuk-uwana inkiana omali nan ustу ay timpu ay enkeddeng amana ay mangichatana as nan tawidna. **3** Kaman us kan chitaku ay as nan chaan takú nangawatan as nan tit-iwa ay sursuru at fiabfiaarun chitaku as nan chiyucha tukutukún ay penapakianu ay ukiali ay muntortoray asna's luta. **4** Ngem as nan inumchanan nan ustу ay timpu ay enkeddeng Apo Dios, finaorna nan Anakna.

Naiyanak hiya as nan fiafiai ay Judio, ya tenongtongparna nan Lintig Moises. <sup>5</sup> Enat Apo Dios chi ta wayawayana nan tataku ay kaman finafiarud nan Lintig ta munfialin taku am-in ay omafurot kan Cristo as tit-iwa ay an-akna.

<sup>6</sup> Kiapú ta an-akna chitaku, finaorna nan Espiriton nan Anakna ta mawawacha kan chitaku. Isunga babaen as nan pannakafialin nan Espiritu Santo, mafialin takú ay kanan kan Apo Dios, "Ama," as nan munkarakarakan takú kan hiya.\* <sup>7</sup> Isunga nan tunggal usa kan chakayu at fiakun mafiabfiaor ad wani, ngem tit-iwa ay anak Apo Dios. Kiapú ta nunfialin kayu as an-akna, mafialinyu us ay tawichun nan am-in ay epatawidna as nan an-akna.

### *Nan Machanakianan Pablo As Nan I-Galacia*

<sup>8</sup> Ad kasin as nan chaanyu nangam-ammuwan kan Apo Dios, kaman chakayu fiabfiaarun as nan chiyuycha didiosen. <sup>9</sup> Ngem ad wani ay naammuwanyu hi Apo Dios, winnu kanak koma un naammuwan chakayu kan Apo Dios, ay laychunyu pay laing ay munfiangad as nan chiyuycha tukutukún ay penapakianu ay ukiali ay maid kotkotokcha ya maid tit-iwa pannakafialinchá? Ay laychunyu kasin ay munfialin as fiabfiaarunchá? <sup>10</sup> Figifikunu met nan chiyuycha iniili ay ukialen chi Judio ay maekamkan man as nan chiyuycha napateg ay urkiw, furan, timpu ya tawwun! <sup>11</sup> Isunga machanakianan maepangkep kan chakayu, tay anaka ya maid kotkotok nan nangepatiyak ay nün-is-isuru kan chakayu.

<sup>12</sup> Iib-a, pangaasiyu ta turachunak, tay kamanak met us kan chakayu ay Gentil ay achi etortorayan nan Lintig. Maid met mangisiw as en-enatyu kan ha-un ad kasin as nan kawad-ak kan chakayu.† <sup>13</sup> Ammuyu met ay nan enmon-oná ay nangekaskasabaak kan chakayu as nan Ammay ay Chamag at kiapú as nan nunsaketak.‡ <sup>14</sup> Ngem chaanak enlaylayusan winnu chinukchukkian kan chakayu, uray mu nalikiant kayu as nan nunsaketak. Kunak at menangili kan chakayu ay kaman ha-un nan anghel Apo Dios winnu kaman ha-un hi Cristo Jesus ay mismu. <sup>15</sup> Ngachanay enommat as nan chiyuy lagsakyu para kan ha-un as nan kawad-ak kan chakayu? Ha-un mismu nan mangepaneknek ay ad kasin at ongor chi layadyu kan ha-un, at mu mafialin, uray oketanyu nan matayu ta ichatyu kan ha-un. <sup>16</sup> Kun pay ad wani, ay nunfialinak as kafusoryu kiapú ta infiakiak nan tit-iwa kan chakayu?

<sup>17</sup> Ngem nan chiyuycha mangisuru as achi tit-iwa at kaman chakayu esasaket, ngem achi ammay nan pangkepcha. Tay nan laychuncha at chukkianak kan chakayu ta chicha nan esaketyu. <sup>18</sup> Ammay tit-iwa ay omesasaket mu ammay nan pangkep ay kaman as nan nangmangiliyanyu kan ha-un ad kasin. Assesa koma nan kanayon ay atunyu, fiakun yangkiay mu wachaak kan chakayu. <sup>19</sup> Chakayu ay an-akku ay laylaychok, munlikiatak kasin kiapú kan chakayu ay kaman as nan ena ay munpasikar. Iturturuyku ay munlikiat inkiana munfialin kayu as tit-iwa ay pasorot Cristo. <sup>20</sup> Mu wachaak koma kan chakayu ad wani ta mafialin ay kunak kun maketakiatfor kan chakayu, tay machanakianak as solet kan chakayu!

### *Nan Maepadpachongan Cha Agar Kan Sara*

<sup>21</sup> Sarudsuchok man na kan chakayu ay manglayad ay mangunud as nan Lintig Moises: Ay achiyu maawatan nan laychun ay kanan nan Lintig? <sup>22</sup> Naisurat as nan Kalen Apo Dios ay kun chuwa ay lanaraki nan potot

\* <sup>4:6</sup> Rom. 8:15   † <sup>4:12</sup> 1 Co. 9:20-21   ‡ <sup>4:13</sup> Ara. 13:13-14:24

Abraham. Nan usa at naiyanak as nan usa ay fiabfiaarun asawana, ya nan usa at naiyanak kan asawana ay hi Sara ay fiakun mafiabfiaor.<sup>§ 23</sup> Nan anak nan chiyuy mafiabfiaor at achi nakaskaschaaw nan enatna ay naiyanak. Ngem nan anak asawana ay fiakun mafiabfiaor at chaan koma naiyanak mu chaan enkaren Apo Dios kan chicha.\*<sup>24</sup> Nan nauycha ay enommat at wacha nan laychuncha ay kanan. Nan nauycha chuwa ay fianafiai at maepachongcha as nan chuwa ay inturag Apo Dios. Nan usa ay inturagna at nan Lintig ay inchatna kan Moises henan chuntug ay Sinai, ya maepachong na kan Agar ay mafiabfiaor. Isunga nan chiyuycha mangtongpar as nan Lintig at kamancha an-ak Agar ay mafiabfiaor, tay fiabfiaarun nan Lintig chicha.<sup>25</sup> O, hi Agar at maepachong henan chuntug ay Sinai ay wacha ad Arabia ay nurpuwan nan Lintig. Maepachong us henan siyudad ay Jerusalem ad wani, tay nan chiyuycha umili hid-i ya nan am-in ay Judio ay manngotongpar as nan Lintig Moises at fiabfiaarun nan chiyuy Lintig chicha.<sup>26</sup> Ngem hi Sara ay fiafiai ay fiakun mafiabfiaor at maepachong henan Jerusalem ay wacha ad chaya, ya kaman hiya nan ena takú ay omafurot.<sup>27</sup> Tay wacha nan naisurat as nan Kalen Apo Dios ay kanana, “Munlagsakka, he-a ay chaan poros enman-anak!

Munfukiawka kiapú as lagsakmu, he-a ay chaan nunpaspasikar!

Tay he-a ay tenaynan chi asawana at ong-ongortu nan an-akmu mu nan fiafiai ay kutug nan asawana.”†

<sup>28</sup> Iib-a, chitaku ay enmafurot at kaman takú kan Isaac ay naiyanak kiapú ta enkaren Apo Dios. Kiapú as nan nauy enkaren Apo Dios, maifilang takú us as an-ak Abraham.<sup>29</sup> As nan hiyachi ay timpu, nan anak ay achi nakaskaschaaw nan enatna ay naiyanak at penalikiatna hi Isaac ay naiyanak babaen as nan pannakafialin nan Espiriton Apo Dios. Assesa us, uray ad wani, tay cha chitaku parpalikiatun as nan chiyuycha finabfiaor nan Lintig.<sup>‡ 30</sup> Ngem numnumun takú nan naisurat as nan Kalen Apo Dios ay kanana, “Pak-akum nan mafiabfiaor ya nan anakna, tay achi mafialin ay maketawid nan anak nan mafiabfiaor as nan tawid nan anak nan fiakun mafiabfiaor.”<sup>§ 31</sup> Iib-a, fiakun chitaku ngarud an-ak as nan mafiabfiaor, ngem kun takú at maifilang as an-ak nan fiakun mafiabfiaor.

## 5

### *Nawayawayaan Nan Taku Ay Omafurot Kan Cristo*

<sup>1</sup> Nawayawayaan takú tit-iwa, tay wenawayawayaan chitaku kan Cristo! Isunga epapasnekyu ay mangekalintikian as nan pannakawayawayayu. Achiyu eparufus ay epatiinchaa nan Lintig Moises kan chakayu ta achi kayu kasin munfalin as mafiabfiaor.

<sup>2</sup> Chungrunu na: Ha-un hi Pablo ay mangifiakia un mu kananyu ay masapor masugyatay kayu ta maifilang kayu as nalintig as nan mangiilan Apo Dios, maid ngarud kotkotok nan enat Cristo para kan chakayu.<sup>3</sup> Itukunku kasin kan chakayu ay nan taku ay munpasugyat at masapor ngarud tongparuna nan am-in ay Lintig.<sup>4</sup> Isunga nan taku ay munlarayad ay maifilang

§ 4:22 (Ismael) Gen. 16:1-16; (Isaac) Gen. 21:1-7 \* 4:23 Gen. 16:1-4; Rom. 4:19; Heb. 11:11-12

† 4:27 Isa. 54:1; 2 Cro. 36:15-23. Nan usa pay ay laychun Pablo ay kanan as na at maepangkep as nan chiyuycha Judio ya chiyuycha enmafurot kan Cristo. Nan laychuna ay kanan at as kasin, omong-ongor nan omafurot kan Cristo ya omong-ongor us nan bendisyon Apo Dios kan chicha mu nan chiyuycha Judio. † 4:29 Gen. 21:8-9 § 4:30 Gen. 21:10

as nalintig as nan mangilan Apo Dios babaen as nan manongtongparana as nan Lintig at naisiyan hiya kan Cristo ya chinukkiana nan grasyan Apo Dios. <sup>5</sup> Kun pay chitaku, namnamaun takú ay ifilang chitaku kan Apo Dios as nalintig babaen as nan pammati takú kan Cristo. Fiadfiadngan chitaku as nan Espiritu Santo as nan manman-uchan takú as nan matongparana.\* <sup>6</sup> Tay mu makius-usa takú kan Cristo Jesus, munpachong as nan mangilan Apo Dios nan nasugyatan ya nan chaan. Nan kasaporan yangkiay at nan pammati takú ay maepaila as nan manglaylaychanan takú as nan pachong takú ay taku.

<sup>7</sup> Ad kasing, ammay paat chi nangab-afurotanu kan Cristo. Ngachana nan nangallilaw kan chakayu t'uyyu at achi afurotan nan tit-iwa? <sup>8</sup> Nan chiyucha nangallilaw kan chakayu at chaancha nurpu kan Apo Dios ay nangayag kan chakayu. <sup>9</sup> Numnumunyu nan kankanan nan tataku, "Uray mu ak-akét nan lebadura, epabrona nan am-in ay maetapiyana." <sup>10</sup> Ngem uray mu tit-iwa na ay kankanan nan tataku, muntalekak kan chakayu kiapú as nan nakius-usaan takú as nan Apo, isunga maid chuwachuwak ay achiyu un-unuchun nan tukún ay sursuru. Ammok us ay chusauntu Apo Dios nan taku ay nangallilaw kan chakayu uray mu ngachana nan katatakuna.

<sup>11</sup> Ngem mu para kan ha-un ay iib-a, chak ekaskasaba kanu ay masapor masugyatan nan Gentil mu omafurot hiya. Mu tit-iwa na, adchi ngay ngarud t'uyak cha parpalikiatun as nan chiyucha Judio? Tay mu tit-iwa ay chak ekaskasaba ay masapor masugyatan nan taku, maid koma manglifok kan ha-un as nan chak mangekaskasabaan as nan maepangkep kan Cristo ya maepangkep as nan natuyana as nan koros. <sup>12</sup> Mu para as nan chiyucha cha mangal-allilaw kan chakayu ay mu epapeletcha ay masapor chi sugyat at pay-anyu chicha, uray mu putnancha nan kuwacha.

<sup>13</sup> Iib-a, enayakian chakayu kan Apo Dios ta mawayawayaan kayu. Ngem achiyu epanfor nan pannakawayawayuu ay mangekaman as laylaychun nan achoryu, kun kayu at munfifinnachang kiapú as nan munleennay-achanyu. <sup>14</sup> Tay am-in ay filin as nan Lintig at nunfialinchu as us-usa ay filin ay kanana, "Laylaychum nan pachongmu ay taku ay kaman as nan atum ay manglaylayad as nan achormu."† <sup>15</sup> Ngem mu iturturuyyu ay munkekennarat ya mun-iinnischu ay kaman as nan chiyucha animar, ililaunyu, tay siguraduntu ay munchichinnachael kayu.

### *Nan Taku Ay Munpaetoróng As Nan Espiritu Santo*

<sup>16</sup> Hiyana nan laychok ay kanan: Munpaetoróng kayu as nan Espiritu Santo ta nan laychuna nan atunyu, fiakun nan mun-ongosán nan achoryu.

<sup>17</sup> Tay achi munpachong nan laychun nan Espiritu ya nan laychun nan anchor. Munkennontra chaná ay chuwa ay kamancha munkafusor, isunga achiyu mafialin ay atun nan laychunyu ay atun. <sup>18</sup> Ngem mu nan Espiritu Santo nan mangetoróng kan chakayu, achi chakayu cha etorayan as nan Lintig.

<sup>19</sup> Naraka ay maematonan nan ukiali ay nurpu as nan mun-ongosán nan anchor nan taku, at nauycha: Nan mangepapasan as assi ay lachok, nan mangekamanan as nunkaaras, nan mangotettet ay ukiali; <sup>20</sup> nan manaychayawan as didiosen, nan enaanennet ay ekamkaman; nan mun-iinningoran, nan munsusumaan, nan omaposan, nan fumungfungtan

\* <sup>5:5</sup> Rom. 5:5; 8:26 † <sup>5:14</sup> Lev. 19:18b

ya nan mun-eennekotan, nan achi munkekennaawatanan ya nan munsisiyanan; <sup>21</sup> nan mun-eennakuman, nan munfututangan, nan nrafus ay panaglagragsak ya tapina pay ay kaman as nan nauycha. Kasek fiagiag-an chakayu ad wani ay kaman as nan namagfiag-ak kan chakayu ad kasin: Nan chiuyucha mangekamkaman as nan nauycha at achicha maetapi henan muntorayan Apo Dios.‡

<sup>22</sup> Ngem nan ukialen nan taku ay murpu as nan Espiritu Santo at nauycha: mananglayad, naragsak, natalna, naanos, manangfiachang, ammay chi atun as nan pachong ay tákú, matalek, <sup>23</sup> napakumbaba ya tuntun-una nan laylaychun nan achorna. Maid lintig ay mangepawa as mangekamanan as nan nauycha ay ukiali. § <sup>24</sup> Am-in ay nakius-usa kan Cristo Jesus at kamancha enlansa as nan koros nan sikud ay numnumcha patí nan am-in ay munongosán ya laraychun nan achorcha. <sup>25</sup> Kiapú ta enettan chitaku as fiarú ay fiyag as nan Espiriton Apo Dios, masapor munpaetoróng takú as nan Espiritu Santo. <sup>26</sup> Isunga achi takú epangpangas nan achor takú, achi takú us munpepennafungat ya mun-eennapos.

## 6

### *Munfifinnachang Takú*

<sup>1</sup> Iib-a, mu wachay usa kan chakayu ay nasulisukian ay finmasor, chakayu ay etortoróng nan Espiritu Santo at iyam-ammayu ay manuchu kan hiya ta unuchuna kasin nan laychun Apo Dios. Ngem pangaasiyu ta achi kayu us masursulisug. <sup>2</sup> Munfifinnachang kayu mu wachay likiat chi usa kan chakayu. Mu hiyasa nan atunyu, matongparyu nan lintig Cristo.\* <sup>3</sup> Tay mu ngachana nan mangifilang as achorna as wachay kafaelana ngem maid payat, kuna cha sugsugnuwun nan achorna.† <sup>4</sup> Masapor waschi un ninumnumna nan chana at-atun ta paneknekana mu ustу winnu achi. Tay mu ustу, mafialin ay hiyasa nan munlaylaychana, ya masapor achina epadpachong nan enatna as nan enat nan tapina ay tataku, <sup>5</sup> tay masapor waschi un senakfiatana nan uchuna.‡

<sup>6</sup> Nan taku ay maisursuruwan as Kalen Apo Dios at masapor umichat as kasaporan nan mangisursuru kan hiya.§

<sup>7</sup> Achiyu mafialin ay luklukuwun hi Apo Dios, isunga achiyu sugsugnuwun nan achoryu. Tay mu ngachana nan entanum nan taku, hiya us chi nan apituna. <sup>8</sup> Nan taku ay mangunud as nan mun-ongosán nan achorna at apitunantu nan chusa ay maid patingkiana. Ngem nan taku ay mangunud as nan laylaychun nan Espiritu Santo at apitunantu nan fiyag ay maid patingkiana ay nurpu as nan Espiritu Santo. <sup>9</sup> Isunga achi takú koma maum-uma ay mangekamkaman as ammay, tay mu epapasnek takú ay mangiturturuy ay mangekamkaman as ammay, wacha nan maara takú ay gun-guna mu umchan nan ustу ay timpu. <sup>10</sup> Isunga mu wachay chansa takú, ekaman takú nan ammay as nan am-in ay tataku, kaskasin as nan iib-a takú ay omaafurot.

† **5:21** Rom. 2:8; 1 Co. 5:11; 6:9-10; 2 Co. 12:20-21; Tit. 3:3; Jud. 1:7. As nan tapina ay manuskritu at entapicha nan “pomatpatuyan”. § **5:23** Efe. 4:2; Col. 3:12 \* **6:2** Jn. 13:34; 15:21; Rom. 15:1. Nan lintig Cristo at kanana un munlennayad takú. † **6:3** Rom. 12:3; 1 Co. 3:18 ‡ **6:5** Nan laychun tona ay kanan at “Waschi un kikiad as nan mismu ay chana atuatun.” § **6:6** 1 Co. 9:11; 2 Co. 9:6-12; 1 Tim. 5:17-18

*Nan Anongos Ay Tukun Ya Pakomostan Pablo*

<sup>11</sup> Ilaunyu nan kaanad-achan nan surat ay ha-un mismu nan cha mangisurat!\* <sup>12</sup> Nan chiyuycha mangepapelet ay masugyatan kayu at chicha nan manglayad ay mangepangpangas as maepangkep as nan mamaaila. Atuncha sa ta malisiyancha nan maparpalikiatanancha. Tay am-mucha ay mu isurucha nan hana kaesarakanan babaen as nan natuyan Cristo as nan koros, palikiatuntu nan iib-acha ay Judio chicha. <sup>13</sup> Uray chicha ay nasugyatan at achicha ekamkaman nan am-in ay Lintig Moises. Kuncha laylaychun ay munpasugyat kayu ta mafialinchay epangas ay nunpasugyat kayu kiapú kan chicha. <sup>14</sup> Ngem mu para kan ha-un, maid tukún as ichaychayawku mu achi yangkiay nan natuyan Apo takú ay Jesu Cristo as nan koros kiapú kan ha-un. Tay kiapú as nan enatna, nan cha epatpateg nan tataku asna's luta at maid kotkotokna kan ha-un, ya nan chak epatpateg at maid us kotkotokna kan chicha. <sup>15</sup> Munpachong nan nasugyatan winnu chaan as nan mangilan Apo Dios, tay nan kasaporan at nan mangepafiaruwan as nan panagfiyyag babaen as nan pannakafialin nan Espiritu Santo. <sup>16</sup> Sapay koma ta mawawacha nan talna ya grasya ay nurpu kan Apo Dios as nan am-in ay mangunud as nan nauy kaifiagfiakiak kan chicha ay tit-iwa ay tatakon Apo Dios.

<sup>17</sup> Munlapu ad wani, masapor maid kan chakayu nan mangot-otyok as nan chak isursuru, tay nauycha nan filatku ay mangepaila ay tit-iwa ay fiabfiaarunak kan Apo Jesus.

<sup>18</sup> Iib-a, sapay koma ta mawawacha kan chakayu am-in nan grasyan Apo takú ay Jesu Cristo. Amen.

---

\* **6:11** Rom. 16:22; 1 Co. 16:21; Col. 4:18; 2 Tes. 3:17

## Nan Surat Pablo As Nan Chiyuycha I-Efeso Nan Omona Ay Ammuwun

Nan nauy surat Pablo at para as nan chiyuycha omaafurot ay wacha henan siyudad ay Efeso ya henan chiyuycha il-ili ay nangliliwus henan siyudad ay ansa. Insurat Pablo nan nauy as nan timpon nan naifiafiaruchana ad Roma (3:1; 4:1; 6:20). Hi Tikico nan finaorna ay nangiyuy as nan nauy surat (6:21-22) ya uray nan suratna as nan chiyuycha i-Colosas (Col. 4:7-9) ya nan suratna kan Filemon.

As nan hiyasa ay timpu, nan siyudad ay Efeso at ad-acha ya kaamuchan henan probinsiya ay Asia ay senakop nan chiyuycha i-Roma. Hesa nan kawad-an nan templo ay manaychayawancha kan Artemis ay didiosencha ay fiafiai (Ara. 19:27-28, 34-35). As nan inmuyan cha Pablo hesa ay mangekasaba as nan Ammay ay Chamag as nan unig chi chuwa ay tawwun, wachacha nan enmafurot kan Apo Jesus (Ara. 19:1-20; 20:17-38). Angkiay ya nunfialin sa ay siyudad as kaman sentron nan kawad-an chi omaafurot henan probinsiya ay Asia.

As nan nauy ay surat, nan usa ay amud ay insurat Pablo at maepangkep as nan planon Apo Dios ay mangornong as nan am-in ay finayangna ay nakin ap-apu kan Cristo (1:10). Matongpar na as nan mun-us-usaan nan chiyuycha omaafurot babaen as nan nakius-usaancha kan Cristo.

Enlawlawag Pablo nan maepangkep as nan mun-us-usaan nan iglesia. Nan enosarna ay nangelawlawag as nan laychun ay kanan nan iglesia at empachongna nan chiyuycha omaafurot as nan achor Cristo, ya hi Cristo nan uru ay mangepanguru kan chicha (1:22-23; 4:15-16). Nan usa pay ay enosarna at empachongna nan iglesia as nan maasawa ay fiafai, ya hi Cristo nan mangasawa kan hiya (5:25-32). Nan iglesia at maepachong us as nan chiyuycha parten chi afong ay cha kiaufun Apo Dios as nan chupras ay pugnad, ya nan amud ay fiatu ay wacha as nan sulen nan pugnad at hi Cristo (2:20-21).

Kiapú as nan nakius-usaan takú kan Cristo, maid at natkunan nan Judio as nan Gentil ya nan mafiabfiaor as nan amona, tay kun takú at nunfialin as us-usa ay pamilyan Apo Dios. Hiyana nan kiapúna ay insurat Pablo nan maepangkep as nan ustу ay panagfiyag nan hen-asawa (5:22-33), nan ongong-a-ya nan chanakchakorchha (6:1-4), ya nan mafiabfiaor ya nan amona (6:5-9).

As nan anongosna, insuratna nan maepangkep as nan armas ay ichat Apo Dios as nan chiyuycha omaafurot ay osaruncha ay mangamis kan Satanas (6:10-20).

### **Nan Nakudkudwaan Nan Nauy Surat**

Nan Laplapon Nan Surat 1:1-2

Nan Kasasaad Nan Chiyuycha Omaafurot Kan Cristo 1:3-3:21

Nan Panagfiyag Nan Chiyuycha Omaafurot Kan Cristo 4:1-6:9

Nan Armas Nan Chiyuycha Omaafurot Kan Cristo 6:10-20

Nan Anongos Nan Surat 6:21-24

### ***Nan Laplapon Nan Surat***

<sup>1</sup> Ha-un hi Pablo ay usa ay apostol Cristo Jesus, tay hiyana nan enkeddeng Apo Dios.

Nauy nan suratku kan chakayu ay tatakon Apo Dios ad Efeso ay tit-iwa ay nakius-usa kan Cristo Jesus.

<sup>2</sup> Sapay koma ta mawawacha kan chakayu nan grasya ya natalna ay numnum ay nurpu kan Apo Dios ay Ama takú ya kan Apo Jesu Cristo.

### *Nan Nakaskaschaaw Ay Planon Apo Dios*

<sup>3</sup> Chayawun takú hi Apo Dios ay hiya nan Dios ya Aman Apo takú ay Jesu Cristo. Benendisyonana chitaku ay nakius-usa kan Cristo as nan am-in ay naespirituwan ay bendisyon ay wacha ad chaya. <sup>4</sup> Tay sakbay mafiyang nan luta, pinipilen Apo Dios chitaku ay munfialin as tatakuna kiapú as nan nakius-usaan takú kan Cristo ta munfialinuna chitaku as nasantowan ya maid fiasorna as nan mangilana. <sup>5</sup> Kiapú as nan layad Apo Dios, sikud ay enkeddengna ay munfialinun chitaku as an-akna babaen as nan enat Jesu Cristo ay maiyunud as nan laychuna ya pangkepna. <sup>6</sup> Isunga chaychayawun takú koma hi Apo Dios kiapú as nan nakaskaschaaw ay grasyana ay chaana inyekot ay inchat kan chitaku ay nakius-usa as nan laylaychuna ay Anakna.

<sup>7</sup> Tay babaen as nan enmayas ay charan nan Anakna ay hi Cristo at nawawayawaan takú. Nan laychuna ay kanan at napakawan takú as nan fiasfiasor takú ay maiyunud as nan kenaongor nan grasyan Apo Dios <sup>8</sup> ay chana ichaichat kan chitaku. Inchatna us nan kenasilib ya pannakaawat takú maepangkep as nan enat Cristo. <sup>9</sup> Tay maiyunud as nan laychuna, enpakaammuna kan chitaku nan planuna ay chaan naepakaammu ad pusuy ay sikud ay enkeddengna ay matongpar babaen kan Cristo. <sup>10</sup> Nan nauy planuna at lopasunantu as nan umchanantu nan ustу ay timpu. As nan hiyachi, mun-us-usaunantu nan am-in ay finayangna ad chaya ya asna's luta ta hi Cristo yangkiy nan Apocha.

<sup>11</sup> Am-in ay ekamkaman Apo Dios at maiyunud as nan planuna ya pangkepna. Hiyasa us challu as nan nangpiliyana kan chakami ta munfialin kami as tatakuna kiapú as nan nakius-usaanmi kan Cristo, tay hiyana nan sikud ay enkeddengna nunlapu as nan laplapuna. <sup>12</sup> Enatna na ta chakami ay enmon-oná ay nawad-an as namnama kan Cristo at chaychayawunmi koma nan kenangaton Apo Dios.

<sup>13</sup> Kaman us kan chakayu at nakius-usa kayu kan Cristo babaen as nan nanngoranyu as nan tit-iwa ay kalina ay hiyana nan Ammay ay Chamag maepangkep as nan kaesarakananyu ya babaen as nan enmafurotanyu kan Cristo. Isunga inchat Apo Dios kan chakayu nan Espiritu Santo ay enkarina ay hiya nan kaman marka ay mangepaila ay chakayu nan kuwana. <sup>14</sup> Nan naichatan nan Espiritu Santo kan chitaku at hiyana nan mangepasiguradu ay awatun takú nan am-in ay enkarina as nan tatakuna. Hiyana us nan mangammuwantakú ay siguradu ay kumpilituwunantu nan pannakawayaway takú. Chaychayawun takú koma nan kenangaton Apo Dios.

### *Nan Luwaron Pablo*

<sup>15</sup> Isunga hiyana nan kiapúna ay nunlapu as nan nangammuwak as nan pammatiyu kan Apo Jesus ya nan layadyu as nan am-in ay iib-ayu ay tatakon Apo Dios, <sup>16</sup> chaanku inkinkinak ay nunyaman kan Apo Dios kiapú kan chakayu. Kunak kay munkararag kan Apo Dios, ekarakarakiak chakayu.

<sup>17</sup> Nan chak ekarkararag as nan machaychayaw ay Ama ay hiya nan Dios Apo takú ay Jesu Cristo at ichatna koma kan chakayu nan kenasilib ya pannakaawat ay nurpu as nan Espiritu Santo ta kaskasinyu maammuwantnan maepangkep kan Apo Dios. <sup>18</sup> Ekararagku us ay masilawan koma nan numnumyu ta maammuwanyu nan chayu namnamaun as nan nangayakiana

kan chakayu ya ta maammuwanu us nan kenaongor nan nakaskaschaaw ay bendisyona ay enkarina as nan tatakuna. <sup>19</sup> Ekararagku pay ay maammuwanyu nan maid kaepachongana ay kenaamud nan pannakafialina ay cha mawacha kan chitaku ay omaafurot. Nan nauy ay pannakafialin ay cha mamadfiachang kan chitaku at pachong nan nakaskaschaaw ay pannakafialina <sup>20</sup> ay enpailana as nan nangtakuwana kan Cristo manipud as nan utúy ya as nan nangepatokorana kan hiya as apét kannawana ad chaya. <sup>21</sup> Hid-i nan cha muntorayan Cristo ad wani. Nan torayna at natortoray mu nan am-in ay anap-apu, nan wachay kalibfengana ya nan am-in ay wachay pannakafialina asna's luta ya ad chaya.\* O, nan ngachana at natortoray us mu nan am-in ay ngachan nan totoray ay maichat ad wani ya as tapen chi urkiw.† <sup>22</sup> Enpaetoray us Apo Dios hi Cristo as nan am-in ay nafiayang, ya chinutokana hiya as mangepanguru as nan iglesia.‡ <sup>23</sup> Nan iglesia nan maepachong as nan anchor ya hi Cristo nan maepachong as nan uruna. Mu maid anchor nan uru, achi kumpilitu. Assesa us as nan iglesia ya hi Cristo, tay nan iglesia nan mangumpilitu kan Cristo, ya hi Cristo us nan mangumpilitu as nan am-in.§

## 2

### *Hi Apo Dios Nan Mangepafiarú As Nan Fiyag Taku*

<sup>1</sup> Ad kasin at naifilang kayu as natuy as nan mangilinan Apo Dios kiapú as nan fiasfiasoryu. <sup>2</sup> As nan hiyachi ay timpu at inun-unudyu nan mangotettet ay panagfiyag nan tataku asna's luta. Enab-afurotyu hi Satanás ay ap-apon nan chiyuycha anennet as nan kawad-an nan chiyuycha lifuu ay hiya nan cha mangetortoray as nan chiyuycha achi omaafurot kan Apo Dios. <sup>3</sup> Nan kenatit-iwana at uray chitaku am-in ad kasin at pachong nan panagfiyag takú nan panagfiyagcha. Tay enpapas takú nan chiyuycha mun-ongosán nan anchor ya nan numnum takú ay chicha nan nurpu as nan mangotettet ay katataku takú. Isunga pachong takú nan tapina ay maid pammaticha ay nakeddengan us ay machusa kiapú as nan fungat Apo Dios kan chitaku.

<sup>4</sup> Ngem hi Apo Dios at sumusug-ang, ya kiapú as nan ongor ay layadna kan chitaku. <sup>5</sup> entapina chitaku kan Cristo as nan natakuwana manipud as nan utúy uray kun takú naifilang as natuy kiapú as nan fiasfiasor takú ta mawacha nan fiarú ay fiyag takú. Kiapú as nan grasyan Apo Dios challu, naesarakan takú.\* <sup>6</sup> Kiapú as nan nakius-usaan takú kan Cristo Jesus, entapen Apo Dios chitaku kan Cristo ay nataku as nan natakuwana as nan utúy, ya enpaetorayna chitaku kan hiya ad chaya. <sup>7</sup> Enat Apo Dios na ta ad wani ya as tapen chi urkiw at epailana nan maid kaepachongana ay grasyana babaen as nan layadna kan chitaku kiapú as nan nakius-usaan takú kan Cristo Jesus. <sup>8</sup> Tay kiapú as nan grasyan Apo Dios at naesarakan kayu babaen as nan pammatiyu kan Cristo. Fiakur kiapú as nan mangesarakananyu as nan mismu ay achoryu, ngem kun at inchat Apo Dios. <sup>9</sup> O, fiakun kiapú as nan mismu ay ekamkaman takú ta maid poros atun takú ay mangepangas as nan kaesarakanan takú. <sup>10</sup> Tay kun pay chitaku, hi Apo Dios nan nangepafiarú as nan fiyag takú kiapú as nan nakius-usaan takú kan Cristo Jesus ta atun takú koma nan ammay ay sikud ay ensakianan Apo Dios ay atun takú.

\* <sup>1:21</sup> Col. 1:16; 2:18; Heb. 1:5-14; 1 Ped. 3:22  
Efe. 5:23-24; Col. 1:18      § <sup>1:23</sup> Col. 1:17-18, 24

† <sup>1:21</sup> Filip. 2:9-11; Heb. 1:4; 1 Ped. 3:22      ‡ <sup>1:22</sup> Ara. 5:11; Rom. 3:24; 5:15; Efe. 2:8-9

### *Mun-us-usaun Cristo Nan Am-in Ay Omafurot Kan Hiya*

**11** Isunga chakayu ay naiyanak ay Gentil, numnumunyu nan kasasaadyu ad kasiñ. “Chaan nasugyatan” nan inyawag nan chiyuycha Judio kan chakayu. Chicha ay Judio nan mange pangpangas ay chicha nan “nasugyatan”, tay kanancha un chicha nan tatakon Apo Dios. Nan sugyat at ekaman nan tataku as nan anchor yangkiay. **12** Numnumunyu us ay as nan hana ay timpu at maid poros pannakaammuyu maepangkep kan Cristo. Kaili kayu challu ay chaan naetapi as nan chiyuycha kianak Israel ay pinilen Apo Dios as tatakuna.<sup>†</sup> Chaan kayu us naetapi as nan chiyuycha inturag Apo Dios as nan tatakuna ay naifisaran nan karina kan chicha.<sup>‡</sup> Natataku kayu henan nauy ay lufong ay maid kayman namnamayu<sup>§</sup> ya maid poros am-ammuyu maepangkep kan Apo Dios. **13** Ngem ad wani, kiapú as nan nakius-usaanyu kan Cristo Jesus, chakayu ay achawwi nan pannakaammuna maepangkep kan Apo Dios ad kasiñ at enesopna chakayu kan hiya babaen as nan enmayas ay charan Cristo as nan natuyana. **14** Tay hi Cristo ay mismu nan nangepakappia kan chitaku ay Judio as nan Gentil. Hiya nan nangepaus-usa as numnum takú ya nangaan as nan kiapón nan masisiyanan takú ay nurpuwan nan mun-iinningoran takú.\* **15** Babaen as nan natuyana as nan koros, kenaana nan toray nan Lintig Moises ay kawad-an nan am-in ay filin ay masapor tongparun takú ay Judio. Enatna na ta nan chuwa ay chicha nan chiyuycha Judio ya nan chiyuycha Gentil at kamana fiayangun chicha as usa yangkiay ay fierú ay taku babaen as nan nakius-usaancha kan Cristo. Mu assena, hiya nan nangepakappia kan chatona ay chuwa. **16** O, babaen as nan natuyana as nan koros, nan hanacha chuwa ay finayangna as usa yangkiay ay anchor at enpakappiana kan Apo Dios. Hiyana nan enat Cristo ay nangaan as nan mun-iinningoran takú. **17** Enmali hi Cristo asna's luta, ya enkasabana kan chakayu ay Gentil ay naifilang as achawwi kan Apo Dios ya kan chakami ay naifilang as asnop kan hiya nan maepangkep as nan makekappiaan takú kan Apo Dios. **18** Tay babaen kan Cristo, nan chuwa ay chicha nan chiyuycha Judio ya nan chiyuycha Gentil at mafialinchay ay maesnop kan Apo Dios ay Ama takú babaen as nan fiachang nan us-usa ay Espirituna ay wacha kan chitaku.

**19** Isunga chakayu ay Gentil at fiakun kayu at kaili winnu kaili ay achi am-ammu, ngem munkakailiyan kayu as nan tatakon Apo Dios ya naifilang kayu as membron nan pamilyana. **20** Maepachong kayu as nan maiyamma as afong ay cha kiaufun Apo Dios as nan kunug ay pugnad. Nan apostoles ya nan chiyuycha pomapadtu at chicha nan maepachong as nan pugnad, ya hi Cristo Jesus nan kaamuchan ay fiatu as nan pugnad ay mange papaknug as nan intiru ay afong.<sup>†</sup> **21** O, kiapú kan Cristo, naepapaot ay ustu nan am-in ay parten nan afong, ya hi Cristo nan mange paad-acha as nan afong ta munfialin as nasantowan ay templo ay para kan hiya. **22** Assesa us kan chakayu ay Gentil kiapú as nan nakius-usaanyu kan hiya. Ad wani, cha kayu maketapi as nan tapina ay omafurot ta munfialin kayu as magyanan nan Espiriton Apo Dios.

### 3

#### *Nan Enpadnon Apo Dios Kan Pablo Para As Nan Chiyuycha Gentil*

---

† **2:12** Exo. 12:48    ‡ **2:12** Jer. 24:7; 30:22; 2 Co. 6:16-18; Pal. 21:3    § **2:12** Rom. 5:3-5; Efe. 1:18; 1 Tes. 4:13    \* **2:14** Gen. 17:12-14    † **2:20** Sal. 118:22; Isa. 28:16; 1 Ped. 2:6-7

<sup>1</sup> Hiyana nan kiapúna ay ha-un ay Pablo ay naifiafiarud kiapú as nan chak munserserfyian kan Cristo Jesus para as nan omammayanyu ay Gentil at ituruyku ay munkarkararag kan Apo Dios. <sup>2</sup> Siguradu ngarud ay chinngoryu ay entalek Apo Dios na ay chunu' kan ha-un ay mangepakaammu as nan grasyana kan chakayu para as nan omammayanyu. <sup>3</sup> Enpakaammon Apo Dios kan ha-un nan planuna ay chaan naepakaammu ad pus-uy, ya hiyasa challu nan ap-aptek ay insuratku as nan nauy suratku. <sup>4</sup> As nan mangfisaanyu ay ustu as na, maifialinyu ay maammuwantu nan pannakaawatku as nan chaan naepakaammu ay planuna ay maepangkep kan Cristo. <sup>5</sup> Ad pus-uy, chaan naepakaammu na ay planuna as nan tataku. Ngem ad wani, enpakaammon nan Espiriton Apo Dios as nan apostoles ya as nan chiyuycha pomapadtu ay pinilina. <sup>6</sup> Hiyana nan enpakaammuna ad wani: Chakayu ay Gentil, kiapú as nan emmafurotanyu as nan Ammay ay Chamag, maketawid kayu ay Gentil kan chakami ay Judio as nan chiyuycha bendisyon Apo Dios. O, chakayu at naifilang kayu ay makemembro kan chakami as nan us-usa ay anchor, ya makikudwa kayu as nanenkaren Apo Dios ay ichatna as nan am-in ay nakius-usa kan Cristo Jesus.

<sup>7</sup> Kun pay ha-un, inchat Apo Dios kan ha-un nan grasyana babaen as nan pannakafialina. O, babaen as nan pannakafialina, nunfalinunak kan hiya as usa ay munserserfi ay wachay kalibfengana ay mangekasaba as nan Ammay ay Chamag ay hiyana nan grasyana kan ha-un. <sup>8</sup> Uray kun ha-un nan kaapuchan as nan am-in ay tatakon Apo Dios, ha-un challu nan nangichatan Apo Dios as nan grasyana ta ekasabak kan chakayu ay Gentil nan maepangkep as nan chiyuycha achi markud ay bendisyon ay mawawacha kan Cristo. <sup>9</sup> O, inchatna nan grasyana ta epakaawatku as nan am-in ay tataku nan atun nan planuna ay matongpar ay chaan naepakpakaammu. Tay hi Apo Dios ay namayang as nan am-in ay wacha at nafiayag ay chaana enpakaammu nan nauy ay planuna inkiana ad wani. <sup>10</sup> Enatna na ta ad wani babaen as nan iglesia, nan chiyuycha anap-apon nan anheles ya nan chiyuycha wachay pannakafialina ay wacha ad chaya at maammuwancha nan kenasilibna as nan am-in ay tutukutukú ay kaepailana. <sup>11</sup> Nan nauy ay enat Apo Dios at naiyunud as nan sikud ay penangkepna ay atun as nan laplapuna ay tenongparna babaen kan Cristo Jesus ay Apo takú. <sup>12</sup> Kiapú as nan nakius-usaan takú kan Cristo ya babaen as nan pammati takú kan hiya at maifalin takú ay tumurud ay maesnop kan Apo Dios as nan munkarakarakan takú kan hiya, tay chungruna chitaku. <sup>13</sup> Isunga munpakaasiyak kan chakayu ay achi kayu koma machischismaya kiapú ta chaak mun-iliwliwas para as nan omammayanyu challu.

### *Nan Nangiluwaruwan Pablo As Nan Chiyuycha I-Efeso*

<sup>14</sup> Hiyana nan kiapúna ay munpalintumangak ay munkarakarag kan Apo Dios ay Ama takú ad chaya, <sup>15</sup> tay hiya nan Aman nan am-in ay pamilya asna's luta ya ad chaya. <sup>16</sup> Ekarkararakgu kan hiya ay maiyunud as nan kenaongor nan nakaskascaaw ay bendisyon a papigsaua koma nan Espirituna nan numnumyu <sup>17</sup> ta iturturuy koma Cristo ay mawawacha kan chakayu babaen as nan pammatiyu kan hiya. Ekarkararakgu us ay lomamot pay koma nan layadyu kan Apo Dios ya as nan iib-ayu <sup>18</sup> ta maketapi kayu as nan am-in ay tatakon Apo Dios ay makaawat koma ay ustu as nan achi markud ay layad Cristo kan chitaku. <sup>19</sup> O, ekarakaragku ay kaskasinyu lakamun koma nan nauy layadna uray achiyu maammuwantay ustu. Mu assesa, sumubra kan chakayu nan kenadios Apo Dios.

**20** Maichaychayaw koma hi Apo Dios ay mannakafialin as nan am-in. Hiya nan makafiael ay mangekaman as chamchamuna as solet mu nan uray ngachana ay chawatun winnu numnumun takú ay maiyunud as nan pannakafialin nan Espirituna ay nawacha kan chitaku. **21** O, maichayaw koma hi Apo Dios babaen as nan iglesia, ya babaen kan Cristo Jesus as nan am-in ay kianak, ya as in-inkiana ay maid patingkiana. Amen.

## 4

### *Nan Mun-us-usaan Nan Numnum Nan Omaafurot (1 Co. 12:1-31)*

**1** Isunga ha-un ay usa ay naifiafiarud kiapú as nan chak munserserfiyan kan Apo Jesus at munpakaasiyak kan chakayu ay matakayu ay maiyunud as nan nangayakian Apo Dios kan chakayu. **2** Uray ngachana ay uras at epailayu koma ay napakumbaba kayu ya naanos kayu. Mun-eennanos kayu koma ay mangepaila ay munleennayad kayu. **3** Epapatiyu nan kafiaelanyu ay mangiturturuy as nan mun-us-usaanyu ay inchat nan Espiritu Santo babaen as nan munkekennappiaanyu.\* **4** Chakayu ay nakius-usa kan Cristo at maepachong kayu as nan us-usa ay anchor. Us-usa nan Espiriton Apo Dios ay wacha kan chitaku. Assesa us ay us-usa nan namnama takú ay nangayakian Apo Dios kan chakayu. **5** Us-usa nan Apo takú. Us-usa nan pammati takú, ya us-usa us nan nafunyakianan takú. **6** Us-usa hi Apo Dios ay Aman nan am-in ay tataku. Hiya nan Apo ay mangetortoray as nan am-in. Epatongparna nan laychuna as nan am-in ay tataku, ya hiya nan mawawacha as nan am-in.

**7** Ngem as nan tunggal usa kan chitaku at inchat Cristo nan kafiaelan ay maiyunud as nan enkeddengna. **8** Isunga wacha nan naisurat as nan Kalen Apo Dios maepangkep kan Cristo ay kanana,

“Enamisna nan kafusorna, ya as nan ngenmatuwana ay nunfiangad ad chaya, entakina nan ongor ay naifiafiarud, ya wacha nan inchatna as nan tatakuna.”†

**9** Ngachana ngarud nan laychun ay kanan nan “ngenmatuwana ay nunfiangad ad chaya”? Nan laychun tonu ay kanan at sakbay ngenmatu, kenomsop ay nurpu ad chaya inkiana as nan karorosongan ay kawad-an asna's luta.‡

**10** Nan chiyuy kenomsop ay nurpu ad chaya at hiya challu nan ngenmatu kasin hid-i ta hiya nan mangumpilitu as nan am-in henan uray ngachana ay lukiar. **11** O, hiya challu nan nangichat as tukutukún ay kafiaelan as nan am-in ay tatakuna. Chinutokana nan tapen nan tataku ay munfialin as apostoles, as pomapadtu, ya chinutokana nan tapina as mangekaskasaba as nan Ammay ay Chamag. Nan tapen nan tataku at pinilina chicha as papastor ay mangay-aywan as nan omaafurot, ya nan tapina at inchatna nan kafiaelan ay mangisursuru kan chicha. **12** Enatna na ta esakianana nan am-in ay tatakon Apo Dios ta munserserficha kan hiya ya as nan iibacha. Hiyana nan enkamana ta pumigsa nan chiyuya omaafurot ay chicha nan naifilang as anchor Cristo **13** inkiana mun-us-usa takuntu am-in as nan panagtalek takú ya as nan pannakaammu takú as nan Anak Apo Dios. O, hiyana nan maekaman inkiana maonngan takú as nan pammati takú kan hiya ya inkiana maepachong takú ay ustu kan Cristo ay maid poros munkurangana. **14** Mu hiyasa, fiakun takú at kaman ongong-a ay naraka

\* **4:3** Filp. 4:7; Col. 3:15; 2 Tes. 3:16; 2 Tim. 2:22      † **4:8** Sal. 68:18      ‡ **4:9** Ara. 2:31; 1 Ped. 3:19

ay mafiarfialiwan chi numnumcha maepangkep as pammati, winnu kaman as nan fiangka ay iyin-inchayon chi challuyon ya iturturchun chi angin ay hiyasa nan achi tit-iwa ay sursuru. O, mu hiyasa, achi takú at maaw-awis as nan chiyuycha omallilaw ay sursurucha.<sup>15</sup> Ngem kun takú at koma mataku ay maiyunud as nan tit-iwa ay sursuru ay mangepaila as nan layad takú as nan iib-a takú. Mu hiyasa, as nan am-in ay fianag, maonngan takú ay munfialin as kaman kan Cristo ay hiya nan kaman uru takú.<sup>16</sup> Kiapú ta hiya nan kaman uru takú ya chitaku nan achorna, hiya nan mangetoray yá manosoop ay ustuustu as nan am-in ay parten nan achorna. Isunga mu waschi un tongparuna nan libfengna, pumigpigsa ya omad-acha nan intiru ay achor babaen as nan munlelennayachan takú.

### *Nan Mafiarfialiwanan Nan Panagfiyag Takú*

<sup>17</sup> Isunga nauy nan laychun nan Apo ay ifilinku ya epeletku kan chakayu: Achiyu iturturuy ay mangunud as nan panagfiyag nan chiyuycha achi omaafurot ay nan panagnumnumnumcha at maid kotkotokna.<sup>18</sup> O, kaman challu kenokorafuwān chi mangotetet nan pannakaawatcha, ya insiyanhay achorcha kan Apo Dios, tay achicha laychun ay mangammu kan hiya kiapú ta nasokelcha challu as solet.<sup>§</sup> <sup>19</sup> Nunsidlay inmingsacha ay mangekamkaman as kafiafain, ya nuntabnawcha at as nan am-in ay karasen chi kaiisiw ya kenarachok ay chacha at-atun ay achicha ikinkinak.

<sup>20</sup> Ngem chakayu at fiakun assesa nan sinuruyu maepangkep kan Cristo, <sup>21</sup> tay chinngoryu met nan maepangkep kan hiya. As nan nakius-usaanyu kan hiya, naisursuruwan kayu ay maiyunud as nan kenatit-iwa maepangkep kan Jesus.<sup>22</sup> O, naisursuruwan kayu ay mangaan ay mamingpingsan as nan sikud ay katatakuyu ay mangetortoróng as nan panagfiyagu ad kasin. Tay nan sikud ay katatakuyu at cha machachael babaen as nan chiyuycha omallilaw ay mun-ongosán nan achoryu.<sup>23</sup> Masapor eparufusyu ay hi Apo Dios nan mangepafiarú as nan numnumyu ya katatakuyu.\*<sup>24</sup> Esokatyu ngarud ay mamingpingsan nan fieru ay katatakuyu ay nafiyang ay maepachong ay ustu as nan kenadios Apo Dios. Mu assena, maepailantu ay tit-iwa ay nalintig ya nasantowan nan panagfiyagu.

<sup>25</sup> Isunga achi kayu munkutkutum, ngem kun at waschi un ifiakiana nan tit-iwa as nan iib-ana, tay nakius-usa takú am-in as nan achor Cristo. <sup>26</sup> Mu fumungat kayu, achiyu eparufus sa ay fungat ay manglumu as fumasoranyu. Achiyu us iturturuy ay fumungat inkiana mauynu nan urkiw<sup>†</sup> <sup>27</sup> ta maid chansan Satanas ay manulisug kan chakayu. <sup>28</sup> Nan mangaakiw at masapor ikinakna at ay mangakiw. Ngem kun at komakud hiya ay munchunu ta wachay pagfiyagna ya wachay ifiachangna as nan pugli. <sup>29</sup> Achi kayu munkarkali as omepasaket, ngem nan ifialekasyu yangkiay at nan ammay ay mangepapigsa as numnum nan chiyuycha chumngor ay maiyunud as nan kasaporancha ta mafiadngancha.<sup>30</sup> Achiyu koma panguyusun nan nasantowan ay Espiriton Apo Dios, tay hiya nan inchat Apo Dios kan chakayu ay kaman marka ay mangepaila ay chakayu nan kuwana. Hiya us nan mangepasiguradu ay tongparuntu Apo Dios nan enkarina ay wachantu nan urkiw ay tit-iwa ay mangwayawayana kan chakayu. <sup>31</sup> Isunga ikinakyu am-in chaná: nan saket chi numnum,

nan umingoran, nan fumungtan, nan munsesennongfiatan, nan omekakaliyan, ya nan am-in ay mangotettet ay pangkep.<sup>‡</sup> <sup>32</sup> Kun kayu at muneennanos ya munsisinnug-ang. Munpepennakawan kayu ay kaman as nan namakawanan Apo Dios kan chakayu babaen kan Cristo. §

## 5

### *Nan Taku Ay Nasilawan Chi Numnumna*

<sup>1</sup> Kiapú ta infilang Apo Dios chakayu as an-akna ay laylaychuna, hiya koma nan turachunyu. <sup>2</sup> Mataku kayu koma ay mananglayad ay kaman as nan nanglaylaychanan Cristo kan chitaku babaen as nan nangichatana as achorna ay matuy para kan chitaku. Nan natuyana at kaman as nan munfiangu ay chaton kan Apo Dios ay mangepalaylayad kan hiya.

<sup>3</sup> Ngem masapor maid poros maanapan kan chakayu as mangepapas as assi ay lachok, winnu uray ngachana ay kaiisiw ay kenarachok, winnu taku ay naakum. Tay nan nauycha manangotettet at achicha maifiakiay as nan tatakon Apo Dios.\* <sup>4</sup> Achi us maifiakiay kan chakayu ay munkarkaliyanu as assi, maid kotkotokna winnu naruket ay ot-otyok, ngem kun kayu at munyaman koma kan Apo Dios. <sup>5</sup> Tay ammuuy met ay maid as nan chiuyucha mangepappapas as assi ay lachok winnu mangekamkaman as kumpurmii ay ilan chi assi nan maetapi henan muntorayan Cristo ya hi Apo Dios. Kaman us as nan taku ay naakum, tay nan kenaakum nan diosna.

<sup>6</sup> Achi kayu maar-allilaw as nan uray ngachana ay munkarkali as maid kotkotokna. Tay kiapú as assesesa ay infiagfiakiak at omalintu nan manusaan Apo Dios as nan achi omafurot kan hiya kiapú as fungatna.

<sup>7</sup> Isunga achi kayu makekadkadwa as nan assesesa ay tataku. <sup>8</sup> Tay ad kasin at kaman ngongot nan panagnumnumnumyu. Ngem ad wani, nasilawan kayu at ay ustustu kiapú as nan nakius-usaanyu kan Cristo Jesus. Isunga unuchunyu nan panagfiay ay maifiakiay as nan tataku ay mawawacha as nan silaw. <sup>9</sup> Tay nan nasilawan ay panagnumnumnum at fumkias as am-in ay ilan chi kenaammay, kenalintig ya kenatit-iwa. <sup>10</sup> Epapasnekyu ay mangachar as nan mangepalaylayad kan Apo Dios ta hiyasa nan atunyu.†

<sup>11</sup> Achi kayu poros maetaptapi as nan maid kotkotokna ay ekamkaman nan tataku ay kaman ngongot chi panagnumnumnumcha, ngem kunyu at epakaammu kan chicha ay mangotettet nan chacha at-atun. <sup>12</sup> Tay kafiafaian tit-iwa uray kun yangkiay nan mangifiagiay as nan maetabtafun ay cha at-atun. <sup>13</sup> Ngem kun pay masilawan nan am-in at maila nan tit-iwa ay ilacha. <sup>14</sup> Tay nan am-in ay masilawan at munfialin as kaman munpaway. Hiyana nan kiapúna ay kanan nan kanta, “Fumangunka, he-a ay suyyop.

Matakuka, he-a ay natuy,

at silawan Cristo nan numnummu!”‡

<sup>15</sup> Il-ilaunyu ngarud nan panagfiaygyu. Achiyu turturachun nan chiuyucha maid silibcha, ngem kunyu at turachun nan mamasilib. <sup>16</sup> Osarunyu koma nan tunggal chansayu ay mangekaman as ammay, tay ongorcha nan cha mangekamkaman as mangotettet ad wani ay timpu. <sup>17</sup> Isunga achiyu ekamkaman chi maid kotkotokna, ngem kunyu at epapasnek ay mangammu as nan laychun nan Apo ay atunyu.

‡ 4:31 Col. 3:8    § 4:32 Col. 3:12-13    \* 5:3 Col. 3:5    † 5:10 Rom. 12:2    ‡ 5:14 Isa. 26:19; Isa. 51:17; Rom. 13:11

<sup>18</sup> Achi kayu munfututang, tay hiyasa nan manglumu as machachaelanyu, ngem kunyu at eparufus nan Espiritu Santo ay mangetoray kan chakayu. <sup>19</sup> As nan maam-amonganyu, munpepennapigsa kayu babaen as nan chiyuycha kali ay naisurat as nan salmo ya tapina pay ay kankanta ay pangchaychayaw as nan Apo. Munkekennanta kayu ay mangichaychayaw kan Apo Dios as nan am-in ay pusuyu. <sup>§ 20</sup> As nan am-in ay om-ommat kan chakayu, kanayon kayu ay munyaman kan Dios Ama kiapú as nan nakiususaanyu kan Apo takú ay Jesu Cristo. <sup>21</sup> Nan usa us at munpaetoray kayu as nan tunggal usa kiapú ta epailayu nan rispituyu kan Cristo.

*Nan Filin As Nan Hen-asawa*

(Col. 3:18-19; 1 Ped. 3:1-7)

<sup>22</sup> Chakayu ay fianafiai ay naasaw-an, waschi un munpaetoray as nan asawana, tay hiyana nan laychun nan Apo. <sup>23</sup> Tay nan laraki nan mangepanguru as nan asawana ay kaman kan Cristo ay hiya nan mangepanguru as nan iglesia ay pannakaachorna. Hi Cristo mismu nan mangesarakan as nan iglesia.\* <sup>24</sup> Kaman as nan atun nan iglesia ay munpaetoray kan Cristo, chakayu ay fianafiai ay naasaw-an at waschi un munpaetoray koma as nan asawana.

<sup>25</sup> Chakayu ay lanaraki ay naasaw-an at waschi un masapor laylaychuna nan asawana ay kaman as nan pananglaylayad Cristo as nan iglesia ya as nan nangichatana as achorna ay matuy para kan hiya. <sup>26</sup> Enatna na ta pasantowuna chicha ay tatakon Apo Dios babaen as nan nangorasanan kan chicha as nan nafunyakianancha as chanum ya as kalen Apo Dios. <sup>27</sup> Nan kiapón nan nangekamanan Cristo as na at ta esakianana nan iglesia ay munfialin as kuwana ay nasantowan ya maid poros fiasfiasorna as nan omaliyana. O, esakianana nan iglesia ay maepachong as nan maichuyas ay fiafiai ta mailantu nan kenapentasna ay maid poros mansana winnu korotna winnu uray ngachana ay munkurangana.† <sup>28</sup> Assesa us kan chakayu ay lanaraki ay naasaw-an. Waschi un laylaychuna koma nan asawana ay kaman as nan pananglaylayadna as nan achorna. Tay nan laraki ay manglaylayad as asawana at nan achorna challu nan laylaychuna. <sup>29</sup> Manuwat, tay maid taku as mang-ingor as achorna, ngem kuna at pakanun ya aywanan ay kaman as nan panang-aywan Cristo as nan iglesia, <sup>30</sup> tay chitaku nan membron nan achorna. <sup>31</sup> Wacha nan naisurat as nan Kalen Apo Dios ay kanana, “Hiyana nan kiapúna ay nan laraki at taynana cha amana kan enana, at maetepontu as nan asawana. Mu assena, munfialincha as us-usa.”‡ <sup>32</sup> Wacha nan amud ay laychun ay kanan nan nauy chaan naepakpakaammu. Nan maawatak ay maepachongana at kan Cristo ya as nan iglesia. <sup>33</sup> Ngem nauy nan para as nan nunkaasaw-an: Tunggal laraki ay naasaw-an at masapor laylaychuna nan asawana ay kaman as nan pananglaylayadna as nan achorna. Kun pay as nan fianafiai ay naasaw-an, tunggal usa at rispituwuna koma nan asawana.

## 6

*Nan Filin As Nan An-ak Ya Chanakchakor*

(Prov. 6:20; Col. 3:20-21)

---

§ 5:19 Col. 3:16 \* 5:23 Efe. 1:22; Col. 1:18 † 5:27 Pal. 19:7-8; 21:2, 9 ‡ 5:31 Gen. 2:24; Mat. 19:5

<sup>1</sup> Chakayu ay an-ak, manangtongpar kayu as nan chanakchakoryu, tay hiyasa nan ustu ay atunyu ay laychun Apo Dios. <sup>2</sup> Tay nan omona ay filin Apo Dios ay wachay karina at kanana, “Chyawum cha amam kan enam

<sup>3</sup> ta omam-ammay ya oman-anchu nan fiyagmu asna's luta.”\*

<sup>4</sup> Chakayu ay chanakchakor, achiyu pafungfungtun nan an-akyu. Ngem kunyu at paurukún chicha ay maiyunud as nan disiplina ya sursuru ay maifiakiay as nan nakius-usaanyu kan Cristo.

### *Nan Filin As Nan Chiyuycha Mafiabfiaor Ya Amocha*

(Col. 3:22–4:1; Tit. 2:9–10; 1 Ped. 2:18–20)

<sup>5</sup> Chakayu ay mafiabfiaor, manangtongpar kayu as nan chiyuycha amoyu asna's luta. Rispiwuunu tit-iwa chicha ay achi kayu aginseserfi kan chicha ay kaman hi Cristo nan chayu munserserfiyan. <sup>6</sup> Fiakun yangkiay as nan mangiil-an nan chiyuycha amoyu nan mangtongparanyu kan chicha ta aprobarancha chakayu. Ngem kun kayu at komakukakud ay mangekaman as nan enkeddeng Apo Dios, tay chakayu at munserserfi kayu kan Cristo. <sup>7</sup> Lagragsakunyu ay munchunu ay kaman challu hi Apo Jesus nan chayu munserfiyan, fiakun as nan tataku. <sup>8</sup> Tay ammuyu ay gun-gunaantu nan Apo nan tunggal usa kiapú as nan ammay ay ekaman nan uray mafiabfiaor winnu fiakun.

<sup>9</sup> Chakayu ay amocha, ammay us nan atunyu as nan fiabfiaarunyu. Ikinakyu ay mangiyug-ugyat as chusa kan chicha, tay ammuyu ay nan Apocha at hiya us nan Apoyu ay wacha ad chaya, ya mapapchong kayu as nan mangilana.†

### *Nan Armas Ay Ichat Apo Dios*

<sup>10</sup> Ad wani, nauy nan anongos ay tukunku kan chakayu. Pumigsa kayu koma babaen as nan nakius-usaanyu kan Apo Jesus ya babaen as nan napigsa ay pannakafialina. <sup>11</sup> Osarunyu nan am-in ay armas Apo Dios ta makatakchug kayu ay mangamis as nan mangotettet ay kenasikap Satanas. <sup>12</sup> Tay fiakun as nan tataku nan makepapatuyan takú mu achi as nan am-in ay mangotettet ay achi maila ay wachá as nan kawad-an nan chiyuycha lifuu. O, nan am-in ay ap-apu, nan wachay kalibfengana, nan wachay pannakafialina ya nan chiyuycha anennet at chicha nan cha mangetortoray as nan tataku ay kaman ngongot chi panagnumnumnumcha.‡ <sup>13</sup> Isunga osarunyu nan am-in ay armas Apo Dios. Mu assena, uray ngachananu ay uras ay ommatantuy mangotettet at nakasakiana kayu ay tomakchug ay mangamis as nan kafusoryu. Kun kayu pay marpas, mangatakchug kayu pay laing ay mangamis as nan mangotettet.

<sup>14</sup> Isunga munsasakiana kayu ay wacha nan nauycha armasyu: Nan pannakasinturunyu at nan mangifiag-anyu as nan kenatit-iwa. Nan esarakyu as tagrangyu at nan nalintig ay panagfiyagyu.§ <sup>15</sup> Nan pannakasapatosyu at nan munsasakianaanyu ay mangekasaba as nan Ammay ay Chamag maepangkep as nan natalna ay numnum ay ichat Apo Dios.\* <sup>16</sup> Etatapiyu ay mamangchun as nan pannakakarasyu ay hiyasá nan pammatiyu kan Cristo. Babaen as nan nauy, kafaelanyu ay mangpatuy as nan am-in ay cha omap-apuy ay epanan nan Mangotettet ay hi Satanas. <sup>17</sup> Araunyu nan

\* <sup>6:3</sup> Exo. 20:12; Deut. 5:16   † <sup>6:9</sup> Ara. 10:34; Rom. 2:11   ‡ <sup>6:12</sup> Rom. 8:38; Efe. 1:21   § <sup>6:14</sup> Exo. 12:11; Isa. 11:5; Jer. 13:1-11   \* <sup>6:15</sup> Isa. 52:7

pannakahelmetyu ay hiyasa nan kaesarakanyu,<sup>†</sup> ya nan pannakaespadayu ay hiyasa nan kalen Apo Dios ay ichat nan Espiritu Santo.<sup>‡</sup> <sup>18</sup> As nan mangos-osaranyu kan chatona am-in, munkararag kayu ay chumawat as fiachang Apo Dios. Uray ngachana ay atunyu, munkararag kayu babaen as nan mangepanguruwan nan Espiritu Santo kan chakayu. As nan munkararakianyu, etatalengaanyu ya epapasnekyu ay munkararag para as nan am-in ay tatakon Apo Dios.<sup>§</sup> <sup>19</sup> Ekarkararakianak us ta as nan kawadan chi chansak ay munkali, ichat Apo Dios koma kan ha-un nan ustу ay kali ya turudku ay mangepakaammu as nan Ammay ay Chamag ay chaan naepakaammu ad pus-uy. <sup>20</sup> Tay kiapú as nan nauy ay chamag, finaorak kan Apo Jesus as pannakaachorna, ya hiyana nan kiapúna ay naifiafiaruchak ad wani. Isunga ekarkararakianak kan chakayu ta tumuruchak ay munekasaba, tay hiyasa challu koma nan ustу ay atok.

### *Nan Anongos Nan Surat*

<sup>21</sup> Ad wani ta maammuwanu nan am-in ay cha om-ommat kan ha-un, ifiaorku hi Tikico kan chakayu. Hiya nan usa ay laylaychok ay ifia takú, ya matalek hiya ay munserserfi as nan Apo.\* <sup>22</sup> O, hiyana nan kiapúna ay ifiaorkuhiya kan chakayu ta epachamagna nan cha om-ommat kan chakami hena ya ta papigsauna nan numnumyu.

<sup>23</sup> Sapay koma ta mawawacha as nan iib-a nan natalna ay numnum ay nurpu kan Apo Dios ay Ama takú ya kan Apo Jesu Cristo. Mawawacha koma us kan chicha nan layad kiapú as pammaticha. <sup>24</sup> Sapay koma ta mawawacha nan grasyan Apo Dios as nan am-in ay achi mamammaid chi layadcha kan Apo takú ay Jesu Cristo.

<sup>†</sup> 6:17 1 Tes. 5:8    <sup>‡</sup> 6:17 Heb. 4:12    Ara. 20:4; 2 Tim. 4:12

<sup>§</sup> 6:18 Rom. 12:12; Filp. 4:6; Col. 4:2; 1 Tim. 2:1

\* 6:21

## Nan Surat Pablo As Nan Chiyuycha I-Filipos Nan Omona Ay Ammuwun

Nan nauy surat Pablo at para as nan chiyuycha omaafurot ay wacha henan ili ay Filipos. Nan ili ay Filipos at wacha henan probinsiya ay Macedonia ay senakop nan chiyuycha Romano. Insurat Pablo nan nauy as nan naifiafiaruchana ad Roma (Ara. 28:16-31, Filp. 1:7,13). Uray mu hiyasa, ongor chi lagsakna ya talekna kiapú as nan pammatina kan Cristo. Maila chasa as nan nauy ay surat.

Nan nauyucha i-Filipos nan omona ay nunfialin as omaafurot kan Cristo henan intiru ay Macedonia kiapú as nan nun-ekaskasabaan Pablo kan chicha as nan enmona ay enay-ayana henan hana ay probinsiya (Ara. 16:6-40). Chicha us nan enmon-oná ay nangepaw-et as fiachangcha kan hiya as nan nunliglikiatana ad Tesalonica (4:10-16; 2 Co. 11:9). Enpaw-etcha nan siping kan Epafroditó ay pannakaachorcha (2:30; 4:18). Isunga malaylaychan as solet hì Pablo kan chicha.

As nan kawad-an Epafroditó ad Roma ay kawad-an Pablo, nunsaket hiya, at kiayud matuy (2:25-30). Ngem as nan enmamayana, enpaw-et Pablo kan hiya nan nauy suratna as nan chiyuycha i-Filipos.

Nan kiapúna ay nunsurat hi Pablo at ta munyaman kan chicha as nan siping ay enpaw-etcha (4:10). Nan usa pay at laychuna ay ifilin ay achicha un-unuchun nan achi ustú ay sursuron nan tapina maepangkep as nan kaesarakancha (3:2). Enpanumnumna kan chicha ay naesarakanancha kiapú yangkiay as nan sug-ang Apo Dios kan chicha ya kiapú as nan emmafurotancha kan Jesus (3:3). Isunga maid kotkotok nan mangun-unuchancha as nan Lintig Moises ay kaman as nan panagsugyat. Kuncha at unuchun nan en-enat Cristo Jesus ay numpakumbaba ay nangtongpar as nan am-in ay laychun Apo Dios ay atuna (2:5-11). Mu atuncha sa, naragsakcha ya natalnay numnumcha (4:7).

### **Nan Nakudkudwaan Nan Nauy Surat**

Nan Laplapon Nan Surat 1:1-2

Nan Luwaron Pablo Para As Nan Chiyuycha I-Filipos 1:3-11

Nan Kasasaad Pablo Ya Nan Namnamauna 1:12-30

Nan Panagfiyag Nan Chiyuycha Omaafurot Kan Cristo 2:1-18

Nan Maepangkep Kan Cha Timoteo Kan Epafroditó 2:19-30

Nan Chiyuycha Tukun Pablo 3:1-4:9

Nan Nunyamanan Pablo As Nan Chiyuycha I-Filipos 4:10-20

Nan Anongos Nan Surat 4:21-23

### **Nan Laplapon Nan Surat**

<sup>1</sup> Chakami cha Pablo kan Timoteo ay munserserfi kan Cristo Jesus.

Nauy nan suratmi kan chakayu am-in ay tatakon Apo Dios ad Filipos ay nakius-usa kan Cristo Jesus ya as nan chiyuycha mange pangpanguru ya fumadfiachang as nan iglesia.

<sup>2</sup> Sapay koma ta mawawacha kan chakayu nan grasya ya nan natalna ay numnum ay nurpu kan Apo Dios ay Ama takú ya kan Apo Jesu Cristo.

### **Nan Luwaron Pablo Para As Nan Chiyuycha I-Filipos**

(Rom. 1:8-15; 1 Co. 1:4-9; Efe. 1:15-23; Col. 1:3-14)

<sup>3</sup> Kunku kay numnumun chakayu, munyamanak kan Apo Dios ay munserserfiyak. <sup>4</sup> Kunku kay ekarkararakian chakayu am-in, naragsakak <sup>5</sup> kiapú as nan nangfiadfiadnganyu kan ha-un as nan naekaskasabaan nan Ammay ay Chamag nunlapu as nan enmon-oná ay urkiw ay enmafurotanyu inkiana ad wani.\* <sup>6</sup> Siguraduwak ay hi Apo Dios ay nangelapu as nan ammay ay chana at-atun as nan fiyagyu at iturturunya inkiana lopasuna as nan urkiw ay munfiangchan Cristo Jesus. <sup>7</sup> Ustu nan ammay ay leknak maepangkep kan chakayu am-in kiapú as nan layadku kan chakayu. Tay uray as nan naifiafiaruchak ya as nan chak mangepaneknek as nan kenatit-iwan nan Ammay ay Chamag, chakayu am-in at naetapi kayu kan ha-un as nan grasyan Apo Dios. <sup>8</sup> Hi Apo Dios nan mangepaneknek ay mailiwak as solet kan chakayu. Tay nan layadku kan chakayu at kaman as nan layad Cristo Jesus kan chakayu.

<sup>9</sup> Nauy ngarud nan kararagku para kan chakayu: Kaskasin omongor koma nan layadyu as nan pachongyu ay taku. Assesa us ay omong-ongor komay ammuyu maepangkep kan Apo Dios ya kafiaelanyu ay mangematon as nan tit-iwa ya ustу. <sup>10</sup> Mu hiyasa, mafialinyu ay piliyun nan kaammayan ta nacharos ya maidtu maepabpfiasor kan chakayu as nan urkiw ay munfiangchan Cristo. <sup>11</sup> O, ekararakiak chakayu ta as nan am-in ay panagfiaygu at nalintig kayu babaen yangkiay as nan fiachang nan pannakafialin Jesu Cristo. Tay mu hiyasa, chayawun nan tataku hi Apo Dios ya figfikuncha nan kenangatuna.

### *Nan Naifiaruchan Pablo Ya Nan Naepachamakian Nan Ammay Ay Chamag*

<sup>12</sup> Laychok ay maammuwanyu ay iib-a ay nan nunfianakian nan naifiaruchak at ammay, tay kaskasin naepachamag nan Ammay ay Chamag. <sup>13</sup> Nan enommat challu at nunchinngor as nan am-in ay munkukuwarcha as nan palasyu ya as nan am-in ay tapina ay tataku hena ay naifiafiaruchak kiapú ta usaak ay munserserfi kan Cristo. <sup>14</sup> Kiapú as nan naifiafiaruchak, kaskasin talekun nan kaongoran as nan iib-a takú nan Apo, ya kaskasincha timurud ya maid ug-ugyatcha ay mangekasaba as nan kalen Apo Dios.

<sup>15</sup> Tit-iwa ay wachacha nan tapina ay mangekasaba as nan maepangkep kan Cristo kiapú as aposcha kan ha-un, ya kuncha laychun ay makisumsum. Ngem fiakun sa as nan tapina, tay ustу nan pangkepcha. <sup>16</sup> Nan nauycha ustuy pangkepcha at mun-ekasabacha kiapú as layadcha kan ha-un, tay ammucha ay inchat Apo Dios kan ha-un nan chunu ay mangepaneknek as nan kenatit-iwan nan Ammay ay Chamag. <sup>17</sup> Kun pay nan nauycha omapos at ekasabacha nan maepangkep kan Cristo ta epangatucha nan mismu ay achorcha. Achi ustу nan pangkepcha, tay ka-anancha ay kaskasinak palikiatun as nan kawad-ak as pagfiaruchan.

<sup>18</sup> Pay-anyu ud-ay! As nan am-in ay pamuspusan, uray achi tit-iwa winnu tit-iwa nan pangkepcha at maekasaba koma nan maepangkep kan Cristo. Mu hiyasa, munlagsakak challu. O, ituruyku ay munlagsak, <sup>19</sup> tay ammok ay mawayawayaanaktu as nan nauy cha om-ommat kan ha-un babaen as nan kararagyu ya fiachang nan Espiriton Jesu Cristo.

### *Hi Cristo Koma Nan Maichyaw As Nan Fiyag Takú (2 Co. 5:6-10)*

\* <sup>1:5</sup> Ara. 16:12

<sup>20</sup> Nan laraychok paat ya namnamaok at achiyaktu poros mafiainan as nan sangwanan Apo Dios. Ngem kun at nan laraychok at kanayon ay naturuchak as solet, kaskasin ad wani ta maichayaw hi Jesu Cristo babaen kan ha-un as nan matatakuwak winnu matuyak. <sup>21</sup> Tay mu para kan ha-un, nan matatakuwak asna's luta at ituruyku ay munserfi kan Cristo ta maichayaw hiya. Mu matuyak, kaskasin ammay, tay umuyak as nan kawadana. <sup>22</sup> Ngem mu kutukiak ay matataku, ongor pay nan mafiadngak. Tuan, acheck ammu nan piliyok. <sup>23</sup> O, tit-iwa ay nalikiat ay munpili as nan nauycha chuwa. Laraychok ay uray ud-ay kunak matuy ta wachaak kan Cristo, tay hiyasa nan kaskasin ammay. <sup>24</sup> Ngem kaskasin kasaporan ay ituruyku ay matakutu ta mafiadngak chakayu. <sup>25</sup> Maid chuwachuwak as na. Isunga ammok ay matakutu pay laing ya kutukiak kan chakayu am-in ta kaskasin kayu napigsa ya naragsak as nan pammatiyu. <sup>26</sup> Laychok ay matakutu pay ta as nan kasektu mangfisitaan kan chakayu, kaskasinyu ichaychayaw hi Cristo Jesus kiapú kan ha-un.

<sup>27</sup> Ngem uray mu ngachanay ommat, masapor maiyunud nan panagfiaygu as nan Ammay ay Chamag maepangkep kan Jesu Cristo. O, atunyu sa ta mu makaaliyak hesa winnu achi, machamagku koma ay achi kayu munchuwachuwa ay mun-us-usa as nan pammatiyu, ya mun-us-usa kayu us ay mangepanekekne as nan Ammay ay Chamag. <sup>28</sup> Achi kayu umug-ugyat as nan chiyuuya mangkontra kan chakayu. Hiyana nan mangepala kan chicha ay maamischantu ay machusa, ya chakayuntu nan mangafiai ay maesaran, tay hi Apo Dios nan mangepangafiai kan chakayu. <sup>29</sup> Tay inchat Apo Dios kan chakayu nan grasyana, fiakun yangkiay ta omafurrot kayu kan Cristo, ngem ta mun-iliwas kayu us para kan hiya.<sup>†</sup> <sup>30</sup> Nan chayu ililiwas at kaman as nan inliwiwasku ay inil-ilayu as nan kawad-ak kan chakayu. Inkiana ad wani, hiyasa challu nan chayu chungchungrun ay chak ililiwas.

## 2

### *Nan Kenapakumbaba Ya Kenangaton Cristo*

<sup>1</sup> Ammuyu ay pinmigsa nan numnumyu kiapú as nan nakius-usaanyu kan Cristo, ya naliwliwa kayu kiapú as nan layadna kan chakayu. Nakiuus-usa kayu us as nan Espiritu Santo. Ammuyu us ay munleennayad ya munisisinnug-ang. <sup>2</sup> Chawatok ngarud kan chakayu ay paragsakunak ay ustu babaen as nan mapapchongan nan numnumyu, mapapchongan nan layadyu, ya mun-us-usaan nan leknayu ya pangkepyu. <sup>3</sup> Achi kayu poros omekaman as kumpurmi ta epangatuyu winnu epangasyu nan mismu ay achoryu. Ngem kun kayu at munpakumbaba as nan tunggal usa, ya ifilangyu nan tapina as kaskasin amud mu chakayu. <sup>4</sup> Nan tunggal usa kan chakayu at fiakun nan omammayana yangkiay nan numnumuna, ngem nan omammayan us chi tapina. <sup>5</sup> Masapor munpachong nan panagnumnumnumyu as nan panagnumnumnum Jesu Cristo.

<sup>6</sup> Tay uray sikud ay munpachong cha Jesu Cristo kan Apo Dios,  
chaan enpelet Jesus ay kumukutug hiya as nan saadna,

<sup>7</sup> ngem kuna at chinukkian nan hana saadna, ya nunfialin as mafiab-fiaor.

As nan enmaliyana asna's luta, naiyanak ay taku nan kail-ana.

<sup>†</sup> 1:29 1 Ped. 2:21

- <sup>8</sup> As nan nunfialinana as taku, nunpakumbaba hiya, ya inyab-afudna nan pangkep Apo Dios kan hiya uray inkiana natuy as nan koros.
- <sup>9</sup> Isunga enpangaton Apo Dios hiya as nan kangatuwan ay saad, ya inchatna us kan hiya nan ngachan ay katotorayan as nan am-in ay ngachan.
- <sup>10</sup> Enat Apo Dios sa ta kan Jesus nan munpalintumangantu nan am-in ay wacha ad chaya, asna's luta ya uray as nan kawad-an nan nunkatuy ay munchaychayaw kan hiya.
- <sup>11</sup> O, nan am-in at ipudnuchantu ay hi Jesu Cristo nan Apo ta machaychayaw hi Dios Ama.

### *Nan Omaafurot At Kaman Silaw Asna's Luta*

<sup>12</sup> Isunga iib-a ay laylaychok, kaman as nan nanongtongparanyu as nan insursurok as nan kawad-ak kan chakayu, kaskasinyu pay tongparun ad wani ay maichak hesa. Ituruyyu ay mangepapasnek as nan panagfiyang ay maifiakiay para as nan tataku ay ensarakan Apo Dios, <sup>13</sup> tay hi Apo Dios nan mawawacha kan chakayu ay mangichat as layadyu ya kafaelanyu ay mangtongpar as nan laychuna.

<sup>14</sup> As nan am-in ay atunyu, achi kayu munlillili ya makisumsuma <sup>15</sup> ta maid poros maepafiasor kan chakayu ya nacharos kayu as an-ak Apo Dios. O, mu atunyu sa, maid fiasoryu as nan maketatakuwanyu as nan tataku asna's luta ay manangotettet chi ukialicha ya tataku ay nunkarubchok. Kun at nan panagfiyangyu at maepachong as nan taraw ay manisilaw as nan ngongot.\* <sup>16</sup> Atunyu sa as nan chayu mangepakaammuwan kan chicha as nan kalen Apo Dios ay umichat as fiyag ay maid patingkiana. Mu hiyasa nan atunyu, wachay kiapúna as mangepangasak kan chakayu as nan kasin omaliyan Cristo, tay maepailantu ay chaan challu nasayang nan nunforayak.

<sup>17</sup> O, chaan nasayang nan nunforayak, tay nan omafurotanyu ya munchaychayawanyu kan Apo Dios at maepachong as nan chaton kan hiya. Ngem kun pay ha-un, uray mu maepapatuyak at maepachongak as nan naestata ay fiayas ay maikuyag as nan chatonyu. Uray mu assesa, naragsak ya makelagragsakak kan chakayu am-in. <sup>18</sup> Kaman us kan chakayu, naragsak kayu, ya makelagsak kayu kan ha-un.

### *Cha Timoteo Kan Epaafroditu*

(Ara. 16:1-4; Filip. 4:18)

<sup>19</sup> Namnamaok ay achi mafiayag at eparufus Apo Jesus ay ifiaorkuntu hi Timoteo kan chakayu. Mu hiyasa, makelagsâkaktu us kan chakayu as nan munfiangchananu ay mangepachamag as nan maepangkep kan chakayu. <sup>20</sup> Hiya yangkiay nan makelekna tit-iwa kan ha-un maepangkep as nan omammayanyu. <sup>21</sup> Tay am-in nan tapina at kun nan omammayancha yangkiay chi chacha an-anapun, fiakun nan laychun Jesu Cristo. <sup>22</sup> Ngem mu maepangkep kan Timoteo, ammuyu met mismu ay napanecknekan ay matalek hiya. Kaman as nan atun nan anak as nan ama, assesa us nan enatna ay nakeserfi kan ha-un as nan Ammay ay Chamag. <sup>23</sup> Namnamaok ngarud ay hiya nan mun-ifiaorku kan chakayu as nan mangammuwak ay dagus as nan maepangkep as nan kasok. <sup>24</sup> Munnamnamaak us as nan Apo ay achi mafiayag at makaaliyak hesa kan chakayu.

<sup>25</sup> Ninumnumku ay masapor pafiangchok hesa hi Epaafroditu ay ifiaik as nan pammati. Pachongku hiya ay munchunchunu kan Cristo ya pachongku ay sorchachon Cristo. Hiya us nan infiaoryu ay mamadfiachang kan ha-un

\* <sup>2:15</sup> Mat. 5:14-16

as nan kasaporak. <sup>26</sup> O, pafiangchok hiya kan chakayu am-in, tay mailiw kan chakayu ya machanakian as solet as nan nangchamakianyu ay nunsaket hiya. <sup>27</sup> Tit-iwa ay nunsaket hiya ya kiayud matuy. Ngem sinug-angan Apo Dios hiya. Fiakun hiya yangkiay nan sinug-angana ngem uray ha-un, tay inlisiyak as nan kaskasin ongor ay ngunguyusku mu kun natuy hiya. <sup>28</sup> Isunga laraychok ay pafiangchun hiya kan chakayu ta maragsakan kayu as nan mangil-anyu kasin kan hiya ya ta makakkaanan chi chanagku. <sup>29</sup> Munlagsak kayu ay mang-awat kan hiya as usa ay ifia takú as nan Apo. Ichayawyu nan tataku ay kaman kan hiya, <sup>30</sup> tay enpostana nan achorna ya kiayudna ekatuy kiapú as nan nunserfiyana kan Cristo. Enatna na ta fiadnganak as nan kamaidyu.

### 3

#### *Nan Tit-iwa Ay Kenalintig (Rom. 2:29; 3:28)*

<sup>1</sup> Nan usa pay ay iib-a, munlagragsak kayu kiapú as nan nakius-usaanyu as nan Apo. Achiyak mauma ay mangisurat kasin as nan chiyucha insuratkun kan chakayu, ya hiyana nan mangsarak kan chakayu. <sup>2</sup> Il-ilaunyu nan tataku ay mangekamkaman as manangotetted ay maepachong as nan chiyucha atap ayasu.\* Chatosa ay tataku at epapeletcha ay achi maesarkan chi tataku mu achi masugyatan. Kenomsawcha! <sup>3</sup> Chitaku nan naifilang as tit-iwa ay nasugyatan, fiakun chicha. O, chitaku nan tatakon Apo Dios, tay chaychayawun takú hi Apo Dios babaen as nan Espirituna ya munlagragsak takú kiapú as nan nakius-usaan takú kan Cristo Jesus. Achi takú poros piyarun nan panagsugyat ya tapina ay infilin nan chiyucha lintig nan tataku.

<sup>4</sup> Uray ha-un mismu at wachay panagtalekku as nan hanacha ay infilin nan chiyucha lintig nan tataku. Mu ka-anan nan tapina kan chakayu un talekuncha nan hanacha, kaskasin pay ay talekok nan hanacha mu chicha. <sup>5</sup> Nasugyatanak as nan maekawaru ay urkiwu. Naiyanakak ay kianak Israel ya nurpuwak as nan tribon Benjamin. Tanikiak ay Hebreo, tay Hebrewocha nan kaap-uwak. Mu maepangkep as nan manongtongparak as nan lintig, usaak ay Fariseo. <sup>6</sup> As nan manglaraychanak ay mangekaman as nan ka-anak un laychun Apo Dios, ongor nan penarpalikiatku ay enmafurot kan Jesus. Mu maepangkep as kenalintig babaen as nan manongtongparak as nan Lintig Moises, maid poros maepafiasor kan ha-un. <sup>7</sup> Ngem am-in chasa ay ka-anak un makaesarkan kan ha-un at ifilangku as maid kotkotokcha ad wani kiapú kan Cristo. <sup>8</sup> Fiakun yangkiay nan hanacha ay ifilangku as maid kotkotokcha, ngem am-in us ay nafiaror kan ha-un kiapú as nan am-amud as solet ay hiyasa nan mangam-ammuwak kan Cristo Jesus ay Apok. Kiapú kan hiya, inwagkiak at am-in chasa as kaman fiasura ta maamammok hi Cristo, <sup>9</sup> ya ta kunak yangkiay makius-usa kan hiya. Isunga ad wani, nan nunfialinak as nalintig at fiakun babaen as nan nanongtongparak as nan lintig, ngem kun at babaen as nan enmafurot kan Cristo. Nan nauy ay kenalintig at nurpu kan Apo Dios ya maifisar as nan pammati. <sup>10</sup> Nan laychok yangkiay at maammuwak ay ustu hi Cristo. Laychok ay lak-amun nan natakuwana manipud as nan utúy. Laychok us ay makiliwas kan hiya, ya laychok ay matuy ay kaman kan hiya ay nangtongpar as nan laychun Apo

\* <sup>3:2</sup> Nan asu at ifilang nan chiyucha Judio as assi.

Dios. <sup>11</sup> Ekamanku chasa ta as nan munnamnamaak at takuwunaktu kan Apo Dios manipud as nan utúy as nan matuyaktu.

### *Nan Mangekaman As Nan Laychun Apo Dios*

<sup>12</sup> Achek kanan un naarak at chaná am-in, ya achek us kanan un maid at munkurangak. Ngem epapasnekku ay mangtongpar as nan laychun Jesu Cristo kan ha-un, tay hiyasa nan kiapúna ay piniliyak ta makius-usaak kan hiya. <sup>13</sup> Iib-a, achek met kanan un naarak at chaná. Ngem nan usa ay atok at hiyana: Liw-ak nan en-enatku ad kasin, ya epapasnekku ay mangtongpar as nan laychuna yangkiay. <sup>14</sup> Isunga epapasnekku nan laychuna ay kamanak cha makeab-abfiak as tennagtakian ta maarak nan gun-guna, tay hiyachi nan nangayakianan Apo Dios kan ha-un as nan fiyag ad chaya babaen kan Jesu Cristo.

<sup>15</sup> Chitaku am-in ay naonngan as nan pammati at assesa koma nan numnum takú. Ngem mu wachachay tapina kan chakayu ay tukún chi numnumna, lawlawakiantu Apo Dios chicha. <sup>16</sup> Uray mu hiyasa, iturturuy takú ay mangun-unud as nan naammuwan takú at ay laychun Apo Dios.

<sup>17</sup> Iib-a, mun-us-usa kayu koma ay manurad kan ha-un. Ilaunyu nan chiyuuya cha mangun-unud as nan ustу ay panagfiyag ay enpailami ay turachunyu. <sup>18</sup> Namen ongorku ay infiakia kan chakayu ad kasin, ya ad wani lumuruwaak ay kasin mangifiakia as na: Ongorcha challuy matakua as kafusor Cristo ay mangelalayus as nan natuyana as nan koros babaen as nan mangotettet ay panagfiyagcha. <sup>19</sup> Nan munfianakianchantu at machusacha ad inferno, tay nan laylaychun nan achorcha yangkiay nan tongtongparuncha as kaman dioscha. Epangpangascha nan ekafaincha koma, ya kuncha yangkiay nunumnumun nan wacha asna's luta.<sup>†</sup> <sup>20</sup> Ngem chitaku at membro takú henan muntorayan ad chaya. Hid-i nan kurpuwan nan laraychun takú ay sasad-un ay mangesarakan kan chitaku ay hi Apo Jesu Cristo. <sup>21</sup> Munfialinunantu nan nakapuy ya matuy ay achor takú as kaman as nan machaychayaw ay achorna babaen as nan pannakafialin ay mangichat as kafaelana ay mangetoray as nan am-in ay wacha.

## 4

### *Nan Tapina Ay Tukun Pablo*

<sup>1</sup> Isunga iib-ak ay laylaychok, maiiliwak as solet kan chakayu. O, chakayu ay mangepalagragsak kan ha-un, ya kaman gun-gunak as nan nunforfor-ayak at achi kayu koma munchuwachuwa ay mangafurot as nan Apo.

<sup>2</sup> Chakayu Evodias kan Sintike, pangaasiyu ta munkatornosan kayu, tay kaman kayu hen-aki kiapú as nan nakius-usaanyu kan Jesu Cristo. <sup>3</sup> He-a us ay matalek ay pachongku ay munchunchunu, fiadngam pay chatona ay fianafiai ta munkatornosancha. Tay chatona ay chuwa at makakudcha ay nakidkidnu kan ha-un as nan nangekaskasabaanmi as nan Ammay ay Chamag patí hi Clemente ya nan chiyuuya tapina. Am-incha at naelestaa nan ngadngachancha as nan liblon Apo Dios ay naelestaa nan chiyuuya wachay fiyagcha ay maid patingkiana.\*

<sup>4</sup> Kanayon ay munlagsak kayu kiapú as nan nakius-usaanyu as nan Apo. Ipidwak ay mangifiakia, "Munlagragsak kayu!"

<sup>†</sup> 3:19 Rom. 16:18 \* 4:3 Pal. 20:12-13

**5** Epailayu ay naanos kayu as nan am-in ay tataku, tay kiayud omali nan Apo.<sup>†</sup> **6** Achi kayu lawá cha munchanchanag as kumpurmi, ngem as nan am-in ay kasasaadyu, kun kayu at chumawat kan Apo Dios as kasaporanyu. Kun kayu kay munkararag, munyaman kayu us kan hiya. **7** Mu hiyasa nan atunyu, ichat Apo Dios kan chakayu nan natalna ay numnum ay ong-ongor mu nan mafialin ay maawatan chi taku. Hiyasa nan mangepaammay as nan leknayu ya numnumyu babaen as nan nakius-usaanyu kan Cristo Jesus.

**8** Kun pay nan anongos ay ifiakiak kan chakayu ay iib-a at nunumnumnumyunu nan nauycha anam-ammay ya nan nauycha maekari ay maichayaw: uray ngachana ay tit-iwa, maekari ay marispitu, nalintig, nasantowan, makapalaylayad, ya maekari ay maichayachayaw.

**9** Iturturuyyu ay mangekamkaman as nan chiyuycha enacharyu ya enawatyu kan ha-un. Atunyu us nan chiyuycha chinngoryu ya inilayu ay enatku. Mu hiyasa, hi Apo Dios ay mangid-ichat as natalna ay numnum at mawawachantu kan chakayu.

### *Nan Kiapón Nan Nunlagsakan Pablo*

**10** Munlagsakak as solet as nan nakius-usaak as nan Apo, tay as nan inmuyan chi nafiayag ay timpu at kasinyu enpaila nan layadyu ay fumachang kan ha-un. Tit-iwa ay ninumnumyu ay fumachang kan ha-un, ngem kun maid chansayu. **11** Achek kanan na kiapú ta munkurangak as kasaporak, tay enpaingsak ay mapnek as nan uray ngachana ay kasasaadku. **12** Napachasak ay nakurkurangan ya nasubsubraan as kasaporan. As nan ay chaud ay kawad-ak as nan kumpurmi ay uras at nasurok ay mapnek uray mu masufuwak winnu munchukiaangak, ya uray mu masubraanak winnu makuranganak as kasaporan. **13** As nan am-in ay kasasaadku at mafialin kan ha-un kiapú kan Cristo ay mangepapapigsa kan ha-un.

**14** Ngem uray mu hiyasa, ammay challu nan enatyu ay finmachang kan ha-un as nan nunlikiatik. **15** Chakayu ay i-Filipos, ammuu met ay as nan nangelapuwak ay nangekaskasaba as nan Ammay ay Chamag henan probinsiya ay Macedonia, chakayu yangkiay nan namadfiachang kan ha-un. O, maid tapina as iglesia ay nangepaw-et as siping para as nan kasaporak mu achi chakayu yangkiay. **16** Uray as nan kawad-ak pay laing ad Tesalonica at fiakun yangkiay namingsan ay enpaw-etanak kan chakayu as kasaporak. **17** Fiakun nan chayu id-ichat nan chak ag-akiay-un kan chakayu, ngem kun at nan matapiyanan nan gun-gunayu ay ichat Apo Dios. **18** Ifilangyu nan nauy surat as resibo ay naawatku am-in nan enpaw-etyu kan Epafrido, at napnekak as solet! Chatud-i ay inchaytu at maepachongcha as nan omeopalaylayad ya munfiangu ay chaton kan Apo Dios. **19** Hi Apo Dios ay munserserifiyak at hiya nan mangichattu as nan am-in ay kasaporanyu ay maiyunud as nan ongoongor ya machayachayaw ay kenafiaknangna kiapú as nan nakius-usaanyu kan Cristo. **20** Machayachayaw koma in-inkiana hi Apo Dios ay Ama takú. Amen.

### *Nan Anongos Ay Pakomostan Pablo*

**21** Pakomostaunyu nan am-in ay tatakon Apo Dios ay nakius-usa kan Cristo Jesus. Nan iib-a takú hena at chacha kayu pakomostaun. **22** Nan am-in ay tatakon Apo Dios hena ad Roma at chacha kayu pakomostaun kaskasin nan chiyuycha munchunchunu as nan palasyon Emperador.

<sup>†</sup> **4:5** Heb. 10:37; San. 5:8-9; Pal. 1:3; 22:7, 12, 20

<sup>23</sup> Sapay koma ta mawawacha kan chakayu am-in nan grasyan Apo Jesu Cristo.

## Nan Surat Pablo As Nan Chiyuycha I-Colosas Nan Omona Ay Ammuwun

Nan nauy ay surat Pablo at para as nan chiyuycha omaafurot henan ili ay Colosas ay sag-un nan Efeso henan probinsiya ay Asia. As nan nun-is-isuruwan Pablo ad Efeso as nan chuwa ay tawwun, nunchinngor nan Ammay ay Chamag henan intiru ay probinsiya ay Asia (Ara. 19:1, 8-10). Kiapú ta hiyasa, wachacha nan enmafurot ad Colosas, Hierapolis ya Laodicea ay sasag-un nan siyudad ay Efeso. Fiakun hi Pablo nan nangelapu as nan iglesia ad Colosas, ngem ninunumnumna ya kanayona ay enkarkárárakan chicha (1:7; 4:12-13) tay chaana uy finisfisita chicha (1:4; 2:1).

Insurat Pablo nan nauy as nan naifiafiaruchana ad Roma (4:3, 8). As nan hana ay timpu, nachamag Pablo ay wachacha nan achi tit-iwa ay mun-isursuru as nan iglesia hid-i ay mangali un achi maesarakan nan taku mu achina chaychayawan nan anghelles (2:18). Nan hanacha achi tit-iwa ay mun-isursuru at kanancha us un masapor ay tongparun nan taku nan naepatawid ay ug-ukialen chi tataku (2:8, 16-23). Hiyasa nan kiapúna ay nunsurat hi Pablo kan chicha.

Enpakaammuna kan chicha as nan suratna ay hi Jesus nan kangatuwan as nan am-in, tay hiya nan nangepafiyangan Apo Dios as nan am-in ay kai-chin. Wacha kan hiya nan am-in ay kenadios (1:15-17; 2:9), ya hiya yangkiay nan makaesarakan as nan tataku. Isunga tinukun Pablo nan chiyuycha i-Colosas ay achicha un-unuchun nan naepatawid ay ug-ukialen chi tataku, ngem kuncha at matakay nalintig ya nasantowan (3:1-25).

Enpaw-et Pablo kan Tikico nan nauy suratna as nan chiyuycha i-Colosas, ya enpatun-udna hi Onesimo ta munfiangad hiya kan Filemon ad Colosas (4:7-9). Hi Onesimo ay anna nan lenmayaw ay fiabbiarun Filemon. Hiyana nan kiapúna as nangetapiyan Pablo as nan sursuru maepangkep as mafibbiaor ya amo (Col. 3:11, 22; 4:1), ya maepangkep us as sug-ang ya pammakawan (Col. 3:12-13).

### **Nan Nakudkudwaan Nan Nauy Surat**

Nan Laplapon Nan Surat 1:1-2

Nan Luwaron Pablo Para As Nan Chiyuycha Omaafurot Ad Colosas 1:3-14

Nan Kasasaad Cristo Ya Nan Chununa 1:15-23

Nan Panagserfen Pablo As Nan Iglesia 1:24-25

Nan Panagfiyag Chi Omaafurot 2:6-23

Nan Sikud Ya Nan Fiarú Ay Fiyag 3:1-4:6

Nan Anongos Nan Surat 4:7-18

### *Nan Laplapon Nan Surat*

<sup>1</sup> Ha-un hi Pablo ay usa ay apostol Cristo Jesus, tay hiyasa nan enkeddeng Apo Dios. Nan kadwak hena ay nunsurat at hi Timoteo ay ifia takú.

<sup>2</sup> Nauy nan suratmi kan chakayu ay tatakon Apo Dios ad Colosas ay matalek ay iib-ami ay nakius-usa kan Cristo.

Sapay koma ta mawawacha kan chakayu nan grasya ya natalna ay num-num ay nurpu kan Apo Dios ay Ama takú.

### *Nan Luwaron Pablo Para As Nan Omaafurot*

<sup>3</sup> As nan mangekarkarakianmi kan chakayu, kanayon kami ay mun-yaman kan Apo Dios ay Aman Apo takú ay Jesu Cristo, <sup>4</sup> tay nachamagmi nan maepangkep as nan pammatiyu kan Cristo Jesus ya nan layadyu as nan am-in ay tatakon Apo Dios. <sup>5</sup> Nan nauy pammatiyu ya layadyu at naifisar as nan namnamayu ay hiyasa nan mang-awatanyuntu as nan ensasakianan Apo Dios ad chaya para kan chakayu. Naammuwanyu nan maepangkep as nan nauy ay namnamayu nunlapu as nan nanngoranyu as nan tit-iwa ay sursuru ay hiyasa nan Ammay ay Chamag. <sup>6</sup> Nan nauy Ammay ay Chamag ay naekasaba kan chakayu at cha maepadpachamag henan tukutukún ay lukiar asna's luta, ya chacha omong-ongor nan omab-afurot kan Cristo. As nan chacha tit-iwa omab-afurotan, cha mafiarfialwan nan panagfiyagcha ay kaman as nan enommat kan chakayu nunlapu as nan nanngoranyu as nan maepangkep as nan grasyan Apo Dios ya as nan nangammuwyu as nan kenatit-iwana. <sup>7</sup> Sinuruyu na kan Epafras ay laylaychunmi ay pachongmi ay usa ay matalek ay munserserfi kan Cristo. Hiya nan pannakaachormi ay omali hesa kan chakayu. <sup>8</sup> Hiya us nan nangepakaammu kan chakami as nan maepangkep as nan layadyu as nan am-in ay tatakon Apo Dios ay ichat nan Espíritu Santo kan chakayu.

<sup>9</sup> Hiyana nan kiapúna ay nunlapu as nan nangchamakianmi as nan maepangkep kan chakayu, chami iturturuy ay cha mangekarkararag kan chakayu. Chami chawachawatun kan Apo Dios ay epakaammuna koma kan chakayu nan ustu ay laychuna ay atunyu babaen as nan am-in ay kenasilib ya pannakaawat ay ichat nan Espíritu Santo.\* <sup>10</sup> Tay mu hiyasa, matataku kayu koma ay maiyunud as nan panagfiyag ay laychun Apo Dios, ya kanayonyu ay atun nan mangepalaylayad kan hiya. O, mu asresa, kaman kayuntu fumkias as nan am-in ay karasen chi ammay ay ekamkaman, ya mataptapiyantu us nan ammuyu maepangkep kan Apo Dios. <sup>11</sup> Ekararagmi us ay nan nakaskaschaaw ay pannakafialin Apo Dios nan mangepapapigsa koma as nan numnumyu ta naragsak kayu chállu ay mun-eta-ta-un as likiat ya mangan-anos as nan chiyucha mammalikiat kan chakayu. <sup>12</sup> Fiakun yangkiay sa, ngem munyaman kayu us koma kan Apo Dios ay Ama takú, tay infilangna chitaku as maekari ay makifingaytu as nan am-in ay ensasakianana para as nan tatakuna ay naetatapi henan muntorayana ay maid poros ngongotna. <sup>13</sup> Tay nan enat Apo Dios at ensarakana chitaku manipud as nan pannakafialin Satanas ay cha mangetortoray as nan chiyucha kaman ngongot chi numnumcha, ya entapina chitaku henan muntorayan nan laylaychuna ay Anakna. <sup>14</sup> Babaen as nan nangesarakan nan Anakna kan chitaku, nawawayawaan takú as nan panangchusan Apo Dios. Nan laychuna ay kanan at napakawan takú as nan fiasfiasor takú.

### *Nan Kasasaad Cristo Ya Nan Enatna*

<sup>15</sup> Hi Cristo at hiya nan ustuuysto ay kail-an nan kenadios nan achi poros maila ay Dios. Hiya us nani katotorayan as nan am-in ay nafiyang. <sup>16</sup> Tay babaen kan hiya, finayang Apo Dios nan am-in ay wacha ad chaya ya asna's luta ay maila ya achi maila patí nan chiyucha anennet ay ar-ari, anap-apu, totoray ya nan chiyucha wachay kalibfengana. O, nan am-in ay wacha at nafiyangcha babaen kan Cristo ya para kan Cristo.† <sup>17</sup> Hi Cristo at nawawacha sakbay mafiyang nan am-in, ya hiya nan mangiyoornos ya mangepaturturuy as nan am-in. <sup>18</sup> Hiya nan maepachong as nan uru

\* <sup>1:9</sup> Efe. 1:8, 15-17    † <sup>1:16</sup> Efe. 1:21; Rom. 8:38; Efe. 2:2; 6:12; Heb. 1:5-14; 1 Ped. 3:22

ay mangepanguru as nan iglesia ay naifilang as achorna. Hiya us nan nurpuwan nan maid patingkiana ay fiyag nan am-in ay omafurot kan hiya, tay hiya nan enmona ay nataku in-inkiana as nan nunkatuy ta hiya nan katotorayan as nan am-in.‡ 19 Tay nan enkeddeng Apo Dios at mawawacha challu nan am-in ay kenadiosna as nan Anakna. 20 O, babaen as nan Anakna, enkeddeng us Apo Dios ay nan am-in ay wacha ad chaya ya asna's luta at maepakappiachà kan hiya. Enatna na babaen as nan enmayas ay charan nan Anakna ay hi Cristo as nan natuyana as nan koros.§

21 Uray chakayu ad kasin at naisiyán kayu kan Apo Dios, ya naifilang kayu as kafusorna kiapú as nan manangotettet ay ninumnumnumyú ya enenatyú.\* 22 Ngem ad wani, babaen as nan natuyan Cristo as nan koros, enpakappian Apo Dios chakayu kan hiya mismu ta nasantowan, nacharos ya maid maepabpafiasor kan chakayu as nan maepasakianganyuntu as nan sangwanana.† 23 Ngem masapor challu munturturuy kayu ay kukumnug as nan pammatiyu kan Cristo ay achi kayu munchuwachuwa. Achiyu eparufus chi uray ngachana ay mangepasiyan kan chakayu as nan namnamayu ay enawatyu as nan nānggoranyu as nan Ammay ay Chamag. O, nan nauy Ammay ay Chamag at naekaskasaba as nan am-in ay tataku asna's luta, ya hiyana nan kiapúna ay ha-un ay Pablo at nunfialinak as munserserfi kan Cristo.

### *Nan Nunserserfiyan Pablo As Nan Am-in Ay Omaafurot*

24 Ad wani, munlagragsakak kiapú as nan chiyuya chak iliwliwas ay para as nan omammayanyu. O, naragsakak ay mangiliwas as nan am-in ay ekeddeng Cristo ay masapor iliwasu as nan munserserfiyan kan hiya para as nan omammayan nan iglesia ay naifilang as achorna.‡ 25 Maiyunud as nan nangchutokanak kan Apo Dios, nunfialinak as munserserfi para as nan iglesia, ya tongparok nan libfengku ay mangepakaammu ay ustus as nan Ammay ay Chamag kan chakayu ay Gentil. 26 Nan nauy ay kali ay epakaammok at chaan enpakpakaammon Apo Dios as nan am-in ay kaap-uwan ad pus-uy, ngem ad wani enpakpakaammu kan chitaku ay tatakuna. 27 O, enkeddeng Apo Dios ay epakaamma as nan tatakuna nan sikud ay chaana enpakpakaammu ay nan kenaongor nan nakaskaschaaw ay bendisyon Cristo at para as nan am-in ay tataku, kaskasin kan chakayu ay Gentil. Nan nauy chaan enpakpakaammon Apo Dios at hiyana: Wacha at hi Cristo kan chakayu ay Gentil. Babaen kan hiya, wacha at nan namnamayu ay mawad-an as fiyag ay maid patingkiana as nan kawad-an Apo Dios ad chaya. 28 Isunga hi Cristo nan ekaskasabami as nan am-in ay tataku. Fiaganmi ya isuruwanmi nan tunggal usa babaen as nan am-in ay kenasilibmi ta mafialin ay epasakiangminto kan Apo Dios nan am-in ay maonngan chipammaticha kan Cristo. 29 O, hiyana nan kiapúna ay chaak munforforay as nan chunok. Uray mu hiyasa, fiakun babaen as nan mismu ay pigsak nan mangekamanak as na ngem babaen as nan am-in ay pannakafialin Cristo ay nangepapigsa kan ha-un.

## 2

1 Laychok ay maammuwanu nan ongor ay forayku para kan chakayu ay i-Colosas ya i-Laodicea, ya para as nan am-in ay chaan nangil-ila kan

---

‡ 1:18 Efe. 1:22; 5:23-24    § 1:20 Efe. 1:10; 2:13-16    \* 1:21 Rom. 5:10; Efe. 2:13-16; 4:18    † 1:22 Efe. 1:4; 5:27    ‡ 1:24 Ara. 9:16; 2 Co. 1:6; Pal. 12:17

ha-un. <sup>2</sup> O, chak at-atun na ta pumigsa koma nan numnumyu ya mun-usa kayu babaen as nan munlelennayachanyu. Hiyasa us ta maawatanyu koma ay ustu ay maid poros chuwatchuwayu as nan mangammuwanyu as nan maepangkep as nan planon Apo Dios ay chaana enpakpakaammu. Nan nauy at maepangkep kan Cristo mismu <sup>3</sup> ay hiya yangkiay nan mangammuwanyu takú as nan am-in ay naitutupug ay kenasilib ya numnum Apo Dios.

<sup>4</sup> Ifiakiak na ta maid koma mangallilaw kan chakayu babaen as nan chiyuycha achi tit-iwa ay makaawis ay sososekcha.\* <sup>5</sup> Tay uray mu maichak hesa kan chakayu, nunumnumok challu chakayu. Maragsakanak as nan mun-uus-usaanyu ya kukumnukian nan pammatiyu kan Cristo.

### Nan Panagfiyag Nan Omaafurop

<sup>6</sup> Kiapú ta enawatyu nan sursuru ay hi Cristo Jesus at hiya nan Apo, unuchunyu ngarud nan panagfiyag ay maifiakiay as nan taku ay nakius-usa kan hiya. <sup>7</sup> Nan pammatiyu kan Jesus at maepachong koma as nan kaiw ay inmuinmuy ad chur-um chi lamotna, winnu maepachong as nan naam-maan ay afong ay kunug chi tukudna. Kaman as nan naisursuruwananyu maepangkep kan hiya, kaskasin pay koma pumigsa nan pammatiyu, ya kanayon kayu ay munyaman kan Apo Dios.

<sup>8</sup> Il-ilaunyu ta maid koma mamabfiaor kan chakayu babaen as nan chiyuycha maid kotkotokcha ya makaallilaw ay sursuru. Tay nan assisid-i ay sursuru at enpatawid chi tataku ya nurpucha as nan chiyuycha tukutukún ay penapakianu ay ukiali ay muntortoray asna's luta.† Achi maiyunud chasa as nan sursuron Cristo. <sup>9</sup> Tay nan kenatit-iwana at nunfialin hi Cristo as taku, ngem wacha kan hiya nan am-in ay kenadios Apo Dios.‡ <sup>10</sup> Kiapú as nan nakius-usaanyu kan Cristo ay hiya nan manetoray as nan am-in ay wachay torayna ya kalibfengana, wacha kan chakayu nan am-in ay kasaporanyu as nan fiarú ay fiyagyu.

<sup>11</sup> O, kiapú as nan nakius-usaanyu kan hiya, kaman kayu nasugyatán. Nan nasugyatánanyu at fiakun kaman as nan panangsugyat chi taku as nan achor, ngem kun at naespirituwan ay hiyasa nan mangaanan Cristo as nan managfiasor ay panagfiyagyu. <sup>12</sup> Tay as nan nafunyakiananyu, kaman kayu naetapi kan Cristo as nan nailubkana. Assesa us ay naetapi kayu as nan natakuwana manipud as nan utúy babaen as nan pammatiyu as nan pannakafialin Apo Dios ay nangtaku kan Cristo manipud as nan utúy. <sup>13</sup> Ad kasin at naifilang kayu as natuy as nan mangilan Apo Dios kiapú as nan ongor ay fiasoryu ya kiapú ta Gentil kayu ay chaan nangunud as nan Lintig Moises kaman as nan panagsugyat. Ngem ad wani, entapen Apo Dios chakayu kan Cristo as nan natakuwana manipud as nan utúy babaen as nan nakius-usaanyu kan hiya. Penakawana chitaku as nan am-in ay fiasfiasor takú. <sup>14</sup> Nan enat Apo Dios at kamana pinunasan nan lestaan nan chiyuycha utang takú kan hiya ay chicha nan nangepaneknek ay finmasor takú kiapú as nan chaan takú nanongtongparan as nan lintigna. O, nan enatna at kamana entapi chaná ay nangelansa kan Cristo as nan koros. <sup>15</sup> Babaen us as nan natuyan Cristo as nan koros, kenaan Apo Dios nan pannakafialin nan chiyuycha manangotetet ay achi maila ay anap-apu ya wachay kalibfengancha ay muntoray, ya enpailana ay naamischa as nan sangwanan nan am-in ay wacha.

\* <sup>2:4</sup> Rom. 16:17-18; Efe. 5:6-8; Col. 2:8 † <sup>2:8</sup> Winnu “ya nurpu as nan aanennet ay muntortoray asna's luta.” ‡ <sup>2:9</sup> 2 Co. 5:19; Efe. 1:23; 4:13

<sup>16</sup> Isunga kunyu iyangkiayan nan chiyuchaya mangmangsoet kan chakayu mu achiyu un-unuchun nan chiyuchaya lintigcha maepangkep as makan, maikop winnu ongor ay ngilinchay kaman as nan fiastan nan pomat-oran nan furan winnu nan Urkiw ay Mun-iblayan. <sup>17</sup> Tay am-in chaná ay naisursuru ad pus-uy at kamancha yangkiay aiw ay inchat Apo Dios as nan tatakuna ay mangepaila as nan atunantu ay mangesarakan kan chicha. Nan tit-iwa ay nakin aiw at hi Cristo mismu. <sup>18</sup> Achiyu poros eparufus ay wachay mamelet kan chakayu ay munpakumbaba kayu ya munchaychayaw kayu as nan angheles ta maesarakana kayu. Nan assesesa ay tataku at epangpangascha nan inilacha ay kaman iitaw, ya napangascha us uray maid kiapkiapúna, tay nan wacha asna's luta yangkiay nan chacha numnumnumun. <sup>19</sup> Chaancha inturuy ay omafurot as nan tit-iwa ay sur-suron Cristo ay hiya nan pannakauru takú, ya chitaku nan pannakaachorna. Kaman as nan am-in ay parten nan achor ay ustuuustuy enatcha ay naesoop, assesa us ay mun-us-usaun ya papigsau Cristo nan tatakuna ta masikun nan achor ay maiyunud as nan planon Apo Dios.

<sup>20</sup> Chakayu ay omafurot, kiapú ta naetapi kayu as nan natuyan Cristo, nawawayayaan kayu as nan chiyuchaya anennet ay cha muntortoray asna's luta. Anuyyu pay laing cha at-atun nan achi tit-iwa ay sursuru? Anuyyu cha un-unuchun nan filfilin ay kaman as nan nauycha:<sup>§</sup> <sup>21</sup> “Achiyu un-nunnan chaná! Achiyu tamtamtam chaná! Achiyu kapkaprosun chaná”? <sup>22</sup> Nan nauycha am-in maepangkep as nan makan ya maikop at enammaan Apo Dios as osarun chi tataku ta mam-incha. Tay nan nauycha ay filfilin at naifisarcha as nan numnum chi taku. <sup>23</sup> Kaman met kayman wachay kenasilib nan filfilinchay as nan mangepeletancha ay munchaychayaw as nan angheles, munpakumbabaancha ay mangtongpar as nan ukialicha, ya as nan mamalikiatancha as achorcha. Ngem nan kenatit-iwana at maid kafaelan chatosa ay mangetpor as nan mun-ongosán nan achorcha.

### 3

#### *Nan Sikud Ya Nan Fiarú Ay Panagfiyagyu*

<sup>1</sup> Kiapú ta naetapi kayu ay nataku as nan natakuwan Cristo manipud as nan utúy, kanayon kayu koma ay matakay aye magepalayayad kan Apo Dios ad chaya ay kawad-an Cristo ay nangatokor as nan tronona as apét kannawan Apo Dios. <sup>2</sup> O, kanayon koma ay nunumnumunyu nan maepangkep as nan chiyuchaya wacha ad chaya, fiakun nan wacha asna's luta. <sup>3</sup> Tay chakayu at naifilang kayu as natuy mu maepangkep as nan sikud ay panagfiyagyu. Ad wani, nan fierú ay fiyagyu kiapú as nan nakius-usaanyu kan Cristo ay nakius-usa kan Apo Dios ad chaya at achi pay mailan chi tataku. <sup>4</sup> As nan kasintu munpail-an Cristo ay hiya nan murpuwan nan hana fierú ay fiyagyu, maetapi kayu kan hiya ay munpaila, ya makelak-am kayu us as nan kaichayawana.

<sup>5</sup> Isunga ikinakyu ay matakay as nan sikud ay panagfiyagyu. Achiyuni nan uray ngachana ay mangepapan as assi ay lachok, assi ay numnum, ya kaiisiw ay mun-ongosán. Assesa us ay achiyuni nan manglayaychanan ay mangekaman as manangotettet ya kenaakum. Tay nan kenaakum at usa ay karasen chi panagchaychayaw as didiosen.\* <sup>6</sup> Kiapú as nan hanacha,

<sup>§</sup> **2:20** Gal. 4:3, 9; Col. 2:8

\* **3:5** Mar. 7:21-23; 1 Co. 6:9-10; Gal. 5:19-21; Efe. 5:3-5

chusaun Apo Dios nan tataku ay achi mangtongpar kan hiya.<sup>†</sup> <sup>7</sup> Uray chakayu ad kasin at assesa nan panagfiyagyu.

<sup>8</sup> Ngem ad wani, ikinakyu chaná am-in: fungat, ingor ya mangotettet ay pangkep. Achi kayu at omekak-ali ya munkarkali as assi ay kali.<sup>‡</sup> <sup>9</sup> Achi kayu at munkikinnutum, tay kenaanyu met nan sikud ay katatakuyu ya panagfiyagyu, <sup>10</sup> ya enawatyu nan fiarú ay katatakuyu ay inchat Apo Dios ay cha mangepafiarú kan chakayu ta komaman kayu kan hiya ya maammuyu ay ustu hiya.<sup>§</sup> <sup>11</sup> Kiapú as nan nauy ay enat Apo Dios, maid paspasikuna as Gentil winnu Judio, nasugyatan winnu chaan, nan chaan nakaachar, nan songel ay taku, nan mafiabfiaor winnu fiakun, ngem hi Cristo nan mangetortoray as nan am-in, ya hiya nan wacha as nan am-in ay omafurot kan hiya.\*

<sup>12</sup> Isunga kiapú ta pinilen Apo Dios chakayu as tatakuna ay laylaychuna ya penakawana, masapor ngarud mannakelekna ya manangfiachang kayu as nan pachongyu ay taku. Masapor us napakumbaba, naanos ya manangeta-un kayu. <sup>13</sup> Mun-eennanos kayu, ya munpepennakawan kayu mu wachay munlinnili kan chakayu. Pomakawan kayu ay kaman as nan enat Apo Jesus ay namakawan kan chakayu. <sup>14</sup> Nan kaamuchan ay atunyu at munlelennayad kayu. Tay mu hiyasa nan tit-iwa ay atunyu, munkatornosan kayu ay maid munkurangan nan nun-us-usaan chi numnumyu. <sup>15</sup> Nan panagtotoros ay inchat Cristo kan chakayu nan kanayon koma ay mange-tortoróng as numnumyu, tay hiyasa nan kiapúna ay enayakian chakayu kan Apo Dios as nan us-usa ay achor Cristo. Munyaman kayu ngarud kan Apo Dios. <sup>16</sup> Kanayonyu ay numnumun nan chiyuycha insursuron Cristo. Munsisinnuru ya munititinnukun kayu koma babaen as nan am-in ay kenasilib ay inchat Apo Dios kan chakayu. Ekantayu kan Apo Dios nan chiyuycha salmo, nan kalen Apo Dios ay maekankanta, ya tapina pay ay kankantan chi omafurot ay wachay panagyamanyu kan hiya.<sup>†</sup> <sup>17</sup> As nan kumpurmí ay atunyu winnu ifiakiayu, atunyu nan am-in as usa ay pannakaachor Apo Jesus, ya munyaman kayu kan Apo Dios ay Ama takú babaen kan Apo Jesus.

### Nan Atun Nan Naetatapi As Nan Fiarú Ay Fiyag

(Efe. 5:22-33; 1 Ped. 3:1-7)

<sup>18</sup> Chakayu ay fianafiai ay naasaw-an, waschi un munpaetoray as nan asawana, tay hiyasa nan ustu ay atun nan omafurot kan Apo Jesus.

<sup>19</sup> Chakayu ay lanaraki ay naasaw-an, waschi un masapor laylaychuna nan asawana, ya achi songel kan hiya.

<sup>20</sup> Chakayu ay an-ak, manangtongpar kayu as nan chanakchakoryu as nan am-in, tay hiyasa nan mangepalaylayad kan Apo Dios.

<sup>21</sup> Chakayu ay chanakchakor, achiyu ifungtan as solet nan an-akyu, tay mu atunyu, machismayachantu.

<sup>22</sup> Chakayu ay mafiabfiaor, manangtongpar kayu as nan chiyuycha amoyu asna's luta as nan am-in. Fiakun yangkiay as nan mangiil-an nan chiyuycha amoyu nan manongtongparanyu kan chicha ta aprobarancha chakayu, ngem manangtongpar kayu ay maid etabtafunyu as mangisiw ay pangkep kiapú as nan chayu mangichayawan kan Apo Jesus.<sup>‡</sup> <sup>23</sup> Uray ngachana nan chunuyu, epapatiyu nan kafaelanyu ay munchunu ay kaman hi Cristo nan

<sup>†</sup> 3:6 Efe. 5:6    <sup>‡</sup> 3:8 Efe. 4:22-32    <sup>§</sup> 3:10 Rom. 12:1-2; Efe. 2:15; 4:24    \* 3:11 1 Co. 12:13-14; Gal. 3:28; 5:6    <sup>†</sup> 3:16 1 Co. 14:26; Efe. 5:19    <sup>‡</sup> 3:22 Tit. 2:9-10

chayu munserfiyan, fiakun taku. <sup>24</sup> Numnumunyu ay ichattu Apo Jesus kan chakayu nan gun-guna ay enkarina as nan tatakuna, tay hi Cristo nan tit-iwa ay Apo ay chayu munserserfiyan. <sup>25</sup> Ngem nan ngachana ay mangekaman as achi nalintig, awatunantu nan chusa ay nunfianakian nan enkamana, tay mapapchong nan atun Apo Dios ay mun-okóm.§

## 4

<sup>1</sup> Chakayu ay amo, nalintig ya ustу nan atunyu as nan fiabfiaarunyu. Numnumunyu ay uray chakayu at wacha us nan Apoyu ad chaya.

### *Nan Tukun Pablo As Nan Am-in Ay Omaafurot*

<sup>2</sup> Epapasnekyu ay mangiturturuy ay munkararag. As nan munkararakianyu, etatalengaanyu, ya munyaman kayu kan Apo Dios.

<sup>3</sup> Ekarkarakararakianyu us chakami ta ichat Apo Dios nan chansami ay mangekaskasaba as nan chaan naepakpakaammu ad pus-uy maepangkep kan Cristo. O, nan nauy nangekaskasabaak as nan Ammay ay Chamag nan kiapón nan naifiafiaruchak ad wani. <sup>4</sup> Ekarkarakararakianak ta fiadnganak kan Apo Dios ay mangelawlawag ay ustу as nan maepangkep kan Cristo, tay hiyasa challu nan masapor ay atok.

<sup>5</sup> Masilib kayu ngarud as nan am-in ay atunyu as nan chiyucha achi omaafurot, ya osarunyu nan tunggal chansayu ay mangifiakia as nan maepangkep kan Cristo. <sup>6</sup> As nan munkaliyanyu as nan chiyucha achi omaafurot, kanayonyu koma ay epaila nan rispituyu kan chicha ya ifiakiayu nan omeplayayad ta ammuwunyu nan atunyu ay manfor ay ustу as nan am-in ay munsarudsud kan chakayu.

### *Nan Anongos Nan Surat*

<sup>7</sup> Ad wani, nan am-in ay cha om-ommat kan ha-un at hi Tikico nan ifiaorku ay mangepakaammuntu kan chakayu. Hiya nan laylaychunmi ya matalek ay ifiami ay pachongmi ay cha munserserfi kan Apo Jesus.\* <sup>8</sup> Hiyana nan kiapúna ay ifiaorku hiya kan chakayu ta maammuwanyu nan cha om-ommat kan chakami am-in hena ya ta papigsauna nan numnumyu. <sup>9</sup> Nan mangadwa kan hiya at hi Onesimo ay kailiyanyu. Hi Onesimo at matalek ya laylaychunmi ay ifiami. Chicha nan uy mangepakaammu kan chakayu as nan am-in ay cha om-ommat hena.

<sup>10</sup> Cha chakayu pakomostaun kan Aristarco ay kadwak ay fierud hena, ya kaman us kan Marcos ay kasinsin Bernabe. (Enpakaammok met at kan chakayu nan maepangkep kan Marcos. Mu umuy hesa, ammay koma nan atunyu ay mangmangili kan hiya.) <sup>11</sup> Cha chakayu pakomostaun us kan Jesus ay makali un Justo. Cha Aristarco, Marcos ya Jesus yangkiay nan Judio ay omaafurot ay pachongku ay munchunchunu as nan maepangkep henan muntorayan Apo Dios. Ongor paat chi naifiachang nan nauycha turu kan ha-un.

<sup>12</sup> Hi Epafras ay usa pay ay kailiyanyu ay cha munserserfi kan Cristo Jesus at chana us pakomostaun chakayu. Kanayona ay epapasnek ay mangekararag kan chakayu ta maonngan kayu koma as nan pammatiyu, ya achi kayu munchuwachuwa ay mangtongpar as nan am-in ay enkedeng Apo Dios. <sup>13</sup> Paneknekak ay makakud hiya ay munchunu para kan chakayu ya para as nan chiyucha omaafurot us ad Laodicea ya ad Hierapolis.

<sup>14</sup> Hi Lucas ay laylaychun takú ay choktor ya hi Demas at cha chakayu pakomostaun.

<sup>15</sup> Id-anyu nan pakomostak as nan iib-a hesa ad Laodicea ya kaman us kan Nimfas ya as nan chiyuycha omaafurot ay maam-among as afongna. <sup>16</sup> As nan marpasanyu ay mamasa as nan nauy ay suratku, epafiasayu ay epafiasa as nan iglesia ad Laodicea. Angkiay arauanyu nan suratku kan chicha ta maifiasa us kan chakayu hesa ad Colosas. <sup>17</sup> Nan usa pay at ifiakiayu kan Arkipo ay masapor lopasuna nan chunu ay naetalek kan hiya kiapú as nan munserserfiyana kan Apo Jesus.

<sup>18</sup> Ha-un hi Pablo ay mismu ay cha mangisurat as nan nauy anongos ay pakomosta kan chakayu. Achiyu pay liwliw-an ay mangekarkararag kan ha-un as nan nauy naifiafiaruchak.

Sapay koma ta mawawacha kan chakayu nan grasya.

## Nan Omona Ay Surat Pablo As Nan Chiyuycha I-Tesalonica Nan Omona Ay Ammuwun

Nan nauy ay surat Pablo at para as nan chiyuycha omaafurot kan Jesus ay wacha ad Tesalonica ay kapital nan probinsiya ay Macedonia. As nan inumchanan cha Pablo kan Silas hena ay nurpu ad Filipos, inmuy hi Pablo as nan senagogan chi Judio ya nun-isuru ay mangepakaammu as nan Ammay ay Chamag maepangkep kan Cristo (Ara. 17:1-3).

As nan hana ay timpu, wachacha nan Judio ay nunlarayad ay omafurot, ngem wachacha us nan achi munlayad. As nan nangil-an nan chiyuycha achi munlayad ay ongorcha nan fiakun Judio ay nangelapu ay omafurot kan Cristo kiapú as nan insuron Pablo, enmaposcha. Isunga enamongcha nan ongor ay kakadwacha, at nunkukurucha henan intiru ay siyudad ta pakakuncha hi Pablo.

Kiapú as nan hana ay kuru, nunkakak-ak cha Pablo, at inmuycha henan ili ay Berea. Ngem uray mu hiyasa, enapor nan chiyuycha Judio ay achi omaafurot chicha. Isunga infiaten Pablo cha Silas kan Timoteo ta fumachangcha ay mangepapigsa as nan pammatten nan chiyuycha omaafurot. Kun pay hi Pablo, inturunya ay inmuy ad Atenas henan probinsiya ay Acaya (Ara. 17:13-35). Angkiay nan chiyuycha nangiturud kan Pablo at nunfiangadcha ay uy mangifiakia kan cha Silas kan Timoteo ay kamuwuncha ay manib-at kan Pablo ad Atenas.

Ngem as nan kawad-antha ad Atenas, nachamagcha ay nan chiyuycha omaafurot ad Tesalonica at chacha malikiatan. Isunga finaor Pablo cha Timoteo ay munfiangad ad Tesalonica ta uycha liwliwaun chicha (3:1-5). Kun pay hi Pablo at inturturunya ay inmuy ad Corinto (Ara. 18:1).

As nan kawad-ana hid-i, inumchan cha Silas kan Timoteo ay nurpu ad Macedonia (Ara. 18:5), ya empakaammon Timoteo kan hiya nan maepangkep as nan ammay ay pammatten nan chiyuycha I-Tesalonica (3:6). Empakaammuna us kan hiya nan sarudsud nan chiyuycha omaafurot ad Tesalonica maepangkep as nan natuy ay iib-acha ay omaafurot. Nurmu sa ay sarudsud kiapú as nan naepachamag kan chicha ay achi siguradu kanu ay takuwuntu Apo Dios nan iib-acha ay omaafurot ay nunkatuy as nan munfiangchan Jesus.

Isunga nunsurat hi Pablo kan chicha ta songfiatana nan hana ay sarudsud (4:13-17). Nunyaman us kan chicha kiapú as nan talek ya layadcha (2:3; 3:6), ya penapigsana nan numnum ya pammaticha (2:12-14; 4:18).

### **Nan Nakudukudwaan Nan Nauy Surat**

Nan Laplapon Nan Surat 1:1

Nan Nunyamanan Pablo As Nan Chiyuycha Omaafurot 1:2-10

Nan Nunserserfiyan Pablo Ad Tesalonica 2:1-12

Nan Likiat Nan Chiyuycha Omaafurot Ad Tesalonica 2:13-16

Nan Nailiwan Pablo As Nan Chiyuycha I-Tesalonica 2:17-20

Nan Nangifiaoran Pablo Kan Timoteo As Nan Chiyuycha I-Tesalonica 3:1-13

Nan Panagfiyag Ay Mangepalaylayad Kan Apo Dios 4:1-12

Nan Sursuru Maepangkep As Nan Omaafurot Ay Natuy 4:13-18

Nan Munsakianaan As Nan Kasin Omaliyan Apo Jesus 5:1-11

Nan Chiyuycha Anongos Ay Tukun Pablo 5:12-28

### *Nan Laplapon Nan Surat*

<sup>1</sup> Ha-un hi Pablo ay nurpuwan nan nauy surat. Nan kakadwak ay nunsurat at cha Silas kan Timoteo. Nauy nan suratmi as nan iglesia ad Tesalonica ay naifilang as tatakon Dios Ama ya hi Apo Jesu Cristo.

Sapay koma ta mawawacha kan chakayu nan grasya ya nan natalna ay numnum.

### *Nan Nuyamanan Pablo Kiapú As Nan Ukielen Chi I-Tesalonica*

<sup>2</sup> Kanayon kami ay munyaman kan Apo Dios kiapú kan chakayu am-in, ya achimi liqliw-an ay chumawat as para kan chakayu as nan munkarkarakarianmi <sup>3</sup> kan Apo Dios ay Ama takú, tay manunumnummi nan chayu at-atun kiapú as nan pammatiyu kan hiya. Manunumnummi us nan kakudyu ay munserfi kiapú as nan layadyu ya kenapasnekyu kiapú as nan namnamayu kan Apo takú ay Jesu Cristo.\* <sup>4</sup> Iib-a ay laylaychun Apo Dios, ammumi ay pinilen Apo Dios chakayu. <sup>5</sup> Naammuwanmi sa, tay as nan nangekaskasabaanmi as nan Ammay ay Chamag kan chakayu, fiakun yangkiay babaen as nan kalimi, ngem babaen us as nan pannakafialin ay nurpu as nan Espiritu Santo, ya achi kami poros munchuwachuwa as nan kenatit-iwan nan kenalimi. Ammuyu us nan panagfiyagmi as nan nakepapagyanganmi kan chakayu, tay nan pangkepmi at nan omammayan chi fiyagyu. <sup>6</sup> Nan usa pay ay nangammuwanmi ay pinilen Apo Dios chakayu at kiapú ta tinurturadyu chakami ya hi Apo Jesus. Tay uray kun ongor chi inliwasyu as nan nang-awatanyu as nan Ammay ay Chamag at ongor challu nan lagsakyu ay inchat nan Espiritu Santo. <sup>7</sup> Isunga nunfialin kayu as munturachan nan am-in ay omaafurot henan probinsiya ay Macedonia ya Acaya.† <sup>8</sup> Tay chakayu nan nunlapuhan nan naepachamakian nan kallen Apo Dios maepangkep kan Apo Jesus ad Macedonia ya ad Acaya. Fiakun yangkiay chi, ngem uray nan pammatiyu kan Apo Dios at naammuwan henan am-in ay lukiar. Isunga maid at masapor kananmi as maepangkep kan chakayu. <sup>9</sup> Tay chicha mismu nan cha mangepadpachamag as nan enkamanyu ay nangmangili kan chakami ya nan enkamanyu ay nankug as nan chiyuchya didiosen ta munserfi kayu as nan matataku ya tit-iwa ay Apo Dios. <sup>10</sup> Ifiakiacha us nan maman-uchanyu as nan omaliyan kasin nan Anakna ay murpu ad chaya ay tenakon Apo Dios manipud as nan utuy. Nan hana ay Anakna nan mangesarakan kan chitaku as nan omalintu ay ichusan Apo Dios.

## 2

### *Nan Nunserserfiyan Cha Pablo Ad Tesalonica*

<sup>1</sup> Iib-a, chakayu ay mismu at ammuyu ay wacha nan kotok nan nangfisi-taanmi kan chakayu. <sup>2</sup> Tay ammuyu ay uray kun chakami penarpalikiat ya infiafiaiñ ad Filipos as nan chaanmi pay enmaliyan kan chakayu hesa ad Tesalonica, inchat challu Apo Dios kan chakamiy turud ay mangekasaba kan chakayu as nan Ammay ay Chamag ay nurpu kan hiya. Tit-iwa ay enommat sa uray kun ongor chi komokontra kan chakami hesa.\* <sup>3</sup> Tay nan mangaw-awisanmi kan chakayu at achi maifisar as nan kinukutum winnu as nan kenaruket ay pangkep winnu as nan mangisiksikan as tataku. <sup>4</sup> Ngem kunmi yangkiay cha atun nan laychun Apo Dios, tay penaneknekana

\* <sup>1:3</sup> 1 Co. 13:13; Gal. 5:5-6; Col. 1:4-5; 1 Tes. 5:8      † <sup>1:7</sup> Nan tukún ay ngachan nan probinsiya ay Acaya at Grecia.      \* <sup>2:2</sup> Ara. 16:16-24

ay matalek kami ay mangekaskasaba as nan Ammay ay Chamag. Isunga achi kami cha mun-ekaskasaba ta palaylaychunmi nan tataku, ngem kun at ta palaylaychunmi hi Apo Dios ay nangammu as nan wacha as numnummi. <sup>5</sup> Ammuyu met us ay as nan kawad-anmi kan chakayu, chaan kami nun-osar as makaawis ay kali ay manikap kan chakayu, winnu chaan kami nun-osar as kali ay manglingubmi as nan kenaakummi. Hi Apo Dios nan mangepaneknek as na. <sup>6</sup> Nan usa pay at chaanmi enanap chi maichayawanmi ay nurpu kan chakayu winnu as nan tapina ay tataku. <sup>7</sup> O, chaanmi enanap sa, uray mu wachay kalintikianmi koma ay manapor as rispitu kan chakayu, tay apostoles chakami kan Cristo. Ngem kun kami at naanos kan chakayu ay kaman as nan kenaanos nan ena ay mangaywan as nan an-akna. <sup>8</sup> Kiapú as nan ongor ay layadmi kan chakayu, fiakun yangkiay nan Ammay ay Chamag ay murpu kan Apo Dios nan isurumi kan chakayu, ngem nakasakiana kami us ay matuy para kan chakayu, tay napateg kayu as solet kan chakami.

<sup>9</sup> Iib-a, ammok ay manunumnumyu nan foraymi ya likiatmi ay nunchunchunu as inurkiw ya lenafi ta wachay iyarami as kasaporanmi. Tit-iwa sa, tay achimi laychun ay palikiatun chi uray usa kan chakayu as nan nun-ekaskasabaanmi kan chakayu as nan Ammay ay Chamag ay nurpu kan Apo Dios.

<sup>10</sup> Chakayu ya hi Apo Dios nan mangepaneknek as nan ukialimi kan chakayu ay omaafurot hesa. Nasantowan ya nalintig kami met ya maid us en-enatmi as maepafiasoranmi. <sup>11</sup> Ammuyu met us ay nan en-enatmi kan chakayu am-in at kaman as nan atun nan ama ay manukun as nan pototna. <sup>12</sup> Tinugtukunmi chakayu, liniqliwami chakayu ya finilfilinmi chakayu ay matakú kayu koma ay maiyunud as nan laychun Apo Dios ay nangayag kan chakayu ay maetapi henan muntorayana ya kaichayawana.

### *Nan Napalikiatanan Nan Omaafurot Ad Tesalonica*

<sup>13</sup> Kanayon kami us ay munyaman kan Apo Dios, tay as nan nanngoranyu as nan kalina ay enkasabami at achiyu ifilang chi as ap-apat chi tataku, ngem kunyu at infilang as tit-iwa ay kallen Apo Dios. Nan kallen Apo Dios at wachay pannakafialina ay cha mamarfiali as nan fiyagu ay omaafurot. <sup>14</sup> Iib-a, maila ay enmafurot kayu tit-iwa, tay nan enommat kan chakayu at kaman as nan enommat as nan chiyuycha iglesian Apo Dios ad Judea ay chicha nan omaafurot kan Cristo Jesus. Penarpalikiat chakayu as nan kakailiyanu ay kaman kan chicha ay penarpalikiat nan kakailiyanu ay Judio. <sup>15</sup> Chicha ay Judio nan nangepapatuy kan Apo Jesus ya nan chiyuycha pomapadtu, ya chicha us nan namalikiat kan chakami. Kontrauncha us nan laychun Apo Dios, ya munfalincha as kafusor chi am-in ay tataku. <sup>16</sup> Tit-iwa sa, tay penachascha ay mangepawa kan chakami ay mun-ekasaba as nan chiyuycha Gentil ta maesarakancha koma. Hiyana nan chacha at-atun ay manapitapi as fiasfiasorcha inkiana ongoongor. Ngem ad wani, inumchan nan manusaan Apo Dios kan chicha.

### *Nan Nailiwan Cha Pablo As Nan Omaafurot Ad Tesalonica*

<sup>17</sup> Iib-a, as nan naisiyananmi kan chakayu as hen-omaketan, enpapatimi ay munfiangad hesa ta kasin takú koma mun-iiinila, tay nailiwan kami as solet kan chakayu. Uray mu achawwi kayu kan chakami, nunumnumunmi challu chakayu. <sup>18</sup> Laraychunmi tit-iwa ay munfiangad ay mangila kan chakayu, kaskasin kan ha-un. Namen ongor ay penadpachasku ay umuy hesa, ngem penas-iw chakami kan Satanas. <sup>19</sup> Nan munlaraychanmi ay mangila kan

chakayu at kiapú ta chakayu nan lagsakmi, namnamami ya kaichayawanmi as nan maesakianganmi kan Apo takú ay Jesus as nan kasina omaliyan. **20** Tit-iwa ay chakayu nan mangepalagragsak kan chakami ya kiapón nan maichayawanmi!

### 3

#### *Nan Naifiaoran Timoteo Ad Tesalonica*

**1** Isunga as nan achimi mangeta-unan as iliumi kan chakayu, ninum-nummi kan Silas ay un-ununya ay munifiati kami ad Atenas. **2** Angkiay infiaormi kan chakayu nan ifia takú ay hi Timoteo ay kadwami ay cha munserserfi kan Apo Dios ya kadwami ay mangekaskasaba as nan Ammay ay Chamag maepangkep kan Cristo. Infiaormi hiya ta papigsauna ya fiadngana chakayu as nan pammatiyu **3** ta maid koma mankug as pammatina kiapú as nan nauycha liglikiat. Chakayu ay mismu at ammuyu ay nakeddengen takú ay mapalikiat. **4** Tay as nan kawad-anmi pay laing kan chakayu, enpakaononami ay nangifiafikia kan chakayu ay mapalikiat takuntu, at ammuyu ay hiyasa met nan tit-iwa ay enommat. **5** Hiyana nan kiapón nan nangifiaorak kan Timoteo ay umuy hesa ta maammuwak mu kukutug nan pammatiyu, tay achiyak makaeta-un as nan munsusuchanmi as chamag maepangkep kan chakayu. Enatku na, tay umugyatak, atun at mu enallilaw chakayu kan Satanas, at maid at kotkotok nan nunforayanmi hesa.

**6** Ngem ad wani, nunfiangad hi Timoteo ay nurpu kan chakayu, at enpakaammuna nan ammay ay chamag maepangkep as nan pammatiyu ya layadyu kan Apo Dios ya as nan iib-ayu. Infiakiana us ay kanayonyu ay numnumun chakami, ya laychunyu us ay mangila kan chakami ay kaman as nan layadmi ay mangila kan chakayu.\* **7** Isunga hiyachi ay iib-a, uray kun kami nalilifokan as solet ya ongor chi iliwasmi at naepapigsa challu nan numnummi as nan nangammuwamni as nan maepangkep as nan pammatiyu. **8** Tay ad wani at naragsak nan matakwanmi mu iturturuyu nan pammatiyu kan Apo Jesus. **9** Achimi ammu nan kananmi ay munyaman kan Apo Dios kiapú kan chakayu, tay ongor chi lagsakmi as nan sangwanan Apo Dios takú kiapú kan chakayu. **10** Inurkiw ya lenafi ay epapasnekmi ay mangichawat kan Apo Dios ta kasin takú koma mun-iinnila ta tapiyamni nan kenakurang nan pammatiyu.

**11** Sapay koma ta hi Apo Dios mismu ay Ama takú ya hi Apo Jesus nan mangetoróng kan chakami ay umuy hesa kan chakayu. **12** Taptapiyan ya pasafiyun koma nan Apo nan layadyu as nan tunggal usa ya as nan am-in ay tataku ay kaman as nan layadmi kan chakayu. **13** Mu hiyasa, papigsauna Apo Dios ay Ama takú nan numnumyu ta maidtu maepafiasor kan chakayu ya nasantowan kayuntu as nan mangiilana as nan kasin omaliyan Jesus ay Apo takú ay kadwana nan am-in ay tatakuna.

### 4

#### *Nan Fiyag Ay Mangepalaylayad Kan Apo Dios*

(Efe. 4:17-32; Col. 3:1-10)

**1** Nauy pay nan ifiakiami kan chakayu ay iib-a. Ammuyu at nan ekaman ay matakú ay mangepalaylayad koma kan Apo Dios, tay sinuruyu met kan chakami. Ad wani, babaen as nan kalibfenganmi ay inchat Apo Jesus,

---

\* **3:6** Ara. 18:5

epakaasimi ya itukunmi kan chakayu ay taptapiyanyu koma nan ammay ay panagfiyagyu ay kaman as nan chayu at-atun. <sup>2</sup> Tay ammuyu met nan chiyucha inflinmi kan chakayu babaen as nan kalibfenganmi ay nurpu kan Apo Jesus. <sup>3</sup> Nan enkeddeng Apo Dios at nan munfialinanyu as nasantowan ay tataku. Isunga masapor achiyu epappapas nan assi ay lachok. <sup>4</sup> Chakayu am-in ay lanaraki at masapor ammuyu nan atunyu ay omasawa ta nasantowan ya maichayaw koma.\* <sup>5</sup> Fiakun assesesa ay nan mun-ongosán nan achoryu nan unuchunyu ay kaman as nan cha at-atun nan tataku ay achi nangammu kan Apo Dios. <sup>6</sup> Mu maepangkep ngarud as sa, maid koma kan chakayu nan mangekamkaman as senasator as nan ifiana winnu manggundaway kan hiya. Tay hi Apo Dios at chusaunantu nan chiyucha mangekamkaman as nan am-in ay assesesa ay kaman as nan nangfiag-anan kan chakayu. <sup>7</sup> Tay chaan chitaku enayakian kan Apo Dios ay mangekamkaman as naruket, ngem enayakian chitaku ay mangunud as nasantowan ay panagfiyag. <sup>8</sup> Isunga nan taku ay mangachi as nan nauy ay sursuru at fiakun taku nan chana achiyun, ngem kun at hi Apo Dios ay nangchat as Espiritu Santona kan chakayu.

<sup>9</sup> Mu maepangkep as layadyu as nan iib-ayu ay omaafurot, achimi masapor isurat kan chakayu, tay insuron Apo Dios kan chakayu nan atunyu ay munleennayad. <sup>10</sup> Tit-iwa met kayman ay enkamanyu sa as nan am-in ay iib-a ay wacha henan intiru ay Macedonia. Ngem tukununmi chakayu ay iib-a ta taptapiyanyu pay nan atunyu ay munleennayad. <sup>11</sup> Nan epapasnekyu ay atun at matakayu ay natalna, achi kayu makififiyang as nan atun chi tapina, ya munchunu kayu ta wachay pagfiyagyu ay hiyasa challu nan inflifilinmi kan chakayu ad kasin. <sup>12</sup> Atunyu chasa ta rispituwun chakayu as nan chiyucha achi omaafurot, ya achi kayu masapor kumkumchaw as kasaporanyu as nan kumpurmi ay taku.

### *Nan Sursuru Maepangkep As Nan Omaafurot Ay Natuy*

<sup>13</sup> Iib-a, laychunmi ay maammuwanyu nan kenatit-iwa maepangkep as nan chiyucha omaafurot ay natuy ta achi kayu ngumuyus ay kaman as nan chiyucha maid namnamacha.<sup>†</sup> <sup>14</sup> Kiapú ta afurotun takú ay hi Jesus at natuy ya nataku challu manipud as nan utúy, isunga afurotun takú us ay takuwun Apo Dios nan chiyucha natuy ay enmafurot kan hiya, at epatun-udnantu chicha kan Jesus as nan kasin omaliyan Jesus asna's luta.

<sup>15</sup> Hiyana nan sursuron nan Apo ay epakaammumi kan chakayu: Chitaku ay kutug ay matataku as nan urkiw ay kasin omaliyan Apo Jesus at achi takú elas-iyen nan chiyucha omaafurot ay natuy as nan uy takú manibatan kan hiya. <sup>16</sup> Tay nan Apo mismu at kumuabtu ay murpu ad chaya. Ifukiawnantu nan filin, ya omayagtus nan ap-apon nan anghelles, ya madngortu nan tarampet Apo Dios. Omon-onantu ay mataku nan nunkatuy ay omaafurot kan Cristo. <sup>17</sup> Angkiay chitaku ay matataku as nan hiyachi ay timpu at maara takuntu ay maiyamong kan chicha ay maetag-uy henan lifuu ay uy manib-at kan Apo Jesus, at maketaku takú kan hiya in-inkiana. <sup>18</sup> Isunga munlilinniwiwa kayu ngarud babaen as nan mangifiagfiag-anyu as nan nauycha ay chamag.

\* **4:4** 1 Ped. 3:7. Nan usa ay laychun nan nauy ay kanan at hiyana: Nan tunggal usa at masapor etporna nan laylaychun nan achorna. † **4:13** Jn. 11:11-13; 1 Co. 15:15-20

## 5

*Nan Munsasakianaan As Nan Kasin Omaliyan Apo Jesus*

<sup>1</sup> Achimi kis-an isurat kan chakayu ay iib-a nan maepangkep as nan timpu ay ommatan chatona. <sup>2</sup> Tay aammuyu met mismu ay nan urkiw ay kasin omaliyan nan Apo at kaman as nan loktat ay omaliyan nan mangaakiw as nan lafi. <sup>3</sup> As nan hiyasa ay timpu nan mangarkaliyan nan tataku un wachay talna as nan fiyagcha ya maid chanchanag, kalina at ya pakachachaelan nan omali kan chicha ay kaman as nan munpasikaran nan fiafiai as nan omankana, at achichantu makalaway.

<sup>4</sup> Ngem kan chakayu ay iib-a, achi kayu matakay kaman kayu wacha henan ngongot. Isunga achi kayu ngarud makudkudnor as nan omaliyan nan hana ay urkiw ay kaman as nan makudnoranyu as nan loktat ay omaliyan nan mangaakiw. <sup>5</sup> Tay chitaku am-in ay omaafurot kan Jesus at sinilawan Apo Dios nan numnum takú. Isunga fiakun chitaku tatakon nan lafi winnu ngongot, ngem kun takú at nunfialin as tatakon nan kaorkia. <sup>6</sup> Isunga achi takú koma un-unuchun nan cha at-atun nan tapina ay achi omaafurot ay kamancha nanassuy, ngem kun takú at koma munsasakiana ya etpor takú nan laylaychun nan anchor takú. <sup>7</sup> Tay as nan lafi nan massuyan nan tataku, ya hiyasa us nan mafutngan nan chiyucha munfutang. <sup>8</sup> Ngem kiapú ta wacha takú as nan kaorkia, masapor etpor takú nan laylaychun nan anchor takú. Isunga kanayon takú ay epapasnek ay omafurot kan Apo Dios, ya kanayon takú ay nakasakiana ay mangepaila as layad takú as nan iib-a takú ya kan Apo Dios. Tay nan pammati ya layad takú at maepachong as nan manasarak as tagrang chi sorchachu. Iturturuy takú koma ay munnamnama ay maesarakan takú, tay nan namnama ay ansa at maepachong as nan helmet ay manasarak as uron chi sorchachu.\* <sup>9</sup> Tay chaan chitaku pinili kan Apo Dios ay munlikiat as nan chusa kiapú as fungatna, ngem kun chitaku at esarakan babaen kan Apo takú Jesu Cristo. <sup>10</sup> Natuy hiya para kan chitaku ta uray mu kukutug takú ay matataku winnu natuy as nan kasina omaliyan, maketaku takú challu kan hiya. <sup>11</sup> Isunga munpeppennapigsa kayu as pammati, ya munfifinnachang kayu ay kaman as nan chayu challu at-atun.

*Nan Anongos Ay Tukun Pablo*

<sup>12</sup> Epakpakaasimi kan chakayu ay iib-a ay rispituwunu koma nan chiyucha mangekarkalikiatan ay mangepangpanguru ya manugtukun kan chakayu as nan mangunuchanyu kan Apo Jesus. <sup>13</sup> Epategyu koma chicha ya epailayu ay wachay layadyu kan chicha kiapú as nan chunucha. Munkeken-nappia kayu koma am-in.

<sup>14</sup> Epakpakaasimi kan chakayu ay iib-a ay fiag-anyu nan chiyucha nanigkia, ya papigsaunyu nan numnum nan chiyucha cha machischismaya. Fiadnganyu nan chiyucha nakapuy chi pammaticha, ya anosanyu nan am-in ay tataku. <sup>15</sup> Mu wachay mangekaman as mangotettet kan chakayu, ilaunu ta maid koma usa kan chakayu as manges-es-ang, ngem kun at kanayon ay ammay nan ekamanyu as nan tunggal usa ya as nan am-in ay tataku.

<sup>16</sup> Kanayon kayu koma ay naragsak. <sup>17</sup> Kanayon kayu us ay munkararag.

<sup>18</sup> Munyaman kayu kan Apo Dios uray ngachananay cha om-ommat kan chakayu, tay hiyana nan enkeddengna ay unuchunyu ay makius-usa kan Cristo Jesus.

\* <sup>5:8</sup> Efe. 6:13-17

<sup>19</sup> Achiyu pakinkun nan Espiritu Santo as nan laychuna kan chakayu.

<sup>20</sup> Achiyu ostun nan kanan nan pomapadton Apo Dios. <sup>21</sup> Ngem kunyu at chistingun nan am-in ay maifiagfiakia ta maammuwanyu mu tit-iwa ay nurpu kan Apo Dios. Iturturuyu ay omafurot as nan ammay, <sup>22</sup> ya achiyunyu nan am-in ay mangotettet.

<sup>23</sup> Sapay koma ta hi Apo Dios ay kurpuwan chi talna nan mangpasanto kan chakayu ta maid munkuranganyu. Sapay koma ta aaywanana nan espiritu, numnum ya achoryu ta maid maepabpafiasor kan chakayu as nan kasin omaliyan Apo takú ay Jesu Cristo. <sup>24</sup> Hi Apo Dios ay nangayag kan chakayu at atuna chaná, tay matalek hiya.

<sup>25</sup> Iib-a, ekarkararakian chakami pay us.

<sup>26</sup> Pakomostaunyu nan am-in ay iib-a takú hesa ta epailayu ay munlelen-nayad kayu.

<sup>27</sup> Babaen as nan kalibfengak ay inchat Apo Jesus, ifilinku kan chakayu ay ifiasayu na ay surat as nan am-in ay iib-a takú hesa.

<sup>28</sup> Sapay koma ta mawawacha kan chakayu nan grasyan Apo takú ay Jesu Cristo.

## Nan Maekadwa Ay Surat Pablo As Nan Chiyuycha I-Tesalonica Nan Omona Ay Ammuwun

Nan nauy ay surat Pablo at hiyana nan maekadwa ay suratna as nan chiyuycha omaafurot ad Tesalonica. Nunsurat hiya kan chicha kiapú ta naepachamag kan hiya ay chacha challu maliglikiatan ya malilifokan maepangkep as nan munfiangchan Apo Jesus asna's luta. Wachacha nan tapina kan chicha ay nangepadpachamag ay kenalen kanu Pablo un natong-par at nan kasin omaliyan Cristo (2:2). Isunga nunsurat kasin hi Pablo kan chicha ta songfiatana sa.

Nan usa pay ay kiapúna as nunsuratana at nachamagna nan maepangkep as nan tapen nan omaafurot ay achi munchunu as pagfiyangcha, tay na-padsokcha ya fifiyanganchay cha at-atun chi tapina ay tataku (3:11). Nan assesena ay tataku at naallilawcha, tay nan wacha as numnumcha at maid kotok nan chacha munchunuchunuwan, tay nachamagcha ay chakus kanu emmali hi Apo Jesus.

Isunga as nan nauy ay surat, enlawlawag Pablo kan chicha ay munpailantu on-oná nan makali un Komokontra As Nan Am-in Ay Lintig Apo Dios, ya fusoruntu nan ongor ay tataku hi Cristo sakbay munfiangad hiya. Senengarana nan chiyuycha napadsok ta munchunucha as pagfiyangcha, ya tinukuna nan chiyuycha omaafurot ta papigsauncha nan pammaticha uray ngachanay ommat kan chicha. Tinukuna pay chicha ta turachuncha hiya ay makakud.

### **Nan Nakudkudwaan Nan Nauy Surat**

Nan Laplapon Nan Surat 1:1-2

Nan Mun-okomán Jesus As Nan Kasina Omaliyan 1:3-12

Nan Tukun Maepangkep As Nan Kasin Omaliyan Jesus 2:1-17

Nan Tukun Maepangkep As Kararag ya Kenapadsok 3:1-15

Nan Anongos Nan Surat 3:16-18

### *Nan Laplapon Nan Surat*

<sup>1</sup> Ha-un hi Pablo ay nurpuwan nan nauy ay surat. Nan kakadwak ay nunsurat at cha Silas kan Timoteo.

Nauy nan suratmi as nan iglesia hesa ad Tesalonica ay naifilang as tatakon Apo Dios ay Ama takú ya hi Apo Jesu Cristo.

<sup>2</sup> Sapay koma ta mawawacha kan chakayu nan grasya ya nan natalna ay numnum ay nurpu kan Apo Dios ay Ama ya kan Apo Jesu Cristo.

### *Nan Mangokomán Apo Dios As Nan Tataku*

<sup>3</sup> Iib-a, masapor kanayon kami ay munyaman kan Apo Dios kiapú kan chakayu. Ustu mu atunmi sa, tay cha pumigsapigsa nan pammatiyu kan Apo Dios ya cha matapitapiyan nan layadyu as nan tunggal usa. <sup>4</sup> Isunga chakami mismu at ichayawmi chakayu as nan chiyuycha iglesian Apo Dios kiapú as nan chayu mun-eta-ta-unan ya as nan chayu mangiturturuyan ay omafurot uray mu ongor chi malilifokananyu ya maparpalikiatananyu kiapú as nan pammatiyu.

<sup>5</sup> Hiyana nan mangepaila ay nalintig nan atun Apo Dios ay mun-okóm as nan tataku, tay hi Apo Dios nan mangesakiana kan chakayu ta munfialin

kayu as maekari ay maetapi henan muntorayana.\* O, nan nauy muntorayan nan kiapúna ay chakayu mun-iliwliwas. <sup>6</sup> Nalintig challu nan atun Apo Dios ay mun-okóm, tay paliwasananu nan chiyucha mamarpa liwas kan chakayu. <sup>7</sup> Paiblayuna chakayu as nan chayu iliwiwas ya kaman us kan chakami. Atunantu sa as nan kasin omaliyan Apo Jesus ay murpu ad chaya ay kadwanantu nan mannakafialin ay anghelesna <sup>8</sup> ya nan cha kumilkilab ay apuy.† Chusauntu Jesus ay Apo takú nan chiyucha achi nangammu kan Apo Dios ya nan chiyucha achi omafurot as nan Ammay ay Chamag maepangkep kan hiya.‡ <sup>9</sup> Iliwaschantu nan chusa ay pannakachachael ay achi munpatungkia. Maisiyanchantu as nan Apo in-inkiana, ya achicha ililaun nan machaychayaw ay pannakafialina. <sup>10</sup> Hiyasa nan ommat as nan urkiw ay omaliyan Jesus ay mang-awat as pammachayaw ya panangrispition nan am-in ay omafurot kan hiya. Maetapi kayu us kan chicha, tay enafurotyu nan kalen Apo Dios ay insursurumi kan chakayu.

<sup>11</sup> Isunga kanayonni ay ekarkararakian chakayu ta munfialinun chakayu kan Apo Dios takú as tatakuna ay maekari as nan nangayakiana kan chakayu. Sapay koma ta babaen as nan pannakafialina at matongpar nan am-in ay ammay ay pangkepyu ad kasin ya marpas nan am-in ay chunyu babaen as nan pammatiyu. <sup>12</sup> Mu hiyasa nan atunyu, maichayawtu hi Apo Jesus kiapú kan chakayu, ya ichayaw chakayuntu us kan hiya. Ommat am-in chasa babaen as nan grasyan Apo Dios takú ya hi Apo Jesu Cristo.

## 2

### *Nan Komokontra Kan Apo Dios*

<sup>1</sup> Mu maepangkep as nan kasin omaliyan Apo takú ay Jesu Cristo ya as nan maamongan takú ay uy manib-at kan hiya,\* epakpakaasimi kan chakayu ay iib-a <sup>2</sup> ay achi kayu koma naraka ay malilifok winnu machanakian mu wachacha nan padtu winnu pakaammu ay chinchingoryu ay kanancha un enmali at nan urkiw ay kasin omaliyan nan Apo. Achiyu afurotun uray kanancha un nurpu kan chakami chasa winnu kanancha un wachay suratmi kan chicha ay assesa nan kenalimi. <sup>3</sup> Achi kayu munpappaallilaw as nan kumpurmi ay tataku uray ngachanay atuncha, tay achi challu omali sa ay urkiw sukúd fusorun on-oná nan ongor ay tataku hi Apo Dios, ya munpaila us nan mangontra as nan am-in ay lintig Apo Dios. Hi toná ay komokontra nan natudingan ay machusa ad inferno. <sup>4</sup> Kontraunantu nan am-in ay chaychayawun nan tataku ay kanancha un dioscha, ya epangatunantu nan achorna as kangatuwan as nan am-in. Angkiay ya uytu tomokor as nan templon Apo Dios, ya kananantu un hiya mismu nan Apo Dios.

<sup>5</sup> Ay kunyu achi manumnum ay infiakiak am-in chaná as nan kawadak kan chakayu? <sup>6</sup> Ammuyu us mu ngachana nan mangepapakud ad wani as nan nauy komokontra kan Apo Dios ta achi munpaila inkiana umchan nan timpu ay enkeddeng Apo Dios. <sup>7</sup> Cha munchunuchunu nan nauy komokontra ay achi maam-ammuwan ad wani, ngem achi mafialin ay munpaila hiya inkiana makaan nan mangepapakud kan hiya. <sup>8</sup> Mu makaan chi, munpailantu nan komokontra. Ngem as nan kasin omaliyan Apo Jesus, chachaelunantu nan komokontra as nan sumili ay munpail-ana, ya patayunantu babaen as nan long-agna.† <sup>9</sup> Sakbay nan maamisan nan

---

\* <sup>1:5</sup> Filp. 1:28-30; 1 Ped. 2:21      † <sup>1:8</sup> 1 Tes. 4:17; Heb. 10:27; 2 Ped. 3:10-14      ‡ <sup>1:8</sup> Isa. 66:15-16  
 \* <sup>2:1</sup> 1 Tes. 4:17      † <sup>2:8</sup> Pal. 17:14; 19:21; 20:9

nauy komokontra ay kawad-an nan pannakafialin Satanas at epailanantu nan am-in ay karasen chi milagro, nakaskaschaaw ya sinyar.<sup>10</sup> Osarunantu nan am-in ay mangotetet as pang-allilawna as nan chiyuycha nakeddengan ay machusa, tay chaancha lenayad ay mangafurot as nan kenatit-iwa ta mae-sarakancha koma.<sup>11</sup> Isunga enparufus Apo Dios ay afurotuncha nan fiakun tit-iwa<sup>12</sup> ta machusachantu am-in ay chaan enmafurot as nan kenatit-iwa, ngem kuncha at lenaylayad nan chiyuycha achi nalintig.

### *Nan Napili Ay Maesaranan*

<sup>13</sup> Ngem masapor kanayon kami ay munyaman kan Apo Dios kiapú kan chakayu ay iib-a ay laylachun nan Apo. Tay sakbay mafiayang chi kaichin at pinipilen Apo Dios chakayu ay maesaranan babaen as nan pannakafialin nan Espiritu Santo ay mangpasanto kan chakayu ya babaen as nan pammatiyu as nan kenatit-iwa.<sup>14</sup> Enayakian Apo Dios chakayu ay maesaranan babaen as nan Ammay ay Chamag ay enkaskasabami kan chakayu ta maetapi kayu as nan kaichayawan Apo takú ay Jesu Cristo.<sup>15</sup> Isunga iib-a, iturturuyyu ay omafurot, ya iturturuyyu ay mangun-unud as nan tit-iwa ay sursuru ay enkaskasabami ya insursuratmi kan chakayu.

<sup>16-17</sup> Sapay koma ta hi Apo takú ay Jesu Cristo mismu ya hi Apo Dios ay Ama takú nan mangepapigsa as numnumyu ya mangfiachang kan chakayu ta ammay chi chayu at-atun ya kankanan. Tay enpailan Apo Dios nan layadna kan chitaku, ya babaen as nan grasyana kan chitaku, inchatnay maid patingkiana ay liwliwa ya ammay ay namnama kan chitaku.

## 3

### *Nan Chinmawatan Cha Pablo As Kararag*

<sup>1</sup> Nauy pay nan chawatunmi kan chakayu ay iib-a. Ekarkarakian chakami ta henkemad ay maepachamag nan kalen nan Apo ya ta ichayaw ya afurotun nan tataku ay chumngor ay kaman as nan nangichayawan ya nangafurotanyu.<sup>2</sup> Ekararagyu us ta esarakan chakami kan Apo Dios as nan tataku ay manangotetet chi ukialicha, tay achi am-in ay tataku at omaafurot kan Apo Dios.

<sup>3</sup> Ngem uray, tay nan Apo at matalek. Papigsaunantu ya esarakanantu chakayu as nan pannakafialin nan Mangotetet ay hi Satanas.<sup>4</sup> Kiapú as nan pammatiyu as nan Apo, achi kami munchuwachuwa ay chayu ekamkaman nan infilfilinmi kan chakayu ya chayu pay iturturuy.

<sup>5</sup> Sapay koma ta etoróng nan Apo nan numnumyu as nan layad Apo Dios kan chakayu ya as nan kenamanang-eta-un Cristo.

### *Nan Tukun As Nan Napadsok Ay Taku*

<sup>6</sup> Iib-a, babaen as nan kalibfengan ay inchat Apo takú ay Jesu Cristo kan chakami, ifilinmi kan chakayu ay achi kayu makekadkadwa as nan am-in ay iib-a ay napadsok ay munchunu ya achi mangekaman as nan insursurumi kan chakayu.<sup>7</sup> Tay chakayu mismu at ammyu met nan atunyu ay mangunud as nan en-enatmi. Achi kami napadsok ay munchunu as nan nakekpyagananmi kan chakayu hesa.<sup>8</sup> Maid enar-arami as kasaporanmi ay chaanmi finayachan. Kunmi at enkarkalikiatan ay nunchunchunu as inurkiw ya lenafi ta maid uray usa kan chakayu as malikiatan kiapú as nan kasaporanmi.<sup>9</sup> Enkamanmi na ta epailami kan chakayu nan ustу ay

turachunyu, uray wachay kalintikianmi ay kumchaw kan chakayu as kas-aporanmi. <sup>10</sup>Tay uray as nan nakepapagyananmi kan chakayu at infilfilinmi ay mu ngachana nan napadsok ay munchunu at achiyu pakpakanun.\*

<sup>11</sup> Isuratmi na, tay chinngormi ay wachacha nan tapina kan chakayu ay nunkapadsok ay munchunu. Maid chacha at-atun mu achi yangkiay makififiyang as nan cha at-atun chi tapina ay tataku. <sup>12</sup> Babaen as nan kalibfengan ay inchat Apo Jesu Cristo kan chakami, filinunmi chasa ay tataku ya tukununmi chicha ta nan chunucha yangkiay nan nonongnongun-cha, ya munchunucha as pagfiyagcha.

<sup>13</sup> Ngem chakayu ay iib-a, achi kayu koma maum-uma ay mangekaman as ammay.† <sup>14</sup> Mu wachay achi mangafurot as nan nauy insuratmi, ilaunyu mu ngachan tosa ay taku, ya achi kayu makekadkadwa kan hiya ta mafainan.‡

<sup>15</sup> Achiyu ifilang hiya as kafusor, ngem kunyu at fiagfiag-an hiya as ifiayu.§

#### *Nan Anongos Nan Surat*

<sup>16</sup> Sapay koma ta nan Apo mismu ay kurpuwan chi talna at ichatnay natalna ay numnum kan chakayu as nan am-in ay timpu ya uray ngachanay om-ommat. Sapay koma ta mawawacha us hiya kan chakayu am-in.

<sup>17</sup> Ha-un hi Pablo ay nangisurat as nan nauy pakomosta. Hiyana nan chak at-atun as nan am-in ay suratku ta mangematonanyu ay ha-un tit-iwa nan nunsurat.

<sup>18</sup> Sapay koma ta mawawacha kan chakayu am-in nan grasyan Apo takú ay Jesu Cristo.

---

\* **3:10** Ara. 18:3; 1 Tes. 4:11    † **3:13** Gal. 6:9    ‡ **3:14** Rom. 16:17; 1 Co. 5:9-11    § **3:15** Gal. 6:1;  
1 Tes. 5:14

## Nan Omona Ay Surat Pablo Kan Timoteo Nan Omona Ay Ammuwun

Nan nauy ay surat Pablo at para kan Timoteo ay usa ay fumarfiaru ay omaafurot kan Jesus. Maflalin ay enmafurot hi Timoteo kan Jesus as nan inmuyan Pablo ad Listra as nan omona ay nunfiaatana ay mun-ekasaba (Ara. 14:6-7). Nan aman Timoteo at Griego (Ara. 16:1-3), ngem nan enana ay hi Eunice at Judio ya uray us nan lolana ay hi Loida. Napigsay pammatten chatona'y chuwa ay fianafiai ay Judio kan Jesus (2 Tim. 1:5).

As nan kawad-an Pablo ad Listra as nan maekadwa ay nunfiaatana, nachamagna nan maepangkep as nan ammay ay ukialen Timoteo ya nan napigsay pammatina (Ara. 16:1-3). Isunga enayakiana hiya as kadwana ya kafiahchangna as nan mangekaskasabaana ya mangisursuruwana as nan maepangkep as nan Ammay ay Chamag. Nunlapu as nan hana ay timpu, inturturuy Timoteo ay nangfiachang kan Pablo (1 Co. 4:17; Filp. 2:19-22).

Nan usa henan chiyucha lukiar ay nun-is-isuruwancha at henan siyudad ay Efeso, ya hid-i nan nanaynanan Pablo kan Timoteo ta hiya nan pannakaachor Pablo ay nangepangpanguru ya mangisursuru as nan iglesia hid-i (1:3). As nan kafiaayag Timoteo hid-i, insurat Pablo nan nauy suratna kan hiya, ya nemannamana ay mailana kasin hiya (3:14; 4:13).

Turu nan infiakiana as nan nauy ay surat. Nan omona at maepangkep as nan chiyucha nun-is-isuru as achi tit-iwa, tay insursurucha ay mu laychun nan taku ay maesarkan, achi omas-asawa ya aaketunay kanuna. Isunga tinukun Pablo ay ustу hi Timoteo ay pakinkuna chicha ay mun-isuru (1:3-7; 4:1-3, 7; 6:3-10, 20-21).

Nan maekadwa at nan chiyucha ustу ay unuchun nan mapili ay mangepangpanguru as iglesia ya chiyucha mapili ay fumadfiachang kan chicha. Nan chiyucha mangepangpanguru as nan iglesia at masapor marispitu nan panagfiayagcha ta chicha mismu nan munturachan nan tataku (3:7).

Nan maekatlu at maepangkep as nan munkarkarakiancha ya munchay-chayawancha kan Apo Dios (2:1-3, 8-15), ya nan ustу ay atun ay mangfiachang as nan eellakas, anam-amá ya mafiabfiaor (5:1-16; 6:2).

### **Nan Nakudkudwaan Nan Nauy Surat**

Nan Laplapon Nan Surat 1:1-2

Nan Maepangkep As Nan Achi Tit-iwa Ay Sursuru 1:3-11

Nan Panagyaman As Nan Sug-ang Apo Dios 1:12-20

Nan Munkarakian Ya Munchayawan 2:1-15

Nan Chiyucha Mangepangpanguru As Nan Iglesia 3:1-16

Nan Tukun Maepangkep As Nan Panagserfi Kan Cristo 4:1-16

Nan Atun As Nan Chiyucha Ellakas, Anam-amá Ya Mafiabfiaor 5:1-6:2

Nan Tit-iwa Ay Kenafiaknang 6:3-10

Nan Tukun Pablo Kan Timoteo 6:11-21

### **Nan Laplapon Nan Surat**

<sup>1</sup> Ha-un hi Pablo ay apostol Cristo Jesus, tay hiyasa nan infilin Apo Dios ay Mangesarakan kan chitaku, ya hiyasa us nan infilin Cristo Jesus ay namnamaun takú ay mangekaman as nan am-in ay sadsad-un takú.

<sup>2</sup> Nauy nan suratku kan he-a Timoteo ay ifilangku as tit-iwa ay anakku kiapú as nan enmafurotam.

Sapay koma ta mawawacha nan grasya, sug-ang ya nan natalna ay numnum kan he-a ay nurpu kan Dios Ama ya kan Cristo Jesus ay Apo takú.

*Nan Mangfiag-anan As Nan Chiyuchya Mun-isursuru As Achi Tit-iwa  
(2 Ped. 1:2; Jud. 1:8-13)*

<sup>3</sup> As nan immuyak ad Macedonia, chinawatku kan he-a ay mayassaka ad Efeso, tay wachacha nan tapina ay tataku ay cha mangisursuru as achi tit-iwa. Ad wani, kasek itukun kan he-a ay filinum chicha ta ikinakcha nan chacha at-atun. <sup>4</sup> Filinum pay chicha ta achicha nunumnumun nan chiyuchya es-estorya ay pinupus-uy ya anchuanchu ay lestaan chi kaapuwana, tay nan kaman as nan hanacha at munlumu as masusumaan. Maid maifiachangcha as nan matongparan nan laychun Apo Dios, tay nan mangammowan as nan laychuna at babaen as nan pammati yangkiay. <sup>5</sup> Nan pangkep nan nauy ay filin at mu tongparuncha, wacha nan tit-iwa ay layadcha as nan iib-acha. Nan nauy ay layad at nurpu as nan nacharos ay pusu, ammay ay numnum ya tit-iwa ay pammati. <sup>6</sup> Wachacha nan tapina ay tataku ay sinmiyan as nan nauycha ammay ay ukiali, at chatona nan kiapón nan chacha makesossosekan maepangkep as maid kotkotkna. <sup>7</sup> Laychuncha ay mangisuru as lintig Apo Dios, ngem achicha maawatan nan laychun nan lintig ay kanan, ya achicha us maawatan nan chiyuchya epapeletcha.

<sup>8</sup> Mu maepangkep as nan lintig, ammu takú ay ammay sa mu ustу nan kaosarana. <sup>9</sup> Ammu takú us ay nan lintig at fiakun para as nan chiyuchya ammay ay tataku, ngem kun at para as nan chiyuchya lomalabsing as lintig ya nunkasokel, chiyuchya achi munchaychayaw kan Apo Dios ya chiyuchya fumafiasor, chiyuchya achi nadiosan chi panagfiyagcha ya chiyuchya mangmangstot as nan maepangkep kan Apo Dios, ya para as nan chiyuchya mangpatuy as chakchakorcha ya pachongcha ay taku, <sup>10</sup> para us as nan chiyuchya mangepappas as assi ay lachokcha, as nan chiyuchya lanaraki ay manarud as pachongcha ay lanaraki ya kaman us as nan fianafiai ay manarud as pachongcha ay fianafiai, para us as nan chiyuchya mangelayaw as taku, as nan chiyuchya nunkangutum, as nan chiyuchya muntistigu as achi tit-iwa ya para as nan chiyuchya mangekaman as maekontra as nan tit-iwa ay sursuru. <sup>11</sup> Nan tit-iwa ay sursuru ay maepangkep as nan lintig at maiyunud as nan Ammay ay Chamag ay entalek nan kangatuwan ya machaychayaw ay Apo Dios kan ha-un ta epakaammok as nan tataku.

*Nunyaman Hi Pablo Kiapú As Nan Sug-ang Apo Dios*

<sup>12</sup> Munyamanak kan Cristo Jesus ay Apo takú ay mangepapapigsa kan ha-un ay mangekaman as nan nauy ay chunu, tay inflangak as matalek babaen as nan nangchutokanak ay munserfi kan hiya. <sup>13</sup> Hiyachi nan enatna uray mu nunkaliyak as maifusor kan hiya, penalikiatku ya enoongngosak nan am-in ay tatakuna ad kasin. Ngem sinug-anganak challu kan Apo Dios, tay as nan hiyachi at chaanak pay laing enmafurot, isunga chaanku naammuwan payat nan chak at-atun. <sup>14</sup> Somabsafi nan grasya ay inchat nan Apo kan ha-un, at enettanak pay as pammati ya layadku as nan pachongku ay taku ay hiya challu nan chana id-ichat kan chitata ay naetatapi kan Cristo Jesus. <sup>15</sup> Nauy nan sursuru ay tit-iwa ya masapor maafurot: “Enmali hi Cristo Jesus asna's luta ta esarakana nan fumafiasor.” Ha-un nan kaongoran chi

fiasfiasorna kan chicha am-in. <sup>16</sup> Ngem sinug-anganak kan Apo Dios ta han-un nan usa ay mail-an nan maid munkurangana ay kenaanos Cristo. Uray mu ha-un nan kaongoran chi fiasorna, sinug-anganak challu kan Apo Dios, isunga nunfialinak as munturachan chi uray ngachanay taku ta mafialinchay ay omafurot kan hiya ya ta maichat us kan chicha nan fiyag ay maid patingkiana. <sup>17</sup> Machaychayaw ya mafigfigig koma nan in-inkiana ay Ari ay us-usa ay Apo Dios ay achi matmatuy ya achi maila! Amen.

<sup>18</sup> Anakku ay Timoteo, etalekku kan he-a nan nauycha filfilinku ay maiyunud as nan naepapadtu ad kasin ay maepangkep kan he-a: Os-arum nan enpadtucha ta tumurudka ay mangamis as nan mangotettet. <sup>19</sup> Papipigsau nan pammatem ya il-ilaum ta nacharos chi numnummu, tay wachacha nan tapina ay nangachi as nan nacharos ay numnum, isunga chinachaelcha nan pammaticha. <sup>20</sup> Nan chuwa kan chicha at cha Himeneo kan Alejandro ay inpurangku kan Satanas ta suruwuncha ay achi munkalikali as maifusor kan Apo Dios.\*

## 2

### *Nan Maepangkep As Nan Panagkararag*

<sup>1</sup> Nauy pay nan ifiakiak kan he-a. Nan omona at masapor ay ekarkarakian takú nan am-in ay tataku. Chumawat ya munyaman takú kan Apo Dios para kan chicha. <sup>2</sup> Ekararakian takú us nan ar-ari ya nan am-in ay tapina ay wacha as nan nangatu ay saad ta natalna ya nadiosan nan panagfiyag takú as nan cha takú munserserfiyan kan Apo Dios ya mangun-unuchan as nan ustу ay ukiali. <sup>3</sup> Ammay mu assesa nan atun takú, tay omepalayayad kan Apo Dios ay Mangesarakan kan chitaku. <sup>4</sup> Laraychuna as solet ay maesarkan nan am-in ay tataku ya maammuwancha us nan tit-iwa maepangkep kan hiya. <sup>5</sup> Tay us-usa nan Apo Dios ya us-usa nan nuntotong-an nan tataku ya kan Apo Dios. Hiya hi Cristo Jesus ay nunfialin as tataku. <sup>6</sup> Inchatna nan achorna ta mawayawayaan nan am-in ay tataku. Naekaman na as nan ustу ay timpu ay pinilen Apo Dios, ya hiyachi nan kail-an nan layadna ay maesarkan koma nan am-in ay tataku. <sup>7</sup> Isunga piniliyak kan Jesus as usa ay apostolna ya mun-ekaskasaba ta uyku isuru as nan chiyuchaya Gentil nan tit-iwa ay maepangkep kan hiya ta omafurotcha. Chak ifiakiak nan tit-iwa. Achiyak cha munkutkutum.

<sup>8</sup> Laraychok ngarud ay nan lanaraki nan mangepanguru as kararagyu henan am-in ay maam-amongan nan chiyuchaya omaafurot kan Cristo, ngem masapor napudnucha kan Apo Dios, ya maid fungfungatcha winnu maid makisumsumaancha as nan mangetag-uyancha as limacha ay munkararag.\*

<sup>9</sup> Kun pay us nan fianafiai, laychok us koma ay munfiachucha as nan maifiakiay ay fiachu kan chicha, fiakun nan chiyuy kafiafiai. Achicha koma labsun ay mang-ar-arkos as fookcha as fialetok winnu perlas, ya achicha munfiachucha as nunkangina.† <sup>10</sup> Kuncha at koma ekaman nan anam-ammay, tay chatona nan ustу ay cha atuatan nan fianafiai ay mangali un nadiosan chi panagfiyagcha. <sup>11</sup> As nan chumngoran nan fianafiai as nan kalen Apo Dios, masapor kumikinakcha ay mun-achar, ya kuncha yangkiay epapanaaag nan cha maisursuru.‡ <sup>12</sup> Achech eparufus ay isuruwan ya etorayan nan

\* **1:20** 1 Co. 5:5

\* **2:8** Sal. 141:2; 143:6

† **2:9** 1 Ped. 3:3

‡ **2:11** 1 Co. 14:34-35

fianafiai nan lanaraki. Masapor kuncha kumikinak. <sup>13</sup> Tay hi Adan nan enmon-oná ay finayang Apo Dios, haat hi Eva. <sup>14</sup> Fiakun hi Adan nan naallilaw, ngem nan fiafiai ay asawana. Isunga nan fiafiai nan enmon-oná ay finmasor kan Apo Dios. <sup>§ 15</sup> Hiyana nan kiapúna ay mapalikiatan nan fianafiai ay omanak. Ngem maesarakancha challu mu iturturuycha ay omafurot kan Apo Dios, manglayayad as nan pachongcha ay taku, mangunud as nan nasantowan ay panagfiyag, ya naannadcha's nan chacha at-atun.

### 3

#### *Nan Chiyuycha Mangepangpanguru As Nan Chiyuycha Iglesia*

(1 Tim. 5:17-25; Tit. 1:5-9; 1 Ped. 5:1-4)

<sup>1</sup> Tit-iwa nan kanancha ay nan taku ay manglalayad ay munfialin as mangepangpanguru as nan iglesia at napateg ay chunu nan laraychuna. <sup>2</sup> Kiapú ta napateg chi ay chunu, masapor ay nan mangepangpanguru as nan iglesia at maid maepafiasor kan hiya. Masapor us us-usa nan asawana. Naonngan hiya ya maetporana nan laylaychun nan achorna. Masapor maichayaw chi ukialina. Masapor us ammunu ay munmangili ya naraing ay mun-isuru. <sup>3</sup> Achi futtang hiya ya achi omaabkor, ngem kun at naanos ya achi makisumsuma. Masapor achi naakum as siping. <sup>4</sup> Masapor us kafiaelana ay mangepanguru ay ustus as nan pamilyana, ya kafiaelana ay mangepaafurot as nan an-akna kan hiya. Masapor us rispituwuncha ay ustus hiya. <sup>5</sup> Tay mu achina ammu ay mangepanguru as nan mismu ay pamilyana, anan atuna ay mangepanguru as nan iglesian Apo Dios? <sup>6</sup> Masapor fiakun kaetaptapi as nan pammati, tay atun at mu pomangas, at hiyasa nan mangekeddengantu Apo Dios kan hiya ay machusa ay kaman as nan naekaman kan Satanas. <sup>7</sup> Masapor us rispituwun chi achi omaafurot hiya ta achi maifiafiaiñ ya achi makna as nan sil-ub\* Satanas.

#### *Nan Chiyuycha Fumadfiachang As Nan Iglesia*

<sup>8</sup> Nan chiyuycha us fumadfiachang as nan chiyuycha mangepangpanguru as nan iglesia at masapor maifilangcha as marispitu, ya achicha nangutum. Masapor achicha futtang, ya achicha naakum as siping. <sup>†</sup> <sup>9</sup> Masapor iturturuycha ay omafurot as nan kenatit-iwa ay maepangkep as nan pammati ay enpakaammon Apo Dios, ya nacharos us chi numnumcha. <sup>10</sup> Masapor mapachascha on-ona ta mu maid maanapan as maepafiasorancha at mafialincha ay munserfi as fumadfiachang. <sup>11</sup> Nan as-awacha<sup>‡</sup> us at masapor maifilangcha as marispitu. Masapor achicha omekek-akak-ali. Masapor maetporcha nan laylaychun nan achorcha, ya matalekcha as nan am-in ay atuncha. <sup>12</sup> Nan usa ay fumadfiachang at masapor kun usa nan asawana, ya kafiaelana us ay mangepanguru ay ustus as nan an-akna ya tapina pay ay membron nan pamilyana. <sup>13</sup> Nan chiyuycha fumadfiachang ay munserfi ay ustus at maarachantu nan rispiton nan iib-acha kan chicha, ya kaskasincha tururud ay mangepakaammu as nan maepangkep as nan pammaticha kan Cristo Jesus.

#### *Nan Kenatit-iwan Nan Pammati Takú*

---

§ **2:14** Gen. 3:6, 13; 2 Co. 11:3   \* **3:7** 2 Tim. 2:26   † **3:8** Rom. 16:1; Filp. 1:1   ‡ **3:11** Nan usa pay ay laychun tona ay kanan at nan fianafiai ay fumadfiachang as nan iglesia.

<sup>14</sup> Kunku pay cha isurat na, chak us challu namnamaun ay achi mafiayag at omaliyak kan he-a. <sup>15</sup> Ngem mu wachay mapas-iwak, nan nauy suratku nan mangifiakia kan he-a as nan ustу ay unuchun nan usa ay omaafurot as nan pamilyan Apo Dios. Nan laychok ay kanan at nan iglesian nan matataku ay Apo Dios ay hiyasa nan tukud ya pugnad nan kenatit-iwa ay maepangkep kan Cristo. <sup>16</sup> Maid mangesaot as nan kenaamud nan cha takу ab-afurotun ay maepangkep kan Cristo ay chaan naepakaammu ad pus-uy, ngem nauy nan enpakaammon Apo Dios ad wani:

Nunfialin hi Cristo as taku.

Penaneknekan nan Espiritu nan kenalintigna.

Inil-ilan nan anghelles hiya.

Naekaskasaba nan maepangkep kan hiya henan am-in ay nasyon,

at wachacha nan enmafurot asna's luta.

Haat maetag-uy hiya henan machaychayaw ay kawad-an Apo Dios.

## 4

### *Nan Achi Tit-iwa Ay Mun-isursuru*

<sup>1</sup> Narawag nan ifiagiakián nan Espiritu Apo Dios ay as tapen chi urkiw at wachacha nan mankug as nan pammaticha. Omafurotchantu as nan chiyucha omaallilaw ay anennet, at unuchuncha nan isursurucha. <sup>2</sup> Nan nauycha ay sursuru at murpu as nan pakamankaman ya nunkangutum ay tataku. Nan numnumcha at nachachael ay kaman naatongan as lanchok.

<sup>3</sup> Chatona nan tataku ay mangepawa as omasaw-an ya mangkakanan as tapen nan makan. Ngem finayang Apo Dios chaná ay makan ta awatun ya kanun nan chiyucha omaafurot ay nangammu as nan kenatit-iwa mu munyamancha on-oná kan hiya.\* <sup>4</sup> Tay am-in ay finayang Apo Dios at ammay, isunga maid maachi mu munyaman takу ay mang-awat.† <sup>5</sup> Tay mu atun takу sa, maifilangcha as ammay babaen as nan kallen Apo Dios ya kararag takу.

### *Nan Ammay Ay Fiabfiaarun Cristo Jesus*

<sup>6</sup> Mu isurom chaná ay filfilin as nan iib-a ay omaafurot, munfialinkantu as ammay ay munserserfi kan Cristo Jesus, ya cham us epaila ay naawatam nan kenatit-iwa ay maepangkep as nan pammati takу ya maepangkep as nan ammay ay sursuru ay inun-unudmu. <sup>7</sup> Achim cha chungchungrun nan chiyucha pinupus-uy ay es-estorya ay maid kotkotokcha ya achi nadiosan. Ngem kunmu at epaingsa ay mangunud as nan nadiosan ay panagfiyag. <sup>8</sup> Manuwat, tay wacha nan akéti ay kotok nan mangpakunukian as anchor, ngem kaskasin wadwacha nan kotok nan nadiosan ay panagfiyag, tay enkaren Apo Dios ay gun-gunaana chitaku fiakun yangkiay as nan fiyag ad wani ngem uray us as nan fiyag as tapen chi urkiw. <sup>9</sup> Tit-iwa na ay infiakiak, isunga libfengna ay maawat ya maafurot ay maid chuwachuwa. <sup>10</sup> Isunga epapati takу ay munserfi kan Apo Dios ay matataku in-inkiana, tay entalek takу nan namnama takу kan hiya ay mangesarakan as nan am-in ay tataku, kaskasin as nan chiyucha omaafurot kan hiya.

<sup>11</sup> Nan nauycha infiagiakiak kan he-a nan ifilimnu ya isurom kan chicha.

<sup>12</sup> Achim eparufus ay elayusan chaká kiapú as nan kenaongam. Ngem kunka at munfialin as munturachan chi omaafurot babaen as nan ukiale

\* <sup>4:3</sup> Gen. 1:29-30; 9:2-3; Mar. 7:19; Ara. 10:15      † <sup>4:4</sup> Gen. 1:31; Rom. 14:14; 1 Co. 10:25-26

ya kalem, layadmu, pammatem ya maid kenaruket as numnummu ya cham atuutun. <sup>13</sup> Iturturuymu ay mangifiasfisa as nan Kalen Apo Dios as nan sangwanan nan naamong ay omaafurot. Hiyana nan ekaskasabam ya isursurom inkiana omaliyak hesa. <sup>14</sup> Achim enganganuy nan inchat nan Espiritu Santo kan he-a ay kafaelam, ngem kunmu at osarun chasa. Nan nauycha kafaelam at naichatcha kan he-a as nan nangifiag-an nan chiyucha pomapadtu ay hiyasa nan kafaelam ya as nan nangepatayan nan chiyucha mangepangpanguru as limacha kan he-a. <sup>15</sup> Nunumnummu ya aasekasuwum chasa ta wachay mangil-an nan tataku ay cha matapiyan nan kafaelam. <sup>16</sup> Il-ilaum nan ukialel ya nan isursurom. Tay mu hiyasa nan epapasnekmu ay atun at fiakun yangkiay nan achormu nan esarakam ngem uray us nan chiyucha manmanngor kan he-a.

## 5

### *Nan Kalibfengan Nan Mangepangpanguru As Nan Iib-a Ay Omaafurot*

<sup>1</sup> Achim sengsengaran nan papangguruwam ay lanaraki, ngem kunmu at iyam-amma ay maketagtakiatfor kan chicha ay kaman chicha nan amam. Iflangmu nan chiyucha lanaraki ay en-enauchem as kaman iib-am ay lanaraki. <sup>2</sup> Iflangmu us nan chiyucha papangguruwam ay fiabfiafiai as kaman enam, ya nan chiyucha fiabfiafiai ay en-enauchem as kaman iib-am ay fianafiai ay maid kenaruket as numnummu ya as nan cham atuutun.

<sup>3</sup> Masapor us rispituwum ya fiadngam nan chiyucha ellakas ay maid mangaywan kan chicha. <sup>4</sup> Ngem mu wachay an-akcha winnu ap-ucha, masapor suruwun nan pamilyacha ay nan on-onauncha as nan munserserfiyan-cha kan Apo Dios át nan mangay-aywanancha as nan pamilyacha. Tay as nan mangekamanancha as sa at maafuscha nan en-enat nan chanakchakorcha ya ap-ucha kan chicha. Mu hiyasa nan atuncha, malaylaychan hi Apo Dios. <sup>5</sup> Nan ellakas ay maid paat mangaywan kan hiya at maid kasina namnamaun ay chumawatan as fiachang mu achi kan Apo Dios yangkiay. Isunga iturturuya ay munkarkararag ya chumawchawat as fiachangna as inurkiw ya lenafi. <sup>6</sup> Ngem nan ellakas ay kun yangkiay nan laylaychun chi achornay anapuna at kaman nanatuy uray mu natataku. <sup>7</sup> Ifilinmu chaná as nan chiyucha omaafurot ta maid maepafiasor kan chicha. <sup>8</sup> Tay mu wachay omaafurot ay achi mangfiachang as iib-ana, kaskasin nan mismu ay pamilyana at chinukkiana nan pammatina. Maiflang hiya as kaskaskasin mangisiw mu nan chiyucha achi omaafurot.

<sup>9</sup> As nan lestaan nan chiyucha ellakas, nan maelestá yangkiay ay mafidngan at nan chiyucha muntawwun as unum puru ya nasorok ay chaan kasis omas-asawa.\* <sup>10</sup> Masapor ammay chi kachamchamakiancha as nan am-in ay en-enatcha kaman kan chatona: Enaywanancha ay ustú nan an-akcha, nunmangmangilicha, napakumbabacha ay nunserserfi as nan tatakon Apo Dios, finadfiadngancha nan chiyucha maliglikiatan, ya inturuyucha ay nangekamkaman as kumpurmí ay ammay.

<sup>11</sup> Ngem achiyu etapi as nan lestaan nan chiyucha chaan pay narakay ay ellakas. Tay mu umchan nan layadcha ay kasis omasawa at enganuycha ay munserfi kan Cristo. <sup>12</sup> Mu hiyasa nan atuncha, makafiasorchá, tay chaancha tenongpar nan enmon-oná ay enkaricha kan Cristo. <sup>13</sup> Nan usa us at epaingsachay kenapadsok, ya itukiachay likud as kaafoafong. Fiakuncha

\* 5:9 Rom. 16:1

pay yangkiay napadsok, ngem itukiacha ay mangapaapat as maepangkep as tapina ay tataku, ya makififiyangcha as cha at-atun chi iib-acha.<sup>14</sup> Isunga laychok ay kun at omasawa nan chiyuycha ellakas ay chaan pay narakay ta omanakcha ya asekasuwuncha nan pamiliyacha ta maid atun nan chiyuycha kafusor takú ay mangsot kan chitaku ay omaafurot.<sup>15</sup> Nan mangifiag-ak as na at kiapú ta wachacha nan tapina ay ellakas ay chakus nankug kan Cristo, at immunudcha kan Satanas.<sup>16</sup> Mu wachay omaafurot ay fiafiai ay nakin ib-a as nan chiyuycha ellakas, hiya nan mangaywan kan chícha ta achi mapalikiatan nan iglesia ta wachay atun tona ay iglesia ay mangfiachang as nan tapina ay ellakas ay maid paat mangaywan kan chicha.

<sup>17</sup> Nan chiyuycha mange pangpanguru ay mangenonongnong ay ustу as chunucha at maifilangcha ay maichayaw ya masapor malagfuwancha ay ustу, kaskasin nan chiyuycha mange papasnek ay mange kasaba ya mangisuru as nan Kalen Apo Dios.<sup>18</sup> Tay wacha nan naisurat as nan Kalen Apo Dios ay kanana,

"Achim fufuchan nan tapak nan fiaka as nan chana mangikiatkiatinan ay mang-elek as pakuy ta wachay atuna ay mangan."<sup>†</sup>

Kanana us, "Nan munlagfu at libfengna ay malagfuwan."<sup>‡</sup>

<sup>19</sup> Mu wachay taku ay mange pafiasor as nan mange pangpanguru, achim afurotun hiya mu maid paat chuwa winnu turu ay tistigu.<sup>20</sup> Kun pay nan chiyuycha finmasor ya achi munfiafiawi, sengaram chicha as nan kaongoran nan omaafurot ta umugyatcha us nan tapina ay mangunud kan hiya.<sup>§</sup>

<sup>21</sup> Ifilinku kan he-a as nan sangwanan Apo Dios ya Cristo Jesus ya as nan sangwanan nan nasantowan ay angheles ay tongparum chaná ay filfilin ay mapapchong nan am-in ay atum as nan uray ngachana ay taku. O, maid pasis-iyaum.<sup>22</sup> Achika munkiakianat ay pumili as munfialin as mange pangpanguru as nan chiyuycha omaafurot. Achika maketaptapi as nan fiasor chi tukún. Il-ilaum ta nacharos nan panagfiayagmu.\*

<sup>23</sup> Fiakun yangkiay chanum nan cham ig-ikopun, ngem umikopka as hen-anak-et ay fiayas ta akiasana nan saket nan putom ya tapina pay ay kankanayon ay putputukum.

<sup>24</sup> Wachacha nan tapina ay tataku ay naraka ay maila nan finmasorancha, ya ammu takú ay machusachantu. Ngem as nan tapina at maila yangkiay as kasin.<sup>25</sup> Kaman us as nan anam-ammay ay cha at-atun chi taku at naraka ay maila, ngem as nan tapina at achi, ngem mailantu challu as kasin.

## 6

<sup>1</sup> Nan am-in ay mafiabfiaor ay omaafurot at masapor rispituwuncha ay ustу nan amocha as nan am-in ay atuncha ta maid kas-otan Apo Dios ya nan sursuru takú.<sup>2</sup> Nan chiyuycha mafiabfiaor ay omaafurot ay nakin amo as omaafurot at masapor achicha elalayusan chicha kiapú ta ib-acha chicha ay omaafurot. Kuncha at kaskasin paammayun koma nan atuncha ay munserfi kan chicha, tay nan chiyuycha amocha ay mang-awat as nan fiachangcha at ib-acha chicha ay omaafurot ay laylaychuncha. Chatona nan masapor ay isurom ya itukunmu as nan omaafurot hesa.

*Nan Achi Tit-iwa Ay Sursuru Ya Nan Munlayad Ay Fumaknang*

---

† **5:18** Deut. 25:4; 1 Co. 9:9   ‡ **5:18** Mat. 10:10; Luc. 10:7   § **5:20** Mat. 18:15-20   \* **5:22** 1 Tim. 4:14; 2 Tim. 1:6; Ara. 6:6; 13:3

<sup>3</sup> Mu wachay taku ay mangisuru as tukún ay achi maiyunud as nan ustus ay insursuron Apo takú ay Jesu Cristo ya achi maiyunud as nan maepangkep as nan nadiosan ay panagfiyag <sup>4</sup> at napangas ya maid ammunas. Kuna laychun yangkiay ay cha makesongsongfiat ya makisumsumas as maepangkep as nan laychun ay kanan nan kali ay munlumu as apos, munsosongfiatan, omekak-aliyan ya mangotettet ay sospetcha, <sup>5</sup> ya kanayon ay sossosek as nan tataku ay nachachael chi numnumcha. Maid ammucha as nan kenatitiwa ay maisursuru. Ka-anancha un fumaknangcha mu nadiosan nan panagfiyacha.

<sup>6</sup> Tit-iwa met ay ongor nan maaran nan taku ay nadiosan chi panagfiyagna mu mapnek hiya as nan wacha kan hiya. <sup>7</sup> Tay as nan naiyankan takú asna's luta at maid uy takú inyali, ya mu matuy takú, maid us uy takú etakin.\*

<sup>8</sup> Isunga mu wachay ommat as kanun ya fiachu takú, mapnek takú koma.†

<sup>9</sup> Ngem nan chiyuuya munlayad ay fumaknang at narakacha ay iyafud chi sulisug ay kamancha nakna as nan kenamaid am-ammu ya chumachael ay laylaychun. Chatosa nan mangiyuy kan chicha as nan chusa ay maid patingkiana. <sup>10</sup> Tay nan layad as siping yangkiay at hiyasa nan kurpuwan chi am-in ay kenamangotettet. Kiapúta ongor chi layadcha as siping, wachacha nan tapina ay nankug as pammaticha. Nan nunfianakian tosa ay enatcha at ongor chi ngunguyuscha.

### Nan Anongos Ay Tukun Pablo

<sup>11</sup> Ngem he-a Timoteo ay usa ay munserserfi kan Apo Dios, achim atan chasa am-in. Kunmu at epapati ay mangekaman as nan kenalintig ya nadiosan ay panagfiyag. Iturturuymu ay omafurot kan Apo Dios. Laylaychum hi Apo Dios ya nan iib-am. Eta-unmu nan likiatmu, ya anosam nan iib-am. <sup>12</sup> Epapasnekmu nan kafiaelam ay mangafurot kan Apo Jesus ay kaman as nan cha makeab-abfiak ay mangepapasnek ay tomagttag ta mangafiak. Maepachongka kan tona ya kokompotka as nan fiyag ay maid patingkiana. Tay hiyana nan kiapúna ay enayakian chaká kan Apo Dios as nan nangifiag-am as pammatem as nan sangwanan nan ongor ay tataku.

<sup>13</sup> As nan sangwanan Apo Dios ay umid-ichat as fiyag chi ka-ichin ya as nan sangwanan Cristo Jesus ay nangepaneknek as nan kenatitiwa kan Poncio Pilato, ifilinku na kan he-a: <sup>14</sup> Masapor afurotum nan am-in ay naifilfilin kan he-a ya ilaum ta achi makaskaslangan sa as achi tit-iwa ya maid kasotana inkiana as nan urkiw ay munfiangchan Apo takú ay Jesu Cristo.

<sup>15</sup> Munfiangadtu hi Apo Jesus as nan ustus ay urkiw ay pinilin Apo Dios. Hi Apo Dios nan machaychayaw ya hiya yangkiay nan Mangetoray as nan am-in. Hiya nan Aren chi kaari-ari ya Ap-apon chi kaap-aap-apu. <sup>16</sup> Hiya yangkiay nan achi matmatuy. Nan kawad-ana at achi maflalin ay sag-unun, tay sumili as solet. Maid taku ay nangila kan hiya, ya kun challu maid makaila kan hiya. Sapay koma ta maichayaw hiya ya muntoray in-inkiana!

Amen.‡

<sup>17</sup> Filinum nan nunkafiaknang asna's luta ta achicha munpangpangas. Ifilinmu us ta fiakun nan kenafiaknang ay naraka ay malitaw nan uycha nanamnamaun, ngem kun at hi Apo Dios ay maid ek-ekotna ay mangid-ichat kan chitaku as am-in ay mangepalaylayad kan chitaku. <sup>18</sup> Ifilinmu pay kan chicha ta nan ammay yangkiay nan atuncha as nan iib-acha ta

\* **6:7** Job 1:21; Ecl. 5:15

† **6:8** Prov. 30:7-9; Mat. 6:25-33; Luc. 12:22-31

‡ **6:16** Sal. 104:2; 1 Jn.

fumaknangcha as anam-ammay ay cha atuatun. Achicha koma iyekot nan kenafiaknangcha, ngem ifingaycha as nan iib-acha.<sup>§ 19</sup> As nan mangeka-manancha's sa, chacha amongun nan tit-iwa ay kenafiaknang ad chaya ay munfialin as kaman kunug ay pugnadcha as kasin ta kokompotcha as nan tit-iwa ay fiyag ay maid patingkiana.

<sup>20</sup> Timoteo, masapor aywanam nan naetalek kan he-a. Achawwiym nan achi nadiosan ay ap-apat ya nan fiakun tit-iwa ay sososek ay kanancha un kenasilib, <sup>21</sup> tay wachacha nan tapina ay tataku ay nangali un wacha chi ay kenasilib kan chicha. Kiapú as na, natingiwcha, isunga enmachawwicha as nan pammaticha.

Sapay koma ta mawawacha kan chakayu am-in nan grasyan Apo takú ay Jesu Cristo.

## Nan Maekadwa Ay Surat Pablo Kan Timoteo Nan Omona Ay Ammuwun

Nan nauy ay surat Pablo at hiyana nan maekadwa ay suratna kan Timoteo. Insuratna na as nan naifiafiaruchana ad Roma kiapú as nan pammatina kan Apo Jesu Cristo (1:16-17; 2:9). Kun pay hi Timoteo, nayaschi ad Efeso ay cha mun-is-isuru ya mun-ekaskasaba as nan chiyuycha omaafurot hid-i.

As nan nauy ay surat, tinukun Pablo hi Timoteo ta atuna nan hanacha chunu ay naichat kan hiya uray wachachay mangepalikiat ya mangontra kan hiya. Tay nan namnamaun Pablo at epapasnek Timoteo ay mangekasaba ya mangisuru as nan maepangkep as nan kalen Apo Dios. Tinukuna us hiya ay achi maketaptapi as nan chiyuycha maid kotkotkna ay ap-apat, ngem kuna at epapasnek ay mangiturturuy ay mangunud as nan tit-iwa ay sursuru ay nurpu kan Apo Dios.

Kiapú ta ammon Pablo ay achi mafiyag at patayuncha hiya (4:6), chinawatna kan Timoteo ay omali ad Roma ay mangfisita kan hiya (4:9, 21).

Nan kaamuchan ay laychun Pablo ay epakaammu kan Timoteo at hiyana: "Ngem kun pay he-a, masapor etatalengaam ay mangaywan as nan pammatem ta achika maar-allilaw" (2 Tim. 4:5).

### **Nan Nakudkudwaan Nan Nauy Surat**

Nan Laplapon Nan Surat 1:1-2

Nan Panangepapigsa As Pammati 1:3-2:13

Nan Tukun Ya Nan Naifilin Ay Ekaman 2:14-4:5

Nan Kasasaad Pablo 4:6-18

Nan Anongos Nan Surat 4:19-22

### *Nan Laplapon Nan Surat*

<sup>1</sup> Ha-un hi Pablo ay usa ay apostol Cristo Jesus, tay hiyana nan enkeddeng Apo Dios. Naifiaorak ta uyku ekasaba nan fiyag ayenkaren Apo Dios kan chitaku ay omaafurot kan Cristo Jesus.

<sup>2</sup> Nauy kasing suratku kan he-a, Timoteo ay ifilangku as anakku ay laylaychok. Sapay koma ta mawawacha kan he-a nan grasya, sug-ang ya talna ay nurpu kan Apo Dios ay Ama takú ya kan Cristo Jesus ay Apo takú.

### *Nunyaman Hi Pablo Kiapú As Nan Pammatten Timoteo*

<sup>3</sup> Munyamanak kan Apo Dios ay chak munserserfiyan as nan nacharos ay numnumku ay kaman as nan nunserfiyan nan kaap-uwak ad pusuy. O, kunak kay munkarkararag as inurkiw ya lenafi, numnumok us ay mangekararag kan chakayu, ya kanayonak ay munyaman kan Apo Dios kiapú kan he-a. <sup>4</sup> Mailiwak as solet kan he-a, kaskasin as nan mangnumnumnumak as nan chiyuycha luwam as nan nunsiananta, isunga laraychok ay mangila kasing kan he-a ta maragsakanak. <sup>5</sup> Ninumnumku us nan tit-iwa ay pammatem ay kaman us challu as nan pammatten lolam ay Loida ya hi enam ay Eunice. Ammok ay assesa us nan wacha kan he-a ad wani.\* <sup>6</sup> Isunga epanumnumku kan he-a ay iturturuymu ay mangepapigsa as nan inchat Apo Dios ay kafaelam as nan nangepatayak as nan limak ay nangekararag kan he-a.† <sup>7</sup> Tay chaan inchat Apo Dios kan chitaku nan

\* <sup>1:5</sup> Ara. 16:1    † <sup>1:6</sup> 1 Tim. 4:14

espiritu ay omepaugyat, ngem kun at espiritu ay umichat as kafaelan takú ay munserfi kan Apo Dios, layad takú as nan iib-a takú ya mangetporan takú as nan laylaychun nan anchor takú.

<sup>8</sup> Isunga achika munfiabfaian ay mangepaneknek as nan maepangkep as nan Apo takú. Achika us munfiabfaian kiapú kan ha-un ay naifiafiarud kiapú as nan munserserfiyak kan hiya. Ngem kunka at makiliwas kan ha-un kiapú as nan mangekaskasabaan takú as nan Ammay ay Chamag, tay ichat Apo Dios chi pigsa takú ay manganos as nan hana ay liwas. <sup>9</sup> Ensarakana ya enayakiana chitaku tá chitaku nan nasantowan ay tatakuna. Nan nangekamanana's chi at fiakun kiapú as nan ammay ay enkaman takú, ngem kiapú as nan mismu ay pangkepna<sup>‡</sup> ya grasyana kan chitaku. Inchatnan nauy ay grasya babaen kan Cristo Jesus sakbay mafiayang nan luta. <sup>10</sup> Ngem ad wani, empailana sa ay grasya babaen as nan enmaliyan Cristo Jesus asna's luta ay mangesarakan kan chitaku. Kenaana nan pannakafialin nan utúy, ya empakaammuna as nan tataku nan fiyag ay maid patingkiana mu afurotuncha nan nauy Ammay ay Chamag.

<sup>11</sup> Chinutokanak kan Apo Dios as apostolna ta uuku ekasaba ya isuru nan nauy Ammay ay Chamag. <sup>12</sup> Hiyana nan kiapón nan chak muniliwliwasan. Ngem achek ekafiai na, tay ammok nan tenalekku, ya achiyak us munchuwachuwa ay kafaelan Apo Dios ay mangaywan as nan entalekna kan ha-un<sup>§</sup> inkiana as nan umchanan nan urkiw ay omaliyan Apo Jesus. <sup>13</sup> Mu mun-isuruka, unuchum nan tit-iwa ay insursurok kan he-a, ya iturturuymu us ay mangepaila as nan pammati ya layad ay wacha kan chitaku ay emafurot kan Cristo Jesus.\* <sup>14</sup> Babaen as nan fiachang nan Espiritu Santo ay mawawacha kan chitaku, aywanam nan napateg ay sursuru ay entalek Apo Dios kan he-a ta achi mafiarfialiwan.

<sup>15</sup> Ammom met ay inyangkiayanak as nan am-in ay omaafurot ad Asia, ya naetapi cha Figelo kan Hermogenes. <sup>16</sup> Kun pay nan pamilyan Onesiforo, sapay koma ta sug-angan nan Apo chicha, tay namen ongor ay penalagsakak kan hiya. Chaana enkafiai nan naifiafiaruchak, <sup>17</sup> ngem kun at as nan inumchananad Roma, makakud hiya ay manganap kan ha-un inkiana ininchananak. <sup>18</sup> Ammom ay ustus nan am-in ay en-enatna ay nunserfi kan ha-un ad Efeso. Sapay koma ta sug-angan Apo Dios hiya as nan urkiw ay mangokomána as nan tataku.

## 2

### Nan Matalek Ay Munserfi Kan Cristo

<sup>1</sup> Kun pay he-a ay anakku, masapor papigsaum nan pammatem babaen as nan grasyan Apo Dios ay naichat kan chitaku ay nakius-usa kan Cristo Jesus. <sup>2</sup> Nan am-in ay chinngormu kan ha-un ay insursurok kan he-a as nan sangwanan nan ongor ay tataku at isurom us chaná as nan tataku ay matalek ta chicha us nan mangisuru as nan tapina.

<sup>3</sup> Makiliwaska kan ha-un ay kaman as nan cha iliwiwas challu nan chiyucha omaafurot kan Cristo Jesus ay kaman as nan atun nan matalek ay sorchachu. <sup>4</sup> Nan cha munchunchunu ay sorchachu at achi maetapi as nan cha at-atun nan fiakun sorchachu, tay nan laychuna at palaylayachuna nan ap-apuna. <sup>5</sup> Numnumunyu na: Nan taku ay makeab-abfiak as tennagtakian

<sup>‡</sup> **1:9** 1 Ped. 1:4-5    <sup>§</sup> **1:12** Nan usa pay ay laychun tona ay kanan at “entalekku kan hiya.”    \* **1:13**  
1 Tim. 1:14

at maid maichat kan hiya as gun-guna sukúdná tongparun ay ustú nan lintig tud-i ay ay-ayam. <sup>6</sup> Nauy pay nan usa: Nan makakud ay munsamor at masapor hiya nan omon-ona ay mangara as nan kudwana as nan naani. <sup>7</sup> Numnumnumum ay ustú nan nauycha ay infiakiak, tay fiadngan chaká kan Apo Jesus ta maawatam am-in.

<sup>8</sup> Achim liqliw-an nan Ammay ay Chamag ay chak ekaskasaba ay tenakon Apo Dios hi Jesu Cristo manipud as nan utý ay kianak David. <sup>9</sup> Kiapú as nan mangekaskasabaak as nan nauy Ammay ay Chamag, parpalíwasanak ya korkor-onganak ay kaman lomalabsing as lintig. Ngem uray, tay achi mafialin ay makor-ongan nan kelen Apo Dios. <sup>10</sup> Isunga eta-unku nan am-in ay likiatku para as nan chiyuycha pinilen Apo Dios ay tatakuna ta maesarakancha us koma babaen kan Cristo Jesus ya mawawacha kan chicha nan am-ammay ay fiyag ay maid patingkiana. <sup>11</sup> Tit-iwa na ay sursuru ay kanana,  
“Mu maetapi takú ay matuy kan Cristo, maetapi takuntu us kan hiya ay mataku ad chaya.”\*

<sup>12</sup> Mu et-aun takú nan likiat, maketoray takuntu kan hiya.  
Mu esaot takú hiya, esaotnantu us chitaku.†

<sup>13</sup> Mu achi takú mapiyar kan hiya, matalék challu hiya, tay achi mafialin ay munkutkutum.”‡

#### *Nan Chiyuycha Ukielen Nan Munserserfi Kan Apo Dios*

<sup>14</sup> Kanayonmu ay epanumnum nan nauy as nan iib-am ay omaafurot, ya filinum chicha as nan sangwanan Apo Dios ay achicha makisumsumma maepangkep as nan laychun ay kanan nan chiyuycha kali. Maid kotkotok tosa, ya kuna lawá chachaelun nan pammatten nan chiyuycha chuchumngor.§ <sup>15</sup> Kun pay he-a, epapatem nan kafielam ay mangekaman as nan mangepalaylayad kan Apo Dios, ya isurom ay ustú nan kelen Apo Dios. Tay mu hiyasa nan atum, achika poros mafainan. <sup>16</sup> Achika makeapat as nan tatakua as maepangkep as maid kotkotokna kan Apo Dios, tay kuna lawá epaachawwi nan tatakua as nan laychun Apo Dios. <sup>17</sup> Maepachong nan achi tit-iwa ay sursurucha as nan saket ay kanser ay munwaras ya chachaeluna nan intiru ay achor. Nan chuwa as nan nauycha mun-is-isuru as achi tit-iwa at cha Himeneo kan Fileto. <sup>18</sup> Sinmiyancha as nan tit-iwa ay sursuru, tay chacha kankanan un narpas at nan matakuwan nan natuy manipud as nan utý. Isunga chacha lillifokun nan tapen nan omaafurot ta chukkiancha nan pammaticha.\* <sup>19</sup> Ngem achi challu masokatan nan tit-iwa ay kelen Apo Dios, tay kaman as nan chupras ay achi mapsak. Wacha nan naisurat hena ay kanana, “Ammon Apo Dios nan chiyuycha tatakuna,” ya kanana us, “Nan mangali un omafurot as nan Apo at masapor chukkiana nan chiyuycha achi nalintig.”†

<sup>20</sup> As nan afong nan fiaknang, ongor chi tukutukún ay wacha hid-i ay maosar ay fiakun yangkiay naamma as fialetok ya silver, ngem naamma us as kaiw ya luta. Nafiaror as solet nan kaosaran nan tapina, ya achi nafiaror nan kaosaran nan tapina. <sup>21</sup> Hiyana nan maepadpachongana kan chitaku. Mu chukkian nan tákua nan am-in ay mangotettet, maosar hiya as nan napateg ay kaosarana, tay napasanto hiya ya os-osarun nan Apo. Angkiay ya nakasakiana hiya ay mangekaman as am-in ay ammay. <sup>22</sup> Isunga

\* <sup>2:11</sup> Rom. 6:3-5, 8   † <sup>2:12</sup> Mat. 10:33   ‡ <sup>2:13</sup> Rom. 3:3-4   § <sup>2:14</sup> 1 Tim. 6:4   \* <sup>2:18</sup> 1 Co.

15   † <sup>2:19</sup> Sal. 34.14; Prov. 3.7

chukkiam ngarud nan mun-ongosán chi fiafiallu, ya epapatem ay mangekaman as nalintig, mangepapigsa as nan pammatem ya manglaylayad as nan iib-am ay omaafurot. O, makekappiaka as nan chiyuycha nacharos chi numnumcha ay muncaychayaw kan Apo Jesus.<sup>†</sup> <sup>23</sup> Kasek ifilin na kan he-a ay achika makeap-apat as nan maepangkep as maid kotkotokna ya maid maifiachangna as nan tit-iwa ay pammati, tay ammom met ay munlumu chasa as masusumaan.<sup>§</sup> <sup>24</sup> Tay nan fiabfiaarun Apo Dios at masapor achi makisumsuma, ngem kuna at atun chi ammay as nan am-in ay tataku. Masapor us naraing ya naanos ay mun-isuru, <sup>25</sup> ya naanos ay mangtukun as nan chiyuycha komontra kan hiya ta urum ya fiadngan Apo Dios chicha ta munfiafiawicha ya maammuwanca nan kenatit-iwa. <sup>26</sup> Mu hiyasa nan om-mat, munfiangadchantu as nan ustu ay numnumcha, ya makalufuschua as nan sil-ub\* Satanas ay nanisil-ub kan chicha ta unuchuncha nan laychuna.

### 3

#### *Nan Atun Nan Taku Mu Umchan Nan Chiyuycha Anongos Ay Urkiw*

<sup>1</sup> Masapor maawatam na. As nan chiyuycha anongos ay urkiw, omalintu nan timpon chi likiat. <sup>2</sup> Tay nan ukialen nan tataku at nan achorcha yangkiay nan laylaychuncha, ya naakumcha as siping. Kaskasincha napangas, napasis-iya ya umiinsurtu. Achichantu afurotun nan chanakchakorcha. Achichantu ammu ay munyaman, ya achicha epateg nan nasantowan. <sup>3</sup> Maidtu layadcha as nan pachongcha ay taku, ya maid poros ammucha ay pomakawan. Omekak-alichantu as nan pachongcha ay taku, achichantu maetporan nan laylaychun chi achorcha, songelchantu ya iienglunchantu nan ammay. <sup>4</sup> Esepsepcantu nan mangekamkaman as ammay. Dara-suduscha ya pararu ay napangascha. Nan laylaychuncha at nan mangepala-gragsak as achorcha, fiakun hi Apo Dios. <sup>5</sup> Epailacha ay relihiyosocha, ngem achicha figfikun nan ustu ay kafaelan Apo Dios ay mamarfialiw as nan mangotettet ay ukialicha. Achika makekadkadwa as nan assesesa ay tataku.\* <sup>6</sup> Tay nan tapina kan chatosa at epapeletcha ay sungkop as nan ab-afong babaen as nan kenasikapcha ay makilidid-iwa as nan fianafiai ay naraka ay maawis ay chumngor as nan isursurucha. Nan nauycha ay fianafiai at chicha nan nalilifok chi numnumcha kiapú as nan ongor ay fiasfi-asorcha. Chicha nan nangun-unud as nan am-in ay mun-ongosán nan achor. <sup>7</sup> Chicha us nan cha munsurusuru, ngem achicha poros maammuwan nan tit-iwa ay sursuru. <sup>8</sup> Nan hanacha ay tataku at kamancha kan cha Janes kan Jambres ay nangkontra kan Moises ad pus-uy, tay kontrauchantu us nan kenatit-iwa. Mangotettet chi panagnumnumnumcha, ya kinukutum chi pammaticha.<sup>†</sup> <sup>9</sup> Ngem achi mafiyag at mailan nan am-in ay tataku nan kenangokngok chatosa ay kaman as nan enommat kan cha Janes kan Jambres.

#### *Nan Anongos Ay Filin Pablo*

<sup>10</sup> Ngem he-a, ammom nan isursurok, nan panagfiyagku ya nan pangkepku as nan nauy ay fiyagku. Ammom nan pammatek, nan kenaanosku, nan layadku ya nan kenamanang-eta-unku. <sup>11</sup> Ammom met us nan naparpalikiatanaya nan nun-iliwlwasak ay kaman as nan enom-mat kan ha-un ad Antioquia, ad Iconio ya ad Listra. Ngem ensarakanak

<sup>‡</sup> **2:22** 1 Tim. 6:11    <sup>§</sup> **2:23** 1 Tim. 1:4; 7:4; 7:6; 4:20    \* **2:26** 1 Tim. 3:7    \* **3:5** Rom. 1:18-32;  
Tit. 1:16    † **3:8** Exo. 7:11, 22; 9:11

kan Apo Dios as nan am-in ay likiatku.<sup>‡</sup> **12** Tit-iwa ay mapalikiatan nan am-in ay munlayad ay matakú as nan nadiosan ay panagfiyag kiapú as nan pammaticha kan Cristo Jesus.<sup>§</sup> **13** Kun pay nan manangotettet chi ukialicha ya omaallilaw ay tataku at kaskasin momangmangotettet chi ukialicha. Chacha omar-allilaw ya chacha us maar-allilaw. **14** Ngem kun pay he-a, iturturuymu ay mangafurot as nan enad-acharmu ya nan ammom ay tit-iwa, tay ammom met nan katatakon nan chiyuycha nangisursuru kan he-a. **15** Nunlapu us as nan kaongam, naisursuwanka as nan naisurat as nan Kalen Apo Dios ay hiya nan nangetoróng kan he-a ay mangammu as nan kaesarakanan babaen as nan pammati kan Cristo Jesus. **16** Am-in ay enpaisurat Apo Dios at hiya mismu nan nakin numnum ya nafiaror nan kaosarana. Isuruna nan kenatit-iwa kan chitaku, sengarana chitaku ta ikinak takú ay fumasfiasor, palintikuna chitaku as nan kenomsawan takú, ya isuruna chitaku ay mangunud as nan nalintig ay panagfiyag **17** ta maid munkurangan takú ay munserfi kan Apo Dios, ya nakasakiana takú ay mangekaman as nan am-in ay ammay.

## 4

**1** As nan mangiilan Apo Dios ya hi Cristo Jesus ay mangokómtu as nan am-in ay matataku ya nunkatuy, ya kiapú as nan omaliyana ay muntoray, iflinku na kan he-a: **2** Ekasabam nan kalen Apo Dios. O, munsasakianaka ay mangekasaba uray mu hiyasa nan ustu ay timpu winnu fiakun. Epakaam-mom kan chicha mu wachay kenomsawancha, ya sengaram chicha ta ikinakcha ay fumasfiasor. Papigsaum us nan numnumcha ay mangekaman as ammay. Naanoska ay mangisuru kan chicha. **3** Tay umchan nan timpu ay achi chumngor nan tataku as nan tit-iwa ay sursuru, ngem kuncha at unuchun nan laylaychun nan achorcha, ya anapuncha nan chiyuycha mun-isursuru as nan laylaychuncha ay chungchungrun. **4** Achichantu laychun ay chungrun nan maepangkep as nan kenatit-iwa, ngem kun at nan maepangkep as nan pinupus-uy ay es-estorya.\* **5** Ngem kun pay he-a, masapor etatalengaam ay mangaywan as nan pammatem ta achika maar-allilaw. Eta-unmuy likiat. Iturturuymu ay mangekaskasaba as nan Ammay ay Chamag ya atum nan am-in ay entalek Apo Dios kan he-a.

**6** Tay ha-un at inumchan nan timpu ay manaynanak as nan nauy ay fiyag. Kamanak as nan fiayas ay maikuyag ay maetapi as nan maichaton kan Apo Dios. **7** Epachongku us nan nunserserifiyak kan Apo Dios as nan ab-abfiak ay tennagtakian. Enpapasnekku, at inumchanak as nan linya ay munpatingkiaan. Enpapasnekku us ay nangunud as nan enafurot takú ay maepangkep kan Cristo. **8** Isunga naiyiis-ud kan ha-un nan gun-guna ay ichat nan Apo as nan chiyuycha nalintig chi panagfiyagcha. O, gun-gunaanak as nan Apo as nan urkiw ay mangokomána as nan katakutaku ya fiakun ha-un yangkiay nan gun-gunaana ngem uray us nan am-in ay manglarayad ay maman-ud as nan munpail-ana.

### *Nan Laychun Pablo Ay Atun Timoteo*

**9** Epapatem nan kafaelam ta kamuwum ay omali kan ha-un, **10** tay tenay-nanak kan Demas ay inmuy ad Tesalonica kiapú ta nan fiyag asna's luta nan laylaychuna. Inmuy hi Cresente ad Galacia, ya hi Tito ad Dalmacia.<sup>†</sup>

---

<sup>‡</sup> **3:11** Ara. 13:14-14:20    <sup>§</sup> **3:12** Mat. 5:10-12; San. 1:2-4; 1 Ped. 2:20-21    \* **4:4** 1 Tim. 1:6; 6:20-21;  
2 Tim. 2:18    † **4:10** Col. 4:14; Film. 1:24

**11** Kun yangkiay hi Lucas nan kadwak hena. As nan omaliyam, chag-osum hi Marcos, tay makafiachang hiya kan ha-un as nan chunok.<sup>‡</sup> **12** Kun pay hi Tikico, infiaorku hiya ad Efeso.<sup>§</sup> **13** Chag-osum us nan kakiayku ay infiatek kan Carpo ad Troas. Etapem us nan chiyuycha liblok, kaskasin nan chiyuycha nalolopelop ay larat ay nasurasuratan.

**14** Hi Alejandro<sup>\*</sup> ay munfusfusór at ongor chi en-enatna as mangotettet kan ha-un. Kun kikiad hi Apo Dios as manusa kan hiya ay maiyunud as nan chiyuycha en-enatna.<sup>†</sup> **15** Isunga il-ilaum us hiya, tay pararuy atuna ay mangontra as nan cha takú isursuru.

**16** As nan enmon-oná ay nangfistikiarancha kan ha-un, maid poros usa as nangekalintikian kan ha-un. Tenmaynancha am-in. Sapay koma ta achi ifilang Apo Dios chachi as fiasfisorcha. **17** Ngem finadngananak kan Apo Jesus ya penapigsaak, isunga kenafaelak ay nangekasaba as nan am-in ay maepangkep kan hiya ta chungrun nan am-in ay Gentil. Isunga enlayawak nan tataku ay mangpatuy kan ha-un.<sup>‡</sup> **18** Nan Apo at esarakakanaku as nan am-in ay kenamangotettet inkiana araunak kan hiya henan muntotorayana ad chaya. Machaychayaw koma hiya in-inkiana! Amen.

#### *Nan Anongos Ay Pakomostan Pablo*

**19** Pakomostaum cha Priscila kan Akila ya cha Onesiforo ay hinfiaruy. **20** Hi Erasto at nafiati ad Corinto. Infiatek hi Trofimo ad Mileto, tay nunsaket hiya.<sup>§</sup> **21** Epapatem man paat nan kafaelam ta makaalika hena sakbay chuminamuy.

Komostaka kanu, kanan cha Eubulo, Pudente, Lino ya hi Claudia ya am-in nan omaafurot ay wacha hena.

**22** Sapay koma ta nan Apo at mawawacha kan he-a. Sapay koma ta mawawacha kan chakayu nan grasya.

---

<sup>‡</sup> **4:11** Ara. 12:12, 25; Col. 4:10; Film. 1:24    <sup>§</sup> **4:12** Efe. 6:14-25; Col. 4:7-8; Tit. 3:12    <sup>\*</sup> **4:14** 1 Tim. 1:20    <sup>†</sup> **4:14** Sal. 28:4; 62:12; Prov. 24:12; Rom. 2:6    <sup>‡</sup> **4:17** Sal. 7:1-2; 22:21; 35:17. Nan naisurat as nan kali ay Griego at “naesarakakanak as nan mangiangtan nan layon kan ha-un.”    <sup>§</sup> **4:20** Ara. 19:22; 20:4; 21:29; Rom. 16:23

## Nan Surat Pablo Kan Tito Nan Omona Ay Ammuwun

Nan nauy ay surat Pablo at para kan Tito. Hi Tito at fiakun Judio ay enmafurot kan Cristo kiapú ta insursuruwan Pablo hiya (1:4). Hi Tito at matalek ya makakud ay namadfiachang kan Pablo as nan chununa. Kenadwaana cha Pablo kan Bernabe as nan nakimitinancha ad Jerusalem (Gal. 2:1). Liniwliwan us Tito hi Pablo as nan kawad-an Pablo ad Macedonia (2 Co. 7:5-7). Hiya us nan finaor Pablo ad Corinto ay mangenongnong as nan siping ay enamongcha para as nan chiyucha makasapor ay omaafurot ad Jerusalem (2 Co. 8:6, 16-24). Nan usa pay at kenadwaana hi Pablo ay inmuy ad Creta ay luta ay liniliwus chi fiayfiay ta fiadngana hi Pablo ay mangekasaba as nan Ammay ay Chamag hid-i. Angkiay ya inflaten Pablo hi Tito ad Creta ta iturunya ay mangisursuru as nan chiyucha omaafurot hid-i.

Nunsurat hi Pablo kan Tito ta ifilina kan hiya nan masapor ay atuna ya isuruna as nan iglesia ad Creta. Nan usa pay as nunsuratan Pablo at ta chumutok hi Tito as mangepangpanguru as nan chiyucha iglesia henan tunggal ili hid-i (1:5). Tay as nan hana ay timpu at ongorcha nan omaafurot hid-i, ngem nalilifokcha kiapú ta inun-unudcha nan sursuron nan chiyucha achi tit-iwa ay mun-isursuru (1:10-11). Lenayad us Pablo ay palutukun Tito nan chiyucha nunkatiku ay cha atuatun nan chiyucha i-Creta ay kaman as nan kenangutum, umiwet, ya kenapadsok, ya tapina pay (1:12-16). Insuron pay Pablo kan Tito nan atun ay mangisuru as nan anam-amá, anen-ena, fiafiallu ya mafiabfiaor (2:1-10).

### **Nan Nakudwaan Nan Nauy Surat**

Nan Laplapon Nan Surat 1:1-4

Nan Chiyucha Mangepangpanguru As Nan Iglesia 1:5-16

Nan Sursuru As Nan Tukutukún Ay Kasasaad Chi Tataku 2:1-15

Nan Ekaman Nan Chiyucha Omaafurot 3:1-11

Nan Anongos Nan Surat 3:12-15

### *Nan Laplapon Nan Surat*

<sup>1</sup> Ha-un hi Pablo ay usa ay fiabfiaarun Apo Dios ya apostol Jesu Cristo. Hi Apo Dios at piniliyak ya finaorak ta uyku papigsauñ nan pammatten nan chiyucha pinilina ay tatakuna ya ta uyku etoróng chicha as nan tit-iwa ay sursuru ay maiyunud as nan nadiosan ay panagfiyag. <sup>2</sup> Atok am-in chaná ta wachay namnamauncha ay fiyag ay maid patingkiana ay enkaren Apo Dios sakbay mafiayang nan luta. Hi Apo Dios at achi poros munkutkutum.\* <sup>3</sup> As nan ustу ay timpu ay pinilina, empakaammuna nan nauy fiyag ay maid patingkiana bábaen as nan nangekasabaak as nan Ammay ay Chamag ay entalekna kan ha-un. O, enkasabak nan Ammay ay Chamag, tay inflin Apo Dios ay mangesarakan kan chitaku.

<sup>4</sup> Nauy nan suratku kan he-a, Tito ay iflangku as tit-iwa ay anakku kiapú as nan pammati takú.

Sapay koma ta mawawacha kan he-a nan grasya ya nan natalna ay numnum ay nurpu kan Apo Dios ay Ama takú ya nurpu kan Cristo Jesus ay mangesarakan kan chitaku.

---

\* <sup>1:2</sup> 2 Tim. 2:13; Heb. 6:18

*Nan Mangepangpanguru As Nan Iglesia  
(1 Tim. 3:1-7; 1 Ped. 5:1-4)*

<sup>5</sup> Nan nanaynanak kan he-a ad Creta at ta enongnongmu nan chaan pay naenongnong ya ta munpilika as mangepangpanguru as nan chiyuchya iglesia henan am-in ay il-ili hesa. Hiyasa nan infilinku ay atum. <sup>6</sup> Nan piliyum ay mangepangpanguru at masapor maid maepafiasor kan hiya, ya kun usa nan asawana. Masapor ay nan an-akna at enmafurotcha kan Apo Dios, maid kaap-apatancha as munlumu as machachaelancha ya achicha nasokel. <sup>7</sup> Kiapú ta hiya nan matalek ay mangaywan as nan iglesian Apo Dios, masapor maid maepafiasor kan hiya. Masapor us achi napangas, achi fungngat, achi futtang, achi omaabkor ya achi naakum as siping. <sup>8</sup> Kun at masapor manangmangili ya laylaychuna ay atun nan ammay. Masapor us manang-etpor, nalintig, nasantowan ya naonngan. <sup>9</sup> Masapor popomkat hiya as nan tit-iwa ay sursuru ay maiyunud as nan kalen Apo Dios ta mafialinay awisun nan tapina ay omafurot as nan tit-iwa ay sursuru ya ta maepailana nan kenomsawan nan chiyuchya mangontrakontra as na.

<sup>10</sup> Iflinku sa, tay ongor nan tataku hesa ay nunkasokel ay manngor as nan tit-iwa ay sursuru, kaskasin nan chiyuchya Judio ay omafurot ay mangepapelet as nan Lintig Moises. Chacha al-allilawun nan tapina ay tataku babaen as nan ap-apat ay maid kotkotokna. <sup>11</sup> Masapor maepakinak chasa ay tataku, tay chacha al-allilawun nan pammatten nan tapina ay pamilya babaen as nan chacha mangisursuruwan as fiakun libfengna ay maisuru. Kafiafiai pay nan pangkepcha, tay laychuncha yangkiay ay omara as siping. <sup>12</sup> Usa as nan chiyuchya kanancha un pomapadtu ay kailiyantha ay i-Creta nan nangali, "Mangisiw paat am-in chi i-Creta, tay nunkangutumcha, napadsokcha ay munchunu ya kun hi kakan chi elamakcha." <sup>13</sup> Tit-iwa met na ay kenalina maepangkep kan chicha. Isunga sengaram chicha ta ustу ya pumiggipsa nan pammaticha <sup>14</sup> ya ta achicha afurotun nan pinupus-uy ay es-estoryan chi Judio ya nan lintig ay enamammaan chi tataku ay mangachi as nan tit-iwa ay sursuru.<sup>†</sup> <sup>15</sup> Nan taku ay nacharos chi numnumna at iflangna as nacharos nan am-in ay makan. Ngem nan taku ay naruket chi numnumna ya achi omafurot at iflangna ay maid poros nacharos ay makan, tay kenokomsaw chi numnumna ya achina maematonan chi ammay ya mangotettet. <sup>16</sup> Chacha kankanan un amammucha hi Apo Dios, ngem mamaila as nan chacha at-atun ay achiyuncha hi Apo Dios. Kaiisiw nan ukialicha, nasokelcha, ya achicha poros kafaelan ay mangekaman as ammay.

## 2

*Nan Ustu Ay Sursuru*

<sup>1</sup> Ngem kun pay he-a Tito, masapor iturturuymu ay manukun as nan omafurot ta unuchuncha nan maiyunud as nan ustу ay sursuru. <sup>2</sup> Isuruwam nan anam-amá ta achicha labsun nan laylaychun nan achorcha, maekaricha ay marispitu ya manang-etporcha. Masapor ustу nan pammaticha ya layadcha kan Apo Dios, ya anosancha nan likiatcha.

<sup>3</sup> Assesa us ay isurom as nan anen-ena ay nan kasaporan at nan nasantowan ay panagfiyag ay maiyunud as nan pammati. Masapor achicha omekek-ali ya munfutfutang, ngem kuncha at isuru nan ammay <sup>4</sup> ta makasurucha nan fianafiai ay kaas-asawa as ustу ay atuncha ay manglaylayad as

<sup>†</sup> **1:14** Mar. 7:14-19; Ara. 10:9-15; Col. 2:20-22

nan as-awacha ya an-akcha. <sup>5</sup> Isuruwam chicha ay munfialin as manang-etpor ya nacharos as maepangkep as laraki. Masapor enonongnongcha nan chunucha as afongcha, naanoscha ya munpaetoraycha as nan as-awacha. Mu assesa nan ukialicha, maid kas-otan nan kalen Apo Dios.

<sup>6</sup> Tukunum us nan fiafiallu ta munfialinch as manang-etpor. <sup>7</sup> He-a mismu at masapor epailam ay napudnuka as nan am-in ay atum ta he-a nan ustу ay munturachan nan fiafiallu, ya as nan mun-isuruwam, masapor napudnu nan atum ay munkali ya maiyunud as nan napateg ay isursurom. <sup>8</sup> Ilaum ta ustу nan cham isursuru ta maid kaskas-otana. Tay mu hiyasa nan atum, mafainan nan chiyuycha komokontra kan he-a, tay maid mangisiw as maifiakiacha kan chitaku.

<sup>9</sup> Filinum us nan chiyuycha mafiabfiaor ta munpaetoraycha as nan amocha as nan am-in ay atuncha ta mapnek nan amocha kan chicha. Achicha koma songsongfiatan <sup>10</sup> winnu akiwan chicha, ngem kuncha at epaila ay ammaammaycha ya matalekcha as nan am-in ay atuncha ta maichayaw nan sursuru ay maepangkep kan Apo Dios ay mangesarakan kan chitaku.\*

<sup>11</sup> Tay enpailan Apo Dios nan nauy grasyana ta maesarkan nan am-in ay tataku. <sup>12</sup> Kiapú as nan nauy ay grasya, isuruwana chitaku ay mankug as nan fiak nadiosan ay panagfiyag ya nan chiyuycha mun-ongosán chi anchor ta manang-etpor, nalintig ya nadiosan nan panagfiyag takú asna's luta. <sup>13</sup> Assesa nan panagfiyag takú as nan cha takú manman-uchan as nan nakiasat ay namnamaun takú ay hiyasa nan maepail-an nan kaichayawan Apo Dios takú ay Jesu Cristo ay mannakafialin ya mangesarakan kan chitaku.† <sup>14</sup> Inchatna nan fiyagna ta pakawanuna chitaku as nan am-in ay fiasor takú, ya ta munfialinuna chitaku as nasantowan ay tatakuna ay makakud ay mangekaman as ammay.

<sup>15</sup> Isurom am-in chaná as nan tataku. Papigsaum nan numnumcha ya sengaram chicha. Masapor atum chaná, tay wachay kalibfengam ay nurpu kan Apo Jesus, ya achim eparufus chi uray usa ay mangsot kan he-a.

### 3

#### *Nan Ammay Ay Ekaman Nan Chiyuycha Omaafurot*

<sup>1</sup> Epanumnummu as nan iib-am ay omaafurot ay masapor munpaetoraycha as nan totoray nan goberno ya nakasakianacha ay mangtongpar as nan filfilinch. Nakasakianacha us koma ay mangekaman as nan am-in ay ammay. <sup>2</sup> Masapor maid ekak-aliyancha as kumpurmi ay taku ya maid makisumsumaancha. Ngem kuncha at masapor naanos ya kun yangkiay ammay chi makekadkadwaancha as nan am-in ay tataku.

<sup>3</sup> Tay uray chitaku at maid poros ammu takú ad kasin as maepangkep kan Apo Dios. Nasokel ya naallilaw takú. Kaman chitaku fiabfiaarun as kumpurmi ay mun-ongosán ya kiankianasun nan anchor takú. As nan hiyachi ay timpu, mangotettet chi pangkep takú ya apsan takú pachong takú ay tataku as kaurkiurkiw. Iningor chitaku as nan pachong takú ay tataku ya iningor takú us chicha. <sup>4</sup> Ngem kun pay enpailan Apo Dios ay mangesarakan kan chitaku nan sug-ang ya layadna, <sup>5</sup> ensarakana chitaku. Ensarakana chitaku fiakun kiapú as nan ammay ay enkaman takú, ngem

\* <sup>2:10</sup> Mat. 24:45-51; Luc. 12:42-48; 19:17; Efe. 6:5-9; 1 Tim. 6:1-2 † <sup>2:13</sup> 1 Tim. 1:1; Gal. 5:5; Col. 1:27; 1 Tes. 5:8; Heb. 6:19; 11:1

kiapú as sug-angna kan chitaku. Tit-iwa, ensarakana chitaku babaen as nan Espiritu Santo ay nanguras ya nangepafiarú as nan numnum takú ta mawad-an takú as fiarú ay fiyag ya nacharos takú as nan sangwanan Apo Dios. <sup>6</sup> Maid ek-ekot Apo Dios ay nangichat as Espiritu Santo kan chitaku babaen kan Jesu Cristo ay nangesarakan kan chitaku. <sup>7</sup> Enatna chi ta babaen as nan grasyana, maifilang takú as nalintig as nan mangilana ya matawid takú nan fiyag ay maid patingkiana ay hiya nan cha takú namnamaun. <sup>8</sup> Tit-iwa chaná ay kenalek.

Chatona nan lalaychok ay epapatem ay isuru ta nan chiyuycha omafurot kan Apo Dios at komakudcha ay mangekaman as ammay. Ammay chaná ay maisuru ya wachay maifiachangcha as nan am-in ay tataku. <sup>9</sup> Ngem achika makesososek as nan tataku as maepangkep as maid kotkotokna ay leslestaan nan ngadngachan nan kaap-uwan. Achika us makesososek ya makisumsuma as nan maepangkep as nan Lintig Moises, tay nan nauycha susuma at maid maifiachangcha ya maid kotkotokcha.\* <sup>10</sup> Mu wachay taku ay makisumsuma ta munisisyanuna nan chiyuycha omafurot, fiag-am hiya ta ikinakna. Mu mamen chuwam ay fiag-an ya achi challu chumngor, achim kadkadwaun, <sup>11</sup> tay ammom ay nan assesa ay taku at fumafiasor ay enmachawwi as nan tit-iwa ay sursuru. Nan chiyuycha chana atuatun ay mismu nan mangepaila ay kenomsaw hiya.

### *Nan Anongos Ay Tukun*

<sup>12</sup> As nan mangifiaorak kan Artemas winnu kan Tikico kan he-a, ya as nan umchanana hesa, epapatem ay makeali kan ha-un ad Nicopolis, tay ninumnumku ay mayaschiyak as nan nauy ay chinamuy. <sup>13</sup> Epapatem ay mangfiachang kan Zenas ay abogado ya hi Apolos as nan munligwatancha ay munfiaat. Ilaum ta wacha nan am-in ay kasaporancha. <sup>14</sup> Nan ib-a takú ay omafurot at masapor suruwuncha ay komakud ay mangekaman as ammay ta makifiachangcha as nan tit-iwa ay makasapor as fiachang ya ta fiakun nan maid kotkotokna nan chacha ekamkaman.

<sup>15</sup> Am-in nan nauycha kakadwak hena at chachaka pakomostaun. Pakomostaunmi us nan chiyuycha manglaylayad kan chakami kiapú as pammati.

Sapay koma ta mawawacha kan chakayu nan grasyan Apo Dios.

---

\* **3:9** 1 Tim. 1:4; 2 Tim. 2:23

## Nan Surat Pablo Kan Filemon Nan Omona Ay Ammuwun

Nan nauy ay surat Pablo at para kan Filemon ay nafiaknang ay i-Colosas. Usa hiya as nan chiyuycha enmafurot kan Jesus. Hiya us nan nakin fiabfiaarun kan Onesimo ay lenmayaw as afongna, tay nauma hiya as mafiabfiaor.

Lenmayaw hi Onesimo ay immuy henan achawwi ay lukiar, at inumchan hiya ad Roma. Kiapú as nan plenaplanon Apo Dios, ininchanana hi Pablo ay nafiafiarud hid-i. As nan nanngorana as nan insursuron Pablo maepangkep kan Cristo, enmafurot hiya ya nunfialin as napateg ay fumadfiachang kan Pablo.

Kiapú as nan nauy enommat, ninumnum Pablo ay ifiangadna hi Onesimo kan Filemon ay amona. Isunga as nan nauy suratna kan Filemon ay kiayyumna ad Colosas, chinawatna ay pakawanun koma Filemon hi Onesimo. Namnamaun Pablo ay awatun Filemon hi Onesimo as fiakun yangkiay napakawan ay mafiabfiaor ngem as ifiana ay enmafurot kan Cristo.

### **Nan Nakudkudwaan Nan Nauy Surat**

Nan Laplapon Nan Surat 1-3

Nan Panangichayaw Pablo Kan Filemon 4-7

Nan Chinawat Pablo Maepangkep Kan Onesimo 8-22

Nan Anongos Nan Surat 23-25

### *Nan Laplapon Nan Surat*

<sup>1</sup> Ha-un hi Pablo ay naafiafiarud kiapú as nan chak munserserfiyan kan Cristo Jesus. Nan kadwak hena at hi Timoteo ay ifia takú.

Nauy nan suratmi kan he-a Filemon ay laylaychunmi ay pachongmi ay munserserfi ay mangepakpakaammu as nan maepangkep kan Cristo.

<sup>2</sup> Suratmi us na challu kan Apia\* ay ifiami ay fiafiai as nan pammati ya kan Arkipo† ay kadwami ay sorchachon Cristo, ya as nan iglesia hesa as afongmu.

<sup>3</sup> Sapay koma ta mawawacha kan chakayu nan grasya ya nan natalna ay numnum ay nurpu kan Apo Dios ay Ama takú ya kan Apo Jesu Cristo.

<sup>4</sup> Ifia ay Filemon, as nan mangekarkarakarakiak kan he-a, kanayonak ay munyaman kan Apo Dios, <sup>5</sup> tay chak chungrchungrun nan maepangkep as nan pammatem kán Apo Jesus ya nan layadmu as nan am-in ay tatakón Apo Dios. <sup>6</sup> Ekarkarakragku ay as nan cham mangifiagfiag-an as nan maepangkep as pammatem as nan tapina ay tataku at mataptapiyan koma nan pan-nakaawatmu as nan am-in ay bendisyon ay inchat Apo Dios kan chitaku kiapú as nan pammati takú kan Cristo. <sup>7</sup> Ifiak, ongor paat chi lagsakku ya pinmigsa nan numnumku kiapú kan he-a, tay enpapigsam nan numnum nan tatakón Apo Dios kiapú as nan layadmu kan chicha.

### *Nan Chawat Pablo Maepangkep Kan Onesimo*

---

\* <sup>1:2</sup> Kanan chi tapina ay tataku un hi Apia at asawan Filemon, ya hi Arkipo at usa hiya ay mangepangpanguru as nan iglesia ay maam-among as afongcha. Kanan us chi tapina un hi Arkipo at anak cha Filemon kan Apia. † <sup>1:2</sup> Col. 4:17

<sup>8</sup> Isunga wacha nan chawatok kan he-a. Uray mu wacha nan inchat Cristo ay kalibfengak ay mangifilin as ustу ay ekamanmu, fiakun sa as atok. <sup>9</sup> Ngem kiapú as layad, kunak yangkiay munpakpakaasi kan he-a. Atok na uray mu ha-un hi Pablo ay am-ama<sup>‡</sup> ya naifiafiarud pay laing ad wani kiapú kan Cristo. <sup>10</sup> Epapkakaasek kan he-a ta sug-angam hi Onesimo<sup>§</sup> ay nunfialin as anakku as pammati as nan naifiafiaruchak pay laing. <sup>11</sup> Ad kasin at maid kayman maifiachangna kan he-a, ngem ad wani, ongor nan maifiachangna kan chita ay chuwa.

<sup>12</sup> Pafiangchok kan he-a hi Onesimo ay laylaychok as solet. <sup>13</sup> Laychok pay koma ay mayasna hiya ta fumachang kan ha-un as nan kamaidmu as nan nauy naifiafiaruchak kiapú as nan nangekaskasabaak as nan ammay ay chamag. <sup>14</sup> Ngem achek atun sa inkiana iyafudmu, tay achek laychun ay mapeletanka ay mangekaman. Am-ammay mu murpu koma as nan mismu ay numnummu.

<sup>15</sup> Uy at nan kiapúna ay naisyan hi Onesimo kan he-a as hen-omaketan at ta munfiangad ay makekadwa kan he-a in-inkiana. <sup>16</sup> Ad wani, hi Onesimo at fiakun usa ay apud ay mafiabfiaor, ngem am-amud mu nan mafiabfiaor, tay nunfialin hiya as laylaychun takú ay ifia. Ongor chi layadku kan hiya, ngem kaskasintu ongor nan layadmu kan hiya as fiabfiaarum ya as ifiam kiapú as nan pammatiyu kan Apo Jesus.

<sup>17</sup> Isunga mu tit-iwa ay ifilangak as ifiam ay omafurot, pangaasem ta awatum hiya as nan munfiangchana ay kaman as nan mang-awatam kan ha-un. <sup>18</sup> Mu wachay finmasorana winnu utangna kan he-a, uray ha-un nan munsengelam. <sup>19</sup> Tit-iwa ay ha-un mismu nan nunsurat ya nunperma's na ta mangammuwam ay atok nan infiakiak: "Ha-un hi Pablo. Fiayachak nan utang Onesimo kan he-a." Achek ud-ay kis-an epanumnum kan he-a ay utangmu kan ha-un nan pannakaesaranamu babaen kan Cristo. <sup>20</sup> Isunga ifiak, sapay koma ta atum nan chawatku kan he-a kiapú as nan enmafurotanta kan Apo Jesus. Pangaasem ta paragsakunak kan he-a ay ifiak kiapú as nan enmafurotanta kan Cristo.

<sup>21</sup> Nunsuratak kan he-a, tay maid chuwachuwak ay tongparum nan chak chawatun ya ong-ongor pay nan ekamanmu mu nan kanak. <sup>22</sup> Wacha pay nan usa ay chawatok kan he-a. Esakianaanak pay as kuwartu ay magyanak, tay namnamaok ay babaen as nan kararagyu am-in at pafiangchunaktu kan Apo Dios kan chakayu.

### Nan Anongos Nan Surat

<sup>23</sup> Cha chakayu pakomostaun kan Epafras ay ifiak ay naifiafiarud kiapú kan Cristo Jesus. <sup>24</sup> Kaman us kan cha Marcos, Aristarco,\* Demas† ya hi Lucas ay kadwak ay cha makidkidnu as nan chunon Apo Dios.

<sup>25</sup> Sapay koma ta mawawacha kan chakayu nan grasyan Apo Jesu Cristo.

<sup>‡</sup> **1:9** As nan tapen nan manuskritu as nan kali ay Griego at kanana, "pannakaachor Cristo Jesus."

<sup>§</sup> **1:10** Nan laychun ay kanan nan Onesimo at wachay fiachangna. \* **1:24** Ara. 19:29; 20:4; 27:2;

Col. 4:10      † **1:24** Col. 4:14; 2 Tim. 4:10

## Nan Surat As Nan Chiyuycha Hebreo Nan Omona Ay Ammuwun

As nan nauy ay surat at maid nafukig mu ngachana nan nangisurat as na. Ngem nan nunsuratana at as nan usa ay grupon chi Judio winnu Hebreo ay nafiyag ay enmafurot kan Jesu Cristo. Ngem uray mu hiyasa, nan hanacha Hebreo at laychuncha ay chukkian nan pammaticha ya munfiangadcha as nan sikud ay pammatten chi Judio kiapú as nan cha omongoongor ay likiat ay chacha iliwliwas. Isunga nan kiapúna ay nunsurat nan nangisurat as na at ta papigsauna nan numnumcha as nan nangepanumnumana kan chicha as nan maepangkep as nan pannakafialin ya kalibfengan Jesus.

Nauycha nan turu ay amud ay naifiakia as na maepangkep kan Jesus: Omona, hi Jesus nan maid patingkiana ay Anak Apo Dios. Kiapú ta assena, hi Jesus at natortoray as solet mu nan chiyuycha pomapadtu ad pus-uy, nan anghelles ya uray hi Moises.

Maekadwa, hi Jesus nan maid patingkiana ay kangatuwan ay pachi takú ay hiya nan tonga as nan tataku ya kan Apo Dios. Tay nan enatna at napapatateg as solet mu nan en-enat nan papachen chi Judio.

Maekatlu, hi Jesus nan nangiyali kan chitaku as nan fiarú ay turag babaen as nan natuyana as nan koros. Isunga nan turag Apo Dios ad pus-uy at kaman aiw nan fiarú ay turag. Mu maepangkep as nan chiyuy turag ad pus-uy, kanayon ay masapor chi charan chi animar as maichaton ta mapakawan chi tataku as nan fiasfiorcha. Ngem as nan fiarú ay turag at kun namingsan yangkiay nan panagchaton, tay inchaton Jesus nan mismu ay fiyagna ta nan ngachana ay omafurot kan hiya at mafialin ay maesarakan ya munfialin as nalintig as nan mangiilan Apo Dios.

Enpanumnum us nan nangisurat nan maepangkep as nan kenapigsan nan pammatten nan kaap-uwancha (kapitulu 11). Nan namnamaun nan nangisurat at turachun nan chiyuycha omafurot chicha. As nan chiyuycha anongos ay kapitulu at tinukuna nan chiyuycha omafurot ay iturturuycha ay mangnumnumnum as nan maepangkep kan Jesus, ya eta-uncha nan ngachana ay likiat ta achicha omachawwi kan Apo Dios, ngem kuncha at matakay ay mangun-unud as nan laychun Apo Dios.

### **Nan Nakudkudwaan Nan Nauy Surat**

Hi Jesus Nan Ustuustu Ay Kail-an Nan Kaichayawan Apo Dios 1:1-3

Natortoray Hi Jesus Mu Nan Anghelles 1:4-2:18

Natortoray Hi Jesus Mu Hi Moises 3:1-4:13

Hi Jesus Nan Kangatuwan Ay Pachi 4:14-7:28

Nan Turag Cristo Ya Nan Turag Apo Dios Ad Pus-uy 8:1-9:28

Nan Chaton Jesus Ya Nan Chaton Nan Papachi 10:3-9

Nan Kenaamud Nan Pammati 11:1-12:29

Nan Anongos Nan Surat 13:1-25

### *Hi Jesu Cristo Nan Nangepakaammu As Nan Kalen Apo Dios*

<sup>1</sup> Ad pus-uy, infiakian Apo Dios nan laychuna as nan kaap-uwan takú babaen as nan chiyuycha pomapadtu. Namen ongor ya tukutukún nan enatna ay nangifiakia as nan hana laychuna ay ifiakia.\* <sup>2</sup> Ngem as nan nauycha cha omanongos ay urkiw, nunkali hiya kan chitaku babaen as nan

\* <sup>1:1</sup> Deut. 18:18-22

Anakna. Hiya nan nangepafaiayangan Apo Dios henan lufong, ya pinilina us ay manawid as nan am-in ay ka-ichin.<sup>†</sup> <sup>3</sup> Nan kaichayawan Apo Dios at kaman sumilsili ay maila as nan Anakna, ya hiya nan ustuustu ay kail-an nan kenadios Apo Dios. Hiya us nan mangepaterturuy as nan kasasaad nan am-in ay ka-ichin babaen as nan mannakafialin ay kalina. Kuna pay penakawan nan tataku as nan fiasfiasorcha, tenmokor hiya ad chaya as apét kannawan Apo Dios ay Mannakafialin as nan am-in.

### *Natortoray Nan Anak Apo Dios Mu Nan Anheles*

<sup>4</sup> Isunga nunfialinun Apo Dios nan Anak as natortoray mu nan anheles. Kaman us as nan empangachan Apo Dios kan hiya at kaskasin machay-chayaw mu nan ngachan nan anheles. <sup>5</sup> Tay maid poros anghel as nangifiag-an Apo Dios,  
“He-a nan Anakku.

Ad wani, epailak ay ha-un nan Amam.”<sup>‡</sup>

Winnu,  
“Ha-untu nan Amana,

ya hiyantu nan Anakku.”<sup>§</sup>

<sup>6</sup> Ngem as nan kiayud mangifiaoran Apo Dios as nan panguru ay Anakna asna's luta, kenalina,

“Chakayu ay anhelesku, chayawunu hiya.”\*

<sup>7</sup> Nan kenalen Apo Dios maepangkep as nan anheles at hiyana:

“Nan anhelesku at nunfialinok chicha as kaman angin, ya nan chiyucha munserserfi kan ha-un as kaman kumarkiarud ay apuy.”<sup>†</sup>

<sup>8</sup> Ngem mu maepangkep as nan Anakna, kenalina,

“He-a Apo Dios, nan muntorayam at maid patingkiana, ya nan atum ay muntoray at nalintig as solet.

<sup>9</sup> Laylaychum chi kenalintig, ya kaiingormuy kenamangotettet. Isunga hi Apo Dios ay Diosmu at pinili chaká, ya kiapú as nan chayaw ay inchatna kan he-a, ong-ongor nan lagsakmu mu nan lagsak nan kakadwam.”<sup>‡</sup>

<sup>10</sup> Kenalina pay,

“As nan laplapuna, he-a ay Apo nan namayang henan luta, ya he-a nan namayang as nan wacha ad chaya.”<sup>§</sup>

<sup>11</sup> Mamaidchantu am-in, ngem he-a at mawawachaka in-inkiana.

Machunotchantu ay kaman as nan fiachu.

<sup>12</sup> Makopekopchantu ay kaman as nan chaket ay maichusuy, ya masokatan-chantu ay kaman as nan fiachu.

Ngem he-a at achika poros munfiarfialiw, ya nan fiyagmu at achi poros munpatpatingkia.”\*

<sup>13</sup> Maid poros nangarkaliyan Apo Dios as nan uray usa as nan anhelesna, “Tomokorka as apét kannawanku inkiana amisok nan chiyuya kafusormu ay kaman chicha nan kiakiatinam.”<sup>†</sup>

<sup>†</sup> **1:2** Ara. 2:17-21; 1 Ped. 1:20; 2 Ped. 3:3; Jud. 1:18    <sup>‡</sup> **1:5** Sal. 2:7; 2 Sam 7:12-14; Ara. 13:33    <sup>§</sup> **1:5**

1 Cro. 17:11-15; 2 Co. 6:18    \* **1:6** Col. 1:16, 17; Rom. 8:29    <sup>†</sup> **1:7** Sal. 104:4. Nan kali ay “angin”

ya “espiritu” at munpachong nan laychuncha ay kanan as nan kali ay Griego.    <sup>‡</sup> **1:9** Sal. 45:6-7. As nan tapina ay manuskritu at kanancha, “lanfulanfuna he-a as nan lanan nan lagsak. As nan inili ay ukiali as nan Turag ad pus-uy, nan pananglanub as lana at epailanay lagsak.”    <sup>§</sup> **1:10** Sal. 102:25-27

\* **1:12** Sal. 102:25-27; Pal. 20:11    <sup>†</sup> **1:13** Sal. 110:1; Mat. 22:44; Ara. 2:35; Heb. 10:13

**14** Ngachancha ngata nan anghelles? Chicha nan espiritu ay munserserfi kan Apo Dios, ya finaor Apo Dios ay mangfiachang as nan tataku ay mae-sarakantu.

## 2

### *Nan Omafurotan Nan Tataku As Nan Enpakaammon Jesus*

**1** Kiapú ta natortoray nan Anak Apo Dios mu nan anghelles, masapor kaskasin takú numnumnumun nan chiyucha chinchinngor takú ta achi takú sumiyan as nan kenatit-iwa. **2** Tay nan lintig Apo Dios ay enpakaammon nan anghellesna as nan kaap-uwani at naepaila ay tit-iwa, ya nan tataku ay nanglабsing as nan lintig ay ansa at enawatcha nan chusacha ay maiyunud as nan fiasorcha.\* **3** Mu assesa nan enommat kan chicha, anan atun takú ay makalintisun as nan chusa mu enganuy takú nan assesa ay kenaamud nan kaesarakanan? Hi Apo Jesus ay mismu nan enmon-onay nangepakaammu as nan nauy ay kaesarakanan, ya nan chiyucha nanngor kan hiya at chicha nan nangepaneknek kan chitaku ay tit-iwa na. **4** Uray us hi Apo Dios at entapina nan pammaneknekna babaen as nan nangepaíl-ana as nan chiyucha sinyar, nakaskaschaaw ya tukutukún ay milagro. Penaneknekana us babaen as nan chiyucha kafielan ay enpaiwarasna as nan Espiritu Santo ay maiyunud as nan laychuna.

### *Nan Mangesarakan Kan Chitaku*

**5** Nan fiarú ay lufong ay chami ifiagfiakia at fiakun nan anghelles nan penatoray Apo Dios, ngem kun at tatu. **6** Tay wacha nan naisurat as nan Kalen Apo Dios ay kanana,  
“Apo Diós, anuyka payat cha munnumnumnum as maepangkep as tatu, winnu adchi t'uymu payat aaywanan chicha ay kun larawa tatu yangkiay?

**7** Finayangmu chicha ta munfialincha as nababbaba mu nan anghelles as nan hen-omaketan ay timpu. Penachayawam us chicha ay kaman as nan chayaw chi ari.

**8** Enpaetoraymu pay kan chicha nan am-in ay ka-ichin.”†  
Nan laychun ay kanan nan nangepatorayan Apo Dios as nan am-in ay wacha as nan tataku at maid achi etorayantu chi tatu. Ngem ad wani, maila ay achi cha etortorayan chi tatu nan am-in ay ka-ichin. **9** Ngem kun natongpar nan nauy naepadtu babaen kan Jesus. Tay as nan hen-omaketan ay timpu, nunfialin hiya as nababbaba mu nan anghelles as nan nunfialinana as tatu. Enommat chi ta matuy hiya para as nan am-in ay tataku babaen as nan grasyan Apo Dios. Ad wani, maila takú ay napachayawan hiya as solet kiapú as nan utúy ay inliwasna. **10** Hi Apo Dios nan namayang as nan am-in ay ka-ichin, ya nafiyang am-in ta maichayaw hiya. Isunga maifiakiay nan nauy planuna: Nunfialinuna hi Jesus as ustú ay mangepangu kan chitaku babaen as nan inliwasna ta ongor chi iyalina ay an-ak Apo Dios ay maetapi as nan kaichayawana. Tay hi Jesus nan mangetoróng kan chicha as nan kaesarakanan.

**11** Hi Jesus nan mangepasanto as nan tataku babaen as nan nangaanana as nan fiasfiasorcha, ya nan tataku ay chana pasantowun at us-usa nan Amacha am-in. Isunga achi mafain hi Jesus ay mangali un ib-ana chicha.  
**12** Tay kenalina kan Apo Dios,

\* **2:2** Deut. 33:2; Ara. 7:38, 53; Gal. 3:19

† **2:8** Gen. 1:26-28; Sal. 8:4-6; 1 Co. 6:2-3; Pal. 22:3-5

"Ifiakiaktu as nan ib-ak nan maepangkep kan he-a, ya as nan maam-amongancha, ekantaktu nan kanta ay pangchaychayaw kan he-a."<sup>‡</sup>  
 13 Kanana us, "Muntalekaktu kan Apo Dios." Tenoptopana, "Nauyak ya nan tataku ay kaman an-akku ay inchat Apo Dios kan ha-un."<sup>§</sup>

14 Nan an-ak Apo Dios ay chana kanan asna at tatakucha ay wachay achorcha ay matuy. Kiapú ta assena, nunfalin hi Jesus as taku ay kaman kan chicha ta wachay atuná ay matuy. Enatna na ta babaen as nan matuyana at amisuna hi Satanas ay wachay pannakafialina ay mangetoróng as nan tataku as nan maid patingkiana ay utúy.\* 15 Kiapú as nan enat Jesus, wenayawayayaana nan am-in ay tataku ay kaman mafiabfiaor kiapú as nan ongor ay ugyatcha ay matuy. Tay nan tataku at umugyatcha as nan utúy as nan intiru ay fiyagcha. 16 Tay narawag ay fiakun nan angeles nan chana fiadfiadngan mu achi nan tataku ay naifilang as kiankianak Abraham. 17 Isunga masapor munfalin hiya as kaman kan chicha ay ib-ana as nan am-in ay panagfiyagcha ta munfalin hiya as manangsug-ang ya matalek ay kangatuwan ay pachi as nan munserfiyana kan Apo Dios. Hiyana nan naekaman ta pakawanun Apo Dios nan tataku as nan fiasfiorcha. 18 Kiapú ta hiya ay mísmu at nun-iliwas ya nachisting, mafialina ay fiadngan nan chiyucha cha machischisting.

### 3

#### Natortoray Hi Jesus Mu Hi Moises

1 Isunga chakayu ay ib-ak ay pinilen Apo Dios as tatakuna ya enayakiana ay maetapi kan hiya ad chaya, masapor nunumnumunyu hi Jesus. Tay mu maepangkep as nan pammati ay ipudnu takú, hiya nan finaor Apo Dios ya hiya nan kangatuwan ay pachi. 2 Matalek hiya ay nanongtongpar kan Apo Dios ay nangchutok kan hiya ay kaman kan Moises ay matalek ay munserfi as nan am-in ay tataku as nan pamilyan Apo Dios.\* 3 Ngem machaychayaw hi Jesus mu hi Moises ay kaman as nan kaichayawan nan nangkiaub as nan usa ay afong mu nan afong ay kinaubna. 4 Tay tunggal afong at wacha nan nangkiaub, ngem hi Apo Dios nan nangamma as nan am-in ay ka-ichin. 5 Manuwat, tay matalek hi Moises ay mafiabfiaor as nan am-in ay kakadwa as nan pamilyan Apo Dios, ya infiakiana nan epakaammon Apo Dios as tapen chi urkiw. 6 Ngem hi Cristo at hiya nan matalek ay Anak Apo Dios ay mangenongnongnong as nan pamilyan Apo Dios. Chitaku at maetapi takú as nan pamilyan Apo Dios mu naturud takú ay mangiturturuy ay omafurot ya achi takú poros ekafiaiñan namnama takú kan hiya.

#### Nan Mun-iblayan Para As Nan Tatakon Apo Dios

7 Isunga masapor afurotun takú nan nauy naisurat as nan Kalen Apo Dios ay infiakian nan Espiritu Santo:  
 "Ad wani, mu chungrunuñan kalen Apo Dios,  
 8 achiyu koma patangtangkenun nan numnumyu ay kaman as nan nan-gontraan nan kaap-uwanyu kan Apo Dios as nan nanistingancha kan hiya henan disyerto.  
 9 Kenalen Apo Dios un hid-i nan nanistingan nan kaap-uwanyu kan hiya, uray mu inilacha nan nakaskaschaaw ay en-enatna as opat puru ay tawwun.

<sup>‡</sup> 2:12 Sal. 22:22

<sup>§</sup> 2:13 Isa. 8:17-18

\* 2:14 Mar. 3:27

\* 3:2 Num. 12:7

<sup>10</sup> Isunga finnungat hi Apo Dios kan chatud-i ay tataku, ya kanana un,  
‘Kanayonak ay chukkian, ya ukialicha challu ay achi manongtongpar as  
nan filfilinku.’

<sup>11</sup> Kiapú as fungatna, ensapatana un,  
‘Achektu poros epaskop chicha as nan mun-ib-iblayan ay ensakianak.’  
†

<sup>12</sup> Il-ilaunyu ay iib-ak ta maid koma kan chakayu nan mangnumnumnum  
as mangotetet ya achi omafurot kan Apo Dios. Chatosa ay ukiali nan  
kiapón nan mangchukkianana as nan matataku ay Dios. <sup>13</sup> Ngem kun at  
nan atunyu as nan kawad-an pay laing nan timpuyu ay makali un “Ad wani  
ay urkiw” at munpeppenapigsa kayu as nan pammatiyu as kaurkiurkiw.  
Mu hiyasa nan atunyu, maid maar-allilaw kan chakayu as nan fiasor ay  
mangepatangken as numnumyu. <sup>14</sup> Tay makekadkadwa takú kan Cristo mu  
kaman takú pokpokkatan as nan pammati ay wacha kan chitaku as nan  
laplapuna inkiana as nan munpatingkiaan nan matatakuwan takú.

<sup>15</sup> Nan naisurat as nan Kalen Apo Dios at kanana,  
“Ad wani, mu chungrunyu nan kalen Apo Dios, masapor achiyu patang-  
tangkenun nan numnumyu ay kaman as nan nangontraan nan kaap-  
uwanyu kan Apo Dios.”‡

<sup>16</sup> Ngachancha nan nanngor as nan kalen Apo Dios ya nangontra kan  
hiya? Chicha met nan kaap-uwan takú ay enpangon Moises as nan nak-  
akancha nunlapu ad Egipto. <sup>17</sup> Ngachancha nan finnungtan Apo Dios as  
opat puru ay tawwun? Ay fiakun challu nan chiyuycha finmasor ay natuy  
henan disyerto? <sup>18</sup> Ngachancha nan nangesapataan Apo Dios ay achinantu  
poros epaskop chicha henan ensakianana ay mun-ib-iblayan mu achi nan  
chiyuycha chaan enmafurot? <sup>19</sup> Isunga ammu takú ay chaancha nakaskop  
as nan mun-ib-iblayan ay ensasakianan Apo Dios kiapú ta chaancha challu  
enmafurot kan hiya.

## 4

### *Nan Mun-ib-iblayan Ay Enkaren Apo Dios*

<sup>1</sup> Isunga, kiapú ta kukutug pay laing nan enkaren Apo Dios ay sungkopan  
takuntu ay ensasakianana ay mun-ib-iblayan, masapor il-ilaun takú, anak  
ya wachay achi makaskop kan chitaku. <sup>2</sup> Tay chinngor takú met nan Ammay  
ay Chamag ay kaman as nan kaap-uwan takú. Ngem as nan nanngorancha,  
maid infilangcha as ammay ay naichat kan chicha, tay chaancha enafurot  
nan hana chamag. <sup>3</sup> Chitaku ngarud ay enmafurot nan makaskop hesa ay  
mun-ib-iblayan. Tay maepachong sa as nan nauy kenalen Apo Dios kan  
chicha ay achi omafurot:

“Kiapú as fungatna, ensapatana un, ‘Achektu poros epaskop chicha as nan  
mun-ib-iblayan ay ensasakianak.’”

Kenalina na uray kun narpas na ay ensakiana nan mun-iblayancha nun-  
lapu as nan namayangana henan lufong. <sup>4</sup> Tay wacha pay nan naisurat as  
nan Kalen Apo Dios maepangkep as nan maekapitu ay urkiw ay kanana,  
“Nun-iblay hi Apo Dios as nan maekapitu ay urkiw as nan nunlopasana ay  
namayang as nan am-in.”\* <sup>5</sup> Kenalina kasin, “Achektu poros epaskop chicha  
as nan mun-ib-iblayan ay ensasakianak.” <sup>6</sup> Isunga nan chiyuycha emmon-  
ona ay nanngor as nan Ammay ay Chamag at chaancha nakaskop as nan

† **3:11** Exo. 17:1-7; Num. 14:1-13; Sal. 95:7-11    ‡ **3:15** Sal. 95:7-11    \* **4:4** Gen. 2:2

mun-ib-iblayan ay ensasakianan Apo Dios kiapú ta chaancha enmafurot. Ngem uray mu hiyasa, wachacha pay nan tapina ay laychun Apo Dios ay makaskop hid-i.<sup>7</sup> Kasin enkeddeng Apo Dios nan tukún ay timpu ta wachay chansan nan tataku ay sungkop, ya nán hana makali ay timpu at ad wani ay urkiw. As nan narpasan chi kaat ay tawwun, enpaisuratna nan nauy kan Ari David:

*"Ad wani ay urkiw, mu chungrunu nan kalen Apo Dios, achiyu koma patangtangkenun nan numnumyu."*

<sup>8</sup> Tay mu tit-iwa ay hi Josue at empanguna nan tataku as nan mun-ib-iblayan ay enkaren Apo Dios, chaan koma infiakian Apo Dios as nan naawni nan maepangkep as nan tukún ay urkiw.<sup>9</sup> Isunga wacha pay laing nan mun-ib-iblayan ay ensasakianan Apo Dios para as nan tatakuna ay kaman as nan nun-ib-iblayan Apo Dios as nan maekapitu ay urkiw.<sup>10</sup> Tay uray ngachana ay sungkop as nan mun-ib-iblayan ay ensasakianan Apo Dios at mun-iblay as nan mismu ay chununa ay kaman as nan enat Apo Dios.<sup>11</sup> Isunga epapati takú nan kafaelan takú ay sungkop as nan hana ay mun-ib-iblayan ta maid koma kan chitaku nan manurad as nan kaap-uwan takú ay chaan nakaskop kiapú as nan chaancha nangafurotan as nan infiakian Apo Dios.

<sup>12</sup> Tay nan kalen Apo Dios at matataku ya mannakafialin. Tadtachum mu nan katatachuman ay espada ay nun-ooram chi saetna ay makachuyok as nan kachuchur-uman ay parten nan achor. Assesa us ay makaskop nan kalen Apo Dios as nan kauunikian ay numnum chi taku, ya mafalina ay okomún nan naetatafun ay laychun ya pangkepna.<sup>13</sup> Maid nafiyang ay maetatafun kan Apo Dios. Kamancha am-in forfollachan as nan mangilana, tay ammuna nan am-in ay maepangkep kan chicha, ya kan hiya nan masapor ay manongfiatan takuntu as nan am-in ay en-enat ya ninumnumnum takú.

### *Hi Jesus Nan Kangatuwan Ay Pachi Takú*

<sup>14</sup> Popomkat takú as nan pammati takú ay ipudnu takú as nan sangwanan nan tataku, tay wacha challú nan Anak Apo Dios ay hi Jesus ay kangatuwan ay pachi takú ay nanguy henan mismu ay kawad-an Apo Dios ad chaya.

<sup>15</sup> Nan kangatuwan ay pachi takú at fiakun hiya nan achi makafiael ay sumug-ang as nan munkapkapuyan takú. Tay napachasana nan am-in ay karasen chi sulisug ay kaman kan chitaku, ngem hiya at chaan finmasor.

<sup>16</sup> Isunga masapor naturud takú ay maesnop as nan sangwanan Apo Dios ay kurpuwan chi grasya ta maawat takú nan sug-ang ya nan grasya ay mangfiachang kan chitaku as nan timpu ay munsaporan takú.

## 5

<sup>1</sup> Nan tunggal kangatuwan ay pachen nan chiyuycha Judio at mapili as nan iib-ana ay tataku ya machutokan ay mangerepresentar kan chicha as nan Apo. Nan hana ay machutokan at hiya nan mangichaton as nan chiyuycha animar ya nan chiyuycha ichat nan iib-ana ta mapakawancha as nan fiasfiasorcha.<sup>2</sup> Kafaelana ay manug-ang as nan chiyuycha finmasor ay achi nangammu ay kenomsawcha, tay uray hiya ay mismu at wacha us chi munkurangan.<sup>3</sup> Kiapú ta assesa hiya, masapor mun-ichaton kan Apo Dios para as nan mismu ay fiasfiasorna ya para us as nan fiasfiasor nan tataku.

<sup>4</sup> Mu maepangkep as nan nauy machayaw ay saad, maid mangchutok as achorna ay munfialin as kangatuwan ay pachi. Ngem kun at hi Apo Dios nan mangayag kan hiya ay kaman as nan enommat kan Aaron.

<sup>5</sup> Mu maepangkep us kan Cristo, chaana chinutokan nan achorna as nan machayaw ay saad ay hiyasa nan nunfialinana as kangatuwan ay pachi. Ngem kun at hi Apo Dios nan nangchutok kan hiya. Tay kenalen Apo Dios kan hiya,

“He-a nan Anakku. Ad wani ay urkiw, ha-un nan Amam.”\*

<sup>6</sup> Wacha pay nan naisurat as nan Kalen Apo Dios ay kanana,

“Pachika in-inkiana ay kaman as nan kenapachen Melkisedec.”†

<sup>7</sup> As nan kawad-an Jesus asna's luta, inpipigsana ya inyag-akorna ay nunkarkararag ya chinmawchawat kan Apo Dios ay makafiael ay mangesarakan kan hiya as nan utúy. Chinngor Apo Dios nan kararagna, tay nunpakumbaba hiya ay nangtongpar as nan laychun Apo Dios. <sup>8</sup> Uray mu hiya at Anak Apo Dios, sinuruna nan atun ay omafurot kan Apo Dios babaen as nan naparpaliwasanana. <sup>9</sup> Kiapú ta tenongparna ay ustuustu nan am-in ay enpakaman Amana, nunfialin hiya as kurpuwan chi maid patingkiana ay kaesarakanan nan am-in ay omafurot kan hiya, <sup>10</sup> tay chinutokan Apo Dios hiya as kangatuwan ay pachi ay kaman as nan kenapachen Melkisedec.

### *Nan Tukun As Nan Chiyuycha Mangenganuy As Pammaticha*

<sup>11</sup> Ongor pay nan laychunmi ay ifiakia kan chakayu maepangkep as nan kenapachen cha Jesus kan Melkisedec, ngem nalikiat ay epakaawat kan chakayu, tay nunsidlay kenapadsokyu ay chumngor. <sup>12</sup> Tay ad wani ay nafiayag at chi enmaafurotanyu, libfengna ay chakayu koma nan mangisursuru as nan iib-ayu. Ngem kunyu at met payat masapor chi mangisuru kan chakayu as nan enmon-oná ay sursuru maepangkep kan Apo Dios. Kaman kayu nunfialin as mutun ay manapor as kiatas ay achi makafiael ay mangan as natangken ay makan. <sup>13</sup> Am-in ay cha yangkiay munkiatkiatas at kaman pay laing mutun ay achi mangematon as ustu ya nalintig ay ukiali. <sup>14</sup> Ngem nan natangken ay makan ay kaman as nan naun-unig ay sursuru at para as nan naonangan ay tataku. Chicha nan inmingsa ay mangosar as nan numnumcha ay makafiael ay mangematon as ammay ya mangotettet.

## 6

<sup>1</sup> Isunga masapor taynan takú nan enmon-oná ay sursuru maepangkep kan Cristo, ya umuy takú as nan naun-unig ay sursuru ta maonngan takú as nan pammati takú. Achi takú itukiatukia ay manuru as nan nauycha enmon-oná ay sursuru: nan mangchukkianan as nan maid kotokna ay cha atuutun ya nan tit-iwa ay pammati kan Apo Dios, <sup>2</sup> nan sursuru maepangkep as funyag, nan panangepatay as lima,\* nan matakawan nan nunkatuy manipud as nan utúy, ya nan maid patingkiana ay mun-okomán Apo Dios. <sup>3</sup> Umuy takú as nan naun-unig ay sursuru mu eparufus Apo Dios.

<sup>4</sup> Tay nan chiyuycha nankug as pammaticha kan Apo Dios at achicha poros mafialin ay maawis kasin ay munfiafiawi, tay nasilawan at nan numnumcha, ya napachasancha at nan inchat Apo Dios ya nan Espiritu Santo.

<sup>5</sup> Napachasancha us nan kenaammay nan kalen Apo Dios ya naleknacha nan pannakafialin Apo Dios ay maepaila as tapen chi urkiw. <sup>6</sup> Mu chinukkiancha chaná am-in, achicha poros mafialin ay maawis kasin ay munfiafiawi, tay kamancha cha kasin elansa nan Anak Apo Dios as nan koros ya chacha papbafiainan hiya as nan sangwanan nan tataku.

\* <sup>5:5</sup> Sal. 2:7    † <sup>5:6</sup> Gen. 14:17-20; Sal. 110:4; Heb. 7:1-10    \* <sup>6:2</sup> Gen. 48:14; Ara. 6:6; 8:17; 19:6

<sup>7</sup> Nan taku at maepachong as nan luta. Tay nan luta ay nauchauchanan ay mangepatufu as nan chiyucha mura ay wachay kotokna as nan nakin luta at bendisyonan Apo Dios. <sup>8</sup> Ngem nan luta ay tumufowan nan sufet ya tapina pay ay nunkapakiatan ay lukiam at maid'kotkotokna. Mu hiyasa, kiayud' maituchor, ya as nan anongos at mapuorantu.

<sup>9</sup> Ngem uray mu hiyana nan ifiakiami kan chakayu ay laylaychunmi ay iib-a, maid munchanakianmi maepangkep kan chakayu, tay ammumi ngamin ay ammay nan kasasaadyu maepangkep as nan kaesarakanyu. <sup>10</sup> Nalintig challu hi Apo Dios. Achina liwliw-an nan ammay ay enkamkamanyu ya nan layadyu kan hiya ay maila as nan namadfiadngangananyu as nan iib-ayu ay omaafurot. Uray inkiana ad wani, iturturuyyu ay mamadfiachang kan chicha. <sup>11</sup> Nan laraychunmi as solet at iturturuy ngarud nan tunggal usa kan chakayu ay mangepapati ay mangnamnama as nan matongparan nan enkaren Apo Dios inkiana as nan munfiangchan Cristo. <sup>12</sup> Nan achimi laraychun at nan pomadsokanyu. Ngem kunyu at turachun nan tataku ay kiapú as nan pammati ya anoscha at tawichunchantu nan enkaren Apo Dios.

### *Nan Enkaren Apo Dios*

<sup>13</sup> Masapor numnumunyu nan nun-ekariyan Apo Dios kan Abraham. Kiapú ta maid nangatngatu mu hiya as uyna munsapataan, nunsapata hiya as nan mismu ay achorna. <sup>14</sup> Kenalina kan Abraham, "Siguradu ay bendisyonak he-a, ya paongoroktu nan chiyucha kianakmu."† <sup>15</sup> Kiapú ta enan-anosan Abraham ay nunsusuud, naawatna nan enkaren Apo Dios kan hiya.‡ <sup>16</sup> Mu laychun nan taku ay epakaammu as nan iib-ana ay tit-iwa nan infiagfiakiana, munsapata as nan nangatngatu mu hiya. Tay mu hiyasa nan atuna, munpaddingkia nan am-in ay sososekcha. <sup>17</sup> Kun pay hi Apo Dios, narawag ay enpailana as nan chiyucha manawid as nan enkarina ay achina poros fiarfialiwan nan pangkepna. Isunga entapina nan sapatana as nan enkarina. <sup>18</sup> Achi poros mafiarfialiwan nan nauycha chuwa: nan enkaren Apo Dios ya nan ensapata, tay achi poros mafialin ay munkutum hi Apo Dios. Isunga chitaku ay kaman naekasiw ay lenmayaw ay umuy kan Apo Dios at mafialin ay kaskasin takú popomkat as nan namnama ay naichat kan chitaku. <sup>19</sup> Nan nauy namnama takú ay kaman as nan mangepapakud as nan papor at hiyasa nan mangepapigsa as nan pammati takú, tay siguradu ay matongpar. Kiapú as nan namnama takú, kaman takú at sinungkop henan mismu ay kawad-an Apo Dios ay kaman as nan sinungkopan nan kangatuwan ay pachi henan Kasasantowan ay Kuwartu ay linilingfian nan kurtina as Templo. <sup>20</sup> Hid-i nan emmon-onaan Jesus mu chitaku ta hiya nan maketagtakiatfor kan Apo Dios para kan chitaku, tay hiya nan nunfialin as kangatuwan ay pachi in-inkiana ay kaman as nan kenapachen Melkisedec.

## 7

### *Nan Kenapachen Melkisedec*

<sup>1</sup> Hi Melkisedec ay anna ad pus-uy at ari ad Salem ya pachen Apo Dios ay Kangatuwan. As nan cha munfiangchan cha Abraham ay nurpu as nan nakikufiatancha as nan nangamisancha as nan chiyucha ari, uy sinib-at Melkisedec, at benendisyona hiya. <sup>2</sup> As nan hiyachi, inchat Abraham kan Melkisedec nan pagkapuron nan am-in ay senamsamcha. Nan lay-chun ay kanan nan ngachan Melkisedec at "Aren chi Kenalintig," ya nan

† **6:14** Gen. 22:16-17    ‡ **6:15** Gen. 12:1-4; 21:5; 25:26

laychuna pay ay kanan at “Aren chi Talna.” Tay nan laychun ay kanan nan Salem at talna. <sup>3</sup> Maid naisurat as nan Kalen Apo Dios maepangkep as nan chanakchakor winnu kaap-uwan Melkisedec. Maid us naisurat as maepangkep as nan naiyankana winnu natuyana. Tay hiya at kaman as nan Anak Apo Dios ay maid patingkian chi kenapachina.

<sup>4</sup> Masapor numnumunyu nan kenangaton Melkisedec as solet. Tay uray chin Abraham ay machayaw ay apu takú ad pus-uy at inchatna kan Melkisedec nan pagkapuron nan am-in ay senamsamna. <sup>5</sup> Infilin nan Lintig ay nan chiyuchya kianak Levi ay munfalin as papachi at chicha nan mangara as nan pagkapuru ay murpu as nan iib-acha ay Judio, uray kun pachongcha chicha ay kianak Abraham. <sup>6</sup> Hi Melkisedec at fiakun kianak Levi, ngem enawatna nan pagkapuru kan Abraham. Nan usa pay at benendisyonana hi Abraham uray mu hi Abraham ay anna nan kawad-an nan chiyuchya karen Apo Dios. <sup>7</sup> Maid poros chuwachuwa ay nangatngatu challu nan bomendisyon mu nan mabendisyonan. <sup>8</sup> Kun pay nan papachi ay kianak Levi at enawatcha nan pagkapuru ay murpu as nan tataku ay matuytu. Ngem kun pay hi Melkisedec ay kutug ay matataku at enawatna nan pagkapuru ay hiyasa nan naifiakia as nan Kalen Apo Dios. <sup>9</sup> Mafialin takú ay kanan un uray chin Levi ay nun-aw-awat as pagkapuru at naetapi kan Abraham ay nangichat as pagkapuru kan Melkisedec. <sup>10</sup> Tay uray mu chaan pay naiyanak hi Levi as nan nainib-atan Melkisedec kan Abraham, naifilang challu ay nawawacha hiya as nan anchor Abraham, tay hi Abraham nan apuna as nan pidwa.

### *Nan Pachi Ay Nangatngatu Mu Hi Melkisedec*

<sup>11</sup> Naichat nan lintig as nan chiyuchya Judio ay naifisar as nan kenapachen chi Levita ay achi makafiael ay mangepalintig as tataku. Isunga masapor takú tukún ay pachi ay kaman as nan kenapachen Melkisedec, fiakun kaman as nan kenapachen Aaron ay kianak Levi. <sup>12</sup> Tay as nan masoktan nan kenapachi, masapor us masokatan nan lintig. <sup>13</sup> Nan Apo takú ay chami kankanan at chaan murpu as nan kianak Levi ay napiliyan nan papachi ad pus-uy. Ngem kun at murpu hiya as nan tukún ay kianak, ya maid poros murpu as nan kianakna ay nunserfi as pachi as nan altar. <sup>14</sup> Naammuwan ay ustу ay murpu hiya as nan kianak Juda, ya maid poros infiagfiakian Moises as maepangkep as nan papachi as nan hana ay kianak.\*

<sup>15</sup> Narakraka takú pay ay maawatan ay nasokatan nan kenapachen Levi as nan enmaliyan nan tukún ay pachi ay kaman kan Melkisedec. <sup>16</sup> Nunfialin nan hana kaman kan Melkisedec as pachi ay chaana tenawid as nan kaap-uwana ay kaman as nan infilin nan lintig, ngem babaen as nan pannakafialin nan fiyagna ay maid patingkiana. <sup>17</sup> Kanana as nan Kalen Apo Dios,

“Pachika in-inkiana ay kaman as nan kenapachen Melkisedec.”†

<sup>18</sup> Isunga nakaan nan sikud ay filin, tay maid kafaelana ay mangepangu as nan tataku ay umuy kan Apo Dios ya maid us kotokna. <sup>19</sup> Tay nan Lintig Moises at maid kafaelana ay mangepalintig as nan tataku. Ngem ad wani, inchat Apo Dios nan am-am-ammay ay namnama babaen kan Apo Jesus ta mafialin takú ay maesnop kan Apo Dios.

<sup>20</sup> Fiakun yangkiay nan am-am-ammay ay namnama takú, tay wacha us nan sapatana Apo Dios kan Jesus. Maid assid-i ay sapatana as nan chiyuchya

\* <sup>7:14</sup> Exo. 28:40-43; 29:9; Lev. 21,22; Num. 3-4 † <sup>7:17</sup> Sal. 110:4

kianak Levi ay nunpachi. <sup>21</sup> Ngem nunpachi hi Jesus babaen as nan sapatan Apo Dios ay kanana,

“Nan Apo at ensapatan, ya achi poros mafialiwan nan numnumna maepangkep as nan nauy:

‘Pachikantu in-inkiana.’ ”<sup>‡</sup>

<sup>22</sup> Kiapú as nan nauy ay ensapatan Apo Dios, hi Jesus nan mangepasiguradu ay kaskasin omammay nan nauy turagna kan chitaku.

<sup>23</sup> Nauy pay nan usa ay natkunan Jesus as nan papachi ay kianak Levi. Nan ongor ay papachi at chaan nunturturuy nan nunserserfiyancha, tay natuycha am-in. <sup>24</sup> Ngem hi Jesus at matataku in-inkiana. Isunga munturturuy challu nan kenapachina in-inkiana. <sup>25</sup> Isunga maid munkurangan chi mangesarakanana as nan tataku ay maesnop kan Apo Dios babaen kan hiya, tay matataku hiya in-inkiana ay cha maketagtakiatfor kan Apo Dios para kan chicha.

<sup>26</sup> Hi Jesus challu nan ustuustu ay kangatuwan ay pachi ay masapor takú. Nasantowan hiya, ya maid maepabpfiasor kan hiya winnu maid fiasfiasorna. Naisyan hiya as nan chiyuuya fumafiasor ya napachayawan hiya mu nan am-in ay wacha ad chaya. <sup>27</sup> Hiya at achi kaman as nan tapina ay kangatuwan ay papachi. Tay hiya at achi inurkiw ay masapor mun-ichaton omona as para as nan mismu ay fiasfiasorna, angkiay ya munichaton para as nan fiasfiasor nan tataku. Namingpingsan nan enatna ay nangichaton as achorna kan Apo Dios. <sup>28</sup> Maiyunud as nan Lintig Moises nan pannakachutok nan kangatuwan ay papachi ay wachay munkurangancha. Ngem maiyunud as nan sapatan Apo Dios ay enman-anongos ay emnali mu nan Lintig nan pannakachutok nan Anakna ay maid munkurangana in-inkiana as pachi.

## 8

### *Hi Jesus Nan Kangatuwan Ay Pachi Taku (2 Co. 3:7-11)*

<sup>1</sup> Nan laychunmi ay maawatanyu as nan chami ifiagfiakia at hiyana: Wacha at kan chitaku nan chiyuuya kangatuwan ay pachi ay nangatokor as apét kannawan nan tronon Apo Dios ay Mannakafialin ad chaya. <sup>2</sup> Nan munserserfiyana as kangatuwan ay pachi at henan tit-iwa ay munchay-chayawan kan Apo Dios ad chaya ay hi Apo Dios mismu nan nangamma. Fiakun as nan fiawi ay naamma as larat ay kun tataku nan nangamma nan munserserfiyana.

<sup>3</sup> Nan tunggal kangatuwan ay pachi at nachutokan ay mangichaton as nan chiyuuya animar ya tapina ay ichaton nan tataku kan Apo Dios. Isunga nan nauy kangatuwan ay pachi takú at masapor us wachay ichatona kan Apo Dios. <sup>4</sup> Mu wacha hiya asna's luta at achi munpachi hiya, tay wachacha at nan nachutokan ay papachi ay mun-ichatchaton as nan inflin nan Lintig. <sup>5</sup> Nan panagserficha as papachi at kun yangkiay kapadpachong winnu aiw nan wacha ad chaya. Tay as nan kiayud mangiyammaan Moises as nan fiawi ay naamma as larat ay munchaychayawancha at inflin Apo Dios kan hiya nan nauy:

“Ilaum ay ustuu ta nan am-in ay ammaam at kapadpachong nan enpailak kan he-a aschi's chuntug.”\*

<sup>‡</sup> **7:21** Sal. 110:4; Heb. 5:6; 7:17      \* **8:5** Exo. 25:9, 40; 26:30; 27:8

**6** Ngem nan panagserfi ay enawat Jesus at nangatngatu as solet mu nan panagserfen nan sikud ay papachi. Kaman us as nan fiarú ay turag Apo Dios at nangatngatu mu nan emmona ay turagna ay inchatna kan Moises, kiapú ta hi Jesus nan nuntotong-an nan tataku ya nan Dios, ya naiyunud us as nan kaskasin ammay ayenkarkaren Apo Dios.

**7** Tay mu maid munkurangan nan sikud ay turag, achi koma masapor chi maesokat. **8** Ngem empafiasor Apo Dios nan tatakuna as nan nangaliyana, “Omalintu nan urkiw ay mangammaak as nan fiarú ay turagku as nan chiyucha kianak Israel ya as nan chiyucha kianak Juda.

**9** Nan nauy turagku at achi kaman as nan inturagku as nan kaap-uwancha ad pus-uy as nan urkiw ay nange panguruwak kan chicha ay nak-ak ad Egípto.

Chaaancha inturuy ay nangtongpar as nan hana inturagku kan chicha, isunga ennganuyku chicha.

**10** Nauy nan ituragkuntu as nan chiyucha kianak Israel as tapen chi urkiw: Ipuuykuntu nan chiyucha lintigku as numnumcha, ya isuratkuntu chasa as nan pusucha ta achicha liwliw-an.

Figfikunchantu ay ha-un nan uycha Apo Dios, ya chichantu nan tatakok.

**11** Achichantu poros isuruwan nan iib-acha winnu ifiakia as nan kakailiyan-chaa un, ‘Figfikunyu nan Apo.’

Tay nan am-in at ammuwaktu uray nan kaapuchan ay taku inkiana as nan kaamuchan.

**12** Tay pakawanoktu chicha as nan mangotettet ay en-enatcha, yaache ktu poros kasin numnumnumun nan fiasfiasorcha.”<sup>†</sup>

**13** As nan nangifiag-an Apo Dios as nan fiarú ay turag, infilangna as lukiak nan emmona, ya uray ngachana ay lumukiak ya machunot at kiayud maid.

## 9

### *Nan Nunchaychayawan Nan Tataku Kan Apo Dios As Nan Fiawi Ay Naamma As Larat*

**1** Nan chiyuy emmona ay turag Apo Dios as nan tatakuna at wachay filfilin maepangkep as nan ustu ay atun nan tataku ay munchayaw kan Apo Dios. Wacha us nan enammaancha ay fiawi ay naamma as larat ay munchaychayawancha kan hiya asna's luta.\* **2** Nan nauy naammaan ay fiawi ay naamma as larat at chuwa nan kuwartuna. Nan omona ay kuwartu ay maskop at makali un Nasantowan ay Kuwartu. Hid-i nan naesakianaan nan maepatpatngan chi silaw ya nan lamesaan ay maepatpatngan nan tenapay ay naichatchaton kan Apo Dios. **3** Nakurtinaan nan sugpan nan omona ay kuwartu. Nakurtinaan us nan maekadwa ay kuwartu ay makali un Kasasantowan ay Kuwartu. **4** Hid-i nan kawad-an nan altar ay fialetok ay mamuppuoran as insenso. Wacha us nan kasón ay napakpakan as fialetok ay makali un Kasón nan Turag. Nan naipuuy ad chur-um nan kasón at fianga ay fialetok ay naittuwan nan makan ay makali un mana, nan surkud Aaron ay senmaliping ya nan chuwa ay chapen-ay ay naisuratan nan filfilin Apo Dios.<sup>†</sup> **5** As nan oson nan kasón at wacha nan chuwa ay napaykan ay enang-anghel ay makali un kerubim ay mangepaila ay wacha hi Apo Dios hid-i. Nan chiyucha payakcha ay nafifitlag at penapaingancha nan tangub

\* **8:12** Jer. 31:31-34    \* **9:1** Exo. 25-27; Lev. 24:1-9    † **9:4** Exo. 16:31-35; 30:1-10; Num. 17:8-10; Deut. 10:3-5

nan kasón ay naiwarwarsiyan nan chara ta mapakawan nan tataku as nan fiasfiasorcha. Ngem fiakun challu ad wani nan mangepakaawatanmi kan chatona am-in.

<sup>6</sup> Hiyana nan enat chatud-i am-in ay naesakiana as nan munchay-chayawancha, at inurkiw ay sungkop nan papachi as nan omona ay kuwarton nan fiawi ay naamma as larat ay mangekaman as nan chunucha. <sup>7</sup> Ngem nan maekadwa ay kuwartu at nan kangatuwan ay pachi yangkiy nan makaskop, ya kun yangkiy mamingsan as nan makatawwun. Achi poros makaskop mu maid chara as ichatona kan Apo Dios para as nan mismu ay fiasfiasorna ya fiasfiasor nan tataku ay chaan nangukurat ay finmasor. <sup>8</sup> Babaen kan tono, epakaammon nan Espiritu Santo ay chaan pay natkafian nan charan ta makaskop nan tataku as nan Kasasantowan ay Kuwartu mu kukutug pay laing nan omona ay kuwartu as nan fiawi ay naamma as larat. <sup>9</sup> As nan nauy omona ay kuwartu, wacha nan laychuna ay kanan ad wani ay timpu. Mu maepangkep as nan chiyuycha animar ya nan chiyuycha tapina ay naichaton kan Apo Dios, achicha poros mafialin ay charosan chi numnum nan munchaychayaw kan Apo Dios. <sup>10</sup> Tay am-in chaná ay chaton at maepangkep yangkiy as nan makan, maikop ya tukutukún ay atun ay manguras as anchor. Masapor matongpar chaná ay lintig para as nan anchor inkiana as nan timpu ay mangepafiaruhan Apo Dios as nan am-in.

### *Hi Cristo Nan Tonga As Nan Fiarú Ay Turag*

<sup>11</sup> Ngem enmali at hi Cristo as kangatuwan ay pachi ay nangepaila as nan chiyuycha ammay ay bendisyon ay wacha at kan chitaku kiapú as nan fierú ay turag. Nan munserserfiyana ad chaya at am-amud ya am-ammay mu nan Kasasantowan ay Kuwartu as nan fiawi ay naamma as larat, tay fiakun taku nan nangamma winnu asna's luta nan kawad-ana. <sup>12</sup> Namingpingsan nan sinungkopan Cristo henan Kasasantowan ay Lukiar ay kawad-an Apo Dios ad chaya. Nan uyna inchaton kan Apo Dios at fiakur charan chi kianching ya urfun ay fiaka, ngem kuna at inchat nan mismu ay charana. Hiyana nan enatna ay nangesarakan kan chitaku in-inkiana. <sup>13</sup> Nan charan nan chiyuycha kianching winnu cha umurúg ay urfun ay laki ay fiaka, winnu chapor nan napuoran ay cha umurúg ay urfun ay fiai ay fiaka at naiwarsicha as nan tataku ta macharosancha kasin, at mafialinchas kasiñay munchayaw kan Apo Dios. <sup>14</sup> Mu nacharosancha babaen as nan charan chi animar, ay achi at paat kaskasin nan charan Cristo ay mangcharos kan chitaku? Babaen as nan pannakafialin nan Espiritu Santo ay maid patingkiana, inchaton Cristo kán Apo Dios nan mismu ay achorna ay maid'poros kurangna. Nan charana at mafialina ay charosan nan numnum takú as nan maid kotokna ay cha atuutun ay muntoróng as nan utý ta mafialin takú ay munserfi kan Apo Dios ay matataku in-inkiana.

<sup>15</sup> Isunga hi Cristo nan tonga<sup>‡</sup> as nan fierú ay turag ta nan chiyuycha enayakian Apo Dios at awatuncha nan maid patingkiana ay bendisyon ay enkaren Apo Dios. Maekaman na, tay natuy hi Cristo ay nangwayawaya kan chicha as nan fiasfiasor ay en-enatcha as nan timpon nan enmona ay turag.

<sup>16</sup> Mu wachay anongos ay filin ay isurat nan taku maepangkep as kakud-kudwaan chi kuk-uwana mu matuy, masapor mapaneknekan ay tit-iwa ay natuy hiya. <sup>17</sup> Tay maid kafaelan nan naisurat ay anongos ay filfilin mu

<sup>‡</sup> **9:15** Heb. 8:6.

kukutug ay matataku nan nangamma. Mafialin yangkiay mu natuy at hiya. <sup>18</sup> Isunga uray nan emmona ay turag at achi matongpar sukúd wachay chara as mangepaneknek ay wachay natuy. <sup>19</sup> Tay kun pay narpas ay inflakian Moises as nan am-in ay tataku nan tunggal filin nan Lintig, enarana nan charan nan chiyuycha urfun ay fiaka ya kianching, at enkaslangna as nan chanum. Inkiarotna nan murchachara ay chotchot nan karnero as nan pangan nan makali un hisupu, at entabnawna as nan nachanman ay chara. Hana at iwarsti as nan liblu ay naisuratan nan chiyuycha filfilin ya as nan am-in ay tataku. <sup>20</sup> As nan chana mangiwarsiyan, kenalina, "Nan nauy ay chara nan mangepaneknek as nan turag ay inflilin Apo Dios ay tongparunyu."§ <sup>21</sup> Assesa us ay wenarsiyana as chara nan fiawi ay naamma as larat ya nan am-in ay ka-ichin ay naosar as nan munchaychayawancha. <sup>22</sup> Tit-iwa ay maiyunud as nan Lintig, nan kiayud am-in ay ka-ichin at macharosancha babaen as nan chara, ya maid mapakawan ay tataku as nan fiasfiasorcha mu maid chara ay omayas.\*

### *Nan Naichatonan Jesu Cristo Nan Kiapúna Ay Makaan Chi Fiasfiasor*

<sup>23</sup> Isunga nan nauyucha ay naturad as nan tit-iwa ay wacha ad chaya at masapor maurasancha babaen as nan panangichaton as animar kan Apo Dios. Ngem nan wacha ad chaya at masapor kaskasin ammay chi maichaton mu chatona. <sup>24</sup> Tay nan sinungkopan Cristo at fiakun as nan Kasasantowan ay Lukiar ay enammaan chi tataku ay tinuradcha as nan tit-iwa ay wacha ad chaya. Nan sinungkopana at ad chaya ay mismu, ya ad wani hiya nan nunfialin as pannakaachor takú as nan sangwanan Apo Dios. <sup>25</sup> Nan kangatuwan ay pachen chi Judio at tenawwun ay sungkop as nan Kasasantowan ay Kuwartu ay mun-ichaton as charan chi animar. Ngem hi Cristo at chaana inpidwapidwa ay nangichaton as achorna. <sup>26</sup> Tay mu assidi ay tinuradna nan en-enat nan kangatuwan ay pachen chi Judio, namen ongor koma ay nun-iliwas hiya nunlapu as nan nafiyangan nan lufong. Ngem nan kenatit-iwana at namingpingsan nan enmaliyana asna's luta as nan nauy anongos ay timpu ta kaanuna nan fiasfiasor chi tataku babaen as nan nangichatonana as nan mismu ay achorna. <sup>27</sup> Naituding nan taku ay matuy as mamingsan. Angkiay ya okomún Apo Dios. <sup>28</sup> Kaman us kan Cristo at namingisan ay naichaton ta kaanuna nan fiasfiasor chi tataku. As nan kasinantu maepail-an, fiakun fiasfiasor chi tataku nan kiapúna, ngem omali ta uyna esarakán nan chiyuycha manglarayad ay maman-ud kan hiya.

## 10

<sup>1</sup> Nan Lintig Moises at kaman yangkiay aiw ay mangepaila as nan chiyuycha anam-ammay ay bendisyon ay omalintu, fiakun nan nauy nan mismu ay tit-iwa. Isunga uray kun tenawwun ay mapapchong nan chiyuycha chaton ay naichatchaton, achicha poros mafialin ay munfialinun nan tataku as maid munkurangancha ay maesnop ay munchaychayaw kan Apo Dios. <sup>2</sup> Tay mu nan chiyuycha nanaychayaw kan Apo Dios at tit-iwa ay nacharosancha as nan fiasfiasorcha, inkinakcha at koma ay nun-ichatchaton, tay maid nan mangisiw ay leknacha ay chicha at finmasorcha. <sup>3</sup> Ngem nan kenatit-iwana, nan nauyucha ay chatchaton at tenawwun ay epanumnumna nan fiasfiasor nan tataku. <sup>4</sup> Tay nan charan nan laki ay fiaka ya kianching at achina poros mafialin ay kaanun chi fiasfiasor nan tataku.

<sup>5</sup> Isunga as nan enmaliyan Cristo asna's luta, kenalina kan Apo Dios, "Achim laychun nan chiyuycha naparti ay animar ya tapina ay chaton. Ngem kunmu at ensakiana nañ anchor chi taku para' kan ha-un.

<sup>6</sup> Chaanka nalaylaychan as nan chiyuycha animar ay napuppuoran ya nan catchaton ay para as nan makaanan nan fiasfiasor.

<sup>7</sup> Angkiay ya kenalek, 'Apo Dios, nauyak ay mangekaman as nan laychum ay kaman as nan naisurat as nan liblon nan Lintig maepangkep kan ha-un.'\*

<sup>8</sup> Nan omona ay kenalen Cristo kan Apo Dios at hiyana: "Chaanmu lenayad winnu chaanka nalaylaychan as nan catchaton ya nan chiyuycha inchat nan tataku kan he-a, winnu chiyuycha animar ay napuppuoran as nan altar ya nan catchaton para as nan makaanan nan fiasfiasor." Kenalina na uray mu naichaton chaná am-in ay maiyunud as nan Lintig. <sup>9</sup> Haat kanan Jesus, "Apo Dios, nauyak ay mangekaman as nan laychum." Nan nangaliyana as na at ta epailana ay menaidna nan kotok nan sikud ay catchaton ta esokatna hi Jesus as chaton. <sup>10</sup> Kiapú ta enkaman Jesu Cristo nan hana ay laychun Apo Dios, nunfialinun chitaku as nasantowan ay tatakon Apo Dios babaen as nan namingpingsan ay nangichatonana as nan mismu ay achorna.

<sup>11</sup> Nan am-in ay papachen chi Judio at inurkiw ay masennokatcha ay mangekaman as nan chunucha. Kanayoncha ay mun-ichaton as mapap-chong ay karasen chi chaton ay maid poros kafaelancha ay mangaan as fiasfiasor chi tataku. <sup>12</sup> Ngem hi Cristo at namingpingsana inchaton nan us-usa ay chaton para as nan makaanan chi fiasfiasor. Haat tomokor hiya as apét kannawan Apo Dios. <sup>13</sup> Hid-i nan munsusuuchana ad wani inkiana maamis nan chiyuycha kafusorna ay kaman chicha nan kiakiatinana. <sup>14</sup> Tay babaen as nan us-usa ay chatona, nunfialinuna nan tataku ay penasantona as nan fiasfiasorcha as maid munkurangancha in-inkiana as nan sangwanan Apo Dios.

<sup>15</sup> Paneknekan us nan Espiritu Santo kan chitaku ay tit-iwa chaná babaen as nan naisurat as nan Kalen Apo Dios ay kanana,

<sup>16</sup> "Nauy nan ituragkuntu kan chicha as tapen chi urkiw: Ipuuykuntu nan chiyuycha lintigku as pusucha ya isuratkuntu chasa as numnumcha ta achicha liwliw-an."

<sup>17</sup> Hana at tuptupan,  
"Achektu kasin numnumnumun nan fiasfiasorcha ya nan mangotettet ay en-enatcha."†

<sup>18</sup> Mu napakawan ngarud chatona, achi kis-an wachay kasin maichaton para as nan fiasfiasor.

### *Maesnop Takú Kan Apo Dios*

<sup>19</sup> Isunga chakayu ay iib-a, kiapú as nan charan Jesus ay enmayas as nan natuyana, masapor naturud takú ay maesnop as nan sangwanan Apo Dios ay maepachong as nan Kasasantowan ay Lukiar. <sup>20</sup> Tay babaen as nan natuyana ay maepachong as nan naraksetan nan kurtina ay somasali as nan sugpan, tenkaifian Jesus para kan chitaku nan fierú ay charan ay kaman matataku, tay nan charan ay ansa at hiya mismu.‡ <sup>21</sup> Isunga kiapú ta wacha nan amud ay pachi takú ay mangenongnongnong as nan pamiliyan Apo Dios, <sup>22</sup> masapor maesnop takú as nan sangwanan Apo Dios kiapú as nan ongor ay layad takú ya maid poros chuwatchuwa takú as nan pammati

\* <sup>10:7</sup> Sal. 40:6-8   † <sup>10:17</sup> Jer. 31:33-34   ‡ <sup>10:20</sup> Mar. 15:38

takú. Tay nacharosan takú at as nan mangisiw ay numnum ay kaman takú nawarsiyán as nan charan Cristo, ya kaman us naurasan nan anchor takú as nacharos ay chanum. <sup>23</sup> Masapor popomkat takú as nan namnama takú kan Apo Dios ay ipudnu takú as nan tataku, tay matalek hi Apo Dios ay mangtongpar as nan enkarina. <sup>24</sup> Numnumun takú koma nan atun takú ay munfifinnangun ay mangepaila as layad ya mangekaman as ammay ay cha atuatan. <sup>25</sup> Achi takú koma enganuy ay cha maam-among ay munchayaw kan Apo Dios ay kaman as nan cha at-atun nan tapina. Ngem kun takú at koma munpepennapigsa as numnum, ya kaskasin takú pay atun sa kiapú ta maila takú ay cha maesnop nan urkiw ay kasis omaliyan nan Apo.

<sup>26</sup> Tay mu kurkuratun takú ay cha fumasfiasor karpasan nan nangam-muwan takú as nan kenatit-iwa maepangkep kan Cristo, maid at kasin maichaton as mafialin ay mangaan as fiasfiasor. <sup>27</sup> Maid at tukún as masmas-ud mu achi nan kauugyat ay mun-okomán Apo Dios ya nan kumilkilarok ay apuy ay mamuortu as nan am-in ay mangontra kan hiya. <sup>28</sup> Nan taku ay manglabsing as nan Lintig Moises at maepapatuy ay achi poros masugangan as nan muntistiguwan nan chuwa winnu turu ay mangepafiasor kan hiya. <sup>29</sup> Mu assesa nan chusan nan manglabsing as nan Lintig Moises, ay achi kaskasin kauugyat chi chusan nan taku ay mangelarayus kan Jesus ay Anak Apo Dios? Tay epailana ay ifilangna nan charan Jesus as maid kotokna, uray mu nan charana ay anna nan nangepaneknek as nan fiarú ay turag Apo Dios ya nangcharos as nan fiasfiasorna. Tit-iwa ay kaskasin kauugyat nan chusana, tay insurtuwuna nan Espiriton Apo Dios ay umichat as grasyana. <sup>30</sup> Tay ammu takú met ay hi Apo Dios nan nangali, “Ha-un nan wachay kalibfengana ay omes-ang. Ha-untu nan omafus.”

Kenalina us, “Ha-untu nan mangokóm as nan tatakok.”\*

<sup>31</sup> Kauugyat as solet ay machusa as nan mun-okomán nan matataku ay Dios.

<sup>32</sup> Numnumunyu nan enommat kan chakayu ad kasin as nan nasisi-lawanan nan numnumyu. Tay uray kun kayu nun-iliwas as solet at nun-eta-un kayu. <sup>33</sup> Wachacha nan timpu ay penabpfiainan ya penarpalikiat chakayu as nan sangwanan nan ongor ay tataku. As nan tapina ay timpu at nakekadkadwa kayu as nan assesesay inliwascha. <sup>34</sup> Sinug-anganyu ya finadnganyu us nan chiyucha fiarud. As nan namrosancha as kuk-uwayu, naragsak kayu challu ay nangan-anos, tay ammuyu ay wacha pay nan kaskasin ammay ya maid patingkiana ay kenafiaknangyu. <sup>35</sup> Isunga achiyu maichun nan talekyu kan Apo Dios, tay ongortu nan gun-gunayu. <sup>36</sup> Masapor mun-eta-un kayu ta maekamanyu nan enkeddeng Apo Dios ya maawatyu nan enkarina. <sup>37</sup> Tay wacha nan naisurat as nan Kalen Apo Dios ay kanana,

“As nan hen-omaketan yangkiay ay timpu at umchantu nan cha omali, ya achina taktakun nan omaliyana.

<sup>38</sup> Nan chiyucha nalintig ay tatakok at matakucha babaen as nan pammaticha.

Ngem mu wachay munsanud ay muntalek kan ha-un, achiyak malaylaychan kan hiya.”†

<sup>39</sup> Ngem chitaku at achi takú maetapi as nan chiyucha nunsanud as nan pammaticha ya maisiyan in-inkiana kan Apo Dios. Kun at nan maetapiyan takú at as nan chiyucha wachay pammaticha ya naesarakan.

§ **10:28** Deut. 17:2-7   \* **10:30** Deut. 32:35-36; Rom. 12:19   † **10:38** Hab. 2:3-4; Rom. 1:17; Gal. 3:11; Pal. 22:7

# 11

## *Nan Maunud Ay Pammati*

<sup>1</sup> Ad wani ngarud, ngachana nan pammati? Hiyasa nan siguradu ay matongparantu nan cha takú namnamaun ya nan ustу ay ammu takú ay wacha tit-iwa nan achi takú maila. <sup>2</sup> Kiapú ta wachay pammatten nan kaap-uwan takú ad pus-uy at nalaylaychan hi Apo Dios kan chicha.

<sup>3</sup> Kiapú ta wachay pammati takú, maawatan takú ay nan lufong at nafiyang babaen as nan kalen Apo Dios. Isunga nan maila at naammaan ay nurpu as nan achi maila.\*

<sup>4</sup> Kiapú ta wachay pammatten Abel, nun-ichaton hiya kan Apo Dios as kaskasin ammay mu nan enat Cain. Kiapú us ta wachay pammatina at enpailan Apo Dios nan panang-aprobarna ay hiya at nalintig ay taku as nan nang-awatana as nan inchatona. Kiapú ta wachay pammatten Abel, uray natuy hiya ad pus-uy, kaman pay laing cha makekarkali kan chitaku ad wani.

<sup>5</sup> Kiapú ta wachay pammatten Enoc, narab-et hiya ad chaya ta achina mapachasan nan utý. Chaan nad-anan hiya asna's luta, tay enaran Apo Dios. Wacha nan naisurat as nan Kalen Apo Dios ay kanana un sakbay marab-et hi Enoc, penalaylayadna hi Apo Dios. <sup>6</sup> Nan maid pammatina at achina mafialin ay palaylaychun hi Apo Dios. Tay nan manglayad ay paat maesnop kan Apo Dios at masapor afurotuna ay wacha tit-iwa hi Apo Dios, ya afurotuna us ay gun-gunaana nan chiyuycha manganap kan hiya.

<sup>7</sup> Kiapú ta wachay pammatten Noe, chinumngor hiya as nan infiakian Apo Dios maepangkep as nan ommat as tapen chi urkiw ay achi maila as nan hiyachi ay timpu. Enafurotna chi, ya nun-amma hiya as papor ta maesarakancha ay hinfiaruy. Kiapú as nan nauy ay pammatina, infilang Apo Dios hiya as nalintig ay taku ay maiyunud as nan pammatina. Ngem kun pay nan tapina ay tataku at naokómcha ay nachusa.

<sup>8</sup> Kiapú ta wachay pammatten Abraham, enmafurot as nan nangayakian Apo Dios kan hiya ay umuy henan lukiar ay enkaren Apo Dios ay ichatnantu kan hiya. Tenaynana nan mismu ay ilina uray achina ammu nan ay-ayana.

<sup>9</sup> Kiapú ta wachay pammatina, nagyan as nan chiyuycha fiawi ay naamma as larat, ya kun kaman mangili henan lukiar ay anchí ay enkaren Apo Dios ay ichatnantu kan hiya. Assesa us nan en-enat Isaac ay anakna ya hi Jacob ay apuna ay chicha nan naifilang ay mang-awattu as nan enkaren Apo Dios.

<sup>10</sup> Enat Abraham sa, tay namnamauna ay makiili henan maid patingkiana ay siyudad ay plenanon ya enammaan Apo Dios.

<sup>11</sup> Kiapú ta wachay pammatten Sara ay asawan Abraham, nunsikug hiya uray narakay as solet, tay nuntalek hiya ay tongparun Apo Dios nan enkarina.† <sup>12</sup> Uray mu hiyasa ay naifilang hi Abraham as kaman natuy kiapú as nan kenarakayna as solet, nurpu challu kan tona ay taku nan ongoongor ay kianak ay maepachong as nan kaongor chi taraw ad chaya ya maepachong as nan achi mafilang ay lakian henan olet nan fiayfiay.

<sup>13</sup> Am-in chaná ay tataku at natuycha ay napigsa pay laing nan pamictha uray mu chaancha enawat nan enkaren Apo Dios kan chicha. Uray mu hiyasa, kamancha challu inila nan ommatanantu as tapen chi urkiw,

---

\* <sup>11:3</sup> Gen. 1-2 † <sup>11:11</sup> As nan tapen nan manuskritu as nan kali ay Griego at kanana, “babaen as nan pammatina at inchat Apo Dios kan hiya nan kafielan ay mun-epotot uray narakay as solet hiya ya fiasig hi Sara ay asawana, tay nuntalek ay atun Apo Dios nan enkarina.”

ya nunlaylayadcha. Isunga inpudnucha ay kuncha yangkiay kaili ay achi am-ammu ya tataku ay napelet ay munliklikud asna's luta. <sup>14</sup> Tay nan tataku ay mangiflagfiakia as assesia at epailacha ay tit-iwa ay chacha an-anapun nan tukún ay lukiar ay kuwacha in-inkiana. <sup>15</sup> Mu nan chiyuy sikud ay lukiar ay tenaynancha nan nunumnumuncha, wachay wayacha koma ay munfiangad. <sup>16</sup> Ngem fiakun chi nan chacha numnumnumun, tay nan laraychuncha ay umuyan at henan kaskasin ammay ay lukiar ad chaya. Isunga achi maifain hi Apo Dios ay maawakian as Dioscha, tay ensakianaana chicha as siyudad ad chaya.

<sup>17</sup> Kiapú ta wachay pammatten Abraham, nakasakiana hiya ay mangichaton kan Isaac ay pototna as nan nanistingan Apo Dios kan hiya. Hi Abraham ay anna ay nang-awat as nan enkaren Apo Dios at nakasakiana ay mangichaton as nan us-usa ay anakna.<sup>‡</sup> <sup>18</sup> Nan enkaren Apo Dios kan Abraham at hiyana:

“Babaen kan Isaac at mawad-anka as kiankianakmu.”<sup>§</sup>

<sup>19</sup> Tay nuntalek hi Abraham ay uray mu matuy hi Isaac, kafaelan Apo Dios ay mangtaku kan hiya manipud as nan utúy. Isunga kaman enawat Abraham hi Isaac ay nurpu as nan utúy.

<sup>20</sup> Kiapú ta wachay pammatten Isaac, benendisyonana nan chuwa ay an-akna ay cha Jacob kan Esau para as tapen chi urkiw.\*

<sup>21</sup> Assesa us ay kiapú ta wachay pammatten Jacob, as nan kiayudna matuyan, benendisyonana nan chuwa ay ap-una ay potot Jose. As nan nangekamanana's chi, penmapakud as nan surkudna ta achi matu-ug, ya nunchaychayaw kan Apo Dios.<sup>†</sup>

<sup>22</sup> Kiapú us ta wachay pammatten Jose, as nan kiayudna matuyan, infi-akiana ñan mak-akantu nan chiyuycha kianak Israel ay nurpu ad Egipto, ya infilina ay masapor etakinchantu nan tong-orna ta ilufokcha henan ay-ayancha.<sup>‡</sup>

<sup>23</sup> Kiapú ta wachay pammatten nan chanakchakor Moises, entafuncha hiya nuñlapu as nan naiyankana inkiana as nan maekatlu ay furanuna, tay inilacha ay am-ammay hiya ay onga. Chaancha inmugyat as nan filin nan Faraon ay ari ad Egipto ay mapatuy nan chiyuycha kaiyan-anak ay lallaraki ay Judio.<sup>§</sup>

<sup>24</sup> Kiapú ta wachay pammatten Moises, as nan inmurukiana, achina lay-chun ay maifilang as anak nan nanarakon kan hiya ay fiasang ay potot nan Faraon.\* <sup>25</sup> Kuna at lenayad ay nakiliglikiat as nan tatakon Apo Dios mu nan mangkiananasana as nan hen-omaketan ay lagsak ay ichat chi fiasor. <sup>26</sup> Infilangna ay un-unuya ay parpalawan nan tataku hiya kiapú as nan pammatina as nan omaliyantu nan Cristo mu nan kuwauna nan kenafiaknang ad Egipto. Tay nan paatna nunumnumun at nan gun-guna ay maichat kan hiya as tapen chi urkiw.

<sup>27</sup> Kiapú ta wachay pammatina, nak-ak hiya ad Egipto ay chaan inmugugyat as nan fungat nan Faraon. Entata-una nan likiat, tay kamana iilaun hi Apo Dios ay achi maila. <sup>28</sup> Kiapú us challu ta wachay pammatina, insuruna as nan chiyuycha kianak Israel nan masapor ay atuncha as nan omona ay fiasta ay makali un Munlausan sakbay ay nak-akcha ad Egipto. Infilina

<sup>‡ 11:17</sup> Rom. 9:7-9    <sup>§ 11:18</sup> Gen. 22:1-18    <sup>\*</sup> <sup>11:20</sup> Gen. 27:27-29    <sup>† 11:21</sup> Gen. 47:31; 48:1-20  
<sup>‡ 11:22</sup> Gen. 50:24-25    <sup>§ 11:23</sup> Exo. 1:22    <sup>\*</sup> <sup>11:24</sup> Exo. 2:10-12

us kan chicha ay warsiyancha nan pantiwcha as charan chi karnero ta achi matuy nan papanguru ay lallaraki ay an-akcha as nan mar-osan nan pomatuy ay anghel.<sup>†</sup>

<sup>29</sup> Kiapú ta wachay pammatten nan chiyuycha kianak Israel, nanarancha ay nanguy henan namag-anan ay luta ay hiyasa nan nunkudwa ay Mun-chachara ay Fiayflay. Ngem kun pay penachas nan chiyuycha i-Egipto ay mangunud kan chicha, nurningcha am-in.<sup>‡</sup>

<sup>30</sup> Kiapú ta wachay pammatten nan chiyuycha kianak Israel, naikurub nan nangatu ay tuping ay nangaarad henan siyudad ay Jerico as nan narpasancha ay nunmarcha ay nangliwus henan nauy ay siyudad as pitu ay urkiw.<sup>§</sup>

<sup>31</sup> Kiapú ta wachay pammatten Rahab ay usa ay fiafiai ay mangepabpafi-ayad as achorna, chaan naetapi hiya ay napatuy as nan chiyuycha chaan emmafurot kan Apo Dios, tay menangilina ay ustu nan chiyuycha kianak Israel ay uy nangsiisiim henan siyudad ay Jerico.\*

<sup>32</sup> Ay ituruyku pay ay mun-ukud? Achi met ommat chi timpok ay mangukud as nan maepangkep kan cha Gideon, Barac, Samson, Jefte, David, Samuel ya nan chiyuycha pomapadtu.<sup>†</sup> <sup>33</sup> Kiapú ta wachay pammaticha, wachacha kan chicha nan nangafiai as nan nakikubkufiatancha henan tukutukún ay muntorayan. Wachacha nan tapina ay nalintig nan atuncha ay mun-okóm, ya wachacha nan nang-awat as nan enkaren Apo Dios. Wachacha us nan tapina ay nangakúm as tapak nan chiyuycha layon.<sup>‡</sup>

<sup>34</sup> Nan tapina kan chicha at penauchya nan kumilkilarok ay apuy.<sup>§</sup> ya nan tapina at naelawayawancha nan mangpatuy koma kan chicha babaen as nan espada. Nan tapina at nakapuuchya, ngem nunfialincha as mafikas. Nan tapina at nunfialincha as naraing ay makikufiat, ya enpalayawcha nan ongoongor ay kafusorcha ay sosorchachu. <sup>35</sup> Wachacha us nan fianafiai ay nang-awat as nan chiyuycha nataku manipud as nan utúy ay iib-acha ay laylaychuncha.

Kiapú ta wachay pammatten nan tapina kan chicha, enachicha nan pannakawayawayacha. Kuncha at lenayad ay maparpaliwasan inkiana natuycha. Tay nan namnamauncha at nan kaskasin ammay ay fiyag ad chaya as nan matakuvancha manipud as nan utúy.\* <sup>36</sup> Nan tapina us at naot-otyokcha ya nasapsapletcha. Nan tapina at nakor-ongancha ay naifiarud. <sup>37</sup> Wachacha us nan nalomlomtak inkiana natuycha, ya wachacha us nan narakiachi ay nakudwa nan achorcha. Natuycha nan tapina babaen as espada. Nan tapina us at kun lawá kopkop chi karnero ya kianching nan fiachucha. Pararu ay puglicha, naparpalikiatcha ya naparpaliwasancha. <sup>38</sup> Nunliklikudcha henan chiyuycha disyerto ya henan chunchuntug ay cha omab-afong as nan liyang ya os-osok. Ngem nan kenatit-iwana at achi maekari nan tataku asna's luta ay makekadkadwa kan chicha.

<sup>39</sup> Nalaylaychan hi Apo Dios kan chatona ay tataku kiapú ta wachay pammaticha, ngem chaancha challu enawat nan enkaren Apo Dios kan chicha. <sup>40</sup> Wacha nan kaskasin ammay ay plenaplanon Apo Dios para kan

---

<sup>†</sup> **11:28** Exo. 12   <sup>‡</sup> **11:29** Exo. 14:16-17   <sup>§</sup> **11:30** Jos. 6   \* **11:31** Jos. 2:11-22; 6:22-25   <sup>†</sup> **11:32** Jos. 23:9-10; Ukom. 4:14-16; 7:22-25   <sup>‡</sup> **11:33** Dan. 6:1-27   <sup>§</sup> **11:34** Dan. 3:1-30   \* **11:35** 1 Ar. 17:19-24; 2 Ar. 4:18-37

chitaku, tay achina tongparun nan enkarina kan chicha inkiana makekad-kadwa takú kan chicha ta mun-us-usauna chitaku am-in ay mang-awat as nan enkaren Apo Dios, ya munfialinuna chitaku am-in as tataku ay maid munkurangana.

## 12

### *Hi Apo Dios Ay Ama Takú*

<sup>1</sup> Isunga kiapú taongoongorcha nan nangepaneknek ad pus-uy ay nan-garufong kan chitaku, esakiana takú koma nan achor takú ay kaman as nan cha makeab-abfiak as tennagtakian. Iwagkia takú koma nan am-in ay mangepapachagsun kan chitaku, kaskasin nan fiasfiasor ay naraka ay pomkat as nan achor takú. Epapasnek takú koma challu ay tomagtak ay makeab-abfiak as nan charan ay inchat Apo Dios ay umuyan takú. <sup>2</sup> Nan kanayon koma ay cha takú numnumnumun at maepangkep kan Jesus, tay hi Jesus nan mangelapu ya mangepaommat as pammati takú ta maid munkurangana. Kiapú as nan lagsak ay namnamauna, enta-una nan inliwasna as nan koros ay chaana penagpakian-anu nan naifiafainana. Ad wani, nangatokor hiya as apét kannawan nan tronon Apo Dios.\*

<sup>3</sup> Nunumnumunyu hi Jesus ay nangeta-ta-un as nan nangonkontraan nan fumafiasor ay tataku kan hiya ta achi kayu machismaya ya omayu ay omafurot.† <sup>4</sup> Tay as nan chayu mangad-achiyan as fiasor, maid poros kan chakayu nan napatuy kiapú as pammatiyu. <sup>5</sup> Ay kunyu liniw-an nan kaken Apo Dios ay mangepapigsa as numnum ay infiakian Apo Dios kan chakayu ay inflangas as an-akna? Kenalina, “Anakku, masapor chumngorka ay ustu mu disciplinaun chaká as nan Apo.

Masapor achiika machismaya mu sengaran chaká.

<sup>6</sup> Tay disciplinaun nan Apo nan taku ay laylaychuna, ya chusauna nan tunggal usa ay ifilangna as anakna.”‡

<sup>7</sup> Eta-unyu nan iliwasyu ay maepachong as nan idisiplinan nan usa ay ama as nan pototona, tay hiyana nan mangepaila ay ifilang chakayu kan Apo Dios as an-akna. Tay ay kun challu wachay anak as achi disciplinaun nan amana? <sup>8</sup> Mu achi chakayu disciplinaun kan Apo Dios ay kaman as nan mangdisiplinaana as nan am-in ay an-akna, laychuna ay kanan at bastardo kayu ay fiakun chakayu nan tit-iwa ay an-akna. <sup>9</sup> Kaman us as nan am-a takú asna's luta, chicha nan mangdisiplina kan chitaku, ya rispituwun takú challu chicha. Isunga kaskasin takú koma munpaetoray kan Ama ad chaya ta matakutakú. <sup>10</sup> Tay nan am-a takú asna's luta at kaatna ay tawwun yangkiay nan mangdisiplinaancha kan chitaku ay maiyunud as nan ammucha ay ustu. Ngem nan mangdisiplinaan Apo Dios kan chitaku at para as nan omammayan takú ta makelak-am takú as nan kenasantona. <sup>11</sup> Tit-iwa ay achi poros omeopalagsak nan maidisiplina, kun at omepasaket as numnum. Ngem as nan marpasana, ammay nan munflanakiana as nan chiyuchya nadisiplinaan, tay maetoróng as nan nalintig ay ukiali ya natalna ay numnum.

### *Nan Tukun*

<sup>12</sup> Isunga chakayu ay kaman nabray chi takrayna ya nakapuy chi kung-una kiapú as nan likiatyu, papigsaunu nan numnumyu. <sup>13</sup> Munturturuy

\* **12:2** Filip. 2:5-11; Heb. 2:10    † **12:3** Gal. 6:9    ‡ **12:6** Prov. 3:11-12; Pal. 3:19

kayu ay manaran as nan lutug ay charan ay maepachong as nan ustu ay pammati ta nan iib-ayu ay kaman napisud at achicha masopsop ay komapuy, ngem kuncha at pumigsa.

<sup>14</sup> Epapatiyu nan kafaelanyu ay makekappia as nan am-in ay tataku ya unuchunyu nan nasantowan ay panagfiyag, tay mu fiakun assena, achiyu mafialin ay ilaun hi Apo Dios. <sup>15</sup> Il-ilaunyu ta maid mankug as nan grasyan Apo Dios, ya ta maid kan chakayu nan kaman as nan napaet ay mura ay tumufu. Tay mu wachay assena, lilirokuna ya alisana nan ongor ay tataku. <sup>16</sup> Il-ilaunyu us ta maid kan chakayu nan mangepappapas as assi ay lachok, ya maid achi nadiosan ay kaman kan Esau ay achi poros mangnumnum kan Apo Dios. Tay hi Esau ay anna at ensokatna as henkomakan nan tawidna as panguru ay anak. <sup>§ 17</sup> Ammuyu ay as nan naawni, as nan nanglaraychanana ay mang-awat as nan bendisyon ay epatawid amana, naachi at hiya. Uray kun nunpakpakaasi hiya ay cha mun-ag-akor, maid at atuna ay mamaliw as nan enatna.\*

<sup>18</sup> O, il-ilaun takú ta as nan lutug ay charan nan manaranan takú, tay nan maesnopen takú kan Apo Dios at achi kaman as nan en-enat nan kaap-uwan takú. Tay chicha at naesnopcha henan chuntug ay Sinai ay kawad-an nan cha kumarkiarud ay apuy ay inilacha. Napachasancha us nan pararu ay ngongot ya nan mun-atifudfud ay puwak.† <sup>19</sup> Chinngorcha us hid-i nan tarampet ya nan kalen Apo Dios. As nan nanngorancha's chi ay kalen Apo Dios, nunpakpakaasicha ta achina ituruy ay munkali kan chicha. <sup>20</sup> Tay achicha at maeta-un nan nauy infilina: "Uray usa ay animar ay manikchud henan chuntug at masapor malomtak inkiana matuy." <sup>21</sup> Nunsidila ay kau-ugyat nan kail-ana. Isunga uray hi Moises at kenalina, "Munpayagpakiak as ugyatku."

<sup>22</sup> Ngem kun pay chitaku, enmali takú ay naesnop henan chuntug ay Sion ay hiyana nan Jerusalem ay wacha ad chaya. Enmali takú ay naesag-un henan siyudad nan matataku ay Dios ay kawad-an us nan kalifulifu ay anheles ay cha makelagragsak ay munchaychayaw kan hiya. <sup>23</sup> Naetatapi takú as nan naaamong ay papanguru ay an-ak Apo Dios ay naisurat at nan ngadngachancha ad chaya. O, makius-usa takú as nan espiriton nan nalintig ay tataku ad pus-uy ay nunfialinun Apo Dios as tataku ay maid munkurangancha. Enmali takú us ay naesnop as nan Dios ay mangokómtu as nan am-in ay tataku <sup>24</sup> ya kan Jesus ay tonga as nan fiarú ay turag. Nan charana ay naiwarsi ay manaros as nan tataku as nan fiasfiasorcha at kaskasin ammay nan laychuna ay epakaammu mu nan charan Abel ay chumawat as asang.‡

<sup>25</sup> Il-ilaunyu ta achiyu hinlurlurkun ay chumngor kan Apo Dios ay cha munkarkali. Tay mu chaan naelawayan nan kaap-uwan takú nan chusa as nan nangachiyancha as nan nangepakaammu as nan nasantowan ay chamag kan chicha asna's luta, anan atun takú pay ay lomayaw mu achi takú chumngor as nan chiyuy nurpu ad chaya. <sup>26</sup> Tay inwawud Apo Dios nan luta as nan nunkarkaliyana ad Sinai ad pus-uy. Ngem ad wani, wacha nan enkarina ay kanana: "Mamingsan pay at iwawudku nan luta, ya fiakun nan luta yangkiay mu achi nan am-in ay wacha ad chaya."§ <sup>27</sup> Nan laychun ay kanan nan nauy: "Mamingsan pay at iwawudku nan luta," at makaan chaná

§ <sup>12:16</sup> Gen. 25:33-34 \* <sup>12:17</sup> Gen. 27:30-40 † <sup>12:18</sup> Exo. 19:12-22; 20:18-21; Deut. 4:11-12; 5:22-27 ‡ <sup>12:24</sup> Gen. 4:10 § <sup>12:26</sup> Exo. 19:18; Hag. 2:6; Pal. 16:17-21

ay finayangna ay mafialin ay maiwawud ta nan achi poros maiwawud yangkiay nan mayagyagtu.

<sup>28</sup> Isunga munyaman takú koma kan Apo Dios, tay maetapi takú henan muntorayan ay achi poros maiwawud. Munyaman ya munchayaw takú koma kan Apo Dios ay maiyunud as nan ustu ya mangepalaylayad kan hiya.

<sup>29</sup> Tay nan panangchusan Dios takú at kaman apuy ay mamuor as nan am-in.

## 13

### Nan Atun Ay Mangepalaylayad Kan Apo Dios

<sup>1</sup> Iturturuyyu ay munleennayad ay kaman hen-anag-i as nan pammati. <sup>2</sup> Achiyu liw-an ay mangiliyun nan chiyucha kaili ay achiyu am-ammu. Tay wachacha nan tapina ay nangekaman as na ay achicha ammu ay angheles payat nan menangilicha.\* <sup>3</sup> Nunumnumunu ay mangfiachang as nan chiyucha naifiafiarud kiapú as nan pammaticha. O, fiadnganyu chicha ay kaman kayu naetatapi kan chicha ay naifiarud. Assena us nan atunyu as nan chiyucha cha maparpaliwasan ay kaman kayu cha makiliwas kan chicha.

<sup>4</sup> Epategyu koma am-in nan pannakeasawa, ya nan hen-asawa at muntenalekcha koma, tay chusaun Apo Dios nan umiwet ya nan mangepappapas as assi ay lachok.

<sup>5</sup> Achi kayu naakum as siping, ngem masapor mapnek kayu as nan wacha kan chakayu, tay kanan Apo Dios,

“Achek poros taytaynan winnu enganganuy chakayu.”†

<sup>6</sup> Isunga naturud takú ay mangali,

“Hi Apo Dios nan mamadfiachang kan ha-un,  
isunga achiyak umugyat.

Ay wachay mafialin ay ekaman chi taku kan ha-un?”‡

<sup>7</sup> Numnumunu kasin nan chiyucha emnon-onu ay nangepangpanguru kan chakayu ay nangepakaammu kan chakayu as nan kalen Apo Dios. O, numnumunu nan nuntongparan nan katakuwancha, ya turachunyu nan pammaticha. <sup>8</sup> Tay hi Jesu Cristo at achi poros munfiarfialiw, ngem kun hiihiya ad kasin, ad wani, ya in-inkiana. <sup>9</sup> Isunga achiyu poros eparufus nan tanuktukn ay fiakun tit-iwa ay sursuru ay maningiw kan chakayu. Tay ammay challu ay nan grasyan Apo Dios nan mangepapigsa as numnum takú, fiakun nan filfilin ay maepangkep as makan. Nan chiyucha nanongtongpar kan chatud-i ay filfilin at chaancha poros nafiadngan.

<sup>10</sup> Nan papachen chi Judio ay mangiturturuy ay munserserfi henan munchayyawancha ay maiyunud as nan Lintig Moises at maid kalibfengancha ay makelak-am as nan chiyucha bendisyon takú ay nunfianakian nan naichatonan Cristo as nan koros. <sup>11</sup> Iskop nan kangatuwan ay pachi nan charan nan chiyucha animar as nan Kasasantowan ay Kuwartu ay mangichaton kan Apo Dios kiapú as nan fiasfiasor nan tataku. Ngem nan achor nan animar ay naparti at naiuyucha henan fiakun sakop nan inmiiliyanca ta mapuoran.§ <sup>12</sup> Isunga hi Jesus us at nun-iliwas ya natuy henan fiakun sakop nan siyudad ay Jerusalem ta pasantowuna nan tataku babaen as nan mismu ay charana. <sup>13</sup> Isunga maetapi takú koma kan Jesus henan fiakun sakop nan siyudad. Nan laychun tona ay kanan at taynan takú nan sursuron nan Judio ta makelak-am takú as nan napabpfaiainana.

\* **13:2** Gen. 18:1; 19:1    † **13:5** Gen. 28:15; Deut. 31:6-8; Jos. 1:5-9    ‡ **13:6** Sal. 118:6    § **13:11**

<sup>14</sup> Tay fiakun challu asna's luta nan umiliyan takú in-inkiana, ngem kun takú at sasad-un nan siyudad ad chaya ay maepailantu as tapen chi urkiw. <sup>15</sup> Isunga babaen kan Jesus, nan kanayon koma ay ichaton takú kan Apo Dios at nan panangichaychayaw takú ya nan panagyaman takú kan hiya. Chatona nan ustу ay chatchaton nan tit-iwa ay mangipudnu ay hi Jesus nan Apona. <sup>16</sup> Masapor achi takú liwliw-an ay mangekaman as ammay ya muneennettan takú, tay chatona nan chatchaton ay mangepalaylayad kan Apo Dios.

<sup>17</sup> Masapor tongparunyu nan ifilin nan chiyuycha mangepangpanguru kan chakayu ya munpaetoray kayu kan chicha. Tay ay-aywanancha chakayu as nan pammatiyu ya songfiatanchantu kan Apo Dios mu anan enatcha ay nangekaman as chunucha. Tongparunyu tit-iwa nan ifilinchta maragsakancha ay mangekaman as nan chunucha. Tay mu achiyu atun sa, ngumuyuscha, ya achi kayu mafiadngan.

<sup>18</sup> Iturturuyu ay mangekarkararag kan chakami, tay ammumi ay nacharos nan numnummi ya laychunmi ay nan ustу nan kanayon ay atunmi. <sup>19</sup> Epakpakaasek paat kan chakayu ay ekarkarakrakanak ta achi mafiatay nan mangepafiangchan Apo Dios kan ha-un kan chakayu.

### *Nan Anongos Ay Kararag*

<sup>20-21</sup> Sapay koma ta hi Apo Dios ay kurpuwan chi talna nan mangichat kan chakayu as am-in ay ammay ay kasaporanyu ta tongparunyu nan laychuna. Sapay koma ta munfialinuna chitaku as tataku ay mangepalaylayad kan hiya babaen kan Jesu Cristo. Kiapú ta mapnek hi Apo Dios as nan charan Jesus ay Apo takú ay nangepaneknek as nan fierú ay turag ay maid patingkiana, tenakuna manipud as nan utúy hi Jesus ay amid ay mangay-aywan kan chitaku ay kaman karnerona. Machaychayaw koma hi Cristo in-inkiana. Amen.

### *Nan Anongos Ay Tukun*

<sup>22</sup> Epakpakaasek kan chakayu ay iib-a ay anosanyu ay chumngor as nan nauy tukunku ay mangepapigsa as numnumyu, tay akét yangkiay na ay suratku kan chakayu. <sup>23</sup> Laychok ay epakaammu kan chakayu ay nailufus at hi Timoteo ay ifia takú as pagfiaruchan. Mu omali ay dagus hiya hena, makeali kan ha-un ay uy mangila kan chakayu.

<sup>24</sup> Pakomostaunyu nan am-in ay mangepangpanguru kan chakayu hesa ya nan am-in ay iib-ayu ay tatakon Apo Dios. Nan iib-a takú ay nurpu ad Italia at cha chakayu us pakomostaun.

<sup>25</sup> Sapay koma ta mawawacha kan chakayu am-in nan grasyan Apo Dios. Amen.

## Nan Surat Santiago

### Nan Omona Ay Ammuwun

As nan Fiarú ay Turag, opat nan nakin ngachan as Santiago. Nan omona at hi Santiago ay potot Zebedeo ya sunúd Juan (Mt. 17:1; 27:56; Mar. 1:19; 3:17). Usa hiya as nan chiyucha apostoles Jesus (Mt. 10:2). Hi Santiago ay anna at napatuy as nan timpon Ari Herodes (Ara. 12:2) sakbay naisurat na ay surat. Nan maekadwa at hi Santiago ay potot Alfeo ya usa us as nan apostoles Jesus (Mt. 10:3; Ara. 1:13). Nan maekatlu at hi Santiago ay aman Judas. Hi Judas at usa as nan chiyucha apostoles (fiakun hi Judas Iscariote. Luc. 6:16; Ara. 1:13). Nan maekap-at at hi Santiago ay mange panganguru as nan omaafurot kan Jesus ad Jerusalem, ya hiya nan uy naketakiatforan Pablo ad Jerusalem as nan enmafurotana kan Jesus (Ara. 15:13-29; Gal. 1:18-19; 2:9). Hi Santiago ay anna nan nangisurat as nan nauy surat.

Nan nunsuratan Santiago at as nan am-in ay omaafurot kan Jesu Cristo, kaskasin as nan chiyucha omaafurot ay Judio ay nunkaiwaras henan tukutukún ay lukiar asna's luta (1:1). Nunsurat hiya ta liwlawauna ya isuruwana chicha as nan chiyucha ustу ay panagfiyag nan omaafurot. Kenalina un masapor naornos nan pammati ya nan cha atuatuun nan omaafurot, tay nan cha atuatuun at paneknékana nan pammati ya chicha nan mangepaila as nan fukias nan pammati. Tay mu maid fukias nan pammati ay ansa at maid kotkotokna (2:17, 20, 26).

Ongor pay nan insursuron Santiago maepangkep as nan nauy panagfiyag chi omaafurot ay maepangkep as nan kenafiaknang, kenapugli, sulisug, achi mapapchong ay atun as nan pachong ay taku, kaosaran nán chila, kenasilib, papatuy, kenapangas ya kenapakumbaba, panang-okóm as pachong ay taku, kenaanos, kararag ya tapina pay.

#### **Nan Nakudkudwaan Nan Nauy Surat**

Nan Laplapon Nan Surat 1:1

Nan Pammati Ya Nan Sulisug 1:2-18

Nan Chumngoran Ya Nan Mangekamanan 1:19-27

Nan Mapapchong Ay Atun As Pachong Ay Taku 2:1-13

Nan Pammati Ya Nan Ammay Ay Ekamkáman 2:14-26

Nan Chila 3:1-12

Nan Kenasilib Ay Nurpu Kan Apo Dios 3:13-18

Nan Tukun Ya Panangliwiwa Ås Pachong Ay Taku 4:1-5:6

Nan Kenaanos Ya Kararag 5:7-20

#### *Nan Laplapon Nan Surat*

<sup>1</sup> Ha-un hi Santiago ay usa ay fiabfiaarun Apo Dios ya hi Apo Jesu Cristo.

Nauy nan suratku kan chakayu am-in ay Judio ay omaafurot kan Cristo ay naiwaras henan tukutukún ay lukiar asna's luta. Komosta kayu?

#### *Nan Tit-iwa Ay Pammati Ya Kenasilib*

<sup>2</sup> Iib-ak, munlagragsak kayu koma as solet as nan manglak-amanyu as tukutukún ay likiat. <sup>3</sup> Tay ammyu ay as nan mapaneknekanan nan pammatiyu babaen as nan hanacha ay liglikiat, murmuy kafielanyu ay mangeta-un as uray ngachana ay kasasaad.\* <sup>4</sup> O, lumuwunyu ay ustу

\* <sup>1:3</sup> Rom. 5:2-5; Sal. 1:12; 1 Ped. 4:12-19

nan kafiaelanyu ay mun-eta-un ta maonngan kayu as nan katatakyu ay maid poros munkuranganyu. <sup>5</sup> Mu wacha kan chakayu nan kurang chi kenasilibna as nan ustу at tuna, chumawat koma kan Apo Dios. Tay hi Apo Dios at ongor chi layadna ay mangichat as kenasilib as nan am-in ay chumawat, ya achina ifungfungtan chicha. <sup>6</sup> Ngem as nan chumawatana, masapor afurotuna ya achi munchuwachuwa hiya ay ichat Apo Dios sa ay kenasilib. Tay nan taku ay munchuwachuwa as nan pammatina at kaman challuyon henan fiayfiay ay kun cha iturturchun chi angin as nan laychuna ay mangiyuyan. <sup>7-8</sup> Nan assesa ay taku at munchuwachuwa ya munkuykuyat as nan am-in ay atuna. Mu hiyasa, achina namnamaun ay maichattu nan uray ngachana ay chawatuna kan Apo Dios.

### *Nan Kenapugli Ya Kenafiaknang*

<sup>9</sup> Chakayu ay pugli ay iib-a, munlagragsak kayu koma, tay ifilang Apo Dios nan kasasaadyu as nangatu. <sup>10</sup> Kun pay chakayu ay nunkafiaknang ay iib-a, munlagragsak kayu koma as nan mangepakumbabaan Apo Dios kan chakayu. Tay nan fiaknang at kaman sabsafong nan chiyuchya lukiam ay mamaidtu.† <sup>11</sup> Tay as nan fomoknakian nan urkiw ya pomtangana at makling nan chiyuchya lukiam ya mag-as nan sabsafongcha. Mu hiyasa, mamaid nan kenaam-ammaycha. Assesa us as nan umchanantu nan katuyan nan fiaknang, uray as nan chana mangenongnongan as nan nigusyuna.‡

### *Nan Machistingan Ya Nan Masulisukian*

<sup>12</sup> Nakiasat nan taku ay mun-eta-un as nan machistingana. Tay as nan napanekeknanan nan pammatina, magun-gunaantu hiya as fiyag ay maid patingkiana ay enkaren Apo Dios as nan chiyuchya manglaylayad kan hiya. <sup>13</sup> Achi koma kanan nan chiyuy nasulisukian kiapú as liglikiat un hi Apo Dios nan nanulisug kan hiya. Tay hi Apo Dios at achi mafialin ay masulisukian ay mangekaman as mangotettet, ya maid poros sulisukiana. <sup>14</sup> Ngem nan tunggal usa at masulisukian as nan murpu as nan mismu ay mangotettet ay laylaychuna ay maepachong as nan papan ay manguyud ya mangawis kan hiya. <sup>15</sup> Angkiay kun pay napapanan hiya ay mangekaman as mangotettet ay laylaychuna, fumasor hiya. As nan mangiturturuyana ay fumasfiasor, epafoknag nan mismu ay achorna nan utý ay hiyasa nan maisiyanan kan Apo Dios.

<sup>16</sup> Laylaychok ay ib-a, achi kayu maal-allilaw. <sup>17</sup> Am-in ay maichat ay ammay ya ustу at murpu kan Dios Ama ad chaya. Hiya nan namayang as nan am-in ay wacha ad chaya ay sumilaw. Ngem uray cha munfialifaliw nan lawag nan urkiw ya nan sorag nan furan kiapú as nan tumuktukunan nan kawad-ancha, achi poros tumuktukún hiya. <sup>18</sup> Kiapú ta hiyana nan laychuna, nunfialinuna chitaku as an-akna babaen as nan tit-iwa ay sursuruna ta chitaku nan kaammayan as nan am-in ay finayangna.

### *Nan Chumngoran Ya Nan Mangekamanan*

<sup>19</sup> Laylaychok ay iib-a, nunumnumunyu ngarud na: Waschi koma un kanayon ay nakasakiana ay chumngor, numnumuna ay ustу haat munkali, ya achi fungngat. <sup>20</sup> Tay nan kenafungngat nan taku at achina challu tongparun nan nalintig ay panagfiay ay laychun Apo Dios. <sup>21</sup> Isunga kaanunyu ngarud nan am-in ay kaiisiw ay numnumyu ya nan manangotettet ay chayu

† **1:10** Isa. 40:6-8; Mat. 6:19-21; 1 Ped. 1:24    ‡ **1:11** Sal. 103:15-16

at-atun. Kun kayu at munpakumbaba kan Apo Dios ya tongparunyu nan kalina ay entanumna as nan numnumyu ay hiya nan makaesarakan kan chakayu.

<sup>22</sup> Manangtongpar kayu koma as nan kalen Apo Dios. Achiyu yangkiay cha chungchungrun. Tay mu hiyasa, kunyu cha al-allilawun nan achoryu.

<sup>23</sup> Tay nan taku ay manngor as nan kalen Apo Dios ya achina ekaman at maepachong as nan taku ay munsarming. <sup>24</sup> Kun pay marpas ay munsarming ya mak-ak, munliw-ana nan ustu ay ilana. <sup>25</sup> Ngem nan taku ay mangemamad ay mangachar ya mangtongpar as nan ammay ay lintig Apo Dios ay mangwayawaya as nan tataku at mabendisyonantu hiya as nan chana at-atun, tay achina liw-an nan chungruna ngem kuna at tongparun.

<sup>26</sup> Mu wachay mangifilang as achorna as relihiyoso ya achina maetporan ay mangifiakia as nan wacha as numnumna, kuna cha al-allilawun nan achorna. Mu hiyasa, maid kotkotok nan kenarelihiyosona. <sup>27</sup> Nan ifilang Dios Ama as ustu ya tit-iwa ay relihiyon at hiyasa nan mangaywanan as nan chiyucha ulila ya ellakas as nan munlikiatancha. Achi us maal-alisan as nan mangotettet ay panagfiyag nan achi omafurot kan Apo Dios.

## 2

### *Nan Maifiakia As Nan Achi Mapapchong Chi Atuna As Pachongna Ay Takú*

<sup>1</sup> Iib-ak, kiapú ta omaafurot kayu kan Apo takú ay Jesu Cristo ay machayaw, mapapchong koma nan atunyu as nan uray ngachana ay taku.

<sup>2</sup> Nauy nan maepadpachongan nan chuwa ay tataku ay sungkop as nan maam-amonganyu. Nan usa at fiaknang ay nasingsingan as fialetok ya nangafiachu as am-ammay. Nan maekadwa at pugli ay naragrag-uy chi fiachuna. <sup>3</sup> Angkiay ya mangiliyunyu nan chiyuy taku ay am-ammay chi fiachuna ay kananyu un, “Tomokorka as nan nauy am-ammay ay tokoran.” Kun pay as nan chiyuy pugli, kananyu un, “Kunka tomakchug hid-i,” winnu “Kunka tomokor as nan chat-or!” <sup>4</sup> Ay munpachong tit-iwa nan enatyu kan chicha ay chuwa? Achi! Tay kunyu at nunfalinun nan achoryu as kaman huwis ay mangotettet chi panang-okómna.

<sup>5</sup> Chumngor kayu, laylaychok ay iib-a! Pinilen Apo Dios nan chiyucha pugli as nan mangiilan nan tataku asna's luta ay munfialin as nafiaknang as pammati ya maetapi henan muntorayana ay enkarina as nan chiyucha munlarayad kan hiya. <sup>6</sup> Ngem chakayu at pabpfainanyu nan chiyucha pugli. Ngachancha nan totoray ay mamarpaliwas ya mamelepel ay mangicharum kan chakayu as nan sangwanan chi huwis mu achi nan nunkafiaknang. <sup>7</sup> Ay fiakun chicha us nan munkarkali as mangotettet as nan machayaw ay ngachan Jesu Cristo ay enmafurotanyu? Chicha met!

<sup>8</sup> Ustu nan atunyu mu tongparunyu nan kaamuchan ay lintig Apo Dios ay naisurat as nan Kalen Apo Dios ay kanana, “Laylaychum nan pachongmu ay taku kaman as nan atum ay manglaylayad as achormu.”\* <sup>9</sup> Ngem mu achi mapapchong nan atunyu as nan iib-ayu, fumasor kayu, ya maicharum kayu as usa ay lomalabsing as lintig. <sup>10</sup> Tay mu ngachana nan manglabsing as uray usa ay lintig at maifilang as lomalabsing as nan am-in ay lintig.† <sup>11</sup> Tay hi Apo Dios nan nangifilin, “Achika umiwet,” ya hiya us nan nangali, “Achika pomatuy.”‡ Uray mu chaanka inmiwet ngem penmatuyka, maifilangka as

\* <sup>2:8</sup> Lev. 19:18; Mat. 19:19; Mar. 12:31; Luc. 10:27    † <sup>2:10</sup> Mat. 5:19; Gal. 3:10; 5:3    ‡ <sup>2:11</sup> Exo. 20:13-14

usa ay lomalabsing as lintig. <sup>12</sup> Isunga il-ilaunyu nan am-in ay kananyu ya atunyu ay mangammu ay siguradu ay maokóm kayuntu ay maiyunud as nan lintig ay mangwayawaya as nan tataku. <sup>13</sup> Tay as nan mun-okomántu Apo Dios at achinantu sug-angan nan taku ay maid sug-angna as nan pachongna ay taku. Ngem nan taku ay sumug-ang at maid ugyatna as nan timpu ay mun-okomántu Apo Dios. §

### *Nan Pammati Ya Nan Ammay Ay Ekamkaman*

<sup>14</sup> Iib-ak, mu kanan nan usa ay taku un wachay pammatica kan Jesu Cristo ngem maid kail-an nan hana ay pammatica as nan chana ekamkaman, maid challu kotkotokna. Ay kun mafalin ay maesarakan hiya babaen as nan hana ay pammatica? <sup>15</sup> Mu ngay wachay ifia ay makasapor as ifiachuna ya kanuna as inurkiw, <sup>16</sup> ya kananyu kan hiya, “Ammaammayka koma. Achika koma cha masmaskaw ya munchugchukiaang,” ngem achiyu ichat nan kasaporana, maid kotkotok nan hana ay infiakiayu! <sup>17</sup> Assena us as nan pammatica ay mu hiihya ay maid kail-ana as nan ekamkaman, maiflang as natuy.

<sup>18</sup> Ngem anaka ya wachantu nan mangontra ay mangali, “Tukutukún chi atun nan tataku ay omafurot. Nan usa at kun yangkiay pammatica nan wacha kan hiya, ya nan usa at kun yangkiay nan ammay ay chana ekamkaman nan wacha kan hiya.” Ngem nan esongfiatku as nan chiyuy taku, “Anan atum ay mangepaneknek as nan pammatem mu achika omekaman as ammay as nan ifiam? Kun pay ha-un, nan ekamkamanku nan mangepaneknek as nan pammatek.” <sup>19</sup> Afurotum met ay kun us-usa nan Apo Dios. Ammay sal! Ngem munpachong kayu as nan chiyuycha anennet, tay uray chicha at afurotuncha sa, ya pomayagpagcha us kiapú as nan nunsidla ay ugyatcha as nan maokománchantu. <sup>20</sup> He-a ay maid ammuna! Ay masapor pay laing paneknekak ay maid kotkotok nan pammatica mu achi maepailá as nan ammay ay ekamkaman? <sup>21</sup> Numnumum pay hi Abraham ay kaap-uwan takú. Ay infilang Apo Dios hi Abraham as nalintig kiapú as nan enkamana as nan nangepatangana kan Isaac ay pototna as nan altar ta ichatona kan hiya? Chaan! <sup>22</sup> Ay maawatam ad wani ay nun-us-usa nan pammatica ya nan enkamana? Nan enkamana at penaneknekana nan kenatit-iwan nan pammatica. <sup>23</sup> Natongpar challu nan naisurat as nan Kalen Apo Dios ay kanana,

“Enmafurot hi Abraham kan Apo Dios, ya infilang Apo Dios hiya as nalintig kiapú as nan pammatica.”\*

Hiyasa nan naawakianan Abraham as kiayyum Apo Dios.† <sup>24</sup> Isunga ammu takú ay ifilang Apo Dios nan usa ay taku as nalintig babaen as nan ammay ay ekamkamana, fiakun babaen as pammatica yangkiay.

<sup>25</sup> Kaman us kan Rahab‡ ad pus-uy ay fiafiai ay mangepabpafiayad as achorna. Infilang Apo Dios hiya as nalintig kiapú as nan nangmangiliyana as nan chiyuycha kiának Israel ay munsissíum, ya entorongna chichá as nan tukún ay charan.

<sup>26</sup> Isunga nan pammatica ay maid kail-ana as nan ekamkaman at maid kotkotokna. Kaman as nan anchor ay tenaynan nan lenawana at natuy.

§ <sup>2:13</sup> Mat. 5:7; 18:21-35   \* <sup>2:23</sup> Gen. 15:6; Rom. 4:3; Gal. 3:6   † <sup>2:23</sup> 2 Cro. 20:7; Isa. 41:8

‡ <sup>2:25</sup> Jos. 2:1-21; 6:17, 25; Heb. 11:31

## 3

*Nan Chila Takú*

<sup>1</sup> Iib-ak, achi koma ongor kan chakayu nan munlayad ay munfialin as mun-isursuru as Kalen Apo Dios, tay ammuyu met ay kaskasin kami machusa mu achimi tongparun nan isursurumi. <sup>2</sup> Am-in takú at ongor chi komkomsawan takú, kaskasin as nan kali takú. Ngem mu wachay taku ay achi poros komkomsaw as nan kanana at maid munkurangana. Kafaelana us ay mangetpor as nan intiru ay achorna. <sup>3</sup> Kaman as nan kafiayu, mu takchun takú nan tapakna ay mangetortoróng kan hiya, mafialin ay etoróng takú nan intiru ay achorna. <sup>4</sup> Winnu numnumun takú nan papor. Uray mu ad-acha-an ya cha iturtchun chi napigsa ay angin, nan ek-ektel ay kumak as uchichina nan osarun nan munmanmanihu ay mangetoróng as nan laychuna ay mangiyuyan. <sup>5</sup> Assesa us as nan chila. Uray mu ek-eket ay parten nan anchor, kafaelana challu ay mangepangas as ongor.

Numnumunyu nan atun nan apuy. Uray mu filet yangkay, mafialina ay lukiayun nan narawa ay pagpag. <sup>6</sup> Nan chila at kaman apuy ay inintug Satanas ad inferno, ya hiyasa us nan mangepafoknag as ongor ay mangotettet. Uray kun ek-ektel ay parten nan anchor, mafialina ay pamangotettetun nan intiru ay anchor. Nan intiru ay fiyag chi usa ay taku ay kamana cha puoran as nan apuy ay nurpu ad inferno. <sup>7</sup> Mapaamon challu nan tataku nan am-in ay karasen chi munkik-iwi ay kaman as nan chiyuchya nunkaatap ay animar, nan chiyuchya mantat-ayaw, nan chiyuchya komadkachap ya nan chiyuchya wacha henan fiayfiay. O, penaamucha chicha am-in. <sup>8</sup> Ngem nan chila at maid poros makapaamu. Mangotettet ya achi poros mapasiw. Kaman urug ay kubra ay napnu as puwison ay makapatuy. <sup>9</sup> Hiyana nan pangchaychayaw takú kan Apo Dios ay Ama takú, ya pangtuchor takú as nan pachong takú ay taku ay finayang Apo Dios ay kaman kan hiya.\* <sup>10</sup> As nan usa ay tapak, fomoknag nan kali ay mun-ichayaw ya mun-ituchor. Iib-ak, fiakun koma assesa nan maekamkaman. <sup>11</sup> Ay fomoknag chi ammay ya mun-aklet ay chanum as nan usa ay uwgor? Achi! <sup>12</sup> Iib-ak, achi fumkias chi lubfian as kallufub, ya achi us fumkias chi sapyura as lubfian. Achi us mafialin ay fomoknag chi ammay ay chanum as nan uwgor ay fomokfoknakian chi mun-aklet ay chanum.

*Nan Kenasilib Ay Murpu Kan Apo Dios*

<sup>13</sup> Ay wachay masilib ya mannakaawat kan chakayu? Mu wacha, masapor paneknekana nan kenasilibna babaen as nan ustu ay panagfiyagna ya ammay ay ekamkamana ay wachay kenapakumbabana ya tit-iwa ay kenasilibna. <sup>14</sup> Ngem mu itupugyu as numnumun nan nunsidla ay kenaapos ya kenapasis-iya, achiyu epangpangas nan kenasilibyu, tay maekontra as nan kenatit-iwa. <sup>15</sup> Nan assesa ay kenasilib at achi murpu kan Apo Dios ad chaya, ngem kun at murpu kan Satanas ya as nan tataku asia's luta ay maid nan Espiriton Apo Dios kan chicha. <sup>16</sup> Tay mu wachay kenaapos ya kenapasis-iya, maid manongnong ya nan maekamkaman at am-in ay karasen chi mangotettet. <sup>17</sup> Ngem nan taku ay wachay kenasilibna ay murpu kan Apo Dios at omona, nacharos. Manangpakappia hiya as nan pachongna ay taku ya naanos. Achina epapelet nan laychuna. Ammay chi makekadkadwaana as nan tataku. Sug-angana as solet nan pachongna ay taku, ya ammay as solet chi atuna kan hiya. Kun us mapapchong

\* <sup>3:9</sup> Gen. 1:26-27; 9:6

chi atuna as nan tunggal usa, ya achi pakamankaman. <sup>18</sup> Nan tataku ay manangpakappia ta munturnosuncha nan pachongcha ay tataku at kaman chicha nan muntantanum as ammay ay fing-i, ya nan apitucha at nan nalintig ay panagfiyag.

## 4

### *Nan Kiapón Chi Masussusumaan*

<sup>1</sup> Anan kiapón chi masosongfiatanyu ya masusumaanyu? Ay fiakun chicha challu nan mangepapasanyu as nan mun-ongosányu ay manglilifok as nan numnumuyu? Chicha met!\* <sup>2</sup> Wacha nan laraychunyu ay arauun, ngem achiyu kafaelan ay mangara as sa, isunga nakasakiana kayu ay pomatuw. Wachay akumanyu, ngem achiyu maara, isunga makepatuy kayu. Achiyu maara chasa, tay achiyu chawatun kan Apo Dios. <sup>3</sup> As nan chumawatanyu kan Apo Dios, achiyu maawat kiapú ta achi ustu nan pangkepyu, tay chumawat kayu ta osarunyu yangkiay as nan mun-ongosán nan achoryu.

<sup>4</sup> Chakayu ay achi mapiyar ay tataku! Ay achiyu ammu ay nan manglay-laychananyu as nan wacha asna's luta at chayu epaila challu ay inglunyu hi Apo Dios? Isunga mu nan pannakikiayyum nan piliyunyu, munfialin kayu as kafusor Apo Dios. <sup>5</sup> Winnu ay kananyu un maid kotok nan naisurat as nan Kalen Apo Dios ay kanana,

"Nan Espiritu ay enpapagyan Apo Dios kan chitaku at nunsidlay emona mu fiakun hi Apo Dios yangkiay nan laylaychun takú"?†

<sup>6</sup> Ngem uray mu assesa, ong-ongor challu nan ichat Apo Dios ay grasyana kan chitaku. Kaman as nan naisurat as nan Kalen Apo Dios ay kanana, "Kontraun Apo Dios nan nunkapangas, ngem ichatnay grasya as nan chiyucha napakumbaba."‡

<sup>7</sup> Isunga munpaetoray kayu ngarud kan Apo Dios. Kontraunyu hi Satanas, tay nan munfianakiana at lomayaw hiya kan chakayu. <sup>8</sup> Maesnop kayu kan Apo Dios, ya hi Apo Dios at maesnoptu kan chakayu. Chakayu ay fumafiasor ay munchuwachuwa, ikinakyu ay cha mangekamkaman as mangotettet, ya charosanyu nan mangotettet ay numnumuyu. <sup>9</sup> Ngumunguyus, mun-ag-akor, ya muntangtangugngug kayu challu kiapú as nan fiasfiasoryu. Munfialinunyu nan am-amranguy as ag-akor. Sokatanyu nan lagragsakayu as ngunguyus. <sup>10</sup> Munpakumbaba kayu as nan sangwanan Apo Dios, ya hi Apo Dios at ichayaw chakayuntu.\*

### *Nan Tukun As Nan Omekak-ali*

<sup>11</sup> Iib-ak, achi kayu koma munkekennak-ali. Mu ekak-aliyanyu winnu okomúnyu nan pachongyu ay taku, ekak-aliyanyu ya okomúnyu nan lintig ay mangali un munleennayad takú. Mu okomúnyu nan lintig, epailayu ay achiyu cha tongparun sa ay lintig, ngem kunyu at cha epangatu nan achoryu ay kaman kayu huwis. <sup>12</sup> Hi Apo Dios yangkiay nan nangichat as nan lintig ya hiya yangkiay nan huwis. O, hiya yangkiay nan mafialin ay omesarakan winnu chumachael. Isunga ngachanmu paat ay mangokóm as pachongmu ay taku?‡

### *Nan Tukun As Nan Napangas*

---

\* **4:1** Rom. 7:23; Tit. 3:3; 2 Ped. 2:13-15    † **4:5** Exo. 20:5    ‡ **4:6** Prov. 3:34    § **4:7** Efe. 6:11; 1 Ped. 5:8-9    \* **4:10** Mat. 23:12; 1 Ped. 5:6    † **4:11** Lev. 19:16, 18; Mat. 5:43    ‡ **4:12** Mat. 10:28

<sup>13</sup> Chumngor kayu, chakayu ay mangali's na: "Ad wani winnu as wiet at munfiaat kami henan usa ay ili. Mayaschi kamintu as usa ay tawwun ay munnigusyu, ya fumaknang kami." <sup>14</sup> Ay mafialin ngun sa? Achiyu met ammu nan ommat kan chakayu as wiet. Tay nan fiyagyu at kaman longaub ay maila as henkemad ya mamaid. <sup>15</sup> Kun at nan ustу koma ay kananyu at assena, "Mu laychun Apo Dios, matataku takú pay koma, ya atun takú nan nauy winnu nan hana."<sup>§</sup> <sup>16</sup> Ngem napapangas kayu met, ya kunyu epangas chi atunyuntu. Mangotettet am-in chasa ay kenapangas!

<sup>17</sup> Isunga nan achi mangekamanan nan taku as nan ammuna ay ammay at maifilang chi as fiasorna.

## 5

### *Nan Tukun As Nan Chiyucha Fiaknang*

<sup>1</sup> Chumngor kayu, chakayu ay nunkafiaknang! Mun-ag-akor ya muntang-tangugngug kayu kiapú as nan nunsidla ay likiat ay ommattu kan chakayu.

<sup>2</sup> Nachachael at nan kenafiaknangyu ya nafuotan nan fiachuyu.\* <sup>3</sup> Lenmati at nan fialetok ya silver ay kinakuyu. Nan laticha nan mangepaneknekta as nan kenaakumyu as nan urkiw ay mun-okomán Apo Dios. O, nan hana lati nan kiapón nan manusaantu Apo Dios kan chakayu ay maepachong as nan mamuorantu nan apuy as nan achoryu. Maid kotkotan mangitupukianyu as kenafiaknangyu as nan nauycha anongos ay urkiw ay kiayud mangokomán Apo Dios kan chakayu. <sup>4</sup> Chumngor kayu! Nan chiyucha tataku ay nun-an-ani as payyiwyu ay chaanyu pay lenagfuwan at ifugfukiawcha ay cha munlillili† as maifusor kan chakayu. O, nan infugfukiaw nan chiyucha nangan-ani as nan pakuyuy at chinngor challu Apo Dios ay Mannakafialin. <sup>5</sup> Lenalaschak ya enpapasuyu as solet nan laylaychun nan achoryu asna's luta. Nunparukmug kayu ay maepachong as nan fiafuy ay achina ammu ay kiayud maparti hiya. <sup>6</sup> Encharumyu ya penatuyyu nan chiyucha tataku ay nalintig ay chaan poros nangontra kan chakayu.

### *Nan Anos Ya Kararag*

<sup>7</sup> Chakayu ay ib-ak, an-anosanyu nan liglikiatyu inkiana omali nan Apo. Numnumunyu nan chiyucha munsamsamor, ya nan atuncha ay mun-an-anos ay maman-ud as uchan uray as nan chinamuy winnu chakun ta tumufu nan pakuycha. An-anosancha us ay maman-ud inkiana mabkiasan nan pakuy ay naflor kan chicha. <sup>8</sup> Masapor us mun-an-anos kayu ya papipigsaunyu nan numnumyu, tay kiayud omali nan Apo.

<sup>9</sup> Iib-ak, achi kayu munlillinnili ta achi kayu maokóm, tay kiayud nan omaliyan Apo Dios ay hiya nan huwis. <sup>10</sup> Iib-ak, turachunyu koma nan kenaanos nan chiyucha pomapadtu ad pus-uy ay nun-epadpadtu babaen as nan kalibfengan Apo Dios uray napaliwasancha as solet. <sup>11</sup> Ammuyu met ay nakiasat nan kaman kan chatud-i ay nun-eta-ta-un. Chinngoryu nan nun-eta-ta-unan Job ad pus-uy, ya ammuyu met nan nunfianakiana as nan nangichatan Apo Dios as nan kasaporana. Tay hi Apo Dios at manangsugang as solet ya mannamelekna as nan tataku.‡

<sup>12</sup> Iib-ak, nan amud ay numnumunyu at achiyu pangsapata nan chaya, luta, winnu nan kumpurmi. Kunyu at kanan un "O," mu o, ya mu achi, "Achi" ta achi chakayu chusau kan Apo Dios.§

§ 4:15 Prov. 16:9 \* 5:2 Mat. 6:19 † 5:4 2 Ar. 6:15-17 ‡ 5:11 Job 1:21-22; 2:10; 42:10-17

§ 5:12 Mat. 5:33-37

<sup>13</sup> Ay wachay cha munliglikiat kan chakayu? Munkararag hiya. Ay wachay naragsak kan chakayu? Munkanta hiya as pangchaychayawna kan Apo Dios. <sup>14</sup> Ay wachay cha munsaket kan chakayu? Omayag hiya as nan chiyuycha mangepangpanguru as nan iglesia ay mangekararag ya mangekapu as lana kan hiya babaen as nan kalibfengan Apo Jesus.\* <sup>15</sup> As nan munkararakiancha ay cha mangafurot as nan pannakafialin Apo Dios, makaantu nan saketna. O, paammayun Apo Dios hiya. Mu wachay fiasorna ay kurpuwan chi saketna, pakawanunantu hiya. <sup>16</sup> Isunga munpipinnudnu kayu as fiasfiasoryu, ya munkekennararag kayu ta omammay kayu. Tay nan kararag nan nalintig ay taku at napisga, tay atuntu challu Apo Dios. <sup>17</sup> Hi Elias ay pomapadtu ad pus-uy at taku hiya ay pachong takú. As nan nangepasnekana ay nunkararag kan Apo Dios ta achi umuchan, chaan tit-iwa inmud-uchan as turu ay tawwun ya unum ay furan henan lutacha. <sup>18</sup> Angkiay as nan kasina nangekararakian ta umuchan, inmuchan tit-iwa ya tinmufucha nan murmura.†

<sup>19</sup> Iib-ak, mu wachay usa kan chakayu as omachawwi as nan tit-iwa ay sursuru ya wachay nanukun ay mangepafiangad kan hiya at ammay paat. <sup>20</sup> Nunumnumunyu na: Mu ngachana nan mangepafiangad as usa ay fumafiasor ta kasin umunud as nan ustу ay sursuru, esarakana nan fumafiasor ay ansa as nan maisyanana kan Apo Dios, ya mapakawan pay hiya as nan ongor ay fiasfiasorna.‡

\* **5:14** Mar. 6:13

† **5:18** 1 Ar. 17:1; 18:1, 42-45

‡ **5:20** Sal. 32:1; Rom. 4:7

## Nan Omona Ay Surat Pedro Nan Omona Ay Ammuwun

Nan nangisurat as nan nauy ay surat at hi Pedro ay usa as nan apostoles Jesus. Hiya nan enmona ay nangali un umunud kan Jesus uray mü us-usa hiya (Mt. 26:33; Mar. 14:29). Hiya us nan nangesaot kan Jesus as nan sangwanan chi ongor ay tataku (Mt. 26:69-74; Mar. 14:66-71). Ngem uray mu hiyasa, babaen as nan pannakafialin nan Espiritu Santo, infiakiana ay hi Jesus nan tit-iwa ay Cristo ya anak Apo Dios (Mt. 16:15-19; Mar. 8:29; Luc. 9:20; Jn. 6:69). Uray mu kauugyat chi ommat as nan fiyag nan apostoles, hiya nan enmona ay tenmakchug ay nun-isuru as nan ongor ay tataku as nan urkiw ay Pentecostes (Ara. 2:1-14). O, inmingsa hi Pedro as likiat (Ara. 4:18-21). Namen kaat us hiya ay nasaplesaplet ya naifiarfiarud (Ara. 5:17-40; 12:1-3). Ngem nan songfiat Pedro as nan nauycha enom-ommat at hiyana: "Masapor hi Apo Dios nan tongparunmi, fiakun nan tataku" (Ara. 5:29).

Nan nunsuratan Pedro at as nan tataku ay omaafurot kan Apo Jesus ay inmiili henan lema ay probinsiya henan Asia (1:1). Nunsurat hiya ta itukuna kan chicha ay papipihsauncha nan pammaticha uray mu chacha maparpa-likiat. Tay nan nauycha ay likiat at achi mafiayag, ya maawattu hanacha omaafurot nan gun-gunacha ay maid patingkiana (1:3-4; 5:10). Isunga nan kaamuchan ay tukuna as nan nauy ay suratna at hiyana: "Ichatyu kan Apo Dios nan am-in ay chanagyu, tay hiya nan mangay-aywan kan chakayu" (5:7).

### **Nan Nakudkudwaan Nan Nauy Surat**

Nan Laplapon Nan Surat 1:1-2

Nan Tit-iwa Ay Namnama Ay Siguradu Ay Matongpartu 1:3-12

Nan Panagfiyag Ay Nasantowan 1:13-2:10

Nan Panagfiyag Nan Omaafurot 2:11-17

Nan Tukun As Nan Chiyuycha Mafiabfiaor 2:18-25

Nan Tukun As Nan Nunkaasaw-an 3:1-7

Nan Atun Nan Omaafurot As Nan Timpon Chi Likiat 3:8-4:19

Nan Chiyuycha Libfengun Nan Mangay-aywan As Nan Omaafurot 5:1-11

Nan Anongos Nan Surat 5:12-14

### *Nan Laplapon Nan Surat*

<sup>1</sup> Ha-un hi Pedro ay usa ay apostol Jesu Cristo.

Nauy nan suratku kan chakayu ay pinilen Apo Dios as tatakuna ay mangili yangkiay asna's luta ay umiili ad Ponto, Galacia, Capadocia, Asia ya ad Bitinia. <sup>2</sup> Pinili chakayu kan Dios Ama ay maiyunud as nan sikud ay pangkepna, ya nunfialinun chakayu as nasantowan ay tataku babaen as nan pannakafialin nan Espiritu Santo. Pinilen Dios Ama chakayu ta afurotunyu hi Jesu Cristo ya ta macharosan kayu as nan fiasfiasoryu babaen as nan charana.

Sapay koma ta omong-ongor nan wacha kan chakayu ay grasya ya talna ay nurpu kan Apo Dios.

### *Nan Tit-iwa Ay Namnama Takú Ay Siguradu Ay Matongpartu*

<sup>3</sup> Chayawun takú hi Apo Dios ay Dios ya Aman Apo takú ay Jesu Cristo! Tay kiapú as nan ongor ay sug-angna, inchatna kan chitaku nan fiarú ay

fiyag babaen as nan nangtakuwana kan Jesu Cristo manipud as nan utúy. Isunga wacha nan tit-iwa ay namnama takú ay siguradu ay matongpartu,<sup>4</sup> at hiyana nan tawichun takú ay achi machadchachael, achi mamanmansaan ya achi mamammaid ay naitutupug ad chaya. <sup>5</sup> Itutupug Apo Dios nan nauy bendisyona para kan chakayu. O, kiapú as nan pammatiyu, aaywanan chakayu as nan pannakafialin Apo Dios inkiana tongparuna nan ensasakianana ay kaesarakananyu ay epálana as nan anongos ay timpu.

<sup>6</sup> Munlagragsak kayu kiapú kan chatona am-in, uray mu masapor ngumuyus kayu as hen-omaketan ad wani kiapú as nan tukutukún ay likiatyu. <sup>7</sup> Tay nan nauycha chayu mapadpachasan ay likiat nan mangepanekek as nan kenatit-iwan nan pammatiyu. Tay uray nan fialetok ay machachael at masapor mailutu ta mapaneknekan mu tit-iwa ay fialetok.\* Isunga masapor us mapaneknekan nan pammatiyu ay napatpateg mu nan fialetok, at mu maila nan kenatit-iwan nan pammatiyu, awni at epangatu chakayu kan Apo Dios ay wachay chayaw ya pategyu as nan urkiw ay maepail-an Jesu Cristo. <sup>8</sup> Chaanyu inil-ila hiya, ngem laylaychunyu challu hiya. Uray achiyu maila hiya ad wani at omafurot kayu challu kan hiya. Isunga munlagragsak kayu as lagsak ay achi mafukig ya maid maepachongana, <sup>9</sup> tay kiapú as nan pammatiyu, chayu awatun nan gun-gunayu ay hiyasa nan kaesarakananyu.

<sup>10</sup> Nan chiyucha pomapadtu ad pus-uy at enpadpadtucha nan maepangkep as nan nauy maepail-an nan grasyan Apo Dios ay hiyasa nan mangesarakanana kan chakayu. Enmamadcha ay nangan-anap mu anan laychuna ay kanan, ngem chaancha naanapan. <sup>11</sup> Tay uray nawawacha kan chicha nan Espiriton Cristo, ya nunkarkalihiya babaen kan chicha as nan nangepadtuwancha as nan maepangkep as nan nunliglikian Cristo ya as nan kaichayawana ay somarununtu, enan-anapcha pay laing ta maammuwanha koma nan timpu ay matongparana ya nan atuna ay matongpar. <sup>12</sup> Enpakaammon Apo Dios kan chicha ay nan enpadpadtucha at achi matongpar para as nan omammayancha ad pus-uy, ngem kún at para as nan omammayanyu ad wani. Tay nan hana enpadpadtucha at hiyasa us nan insursuron nan chiyucha nangekaskasaba as nan Ammay ay Chamag kan chakayu babaen as nan pannakafialin nan Espiritu Santo ay naifiaor ay nurpu ad chaya. Uray nan angeles at laraychuncha ay maawatan ay ustu chaná.

### *Masapor Nasantowan Nan Panagfiyag Takú*

<sup>13</sup> Kiapú as nan nangesarakanan Apo Dios kan chakayu, masapor esakianayu nan numnumyu ay kaman as nan laychuna, ya manang-etpor kayu. Masapor epapatiyu ay mangnamnama as nan bendisyon ay ichat Apo Dios kan chakayu as nan munpail-an Jesu Cristo. <sup>14</sup> Kaman as nan manangtongpar ay ongong-a, manangtongpar kayu koma kan Apo Dios. Masapor achiyu un-unuchun nan mangotettet ay mun-ongosáyu ad kasin as nan chaanyu nangam-ammuwan kan Apo Dios. <sup>15</sup> Kiapú ta nasantowan hi Apo Dios ay nangayag kan chakayu, masapor ngarud nasantowan kayu as nan intiru ay panagfiyagu. <sup>16</sup> Tay wacha nan naisurat as nan Kalen Apo Dios ay kanana,

“Masapor nasantowan kayu, tay ha-un at nasantowanak.”†

<sup>17</sup> As nan munkarkarakianyu, figfikunu ay nan Ama at hiya us nan mun-okóm. Maid pasis-iyauna as nan mun-okomana, tay okomuna nan am-in ay tataku ay maiyunud as nan en-enat nan tunggal usa. Isunga masapor

\* <sup>1:7</sup> Rom. 8:17-18    † <sup>1:16</sup> Lev. 11:44; 19:2; 20:7

manangchaychayaw kayu kan Apo Dios as nan matatakuwanyu asna's luta. <sup>18</sup> Tay aammuyu ay wenayawayayaana chakayu as nan maid kotkotokna ay panagfiyag ay tenawidyu as nan kaap-uwanyu. Nan enatna ay nangwayawaya kan chakayu at chaana enosar kaman as nan silver winnu fialetok ay machachael, <sup>19</sup> ngem kuna at enosar nan napateg ay charan Cristo ay kaman as nan kordero ay maid poros kas-otana ay maichaton kan Apo Dios. <sup>20</sup> Sakbay mafiyang nan luta, pinilen Apo Dios hiya as maichaton ay mangaan as fiasfiasor nan katakutaku, ngem as nan nauy anongos ay timpu nan naepail-ana ta maesarakan kayu.† <sup>21</sup> Babaen kan hiya, muntalek kayu kan Apo Dios ay nangtaku kan hiya manipud as nan utúy ya nangichat kan hiya as kaichayawana. Isunga hi Apo Dios nan kawad-an nan pammaiyu ya namnamayu.

<sup>22</sup> Kiapú ta chinarosanyu nan numnumyu as nan nangtongparanyu as nan kenatit-iwa, ya nawacha nan tit-iwa ay layadyu as nan iib-ayu ay omaafurot, masapor epapatigu ngarud ay munlelennayad as nan am-in ay numnumyu. <sup>23</sup> Tay naiyanak kayu kasin, at nan fiarú ay fiyagyu at chaan nurpu as nan taku ay matuy mu achi yangkiay kan Apo Dios ay achi matmatuy. Nunfialinuna chakayu as an-akna babaen as nan kalina ay umid-ichat as fiyag ya mawawacha in-inkiana. <sup>24</sup> Hiyana us nan naisurat as nan Kalen Apo Dios ay kanana,  
“Am-in ay tataku at kamancha lukiam, ya nan kaichayawancha at kaman as nan sabsafongna.

Nan lukiam at marangu, ya nan sabsafongna at mag-as,

<sup>25</sup> ngem nan kalen nan Apo at mawawacha in-inkiana.”§

Nan nauy kalen Apo Dios at hiyana nan Ammay ay Chamag ay naekaskasaba kan chakayu.

## 2

### *Nan Matataku Ay Fiatu Ya Nan Tatakon Apo Dios*

<sup>1</sup> Isunga kiapú ta wacha nan fiarú ay fiyagyu, masapor chukkianyu nan am-in ay mangotetted ay pangkep. Masapor maid munkutkutum, pakamakan, omap-apos ya omekek-ali.\* <sup>2</sup> Maepachong kayu as nan kaiyananak ay mutun, isunga masapor unuchunyù nan ukialen chi mutun ay kanayon ay manglayayad ay munsussusu. Masapor iliwunyu nan puru ay naespirituwan ay kiatas ay hiyana nan kalen Apo Dios ta maonngan kayu as nan pammaiyu inkiana matongpar nan kaesarakananyu. <sup>3</sup> Kaman as nan naisurat as nan Kalen Apo Dios ay kanana,

“Napachasanyu met nan kenaammay Apo takú.”†

<sup>4</sup> Maesnop kayu ngarud as nan kurpuwan chi fiyag ay hi Cristo ay maepachong as nan matataku ay fiatay mangepapaknug as nan afong. Nan fiatay anna at enachen nan tataku, ngem hiya nan pinilen Apo Dios, at napateg as nan mangilana. <sup>5</sup> Babaen as nan maesnopanyu kan hiya, maepachong kayu us as nan matataku ay fiatay maiyamma as nan afong Apo Dios ay makiaub ay naespirituwan ay templo. Munserserfi kayu us as nasantowan ay papachen Apo Dios ay mangichatchaton kan hiya as naespirituwan ay chaton‡ ay mangepalayayad kan hiya babaen kan Jesu Cristo. <sup>6</sup> Ammu taku ay tit-iwa chaná, tay wacha nan naisurat as nan Kalen Apo Dios ay kanana,

† **1:20** Efe. 1:4    § **1:25** Isa. 40:6-8    \* **2:1** Rom. 1:29-30; 2 Co. 12:20; Efe. 4:31    † **2:3** Sal. 34:8

‡ **2:5** Rom. 12:1; Heb. 13:15

“Ilaunyu, wacha nan pinilek ay kapatikian ay fiatu ay ensaadku ad Sion ay mangepakenug as nan afong.

Uray ngachana ay omafurot kan hiya at achi poros mapabpfainan.”<sup>§</sup>

<sup>7</sup> Isunga para kan chakayu ay omafurot, napateg hiya, ngem para kan chicha ay achi omafurot, maid pategna ay kaman as nan kanana as nan nauy naisurat as nan Kalen Apo Dios:

“Nan chiyuy fiatu ay enachen nan chiyuycha muntuptuping at hiyana at nan nunfialin as kaamuchan ay maipugnad.”\*

<sup>8</sup> Kenalina pay as nan naisurat as nan Kalen Apo Dios,

“Hiyana nan fiatu ay mangesakiaw as nan tataku ya mang-ukias kan chicha.”

Maesakiawcha, tay achicha tongparun nan kalen Apo Dios, ya hiyana us nan planon Apo Dios para kan chicha.<sup>†</sup>

<sup>9</sup> Ngem fiakun assesa kan chakayu, tay chakayu nan napili ay tataku, ya chakayu nan papachi ay munserserfi as nan Ari takú. Chakayu us nan nasantowan ay nasyon, tay naichaton kayu kan Apo Dios.<sup>‡</sup> O, pinilen Apo Dios chakayu ta epakaammuyu as nan tapina ay tataku nan anam-amay ay en-enatna. Hiya nan nangayag kan chakayu ay manaynan as nan ngongot ta masilawan kayu as nan nakaskaschaaw ay lawagna. <sup>10</sup> Ad kasin, fiakun chakayu nan tatakon Apo Dios, ngem ad wani, chakayu nan tatakuna. Ad kasin chaanyu lenaklak-am nan sug-ang Apo Dios, ngem ad wani, chayu laklak-amun.

### *Nan Panagfyag Nan Omaafurot*

<sup>11</sup> Iib-a ay laylaychok, kiapú ta mangili kayu yangkiay asna's luta, ya kun hen-omaketan yangkiay nan magyananyu hena, pangaasiyu ta chukkianyu nan am-in ay mun-ongosán nan anchor, tay kufiatuncha nan mismu ay numnumuyu. <sup>12</sup> Masapor kanayon ay ammay nan ukialiuyu as nan mangilan nan achi omaafurot. Tay mu hiyachi nan atunyu, uray chacha kankanan un mangotettet chi chayu at-atun, ilauncha challu nan ammay ay en-enatyu, at chayawuncha hi Apo Dios as nan urkiw ay omaliyana.

<sup>13</sup> Nan atunyu ta turachunyu nan Apo at munpaetoray kayu as nan am-in ay tataku ay wachay kalibfengancha kan chakayu. Munpaetoray kayu as nan emperador ay kangatuwan ay toray,<sup>§</sup> <sup>14</sup> ya kaman us as nan chiyuycha gobernador ay infiaorna ay uy manusia as nan chiyuycha cha mangekamkaman as mangotettet ya uy mangichayaw as nan chiyuycha cha mangekamkaman as ammay. <sup>15</sup> Tay nan laychun Apo Dios at pakinkunyu nan maid kotkotokna ay cha kankanan nan nunkangokngok ay tataku babaen as nan ammay ay chayu at-atun. <sup>16</sup> Epailayu babaen as nan panagfyagyu ay nawawayawaan kayu ay tataku, ngem achiyu os-osarun nan wayawayayu as panforyu ay mangekaman as mangotettet, ngem kunyu at osarun ay munserfi kan Apo Dios.\* <sup>17</sup> Rispiuwunyu nan am-in ay tataku. Laylaychunyu nan iib-ayu ay omaafurot. Manangchaychayaw kayu kan Apo Dios. Rispiuwunyu us nan emperador.

### *Nan Tukun As Nan Chiyuycha Mafiafbiaor (Efe. 6:5-9; Col. 3:22-25; 1 Tim. 6:1-2; Tit. 2:9-10)*

<sup>§</sup> **2:6** Isa. 28:16; Rom. 9:32-33; Efe. 2:20  
1:23; Gal. 5:11      <sup>‡</sup> **2:9** Exo. 19:5-6; Deut. 7:6

\* **2:7** Sal. 118:22; Mt. 21:42  
§ **2:13** Rom. 13:1-7; Tit. 3:1

<sup>†</sup> **2:8** Isa. 8:14-15; 1 Co. 2:16 Gal. 5:13

<sup>18</sup> Mu mafiabfiaor kayu, waschi un munpaetoray as nan amona. Epailayu kan chicha nan tit-iwa ay rispituyu, fiakun yangkiay as nan chiyuchya amo ay naanos ya mannakawaat ngem uray as nan chiyuchya amo ay sanongel. <sup>19</sup> Tay malaylaychan hi Apo Dios mu eta-unyu nan maparpaliwasananyu ay maid kiapkiapúna babaen as nan mangnunumnumanyu kan hiya. <sup>20</sup> Tay mu sopratun chakayu kiapú as nan nangekamkamananyu as achi ustu, ya chayu eta-ta-un sa ay chusa, achi kayu maifilang as machayaw. Ngem mu paliwasan chakayu kiapú as nan nangekamkamananyu as ammay ya chayu eta-ta-un, siguradu ay malaylaychan hi Apo Dios kan chakayu. <sup>21</sup> Hiyasa nan kiapúna as nangayakian chakayu kan Apo Dios, tay nun-iliwliwas hi Cristo para kan chakayu ay hiyasa nan nuntongparan nan enpailana ay turachunyu, isunga hiyana koma nan unuchunyu. <sup>22</sup> Kun pay hiya, chaan poros finmasfiasor, ya maid us poros kenarkalina as kinukutum.<sup>†</sup> <sup>23</sup> As nan nangin-insurtuwancha kan hiya, maid mangisiw as ensongsongfiatna. As nan namarpaliwasancha kan hiya, chaana us inyug-ugyat kan chicha nan chusa, ngem kuna at entalek nan am-in kan Apo Dios ay mun-okóm ay ustu. <sup>24</sup> Hi Cristo ay mismu nan nangiliwas as nan fiasfiasor takú as nan natuyana as nan koros ta ikinak takú ay fumasfiasor ya unuchun takú nan nalintig ay panagfiyag. Babaen as nan sugsukiatna, enmammay takú.<sup>‡</sup> <sup>25</sup> Ad kasin, kaman kayu karnero ay natingiw, ngem ad wani, nunfiangad kayu as nan mangay-aywan ya mamanfiantay kan chakayu.

### 3

#### *Nan Tukun As Nan Nunkaasaw-an (Efe. 5:22-23; Col. 3:18-19)*

<sup>1</sup> Chakayu us ay fianafiai ay nunkaasaw-an, masapor waschi un munpaetoray as nan asawana ta mu wacha kan chicha nan achi omafurot as nan kalen Apo Dios ad wani, awni at maawis ay omafurot babaen as nan ammay ay ukialiyu. Mu atunyu chaná, achiyu kis-an epakaawat sa kan chicha, <sup>2</sup> tay iilauncha nan nacharos ay ukialiyu ya nan marispitu ay panagfiyagyu. <sup>3</sup> Nan kenapentasyu at masapor achi maifisar as nan ar-arkos ay os-osarun chi fiabfiafiai ay kaman as nan mangar-arkosancha as fookcha, nan mangos-osarancha as singsing ya fialetok, ya nan munfiachuwancha as nunkangina, <sup>4</sup> ngem kun at masapor maifisar as nan wacha as numnumyu. Tay nan kenapentas ay achi makakkaan nan pategna as nan mangilan Apo Dios at nan kenaanos ya nan natalna ay numnum. <sup>5</sup> Hiyana nan ukiali ay inun-unud nan chiyuchya nasantowan ay fianafiai ad pus-uy ay nuntalek kan Apo Dios. Penapentascha nan achorcha babaen as nan nunpaetorayancha as nan asawacha. <sup>6</sup> Assid-i nan ukialen Sara ad pus-uy, enafurotna chin Abraham ay asawana ya enawakiana pay hiya as apo. Maifilang kayu as an-akna mu ammay nan chayu at-atun ya achi kayu machanchanakian.

<sup>7</sup> Chakayu us ay lanaraki ay nunkaasaw-an, masapor waschi un maawatana nan asawana ya ay-aywanana hiya ay ustu, tay nakapkapuycha mu chakayu. Rispiwuunyu chicha, tay maketawidcha kan chakayu as nan fiyag ay maid patingkiana ay ichat Apo Dios. Atunyu chaná ta makakararag kayu ay ustu.

#### *Nan Mun-iliwliwasan Kiapú As Kenalintig*

<sup>†</sup> 2:22 Isa. 53:9; 2 Co. 5:21; Heb. 4:15      <sup>‡</sup> 2:24 Isa. 53

<sup>8</sup> Ad wani, nauy pay nan itukunku kan chakayu: Mun-us-usaunyu koma nan numnumyu, ya makelekna kayu as nan iib-ayu. Munlelennayad kayu ay kaman tit-iwa ay hen-anag-i, munsisinnug-ang kayu ya munpakumbaba kayu as nan tunggal usa. <sup>9</sup> Mu wachay mangekaman as mangotettet kan chakayu, achiyu es-es-ang. Mu wacha us chi omekak-ali, achiyu ekak-aliyan hiya. Ngem kun kayu at munkararag kan Apo Dios ta bendisyonana chicha, tay uray chakayu at enayakian chakayu kan Apo Dios ta mabendisyonan kayuntu. <sup>10</sup> Tay wacha nan naisurat as nan Kalen Apo Dios ay kanana, “Mu laraychun nan taku ay mawad-an as naragsak ay fiyag ya maiturturuy nan lagsakna, masapor achi munkarkali hiya as omepasaket as numnum ya achi munkutkutum hiya.

<sup>11</sup> Masapor chukkiana nan mangotettet ta nan ammay nan atuna, ya masapor us epapatina nan kafaelana ay makekappia as nan tapina. <sup>12</sup> Tay hi Apo Dios at kanayona ay ilaun nan nalintig ay tataku, ya chungruna nan kararagcha, ngem fusoruna nan tataku ay mangekamkaman as mangotettet.”\*

<sup>13</sup> Mu laraychunyu ay mangekaman as ammay, ay wachay mangituchor kan chakayu? <sup>14</sup> Ngem uray mu mapaliwas kayu kiapú as nan nalintig ay chayu at-atun, nakiyat kayu challu. Isunga achi kayu umugugyat as nan mamarpaliwas kan chakayu ya achi kayu machanchanakian, <sup>15</sup> ngem kunyu at tit-iwa figfikun hi Cristo as Apo. Kanayon kayu ay munsasakiana ta mu wachay munsarudsud kan chakayu maepangkep as nan namnamayu kan Cristo, mafialinyu ay songfiatan. Ngem ilaunyu ta iyam-ammayu nan atunyu ay manongfiat kan chicha ay mangepaila as ustu ay rispitu. <sup>16</sup> Kanayon koma ay nacharos nan numnumyu ta nan chiyucha munkarkali as mangotettet ay maifusor as nan ammay ay ukialiuy as nan chayu mangun-unuchan kan Cristo at mafainanchantu. <sup>17</sup> Tay mu eparufus Apo Dios ay mapaliwasan kayu, kaskasin ammay ay mapaliwasan kayu kiapú as nan mangekamkamananyu as ustu mu nan mapaliwasan kayu kiapú as nan mangekamkamananyu as mangotettet. <sup>18</sup> Tay hi Cristo us at nun-iliwas ya namingpingsan ay natuy kiapú as nan fiasfiasor takú. Hiya ay nalintig at natuy para kan chitaku ay fumafiasor ta iyesnopna chitaku kan Apo Dios. Penatuycha nan achorna, ngem tenakon Apo Dios hiya as nan naespirituwan ay katataku. <sup>19</sup> As nan nauy ay kasasaadna, inmuy hiya as nan kawad-an nan chiyucha naifiafiarud ay lenawan nan natnatuy ay tataku, at nun-ekasaba kan chicha. <sup>20</sup> Chatona nan espiriton nan tataku ay chaan enmafurot kan Apo Dios as nan timpon Noe ad pus-uy. As nan chiyuy ay timpu ay cha mangam-ammaan Noe as nan papor, enan-anosan Apo Dios ay nanan-ud as nan omafurotan koma nan tataku kan hiya. Uray mu hiysa, warucha yangkiay nan sinungkop as nan papor, at naesarakancha as nan chanum. <sup>21</sup> Nan chanum ay anchi at hiyachi nan maepachongan nan funyag ay mangepaila ay esarakan chakayu kan Apo Dios babaen as nan natakuwan Jesu Cristo manipud as nan utúy. Nan laychun ay kanan nan nunpafunyakiananyu at fiakun nan nam-usan nan achoryu ta makaan chi luket, ngem kun at nan nunkararakianyu kan Apo Dios ta charosana nan numnumyu. <sup>22</sup> Nunfiangad hi Cristo ad chaya, at wacha as apét kannawan Apo Dios, ya chana etortorayan nan am-in ay anghelles ya nan tapina ay achi maila ay wachay kalibfengancha ya pannakafialinchá.

\* <sup>3:12</sup> Sal. 34:12-16

## 4

*Nan Nafialiwan Ay Fiyag Takú*

<sup>1</sup> Kiapú ta nun-iliwiwas ya natuy hi Cristo asna's luta, esakianayu us nan numnumyu ay mun-iliwas ay kaman kan hiya, tay nan taku ay nun-iliwas kiapú as nan pammatina kan Cristo Jesus at ikinakna ay fumasfiasor.\* <sup>2</sup> Isunga as nan nayagyag ay katakuwanyu, esakianayu ngarud nan numnumyu ta tongparunyu nan enkeddeng Apo Dios, fiakun nan mun-ongosán chi taku. <sup>3</sup> Tay ongor chi senayangyu ay timpu ad kasin ay nangekamkaman as nan laylaychun nan chiyuuya achi omafurot kan Apo Dios ay cha at-atun. Tay ad kasin, enkamkamanyu nan am-in ay kenaruket ya kafiafiaiñ ay mun-ongosán chi achor. Inmig-ikop kayu as fumutang ay maikop, nunkaranok kayu, naetaptapi kayu as nan narafus ay lagragsak, ya maid flainyu as nan nanaychayawanyu as nan chiyuuya didiosen. <sup>4</sup> Isunga ad wani, naschaaw nan tataku ay achi omafurot, at cha chakayu ekakkak-ali, tay achi kayu maetaptapi as nan munlumu as nan machachaelan. <sup>5</sup> Ngem masapor sanguwunchantu hi Apo Dios ta songfiatanchantu kan hiya nan en-enatcha, tay nakasakiana hiya ay mangokóm as nan am-in ay tataku ay matataku ya nan nunkatuy. <sup>6</sup> Hiyana nan kiapúna ay uray as nan chiyuuya natuy at naekaskasaba nan Ammay ay Chamag. Tay uray natuy nan achorcha ay maiyunud as nan maokomán nan am-in ay tataku, nan Ammay ay Chamag at naekasaba kan chicha ta matakucha as nan naespirituwan ay katakuwancha ay kaman kan Apo Dios.

*Nan Panagfiyag Nan Omaafurot Kan Cristo  
(Rom. 13:11-14; Efe. 5:1-21; Filip. 4:8)*

<sup>7</sup> Kiayud chi munpatungkiaan nan ka-ichin, isunga manumnuman kayu koma ya manang-eptor kayu ta mafialin kayu ay munkararag ay maiyunud as nan laychun Apo Dios. <sup>8</sup> Nan kaammayan as nan am-in ay atunyu at masapor epapatiyu ay munlelennayad, tay mu hiyasa nan atunyu, mafialin kayu ay mun-eennanos, ya mafialin kayu ay munpeppennakawan. <sup>9</sup> Naragsak kayu ay mangepaskop as nan iib-ayu. <sup>10</sup> Nan chiyuuya kafaelan ay inchat Apo Dios as nan tunggal usa kan chakayu ay omaafurot at masapor osarunyu chasa ay munfifinnachang. Tay mu hiyasa nan atunyu, kaman kayu as nan matalek ay mangay-aywan as nan tukutukún ay bendisyon Apo Dios. <sup>11</sup> Mu wacha kan chakayu nan mun-ekaskasaba, nunumnumuna koma ay nan kalen Apo Dios nan ekasabana. Mu ngachana nan nangichatan Apo Dios as kafaelan ay munserfi as nan iib-ana, munserfi koma hiya bábaen as nan pigsa ay inchat Apo Dios kan hiya. As nan am-in ay atunyu, ilaunyu ta maichaychayaw hi Apo Dios bábaen kan Jesu Cristo. Hiya nan machaychayaw ya mannakafialin ay cha muntortoray in-inkiana. Amen.

*Nan Munlikiatan Nan Omaafurot Kan Cristo  
(Mat. 5:11; San. 1:2-4, 12)*

<sup>12</sup> Iib-a ay laylaychok, achi kayu masmaschaaw as nan pararu ay maparpaliwasananyu ay kaman wachay tuktukún ay cha om-ommat kan chakayu. Masapor ommat chaná ta mapaneknekan nan pammatiyu. <sup>13</sup> Ngem kun kayu at masapor munlagragsak mu maparpaliwasan kayu ay kaman kan Cristo ta maid us munkurangan chi lagsakyu as nan maepail-an nan kaichayawan Cristo. <sup>14</sup> Nakiasat kayu us mu masmas-ot kayu kiapú as

\* <sup>4:1</sup> Rom. 6:1-11; Col. 2:12, 3:1-3

nan pammatiyu kan Cristo, tay hiyasa nan mangepaila ay mawawacha kan chakayu nan mannakafialin ay Espiritu ay nurpu kan Apo Dios. <sup>15</sup> Ngem maid koma kan chakayu nan mapaliwasan kiapú as nan pomatuyanyu, mangakiwanyu winnu makififiyanganyu ay manaktak as tapina ay tataku. <sup>16</sup> Ngem mu mapaliwasan kayu kiapú as nan pammatiyu kan Cristo, achiyu ekafiain sa, ngem kunyu at chayawun hi Apo Dios kiapú as nan naifilangan-ganyu as tatakon Cristo.

<sup>17</sup> Inumchan at nan timpu ay mangokomán Apo Dios as nan am-in ay tataku, ya nan tatakuna nan omón-oná ay okomuna. Mu chitaku ay enmafurot nan maelapuwana, ay kun achi kaskasin kauugyat nan ommat as nan chiyuycha achi omafurot as nan Ammay ay Chamag ay nurpu kan Apo Dios?

<sup>18</sup> Kaman as nan naisurat as nan Kalen Apo Dios ay kanana, “Mu nalikiat nan kaesarakanan nan nalintig ay tataku, ay achi kaskasin nalikiat nan ommattu as nan chiyuycha mangachi kan Apo Dios ya fumafiasor?”<sup>†</sup>

<sup>19</sup> Isunga mu mapaliwasan kayu kiapú ta hiyasa nan laychun Apo Dios kan chakayu, epapanekyu ay mangekaman as ammay, ya etalekyu nan achoryu kan Apo Dios ay hiya nan namayang kan chakayu ya nan matalek ay mangtongpar as nan enkarina.

## 5

### *Nan Chiyuycha Kalibfengan Nan Mangay-aywan As Nan Omaafurot*

<sup>1</sup> Wacha nan laychok ay ifilin kan chakayu ay mangepangpanguru as nan omaafurot hesa, tay ha-un us at usaak ay mangepangpanguru. Usaak us ay nangepaneknek as nan nun-iliwliwasan Cristo, ya makelak-amaktu as nan kaichayawana ay maepailantu. <sup>2</sup> Nauycha nan tukunku kan chakayu: Masapor aywananyu ay ustu nan tatakon Apo Dios as nan kawad-anyu, tay chicha nan kaman karnerona ay entalekna kan chakayu. Munlagragsak kayu koma ay mangay-aywan kan chicha ay achi kayu mapelpelet, tay hiyasa nan laychun Apo Dios. Achiyu atun nan chunuyu kiapú as kenaakum as siping, ngem kiapú as layadyu ay munserfi kan Apo Dios ya as nan iib-ayu. <sup>3</sup> Masapor us achiyu epapelet nan laychunyu as nan tataku ay naetalek kan chakayu, ngem kun at koma ammay nan ukialiyyu ta wachay ustu ay turachuncha. <sup>4</sup> Angkiay ya as nan munpail-an Cristo ay ap-apon nan am-in ay mun-ay-aywan, maettan kayuntu as korona ay hiyasa nan gun-gunayu ad chaya ay achi poros munkupas.

<sup>5</sup> Chakayu us ay en-auchi, masapor munpaetoray kayu as nan papangu-ruwanyu. Am-in kayu ay omaafurot at masapor munpakumbaba kayu as nan munserfiyanyu as nan tunggal usa. Tay wacha nan naisurat as nan Kalen Apo Dios ay kanana,

“Kontraun Apo Dios nan nunkapangas, ngem fiadngana nan chiyuycha napakumbaba.”<sup>\*</sup>

<sup>6</sup> Munpakumbaba kayu ngarud kan Apo Dios ay mannakafialin ta epan-gatuna chakayu as nan urkiw ay pinilina. <sup>7</sup> Ichatyu kan Apo Dios nan am-in ay chanagyu, tay hiya nan mangay-aywan kan chakayu.

<sup>8</sup> Masapor manang-epor ya munsasakiana kayu. Tay nan kafusor takú ay hi Satanás ay kaman as nan cha mun-ug-ukiab ay layon at cha munliklikud ay mun-anap as aknotana. <sup>9</sup> Masapor kontraunyu hiya babaen as nan napigsa ay pammatiyu, tay ammuyu ay assesa us ay likiat nan cha iliwliwas

<sup>†</sup> **4:18** Prov. 11:31    <sup>\*</sup> **5:5** Prov. 3:34; San. 4:6

nan iib-ayu ay omaafurot henan kailili asna's luta. <sup>10</sup> Achi mafiyag nan maparpaliwasananyu, at munfialinun chakayu kan Apo Dios as tataku ay maid munkurangana. Papigsauna chakayu ta kanayon ay napigsa nan pammatiyu ta achi kayu poros maiwudwud. Tay hiya nan manangsug-ang ay Dios ay nangayag kan chakayu ta makelak-am kayu as nan kaichayawana ay maid patingkiana babaen as nan pammatiyu kan Cristo. <sup>11</sup> Sapay koma ta maichaychayaw hiya in-inkiana. Amen!

*Nan Anongos Nan Surat*

<sup>12</sup> Nan nangfiachang kan ha-un ay nangisurat as nan nauy ap-aptek ay surat at hi Silas<sup>†</sup> ay ifilangku as matalek ay ifia takú. Insuratku na ta papigsaok nan pammatiyu ya paneknekak kan chakayu nan nauycha am-in ay napachasanyu ay grasyan Apo Dios. Epapasnekyu ay mangnunumnum as nan hana grasyana ta achiyu liwliw-an.

<sup>13</sup> Nan iib-ayu ay omaafurot ay pinilen Apo Dios ay wacha ad Babilonia at cha chakayu pakomostaun. Kaman us kan Marcos ay infilangku as anakku.

<sup>14</sup> Munpepennakomosta kayu ay mangepaila ay munleennayad kayu. Sapay koma ta mawawacha nan talna kan chakayu am-in ay enmafurot kan Cristo.

---

<sup>†</sup> **5:12** Ara. 15:22; 2 Co. 1:19; 1 Tes. 1:1

## Nan Maekadwa Ay Surat Pedro Nan Omona Ay Ammuwun

Nan nauy maekadwa ay surat Pedro at para as nan chiyuycha omaafurot kan Jesu Cristo henan probinsiya ay Asia. Kenakamon Pedro ay nunsurat kan chicha, tay enpakaammon Apo Jesus kan hiya ay kiayud nan katuyana (1:14).

Nunsurat hi Pedro ta papigsauna nan pammatten nan chiyuycha omaafurot (3:1) ya ta kontrauna nan sursuron nan achi tit-iwa ay mun-isursuru (2:1). Nan nuntongparan nan insursuron nan nauyucha achi tit-iwa ay mun-isursuru at nan maallilawan nan chiyuycha omaafurot kan Jesus, ya mangesaotancha ay hi Cristo nan nangwayawaya kan chicha as nan maid kotkotokna ay panagfiyagcha ay tenawidcha as nan kaap-uwancha (2:1). Nan chiyuycha chaan pay laing naonngan as nan pammaticha at inun-unudcha nan kafiafain ay cha atuatan nan chiyuycha achi tit-iwa ay mun-isursuru.

Isunga, infiakian Pedro kan chicha ay nasantowan koma ya nalintig nan panagfiyagcha, tay chakus inchat Apo Dios kan chicha nan am-in ay masaporcha ay mangtongpar as chi (1:3). Mu hiyasa nan atuncha, achicha maaw-awis as nan tukún ay sursuru ay mangiyachawwi kan chicha as nan pammaticha, ngem kuncha at epapasnek ay manaptapi as nan ammay ay numnumcha ya nan mangam-ammuwancha kan Apo Jesus. Epapasnekcha pay koma ay mangunud as nan panagfiyag Apo Jesus (3:17-18).

Nan achi poros laraychun Pedro ay sursuron nan chiyuycha achi tit-iwa ay mun-isursuru at nan mangepadpachamakiancha ay hi Jesus at achi at munfiangad. Tay kanancha un nan kaap-uwancha at natuycha, ngem kun met hihiya challu nunlapu as nan nafiayangan nan luta (3:4). Nan songfiat Pedro at naanos as solet hi Apo Dios kan chicha, tay laychuna ay maid koma machusa, ngem kun at koma munfiafiawi nan am-in ay tataku as nan fiasfiorcha (3:9). Isunga intukun Pedro ay uray mu hiyasa nan cha kankanan nan chiyuycha achi tit-iwa ay mun-isursuru, masapor ililaun takú, tay nan omaliyan kasin Cristo at as nan urkiw ay achi takú namnamaun ay kaman as nan omaliyan nan mangaakiw. As nan hana ay urkiw, nan chaya ya nan luta at mapuorancha am-in, ya nan tataku at maokómcha, tay hiyasa nan encaren Apo Dios as nan kalina (3:12).

### **Nan Nakudkudwaan Nan Nauy Surat**

Nan Laplapon Nan Surat 1:1-2

Nan Mün-ayakian Ya Munpiliyan Apo Dios 1:3-11

Hi Jesus Nan Maifisaran Nan Tit-iwa Ay Pammati 1:12-21

Nan Chiyuycha Achi Tit-iwa Ay Mun-isursuru 2:1-22

Nan Kasin Omaliyan Apo Jesus 3:1-18

### *Nan Laplapon Nan Surat*

<sup>1</sup> Ha-un hi Simon Pedro ay usa ay fiabfiaarun Jesu Cristo ya apostolna. Nauy nan suratku kan chakayu ay naettan as pammati ay pachong nan pammatichi. Naettan kayu as pammati kiapú as nan kenalintig Jesu Cristo ay Dios takú ya mangesarakan kan chitaku. <sup>2</sup> Sapay koma ta omongoongor kan chakayu nan grasya ya talna ay nurpu kan Apo Dios kiapú as nan chayu mangam-ammuwan kan Apo Dios ya kan Jesus ay Apo takú.

### *Nan Mun-ayakian Ya Munpiliyan Apo Dios*

<sup>3</sup> Babaen as nan pannakafialin Apo Dios, inchatna kan chitaku nan am-in ay kasaporan takú ta unuchun takú nan nadiosan ay panagfiyag babaen as nan cha takú mangam-ammuwan kan hiya ay nangayag kan chitaku ta makelak-am takú as nan mismu ay kaichayawana ya kenaammayna. <sup>4</sup> Kiapú as nan kaichayawana ya kenaammayna, inchatna nan chiyuycha kaamuchan ya napateg ay enkarina ta babaen as nan hanacha, mailisi kayu as nan mabrokan kiapú as nan manangotetet ay mun-ongosán chi tataku asna's luta, ya ta makelak-am kayu as nan kenadiosna. <sup>5</sup> Isunga epapatiyu nan kafiaelanyu ta nan ammay ay katatakuyu nan etapiyu as nan pammatiyu. Nan etapiyu us as nan ammay ay katatakuyu at nan pannakaammuyu as nan maepangkep as nan laychun Apo Dios. <sup>6</sup> Nan etapiyu as nan pannakaammuyu as nan maepangkep as nan laychun Apo Dios at kenamanang-etpor, ya nan etapiyu as nan kenamanang-etpor at kenaanos. Nan etapiyu as nan kenaanosyu at nadiosan ay panagfiyag, <sup>7</sup> ya nan etapiyu as nan nadiosan ay panagfiyagu at layad as nan iib-ayu ay omaafurot. Nan etapiyu as nan layadyu ay ansa at layad para as nan am-in ay tataku. <sup>8</sup> Tay mu omongoongor kan chakayu nan nauycha kenaammay, ya tit-iwa ay maam-ammuyu hi Apo takú ay Jesu Cristo, kaskasin omongor nan ammay ay chayu atuutan. <sup>9</sup> Ngem mu maid chaná ay ukiali as nan taku, kaman nafurag sa ay taku winnu achi makaila as achawwi, tay liniw-ana ay naurasan hiya as nan sikud ay fiasfiasorna.

<sup>10</sup> Isunga chakayu ay iib-ak, kaskasinyu epapasnek ay mangun-unud as nan nauy nadiosan ay panagfiyag ta mapanecknekan nan nangpiliyan ya nangayakian Apo Dios kan chakayu. Tay mu atunyu sa, achiyu chukkian nan pammatiyu. <sup>11</sup> Angkiay mu unuchunyu chaná ay nadiosan ay panagfiyag, maragsakantu hi Apo Dios ay mangepaskop kan chakayu as nan maid patingkiana ay muntorayan Apo takú ay Jesu Cristo ay mangesarakan kan chitaku.

### *Nan Tukun Pedro As Nan Am-in Ay Omaafurot*

<sup>12</sup> Isunga kanayonku challu ay epanumnum chaná kan chakayu uray aammuyu chaná ya epapasnekyu ay mangun-unud as nan kenatit-iwa ay naisursuru kan chakayu. <sup>13</sup> As nan munnunumnumku at libfengku ay mangepanumnum kan chakayu as nan hanacha ad wani ay kutukiak ay matataku. <sup>14</sup> Tay ammok ay as nan hen-omaketan yangkiay at mak-akak asna's luta ay hiyasa challu nan empakaammon Jesu Cristo kan ha-un. <sup>15</sup> Epapatek ngarud nan kafiaelak ay mangisuru as nan nauycha ta uray mu mak-akak asna's luta, wachay chayu mangnumnumuman as nan nauycha insursurok.

### *Nan Chiyuycha Nangila As Nan Kaichayawan Cristo*

(Mat. 17:1-13; Mar. 9:2-3; Luc. 9:28-36)

<sup>16</sup> Nan empakaammumi kan chakayu ay maepangkep as nan pannakafialin Apo takú ay Jesu Cristo ya nan kasina omaliyan at chaan naifisar as nan pinupus-uy ay es-estoryan chi nunkaraing ya nunkasikap ay tataku, tay chakami ay mismu nan nangila as nan kaichayawana. <sup>17</sup> O, wacha kami mismu hid-i as nan nangichatan Dios Ama kan Jesu Cristo as chayaw ya kaichayawan. Chinngormi us nan kali ay nurpu kan Dios Ama ay kanganatuwan ya kachachayawan. Kenalina, "Hí tona nan anakku ay laylaychok. Hiya nan mangepalaylayad kan ha-un." <sup>18</sup> Chakami ay mismu nan naangor

as nan hana ay kali ay nurpu ad chaya as nan nangkadkadwaanmi kan hiya henan nasantowan ay chuntug.

<sup>19</sup> Nan hanacha chinngormi nan mangepaneknek ay tit-iwa nan enpadton nan chiyucha pomapadtu ad pus-uy, isunga kaskasin ongor nan talekmi as nan enpadtucha. Ammay mu afurotunyu nan enpadtucha, tay nan hanacha nan kaman silaw ay manilaw as nan ngongot ay lukiar. Epapasnekyu ay omafurot inkiana fomoknag nan taraw\* as nan wi-ewi-et ya mafikiat. Nan laychun nan nauy ay kanan at inkiana as nan urkiw ay kasin omaliyan Cristo ay manilaw ay ustus as nan numnumyu.<sup>†</sup> <sup>20</sup> Ngem nan amud ay masapor maawatanyu at maid poros naepadtu ay naisurat as nan Kalen Apo Dios ay murpu as nan mismu ay numnum nan nangepadtu. <sup>21</sup> Tay maid naepadtu ay nurpu as nan numnum chi taku, ngem kun at nan Espiritu Santo nan nangetoróng as nan chiyucha pomapadtu as nan nangifiag-ancha as nan kali ay nurpu kan Apo Dios.

## 2

### Nan Achi Tit-iwa Ay Mun-isursuru

(Jud. 4-16)

<sup>1</sup> Ngem ad pus-uy wachacha challu nan achi tit-iwa ay pomapadtu ay nunpaila as nan chiyucha kianak Israel ay naiflang as tatakon Apo Dios. Assesa us ay wachachantu nan achi tit-iwa ay mun-isursuru ay maetatapi kan chakayu. Chicha ay omal-allilaw at mun-isuruchantu as kinukutum ay manachael as pammatiyu, ya esaotcha uray nan Amo ay hi Cristo ay nangwayawaya kan chicha as nan maid kotkotokna ay panagfiyagcha ay tenawidcha as nan kaap-uwancha. Kiapú as nan nauyucha, chicha challu nan kiapón nan loktat ay machusaancha. <sup>2</sup> Ongorchantu challu nan mangunud as nan kaiisiw ay panagfiyagcha, ya kiapú kan chicha, mangotettetu nan kankanancha maepangkep as nan tit-iwa ay sursuru maepangkep kan Cristo. <sup>3</sup> Kiapú us as nan kenaakumcha, munsipingan chakayu babaen as nan pinupus-uy ay estoryacha. Ngem nunlapu ad pus-uy, nakasakiana challu hi Apo Dios ay mangokóm kan chicha, ya hiya ay manusa kan chicha at achi masmassuy.

<sup>4</sup> Tay uray nan anghelles ay finmasor ad maliyam at chaan sinug-angan Apo Dios. Ngem kuna at inchus-or chicha ad inferno ay hid-i nan nangepari-aruchana kan chicha as nan kawad-an chi ngongot ay maid patingkiana as nan manman-uchancha as nan anongos ay mun-okomán Apo Dios as nan manusaana kan chicha.\* <sup>5</sup> Chaana us sinug-angan nan chiyucha achi nadiosan ay tataku ad pus-uy as nan timpon Noe as nan namsongana henan luta. Nurningcha tit-iwa, ngem hi Noe ay nangekaskasaba as nan maepangkep as nan nalintig ay panagfiyag at ensarakan Apo Dios ya uray nan pitu ay tataku.<sup>†</sup> <sup>6</sup> Chinusan us Apo Dios nan chiyucha i-Sodoma ya i-Gomorra ad pus-uy babaen as nan nangepatemokana kan chicha as nan apuy ya uray nan siyudadcha. Hiyana nan enatna ay mangepaila as nan ommat as nan chiyucha achi nadiosan ay tataku.<sup>‡</sup> <sup>7</sup> Ensarakana hi Lot ay nalintig ay taku ay nalilifok as solet nan numnumna kiapú as nan kaiisiw ay panagfiyag nan chiyucha kakailiyana ay lomalabsing as lintig. <sup>8</sup> Nalintigna

\* <sup>1:19</sup> Num. 24:17; Luc. 1:78-79; Pal. 22:16      † <sup>1:19</sup> “manilaw as numnumyu” winnu omali hi Cristo ay mangelawlawag ay ustus kan chakayu as nan maepangkep kan Apo Dios.      \* <sup>2:4</sup> Gen. 6:2; Jud. 6      † <sup>2:5</sup> Gen. 6:1-9:29      ‡ <sup>2:6</sup> Gen. 19:1-29

ay taku ay nakiili kan chicha. Inurkiw ay nalilifok as solet nan numnumna kiapú as nan chana mangil-il-an ya manmanngoran as nan mangotettet ay chacha at-atun.<sup>9</sup> Isunga am-in chaná ay enom-ommat ad pus-uy at hiyana nan mangammowan takú as nan panangesarakan Apo Dios as nan nadiosan ay tataku as nan chacha maparpalikiatanan. Ammuna us ay mangifiarud ya manusa as nan achi nalintig ay tataku inkiana as nan urkiw ay munokomana.<sup>§</sup> <sup>10</sup> Kaskasincha us machusa nan tataku ay mangun-unud as nan kaiisiw ay mun-ongosán nan achorcha ya mangelalayus as nan wachay kalibfengana.

Nan nauycha achi tit-iwa ay mun-isursuru at naturudcha ay mangekamkaman as mangotettet ya nunkasokelcha. Achicha us umugyat ay manginsurtu as nan chiyuycha machaychayaw ay nafiyang ad chaya.<sup>11</sup> Nan anghelles ay uray kaskasincha mannakafialin ya napigpigsa mu nan chiyuycha achi tit-iwa ay mun-isursuru at achicha ostun nan nakafiasor ay kakadwacha ay anghelles as nan sangwanan Apo Dios.\* <sup>12</sup> Ngem chatona ay tataku at munkalicha as maifusor as nan achicha maawatan. Kamancha atap ay animar ay chaan nanumnuman. Penpennekuncha yangkiay nan kiaiangay ay mun-ongosán nan achorcha. Kun pay nan nauycha ay animar at maiyanakcha yangkiay ay madpap ya mapatuy. Assena us nan ommat kan chicha. <sup>13</sup> Mun-iliwaschantu kiapú as nan namarpaliwasanancha as nan tapina. Lagragsakuncha ay mangelamak ay mangan ya umikop ya mangepapas as assi ay lachok uray kun kaorkia! Maepachongcha as nan mansa ay mangepaassi kan chakayu as nan chacha makekkekanan kan chakayu, ya lagragsakuncha ay cha mangal-allilaw kan chakayu. <sup>14</sup> Maid tukún as chacha anaanapun mu fiakun yangkiay nan chiyuycha fianfiai ay laychuncha ay umiwetan. Uray mu hiyasa, achicha mapmapnek ay cha fumasofiasor. Nasikapcha us ay mangawis as nan tataku ay nakapuy nan pammaticha ta masulisugcha ay fumasor. Inningsacha pay as kenaakum. Awni at chusaur Apo Dios chicha! <sup>15</sup> Tenaynancha nan nalintig ay charan ya natingiwcha. Tinuradcha nan panagfiyag chin Balaam ay potot chin Bosor ay nanglaylayad ay nalagfuwan as nan achi nalintig ay en-enatna.<sup>†</sup> <sup>16</sup> Ngem empasingor Apo Dios chin Balaam ay pomapadtu as nan dongki kiapú as nan nauy mangotettet ay enatna. Nan dongkina ay achi makakali at nunkali kan hiya as kalen chi taku ya empakinakna nan tenotongok ay planon Balaam.

<sup>17</sup> Chatona ay achi tit-iwa ay mun-isursuru at kamancha namag-anan ay uwgor winnu lifuu ay kun cha etaytayaw chi puwak. Ensasakianan at Apo Dios nan lukiar para kan chicha ay maifiaruchancha as nan ngongnunggottan ay maid patingkiana. <sup>18</sup> Ongoongor us chi ifiagfiakiacha ay penapangas ay maid kotkotokna. Insursurucha ay maifialin ay unuchun nan mangotettet ay mun-ongosán nan achor, at hiyasa nan pang-awischa ta fumasor nan kaab-afurot ay taku ay kalaylayaw as nan achi ustу ay panagfiyag. <sup>19</sup> Ekaricha pay ay mawayawayaan nan taku mu unuchuna nan isursurucha, ngem nan kenatit-iwana at chicha mismu nan fiabfiaarun nan chumachael ay ukialicha. Tay nan taku at munfialin as fiabfiaarun nan uray ngachana ay mangamis kan hiya.<sup>‡</sup> <sup>20</sup> As nan nangam-ammowan nan taku kan Apo takú ay Jesu Cristo ay Omesarakan, elayawana nan achi ustу

ay panagfiyang asna's luta. Ngem mu munfiangad kasin hiya ay makna ya maamis as nan sikud ay panagfiyagna, kaskasin mangisiw nan kasasaadna mu as nan chaana nangammuwan kan Cristo. § 21 Un-unuyna at ay chaana ud-ay naammuwan nan nalintig ay panagfiyang mu nan naammuwanaya chukkiana challu nan nauy ay nasantowan ay filin Apo Dios ay naichat kan hiya. 22 Nan chiyucha achi tit-iwa ay mun-isursuru at paneknekancha nan kenatit-iwan nan chuwa ay proverbio ay kanana,  
“Kanun kasin nan asu nan inyorakna,”  
ya kanana us,  
“Uray mu umsum nan fiafuy, uy kasin munlubnak.”\*

### 3

#### *Nan Kasin Omaliyan Jesu Cristo*

<sup>1</sup> Kiakiayumku ay laylaychok, hiyana nan maekadwa ay suratku kan chakayu. As nan nauy chuwa ay suratku at wacha nan enpanumnumku kan chakayu ta ammay ya nacharos nan numnumyu. <sup>2</sup> Laychok ay numnumunu nan infiagfiakian nan chiyucha nasantowan ay pomapadtu ad pus-uy ya nan filfilin Apo takú ay Mangesarakan kan chitaku. Nan nauycha ay filfilin at enpakaammuna kan chakayu babaen as nan apostoles ay nangisursuru kan chakayu. <sup>3</sup> Nan amud ay masapor maawatanyu at as nan chiyucha anongos ay urkiw, wachacha nan tataku ay mangun-unud as nan mangotetet ay mun-ongosán nan achorcha. Omalichantu ya ot-otyokun chakayu <sup>4</sup> ay mangarkali kan chakayu, “Enkaren met Jesus ay munfiangad, o-ngun? Ay chaud nan kawad-ana? Natuycha met at nan kaap-uwan takú, ngem chaan pay met enmali hi Cristo. Hiihiya met challu nan am-in nunlapu as nan nafiyangan nan luta inkiana ad wani.” <sup>5</sup> Hiyachi nan kankanan nan chiyucha oomsot, ngem kurkuratuncha ay liw-an nan enat Apo Dios ad maliyam. Tay ad maliyam, finayang Apo Dios nan luta ya nan wacha ad chaya babaen as nan filina. Chanum nan enosarna ay namayang as nan luta, at nafunsiyan nan luta as nan chanum. <sup>6</sup> Babaen us as nan filina, naleyus nan sikud ay luta, at nurningcha nan katakutaku, ya nachachael nan luta. <sup>7</sup> Babaen challu as nan filina, naesasakiana ay mapuoran nan luta ay wacha ad wani ya as ngatu ay kawad-an nan lifuu. O, maay-aywanancha inkiana as nan urkiw ay maokomán ya machusaan nan katakutaku ay achi munchaychayaw kan Apo Dios.

<sup>8</sup> Ngem kiakiayum ay laylaychok, masapor achiyu liqliw-an na: As nan munnunumnum Apo Dios, nan kafiyag nan usa ay urkiw at kaman hinlifu ay tawwun, ya nan kafiyag nan hinlifu ay tawwun at kaman us-usa ay urkiw. <sup>9</sup> As nan munnunumnum nan tapina at nautuy hi Apo Dios ay mangtongpar as nan enkarina, ngem achi tit-iwa chi. Nan kenatit-iwana at naanos as solet hiya kan chakayu, tay laychuna ay maid koma machusa, ngem kun at koma munfiafiawi nan am-in ay tataku as nan fiasfiasorcha.\* <sup>10</sup> Ngem umchantu challu nan urkiw ay omaliyan nan Apo, at loktat nan omaliyana ay kaman as nan omaliyan nan mangaikiw.† As nan urkiw ay ansa, wachantu nan napigsa ay ungug, at maumastu nan chaya. Marunawtu

---

§ 2:20 Heb. 6:4-6 \* 2:22 Prov. 26:11 \* 3:9 Ezek. 18:32; Joel 2:12-14; Rom. 2:4 † 3:10 Mt. 24:43-44; 1 Tes. 5:2; Pal. 3:3; 16:15

us nan urkiw kiapú as nan apuy, uray nan furan ya nan chiyuycha taraw, ya mapuorantu us nan luta ya am-in ay wacha asna's luta.<sup>‡</sup>

<sup>11</sup> Kiapú ta assid-i nan pannakachachael nan am-in, ngachana ngay ay karasi nan panagfiyagyu? Masapor nasantowan ya nadiosan nan panagfiyagyu <sup>12</sup> as nan chayu manman-uchan as nan urkiw ay mangokomán Apo Dios as nan katakutaku. Masapor atunyu nan kafiaelanyu ay mangepanhenkemad as nan omaliyana. Tit-iwa ay as nan urkiw ay anchí, mapuoran nan chaya, at maetemok nan am-in ay wacha hid-i kiapú as nan apuy. <sup>13</sup> Ngem chitaku ay omaafurot at namnamaun takú ay tongparuntu Apo Dios nan enkarina ay wachantu nan fiarú ay chaya ya fiarú ay luta ay magyanan nan nunkalintig.<sup>§</sup>

<sup>14</sup> Isunga kiakiayyum ay laylaychok, kiapú ta hiyana nan sasad-unyu, epapatiyu nan kafiaelanyu ta nacharos kayu ya maid munkuranganyu as nan mangiilan Apo Dios ya ta makekappia kayu kan hiya. <sup>15</sup> Achiyu liwliwan ay nan kiapón nan kenaanos nan Apo at laychuna ay maesarakan nan tataku. Assena us challu nan insurat Pablo ay laylaychun takú ay ifia kan chakayu babaen as nan silib ay inchat Apo Dios kan hiya. <sup>16</sup> As nan am-in ay sursuratna maepangkep as nan nauy kaesarakanan, assesa challu nan infiagfiakiana. Wachacha kayman nan nalikiat ay maawatan as nan sursuratna, at nan tataku ay kurang chi pannakaawatcha ya nakapuy nan pammaticha at fiarfialinsuwekuncha nan laychun nan hanacha ay kanan. Assesa nan chacha at-atun as nan tapina ay empaisurat Apo Dios ay kalina. Kiapú as nan mangfiarfialinsuwekancha as nan hana, machusacha inkiana.

<sup>17</sup> Ngem kiakiayyum ay laylaychok, kiapú ta ammuyu at nan maepangkep as nan chiyuycha achi tit-iwa ay mun-isursuru, il-ilaunyu ngarud ta achi kayu maaw-awis as nan tukún ay sursurucha ya omachawwi as nan pammati ay penopomkatanyu. <sup>18</sup> Ngem chakayu ay kiakiayyumku, epapasnekyu koma ay manaptapi as nan ammay ay numnumuyu ya as nan mangamamuwanyu kan Apo Jesus. Epapasnekyu koma ay mangunud as nan panagfiyagna.

Machaychayaw koma hiya ad wani ya in-inkiana! Amen.

<sup>‡</sup> **3:10** Mat. 24:35; Mar. 13:31; Luc. 21:33; Pal. 16:17-21      <sup>§</sup> **3:13** Pal. 22:1-7

## Nan Omona Ay Surat Juan Nan Omona Ay Ammuwun

Nan nangisurat as nan nauy ay surat ya nan chuwa pay ay somarunu ay surat at hi Juan ay usa as nan disipulus Jesus (Jn. 21:7). Hiya us nan nangisurat as nan “Ammay Ay Chamag Ay Insurat Juan” ya “Nan Chiyuycha Naepakaammu Kan Juan”. Narakay at hiya as nan nangisuratana as na, isunga ngenadnana nan achorna as am-ama (2 Jn. 1:1; 3 Jn. 1:1). Nan nunsuratana at as nan chiyuycha omaafurot henan il-ili henan Asia Minor, tay nagyan hiya ad Efeso ay siyudad hesa.

Nunsurat hi Juan ay manukun as nan chiyuycha omaafurot ta makekad-kadwacha koma kan Dios Ama ya as nan Anakna ay hi Jesu Cristo (1:3). Nunsurat pay ta achicha maal-allilaw as nan achi tit-iwa ay sursuru.

Intukuna us kan chicha ay achicha ab-afurotun nan chiyuycha kafusor Cristo (2:18-19). Nan hanacha kafusor Cristo at sinmiyancha as nan kenatitiwa (4:1). Tay nan chacha isursuru at taku yangkiay kanu hi Jesus, ya fiakun hiya nan Cristo ay Anak Apo Dios. Insursurucha us un achi takú kanu machukkian chi fiasor kiapú ta hi Satanas nan cha muntortoray asna's luta. Kanancha pay un achi kanu kasaporan chi layad as nan pachong ay taku.

Isunga, infiakian Juan ay nan pammati takú kan Cristo nan iyamis takú as nan am-in ay manangotettet asna's luta (5:4-5). Afurotun takú ay hi Jesus at nunfialin as taku ta esarakana nan tataku ay omafurot kan hiya (4:2-3; 5:6). Mu ngachana ngarud nan manglaylayad kan Apo Dios at masapor us laylaychuna nan pachongna ay taku (4:7-8). Tay nan ngachana ay taku ay mangnamnama ay munfialin as anak Apo Dios at masapor tongparuna nan filfilin Apo Dios (2:3-5; 3:24) ya achina at iturturuy ay fumasor (3:6; 5:18).

Insurat pay Juan nan maepangkep as nan atun takú ay mangam-ammu kan Apo Dios, ya mu ngachancha nan an-ak Apo Dios (2:3-4; 3:2, 24; 4:2, 7-8, 13; 5:2, 18-20). Masapor maematonan takú nan tit-iwa ya nan achi tit-iwa ay sursuru (2:20-21; 3:19; 4:6), tay kiayud at nan timpu ay mun-okomán Apo Dios (2:18).

### **Nan Nakudkudwaan Nan Nauy Surat**

Nan Laplapon Nan Surat 1:1-4

Nan Mangammuwan Kan Apo Dios 1:5-2:17

Nan Kafusor Cristo Ya Nan Chiyuycha Omaallilaw 2:18-29

Nan An-ak Apo Dios 3:1-24

Nan Tit-iwa Ya Nan Achi Tit-iwa Ay Espiritu 4:1-6

Nan Layad Apo Dios 4:7-5:5

Nan Pammaneknek Maepangkep Kan Jesu Cristo 5:6-12

Nan Anongos Nan Surat 5:13-21

### *Nan Kali Ay Umichat As Fiyag Ay Maid Patingkiana*

<sup>1</sup> Isuratmi kan chakayu nan maepangkep kan Jesu Cristo ay makali un Kali ay hiya nan kurpuwan chi fiyag ay maid patingkiana. Hiya at nawawacha nunlapu as nan chaan pay nafiayangan chi ka-ichin,\* ya nunfialin as taku asna's luta. Chinngormi ay mismu nan kalina. Inilan nan mismu ay matami hiya ya kenpan nan mismu ay limami.<sup>†</sup> <sup>2</sup> As nan nunfialinana as taku

\* **1:1** Jn. 1:1-4    † **1:1** Luc. 24:38-43; Jn. 13:25; 20:27

asna's luta, inilami mismu hiya. Isunga paneknekanmi ya epakaammumi kan chakayu nan maepangkep kan hiya ay mangichat as fiyang ay maid pattingkiana. Hiya nan nawawacha kan Dios Ama, ya hiya nan naepakaammumi kan chakami. <sup>3</sup> O, nan inilami ya chinngormi mismu at epakaammumi us kan chakayu ta makekadkadwa kayu koma kan chakami as nan makekadkadwaanmi kan Dios Ama ya as nan Anakna ay hi Jesu Cristo. <sup>4</sup> Isuratmi chaná kan chakayu ta maid munkurangan chi lagsak takú.‡

### *Hi Apo Dios Nan Silaw*

<sup>5</sup> Nauy nan chamag ay chinngormi as nan Anakna ya epakaammumi kan chakayu: Hi Apo Dios at silaw ay manilaw as numnum nán tataku, ya maid poros ngongot kan hiya. <sup>6</sup> Mu kanan takú un makekadkadwa takú kan hiya ngem kutug takú challu ay matataku as nan ngongot at cha takú munkutum ya achi maiyunud as nan kenatit-iwa nan cha takú at-atun. <sup>7</sup> Ngem mu matataku takú as nan kawad-an nan silaw ay kaman kan Apo Dios ay wacha as nan silaw at ammay nan makekadkadwaan takú as nan tunggal usa ay omafurot kan hiya. Nan usa pay at macharosan takú as nan am-in ay fiasfiasor takú babaen as nan charan Jesus ay Anakna.

<sup>8</sup> Mu kanan takú un maid fiasor takú, kun takú cha al-allilawun nan mismu ay anchor takú, ya maid kan chitaku nan kenatit-iwa. <sup>9</sup> Ngem mu ipudnu takú nan fiasfiasor takú, pakawanun Apo Dios chitaku ya charosana us chitaku as nan am-in ay achi nalintig ay en-enat takú, tay hiya at matalek ya nalintig. <sup>10</sup> Mu kanan takú un chaan takú finmasor, nunfialinun takú hiya as nangutum, ya maid kan chitaku nan kalina.

## 2

### *Hi Cristo Nan Kafachang Takú*

<sup>1</sup> Chakayu ay maifilang as an-akku, isuratku na kan chakayu ta achi kayu fumasor. Ngem mu wachay fumasor, wacha at hi Jesu Cristo ay nalintig ay maketakiatfor kan Dios Ama para kan chitaku. <sup>2</sup> Hi Cristo mismu nan naichaton ay nangiliwas as nan chusan nan fiasfiasor takú ta mapakawan takú, ya fiakun yangkiay nan fiasfiasor takú ngem uray nan fiasfiasor nan katakutaku.

### *Nan Filfilin Apo Dios*

<sup>3</sup> Tit-iwa ay am-ammu takú hi Apo Dios mu tongparun takú nan filfilina. <sup>4</sup> Nan taku ay mangali un am-ammuna hi Apo Dios, ngem achina tongparun nan filfilina at nangutum ya maid nan kenatit-iwa kan hiya. <sup>5</sup> Ngem mu ngachana nan mangtongpar as nan kalen Apo Dios, epailana ay maid munkurangan chi layadna kan Apo Dios. Nan mangammowan takú ay mawawacha takú kan Apo Dios at hiyana: <sup>6</sup> Nan taku ay mangali un mawawacha hiya kan Apo Dios at mataku hiya ay kaman as nan panagfiyang Jesu Cristo as nan nunfialinana as taku asna's luta.

<sup>7</sup> Iib-a ay laylaychok, fiakun fiarú ay filin nan chak isurat kan chakayu, ngem sikud ay filin ay wacha kan chakayu as nan laplapon nan emmafurotanyu kan Jesu Cristo. Nan nauy sikud ay filin at nan chinngoryu at ay masapor munlelennayad kayu.\* <sup>8</sup> Uray mu assesa, chak isurat nan nauy usa ay fiarú ay filin, tay naila nan natongparana babaen as nan en-enat Cristo ya

‡ <sup>1:4</sup> Jn. 3:29; 16:24; 2 Jn. 1:12      \* <sup>2:7</sup> Jn. 13:34; 1 Jn. 4:7-8

babaen as nan panagfiyagyu ay omaafurot. Tay nan ngongot at cha mamaid, ya nan tit-iwa ay silaw at cha lomawag.

<sup>9</sup> Nan taku ay mangali un wacha hiya as nan silaw, ya kuna challu iinglun chi ifiana at kutug ay wacha hiya as nan ngongot. <sup>10</sup> Nan taku ay manglayayad as ifiana at mawawacha as nan silaw, ya maid as nan panagfiyagna nan kiapón nan fumasorana.<sup>†</sup> <sup>11</sup> Ngem nan taku ay mangingor as nan ifiana at wacha as nan ngongot ya kaman cha manarcharan ay achina ammu nan ay-ayana, tay finurag nan ngongot hiya.

<sup>12</sup> Chakayu ay maifilang as an-akku, chak isurat na kan chakayu, tay napakawan kayu as nan fiasfiasoryu kiapú kan Cristo. <sup>13</sup> Chakayu ay am-a, chak isurat na kan chakayu, tay am-ammuyu hi Cristo ay nawawacha sakbay mafiyang chi ka-ichin. Chakayu ay fumarfiaru, chak isurat na kan chakayu, tay enamisyu hi Satanás ay makali un Mangotettet. Chakayu ay an-ak, chak isurat na kan chakayu, tay am-ammuyu hi Dios Ama.

<sup>14</sup> Kasinku ifiakia nan kiapúna as nunsuratak kan chakayu ay am-a, tay am-ammuyu hiya ay nawawacha sakbay mafiyang chi ka-ichin. Nunsuratak kan chakayu ay fumarfiaru, tay mafikas kayu, ya mawawacha kan chakayu nan kallen Apo Dios, ya enamisyu us hi Satanás ay makali un Mangotettet.

<sup>15</sup> Achiyu koma laylaychun nan panagfiyag nan tataku winnu uray ngachana ay wacha asna's luta. Tay mu laylaychunyu chaná, maid layadyu kan Dios Ama. <sup>16</sup> Tay am-in ay mangotettet asna's luta ay kaman as nan mun-ongosán nan anchor, nan mang-akuman as iilaun chi mata ya nan mangepangpangasan as kuk-uwa ya kasasaad at fiakun kan Dios Ama nan nurpuwana, ngem kun at asna's luta. <sup>17</sup> Nan fiyag asna's luta ya nan am-in ay mun-ongosán nan tataku at chacha mamaid. Ngem nan taku ay mangekaman as nan enkeddeng Apo Dios at wachay fiyagna ay maid patingkiana.

### *Nan Kafusor Cristo*

<sup>18</sup> Chakayu ay maifilang as an-akku, kiayud umchan nan timpu ay kasintu omaliyan Cristo. Chinggoryu at ay omalintu nan kafusor Cristo, ya uray ad wani at emmongorcha nan chiyuycha fumusor kan Cristo. Isunga hiyana nan mangammuan takú ay kiayud nan omaliyana. <sup>19</sup> Nan chiyuycha fumusor at sikud ay naetatapicha kan chitaku, ngem kuncha sinmiyan, tay fiakun takú challu kakadwa chicha. Tay mu kakadwa takú challu chicha at chaancha koma sinmiyan kan chitaku. Ngem sinmiyancha ta narawag ay maepaila ay fiakun takú kakadwa chicha.

<sup>20</sup> Ngem kun pay chakayu, mawawacha at nan Espiritu Santo ay inchat Cristo kan chakayu, isunga ammuyu am-in nan kenatit-iwa. <sup>21</sup> Munsuratak kan chakayu fiakun kiapú ta achiyu ammu nan kenatit-iwa, ngem kun at kiapú ta ammuyu, ya ammuyu us ay maid poros kinukutum ay murpu as nan kenatit-iwa.

<sup>22</sup> Ngachana nan nangutum mu achi nan taku ay mangesaot ay hi Jesus nan Cristo ay finaor Apo Dios. Nan nauy taku at fumusor kan Cristo, tay esaotna nan Dios Ama ya nan Anakna. <sup>23</sup> Nan taku ay mangesaot as nan Anak Apo Dios at maid us kan hiya hi Dios Ama. Nan taku ay mangepaneknek ay hi Jesus nan Anak Apo Dios at mawawacha us kan hiya nan Dios Ama.

---

<sup>†</sup> **2:10** winnu "maid as nan panagfiyagna nan kiapón chi fumasoran chi tapina."

**24** Nan chamag ay chinchinngoryu nunlapu as nan enmafurotanyu at mawawacha koma as nan numnumyu. Mu hiyasa, mawawacha kayu as nan Anak Apo Dios ya kan Dios Ama.<sup>‡</sup> **25** Hiyana nan fiyag ay maid patingkiana ay enkaren Cristo ay ichatna kan chitaku.

**26** Isuratku na kan chakayu, tay wachacha nan tataku ay mamadpachas ay mangallilaw kan chakayu. **27** Ngem kun pay chakayu, mawawacha nan Espiritu Santo ay inchat Cristo kan chakayu. Isunga achiyu masapor chi mangisuru kan chakayu as kenatit-iwa. Tay nan Espiritu at isuruna kan chakayu nan am-in ay masapor ay ammuwunyu, ya tit-iwa nan isursuruna, fiakun kinukutum. Unuchunyu ngarud nan isursuruna, ya iturturuyu ay mawawacha kan Cristo.

**28** Ad wani, chakayu ay maifilang as an-akku, masapor mawawacha kayu kan hiya ta as nan munpail-anantu at mapapigsa nan numnum takú ya achi takuntu mafainan ay maesakiang kan hiya as nan omaliyana. **29** Ammuyu met ay nalintig hi Cristo. Isunga ammuyu koma us ay maifilang as an-ak Apo Dios nan am-in ay mangekamkaman as ustу.

### 3

#### *Nan An-ak Apo Dios*

**1** Numnumun takú koma nan kenaongor nan layad Dios Ama kan chitaku! Kiapú as nan ongor ay layadna, iflangna chitaku as an-akna. O, tit-iwa ay an-akna chitaku. Hiyana nan kiapúna ay achi chitaku figfikun as nan chiyuycha achi omaafurot, tay achicha challu figfikun hi Dios Ama. **2** Lib-a ay laylaychok, an-ak Apo Dios chitaku ad wani, uray mu achi takú pay maawatan mu ngachana nan munfialinan takú as kasin. Ngem ammu takú ay as nan kasin omaliyan Cristo at munfialin takuntu as kaman kan hiya, tay ilaun takuntu nan ustу ay ilana. **3** Nan am-in ay tataku ay wachay namnamacha kan Cristo at chukkiancha koma nan mangotettet ta kanayon ay nacharos nan panagfiyagcha ay kaman challu kan Cristo.

**4** Nan uray ngachana ay fumasor at labsinguna nan lintig Apo Dios, tay nan fiasor at hiyasa nan manglabsingan as nan lintig. **5** Ammuyu ay emiali hi Cristo asna's luta ta kaanuna nan fiasfiasor chi tataku. Kun pay hiya at maid poros fiasfiasorna. **6** Nan taku ay mawawacha kan Cristo at achina at iturturuy ay fumasfiasor. Nan taku ay mangiturturuy ay fumasfiasor at chaan poros enmafurot kan Cristo ya chaana poros naammuwan hiya.

**7** Chakayu ay an-akku, achiyu eparufus nan uray ngachana ay mangallilaw kan chakayu. Nan taku ay cha mangekamkaman as ustу at nalintig ay kaman kan Cristo ay nalintig. **8** Ngem nan taku ay mangiturturuy ay cha fumasfiasor at takon Satanas. Tay hi Satanas at finmasfiasor nunlapu as nan chaan pay nafiayangan chi ka-ichin. Hiyana nan kiapúna ay emiali nan Anak Apo Dios asna's luta ta chachaeluna nan cha at-atun Satanas.

**9** Nan taku ay tit-iwa ay anak Apo Dios at achina iturturuy ay cha fumasfiasor, tay mawawacha kan hiya nan panagnumnumnum Apo Dios. Achi mafialin ay iturturuya ay cha fumasfiasor, tay naifilang hiya as anak Apo Dios. **10** Nan mangematonan mu ngachancha nan an-ak Apo Dios ya nan an-ak Satanas at hiyana: Nan achi mangekamkaman as ustу winnu achi manglayayad as iib-acha at fiakun an-ak Apo Dios chicha.

#### *Munlelennayad Takú*

---

<sup>‡</sup> **2:24** 2 Tim. 1:13; 4:3-5; Tit. 1:9

**11** Nan chinchinngoryu nunlapu as nan laplapuna at hiyana: Masapor munlelennayad takú. **12** Achi takú koma turachun chin Cain ay takon Satanas ay makali un Mangotettet, ya penatuyna nan enauchina. Adchi pay t'uy penatuy Cain nan enauchina? Kiapú ta mangotettet nan en-enatna, ngem nalintig nan enat nan enauchina.\*

**13** Isunga, iib-a, achi kayu masmaschaaw mu inglun chakayu as nan tataku ay achi omafurot. **14** Ammu takú ay achi chitaku at etortorayan as nan pannakafialin nan utú, tay wacha kan chitaku nan fiyag ay maid patingkiana. Ammu takú sa, tay laylaychun takú nan iib-a takú. Nan taku ay achi manglaylayad as iib-ana at mawawacha paylaing as nan pannakafialin nan utú. **15** Nan taku ay mang-ingor as ifiana at kaman challu pomapatuy, ya ammuyu met ay nan pomapatuy at achi mawawacha as nan fiyag ay maid patingkiana.

**16** Nan atun takú ay mangammu mu ngachana nan tit-iwa ay layad at hiyana: Inchaton Cristo nan fiyagna para kan chitaku. Isunga chitaku us at masapor nakasakiana takú ay mangichaton as fiyag takú para as nan iib-a takú. **17** Mu ngachana nan wachay kenafiaknangna ya ilauna nan ifiana ay munkasaporan, ngem maid poros sug-angna kan hiya, ay mafialina ay kanan un laylaychuna hi Apo Dios? **18** Chakayu ay naifilang as an-akku, nan pananglayad takú as nan iib-a takú at fiakun koma karkali winnu ap-apat yangkiay, ngem maepaila koma as nan ekamkaman takú ay maiyunud as nan kenatit-iwa.

**19** Mu assena nan atun takú ay munlelennayad, ammu takú ay mawawacha kan chitaku nan kenatit-iwa, ya hiyana nan mangaan as ugyat takú as nan sangwanan Apo Dios. **20** Kun chitaku kay pafiasorun as nan numnum takú, ammu takú ay hi Apo Dios at am-amud mu nan numnum takú ya ammunan am-in ay ka-ichin. **21** Iib-a ay laylaychok, mu achi chitaku pafiasorun as nan numnum takú at naturud takú as nan sangwanan Apo Dios. **22** Awatun takú kan hiya nan uray ngachana ay chawatun takú, tay tongparun takú met nan filfilina ya atun takú nan mangepalaylayad kan hiya. **23** Nauy nan filina: Omafurot takú as nan Anakna ay hi Jesu Cristo ya munlelennayad takú ay kaman challu as nan infilin Cristo kan chitaku. **24** Nan manongtongpar as nan filfilin Apo Dios at mawawacha hiya kan Apo Dios, ya mawawacha us hi Apo Dios kan hiya. Nan usa pay at kiapú as nan Espiritu Santo ay inchatna kan chitaku, maammuwan takú ay mawawacha hi Apo Dios kan chitaku.

## 4

### *Nan Tit-iwa Ya Nan Achi Tit-iwa Ay Espiritu*

**1** Iib-a ay laylaychok, achiyu afurotun ay dagus nan am-in ay mangarkali un mawawacha nan Espiriton Apo Dios kan chicha. Masapor chistingunu omona nan sursurucha ta maammuwanu mu nan nurpuwana at kan Apo Dios winnu fiakun, tay ongorcha at nan nunpaila ay achi tit-iwa ay pomapadtu as nan intiru ay luta. **2** Nan mangammuwanu mu mawawacha kan chicha nan Espiriton Apo Dios at hiyana: Nan am-in ay mangepaneknek ay hi Jesu Cristo nan enmali asna's luta ya nunfialin as taku at wacha nan Espiriton Apo Dios kan chicha.\* **3** Ngem nan taku ay achi mangepaneknek ay hi Jesu Cristo nan nunfialin as taku at fiakun Espiriton Apo Dios nan wacha

kan hiya. Hi tona nan espiriton nan kafusor Cristo ay chinchinngoryu at ay cha omali ya ad wani, wacha at asna's luta.

<sup>4</sup> Chakayu ay naifilang as an-akku, an-ak chakayu kan Apo Dios, ya enamisyu nan chiyuycha achi tit-iwa ay pomapadtu, tay nan Espiriton Apo Dios ay mawawacha kan chakayu at natortoray mu nan espiriton Satanas ay mangetortoray as nan chiyuycha achi omaafurot asna's luta. <sup>5</sup> Chatona ay achi tit-iwa ay pomapadtu at kakadwan nan chiyuycha achi omaafurot kan Apo Dios. Isunga nan chacha kankanan at nurpu as nan kenasilib nan chiyuycha achi omaafurot. Hiyana nan kiapúna ay chumngor nan achi omaafurot kan chicha. <sup>6</sup> Ngem chitaku at an-ak chitaku kan Apo Dios. Mu ngachana nan nangammu kan Apo Dios at chumngor kan chitaku. Ngem nan fiakun anak Apo Dios at achi chumngor hiya kan chitaku. Hiyana nan mangammuwan takú as nan Espiritu Santo ay mangisursuru as tit-iwa winnu hi Satanas ay mangisursuru as achi tit-iwa.

### *Nan Layad Apo Dios*

<sup>7</sup> Iib-a ay laylaychok, munlelennayad takú koma, tay hi Apo Dios nan nurpuwan nan layad. Nan manglaylayad as iib-ana at anak Apo Dios ya amammuna as solet hi Apo Dios. <sup>8</sup> Ngem nan achi manglaylayad as iib-ana at achina us am-ammu hi Apo Dios, tay hi Apo Dios at mananglayad. <sup>9</sup> Assena nan enat Apo Dios ay nangepaila as layadna kan chitaku: Infiaorna nan usa ay Anakna asna's luta ta mawad-an takú as fiyag ay maid patingkiana babaen kan hiya.<sup>†</sup> <sup>10</sup> Nan tit-iwa ay layad at hiyana: Fiakun kiapú ta lenaylayad takú hi Apo Dios, ngem kun chitaku at lenaylayad kan hiya, ya infiaorna nan Anakna ay naichaton ay nangiliwas as chusan nan fiasfiasor takú ta mapakawan takú.

<sup>11</sup> Iib-a ay laylaychok, mu assena nan enat Apo Dios ay nanglaylayad kan chitaku, masapor us munlelennayad takú. <sup>12</sup> Maid poros taku as nakaila kan Apo Dios. Ngem mu munlelennayad takú, mawawacha hi Apo Dios kan chitaku, ya nan layadna at natongpar babaen kan chitaku.

<sup>13</sup> Ammu takú ay mawawacha takú kan Apo Dios ya mawawacha hiya kan chitaku, tay inchatna kan chitaku nan Espirituna. <sup>14</sup> Inilami mismu hi Jesus, ya paneknekanmi ay infiaor Dios Ama nan Anakna ay hiya nan mangesarakan as nan tataku asna's luta. <sup>15</sup> Mu ngachana nan mangepanekek ay hi Jesus nan Anak Apo Dios, mawawacha hi Apo Dios kan hiya ya mawawacha hiya kan Apo Dios. <sup>16</sup> Isunga naammuwan takú ya ifisar takú nan panagfiyag takú as nan layad Apo Dios kan chitaku.

Hi Apo Dios at layad. Nan taku ay manglaylayad kan Apo Dios ya nan iib-ana at mawawacha hiya kan Apo Dios ya mawawacha hi Apo Dios kan hiya. <sup>17</sup> Matongpar nan layadna babaen kan chitaku ta tumurud nan numnum takú as nan urkiw ay mun-okomana. O, tumurud nan numnum takú ay maesnop kan Apo Dios, tay nan layad takú asna's luta at kaman challu as nan layad Cristo. <sup>18</sup> Maid ugyat nan taku ay wacha kan hiya nan layad Apo Dios kan hiya as nan Munchusaan Apo Dios. O, nan layad ay maid kurangna at maichuna nan ugyat. Tay nan taku ay umugyat kiapú as nan mangnumnumnummana as nan kachusaana at epailana ay chaan natongpar nan layad Apo Dios kan hiya.

<sup>19</sup> Lomayad takú, tay lenayad chitaku on-oná kan Apo Dios. <sup>20</sup> Mu ngachana nan mangali, "Laylaychok hi Apo Dios," ya iingluna challu nan

<sup>†</sup> **4:9** Jn. 3:16, 36; Rom. 5:8; 8:32; Efe. 2:4-5

ifiana at nangutum hiya. Tay nan achi manglayayad as ifiana ay mailana at achina mafialin ay laylaychun hi Apo Dios ay achina maila. <sup>21</sup> Nan filin Apo Dios kan chitaku at hiyana: Nan manglayayad kan Apo Dios at masapor laylaychuna us nan ifiana.

## 5

### *Nan Mangamisan Takú As Nan Kafusor Apo Dios*

<sup>1</sup> Nan ngachana ay mangafurot ay hi Jesus nan Cristo at anak Apo Dios. Nan ngachana us ay manglayayad as nan usa ay ama at laylaychuna us nan anak nan hana ay ama. <sup>2</sup> Babaen as nan layad takú kan Apo Dios ya nanongtongparan takú as nan filfilina, ammu takú ay laylaychun takú us nan an-ak Apo Dios. <sup>3</sup> Tay nan mangepail-an takú ay laylaychun takú hi Apo Dios at nan manongtongparan takú as nan filfilina. Nan filfilina at achi nalikiat ay tongparun. <sup>4</sup> Tay nan am-in ay naifilang as an-ak Apo Dios at kanayoncha ay amisun nan uray ngachana ay mangotettet ay wacha asna's luta. Nan iyamis takú at nan pammati takú.\* <sup>5</sup> Ngachana nan mangamis as nan manangotettet ay wacha asna's luta? Maid tukún mu achi yangkiay nan taku ay mangafurot ay hi Jesus nan Anak Apo Dios.

### *Nan Mangepaneknek As Nan Tit-iwa Maepangkep Kan Jesu Cristo*

<sup>6</sup> Hi Jesu Cristo nan enmali asna's luta ay nangepaneknek ay hiya nan Anak Apo Dios babaen as nan nafunyakianana as nan chanum ya babaen as nan natuyana as nan koros as nan enmayasan nan charana. Fiakun yangkiay babaen as nan chanum ngem babaen as nan chanum ya charana. Nan mangepaneknek ay tit-iwa na at nan Espiritu Santo, tay hiya nan nurpuwan chi kenatit-iwa. <sup>7</sup> Wachacha nan turu ay mangepaneknek as nan kenatit-iwa maepangkep kan Jesu Cristo: <sup>8</sup> nan Espiritu Santo, nan chanum ya nan chara. Chatona ay turu at mapapchong nan pamaneknekcha. <sup>9</sup> Mu afurotun takú nan pamaneknek chi tataku, masapor kaskasin takú afurotun nan pamaneknek Apo Dios, tay hiyana nan pamaneknek Apo Dios maepangkep as nan Anakna ay hi Jesu Cristo. <sup>10</sup> Nan taku ay omafurot as nan Anak Apo Dios at aammuna ay tit-iwa nan nauy ay pamaneknek. Ngem nan taku ay achi omafurot kan Apo Dios at munfialinuna hi Apo Dios as nangutum, tay achina afurotun nan pamaneknekna maepangkep as nan Anakna. <sup>11</sup> Nauy nan pamaneknek Apo Dios: Inchatna kan chitaku nan fiyag ay maid patingkiana, ya nan Anakna nan nurpuwan nan nauy ay fiyag. <sup>12</sup> Nan taku ay mawawacha as nan Anak Apo Dios at wacha kan hiya nan nauy fiyag ay maid patingkiana. Ngem nan taku ay achi pay laing mawawacha as nan Anak Apo Dios at maid kan hiya nan nauy fiyag.

### *Nan Anongos Nan Surat*

<sup>13</sup> Isuratku na kan chakayu ay omafurot as nan Anak Apo Dios ta maam-muwanyu ay wacha kan chakayu nan fiyag ay maid patingkiana. <sup>14</sup> Wachay turud takú as nan sangwanan Apo Dios, tay ammu takú ay mu ngachana nan chawatun takú ay maiyunud as nan laychuna at chungruna chitaku. <sup>15</sup> Mu ammu takú ay chungruna chitaku as nan uray ngachana ay chawatun takú kan hiya, ammu takú ay ichatna kan chitaku nan chinawat takú kan hiya.

\* <sup>5:4</sup> 1 Jn. 2:15-17

**16** Mu wachay mangila as ifiana ay cha fumasor as fiasor ay achi ometoróng as nan utúy ay maid patingkiana, masapor ekarakarakanýu hiya ta pakawanun Apo Dios. Mu hiyasa, ichatna nan fiyag ay maid patingkiana kan hiya. Maekaman na yangkiay as nan chiyuycha tataku ay nan fiasfiasorcha at achi ometoróng as nan utúy. Ngem wacha us nan fiasor ay ometoróng as nan utúy, ya achek kanan un ekarakarakanýu nan chiyuycha mangekaman as assesá.<sup>†</sup>

**17** Am-in ay achi ustu ay ekamkaman at fiasor, ngem wacha nan fiasor ay achi ometoróng as nan utúy ay maid patingkiana.

**18** Ammu takú ay nan ngachana ay naiflang as anak Apo Dios at achina iturturuy ay fumasfiasor, tay nan Anak Apo Dios at ay-aywanana hiya, ya nan Mangotettet ay hi Satanas at achina poros mafialin ay ekaman chi mangisiw kan hiya.

**19** Ammu takú ay an-ak chitaku kan Apo Dios, ya nan am-in ay achi omaafurot asna's luta at wachacha as nan pannakaafialin Satanas.

**20** Ammu takú us ay enmali at nan Anak Apo Dios, ya ichatnay pannakaawat kan chitaku ta maammuwán takú ay hiya nan tit-iwa. Nawawacha takú kan hiya ay tit-iwa, tay nawawacha takú as nan Anakna ay hi Jesu Cristo. Hi tona nan tit-iwa ay Apo Dios ya kurpuwan chi fiyag ay maid patingkiana.

**21** An-akku, achawwiyanýu nan didiosen.

---

<sup>†</sup> **5:16** Mat. 12:31-32; Heb. 6:1-6; 2 Ped. 2:20-22

## Nan Maekadwa Ay Surat Juan **Nan Omona Ay Ammuwun**

Nan nauy maekadwa ay surat Juan at para as nan fiafiai ay pinilen Apo Dios ya as nan an-akna. Nan chiyuycha nangachar as nan Biblia at kanancha un nan nauy ena ya nan an-akna at kiakiayyum Juan mismu. Isunga nunsurat hiya kan chicha ta papigsauna nan pammaticha (1:5). Nan kenalen nan tapen nan tataku ay laychun Juan ay kanan at nan nauy suratna at para as nan iglesia ay maepachong as nan ena, ya as nan membrona ay maepachong as nan an-ak nán nauy ena. Nan laychun ngarud tona ay kanan at para kan chitaku am-in ay omaafurot kan Cristo Jesus nan nauy surat Juan.

Nunsurat hi Juan ta epakaasina ay munlelennayadcha, tay hiyasa nan filin Apo Dios. Infiakiana us kan chicha ay il-ilauncha nan chiyuycha omaallilaw ay mangisursuru as kinukutum ta achicha un-unuchun nan sursurucha.

Nan kasenopan nan laychun Juan ay kanan at maila as nan nauy versikulu waru: "Il-ilaunyu ta achi mamaid nan inidnuwanmi kan chakayu, ngem kunyu at koma maawat nan gun-gunayu ay maid kurangna."

### **Nan Nakudkudwaan Nan Nauy Surat**

Nan Laplapon Nan Surat 1-3

Nan Kenatit-iwa Ya Layad 4-11

Nan Anongos Nan Surat 12-13

<sup>1</sup> Ha-un hi Juan ay usa ay am-ama as nan chiyuycha omaafurot. Nauy nan suratku kan he-a ay ena ay pinilen Apo Dios ya as nan an-akmu. Tit-iwa nan layadku kan chakayu ay hen-enen-a. Fiakun yangkiay ha-un nan manglayayad kan chakayu, ngem am-in nan nangammu as nan tit-iwa ay sursuru. <sup>2</sup> O, laylaychunmi chakayu kiapú ta nan nauy tit-iwa ay sursuru at mawawacha kan chitaku ya maid poros mangaan kan chitaku in-inkiana.

<sup>3</sup> Sapay koma ta mawawacha kan chitaku nan grasya, sug-ang ya natalna ay numnum ay murpu kan Dios Ama ya kan Jesu Cristo ay Anakna. Mawawacha koma chaná kan chitaku mu iturturuy takú ay mangun-unud as nan tit-iwa ay sursuru ya mu iturturuy takú ay munlelennayad.

<sup>4</sup> Ongor chi lagsakku as nan nangammuwak ay cha un-unuchun nan tapen nan an-akmu nan tit-iwa ay sursuru ay kaman as nan infilin Dios Ama kan chitaku. <sup>5</sup> Ad wani, nauy nan chawatok kan he-a ay ena: Munlelennayad takú. Fiakun fiarú ay filin nan nauy chak isurat kan he-a, ngem kun at wacha kan chitaku as nan laplapon nan enmafurotan takú. <sup>6</sup> Nauy nan laychun ay kanan nan layad: Masapor unuchun takú nan maiyunud as nan filfilin Apo Dios. Nan filin ay chinngoryu as nan laplapuna at masapor munlelennayad takú.

<sup>7</sup> Epanumnumku na kan chakayu, tay ongorcha nan omaallilaw ay nai-waras asna's luta. Chatona nan tataku ay achi poros mamigfig as nan emmaliyan Jesu Cristo as nan nunfialinana as tákú. Nan assesena ay tataku at omaallilaw ya kafusor Cristo.\* <sup>8</sup> Il-ilaunyu ta achi mamaid nan inidnuwanmi kan chakayu, ngem kunyu at koma maawat nan gun-gunayu ay maid kurangna.

---

\* <sup>1:7</sup> 1 Jn. 4:3

<sup>9</sup> Nan ngachana ay achi mangiturturuy ay mangunud as nan insursuron Cristo ya sorsorokana at maid hi Apo Dios kan hiya. Ngem nan ngachana ay mangiturturuy ay mangunud as nan insursuron Cristo at mawawacha kan hiya hi Dios Ama ya nan Anakna ay hi Jesu Cristo. <sup>10</sup> Isunga mu ngachana nan omali ay achi mangisuru as nan nauy ay sursuru kan chakayu, achiyu paspaskopun as afongyu winnu pakpakomostaun. <sup>11</sup> Tay nan taku ay mangpakomosta kan hiya at cha maetapi as nan mangotettet ay chana attun.

<sup>12</sup> Uray mu ongor pay chi laychok ay ifiakia kan chakayu, chek ud-ay etapi as nan nauy ay surat. Ngem kunak at koma makaali ay mangfisita ya maketakiatfor kan chakayu ta kaskasin takú naragsak.

<sup>13</sup> Nan an-ak nan ifiam ay fiafiai ay pinilen Apo Dios at cha chakayu pakomostaun.

## Nan Maekatlu Ay Surat Juan Nan Omona Ay Ammuwun

Nan nauy maekatlu ay surat Juan at para as nan kiayyumna ay hi Gayo ay usa ay mange pangpanguru as nan iglesia.

Nunsurat hiya kan Gayo ta chayawuna hiya kiapú as nan ammay ay chana atuatun as nan chiyucha mun-ekaskasaba uray kuncha kaili ay achi amammu. Wacha nan tukun Juan asna maepangkep as nan mangotettet ay cha atuatun Diotrefes ta achina turturachun sa.

Nan kaamuchan ay laychun Juan ay kanan at maila as nan nauy ay versikulu hinpuru ya usa: "He-a ay laylaychok, achim turturachun nan mangotettet mu achi yangkiay nan ammay. Nan mangekamkaman as ammay at anak Apo Dios. Ngem nan mangekamkaman as mangotettet at achina am-ammu hi Apo Dios."

### **Nan Nakudkudwaan Nan Nauy Surat**

Nan Laplapon Nan Surat 1-4

Nan Naichayawan Gayo 5-8

Hi Diotrefes Ya Hi Demetrio 9-12

Nan Anongos Nan Surat 13-15

<sup>1</sup> Ha-un hi Juan ay usa ay am-ama as nan chiyucha omaafurot.

Nauy nan suratku kan he-a, Gayo ay tit-iwa ay laylaychok.\*

<sup>2</sup> He-a ay laylaychok, sapay koma ta ammay nan fiyagmu hesa ya napigsa koma nan achormu ay kaman as nan kenapigsan nan pammatem. <sup>3</sup> Ongor paat chi lagsakku as nan inumchanan nan tapen nan iib-a takú hena ya as nan nangifiag-antha ay inturturuymu ay mangunud as nan tit-iwa ay sursuru ay kaman challu as nan cham at-atun. <sup>4</sup> Maid tukún as kaskasin mangepalagsak kan ha-un mu achi kiapú as nan nauy nanngorak ay nan an-akku at chacha un-unuchun nan tit-iwa ay sursuru.

<sup>5</sup> He-a ay laylaychok, mataleksa as nan cham at-atun ay fumadfiachang as nan iib-a takú ay omaafurot, kaskasin as nan chiyucha kaili ay achi amammu. <sup>6</sup> Infiakiacha as nan iglesia nan maepangkep as nan layadmu kan chicha. Fiadngam man paat chicha as nan kasaporancha as nan mangitruyancha ay munfiaat. O, atum sa ay maiyunud as nan malaylaychanan Apo Dios. <sup>7</sup> Tay as nan nak-akantha ay mangekaskasaba as nan maepangkep kan Cristo at maid enawatcha as fiachang ay nurpu as nan chiyucha achi omaafurot. <sup>8</sup> Isunga chitaku ay omaafurot nan masapor mangfiachang as nan assesesa ay tataku ta maetapi takú kan chicha ay mangepakaammu as nan tit-iwa ay sursuru.

<sup>9</sup> Nunsuratak as nan iglesia hesa, ngem hi Diotrefes ay munlarayad ay munfialin as mange pangpanguru kan chicha at achina figfikun nan kalibfengan takú. <sup>10</sup> Isunga as nan omaliyak hesa, pafoknakoktu nan am-in ay chana at-atun ay hiyasa nan mangepabpfiasorana kan chitaku as mangotettet. Achi pay laing mapnek as nan hana, tay achina laychun ay mangiliyun nan iib-a takú. Pas-iwuna pay nan chiyucha mang-awat as nan chiyucha manglayad ay mangmangili kan chicha, ya pak-akuna chicha as nan iglesia.

---

\* <sup>1:1</sup> Ara. 19:29

<sup>11</sup> He-a ay laylaychok, achim turturachun nan mangotettet mu achi yangkiay nan ammay. Nan mangekamkaman as ammay at anak Apo Dios. Ngem nan mangekamkaman as mangotettet at achina am-ammu hi Apo Dios.

<sup>12</sup> Mu maepangkep kan Demetrio, ammay nan kaap-apatanas as nan am-in ay tataku. Nan panagfiyagna at paneknekana ay chana un-unuchun nan tit-iwa ay sursuru. Uray chakami at paneknekanmi us nan maepangkep kan hiya, ya ammom met ay tit-iwa nan pammaneknekmi.

<sup>13</sup> Ongor pay nan laychok ay ifiakia kan he-a, ngemache ud-ay isurat hena. <sup>14</sup> Sapay koma ta achi mafiayag at mun-innilata, at kunta mun-sasakiang ay muntakiatfor.

<sup>15</sup> Sapay koma ta mawawacha kan he-a nan natalna ay numnum. Nan am-in ay kiakiayummu hena at chachaka pakomostaun. Hin-us-aum pay ay mangepakomosta as nan chiyucha kiakiayum takú hesa.

## Nan Surat Judas

### Nan Omona Ay Ammuwun

As nan Fiarú ay Turag, opat nan nakin ngachan as Judas. Nan omona at hi Judas Iscariote ay nangesepsep kan Jesus. Nan maekadwa at hi Judas Barsabas ay mangepangpanguru as nan chiyuycha omaafurot ad Jerusalem ya nangitun-ud kan cha Pablo kan Bernabe (Ara. 15:22). Nan maekatlu at hi Judas Tadeo ay potot Santiago. Cha Santiago kan Juan at potot Zebedeo (Mt. 10:3; Mar. 3:18; Luc. 6:16; Ara. 1:13). Nan maekap-at at hi Judas ay nangisurat as nan nauy ay surat. Hi Judas ay anna at sunúd Santiago ay usa us ay mangepangpanguru as nan omaafurot ad Jerusalem.

Nan nauy ay surat Judas at para as nan am-in ay omaafurot kan Cristo, kaskasin as nan chiyuycha Judio. Nunsurat hiya ta tukununa chicha ay achicha un-unuchun nan kinukutum ay sursuron nan chiyuycha achi tit-iwa ay mun-isursuru. Nan sursuron chatona at uray ud-ay epapas nan assi ay lachok, achiyun nan chiyuycha wachay kalibfengancha, ya ekaliyan as maifusor nan machaychayaw ay anghelles (1:4, 8) ya tapina pay (1:16). Atuncha chaná, tay nan pammaticha at pakawanun challu kanu Apo Dios chicha kiapú as nan ongor ay sug-angna kan chicha. Isunga intukun Judas ay papipigsaun nan pammati ay namingpingsan ay entalek Apo Dios as nan tatakuna (1:3). Masapor maid munpappaallilaw as nan hanacha fialinsuwek ay sursuru, tay uray mu manangsug-ang hi Apo Dios, chusauna challu nan chiyuycha mangekaman as mangotettet.

#### **Nan Nakudkudwaan Nan Nauy Surat**

Nan Laplapon Nan Surat 1-2

Nan Achi Tit-iwa Ay Mun-isursuru 3-13

Nan Enpadton Enoc 14-16

Nan Enpadton Nan Apostoles 17-19

Nan Tukun As Nan Chiyuycha Omaafurot 20-23

Nan Kararag Ay Pangchayaw Kan Apo Dios 24-25

#### *Nan Laplapon Nan Surat*

<sup>1</sup> Ha-un hi Judas ay munserserfi kan Jesu Cristo ya enauchen Santiago.

Nauy nan suratku ay para as nan chiyuycha enayakian Dios Ama aylaylay-chuna ya ay-aywanana inkiana as nan kasintu omaliyan Jesu Cristo. <sup>2</sup> Sapay koma ta omongoongor kan chakayu nan sug-ang, natalna ay numnum ya layad Apo Dios.

#### *Nan Achi Tit-iwa Ay Mun-isursuru*

<sup>3</sup> Iib-a ay laylaychok, enpapatek paat ay nunsurat kan chakayu maepangkep as nan mapapchong ay kaesarakanan takú. Ngem ad wani, naleknak ay masapor munsuratak ay manukun kan chakayu ta komakud kayu ay mangepapigsa as pammati ay namingpingsan ay entalek Apo Dios kan chitaku ay tatakuna. <sup>4</sup> Tay nan tapen nan chiyuycha achi nadiosan ay tatakua ay achi tit-iwa ay mun-isursuru at naetatapicha kan chakayu ay achiyu ammu. Chicha nan naepadtu challu ad pus-uy ay machusantu ay hiyasa nan naisurat as nan Kalen Apo Dios. Nan chacha at-atun at chacha fiarfialinsuwekun nan tit-iwa ay maepangkep as nan grasyan Apo Dios ta

mangepasancha as nan assi ay lachokcha. Achiyuncha us hi Jesu Cristo ay us-usa yangkiay ay Amo ya Apo takú.\*

*Nan Chiyuycha Chinusan Apo Dios Ad Pus-uy*

<sup>5</sup> Uray mu ammuu chaná am-in, laychok challu ay mangepanumnum kan chakayu ay ensarakan Apo Dios nan chiyuycha kianak Israel as nan nangepanguwana kan chicha ay nak-ak ad Egipto, ngem kun pay naaw-awni, penatuya nan chiyuycha chaan enmafurot kan hiya.<sup>†</sup>  
<sup>6</sup> Numnumunyu nan chiyuycha anheles ay chaan napnek as nan kasasaadcha ay enkeddeng Apo Dios, ngem kuncha at tenaynan nan ustу ay kawadancha ad chaya. Isunga enpakor-ong Apo Dios chicha in-inkiana, ya enpaifiarudna chicha as nan kawad-an chi ngongot inkiana as nan umchanan nan amud ay urkiw ay mun-okomana.<sup>‡</sup> <sup>7</sup> Numnumunyu us nan enommat henan chiyuycha siyudad ay Sodoma ya Gomorra ad pus-uy, ya nan chiyuycha siyudad henan sag-uncha. Tay nan chiyuycha inmiili hid-i at enpapascha nan fiakun kiakiangay ay lachok ay kaman as nan enat nan chiyuycha anheles.<sup>§</sup> Isunga enpaetemok Apo Dios chicha patí nan chiyuycha siyudadcha. Nan chiyuycha inmiili hid-i at chacha machusa as nan apuy ay achi mapappauy ta mafiq-an nan am-in.\*

<sup>8</sup> Kaman us challu as nan nauycha achi tit-iwa ay mun-isursuru. Kiapú as nan chiyuycha iitawcha ay epangpangascha ay kanancha un nurpu kan Apo Dios, fumasorcha as nan mismu ay achorcha ay mangekamkaman as assi. Achiyuncha nan chiyuycha wachay kalibfengancha, ya ekaliyancha as maifusor nan machaychayaw ay anheles. <sup>9</sup> Ngem uray hi Miguel ay kangatuwan ay anghel at chaana enkalkaliyan hi Satanas as maifusor kan hiya as nan nakisumaana kan hiya maepangkep as nan achor Moises. Ngem kuna yangkiay kenali, "Hi Apo Dios nan kikiad ay maningor kan he-a!"  
<sup>10</sup> Ngem chatona ay tataku at ekak-aliyancha nan kumpurmi ay achicha maawatan. Nan chiyuycha kiakiangay ay achi masapor maachar at maepachong as nan cha at-atún nan chiyuycha atap ay animar ay chaan nanumuman. Munpennekcha yangkiay as nan laylachun nan achorcha. Kiapú as nan nauycha, machusachantu in-inkiana. <sup>11</sup> Kasusug-angcha, tay kauugyat nan chusacha! Tinuradcha nan mangotettet ay panagfiyag chin Cain.<sup>†</sup> Nunpapascha as nan allilaw chin Balaam ay nangepanguru as nan tataku ay fumasor ta fumaknangcha.<sup>‡</sup> Kenontracha us hi Apo Dios ay kaman as nan nangontraan Core kan Moises ad pus-uy. Siguradu ay machusachantu ay kaman kan Core.<sup>§</sup> <sup>12</sup> As nan chacha makekkekkanan kan chakayu as nan maam-amonganyu ay mangan as nan mangnumnumnumanyu as nan natuyan Apo Jesus at chicha nan mangepaassi kan chakayu.\* Nunsidlacha! Maid poros fiabfaincha ay mangelamak ay mangan ya umikop, tay kun yangkiay achorcha nan nunumnumuncha. Maepachongcha as nan lifuu ay kun cha etaytayaw chi angin ay achi umichat as uchan.<sup>†</sup> Maepachongcha us as nan chiyuycha kaiw ay achi mamunga as nan timpon chi mamungaancha, ya kamancha at natuy, tay nafiagnotcha. <sup>13</sup> Maepachongcha as nan ad-acha ay challuyon henan fiayfiay ay cha mangepabpfafoknag as naruket ay usab henan oletna ay maepachong as nan kafiafiaiñ ay chacha at-atun.

\* 1:4 2 Ped. 2:1    † 1:5 1 Co. 10:1-5    ‡ 1:6 2 Ped. 2:4    § 1:7 Gen. 6:2-4; 2 Ped. 2:4    \* 1:7 Gen. 19; Deut. 29:23    † 1:11 Gen. 4:1-8; 1 Jn. 3:12    ‡ 1:11 Num. 16:1-35    § 1:11 Num. 22-24; 31:16; 2 Ped. 2:15-16    \* 1:12 2 Ped. 2:13    † 1:12 2 Ped. 2:17

Maepachongcha us as nan chiyuycha taraw ay maid ustu as ayuncha. Ensasakianan at Apo Dios nan lukiar henan ngongot ay maifiaruchancha in-inkiana.

### *Nan Enpadton Chin Enoc*

<sup>14</sup> Wacha nan enpadton chin Enoc ay nurpu as nan maekapitu ay kianak Adan ad pus-uy maepangkep kan chicha. Kenalina, "Ilaunyu, makealintu nan Apo ay kadwana nan linibilfu ay nasantowan ay anhelesna <sup>15</sup> ay uy mangokóm as nan am-in ay tataku. O, omalintu ay mangicharum as nan am-in ay achi nadiosan ay tataku kiapú as nan am-in ay achi nadiosan ay enenatcha ya am-in ay nasaket ay kenarkalicha ay maifusor kan hiya!"

<sup>16</sup> Chatona ay tataku at chicha nan cha munlililili ya cha mangepabpfiasor as nan tapina. Chicha nan cha mangun-unud as nan mangotetted ay mun-ongosancha. Epangpangascha nan achorcha, ya ichayawcha nan ibacha ta maaracha nan laychuncha.

### *Nan Filfilin*

<sup>17</sup> Ngem chakayu ay iib-a ay laylaychok, achiyu koma liwliw-an nan enpadton nan apostoles Apo takú ay Jesu Cristo. <sup>18</sup> Kenalicha kan chakayu, "Kun pay umchan nan chiyuycha anongos ay urkiw, wachachantu nan tataku ay mangot-otyok kan chakayu. Chacha un-unuchun nan achi nadiosan ay mun-ongosancha."‡ <sup>19</sup> Chatona ay tataku nan kurpuwan nan mangsisiyan kan chakayu. Kun yangkiay nan mismu ay mun-ongosancha nan mangetortoray kan chicha, tay maid nan Espiritu Santo kan chicha.

<sup>20</sup> Ngem chakayu ay laylaychok ay iib-a, munpepennapigsa kayu koma as nan nasantowan as solet ay pammatiyu, ya munkararag kayu babaen as nan mangepanguruwan nan Espiritu Santo. § <sup>21</sup> Ilaunyu ta mawawacha kayu koma as nan layad Apo Dios as nan chayu manman-uchan kan Apo takú ay Jesu Cristo ay mangepailantu as nan sūg-angna as nan mangichatanantu kan chakayu as nan fiyag ay maid patingkiana.

<sup>22</sup> Sug-anganyu ya fiadnganyu nan chiyuycha munchuwachuwa as nan pammatica. <sup>23</sup> Awisunuyu tapina ta munfiangadcha as nan pammati. Mu hiyasa nan atunyu, kamanyu kuyuchun chicha as nan apuy ad inferno. O, sug-anganyu, ngem il-ilaunyu challu ta achi kayu maetapi kan chicha. Inglunyu nan mangotetted ay chacha at-atun, tay ñan nunsidla ay kaiisiw ay chacha at-atun at maepachong as nan mansa ay mangmansa as nan uray nan nunchuchur-um ay fiachucha.

### *Nan Luwaru Ay Mangichayaw Kan Apo Dios*

<sup>24</sup> Machaychayaw koma hi Apo Dios ay makafiael ay mangaaywan kan chakayu ta achi kayu maamis as nan fiasor. Hiya nan makafiael ay mangepatakchug kan chakayu as nan machaychayaw ay sangwanana ay chakayu nan maid fiasfiasorna ya naragsak kayu as solet.\* <sup>25</sup> Hiya nan us-usa ay Apo Dios ay Mangesarakan kan chitaku babaen kan Jesu Cristo ay Apo takú. Sapay koma ta mawawacha kan Apo Dios nan chayaw, kaichayawan, pannakafialin, ya toray ad pus-uy, ad wani, ya in-inkiana! Amen.†

‡ **1:18** 1 Tim. 4:1; 2 Tim. 3:1-5; 2 Ped. 3:3  
1 Tim. 1:17

§ **1:20** Rom. 8:26 \* **1:24** Rom. 14:4; Efe. 3:20

† **1:25**

## Nan Naepakaammu Kan Juan (Paltiing) Nan Omona Ay Ammuwun

Nan nauy ay surat at hiyana nan empakaammon Apo Jesu Cristo kan Juan ay usa as nan apostolesna. As nan timpu ay nangisuratan Juan as nan nauy, nan chiyuycha omaafurot kan Jesus at naparpalikiatcha. Isunga insuratna na ta liwliwauna chicha, ya lumuwunay namnamacha.

Naifiakia as na ay uray napigsa hi Satanas ya nan chiyuycha anennetna ay mamarpalikiat as nan tataku asna's luta, masapor achi engannganuy nan chiyuycha omaafurot nan pammaticha, tay amisun challu Apo Dios nan hanacha ay kafusorcha. Isunga nan ngachana ay munturturuy ay omafurot kan Jesus at maketoray kan hiya in-inkiana.

Nan naepakaammuwan nan nauy ay surat at as nan timpon nan chuwa ay nunkasongel ay emperador ad Roma. Nan nauycha ay emperador at cha Emperador Nero ya hi Emperador Domitian. Peneletcha nan tataku ay manaychayaw kan chicha, tay laychuncha ay maichaychayawcha ay kaman kan Apo Dios. Penarpalikiatcha nan chiyuycha omaafurot kan Jesus, tay nan chiyuycha omaafurot at chaancha chinaychayaw nan emperador.

As nan timpon Emperador Domitian, enpatiliwna hi Juan, at enpaiyuyna henan ek-eket ay luta ay liniliwus chi fiayfiay ay makali un Patmos (1:9). Nafiyag ay nanagyan hi Juan hid-i inkiana wacha nan fiarú ay emperador ay nangilufus kan hiya, at nunfiangad hiya as nan iglesia ad Efeso ya hid-i nan natuyana.

As nan nauy ay surat at wachacha nan opat ay kaman iitaw ay enpailan Jesus kan Juan maepangkep as nan planon Apo Dios para henan nauy lufong ya para as nan tatakuna.

As nan omona ay kaman iitaw (1:10-3:22), naepaila ay hi Jesus at wacha as nan kiawan nan pitu ay maepatpatngan chi silaw ay mangerepresentar as nan pitu ay iglesia ad Asia. Nan epakaammuna as nan chiyuycha iglesia at omong-ongor koma nan layadcha ya panangtongparcha kan Apo Dios. Tay mu munturturuycha as nan pammaticha, tokafian Apo Dios nan kaman pantiw nan muntorayana para kan chicha (3:8).

As nan maekadwa ay kaman iitaw (4:1), inilan Juan nan mismu ay chaya, ya inilana us ay nangatokor hi Apo Dios as nan tronona. Naepaila kan Juan ay nan korderon Apo Dios at hiya yangkiay nan maekari ay mamitlag as nan nalooppelop ay papel, ya mangifiakia as nan panangesarakan Apo Dios as nan tatakuna, ya nan panangchusana as nan am-in ay mangekamkaman as mangotettet.

As nan maekatlu ay kaman iitaw (17:3), inilan Juan nan enkaman Apo Dios ay nanachael as nan am-in ay karasen chi mangotettet asna's luta. Tit-iwa ay oralintu hi Apo Dios ay manachael henan intiru ay luta ya as nan am-in ay mangachi kan hiya. Maidtu poros makalaway.

As nan anongos ay kaman iitaw (21:10), naepaila kan Juan nan atun Apo Dios ay mangepafiarú as nan chaya ya nan luta. Nan chiyuy sikud at mamaidtu ya achi kasin mail-ila. (20:11). Nan tatakon Apo Dios at maepachongcha as nan fiarú ay siyudad ay cha kumuwab ay murpu ad chaya. Hena makekadkadwa takuntu kan Apo Dios in-inkiana.

Ongor nan sinyar ay nalikiat ay maawatan as nan nauy ay surat ya wachay laychuncha ay kanan ay kaman as nan ongor ay mata. Nan laychuna ay

kanan at “nan munfialinan as masilib ay mangammu as nan naun-unig ay fianag ay nalikiat ay maawatan.” Nan laychun ay kanan nan sakkud at “pannakafialin” winnu “kalibfengan.” Nan laychun ay kanan nan uru, korona, ya nan trono at “kenaari” ya “kenawachay kalibfengan.” Nan laychun ay kanan nan fiayfiay at “wachay munsiyanan” winnu “wachay muntotonga.”

Nan chiyuycha numero at wacha us nan laychuncha ay kanan. Nan numero ay pitu at filang Apo Dios. Nan laychuna ay kanan at “kumpilitu” winnu “maid poros kurangna.” Nan numero ay unum at hiyana nan numero ay naichat as nan taku. Kun pay hi Apo Dios at finayangna nan lufong as unum ay urkiw. Nan numero ay hinpuru ya chuwa at epailana nan tatakon Apo Dios. Nan tapina ay numero as nan nauy ay surat at wachacha us nan tukutukún ay laychuncha ay kanan.

Nan chiyuycha kolor at wacha us nan laychuncha ay kanan ay kaman as nan munpupukaw. Nan laychuna ay kanan at “puru” winnu “nasantowan.” Kun pay nan munchachara. Nan laychuna ay kanan at “chara” winnu “chaton.”

Nan ngachana ay taku ay mangachar as nan nauy ay surat at masapor nunumnumuna nan chiyuycha kafiag-anan ay inchat Juan as nan 22:18-19 ay kanana un masapor achina tapapiyan winnu ak-aketan nan wacha as nan nauy ay naepakaammu.

### **Nan Nakudkudwaan Nan Nauy Surat**

Nauy nan usa ay wagas ay kakudkudwaan nan nauy surat ta naraka as acharun. Pitu nan nakudkudwaana ay maiyunud as nan pitu ay numero ay nafukig as nan nauy surat. Nan tunggal usa at kaman eklatu ay mangifiakia as nan atun Apo Dios ay mangamis as nan mangotettet ya nan mange-sarakanana as nan tatakuna.

Nan Pitu Ay Iglesia 1:1-3:22

Nan Pitu Ay Silyu 4:1-8:1

Nan Pitu Ay Tarampet 8:2-11:19

Nan Pitu Ay Sinyar 12:1-14:20

Nan Pitu Ay Mallokong 15:1-18:24

Nan Omaliyan Cristo Ya Nan Mun-okomán Apo Dios 19:1-20:15

Nan Fiarú Ay Chaya Ya Fiarú Ay Lufong 21:1-22:21

### ***Nan Laplapon Nan Surat***

<sup>1</sup> Nan naisurat as nan nauy ay surat at hiyana nan enpakaammon Apo Dios kan Jesu Cristo ta epakaammon Jesu Cristo as nan chiyuycha munserserfi kan Apo Dios nan maepangkep as nan masapor kiayud ommat. Finaor Cristo nan anghelna ay mangepaila kan Juan ay usa ay munserserfi kan Cristo. <sup>2</sup> Insurat Juan nan am-in ay naepappaila kan hiya, at paneknekana ay tit-iwa nan kalen Apo Dios ya nan sursuru ay enpakaammon Jesu Cristo. <sup>3</sup> Nakiasat nan taku ay mangifasa as nan nauycha naepadtu, ya nakiasat nan chiyuycha chumngor ya omafurot as nan nauycha naisurat, tay kiayud nan matongparan chatona.

### ***Nan Insurat Juan As Nan Chiyuycha Pitu Ay Iglesia***

<sup>4</sup> Ha-un hi Juan. Nauy nan suratku kan chakayu ay pitu ay iglesia henan probinsiya ay Asia.

Sapay koma ta mawawacha kan chakayu nan grasya ya talna ay nurpu kan Dios Amá ya kan Jesu Cristo, ya nurpu as nan Espiritu Santo. Hi Apo Dios at nawawacha ad maliyam, mawawacha ad wani, ya mawawacha

in-inkiana. Nan Espiritu Santo ay wacha as nan sangwanan nan tronona at pitu nan kail-an nan pannakafialina.\* <sup>5</sup> Hi Jesu Cristo nan matalek ay mangepaneknek as nan am-in ay tit-iwa. Hiya us nan enmona ay nataku in-inkiana manipud as nan utúy as nan am-in ay nunkatuy, ya hiya nan mangetoray as nan am-in ay ar-ari asna's luta.

Laylachuna chitaku, ya wenayawayaana chitaku as nan fiasfiasor takú babaen as nan charana ay enmayas as nan natuyana. <sup>6</sup> Entapina chitaku henan muntorayana ta maketoray takú kan hiya, ya nunfialinuna us chitaku as papachi ta munserfi takú kan Apo Dios ay Amana. Sapay koma ta hi Jesu Cristo nan maichaychayaw ya muntortoray in-inkiana. Amen.

<sup>7</sup> Il-ilaunyu! Omalintu hi Jesu Cristo ay maetatapi as nan lifuu! Ilauntu nan am-in ay tataku hiya uray nan chiyuchya nangchuyok kan hiya. Mun-ag-akorchantu nan am-in ay tataku asna's luta kiapú kan hiya as nan manusaana kan chicha. O, ommat sa. Amen.

<sup>8</sup> Hi Apo Dios ay Mannakafialin as nan am-in ay mawawacha ad wani, nawawacha ad maliyam, ya mawawacha in-inkiana at kanana, “*Ha-un nan makali un Alpha ya Omega.*”†

### *Nan Enpailan Jesu Cristo Kan Juan*

<sup>9</sup> Ha-un hi Juan ay ifiayu ay omaafurot. Ha-un us at pachongyu ay cha mangeta-ta-un as nan chak ilíwliwas ya pachongyu ay maketoraytu kan Jesus kiapú as nan nakius-usaan takú kan hiya. Nan enommat kan ha-un ad kasin at nakeddenganak ay maiyuy henan luta ay liniliwus chi fiayfiay ay makali un Patmos kiapú as nan nangekaskasabaak as nan kalen Apo Dios ya as nan kenatit-iwa ay enpakaammon Jesus. <sup>10</sup> As nan Chumingku ay urkiw nan Apo, pinmigsa nan pannakafialin nan Espiritu Santo kan ha-un, ya chinngorku as uchugku nan napigsa ay kali ay kaman kiangos chi tarampet.‡ <sup>11</sup> Kenalina kan ha-un, “*Isuratmu as nan liblu nan ilaum. Angkiay epaw-etmu as nan pitu ay iglesia henan tukutukún ay siyudad ay Efeso, Esmirna, Pergamo, Tiatira, Sardis, Filadelfia ya Laodicea.*”

<sup>12</sup> Kunku pay chinngor sa ay kali, nunsakongak ay nangila mu ngachana nan cha munkali kan ha-un. Nan inilak at pitu ay maepatpatngan chi silaw ay naamma as fialetok. <sup>13</sup> As nan nunkiakiaw-ancha, wacha nan kaman taku nan ilana ay nunfiafiachu as somakiayad. Wacha us as tagrangna nan nae-popotepot ay naamma as fialetok. <sup>14</sup> Nan fookna at pukpukkawan ay kaman kapas winnu munpupukaw ay lifuu. Nan matana at kaman kumarkiarud ay apuy. <sup>15</sup> Nan sukina at mun-aliling ay maepachong as nan kianfiang ay nailutu as nan apuy ya napasing. Nan kalina át maepachong as nan wawak chi ongor ay chanum. <sup>16</sup> As nan kannawan ay limana, at inuunnana nan pitu ay taraw, ya finmofoknag as tapakna nan tadtachumman ay espada ay nunoomam chi saetna. Nan lupana at sumilsili ay maepachong as nan urkiw as nan nunkiawa.

<sup>17</sup> As nan nangil-ak kan hiya, natu-ukiak as nan sangwanana ay kamanak natuyut. Ngem enpatayna kan ha-un nan kannawan ay limana ya kanana,

“*Achika umugyat! Ha-un nan makali un Omona ya ha-un nan Anongos.*

<sup>18</sup> *Ha-un challu nan matataku! Uray natuyak ad kasin, ilaum at matatakuwak*

\* <sup>1:4</sup> Isa. 11:1-5. Maipidwapida nan numero ay pitu. Nan laychun ay kanan nan pitu as na at ustuuustu, kumpilitu, winnu maid kurangna. † <sup>1:8</sup> Pal. 21:5-8. “Alfa” nan omona ay letra as nan alfabeton nan Griego. “Omega” nan anongos ay letra. ‡ <sup>1:10</sup> 4:2; 17:3; 21:10

*ad wani ya in-inkiana. Wacha kan ha-un nan pannakafialin ya kalibfengan ay mangetoray as nan utýu ya ad Hades ay lukiar ay kawad-an nan nunkatuy.* <sup>19</sup> *Isuratmu nan am-in ay epailak kan he-a ay cha om-ommat ad wani ya nan ommattu as kasin.* <sup>20</sup> *Nauycha nan laychun ay kanan nan chaan naepakaammu ad kasin ay pitu ay taraw ay inilam as nan kannawan ay limak ya nan pitu ay maepatpatngan chi silaw ay naamma as fialetok. Nan pitu ay taraw at chicha nan pitu ay anghelos ay mangay-aywan as nan pitu ay iglesia. Nan pitu us ay maepatpatngan chi silaw at chicha nan pitu ay iglesia.”*

## 2

### *Nan Maepakaammu As Nan Iglesia Ad Efeso*

<sup>1</sup> Inturuyna pay, “*Nan isuratmu as nan anghel ay mangay-aywan as nan iglesia ad Efeso at hiyana:*

“ ‘Nauy nan maepakaammu ay nurpu as nan nanangchun as nan pitu ay taraw as nan kannawan ay limanaya cha manarcharan as nan nunkiakiaw-an nan pitu ay maepatpatngan chi silaw ay naamma as fialetok: <sup>2</sup> *Ammok challu nan panagfiyagu, nan kenakakudyu ay munchunu ya nan kenapasnekyu ay mun-eta-un. Ammok us ay achiyu maanosan nan tataku ay manangotetet chi ukialicha. Chinistingyu us nan chiyucha mangarkali un apostolescha, ya naammuwanyu ay nunkangutumcha.* <sup>3</sup> *Ammok ay enpapasnekyu ay naangeta-un as nan naparparlikiatananyu kiapú kan ha-un, ya chaan kayu challu nunkuykuyat ay enmafurot kan ha-un.*

<sup>4</sup> “ ‘Ngem nauy nan epafiasorku kan chakayu: *Nan manglaylaychananyu kan ha-un ad wani at achi poros kaman as nan emmon-onu ay nanglaylaychananyu kan ha-un.* <sup>5</sup> *Nunumnumunyu ngarud nan emmon-onu ay emmafurotanyu ay napigsa nan manglaylaychananyu kan ha-un ta hiyasa nan atunyu ay omafurot ad wani. Ayu munfiafiawi kayu ya kasinyu atun nan sikud ay en-enatyu. Tay mu achi kayu munfiafiawi, omaliyaktu kan chakayu ya kaanok nan maepatpatngan chi silawyu as nan kawad-ana.* <sup>6</sup> *Ngem uray mu hiyasa, nauy nan chayawok kan chakayu: *Iinglunyu nan cha at-atun nan chiyucha Nicolaita\** ay iinglok us.†*

<sup>7</sup> “ ‘Nan wachay ingana ay chumngor at masapor chumngor as nan kanan nan Espiritu Santo as nan chiyucha iglesia. Nan tataku ay mangamis as nan mangotettet at ichatku kan chicha nan kalibfengan ay mangan as nan fukias nan kaiw ay umichat as fiyag ay tinmutufu ad Paraiso ay kawad-an Apo Dios.’”‡

### *Nan Maepakaammu As Nan Iglesia Ad Esmirna*

<sup>8</sup> “*Nan isuratmu as nan anghel ay mangay-aywan as nan iglesia ad Esmirna at hiyana:*

“ ‘Nauy nan maepakaammu ay nurpu as nan makali un nan Omona ya nan Anongos. Hiya ay natuy, ya nataku manipud as nan utýu: <sup>9</sup> *Ammok challu nan chiyucha iliwlwasyu, ya nan kenapugliyu, ngem nan kenatit-iwana at nunkafiaknang kayu. Ammok us ay enkak-aliyan chakayu as nan chiyucha mangarkali un Judiocha, uray fiakun chicha nan tit-iwa ay tatakon Apo Dios. Kenomsawcha, tay kun at chicha nan pasorot Satanas!* <sup>10</sup> *Achi kayu umugyat*

\* <sup>2:6</sup> Nan chiyucha Nicolaita nan nangisursuru as kinukutum. Infiakiacha ay mafialin ay munlamongun nan taku nan pammatina kan Cristo ya nan laychun chi anchor. † <sup>2:6</sup> Num. 22-23

‡ <sup>2:7</sup> Gen. 2:8-9; Ezek. 28:13; 31:8; Luc. 23:43; 2 Co. 12:3

as nan kiayud omali ay iliwasyu. Awni at epaifiarud Satanas nan tapina kan chakayu ta machisting nan pammatiyu. Mapaliwasan kayuntu as hinpuru ay urkiw. Ngem epapasnekyu ay omafurot kan ha-un uray mu ekatuyyu. Mu hiyasa nan atunyu, ichatkuntu nan korona kan chakayu ay hiyasa nan fiyag ay maid patingkiana.

<sup>11</sup> “Nan wachay ingana ay chumngor at masapor chumngor as nan kanan nan Espiritu Santo as nan chiyuchya iglesia. Nan tataku ay mangamis as nan mangotettet at achichantu maetapi ay machusa in-inkiana ay hiyasa nan makali un anongos ay utúy.”

#### Nan Maepakaammu As Nan Iglesia Ad Pergamo

<sup>12</sup> “Nan isuratmu as nan anghel ay mangay-aywan as nan iglesia ad Pergamo at hiyana:

“Nauy nan maepakaammu ay nurpu as nan wachay tadtachumman ay espadana ay nun-oomam chi saetna: <sup>13</sup> Ammok challu nan umiiliyanyu ay muntortorayan Satanas. Ngem uray mu hiyasa, enpapasnekyu challu ay enmafurot kan ha-un. O, chaanyu chinukchukkian nan pammatiyu kan ha-un uray as nan timpu ay namatuyancha kan Antipas ay usa ay matalek ay nangekaskasaba as nan maepangkep kan ha-un hesa ay muntortorayan Satanas.

<sup>14</sup> “Ngem nauy nan akét ay epafiasorku kan chakayu. Wachacha nan naetatapi kan chakayu ay cha mangun-unud as nan mangotettet ay insursuron chin Balaam ad pus-uy. Insuruwan Balaam hi Balak as atuna ta sulisukiana nan chiyuchya kianak Israel ay fumasor babaen as nan makekkekanancha as nan naichaton as nan didiosen ya mangepappapasancha as assi ay lachokcha. <sup>15</sup> Kaman us kan chakayu ay wachacha nan tapina ay mangun-unud as nan isursuron nan chiyuchya Nicolaita. <sup>16</sup> Munfiafiawi kayu! Tay mu achi kayu, achi mafayag at umuyak hesa, at osarok nan espada ay fomokfoknag as tapakku ay mangufiat kan chicha.

<sup>17</sup> “Nan wachay ingana ay chumngor at masapor chumngor as nan kanan nan Espiritu Santo as nan chiyuchya iglesia. Nan tataku ay mangamis as nan mangotettet at ichatkuntu kan chicha nan tapen nan naililingub ay makan ay nurpu ad chaya ay makali un mana. § Ichatkuntu us as nan tunggal usa kan chicha nan munpupukaw ay fiatu ay maisuratan nan fieru ay ngachan ay maid mangammu mu achi yangkiay nan taku ay maichatana.” \*

#### Nan Maepakaammu As Nan Iglesia Ad Tiatira

<sup>18</sup> “Nan isuratmu as nan anghel ay mangay-aywan as nan iglesia ad Tiatira at hiyana:

“Nauy nan maepakaammu ay nurpu as nan Anak Apo Dios ay nan matana at kaman kumarkiarud ay apuy, ya nan sukina at kaman napasing ay kianfang: <sup>19</sup> Ammok nan panagfiyagyu. Ammok nan munleennayachanyu ya nan panagtalekyu kan ha-un. Ammok nan munserserfiyanyu as nan iib-ayu ya nan nun-eta-ta-unanyu as nan naparpalikiatanyu. Ammok us ay kaskasin ammay nan chayu at-atun ad wani mu as nan enmon-oná ay enmafurotanyu.

<sup>20</sup> “Ngem nauy nan epafiasorku kan chakayu: Chayu parparufusun ay maetapi kan chakayu nan hana fiafiai ay hi Jezebel† ay mangarkali un pomapadton Apo Dios hiya. Babaen as nan chana isursuru, chana al-allilawun

nan chiyuycha munserserfi kan ha-un ta epappapaschay assi ay lachokcha ya mangmangancha as makan ay naichaton as nan didiosen. <sup>21</sup> Inchatku kan hiya nan chansana ay munfiafiawi as nan fiasfiasorna, ngem kuna at cha iturturyay mangepapas as assi ay lachokna. <sup>22</sup> Isunga epaleknaktu kan hiya nan pararu ay saket ta achi makafiangun. Paliwasaktu us as solet nan chiyuycha inmiwet kan hiya mu achicha ifiafiawi nan naetaptapiyancha kan hiya. <sup>23</sup> Patayoktu challu nan chiyuycha cha mangun-unud kan hiya ay maiflang as an-akna. Hiyachi nan mangammuwantu nan am-in ay iglesia ay ha-un challu nan nangammu as nan numnum ya nan tit-iwa ay laychun chi tataku. Gun-gunaaktu us nan tunggal usa kan chakayu ay maiyunud as nan en-enatyu.

<sup>24</sup> “Ngem nan tapina kan chakayu hesa ad Tiatira at chaanyu inunud nan hana mangotettet ay sursuruna, ya chaanyu sinuru nan kanancha un naunig ay maisursuru ay nurpu kan Satanas. O, ifiaakiak kan chakayu ayachek tapiyan nan chayu un-unuchun ay filfilin. <sup>‡</sup> <sup>25</sup> Nan ifiaakiak yangkiay kan chakayu at iturturuyyu ay omafurrot as nan kenatit-iwa inkiana as nan omaliyak. <sup>26</sup> Nan tataku ay mangamis as nan mangotettet ya iturturuycha ay mangekaman as nan laychok inkiana as katuyancha at ichatkuntu kan chicha nan kalibfengan ay muntoray henan am-in ay nasyon <sup>27</sup> ay pachong nan kalibfengan ay inchat Amak kan ha-un. Maid poros makaamis kan chicha, tay muntoraycha ay maid sug-angcha ay kamancha epak-or nan lanchok ay mangkimok as oknet ay fianga. <sup>§</sup> <sup>28</sup> Ichatkuntu us kan chicha nan napigsa ay taraw ay maila as nan wi-ewi-et.”\*

<sup>29</sup> “Nan wachay ingana ay chumngor at masapor chumngor as nan kanan nan Espiritu Santo as nan chiyuycha iglesia.” ”

### 3

#### Nan Maepakaammu As Nan Iglesia Ad Sardis

<sup>1</sup> “Nan isuratmu as nan anghel ay mangay-aywan as nan iglesia ad Sardis at hiyana:

“Nauy nan maepakaammu ay nurpu as nan wachay kalibfengana ay mangetoray as nan pitu ay kail-an nan pannakafialin nan Espiriton Apo Dios ya as nan mamangchun as nan pitu ay taraw: Ammok challu nan panagfiaygu. Ammok us ay as nan mangilan nan tataku, wacha nan naespirituwan ay fiaygu. Ngem nan kenatit-iwana at natuy kayu as nan mangilan Apo Dios. <sup>2</sup> Ayu! Fumangun kayu! Papigsaunyu nan nakapuy ay pammatiyu ay nayagyag ay kiayud at mamaid. Tay as nan sangwanan Apo Dios at mailak ay kurang as solet nan panagserserfiyu. <sup>3</sup> Isunga numnumunyu nan naisuru kan chakayu ya nan chinngoryu as nan emmon-on. Tongparunyu chachi, ya munfiafiawi kayu us as nan fiasfiasoryu. Mu achi kayu fumangun, omaliyaktu ay manusa kan chakayu as nan uras ay achiyu ammu. Tay nan omaliyak at kaman as nan atun nan mangaakiw.”\*

<sup>4</sup> “Ngem wachacha challu nan akét kan chakayu ay omafurrot hesa ad Sardis ay chaan nangmansa as nan fiachucha. As tapen chi urkiw at mafiahwanchantu as munpupukaw ay makekadkadwa kan ha-un, tay

---

<sup>‡</sup> **2:24** Ara. 15:28    <sup>§</sup> **2:27** Sal. 2:9; Pal. 19:15    \* **2:28** Mat. 2:2; Pal. 22:16    \* **3:3** Mat. 24:42-51;  
1 Tes. 5:2; 2 Ped. 3:10; Pal. 16:15

maekaricha.<sup>†</sup> <sup>5</sup> Nan tataku ay mangamis as nan mangotettet at mafiachuwan-chantu as munpupukaw ay kaman kan chicha. Achektu poros kaanun nan ngachancha ay naisurat as nan liblu ay naelestaan nan chiyucha wachay fiyagcha ay maid patingkiana. Ngem ipudnoktu ay chicha nan tit-iwa ay tatakok as nan sangwanan Amak ya as nan anghelesna.

<sup>6</sup> “Nan wachay ingana ay chumngor at masapor chumngor as nan ifiakian nan Espiritu Santo as nan chiyucha iglesia.”

### Nan Maepakaammu As Nan Iglesia Ad Filadelfia

<sup>7</sup> “Nan isuratmu as nan anghel ay mangay-aywan as nan iglesia ad Filadelfia at hiyana:

“Nauy nan maepakaammu ay nurpu as nan nasantowan ya matalek, ya as nan kawad-an nan torfek nan muntorayan Ari David ay nan tokafiana at maid makain-ub, ya nan in-ubna at maid makatokab: <sup>8</sup> Ammok nan panagfyaygu. Ammok ay uray akéti nan kafaelanyu, enafurotyu challu nan insursurok, ya chaaryu ensassaot nan pammatiyu kan ha-un. Isunga wacha nan kaman pantiu ay tenkafiat para kan chakayu ay maid poros makain-ub.

<sup>9</sup> “Chungrunu ay ustu nan nauy! Kun pay nan maepangkep as nan chiyucha pasorot Satanas ay chicha nan mangarkali un Judiocha urayfiakun chicha nan tit-iwa ay tatakon Apo Dios, nunkangutumcha. Awni at peletok chicha ay uy munpalintumang as nan sangwananyu. Hiyasa nan mangamuwanchantu ay tit-iwa ay laylaychok chakayu. <sup>10</sup> Kiapú ta tenongparyu nan filinku ay mun-eta-un kayu as nan maparpalikiatananyu, esarakaktu chakayu as nan timpon nan kauugyat ay likiat ay omalintu ay manisting as nan am-in ay tataku henan intiru ay luta. <sup>11</sup> Kiayuchak omali! Epapasnekyu ay mangunud as nan tit-iwa ay sursuru ta maid mamros as nan gun-gunaunyu. <sup>12</sup> Nan tataku ay mangamis as nan mangotettet at munfialinok chicha as kaman as nan chiyucha tukud nan templon nan ok Apo Dios. Nan laychuna ay kanan at makepagyanchantu kan Apo Dios in-inkiana. Isuratkuntu kan chicha nan ngachan nan ok Apo Dios ya nan ngachan nan fierú ay Jerusalem ay komsoy ay murpu as nan Apo ay ok Apo ad chaya. Emarkaktu us kan chicha nan fierú ay ngachanku.<sup>‡</sup>

<sup>13</sup> “Nan wachay ingana ay chumngor at masapor chumngor as nan kanan nan Espiritu Santo as nan chiyucha iglesia.”

### Nan Maepakaammu As Nan Iglesia Ad Laodicea

<sup>14</sup> “Nan isuratmu as nan anghel ay mangay-aywan as nan iglesia ad Laodicea at hiyana:

“Nauy nan maepakaammu ay nurpu as nan makali un Amen<sup>§</sup>ay matalek ya napudnu ay mangepaneknek as nan tit-iwa maepangkep kan Apo Dios, ya kurpuwan nan am-in ay finayang Apo Dios: <sup>15</sup> Ammok nan panagfyaygu. Maepachong kayu as nan at-atong ay chanum ay achi tungnin winnu omatong. Nan laraychok paat at piliyunu nan usa as nan hanacha chuwa. <sup>16</sup> Ngem kipapú ta kun kayu at-atong as nan pammatiyu, achiyoktu chakayu ay kamanku itubfa chakayu.

---

<sup>†</sup> 3:4 Pal. 3:5;18; 4:4; 6:11; 7:9-13; 19:8, 14    <sup>‡</sup> 3:12 Isa. 62:2; Pal. 2:17; 14:1; 22:4    <sup>§</sup> 3:14 Nan kali ay “Amen” at kalen chi Hebreo ay nan laychuna ay kanan at Ommat challu.

<sup>17</sup> “Kananyu un fiaknang kayu ay wacha at am-in chi kasaporanyu. Ngem achiyu ammu ay nan kenatit-iwana at kasusug-ang kayu. Tay as nan sangwanan Apo Dios, maifilang kayu as pugli, nafuraga ya forfollachan. <sup>18</sup> Tukunok ngarud chakayu ay lomaku kayu kan ha-un as fialetok ay nailutu as nan apuy ta tit-iwa ay fumaknang kayu. Ha-un us koma nan lomakwanyu as munpupukaw ay lopot as ifiachuyu ta achi kayu at mafiabfainan kiapú ta forfollachan kayu. Lomaku kayu us kan ha-un as akias ay ekapuyu as nan matayu ta makaila kayu kasin. <sup>19</sup> Am-in ay laylaychok at sengarak ya disiplinaok. Isunga komakud kayu ay omafurot ya munfiafiawi kayu as nan fiasfiasoryu. <sup>20</sup> Chumngor kayu! Mangatackchukiak as nan pantiw ay cha munkokkokkok. Mu wachay manngor as nan kalek ya tokafiana nan pantiw, sungkopaktu ya mun-ufong kami ay chuwa. <sup>21</sup> Nan tataku ay mangamis as nan mangotetett at ichatkuntu kan chicha nan kalibfengan ay maketokor kan ha-un ay muntoray ay kaman as nan naketokorak kan Amak ay muntoray as nan nangamisak kan Satanas.

<sup>22</sup> “Nan wachay ingana ay chumngor at masapor chumngor as nan kanan nan Espiritu Santo as nan chiyuchya iglesia.”

## 4

### Nan Panagchaychayaw Ad Chaya

<sup>1</sup> Kun pay narpas na, inilak nan nanatkafian ay pantiw ad chaya. Kasinku chinngor nan hana ay kali ay kaman kiangos chi tarampet ay kanana, “Omabratka hena, at epailak kan he-a nan ommat as kasin.” <sup>2</sup> Hiya at chi ya pinmigsa nan pannakafialin nan Espiritu Santo kan ha-un,\* ya inilak ad chaya nan usa ay trono ay wacha nan nangatokor. <sup>3</sup> Nan ilan nan nangatokor at kaman as nan chiyuchya munliyaw ay fiatu ay makali un haspe† ya karnelia.‡ Nan tronona at liniliwus nan tilag ay kaman fiatu ay esmeralda§ nan ilana.\* <sup>4</sup> Nan trono at liniliwus nan chuwan puru ya opat ay trono ay nangatokoran nan chuwan puru ya opat ay anam-amá. Nafiafiachuwancha as munpupukaw ya nakokoronaancha as fialetok. <sup>5</sup> As nan munkiakiawa ay trono, cha murmurpu nan fiakilat, nunkapigsa ay kali ya komanikong ay kud-or. As nan sangwanan nan trono, wachacha nan pitu ay napapaskuchan ay penakad ay cha kumilkilarok. Chicha nan pitu ay kail-an nan pannakafialin nan Espiriton Apo Dios. <sup>6</sup> As nan sangwanan nan trono, wacha us nan kaman fiayfiay† ay naamma as sarming ay munmallag ay kaman kristal.

As nan kiawan nan opat ay trono, wachacha nan opat ay matataku ay finayang Apo Dios.‡ Waschi un namataan nan intiru ay achorcha as sangu ya kaman us as uchug.§ <sup>7</sup> Nan omona ay matataku ay nafiayang at kaman layon nan ilana. Nan maekadwa at kaman urfun ay fiaka. Nan maekatlu at wachay lupana ay kaman as nan lupon chi taku, ya nan maekap-at at kaman as nan muntat-ayaw ay nawi. <sup>8</sup> Napapayakan nan tunggal matataku ay nafiayang as hin-un-um ya namataan nan intiru ay achorcha patí nan

---

\* **4:2** Pal. 1:10; 17:3; 21:10      † **4:3** Nan haspe at nafiaror ya tukutukún chi kialetna.      ‡ **4:3** Nan karnelia at nafiaror ya munchachara nan na.      § **4:3** Nan esmeralda at nafiaror ya berde nan kialetna.      \* **4:3** Gen. 9:11-16      † **4:6** Pal. 15:2; 21:1      ‡ **4:6** Ezek. 1:4-28; Isa. 6:2      § **4:6** Pal. 5:6; 6:1-7; 7:11; 14:3; 15:7; 19:4

payakcha. Achicha ikinkinak ay cha munkantakanta as inurkiw ya lenafi ay mangarkali,

"Nasantowan, nasantowan, nasantowan hi Apo Dios ay Mannakafialin as nan am-in.\* Nawawacha hiya ad maliyam, mawawacha ad wani, ya mawawacha in-inkiana."†

<sup>9</sup> Nan nauycha opat ay nafiyang at munchayawcha, figfikuncha ya mun-yamancha as nan nangatokor as nan trono ay matataku in-inkiana. As nan mangekamanancha as sa, <sup>10</sup> nunlukfub nan chiyucha chuwan puru ya opat ay anam-amá as nan sangwanan nan nangatokor as nan trono ay munchayaw kan hiya ay matataku in-inkiana. Esaadcha us nan koronacha as nan sangwanan nan trono, ya ekankantacha,

<sup>11</sup> "He-a ay Apo ya Diosmi at maekarika ay omawat as kaichayawan, chayaw, ya pannakafialin, tay he-a nan namayang as nan am-in ay ka-ichin. Kiapú as nan pangkepmu, nafiyangcha ya naichat kan chicha nan fiyag."‡

## 5

### *Nan Nalolopelop Ay Papel Ya Nan Kordero*

<sup>1</sup> Kun pay narpas chi, inilak as nan kannawan ay liman nan nangatokor as nan trono nan nalolopelop ay papel ay nasuratan nan nunsinumfiangel ya naeepkat nan pitu ay silyu\* ta achi mafitlag.† <sup>2</sup> Inilak us nan usa ay mannakafialin ay anghel ay nunkali as napigsa, "Ngachana nan maekari ay mangloksa as nan nunkaepkat ay silyu ta mafitlag nan nalolopelop ay papel?" <sup>3</sup> Ngem maid poros maekari ad chaya winnu asna's luta winnu ad chur-um ay kawad-an chi nunkatuy ay mamitlag as nan nalolopelop ay papel ta fiasauna. <sup>4</sup> Nun-akorak as solet, tay maid poros naanapan as maekari ay mamitlag as nan nalolopelop ay papel ta fiasauna. <sup>5</sup> Angkiay ya usa as nan chiyucha anam-amá nan nangali kan ha-un, "Achika man kayong mun-akor! Ilaum kay ya! Wacha nan usa ay makali un Layon ay nurpu as nan tribon Juda ay mafigfigfig ay kianak David. Enamisna nan mangotettet, ya naichat kan hiya nan kalibfengan ay mangloksa as nan pitu ay silyu ya mamitlag as nan nalolopelop ay papel."‡

<sup>6</sup> Inilak nan usa ay Kordero ay nangatakchug as nan sangwanan nan trono ay liniwus nan opat ay nafiyang ya nan chiyucha anam-amá. Nan ilan nan Kordero at kaman napatuy. Pitu nan sakkudna ya pitu us nan matana. Nan laychun ay kanan nan pitu ay sakkuad at chicha nan pitu ay kail-an nan pannakafialin nan Espiriton Apo Dios ay naifiaor henan am-in ay lukiar asna's luta. § <sup>7</sup> Naesnop nan Kordero as nan kawad-an nan trono, at enarana nan nalolopelop ay papel as nan kannawan ay liman nan nangatokor. <sup>8</sup> As nan nangor-ana, nan chiyucha opat ay nafiyang ya nan chuwan puru ya opat ay anam-amá at nunlukfubcha as nan sangwanan nan Kordero. Tunggal usa as nan chiyucha anam-amá at inuunnanay makutkuttingting ay makali un arpa ya nan fialetok ay mallokong ay nanopnu as insenso ay

---

\* <sup>4:8</sup> Isa. 6:3   † <sup>4:8</sup> Pal. 1:4, 8; 11:17; 16:5   ‡ <sup>4:11</sup> Ara. 14:15; Pal. 5:9,12   \* <sup>5:1</sup> Nan silyu at kaman lilin chi iyukan ay mangep-epkat as nan nalolopelop ay papel ta achi mafitlag.   † <sup>5:1</sup> Ezek. 2:9-10   ‡ <sup>5:5</sup> Gen. 49:9   § <sup>5:6</sup> Isa. 53:7; Jn. 1:29; Ara. 8:32; 1 Ped. 1:19

hiyasa nan kararag nan tatakon Apo Dios.\* <sup>9</sup> Kenantacha nan nauy usa ay fiarú ay kanta:

“He-a nan maekari ay mangara as nan nalolopelop ay papel, ya mangloksa as nan chiyuycha silyuna, tay napatuyka. Kiapú as nan charam, nafiyachan nan tataku ta wachacha nan munfialin as tatakon Apo Dios ay murpu henan tunggal nasyon ya tribu ya murpu as nan tataku ay tukutukún chi kali ya kubletcha.

<sup>10</sup> Entapem chicha as nan muntorayam ta maketoraycha kan he-a asna's luta, ya nunfialinum us chicha as papachi ta munserficha kan Apo Dios takú.”

<sup>11</sup> Kasinku inila, ya chinngorku nan kalen nan minilmilyon ay angheles ay nangliliwus as nan trono ya nan opat ay nafiyang ya nan chiyuycha anam-amá. <sup>12</sup> Inpipigsacha ay nangekankanta's na:

“Nan Kordero ay napatuy at maekari ay omawat as pannakafialin, kenafiakk-nang, kenasilib, kenapigsa, kaichayawan, chayaw ya bendisyon.”

<sup>13</sup> Angkiay ya chinngorku nan kalen nan tunggal usa ay nafiyang ad chaya, asna's luta, ad chur-um ay kawad-an chi nunkatuy ya henan fiayfiay. Am-in chaná at chacha ekankanta, “Sapay koma ta nan nangatokor as nan trono ya nan Kordero at maichat kan chicha nan bendisyon, chayaw, kaichayawan ya kalibfengan inkiana.”

<sup>14</sup> Tinumfor nan opat ay nafiyang, “Amen!” Nan chiyuycha anam-amá at nunlukfubcha kasin ay nanaychayaw as nan nangatokor as nan trono ya as nan Kordero.

## 6

### *Nan Naloksaan Nan Unum Ay Silyu*

<sup>1</sup> Kunak pay cha munfuyfuya, lenoksan nan Kordero nan omona as nan chiyuycha pitu ay silyu, at chinngorku nan kaman kud-or ay kalen nan usa as nan chiyuycha nafiyang ay kanana, “Aka!” <sup>2</sup> As nan hiyachi, inilak nan munpupukaw ay kafiyu. Nan nunsasakay at wachay inuunnana ay pana ay ikufiatna. Naichat kan hiya nan korona ay sinyar chi mangafiakana, at uy nakikubkufiat ta amisuna nan am-in ay kafusorna.

### *Nan Maekadwa Ay Silyu*

<sup>3</sup> Kun pay lenoksan nan Kordero nan maekadwa ay silyu, chinngorku nan kalen nan maekadwa ay nafiyang ay kanana, “Aka!” <sup>4</sup> Hiya at chi ya fenmoknag nan usa pay ay kafiyu ay munchachara. Nan nunsasakay at naettan as kalibfengan ay mangaan as talna asna's luta ta munkikinnufiat ya munpepennatuy nan tataku. Naichat us kan hiya nan anchuanchu ay espada.

### *Nan Maekatlu Ay Silyu*

<sup>5</sup> Kun pay lenoksan nan Kordero nan maekatlu ay silyu, chinngorku nan kalen nan maekatlu ay nafiyang ay kanana, “Aka!” As nan hiyachi, wacha nan munnungutug ay kafiyu. Nan nunsasakay at inuunnanay kiluwan.

<sup>6</sup> Angkiay ya chinngorku nan kaman kali ay cha murmurpu as nan kiawan nan chiyuycha opat ay nafiyang ay kanana, “Awni at wachantuy fitel asna's luta. Nan lagfuntu nan tataku as hin-urkiw at ommat yangkiay as elakuna as fukias winnu tuki ay kanuna as nan hiyasa ay urkiw. Ngem achim

---

\* <sup>5:8</sup> Sal. 141:2; Pal. 8:3-5

panginaun nan mantikan chi olivo ya nan fiayas ay nurpu as nan unus chi ubas."

### *Nan Maekap-at Ay Silyu*

<sup>7</sup> Kun pay lenoksan nan Kordero nan maekap-at ay silyu, chinngorku nan kalen nan maekap-at ay nafiyang ay kanana, "Aka!" <sup>8</sup> Kunku pay inila, wacha at nan kaman kumukusyaw ay kafiayu. Nan ngachan nan nunsasakay at Utúy, ya nan kadwana ay cha umun-unud at nangadnan as Hades ay kawad-an chi nunkatuy. Naichat kan hiya nan kalibfengan ay pomatuy as nan pagkap-at nan am-in ay tataku asna's luta babaen as nan kufiat, fitel, kauugyat ay pomatuy, ya atap ay animar.\*

### *Nan Maekalema Ay Silyu*

<sup>9</sup> Kun pay lenoksan nan Kordero nan maekalema ay silyu, inilak as nan selok nan altar nan chiyuycha lenawan nan chiyuycha naepapatuy kiapú as nan nangekaskasabaancha as nan kalen Apo Dios ya as nan nangepanecknekancha as nan maepangkep kan Apo Dios. <sup>10</sup> Infukiawcha, "Mannakafalin ay Apo Dios ay nasantowan ya matalek, kaatna man nan omaliyam ay mang-ókóm as nan am-in ay tataku asna's luta ya manges-angam as nan namatuyancha kan chakami?" <sup>11</sup> Angkiay ya naichat as nan tunggal usa nan munpupukaw ay fiachu, ya naifiakia kan chicha ay muniblaycha as hen-omaketan pay. O, mun-iblaycha inkiana makumpilitu nan filang nan pachongcha ay munserserfi kan Apo Dios ay iib-acha as nan pammati ay maepapatuytu us ay kaman as nan naepapatuyancha.

### *Nan Maekan-um Ay Silyu*

<sup>12</sup> Kunak pay challu cha munfuyfuya, lenoksan nan Kordero nan maekan-um ay silyu. Wacha at nan napigsa as solet ay kichu. Nginmutug nan urkiw ay kaman as nan panis, ya chinmacharagchag nan furan ay kaman chara. <sup>13</sup> Nag-ascha asna's luta nan chiyuycha taraw ay kaman as nan nagasan nan chaan nor-om ay fukias chi kaiw ay igos as nan napuwakana. <sup>14</sup> As nan hiyachi us, namaid nan chaya ay kaman as nan atun chi papel ay malopelop. Naiyawud ya naiyatón nan am-in ay chuntug ya am-in ay luta ay liniliwus chi fiayfiay. <sup>15</sup> Angkiay ya nan ar-ari asna's luta, nan chiyuycha totoray, nan anap-apon chi sosorchachu, nan nunkafiaknang, nan chiyuycha mafifigfig, ya nan tapina ay tataku ay mafiafbiaoer winnu fiakun at tenagtagcha ay nuntafun am-in as nan chiyuycha liyang ya as nan penapaingan nan chiyuycha chalimmug henan chunchuntug. <sup>16</sup> Nunpasugangcha henan chiyuycha chuntug ya as nan chiyuycha fiatu, "Ayu man paat, magchay kayu kan chakami ya kumab-on kayu ta achi chakami ilau as nan nangatokor as nan trono, ya malisiyanmi nan kauugyat ay chumusaan nan Kordero. <sup>17</sup> Tay nan kauugyat ay urkiw ay manusaana kan chakami at inumchan at, ya ay wachay makaeta-un? Maid!"†

## 7

### *Nan 144,000 Ay Tatakon Apo Dios*

(Pal. 14:1-5)

<sup>1</sup> Kun pay narpas na, inilak nan opat ay angheles ay nangatakchug as nan opat ay sulen nan lufong. Tetenpapcha nan opat ay kurpuwan chi

\* <sup>6:8</sup> Ose. 13:14; 1 Co. 15:54-57; Pal. 20:13-14 † <sup>6:17</sup> Isa. 63:4-6; Joel 1:15-2:17; Sof. 1:14-18; Luc. 21:33-36

puwak ta achi poros mapuwak nan luta, fiayfiay ya uray nan chiyucha kaiw.<sup>2</sup> Chatona ay anghelles nan nangichatan Apo Dios as pannakafialin ay manachael henan luta ya nan fiayfiay. Angkiay inilak nan usa pay ay anghel ay cha ngomatu ay nurpu as nan fomokfoknakian nan urkiw ay nawad-an as nan markan\* nan matataku ay Apo Dios. Infukiawna as nan chiyucha opat ay anghelles ay kakadwana,<sup>3</sup> “Achiyu chachaelun nan luta winnu nan fiayfiay winnu nan chiyucha kaiw inkiana markaanmi nan ketong nan chiyucha munserserfi kan Apo Dios takú.”<sup>4</sup> As nan nangmarkaana kan chicha, naifiakia kan ha-un nan filang ay hinkiasot ya opat puru ya opat ay lifu. Chicha nan nurpu as nan kianak nan hinpuru ya chuwa ay an-ak Israel.<sup>5-8</sup> Hinpupuru ya chuwa ay lifu nan namarkaan as nan kianak nan potot Israel ay cha Juda, Ruben, Gad, Aser, Neftali, Manases, Simeon, Levi, Isacar, Zabulon, Jose, ya hi Benjamin.

### *Nan Achi Mafilang Ay Tataku Ay Nunfiafiachu As Munpupukaw*

<sup>9</sup> Kun pay narpas na, inilak nanongoongor ay tataku ay maid makafilang ay nurpu henan tunggal nasyon ya tribu ya nurpu as nan tataku ay tukutukún chi kubletcha ya kalicha. Nangatackchugcha as nan sangwanan nan trono ya nan Kordero. Nangafiafiacha as kummayad ay munpupukaw, ya waschi un inuunnanay tufon chi palma ay mangepaila as lagsakcha.<sup>10</sup> Infukiawcha, “Nan nangesarakan kan chitaku at nan Apo Dios takú ay nangatokor as nan trono ya nan Kordero!”<sup>11</sup> Nan am-in ay anghelles at liniliwscha nan trono, nan chiyucha anam-amá, ya nan opat ay nafiayang. Nunlukfubcha am-in ay nanaychayaw kan Apo Dios as nan sangwanan nan trono.<sup>12</sup> Kenalicha, “Ommat koma na! Sapay koma ta mawawacha inkiana kan Apo Dios ay munserserfiyan takú nan bendisyon, kaichayawan, kenasilib, panagyaman, chayaw, pannakafialin ya kenapigsa. Amen.”

<sup>13</sup> Angkiay ya nunsarudsud kan ha-un nan usa as nan chiyucha anam-amá. Kenalina, “Ay ammom mu ngachan chatona nan nunfiafiachu as munpupukaw ya mu anan nurpuwancha?”

<sup>14</sup> “Tuan. Ammom met, apo. Ifiakiam pay,” ensongfiatku. Kenalina, “Chatona nan nakalasat as nan kauugyat ay likiat. Lenab-ancha nan fiachucha, ya nunfialinuncha chasa as munpupukaw babaen as nan charan nan Kordero ay enmayas as nan natuyana.”<sup>15</sup> Hiyasa nan kiapúna ay wachacha as nan sangwanan nan tronon Apo Dios, ya chacha munserserfi kan hiya as inurkiw ya lenafi as nan templona. Mawawachantu kan chicha nan nangatokor as nan trono ya aywanana chicha.<sup>16</sup> Achicha poros kasin munchugchukiaang winnu masmasketan. Achicha poros maesapsap-uy winnu maparpalikiat as nan tapina ay omatong.<sup>17</sup> Tay nan Kordero ay wacha as nan kawad-an nan trono at hiyantu nan mangay-aywan kan chicha, ya epanganantu chicha as nan ugwor ay fomokfoknakian nan chanum ay umichat as fiyag. Achichantu kasin mun-ag-akor, tay punasantu Apo Dios nan am-in ay luwacha.”‡

## 8

### *Nan Naloksaan Nan Maekapitu Ay Silyu*

---

\* 7:2 Nan marka at hiyasa nan osarun Apo Dios ay mangematon as nan tatakuna. † 7:14 Heb.  
9:14 ‡ 7:17 Isa. 25:8; Pal. 21:4

<sup>1</sup> Kun pay lenoksan nan Kordero nan maekapitu ay silyu, kinmikinakcha am-in nan wacha ad chaya as nan kiayud kakudwan chi uras. <sup>2</sup> Angkiay ya inilak nan pitu ay anghelles ay nangatachug as nan sangwanan Apo Dios. Naettancha as pitu ay tarampet.

### *Nan Naittuwan Nan Insenso Ay Naamma As Fialetok*

<sup>3</sup> Fenmoknag nan usa pay ay anghel ay uy tenmakchug as nan kawad-an nan altar ay nananangchun as nan naittuwan nan insenso ay naamma as fialetok. Naettan hiya as ongor ay insenso ay etapina as nan kararag nan am-in ay tatakon Apo Dios, ya puorana ay mangichaton kan Apo Dios as nan altar ay naamma as fialetok ay wacha as nan sangwanan nan trono. <sup>4</sup> Nan asok nan cha mapuppuoran ay insenso ya nan kararag nan tatakon Apo Dios at ngenmatucha ay nurpu as nan mait-ittuwan nan insenso ay inuunnan nan anghel as nan sangwanan Apo Dios. <sup>5</sup> Angkiay ya enaran nan anghel nan mait-ittuwan nan insenso, ya pinnuna as finmafriara ay uling ay enarana as nan altar, at inchus-orna asna's luta. Hiya at chi ya wachay komanikong ay kud-or, ya cha munfiaklat ya munkichu.

### *Nan Chiyuycha Tarampet*

<sup>6</sup> Angkiay ya nan pitu ay anghelles ay nakchang as tarampet at nun-sakianacha ay mangepakiangos as nan tarampetcha.

<sup>7</sup> Nan omona ay anghel at penakiangosna nan tarampetna, at naepetlak asna's luta nan chiyuycha choraru ya apuy ay nakaslangan as chara. Isunga naetemok nan pagkatlon nan luta ya pagkatlon us nan kakkaiw ya am-in ay lukiam.

<sup>8</sup> Angkiay ya nan maekadwa ay anghel at penakiangosna nan tarampetna, at inilak nan kaman ad-acha-an ay chuntug ay cha kumarkiarud ay naetap-or henan fiayfiay. <sup>9</sup> Nunfialin as chara nan pagkatlon nan fiayfiay, ya natuycha nan pagkatlon nan chiyuycha matataku henan fiayfiay, ya nachachaelcha nan pagkatlon nan chiyuycha papor.

<sup>10</sup> Nan maekatlu ay anghel at penakiangosna us nan tarampetna, at wacha nan ad-acha-an ay taraw ay kaman penakad ay cha kumilkilarok ay nurpu ad chaya ay nag-as henan pagkatlon nan chiyuycha wawwang ya ugwor. <sup>11</sup> Nan ngachan nan nauy taraw at Mun-aklet. Enmaklet nan pagkatlon nan chanum, ya natuy nan ongor ay tataku ay inmikop as nan chiyuy chanum.

<sup>12</sup> Nan maekap-at ay anghel at penakiangosna nan tarampetna. Nachachael nan pagkatlon nan urkiw, nan pagkatlon nan furan ya pagkatlon nan chiyuycha taraw. Nan nunfianakiana at namaid nan pagkatlon nan silawcha. Isunga ngenmongot nan pagkatlon nan kaorkia ya pagkatlon nan lafi.

<sup>13</sup> Kunak pay cha munfuyfuya, chinngorku nan nawi ay cha muntat-ayaw as ngatu ay nangifukiaw, “Kasusug-ang! Kasusug-ang! Kasusug-ang kayman as solet nan ommattu as nan tataku asna's luta as nan mangepakiangosantu nan turu pay ay anghelles as nan tarampetcha.”\*

## 9

<sup>1</sup> Nan maekalema ay anghel at penakiangosna nan tarampetna, at inilak nan nanag-as asna's luta ay taraw ay nurpu ad chaya. Naichat as nan taraw ay anna nan torfek nan pantiw nan lukiar ay kaman fitu ay maid papugna.\* <sup>2</sup> Kuna pay tenkafian nan chiyuy fitu, naifud-ok nan asok ay

\* <sup>8:13</sup> Pal. 9:12; 11:14; 12:12    \* <sup>9:1</sup> Pal. 8:10-11

kaman as nan arotottot chi ad-acha-an ay puor. Liningfiana nan urkiw, ya penangongotna asna's luta. <sup>3</sup> Wachacha nan chuchun ay nakefoknag as nan asok, ya kenomsopcha asna's luta. Naettancha as kafaelan ay sumilud ay kaman as nan makali un scorpion.<sup>†</sup> <sup>4</sup> Naiflin kan chicha ay achicha teletelun nan uray ngachana ay lukiam, kaiw, winnu tapina ay mura, ngem kuncha yangkiay sukiatun nan tataku ay chaan namarkaan chi ketongcha as nan markan Apo Dios.<sup>‡</sup> <sup>5</sup> Chaancha naparufusan ay mangpatuy kan chicha, ngem kuncha yangkiay palikiatun chicha as lema ay furan. Nan kaputug nan chacha iliwlwas at kaman as nan siluchan nan makali un scorpion ay munnotnot as solet. <sup>6</sup> As nan hana lema ay furan at iyan-anap chi tatakuy katuyancha, ngem achi challu uchanan nan utúy chicha. O, uray mu laraychuncha ay matuy, ngem achi umchan nan utúy kan chicha.

<sup>7</sup> Nan ilan nan chiyuycha chuchun at kamancha kafiaiyu ay nakasakiana ay uy makikufiat. As nan urucha at wacha nan kaman korona ay naamma as fialetok, ya nan lupacha at kaman lupan chi taku. <sup>8</sup> Nan fookcha at ananchu ay kaman as nan fook chi fianafiai, ya nan fiab-acha at kaman as nan chiyuycha fiab-an chi layon. <sup>9</sup> Nan tagrangcha at nasasarakan as kaman lanchok. Nan kayabkab chí payakcha as nan tomayawancha at kaman as nan ungug chi ongoongor ay kalesa ay cha ikuykuyud chi kafiaiyu ay cha tomagtag ay uy makikufiat. <sup>10</sup> Nan iwetcha at kaman as nan iwet nan makali un scorpion ay sumilud, ya as nan iwetcha nan kawad-an nan kafaelancha ay mamalikiat as nan tataku as lema ay furan. <sup>11</sup> Wacha nan aricha ay mangetoray kan chicha ay hiya nan anghel ay mangay-aywan henan lukiar ay kaman fitu ay maid papugna. Nan ngachana as nan kalen chi Hebreo at Abaddon, ya as nan kalen chi Griego at Apolion. Nan laychuna ay kanan at Nan Chumachael.

<sup>12</sup> Narpas at nan omona ay kauugyat ay likiat, ngem wacha pay nan chuwa ay omali.

<sup>13</sup> Nan maekan-um ay anghel at penakiangosna nan tarampetna, at chinngorku nan usa ay kali ay nurpu as nan opat ay sulen nan altar ay naamma as fialetok ay wacha as nan sangwanan Apo Dios. <sup>14</sup> Kenalen nan kali ay ansa as nan maekan-um ay anghel ay nanangchun as tarampet, “Ilufusmu nan opat ay anghelos ay naifiafiarud as nan kawad-an nan ad-acha ay wawwang ay Eufrates.”<sup>§</sup>

<sup>15</sup> Tit-iwa ay nailufus nan opat ay anghelos, tay sikud ay naesasakianacha para as nan nauy ustuustu ay uras ya urkiw, furan ya tawwun ay uycha mangpatuyan as nan pagkatlon nan tataku. <sup>16</sup> Naifiakia kan ha-un ay nan filang nan chiyuycha nunkakafiaiyu ay sosorchachu at chuwani kiasot ay milyon. <sup>17</sup> Nan chiyuycha kafiaiyu ya nan chiyuycha nunsasakay ay inilak as nan kaman iitawku at assena: Nakchang nan chiyuycha nunsasakay as lanchok ay manasarak as tagrangcha ay nan kolorcha at turu. Nan usa ay kolorcha at munchachara ay kaman apuy. Wacha pay chi asul ay kaman naifiaror ay safiru, ya munitifla ay kaman asufre. Nan uron nan nauycha kafiaiyu at kaman uron chi layon, ya chacha ifudfud-ok chi apuy, asok ya asufre. <sup>18</sup> Natuy nan pagkatlon nan tataku asna's luta kiapú as nan nauycha turu ay kauugyat ay pomatuy ay apuy, asok ya asufre ay cha ifudfud-ok nan hanacha kafiaiyu. <sup>19</sup> Tay nan kawad-an nan kafaelan nan hanacha kafiaiyu

---

<sup>†</sup> 9:3 Ezek. 2:6; Pal. 9:5,10      <sup>‡</sup> 9:4 Ezek. 9:4-6; Pal. 7:2-3      <sup>§</sup> 9:14 Gen. 15:18; Deut. 1:7; Jos. 1:4; Pal. 16:12

ay pomatuy at as tapakcha ya iwetcha. Nan iwetcha at nauruwancha as kaman uron chi urug ay isukiatcha as tataku.

<sup>20</sup> Ngem nan tataku ay nayagyag ay chaan natuy as nan chiyuchya kau-ugyat ay pomatuy at chaancha challu chinukkian\* nan nanaychayawancha as nan chiyuchya anennet ya chiyuchya didiosen ay fialetok, silver, kianflang, fiatu ya kaiw ay chicha mismu nan nangamma. Chatona ay didiosen ay enam-ammaancha at achicha poros makakali, makadngor winnu makacharan. <sup>21</sup> Chaancha us infiafiawi nan penmatpatuyancha, nan nunsarsaromangkaancha, nan nangepappapasancha as assi ay lachok, winnu nan nangak-akiwancha.

## 10

### *Nan Anghel Ya Nan Ek-eket Ay Nalolopelop Ay Papel*

<sup>1</sup> As nan hiyachi, inilak nan usa pay ay mannakafialin ay anghel ay cha komsofay ad nurpu ad chaya. Nalilifotan as lifuu, ya wachay tilag as nan ngatoru nan uruna. Nan lupana at narawag ay kaman as nan urkiw, ya nan sukina at kaman kumilkil-aw ay apuy. <sup>2</sup> Inuunnanay ek-eket ay papel ay nafifitlag. Inkiakiatin nan kannawan ay sukina nan fiayfiay, ya nan kannikid ay sukina nan luta. <sup>3</sup> Nunfukiaw as napigsa ay kaman as nan ukiab chi layon. As nan nunfukiawana, nunkali nan pitu ay kud-or ay nanfor. <sup>4</sup> Kun pay narpas ay nunkali nan pitu ay kud-or, kiayudku elapu ay mangisurat as nan kenalicha. Ngem chinngorku nan kali ay nurpu ad chaya ay kanana, “Achim epapkakaammu ya isursurat nan kenalen nan pitu ay kud-or.”

<sup>5</sup> Angkiay ya nan anghel ay inilak ay nangatakchug henan fiayfiay ya henan luta at tenag-uya ad chaya nan kannawan ay limana <sup>6</sup> ya nunsapata as nan ngachan Apo Dios ay matataku in-inkiana ay namayang henan chaya, luta, fiayfiay ya nan am-in ay wacha kan chicha. Nan chinngorku ay ensapatan nan anghel at hiyana: “Achi poros matakta nan ommatana! <sup>7</sup> Ngem as nan mangepakiangosan nan maekapitu ay anghel as nan taram-petna, tongparuntu Apo Dios nan planuna ay kaman as nan infiakiana as nan chiyuchya pomapadtu ay nunserserfi kan hiya ad pus-uy ay chaana empakaammu as nan tapina.”\*

<sup>8</sup> Angkiay ya chinngorku nan kali ay nurpu ad chaya, ya kanana kasin kan ha-un, “Uymu araun nan ek-eket ay papel ay nafifitlag ay inuunnan nan chiyuy anghel ay kinmakiatin henan fiayfiay ya henan luta.”

<sup>9</sup> As nan hiyachi, inmuyak as nan anghel, at kinchawku nan ek-eket ay papel. Kenalina, “Araum ya kanum. Munlamiis ay kaman as nan chilon chi iyukan as tapakmu. Ngem as putom at mun-aklet, at pumutugtu.”

<sup>10</sup> Enarak nan ek-eket ay papel as nan liman nan anghel, at kenanku. Munlamiis tit-iwa ay kaman chilu as tapakku. Ngem as nan nangokmonak, pimutug nan putok. <sup>11</sup> Angkiay ya wacha nan nangifilin kan ha-un, “Masapor kasinmu epadtu nan ommat henan ongor ay nasyon ya tataku ay tukutukún chi kalicha ya as nan ar-aricha.”

## 11

### *Nan Chuwa Ay Nangepaneknek As Nan Tit-iwa*

\* **9:20** 16:9-12    \* **10:7** Jer. 7:25; 25:4; Ezek. 38:17; Dan. 9:10; Pal. 11:15-19

<sup>1</sup> Kun pay narpas sa, naichat kan ha-un nan pangluklukud ay kaman surkud, ya naifiakia us kan ha-un na: "Uymu lukchun nan templon Apo Dios ya nan altar, ya filangum nan chiyuycha munchaychayaw hid-i. <sup>2</sup> Ngem pay-am ud-ay nan fiattaw nan templo. Achim lukchun, tay naipurang at sa as nan chiyuycha Gentil ay chicha nan mangepaassi henan nasantowan ay siyudad ay Jerusalem ay kamancha cha ikiatkiatin as opat puru ya chuwa ay furan. <sup>3</sup> As nan unig nan hanacha furan ay munpachong as nan hinlifu ya chuwan kiasot ya unum puru ay urkiw, ifiaorkuntu nan chuwa ay tistigok. Mafiachuwanchantu as saku ay mangepaila as ngunguyuscha, ya paneknekanchantu as nan tataku nan epakaammok kan chicha."

<sup>4</sup> Nan nauycha chuwa ay tistigu at chicha nan maepachong as nan chiyuycha chuwa ay kaiw ay olivo ya nan chuwa ay maepatpatngan chi silaw ay wacha as nan sangwanan Apo Dios ay Apon nan tataku asna's luta.\*

<sup>5</sup> Mu wachay mamadpachas ay manukiat kan chicha, fumud-ok chi apuy as tapakcha ay mangegetemok kan hiya. Hiyachi nan ekatuytu nan am-in ay fumusor ay mamachas ay manukiat kan chicha. <sup>6</sup> Naichat kan chicha nan kafaelan ya kalibfengan ay mangeparkinak as nan uchan ta achi umuduchan as nan timpu ay chacha mangepaneknekan as nan enpakaammon Apo Dios kan chicha. Naichat kan chicha nan kafaelan ay mangepafinalin as nan am-in ay chanum as chara, ya palikiatuncha nan tataku asna's luta babaen as nan kumpurmi ay kauugyat ay pomatuy, uray mamen kaat mu hiyasa nan laychuncha ay atun.

<sup>7</sup> As nan marpasan nan nauycha chuwa ay mangepaneknek as nan enpakaammon Apo Dios kan chicha, fomoknagtu nan atap ay animar henan chiyuy lukiar ay kaman fitu ay maid papugna, at makikufiat hiya kan chicha. Amisunantu ya patayunantu chicha.† <sup>8</sup> Maenganuytu nan natuy ay anchorcha as nan korsa henan nunchinngor ay siyudad ay naelansaan nan Apocha as nan koros. Nan siyudad ay anchi at maepachong ad Sodoma winnu Egipo. <sup>9</sup> As nan turu ya kakudwa ay urkiw, nan tataku ay murpu henan tunggal nasyon ya tribu ya tataku ay tukutukún chi kalicha ya kubletcha at fuyfuyaunchantu nan anchor nan hanacha. Achichantu us eparufus ay mailufok chasa. <sup>10</sup> Nan am-in ay tataku asna's luta ay achi omafurot kan Apo Dios at munlagsakchantu kiapú as nan natuyan nan nauycha chuwa ay pomapadtu. Munfiastacha ya mun-eennettanchantu, tay penarpalikiat nan hanacha chuwa nan tataku asna's luta.

<sup>11</sup> Ngem as nan marpasan nan turu ya kakudwa ay urkiw, tenakon Apo Dios nan chiyuycha chuwa, at temakchugcha. Ongor chi ugyat nan am-in ay nangila kan chicha. <sup>12</sup> As nan hiyachi, chinngor nan chiyuycha chuwa nan usa ay napigsa ay kali ay nurpu ad chaya ay kanana kan chicha, "Omabrat kayu hena!" Angkiay ya naetag-uycha ad chaya babaen as nan lifuu ay iilaun nan chiyuycha kafusorcha. <sup>13</sup> As nan hiyasa ay uras, nunkichu as napigsa ay nanachael as nan pagkapuron nan siyudad, ya natuycha nan piton lifu ay tataku. Inmugyat as solet nan nayagyag ay tataku, ya finigfigcha nan pannakafinalin Apo Dios ad chaya.

<sup>14</sup> Hiyana nan anongos nan maekadwa ay kauugyat ay likiat, ngem kiayud at omali nan maekatlu.

### Nan Maekapitu Ay Tarampet

<sup>15</sup> Angkiay ya as nan nangepakiangosan nan maekapitu ay anghel as nan tarampetna, wachacha nan nadngor ay nunkapigsa ay kali ay nurpu ad

\* <sup>11:4</sup> Zac. 4:1-6; Pal. 2:8-11; 3:7-13 † <sup>11:7</sup> Pal. 13:1-18

chaya. Chacha kanan, "Munlapu ad wani, maid tukún as muntoray asna's luta mu achi yangkiay nan Apo takú ay Dios ya hi Cristo ay pinilina. Hi Apo Dios at muntoray in-inkiana."

<sup>16</sup> Angkiay ya nan chuwan puru ya opat ay anam-amá ay nangatokor as nan tronocha as nan sangwanan Apo Dios at nunlukfubcha ay nunchay-chayaw kan Apo Dios. <sup>17</sup> Chacha kankanan,

"Apo Dios ay Mannakafialin as nan am-in ay mawawacha ad wani ya nawawacha ad maliyam, munyaman kami kan he-a, tay enpailam nan nakaskaschaaw ay pannakafialinmu, ya enlapom ay muntoray.

<sup>18</sup> Ongor chi fungat nan chiyuycha Gentil ay achi omafuröt kan he-a, ngem finnungatka us. Ad wani inumchan at nan timpu ay mangokomám as nan am-in ay nunkatuy ya manggun-gunaam as nan chiyuycha pomapadtu ay munserserfi kan he-a ya nan am-in ay tatakom ay manangchaychayaw ay uray nangangatu winnu ap-apud.

Hiyana nan ustу ay timpu ay manachaelam as nan chiyuycha nanachael as nan tataku asna's luta."

<sup>19</sup> Kun pay narpas chi, natkafian nan templon Apo Dios ad chaya, at naila hid-i nan kasón ay naiittuwan nan naisurat ay turag Apo Dios. Angkiay ya wachachay fiakilat, nunkapigsa ay kali ya komanikong ay kud-or. Nunkichu pay ya inmuchan as napigsa ay choraru.

## 12

### *Nan Fiafiai Ya Nan Tabfiad*

<sup>1</sup> Kun pay narpas chi, wacha nan nakaskaschaaw ay sinyar ay naepaila ad chaya. Nunpaila nan usa ay fiafiai ay nangafiachu as sumili ay kaman urkiw, ya nangatackchug as nan furan. Nakakorona as hinpuru ya chuwa ay taraw. <sup>2</sup> Kiayud at omanak hiya, ya cha mun-ag-akor kiapú as nan chana iliwas ay munpasikar.

<sup>3</sup> Wacha us nan tukún ay nakaskaschaaw ay sinyar ay naepaila ad chaya. Nunpaila nan ad-acha-an ay tabfiad ay munchachara. Pitu nan uruna ay nakchang as korona, ya hinpuru nan sakkudna. <sup>4</sup> As nan nangiwtwetana as iwetna, naamong nan pagkatlon nan chiyuycha taraw ad chaya, ya enpet-agna asna's luta. Angkiay uy tenmakchug as nan sangwanan nan fiafiai ay kiayud omanak ta okmonunantu nan mutun as nan fomoknakiana. <sup>5</sup> As nan naiyankan nan anakna ay laraki, wacha at nan namros ay nangiyuy as nan kawad-an Apo Dios as nan tronona. Tay nan nauyut onga at etorayana nan am-in ay nasyon. Henan muntorayana, maid poros sug-angna ay kamana epak-or nan lanchok as nan achi mamigfig as nan torayna. <sup>6</sup> Lenmayaw nan fiafiai ay immuy henan lukiar henan disyerto ay ensasakianan Apo Dios ay magyanana ta maaywanan hiya hid-i as hinlifu ya chuwan kiasot ya unum puru ay urkiw.\*

<sup>7</sup> Kun pay narpas chi, wachay kufiat ad chaya. Hi Miguel ya nan kakad-wana ay anghelles at kinuifiatcha nan tabfiad. Kun pay nan tabfiad ya nan kakadwana us ay anghelles at enes-angcha. <sup>8</sup> Ngem naamis nan tabfiad ya nan kakadwana, ya chaancha at naparufusan ay magyan ad chaya. <sup>9</sup> As nan hiyachi, naepet-ag manipud ad chaya nan hana ad-acha-an ay tabfiad ya nan anghellesna asna's luta. Nan tabfiad ay ansa at hiyasa challu nan urug ad

\* <sup>12:6</sup> Pal. 11:2-3

maliyam ay makali un Diablo winnu Satanas ay mangar-allilaw as nan am-in ay tataku asna's luta.<sup>†</sup>

<sup>10</sup> Angkiay ya chinngorku nan usa ay napigsa ay kali ad chaya ay kanana, "Ad wani nan natongparan nan nangesarakanan Apo Dios as nan tatakuna, tay enpailana nan pannakafialina ay muntoray. Ad wani us, nan infiaorna ay hi Cristo at enpailana at nan kalibfengana. Tay nan nangepabpfiasor as nan iib-a takú as nan sangwanan Apo Dios as inurkiw ya lenafi at naepet-ag manipud ad chaya.

<sup>11</sup> Enamis nan iib-a takú hi Satanas babaen as nan charan nan Kordero ya babaen as nan Ammay ay Chamag ay penanekekancha. Enpapas-nekcha ay nun-ekaskasaba uray hiyasay ekatuycha.

<sup>12</sup> Isunga chakayu am-in ay wacha ad chaya, munlagragsak kayu! Ngem chakayu ay wacha henan luta ya henan fiayfiay at ngumunguyus kayu, tay kinmuwab hi Satanas as nan kawad-anyu. Nunsidlay fungatna, tay ammunay ay ak-akettuy nan nayagyag ay timpuna."<sup>‡</sup>

<sup>13</sup> Kun pay naammuwan nan tabfiad ay naepet-ag hiya asna's luta, enapoaporna nan chiyuy fiafiai ay nangiyank as nan laraki. <sup>14</sup> Ngem naettan nan fiafiai as chuwa ay payak chi ad-acha-an ay nawi ta makatayaw ay umuy henan lukiar ay ensasakianan Apo Dios ay magyanana henan disyerto. Tay hid-i nan maaywanana as turu ay tawwun ya kakudwa, ya malisiyana nan urug ay hiyasa nan tabfiad.<sup>§</sup> <sup>15</sup> Angkiay ya infud-ok nan hana urug chi ongor ay chanum ay kaman layus ta maiyanud koma nan fiafiai. <sup>16</sup> Ngem finadngan nan luta nan fiafiai babaen as nan nuntakangana. Hiya at chi ya enokmona nan chanum ay infud-ok nan tabfiad. <sup>17</sup> Nunsidlay fungat nan tabfiad as nan fiafiai, ya uy nakikufiat as nan tapen nan an-akna ay chicha nan cha mangun-unud as nan filfilin Apo Dios ya as nan sursuru ay enpakaammon Jesus. <sup>18</sup> Angkiay ya uy temmakchug hiya henan olet nan fiayfiay.

## 13

### Nan Kauugyat Ay Animar Ay Nurpu Henan Fiayfiay

<sup>1</sup> As nan hiyachi, inilak nan kauugyat ay animar ay cha fomoknag henan fiayfiay. Pitu nan uruna ya hinpuru nan sakkudna ay nakchang as korona. Nan chiyuycha uru at nakchangcha as naisurat ay ngadngachan ay kaiinsurtu kan Apo Dios.\* <sup>2</sup> Nan ilan nan kauugyat ay animar at kaman leopardo.<sup>†</sup> Ngem nan chapana at kaman chapan nan makali un bear,<sup>‡</sup> ya nan tapakna at kaman tapak chi layon. Inchat nan tabfiad kan hiya nan mismu ay pannakafialina ya nan kalibfengana ay muntoray akas ari. <sup>3</sup> Nan usa as nan chiyuycha uron nan kauugyat ay animar at kaman wachay sukiatna ay ekatuyna koma, ngem napuy-anan. Naschaawcha am-in nan tataku asna's luta, ya inun-unudcha nan kauugyat ay animar. <sup>4</sup> Chinaychayaw nan am-in ay tataku nan tabfiad, tay inchatna nan kalibfengana as nan kauugyat ay animar. Chinaychayawcha us nan nauy kauugyat ay animar. Senarudsudcha, "Ay wachay maepachong as nan nauy ay animar? Ay wacha us chi makaamis kan hiya?"

<sup>†</sup> **12:9** Gen. 3; Isa. 14:12-23; Ezek. 28:13-19; Luc. 10:18      <sup>‡</sup> **12:12** Pal. 8:13      <sup>§</sup> **12:14** Pal. 11:2-3;

<sup>12:6</sup> \* **13:1** Pal. 16:13; 19:20; 20:10      <sup>†</sup> **13:2** Nan "leopardo" at kaman ad-acha ay atap ay pusa.

<sup>‡</sup> **13:2** Nan "bear" at ad-acha ay animar ay anchuanhuy kok-orongna.

<sup>5</sup> Enparufus Apo Dios ay muntoray nan chiyuy kauugyat ay animar as opat puru ya chuwa ay furan ya munkali as penapangas ay maifusor kan Apo Dios.<sup>6</sup> Isunga enlapuna ay mangitudtuchor kan Apo Dios, as nan ngachana, as nan mamagyanana, ya as nan am-in ay mamagyan ad chaya. <sup>7</sup> Naparufusan us hiya ay makikufiat ya mangamis as nan tatakon Apo Dios. Naichat pay kan hiya nan kalibfengan ay mangetoray as nan tataku ay nurpu henan tunggal nasyon ya tribu ay nurpu as nan tataku ay tukutukún chi kalicha ya kubletcha. <sup>8</sup> Am-in ay tataku asna's luta at munchaychayawchanta as nan chiyuy kauugyat ay animar, omangkiay nan chiyuycha wachay ngachancha as nan liblu ay naeletaan nan ngadngachan nan chiyuycha wachay fiyagcha ay maid patingkiana. Sakbay mafiyang nan luta, naisusurat nan ngachancha as nan chiyuy liblon nan Kordero ay naichaton.

<sup>9</sup> Nan wachay ingana ay chumngor at masapor chumngor. <sup>10</sup> Nan natudinan ay maifiarud at maifiarud challu, ya nan natudingan ay matuy babaen as espada at mapatuy babaen as espada. Isunga masapor eta-un nan tatakon Apo Dios chi likiatcha, ya ituruycha ay muntalek.

### *Nan Kauugyat Ay Animar Ay Nurpu As Nan Luta*

<sup>11</sup> Angkiay ya inilak nan usa pay ay kauugyat ay animar ay cha fomoknag henan luta. Wachay chuwa ay sakkudna ay kaman sakkud chi kordero, ngem nan kalina at kaman kalen chi tabfiad.\* <sup>12</sup> Wacha kan hiya nan am-in ay kalibfengan nan enmon-onay kauugyat ay animar, ya enosarna ay nunserfi kan hiya. Peneletra nan am-in ay tataku asna's luta ay chayawuncha nan enmon-onay animar ay napuy-anan chi sukiatna ay ekatuyna koma. <sup>13</sup> Nan maekadwa ay animar at en-enatna nan nakaskaschaaw ay sinyar, kaman as nan nangepar-iyana as apuy ay nurpu ad chaya ay ilalaun nan tataku. <sup>14</sup> Enallilawna nan am-in ay tataku asna's luta babaen as nan chiyuycha nakaskaschaaw ay sinyar ay naeparufus ay epailana as nan sangwanan nan enmon-onay animar. Finilina chicha ay mun-ammacha as kapadpachong nan enmona ay animar ay pangchayawcha challu as nan nauy enmona ay animar ay nafiakag as espada, ngem nataku challu. <sup>15</sup> Naparufusan us nan maekadwa ay kauugyat ay animar ay mangtaku as nan enammaancha ay kapadpachong nan enmona ay animar ta makakali ya makaekeddeng ay mangepapatuy as nan am-in ay achi munchayaw kan hiya. <sup>16</sup> Penelet us nan maekadwa ay animar ay mamarkaan nan am-in ay tataku as nan kannawan ay limacha winnu as ketongcha. Uray nan nangangatu ay tataku ya fiakun, nunkafiaknang ya nunkapugli, mafibiaor ya fiakun at peneletra chicha ay mamarkaancha. <sup>17</sup> Enatna chi ta maid poros taku as lomaku winnu mun-elaku sukúd mamarkaan as nan ngachan nan enmona ay kauugyat ay animar, winnu nan numero ay sinyar nan ngachana.

<sup>18</sup> Hiyana nan manaporan as kenasilib. Mu wachay kenasilib at numnumun ay mangammu as nan laychun ay kanan nan numeron nan kauugyat ay animar. Tay nan numero at pachong nan ngachan chi taku. Nan numero at unum kiasot ya unum puru ya unum.

## 14

### *Nan Kordero Ya Nan 144,000 Ay Ensarakana*

§ 13:5 Pal. 11:1-2; 12:6 \* 13:11 Pal. 13:1; 16:13; 19:20; 20:10

<sup>1</sup> Angkiay ya inilak nan Kordero ay nangatakchug henan chuntug ay Sion ya kadwana nan hinkiasot ya opat puru ya opat ay lifu ay tataku. Naisurat as ketongcha nan ngachan nan Kordero ya nan ngachan Amana. <sup>2</sup> Chinngorku nan usa ay kali ay nurpu ad chaya ay kaman wawak chi ongor ay chanum, ya kaman as nan napigsa ay kud-or. Kaman us kiangos chi cha makutkuttingting ay ongor ay arpa. <sup>3</sup> Nangatakchugcha nan hinkiasot ya opat puru ya opat ay lifu ay tataku ay manasakiang as nan trono, opat ay matataku ay nafiyang, ya chiyucha anam-amá. Chacha munkankanta as fiarú ay kanta ay chicha yangkiay nan makaekanta, tay chicha nan nawawayawaan as nan am-in ay tataku asna's luta. <sup>4</sup> Chicha us nan lanaraki ay chaan nangepaassi as achorcha maepangkep as nan makiskissuyan as fianafiai, tay kanayon ay nacharoscha. Chacha un-unuchun nan Kordero as nan am-in ay ay-ayana. As nan am-in ay tataku, chatona nan nawawayawaan ta chicha nan omona ay maichaton kan Apo Dios ya as nan Kordero. <sup>5</sup> Chaancha poros nunkutkutum. O, maid poros maepabpfiasor kan chicha.

### *Nan Turu Ay Anghes*

<sup>6</sup> Angkiay ya inilak nan usa pay ay anghel\* ay cha muntat-ayaw as ngatu, ya wacha nan ammay ay chamag ay maid patingkiana ay uyna ekasaba as nan am-in ay tataku asna's luta, henan tunggal nasyon ya tribu, ya as nan tataku ay tukutukún chi kalicha ya kubletcha. <sup>7</sup> Nunkali as napigsa, "Chaychayawunu hi Apo Dios, ya chaychayawunu nan pannakafialina, tay inumchan nan timpu ay mang-okomana as nan tataku. Chayawunu nan namayang as nan chaya, luta, fiayfiay ya chiyucha ugwor."

<sup>8</sup> Angkiay ya wacha nan maekadwa ay anghel ay inmunud ay nangali, "Nachachael at! Nachachael nan nunchinngor ay siyudad ay Babilonia! Tay nan chiyucha i-Babilonia at finutangcha nan am-in ay nasyon as nan fiayascha ay maepachong as nan nunsidla ay nangepapasancha as nan assi ay lachokcha."

<sup>9</sup> Nunkali as napigsa nan maekatlu ay anghel ay inmunud kan chicha. Kenalina, "Nan chiyucha manaychayaw as nan kauugyat ay animar ya as nan enammaancha ay kapadpachong nan hana ay animar, ya namarkaan chi ketongcha winnu limacha as nan markan nan kauugyat ay animar <sup>10</sup> at ikopunchantu nan naetatasa ay fiayas ay chaan nasubsuforan ay hiyasa nan maepachongan nan kauugyat ay maid poros sug-angna ay fungat Apo Dios. Mapalikiatchantu us as nan apuy ya as nan cha mapuppuoran ay asufre ay iilaun nan nasantowan ay anghes ya nan Kordero. <sup>11</sup> Nan asok nan apuy ay cha mamarpalikiat kan chicha at cha munpangapangatu in-inkiana. Inurkiw ya lenafi ay maid poros kuminkinkan nan mun-iliwliwasan nan chiyucha nunchaychayaw as nan kauugyat ay animar ya as nan enammaancha ay kapadpachongna, ya nan uray ngachana ay namarkaan as nan ngachana."

<sup>12</sup> Isunga masapor mun-eta-un nan tatakon Apo Dios ay chicha nan manongtongpar as nan filfilina ya mangiturturuy ay muntalek kan Jesus.

<sup>13</sup> Angkiay ya chinngorku nan usa ay kali ay nurpu ad chaya ay kanana, "Isuratmu na: Munlapu ad wani, nakiasatcha nan nunkatuy ay enmafurot kan Apo Jesus."

"O-a! Tit-iwa met sa," ensongfiat nan Espiritu Santo. "Mun-iblachantu as nan nalikiat ay chunucha, tay awatuncha nan ammay ay nunfianakian nan en-enatcha."

\* **14:6** 14:6, 8-9, 14-15, 17-18; 15:1-16:21

### *Nan Maaniyan Nan Tataku Asna's Luta*

<sup>14</sup> Kun pay narpas chi, inilak nan usa ay munpupukaw ay lifuu ay nangatokoran nan kaman taku ay nakakorona as naamma as fialetok ya nanangchun as tachum ay kompay. <sup>15</sup> Angkiay ya fenmoknag nan usa pay ay anghel as nan templo ad chaya, ya chana ifugfukiaw as nan chiyuy nangatokor as nan lifuu, “Ayu! Araum nan kompaymu ya uyka mun-aní, tay panag-aani met ad wani. Nabkiasancha at nan maani ay chicha nan tataku asna's luta.” <sup>16</sup> Isunga nan nangatokor as nan lifuu at nunkompay asna's luta, at naani at nan maani.

<sup>17</sup> Kun pay narpas sa, inilak nan usa pay ay anghel ay fenmoknag as nan templo ad chaya, ya inuunnana us nan tachum ay kompay.

<sup>18</sup> Angkiay ya fenmoknag nan usa pay ay anghel ay nurpu as nan kawad-an nan altar. Hiya nan mangay-aywan as nan apuy. Infukiawna as nan kadwana ay nanangchun as nan tachum ay kompay, “Ayu! Araum nan tachum ay kompaymu ya uymu kompayun ay mamuras as nan chiyuycha fukias nan ubas aschi's luta, tay nor-omcha at.” <sup>19</sup> Isunga inwasiwasna nan kompayna asna's luta ay namuras as nan am-in ay fukias nan ubas, at entap-orña as nan ad-acha-an ay munchetchetchan as ubas ay maepachongan nan kauugyat ay fungat Apo Dios. <sup>20</sup> Naikiatiкиatin ay nachetchet nan chiyuycha fukias nan ubas henan fiakun sakop nan siyudad. Nunlapu as nan munchetchetchan at enmayas chi chara ay inumchan as turon kiasot ya chuwan puru ay kilometro nan kaachawwina ya inkiana usa ya kakudwa ay metro nan kaposongna.†

## 15

### *Nan Pitu Ay Anheles Ya Nan Anongos Ay Likiat*

<sup>1</sup> Kun pay narpas chi, inilak kasin nan usa pay ay am-amud ya nakaskaschaaw ay sinyar ad chaya. Wachacha nan pitu ay anheles ay nangiyali as pitu ay kauugyat ay pomatuy. Chatona nan anongos, tay as nan marpasan nan chiyuycha chusa, munpatinkia nan kauugyat ay fungat Apo Dios.

<sup>2</sup> Inilak us nan kaman fiayfiay ay naamma as sarming ay nakaslangan as apuy. Nan chiyuycha nangamis as nan kauugyat ay animar ya nan naammaan ay kapadpachongna at nangatakchugcha henan olet nan kaman fiayfiay. O, chicha nan chaan nanaychayaw as nan chiyuycha animar wiñnu nunpamarka as nan numeron nan ngachana. Inuunnanchay arpa ay inchat Apo Dios kan chicha, <sup>3</sup> ya chacha kankantaun nan kantan Moises ay taku ad pus-uy ay nunserserfi kan Apo Dios ya nan kantan nan Kordero. Kenantacha,

“Apo Dios ay Mannakafialin as nan am-in, amud ya nakaskaschaaw nan en-enatmu.

He-a nan aren nan am-in ay nasyon.

Nalintig ya ustу nan chiyuycha en-enatmu.

<sup>4</sup> Maid met achi mamigfig ya mangichaychayaw kan he-a, Apo.

Tay he-a yangkiay nan nasantowan.

Omalichantu nan am-in ay tataku as nan sangwanam ay manaychayaw kan he-a. Murpucha henan am-in ay nasyon, tay nailacha nan am-in ay nalintig ay en-enatmu.”

† **14:20** Pal. 19:17-18; As nan kali ay Griego at “inkiana as nan fiakiang chi kafiayu”.

<sup>5</sup> Kuncha pay narpas ay nunkankanta, inilak ay natkafian nan Kasasan-towan ay Lukiar as nan templo ad chaya ay kawad-an nan naisurat ay filfilin Apo Dios.\* <sup>6</sup> As nan hiyachi, fennoknag as nan templo nan chiyuycha pitu ay angheles ay nangiyali as nan pitu ay kauugyat ay pomatuy. Nunfiafiachucha as nafiaror ay nacharos ya mun-amoselap ay lopot ay panukaw, ya tunggal usa at wachay naamma as fialetok ay naeopopotepot as tagrangcha. <sup>7</sup> Angkiay ya nan usa as nan chiyuycha opat ay munkik-iwi at inwarasna as nan pitu ay angheles nan pitu ay mallokong ay naamma as fialetok ay nunkapnu as nan kauugyat ay fungat Apo Dios ay matataku in-inkiana. <sup>8</sup> Napnu nan templo as asok ay mangepaila as nan kenaamud ya pannakafialin Apo Dios. Isunga maid nakaskop hid-i inkiana narpas nan pitu ay kauugyat ay pomatuy ay inyalen nan pitu ay angheles asna's luta.

## 16

### *Nan Pitu Ay Mallokong Ay Napnu As Kauugyat Ay Fungat*

<sup>1</sup> Angkiay ya chinngorku nan usa ay napigsa ay kali ay nurpu as nan templo ay chana kanan as nan pitu ay angheles, “Uyyu ikuyag aschi's luta nan pitu ay mallokong ay nunkapnu as kauugyat ay fungat Apo Dios.”\*

<sup>2</sup> Isunga nan omona ay anghel at inmuy ay uy nangikuyag as nan naiittu as nan mallokongna aschi's luta. Kauugyat ya putputallig ay kulid nan nurmu as nan anchor nan tataku ay namarkaan as nan markan nan kauugyat ay animar ya as nan chiyuycha nanaychayaw as nan enammaancha ay kapadpachongna.

<sup>3</sup> Nan maekadwa ay anghel at inkuyagna nan naiittu as nan mallokongna henan fiayfiay. Nunfialin nan chanum as chara ay kaman charan chi natuy ay taku, at natuycha am-in nan wacha henan fiayfiay.

<sup>4</sup> Angkiay ya nan maekatlu ay anghel at inkuyagna nan naiittu as nan mallokongna henan chiyuycha wawwang ya ugwor, at nunfialin nan chanum as chara. <sup>5</sup> Chingorku ay kanan nan anghel ay mangay-aywan as nan chanum, “He-a nan Nasantowan ay mawawacha ad wani ya nawawacha ad maliyam. Nalintig nan enkeddengmu ay chusan nan tataku.” <sup>6</sup> Tay nan chiyuycha manangotettet chi ukialicha ay tataku at penatuycha nan tatakom ya nan chiyuycha pomapadtu ay infiaormu ay enmayas nan characha. Isunga ad wani, chara nan cham epaikop kan chicha. Hiyasa nan libfengna ay chusacha.”

<sup>7</sup> Angkiay ya chinngorku nan kali ay nurpu as nan altar ay kanana, “Apo Dios ay Mannakafialin as nan am-in, ustu ya nalintig nan enkeddengmu ay chusan nan tataku.”†

<sup>8</sup> Nan maekap-at ay anghel at inkuyagna nan naiittu as nan mallokongna as nan urkiw. Isunga kaskasin enmatong nan urkiw ya naparufusan ay mamalikiat as tataku babaen as nan omatngig ay atongna. <sup>9</sup> Naesasap-uycha as nan omatngig ay atongna. Isunga intuchorcha nan ngachan Apo Dios ay hiya nan wachay kalibfengana as nan chiyuycha kauugyat ay pomatuy. Chaancha us poros nunfiafiawi winnu chinaychayaw hi Apo Dios.‡

<sup>10</sup> Angkiay ya nan maekalema ay anghel at inkuyagna nan naiittu as nan mallokongna as nan tronon nan kauugyat ay animar. Hiya at chi ya ngenmongot nan intiru ay muntortorayana. Kenarat nan tataku nan chilacha kiapú as nan putputallig ay chacha iliwas, <sup>11</sup> ya intuchorcha hi Apo

\* **15:5** Heb. 9:4   \* **16:1** Exo. 7:14-11:10   † **16:7** Pal. 6:9-11   ‡ **16:9** Pal. 9:20-21; 16:11

Dios ad chaya kiapú as nan putputallig ay kulidcha. Ngem chaancha poros inflafiaawi nan mangotettet ay en-enatcha.

<sup>12</sup> Angkiay ya nan maekan-um ay anghel at inkuyagna nan naiittu as nan mallokongna henan ad-acha ay wawwang ay Eufrates. Hiya at chi ya namag-anan nan wawwang ta maesakiana as ayun nan chiyuycha ari ya sosorchachucha ay murpu as apét fomokfoknakian nan urkiw. <sup>13</sup> Angkiay ya inilak nan turu ay anennet ay kaman tugtug chi ilacha. Fenmoknag nan usa as nan tapak nan tabbiad. Nan usa at fenmoknag as nan tapak nan kauugyat ay animar, ya nan usa us at fenmoknag as nan tapak nan achi tit-iwa ay pomapadtu. <sup>14</sup> Chicha nan chiyuycha anennet ay makafiael ay mangekamkaman as nakaskaschaaw ay sinyar. Umuycha nan hanacha turu henan intiru ay luta ay mangamong as nan am-in ay ar-ari ta uycha makikuiat kan cha Apo Dios ay Mannakafialin as nan am-in as nan urkiw ay mang-okomána as nan am-in ay tataku.

<sup>15</sup> Numnumunyu nan kenalen Apo Jesus, “*Omaliyaktu ay kaman as nan omaliyan nan mangaaki!*<sup>§</sup> *Nakiasat nan taku ay munpuyat ya nangafachu ay nakaskaschaaw ay maman-ud as nan omaliyan nan apuna ta achi forfollachan ya achi mafainan as nan uyna manib-atan kan hiya.*”

<sup>16</sup> Angkiay enamong nan chiyuycha anennet nan chiyuycha ar-ari ay kadwacha nan sosorchachucha henan lukiar ay makali un Armagedon as nan kalen nan Hebreo.

<sup>17</sup> As nan anongos, nan maekapitu ay anghel at inkuyagna nan naiittu as nan mallokongna as nan angin. Hiya at chi ya wacha nan napigsa ay kali ay nurpu as nan trono as nan templo ay kanana, “Narpas at!” <sup>18</sup> Angkiay ya wachachay fiakilat ya komanikong ay kud-or ya kauugyat ay kichu. Maid poros maepachongan nan kenapigisan tonas ay kichu nunlapu pay laing as nan nafiayangan chi tataku, tay hiyana nan kapigsaan. <sup>19</sup> Nunkatluwun nan kichu nan nunchinngor ay siyudad ay Babilonia ya nachachael us nan am-in ay siyudad asna's luta. Chaan challu liniw-an Apo Dios ay manusa as nan chiyuycha i-Babilonia. Isunga peneletna chichá ay umikop as nan tasa ay napnu as kauugyat ay fungatna. <sup>20</sup> Kun pay nunkichu, am-in ay luta ay liniliwus chi fiayfiay ya am-in ay chuntug at namaidcha. <sup>21</sup> Nurpu ad chaya nan anad-acha-an ay choraru ay nag-as ay umuy as leman puru ay kilo nan kachagsun nan usa, ya naitungorcha as nan tataku asna's luta. Isunga kaskasin intuchor nan tataku hi Apo Dios kiapú as nan choraru, tay kauugyat as solet nan hana ay likiat.

## 17

### *Nan Nunchinngor Ay Fiafiai Ay Mangepabpafiyad As Kuwana*

<sup>1</sup> Kun pay narpas chi, enmali kan ha-un nan usa as nan pitu ay anghelles ay kawad-an nan pitu ay mallokong, ya kanana kan ha-un, “Aka ta epailak kan he-a nan chusan nan nunchinngor ay fiafiai ay mangepabpafiyad as achorna. Hiyana nan siyudad ay nakiaub as nan sag-un nan ongor ay wawwang. <sup>2</sup> Nan ar-ari asna's luta at enpappapaschay assi ay lachokcha kan hiya. Uray nan tataku asna's luta at kaman finutang nan fiyasna ay maepachong as nan nangepappapasana as assi ay lachokna.”

<sup>3</sup> As nan hiyachi, pinmigsa nan pannakafialin nan Espiritu Santo kan ha-un, ya inuyuk as nan anghel henan disyerto. Inilak hid-i nan fiafiai ay nunsasakay as nan kauugyat ay animar ay munchachara ay pitu nan

uruna ya hinpuru nan sakkudna. Nan intiru ay achor nan chiyuy animar at nasuratan as ngadngachan ay manginsurtu kan Apo Dios. <sup>4</sup> Nunfiafiachu nan fiafiai as violet ya munchachara ay kaman fiachon chi ari. Naarkosan us hiya as fialetok, nunkafiaror ay fiatu ya perlas. Inuunnana nan tasa ay fialetok ay napnu as kaiisiw ya assi ay nunfianakian nan nangepappasana as assi ay lachokna. <sup>5</sup> Naisurat as ketongna nan ngachan ay wacha nan naetatafun ay laychuna ay kanan. Nan naisurat at hiyana: “Nan Nunchinngor ay Babilonia, nan enan chi fianafiai ay mangepabpafiayad as achorna ya nurpuwan chi am-in ay kaiisiw asna's luta.” <sup>6</sup> Inilak ay nafutang nan fiafiai as charan nan tatakon Apo Dios ay chicha nan napatuy kiapú as nan nangepaneknekancha as nan pammaticha kan Jesus.

As nan nangil-ak kan hiya, naschaawak as solet. <sup>7</sup> Ngem kenalen nan anghel kan ha-un, “Adchi t'uyka maschaaw? Epakaawatku kan he-a nan laychun ay kanan nan chaan naepakpakaammu ad kasin ay maepangkep as nan fiafiai ya nan chiyuy nunsasakayana ay kauugyat ay animar ay wachay pitu ay uruna ya hinpuru ay sakkudna. <sup>8</sup> Nan kauugyat ay animar ay inilam at nawawacha ad kasin, ngem natuy ad wani. As kasin at fomoknagtu henan lukiar ay kaman fitu ay maid papugna ya maiyuy as nan pakachachaelana in-inkiana. Nan tataku asna's luta ay maid ngachancha ay naisurat as nan liblu ay naelestaan nan ngadngachan nan wachay fiyagna ay maid patingkiana sakbay mafiyang nan luta at maschaawcha as nan mangilancha as nan kauugyat ay animar. Maschaawcha, tay natataku ad kasin, natuy ad wani, ya munpailantu kasin.”

<sup>9</sup> Kenalen pay nan anghel kan ha-un, “Hiyana nan manaporan as kenasilib ta maawatanyu chaná. Nan laychun ay kanan nan pitu ay uru at pitu ay filig ay tomotokoran nan fiafiai. <sup>10</sup> Nan usa us ay laychuna ay kanan at pitu ay ari. Nakaan at nan lema kan chicha, kutug ay cha muntortoray nan usa ad wani, ya wacha pay nan usa ay omalintu. Ngem as nan kasina maepilan at hen-omaketan yangkiay nan maparufusanana ay muntoray. <sup>11</sup> Nan chiyuy kauugyat ay animar ay natataku ad kasin ya natuy ad wani at hiya nan maekawaru ay ari, ngem usa challu hiya as nan chiyucha pitu ay ari. Awni at maiyuy as nan pakachachaelana in-inkiana.

<sup>12</sup> “Nan hinpuru ay sakkud ay inilam at chicha nan hinpuru ay ari ay chaan pay nuntoray. Ngem maichattu kan chicha nan kalibfengan ay maketoray as nan kauugyat ay animar as usa ay uras. <sup>13</sup> Us-usa challu nan pangkepcha. Ipurangchantu nan pannakafialinchya ya kalibfengancha ay muntoray as nan kauugyat ay animar. <sup>14</sup> Kufiatunchantu nan Kordero. Ngem nan Kordero ya nan chiyucha matalek ay umun-unud kan hiya ay enayakian ya pinilen Apo Dios at amisunantu chícha, tay hiya nan Apo as nan am-in ay apo ya Ari as nan am-in ay ari.”

<sup>15</sup> Kenalen pay nan anghel kan ha-un, “Nan chiyucha wawwang ay inilam ay temotokoran nan fiafiai ay mangepabpafiayad as achorna at chicha nan ongoongor ay tataku ay nurpu henan nasnasyon, nan chiyucha tribu ya tataku ay tukutukún chi kalicha ya kubletcha. <sup>16</sup> Ingluntu nan chiyuy inilam ay kauugyat ay animar ya nan hinpuru ay sakkud nan chiyuy fiafiai ay mangepabpafiayad as achorna. Araunchantu nan am-in ay wacha kan hiya, ya lafusanchantu hiya. Ischachantu nan lamana, ya puoranchantu nan mayagyag. <sup>17</sup> Maekaman chaná kan hiya, tay hi Apo Dios nan mangepaus-usa as numnumcha ay mangtongpar as nan pangkepna.

Isunga inpurangcha as nan kauugyat ay animar nan kalibfengancha ay muntoray inkiana matongpar nan am-in ay kenalen Apo Dios.

<sup>18</sup> “Nan fiafai ay inilam at hiya nan nunchinngor ay siyudad ay mangotoray as nan am-in ay ar-ari asna's luta.”

## 18

### *Nan Machachaelan Nan Siyudad Ay Babilonia*

<sup>1</sup> Kun pay narpas na, inilak nan usa pay ay anghel ay cha komnopay nurpu ad chaya. Mafigfigfig nan kafaelana, ya sinilawan nan napigsa ay munamoselapana nan intiru ay luta. <sup>2</sup> Inpigsana ay nangifukiaw, “Nachachael! Nachachael at nan nunchinngor ay siyudad ay Babilonia! Nunfialin at ad wani as mamagyanan nan chiyucha anen net ya muntabtafunan nan am-in ay mangotettet ay espiritu. Omap-aponan us nan chiyucha kessel ay maifilang as naruket ya kaiisiw. <sup>3</sup> Tay nan am-in ay nasyon at inikopcha nan fiayasna ay maepachong as nan am-in ay assi. Nan chiyucha ar-ari asna's luta at enpapaschay assi ay lachokcha kan hiya, ya nan chiyucha nigosyante asna's luta at finmaknangcha as nan nunsidla ay nangepasana as assi ay lachokna.”

<sup>4</sup> Angkiay ya chinngorku nan usa pay ay kali ay nurpu ad chaya ay kanana, “Chakayu ay tatakok, mak-ak kayu henan hana ay siyudad ta achi kayu maetapi as nan fiasfiasorna, ya ta achi kayu us maetapi as nan chusana.

<sup>5</sup> Tay ongoongor chi fiasfiasorna ay kamancha natot-or-op inkiana ad chaya, ya achi liwliw-an Apo Dios nan kenamangotettetna.

<sup>6</sup> Epaleknan Apo Dios kan hiya nan likiat ay kaman as nan enpaleknana as nan tapina.

O, epaleknana kan hiya as mamen chuwa nan enpaleknana ay likiat kan chicha.

Nan kenaengel nan fiayas ay enpaikopna as nan tapina ay tataku at munchubliyun Apo Dios nan kenaengel nan fiayas ay epaikopna kan hiya.

<sup>7</sup> O, nan kenaongor chi nangepasana as assi ay lachokna ya kenapangasna at asesa us nan kenaongor nan iliwasna ya ngunguyusna ay ichusan Apo Dios kan hiya.

Tay chana epangpanggas as numnumna un,

‘Ha-un met nan reyna! Fiakunak ellakas, ya achektu poros mapachasan nan asesa ay ngunguyus.’

<sup>8</sup> Kiapú as na, as nan usa yangkiay ay urkiw, omalintu kan hiya nan chiyucha kauugyat ay pomatuy ay kaman as nan utú, ngunguyus, fitel, ya apuy.

O, mapuorantu hiya, tay mannakafialin hi Apo Dios ay manuska kan hiya.”

<sup>9</sup> Isunga nan chiyucha ar-ari asna's luta ay nangepappas as assi ay lachokcha kan hiya ya nangkianianas as nan kenarachokna at pararuntuy ngunguyus ya akorcha kiapú henan siyudad as nan mangil-ancha as nan asokna as nan chana mapuppuoran. <sup>10</sup> Kiapú as ugyatcha ay maetapi as nan iliwasna, mangatakchugchantu as nan achawwi, ya kanancha, “Kasusugang! Anuy paat kasusug-ang nan chiyuy nunchinngor ay siyudad ay Babilonia! Uray kun mafigfigfig ay siyudad, ngem as nan usa yangkiay ay uras, nachachael at.”

<sup>11</sup> Nan chiyucha nigosyante at mun-akor ya ngumuyuscha us, tay maid at lomaku as nan elakucha. <sup>12</sup> O, maid lomaku kan chicha as naamma as

fialetok, silver ya nan chiyuycha nafiaror ay fiatu ya perlas. Maid us lomaku as anam-ammay ay lopot ay panukaw, nunkangina ay lopot ay violet, ya lopot ay munchachara ya sida. Maid us lomaku as nan am-in ay karasen chi munfiangu ay kaiwcha ya nan am-in ay karasen chi ka-ichin ay naamma as fiab-an chi elepante, nunkangina ay kaiw, kianfiang, lanchok ya naamma as am-ammay ay fiatu ay makali un marfil. <sup>13</sup> Maid us lomaku as sinamon ay fiangfiangru, munfiangu ay lana, insenso, mirra ya frankensenso. Maid us lomaku as fiayas, mantika, ammay ay alina, ya trigo. Maid us lomaku kan chicha as fiaka ya karnero, kafiyau ya kalesa, ya uray taku ay mapelet ay mafiabfiaor.

<sup>14</sup> Chatona ay nigosyante at kananchantu kan hiya, “Kayman! Namaidcha nan anam-ammay ay laraychum ay kuwaun. Nan am-in ay kenafiaknangmu ya kaichayawam at namaid, ya achimtu poros kasiñ mad-anan chicha.”

<sup>15</sup> Nan chiyuycha nigosyante ay finmakanng as nan nun-el-elakwancha henan siyudad ay ansa at mangatakchugchantu henan achawwi kiapú as ugyatcha ay maetapi as nan iliwasna. Mun-akorchantu ya ngumuyuschantu as solet, <sup>16</sup> ya kanancha, “Kasusug-ang! Anuy paat kasusug-ang nan chiyuy nunchinngor ay siyudad ay Babilonia! Tay ad kasiñ, nunfiafiachucha nan umiili hid-i as lopot ay panukaw, nunkangina ay lopot ay violet ya munchachara. Naarkoarkosancha us as fialetok ya nafiaror ay fiatu ya perlas. <sup>17</sup> Ngem as nan usa yangkiay ay uras, namaid at nan am-in ay kenafiaknangcha.”

Am-in us nan kapetan nan chiyuycha papor, nan chiyuycha munlurukian, ya nan chiyuycha munchunchunu as nan papor ya am-in ay omar-ara as pagfiyagcha ay murpu henan fiayfiay at mangatakchugchantu as nan achawwi. <sup>18</sup> Mun-akorchantu as nan mangil-ancha as nan asok ay cha murmurpu henan siyudad ay cha mapuppuoran, ya ifukiawchantu, “Ay wachay siyudad as maepachong as nan nunchinngor ay siyudad? Maid poros!” <sup>19</sup> Pay-anchantu as chapor nan urucha ay mangepaila as ongor ay tutuyucha ya mun-akorchcha ya ngumuyuscha ay mangali, “Kasusug-ang! Anuy paat kasusug-ang as solet nan nunchinngor ay siyudad! Nan hana ay siyudad nan finmakanngan nan am-in ay wachay paporna. Ngem as nan usa yangkiay ay uras at namaid at nan am-in.”

<sup>20</sup> Chakayu ay wacha ad chaya at munlagragsak kayu koma. Chakayu us ay tatakon Apo Dios, apostolesna ya chakayu ay pomapadtuna at munlagragsak kayu koma us, tay chinusan Apo Dios nan hana ay siyudad kiapú as nan enatna kan chakayu.

<sup>21</sup> Angkiay ya wacha nan usa ay mannakafialin ay anghel ay nangokwat as fiatu ay kaman as nan kaad-achan chi ad-acha-an ay losóng, at entap-orna henan fiayfiay. Kenalina, “Assenantu nan kauugyat ay machachael-lantu nan nunchinngor ay siyudad ay Babilonia, ya achi kasiñ mail-ila. <sup>22</sup> Maidtu madmadngor henan chiyuy ay siyudad as kankantan nan chiyuycha munkankanta, kutingting nan chiyuycha munkutkutting as arpa, koraling nan chiyuycha munkorkoraling ya kiangos nan tarampet nan chiyuycha muntartarampet. Maid us kasiñ maanapan hid-i as nunkaraing ay mun-am-amma as kumpurmi ay maammaan, ya maid us madmadngor as panugpug chi cha munfiayfiay, tay maid poros fiayuwuncha. <sup>23</sup> Maidtu poros munpaspaskud as uray usa ay pingki, ya maid us madmadngor as kalen chi chumuyas ya nan maichuyas. Chatona nan chusan nan Babilonia, tay nan chiyuycha nigosyante hid-i at chicha nan kafiaknangan ya katorayan asna's luta. Nan am-in ay nasyon asna's luta at naallilawcha

babaen as nan nunsarsaromangkaancha. <sup>24</sup> Nachusa nan Babilonia, tay hid-i nan finmud-okan nan charan nan chiyuycha pomapadtu ya nan tatakon Apo Dios ya nan am-in ay napatuy asna's luta."

## 19

### *Nan Lagragsak Nan Chiyuycha Wacha Ad Chaya*

<sup>1</sup> Kun pay narpas na, chinngorku nan kaman napigsapigsa ay kalen chi ongoongor ay tataku ad chaya ay cha mangifugfukiaw, "Machaychayaw hi Apo Dios! Nan kaesarakanan, kaichayawan ya pan-nakafialin at wacha kan hiya,

<sup>2</sup> tay tit-iwa ya nalintig nan atuna ay mun-okóm. Enkeddengna nan kachusaan nan nunchinngor ay fiafiai ay mangepabpafiayad as achorna, tay munlumu hiya as fumasoran nan tataku babaen as nan mangepapasana as assi ay lachokna. Enes-ang Apo Dios as nan nauy fiafiai nan nangpatuyana as nan chiyuycha munserserfi kan Apo Dios."

<sup>3</sup> Kasincha infukiaw, "Machaychayaw hi Apo Dios! In-inkiana ay cha munpangpangatu nan asok ay murpu henán cha mapuoran ay siyudad."

<sup>4</sup> Angkiay ya nan chuwan puru ya opat ay anam-amá ya nan opat ay matataku ay nafiyang at nunlukfubcha ay nunchayaw kan Apo Dios ay nangatokor as nan tronona. Kenalicha, "Amen! Machaychayaw hi Apo Dios!"

### *Nan Chuyas Nan Kordero*

<sup>5</sup> Angkiay ya wacha nan kali ay nurpu as nan kawad-an nan tronon Apo Dios ay kanana,

"Chakayu am-in ay munserserfi ya munchaychayaw kan Apo Dios, uray mu nangatu winnu ap-apud kayu at chayawunyu hi Apo Dios takú."

<sup>6</sup> Angkiay ya chinngorku nan kaman napigsapigsa ay kalen chi ongoongor ay tataku ay kaman as nan wawak chi ongor ay chanum, ya kaman napigsa ay kud-or. Kenalicha ay nangekanta,

"Machaychayaw hi Apo ay Dios. Tay nan Apo ay Dios takú ay Mannakafialin as nan am-in at hiya nan cha muntoray."

<sup>7</sup> Munlagragsak takú koma as solet, ya chayawun takú koma nan pannakafialina, tay nan uras nan munchuyasan nan Kordero at umchan. Nan ichuyasna ay fiafiai at nakasakiana.

<sup>8</sup> Naparufusan ay mangifiachu as nacharos ya mun-amoselap ay lopot ay pukpukkawan ay naichat kan hiya."

Nan laychún ay kanan nan pukpukkawan ay lopot at hiyasa nan chiyuycha nalintig ay cha atuatun nan tatakon Apo Dios.

<sup>9</sup> Angkiay ya kanan nan anghel kan ha-un, "Isuratmu na: Nakiasat nan tataku ay naayakian ay makekan as nan chuyas nan Kordero." Hana at tutupan, "Chatona nan tit-iwa ay kalen Apo Dios."

<sup>10</sup> As nan nangaliyana's chi, nunlukfuiak as nan sangwanana ay mun-chayaw koma kan hiya, ngem kenalina, "Achim atun sa! Hi Apo Dios yangkiay nan chayawum! Tay usaak ay munserserfi kan Apo Dios ay kaman kan he-a ya as nan iib-am ay mangepaneknek as nan sursuru ay enpakaammon Jesus. Tay nan enpaifiagiakiyan nan Espiriton Apo Dios as nan chiyuycha pomapadtu at nurpu challu as nan enpakaammon Jesus."

### *Nan Nunsasakay As Nan Munpupukaw Ay Kafiyau*

<sup>11</sup> Angkiay ya inilak ay natkafian ad chaya, at fenmoknag nan munpupukaw ay kafiayu. Nan nunsasakay at nangadnan as Matalek ya Tit-iwa. Nalintig nan atuna ay mun-okóm, ya nalintig us nan atuna ay makikufiat as nan kafusorna. <sup>12</sup> Nan matana at kaman kumarkiarud ay apuy, ya ongor chi korona as uruna. Wacha us nan naisurat kan hiya ay ngachana, ngem maid nangammu as nan laychun ay kanan nan naisurat mu achi yangkiay hiya. <sup>13</sup> Nunfiafiachu as kummayad ay naisiwsiw as chara, ya nan enpangachancha kan hiya at Kalen Apo Dios.\* <sup>14</sup> Nan ongoongor ay sorchachu ay tatakuna ad chaya at inmun-unudcha kan hiya. Nunsasakaycha us as panukaw ay kafiayu, ya nunfiafiachucha as nacharos ay lopot ay panukaw. <sup>15</sup> Nan chiyuy nangadnan as Kalen Apo Dios at wachay tachum ay espada ay fomokfoknag as tapakna ay iyamisna henan am-in ay nasyon. As nan mangetortorayanantu kan chicha, maid poros sugangna ay kamana epak-or nan lanchok as nan achi mamigfig as nan torayna. Epailanantu nan kauugyat ay fungat Apo Dios ay Mannakafialin as nan am-in, tay chusaunantu chicha ay kamana cha ikiatkiatin nan ubas ta fomoknag nan unusna. <sup>16</sup> As nan fiachuna ay kummayad ya urname at naisurat nan nauy ay ngachan:

“Ari as nan am-in ay ari ya Apo as nan am-in ay apo.”

<sup>17</sup> Angkiay ya inilak nan usa ay anghel ay nangatackhug as nan urkiw. Infukiawna as nan am-in ay kossel ay cha muntat-ayaw, “Akayu! Maamong kayu ay makekan as nan ongor ay naesakiana as nan sichantu Apo Dios para kan chakayu. <sup>18</sup> Omali kayu ta ischayu nan chiyuchu nunkatuy ay achor nan ar-ari, nan kakapetan ya sosorchachu, chiyuchu kafiayu ya nan chiyuchu ensasakaycha. Ô, ischayu nan nunkatuy ay achor nan am-in ay tataku ay mangachi kan Apo Dios ay chicha nan mafiafbiao or winnu fiakun, nangangatu winnu ap-apud.”

<sup>19</sup> Kun pay narpas chi, inilak ay nan chiyuy kauugyat ay animar ya nan ar-ari asna's luta ay kadwana nan sosorchachucha at naamongcha ta uycha kufiatun nan nunsasakay as nan munpupukaw ay kafiayu ya nan sosorchachuna. <sup>20</sup> Ngem natiliw nan kauugyat ay animar. Natiliw us nan achi tit-iwa ay pomapadtu ay nangeppappaila ad kasin as nakaskaschaaw ay sinyar as nan nunserserifiyana as nan chiyuy animar. Chatona ay sinyar nan enosarna ay nangallilaw as nan tataku ay namarkaan as nan markan nan kauugyat ay animar ya nunchaychayaw as nan enammaancha ay kapadpachongna. Chatona ay chuwa ay kutug ay matataku at naetap-orchu as nan apuy ay kaman fiayfiay chi ilana ay kawad-an nan asufre ay cha kumarkiarud. <sup>21</sup> Am-in us nan sosorchachucha at napatuycha as nan espada ay fomokfoknag as nan tapak nan nunsasakay as nan munpupukaw ay kafiayu. Nan am-in ay kossel at kenakenancha nan nunkatuy ay achor chatosa inkiana nasufusufucha.

## 20

### Nan Hinlifu Ay Tawwun

<sup>1</sup> Kun pay narpas chi, inilak nan usa ay anghel ay cha komnop ay nurpu ad chaya. Inuunnana nan torfek nan lukiar ay kaman fitu ay maid papugna ya nan chagsun ay kor-ong. <sup>2</sup> Chinpapna nan tabfiad ya kenor-ongana hiya inkiana marpas nan hinlifu ay tawwun. Nan tabfiad at hiya nan nunpaila

\* <sup>19:13</sup> Isa. 63:3; Jn. 1:1

ay urug ad pus-uy ay nangadnan as Diablo winnu Satanas.\* <sup>3</sup> Angkiay inchus-ornan henan lukiar ay kaman fitu ay maid papugna, at tenorfekana ya menarkaana nan unub ta maid atun Satanas ay uy mangallilaw as nan tataku henan chiyuycha nasyon inkiana marpas nan hana hinlifu ay tawwun. Kun pay marpas chi, masapor mailufus hiya as hen-omaketan yangkiay.

<sup>4</sup> Angkiay ya inilak nan chiyuycha trono ay nangatokoran nan chiyuycha naettan as kalibfengan ay mun-okóm. Inilak us nan lenawan nan chiyuycha napatpatuy kiapú as nan nangepaneknekancha as nan sursuru ay enpakaammon Jesus ya nan kalen Apo Dios. Chicha nan chaan nun-chaychayaw as nan kauugyat ay animar ya as nan enammaancha ay kapadpachongna, ya chaan us nunpamarka as ketongcha winnu limacha as nan markana. Natakucha, at naketoraycha kan Cristo as hinlifu ay tawwun.

<sup>5</sup> Hiyana nan omona ay matakawan manipud as nan utúy. Nan tapina ay natuy at chaancha natakua inkiana marpas nan hinlifu ay tawwun. <sup>6</sup> Nan chiyuycha maetapi as nan omona ay matakawan chi nunkatuy manipud as nan utúy at nakiasatcha ya maifilangcha as nasantowan ay tatakon Apo Dios. Achichantu poros makilikiat as nan anongos ay utúy. Kuncha at munfialintu as papachi ay munserserfi kan Apo Dios ya kan Cristo, ya maketoraychantu kan Cristo as hinlifu ay tawwun.

#### *Nan Naamisan Satanas*

<sup>7</sup> As nan marpasan nan hinlifu ay tawwun, mailufus hi Satanas as nan naiflafiaruchana, <sup>8</sup> at uyna allilawun nan makali un Gog ya Magog ay chicha nan am-in ay nasyon asna's luta. Amonguna chicha am-in ta uycha makikufiat. Nan kaongorcha at kaman as nan kaongor chi lakian henan olet nan fiayfiay. <sup>9</sup> As nan hiyachi, naiwarascha henan intiru ay luta, at liniwuscha nan siyudad ay laylaychun Apo Dios ay mamagyanan nan tatakuna. Ngem kalina at ya wacha nan nurpú ad chaya ay apuy ay namuor kan chicha. <sup>10</sup> Angkiay ya nan Diablo ay nangallilaw kan chicha at naetap-or as nan apuy ay kaman fiayfiay chi ilana ay kawad-an nan cha kumarkiarud ay asufre. Hid-i nan naetap-oran nan kauugyat ay animar ya nan achi tit-iwa ay pomapadtu, ya hid-i us nan mapalikiatananchantu in-inkiana as inurkiw ya lenafi.

#### *Nan Anongos Ay Mun-okomán Apo Dios*

<sup>11</sup> Kun pay narpas chi, inilak nan ad-acha ay munpupukaw ay trono ya nan nangatokor hid-i. Angkiay ya nan luta ya nan wacha ad chaya at namaidcha ay kamancha enlayawan hiya, ya achicha kasin mail-ila. <sup>12</sup> Inilak us nan chiyuycha nunkatuy ay nangangatu ya ap-apud ay tataku ay nangatachchug as nan sangwanan nan tronon Apo Dios. As nan hiyachi, naftilag nan chiyuycha liblu. Naftilag us nan tukún pay ay liblu ay naisuratan nan ngadngachan nan chiyuycha wachay fiyagcha ay maid patingkiana. Naokóm nan nunkatuy ay maiyunud as nan en-enatcha ay naisurat as nan chiyuycha liblu ay naftilag. <sup>13</sup> Angkiay ya enpafoknag nan fiayfiay nan nunkatuy ay wacha kan hiya. Enpafoknag us nan Utúy ya Hades ay kawad-an nan nunkatuy nan wacha kan chicha, at naokómcha am-in ay naiyunud as nan en-enatcha. <sup>14</sup> Kun pay narpas sa, naetap-or nan Utúy ya nan Hades as nan apuy ay kaman fiayfiay chi ilana. Hiyana nan makali un anongos ay utúy. <sup>15</sup> Nan tataku ay maid ngachancha ay naisurat as nan liblu ay naelestaa

---

\* **20:2** Isa. 24:22; 2 Ped. 2:4; Jud. 6

nan chiyuycha wachay fiyagcha ay maid patingkiana at maetap-orchantu as nan apuy ay kaman fiayfiay chi ilana.

## 21

### *Nan Fiarú Ay Chaya Ya Nan Fiarú Ay Luta*

<sup>1</sup> Kun pay narpas chi, inilak nan fiarú ay chaya ya nan fiarú ay luta, tay namaidcha at nan emmona ay chaya ya luta, ya namaid us nan fiayfiay. <sup>2</sup> Inilak us nan nasantowan ay siyudad ay hiyasa nan fiarú ay Jerusalem ay cha komnop ay nurpu kan Apo Dios ad chaya. Nakasakiana ay kaman as nan chumuyas ay fiafiai ay nunfiafachu as am-ammay ay uy manib-at as nan mangasawa kan hiya. <sup>3</sup> Chinngorku us nan usa ay napigsa ay kali ay nurpu as nan trono ay kanana, "Ilaunyu! Nan magyanan Apo Dios at as nan kawad-an nan tataku. Makepagyantu hiya kan chicha, ya chicha nan tatakuna. Mawawachantu hiya kan chicha, ya hiya nan Dioscha. <sup>4</sup> Punasanantu nan am-in ay luwacha. Maidtu poros kasin matmatuy winnu ngumunguyus winnu mun-ag-akor winnu putputug, tay am-in chaná ay sikud ay wacha at namaidcha."

<sup>5</sup> Angkiay ya kenalen nan nangatokor as nan trono, "Ilaunyu, fumayangak as am-in ay ka-ichin." Kenalina us kan ha-un, "Isuratmu nan nauycha ifi-akiak, tay tit-iwa ya siguradu ay maekaman chaná." <sup>6</sup> Kenalina pay, "Narpas at chaná am-in! Ha-un nan makali un Alfa ya Omega, nan munlapuwan ya nan munpatingkiaan chi am-in.\* Ichatku as nan nasketan ay taku nan libri ay chanum ay nurpu as nan ugwor ay umichat as fiyag ay maid patingkiana.

<sup>7</sup> "Nan taku ay mangamis as nan mangotettet at tawichuna am-in chaná. Ha-untu nan Diosna, ya hiya nan anakkku. <sup>8</sup> Ngem nan tataku ay umugyat ay mangepaneknek as pammaticha, nan chiyuycha mankug as pammaticha, nan chiyuycha mangekamkaman as assi, nan chiyuycha pomapatuy, nan chiyuycha nangeappapas as assi ay lachokcha, nan chiyuycha munsarsaromangka, nan chiyuycha munchaychayaw as didiosen ya nan am-in ay nunkangutum at machusachantu am-in as nan apuy ay kaman fiayfiay chi ilana ay kawad-an nan kumarkiarud ay asufre. Hiyana nan makali un anongos ay utúy."

### *Nan Fiarú Ay Jerusalem*

<sup>9</sup> Kun pay narpas chi, enmali kan ha-un nan usa as nan pitu ay anghelos ay kawad-an nan chiyuycha pitu ay mallokong ay naiittuwan nan pitu ay anongos ay kauugyat ay pomatuy, ya kanana, "Aka ta epailak kan he-a nan fiafiai ay asaw-un nan Kordero." <sup>10</sup> Angkiay ya pinmigsa nan pannakafialin nan Espiritu Santo kan ha-un, ya inuyak as nan anghel as nan toktok nan nangatungatu ay chuntug. Hana at epaila kan ha-un nan nasantowan ay siyudad ay Jerusalem ay cha komnop ay nurpu kan Apo Dios ad chaya.

<sup>11</sup> Nan kaichayawan Apo Dios nan mangepakelat henan siyudad. Munkelat ay kaman as nan munliyaw ay naflaror ay fiatu ay makali un haspe ya munmallag ay kaman kristal. <sup>12</sup> Nan tuping ay hiyasa nan arad nan siyudad at nangatungatu ya kunug. Wacha nan hinpuru ya chuwa ay sugpan ay nakchang as hin-us-a ay anghel ay namafiantay. As nan tunggal sugpan at naisurat nan usa as nan chiyuycha ngachan nan hinpuru ya chuwa ay kianak Israel. <sup>13</sup> Nan turu ay sugpan at as apét fomokfoknakian nan urkiw. Nan turu at as apét senakiangan. Nan turu pay at as apét filáng, ya nan turu us at as apét nan mauy-uynuwan nan urkiw. <sup>14</sup> Nan naipugnad as nan arad

\* **21:6** Pal. 1:8

nan siyudad at hinpuru ya chuwa ay anad-acha ay fiatu. As nan tunggal fiatu at naisurat nan usa as nan chiyuycha ngachan nan hinpuru ya chuwa ay apostoles nan Kordero.

<sup>15</sup> Nan anghel ay nunkali kan ha-un at wachay inuunnana ay fialetok ay panglukudna henan siyudad ay ansa, as nan chiyuycha sugpan ya as nan tupingna. <sup>16</sup> Nan kaanchon nan siyudad at munpachong as nan karawana. Kun pay linkud nan anghel nan siyudad as nan pangluklukudna, chuwa ay lifu ya opat kiasot ay kilometro nan kaanchuna ya kaman us nan karawana ya katakchugna. <sup>17</sup> Linkudna us nan tuping at unum puru ya unum ay metro nan katakchugna. Nan pangluklukud ay enosar nan anghel at munpachong as nan iluklukud chi taku. <sup>18</sup> Nan tupingna at naamma as haspe, ya nan siyudad at naamma as puru ay fialetok ay munmallag ay kaman sarming. <sup>19</sup> Nan chiyuycha fiatu ay naipugnad as nan tuping nan siyudad at naarkosan as tukutukún ay karasen chi nafiaror ay fiatu. Nan omona ay pugnad at naarkosan as haspe; nan maekadwa at safiro; nan maekatlu at kalsedonia; nan maekap-at at esmeralda; <sup>20</sup> nan maekalema at sardonika; nan maekandum at karnelia; nan maekapitu at krisolito; nan maekawaru at berilo; nan maekasiyam at topasio; nan maekapuru at krisoprasio; nan maekapuru ya usa at hasinto, ya nan maekapuru ya chuwa at amatista. <sup>21</sup> Nan hinpuru ya chuwa ay sugpan at naamma as hin-us-a ay perlas. Nan korsan nan siyudad at naamma as puru ay fialetok ay munmallag ay kaman sarming.

<sup>22</sup> Maid inilak as templo henan chiyuy siyudad, tay hi Apo Dios ay Mannakafalin as nan am-in ya nan Kordero nan templo hid-i. <sup>23</sup> Achi us masapor chi urkiw ya furan henan siyudad, tay nan kaichayawan Apo Dios nan manilaw assa ya nan Kordero nan silawna. <sup>24</sup> Nan am-in ay tataku henan chiyuycha nasyon at masilawancha as nan lawagna, ya am-in ay ar-ari asna's luta at iskopcha nan kenafiaknangcha hid-i. <sup>25</sup> Kanayon ay mamatkafian nan am-in ay sugpan nan siyudad as nan kaorkia, tay maid poros lafi hid-i. <sup>26</sup> Maiyuytu hid-i nan chiyuycha kaammayan ay ka-ichin ya kenafiaknang nan tataku henan am-in ay nasyon. <sup>27</sup> Ngem achi poros makaskop hid-i nan infilang Apo Dios as naruket ay kaman as nan mangekamkaman as kaiisiw winnu munkutkutum. Nan chiyuycha yangkiay naisurat nan ngachancha as nan liblon nan Kordero ay naelestaan nan wachay fiyagna ay maid patingkiana nan makaskop.

## 22

<sup>1</sup> Kun pay narpas chi, enpailan nan anghel kan ha-un nan wawwang ay murpuwan chi chanum ay umichat as fiyag. Munmallag nan chanumna ay kaman kristal ay cha fomokfoknag as nan tronon Apo Dios ya nan Kordero\* <sup>2</sup> ay cha omay-ayas as nan kiawan nan korsa henan siyudad. As nan nunchuchumang ay olet nan wawwang, wacha nan tinmutufu ay kaiw ay fumkias ay umichat as fiyag. Fumkiascha as mamen hinpuru ya chuwa as nan makatawwun, at finuran ay fumkias. Nan forongcha at pang-akias as saket nan tataku henan am-in ay nasyon.<sup>†</sup> <sup>3</sup> Maidtu poros maanapan henan siyudad as nan chiyuycha intuchor Apo Dios.

Nan wacha henan nauy ay siyudad at nan tronon Apo Dios ya nan Kordero. Nan chiyuycha munserserfi kan Apo Dios at wachacha hid-i ay cha munchaychayaw kan hiya. <sup>4</sup> Ilauchantu nan lupana, ya maisurattu as

\* <sup>22:1</sup> Zac. 14:8; Jn. 4:10-14; Pal. 7:17; 22:17    † <sup>22:2</sup> Gen. 2:9; Pal. 2:7; 22:14, 19

ketongcha nan ngachana. <sup>5</sup> Maidtu at poros lafi. Achichantu masapor chi silaw winnu urkiw, tay hi Apo Dios nan silawcha, ya maketoraychantu kan hiya in-inkiana.

### *Nan Kasin Omaliyan Apo Jesus*

<sup>6</sup> Angkiay ya kenalen nan anghel kan ha-un, “Siguradu ay maekaman ya tit-iwa am-in chaná ay naifiakia kan he-a. Tay hi Apo Dios ay nangichat as Espirituna as nan chiyuycha pomapadtuna at hiya challu nan nangifiaor as nan anghelna ay mangepakaammu as nan chiyuycha munserserfi kan hiya nan masapor ommat as nan achi mafayag.”

<sup>7</sup> Kenalen Jesus, “*Chumngor kayu! Kiayuchak omali! Nakiasat nan chiyucha mangafurot as nan chiyuycha naepadtu as nan nauy ay liblu.*”

<sup>8</sup> Ha-un hi Juan ay nanngor ya nangila kan chatona ay naisurat as na. As nan nanngorak ya nangil-ak, nunlukfufiak as nan sangwanan nan anghel ay nangepaila kan ha-un as nan hanacha naisurat ta chayawok koma hiya.

<sup>9</sup> Ngem kenalina kan ha-un, “Achim atun sa! Hi Apo Dios yangkiay nan chayawum! Tay usaak us ay munserserfi kan Apo Dios ay kaman kan he-a, ya as nan ib-am ay pomapadtu ya kaman as nan am-in ay mangafurot as nan naisurat as nan nauy ay liblu.”

<sup>10</sup> Kenalina pay kan ha-un, “Achim ikinkinak ay mangifiakia as nan neapadtu ay naisurat as nan nauy ay liblu, tay kiayud nan ommatana.

<sup>11</sup> Uray mu kiayud ommat, nan chiyuycha mangekamkaman as mangotettet ya kaiisiw at chacha ituruturuy nan panagfiyagcha ay mangotettet ya kaiisiw. Nan chiyuycha mangekamkaman as ammay ya nan mangun-unud as nan nasantowan ay panagfiyag at masapor iturturuycha nan assena ay panagfiyag.”

<sup>12</sup> Kenalen Jesus, “*Chumngor kayu! Kiayuchak omali! As nan omaliyak, iyalektu nan gun-guna ay ichatku as nan tunggal usa ay maiyunud as nan en-enatna.*” <sup>13</sup> *Ha-un nan makali un Alfa ya Omega, ya nan Omona ya nan Anongos. Ha-un nan munlapuwanyan munpatingkiaan chi am-in.*”

<sup>14</sup> Nakiasat nan chiyuycha munlafia as fiachucha. Mu hiyasa nan atuncha, mawad-ancha as kalibfengan ay sungkop as nan sugpan nan siudad, ya mangan as nan fukias nan kaiw ay umichat as fiyag. <sup>15</sup> Ngem achicha makaskop hid-i nan chiyuycha mangekamkaman as mangotettet ay maepachong as nan atap ay asu, nan chiyuycha munsarsaromangka, nan chiyuycha mangepappapas as assi ay lachok ya nan chiyuycha pomapatuy, nan manaychayaw as didiosen, ya nan am-in ay nunkangutum as nan kalicha ya chacha at-atun.

<sup>16</sup> *“Ha-un hi Jesus ay nangifiaor as nan anghelku ay mangepaneknek as nan nauycha am-in as nan chiyuycha iglesia. Ha-un nan kianak David, ya nan napigsa ay taraw as nan wi-ewi-et.”*

<sup>17</sup> “Omalika,” kanan nan Espiriton Apo Dios ya nan tatakuna ay maepachong as nan fiafiai ay asaw-un nan Kordero.

Nan am-in ay mangchungor as nan nauyucha at kanana us un “Omalika.”

O-a, nan taku ay masketan ya nan taku ay manglayad ay umikop at omali koma ay umikop as nan libri ay chanum ay umichat as fiyag.

### *Nan Anongos Nan Surat*

<sup>18</sup> Ha-un hi Juan. Fiag-ak chakayu am-in ay nanngor as nan chiyuycha naepadtu ay naisurat as nan nauy ay liblu. Mu wachay manaptapi as nan naisurat as na, etapintu us Apo Dios as nan chusana nan chiyuycha kauugyat

ay pomatuy ay naisurat as nan nauy ay liblu. <sup>19</sup> Mu wacha us nan mangaket as nan chiyuycha naepadtu ay naisurat as nan nauy ay liblu, kaanuntu us Apo Dios nan kalibfengana ay makifingay as nan fukias nan kaiw ay umichat as fiyag ya nan kalibfengana ay makeafong henan nasantowan ay siyudad ay naifiakia as nan nauy ay liblu.

<sup>20</sup> Nan mangepanekek ay tit-iwa am-in chaná at kanana: “*Tit-iwa ay kiayuchak omali!*”

Amen! Apo Jesus, omalika!

<sup>21</sup> Sapay koma ta mawawacha kan chakayu am-in ay tatakon Apo Dios nan grasyan Apo Jesus. Amen.